


Chyoiyúng
chyumlaiká:
dangshikaq asik; Zaiwa



New Testament in Zaiwa

Contents

Mahte	1
Markuq	48
Lukaq	78
Yohan	128
Lagyo	166
Romaq	211
1 Korinhtuq	232
2 Korinhtuq	252
Galatiq	266
Ehpesu	273
Hpilipi	280
Kolose	285
1 Htesaloni	290
2 Htesaloni	295
1 Timohti	298
2 Timohti	304
Tituq	308
Hpilemon	311
Hebre	312
Yakuq	328
1 Petruq	334
2 Petruq	340
1 Yohan	344
2 Yohan	350
3 Yohan	351
Yude	352
Shing-rán	354

Chyoiyúng chyumlaiká: dangshikaq asik; Zaiwa
New Testament in Zaiwa

copyright © 2009 [Wycliffe Bible Translators, Inc.](#)

© 2009, Wycliffe Bible Translators, Inc. All rights reserved.

Language: [Zaiwa](#)

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you [contact us](#) with your request.

Printed book ISBN 9781921445408

The New Testament

in Zaiwa

This translation is made available to you under the terms of the [Creative Commons Attribution-noncommercial-no derivatives license](#). You have permission to port the text to different file formats, as long as you don't change any of the text or punctuation of the Bible.

You may share, copy, distribute, transmit, and extract portions or quotations from this work, provided that:

You include the above copyright information.

You do not sell this work for a profit.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated on 30 Jan 2016 from source files dated 30 Jan 2016

23f9fc55-a8a4-59ef-9513-707ec336b0ee

MAHTE
é Gabú Danglù Laiká
(The Gospel of Matthew)

Yesuq É Byùxik Shap Kyô É Hkyô
Luk 3:23-38

¹ Abraham é awut ashín, Dawiq é yhangzo yhangshu,* Yesuq Hkrisduq é byùxik labaû gi, a-ô mâ é eq rajung za nghut lhê.

² Abraham gi, Isak lé hkû;
 Isak gi, Yakup lé hkû;
 Yakup gi, Yudaq eq yhanggu yhangmâng pé lé hku é nghut lhê;

³ Yudaq gi, Hparet eq Zera lé hkû, haú nhik é yhangnu gi, Tamar nghut ri.
 Hparet gi, Hesrun lé hkû;

Hesrun gi, Ram lé hkû;
⁴ Ram gi, Aminada lé hkû;
 Aminada gi, Nashon lé hkû;
 Nashon gi, Salamun lé hkû;

⁵ Salamun gi, Buaq lé hkû;
 Buaq é yhangnu gi, Rahap nghut ri.
 Buaq gi, Obet lé hkû;
 Obet é yhangnu gi, Ruhtaq nghut ri.
 Obet gi, Yese lé hkû;

⁶ Yese gi, Hkohkâm Dawiq lé hkû;
 Dawiq gi, Sholumon lé hkû; Sholumon é yhangnu gi, Uriaq yhangmyi dut wú sù nghut ri.

⁷ Sholumon gi, Rehoboam lé hkû;
 Rehoboam gi, Abiyaq lé hkû;
 Abiyaq gi, Asa lé hkû;

⁸ Asa gi, Yehoshaphat lé hkû;
 Yehoshaphat gi, Yoram lé hkû;
 Yoram gi, Uzi-aq lé hkû;

⁹ Uzi-aq gi, Yohtam lé hkû;
 Yohtam gi, Ahaza lé hkû;
 Ahaza gi, Hezekiaq lé hkû;

¹⁰ Hezekiaq gi, Manase lé hkû;
 Manase gi, Amon lé hkû;
 Amon gi, Yosiaq lé hkû;

¹¹ Yosiaq gi, Babelon má shúm dut huí é hkûn, Yehkoniasq eq yhanggu yhangmâng pé lé hku é nghut ri.

¹² Babelon má shúm dut huí é htâng má, Yehkoniasq gi, Shalahtila lé hkû;

Shalahtila gi, Zerubabelaq lé hkû;

¹³ Zerubabelaq gi, Abiut lé hkû;

Abiut gi, Eliakim lé hkû;

Eliakim gi, Azor lé hkû;

¹⁴ Azor gi, Zaduk lé hkû;

Zaduk gi, Ahkim lé hkû;

Ahkim gi, Eliut lé hkû;

¹⁵ Eliut gi, Eliaza lé hkû;

Eliaza gi, Mahtan lé hkû;

Mahtan gi, Yakup lé hkû;

¹⁶ Yakup gi, Mariq é yhanglâng Yosep lé hku é nghut ri;

Mariq gi, Hkrisduq gâ é Yesuq lé hku é sù nghut ri.

¹⁷ Haú mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

Yesuq Hku Lé Lo É Hkyô

Luk 2:1-7

¹⁸ Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhangnu Mariq gi, Yosep eq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogûng dut bê nghut ri. ¹⁹ Yhâng é yhumsîng hpó Yosep gi, dingmán sù nghut luí, yhang lé byu pê hí má hoq a kâm lhoq hpu nau é yanmai, tsik za lhoq kâng pyám râ dâ ri.

²⁰ Nghut kôlhang, yhang haú su myit nyi é hkûn, yhupmoq má, haú Yhumsîng é maumang lagyo gi, yhang lé, lé htoq shit luí, "Dawiq é yhangzo yhangshu Yosep ê, haú náng é yhumsîng myhí Mariq lé hâng yù râ hkyô lé, hkâ-myit chiq; haí mù gâ le, yhang wun tô é zoshâng gùng gi, Chyoiyúng Woi-nyí dông lo é nghut lhê. ²¹ Yhang gi, yuqzo rayuq hkû râ nghut luí, nàng gi, zoshâng haú lé, Yesuq nghú myìng myhíng byi ra râ nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù râ sù nghut lhê." ga tâi ri.

²² Shí hkyô banshoq gi, Garai Gasâng èq, haú myiqhtoi dông tâi é dang lé lhoq dik é nghut ri. ²³ Myiqhtoi dang haú gi,

* 1:1 Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê. † 1:17 Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê.

"Haû zomyi gyíng gi, zogûng dut luí, yuqzo rayuq hkû râ nghut lhê; Yhâng é myíng lé gi, Emanuelaq ga kó râ nghut lhê." ✧ gâ ri. Hau é lichyúm gi, "Garai Gasang gi, nganhúng eq rahá nghut nyi lhê." gâ é nghut lhê.

²⁴ Yosep gi, yhup bûn lo é hkûn, haû Yhumsing é maumang lagyo taí é eq rajung za, Mariq lé, yhangmyi dông yhûm má shuí yù bê nghut ri. ²⁵ Nghut kôlhang, yhang gi, yuqzo haû hku é hkûn jé shoq, Mariq eq gungsho a zùm nghut ri. Yuqzo haû lé, yhang gi, Yesuq ga myhíng byî ri.

2

Buihtoq Hkyam Mâ É Hpaqchyî Bò Bang

¹ Herut hkohkâm up nyi é u lé, Yuda mau mâ é Betlehem wà má Yesuq lé hku é nghut ri. Hau htâng, buihtoq hkyam mâ é hpaqchyî bò bang gi, Yerusalem wà mó má jé lé kômù, ² "Haû hku lé lô bê Yudaq byu pê é Hkohkâm gi, hkâmá nghut lhê lú? Yhâng é kyî lé, buihtoq hkyam má ngamoq myàng luí, Yhang lé noq râ matú jé lé é nghut lhê." ga luí, myî akô nghut ri.

³ Herut hkohkâm gi, haû hkyô lé wó gyo jáng myit myô nyi ri; hau htoq agó, Yerusalem wà mó mâ é lhunglhâng bang le, myit myô bum akô nghut ri. ⁴ Haû mù luí, yhang gi, byu pê é hkyangjong agyi pé eq tarâ sará pé banshoq lé, ji tsíng yù mù, haû Hkrisduq hkâmá hku lé lô râ nghut é hkyô lé myî ri. ⁵ Haû hkûn, yhangmoq gi, "Yuda mau Betlehem wà má nghut lhê. Hkâsu mù gâ le, shí hkyô eq séng luí, haû myiqhtoi kâ tô é má,

⁶ "Yudaq mau mâ é Betlehem wà ê, nàng gi, Yudaq mau mâ é wà pé má, je tiq sú a nghut;

hkâsu mù gâ le, ngá é Israelaq byu pé lé upzúng râ Zau gi, náng chyáng mai htoq lô râ nghut lhê." ✧ ga bo tô ri." ga tû taí akô.

⁷ Hau htâng, Herut gi, haû hpaqchyî bò bang lé haq ji yù mù, kyî lé htoq shit é ahkyíng lé, yhangmoq chyáng mai hkyak wó myî sê yù bê nghut ri. ⁸ Haû mù, yhang gi, "Nungmoq, zoshâng haû lé rago ê ho wú keq. Ngò le, Yhang lé ê wó noq râ matú, Yhang lé nungmoq é myâng eq yhang, ngo

lé lo shit kyo keq." ga taí luí, haû bang lé Betlehem wà shut nhang kat bê nghut ri.

⁹ Yhangmoq gi, haû hkohkam é dang lé gyô yu é htâng má, htoq e ló bekô nghut ri. Haû buihtoq hkyam má yhangmoq myang é kyî gi, haû zonú nyi é ahtoq ang ang má ló nô é jé shoq, yhangmoq é hí má e ló byî ri.

¹⁰ Yhangmoq gi, kyî haû lé myàng jáng, gyai yhang gabú bum akô nghut ri. ¹¹ Yhangmoq gi, haû yhûm má wang e ló kô é hkûn, zonú eq yhângnu Mariq lé myàng kômù, hkyihput htuq luí, haû zonú lé noquq akô; hau htâng, yhangmoq é sutdek pé lé le hpóng luí, hîng, namngón jung loban eq mura* pé lé yù mù, Yhang lé chyunghuq byî akô nghut ri. ¹² Yhangmoq gi, Herut chyáng a dum taú ló râ matú, yhupmoq má, yhangmoq lé sidiq byî é hui kômù, hkyô gó hkat dông yhangmoq é mau shut taú ló bekô nghut ri.

Egutuq Ming Shut H pang E É Hkyô

¹³ Yhangmoq ló byuq é htâng má, haû Yhumsing é maumang lagyo rayuq gi, Yosep lé yhupmoq má htoq shit mù, "Toq aq! Haû zoshâng eq yhângnu lé, Egutuq ming shut shuí hpang ê aq. Ngò, nang lé dum ji yu é ahkyíng jé shoq, haû má nyi nyi keq. Haí mù gâ le, Herut gi, zoshâng haû lé sat râ matú, ho nyi bê nghut ri." ga taí ri.

¹⁴ Haû mù, yhang gi, toq luí, myín lé yhang, zôshang me lé shuí chûng mù, Egutuq ming shut e ló bê nghut ri.

¹⁵ Yhangmoq gi, Herut shi é jé shoq, haû má nyi nyi akô. Haû gi, "Ngá zo lé, ngò, Egutuq ming mai wut htoq yù bê nghut lhê." ✧ ga, haû Yhumsing eq myiqhtoi dông taí é dang lé lhoq dik é ru nghut lhê.

¹⁶ Herut gi, yhang lé, hpaqchyî bò bâng eq mhaû pyâm tô é lé sé jáng, nhikmo-yo bê nghut ri; haû mù, yhang gi, haû hpaqchyî bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayâm mâ é wà pé má nyi é, í zân mai a-ô mâ é yuqzo pé banshoq lé, sat pyám nhang ri. ¹⁷ Haû gi,

"Ramaq gâ é jowò má, yón kuq é eq ngau garú é htê lé wó gyô ri;

✧ 1:23 Esai 7:14 ✧ 2:6 Mihka 5:2 * 2:11 Mura gi, chí wó kut jung xû nghut lhê. ✧ 2:15 Hos 11:1 ✧ 2:17 Yer 31:15

Rahkelaq gi, yhang zô pé a nyi byuq lo kô é yanmai, ngau nyi é eq nhik a wó tíng dut ri."✠
ga luí, ¹⁸ myiqhtoi Yereimiaq dông taí tô é dang lé lhoq dik é nghut ri.

Nazaret Wà Má Dum Taú Lo É Hkyô

¹⁹ Herut shi byuq é htâng, Egutuq ming má, haú Yhumsing é maumang lagyo gi, Yosep chyáng yhupmoq dông lé htoq shit mù, ²⁰ "Toq aq, haú zôshang me lé shuí chûng mù, Israelaq ming má taú ló aq; hkâsu mù gâ le, haú zoshâng lé sat naú bang shi byuq bekô nghut ri." ga taí ri.

²¹ Haú mù, Yosep gi, zôshang me lé shuí chûng mù, Israelaq ming shut taú ló bê nghut ri. ²² Nghut kôlhang, yhang gi, Yuda mau má, Arhkela-uq, yhangwa Herut é hkó má xoq up nyi é hkyô lé wó gyo jáng, haú má a wám ló lo nghut ri. Yhupmoq má sidiq byí é huí é eq rajung za, yhang gi, Galile mau shut e ló mù, ²³ Nazaret gâ é wà má ló nyi nyi bê nghut ri. Haú mù, "Yhang lé, Nazaret wà byù ga râ nghut lhê." ga luí, haú myiqhtoi pé dông taí tô é dang lé lhoq dik é nghut ri.

3

Wui-myhup Sará Yohan Shui Hen É Hkyô

Mrk 1:1-8; Luk 3:1-18; Yhn 1:19-28

¹ Haú yoq má, Wui-myhup Sará Yohan htoq lô mù, Yuda mau mâ é yoso má hko kyô é gi, ² "Myit lhîng keq; hkâsu mù gâ le, mauhkûng mingdán gi, chyâng lò bê* nghut ri." gâ ri. ³ Haú yuq gi, "Haú yoso má, byù rayuq garû taí é htê gi, 'Haú Yhumsing é matú, hkyô hen to keq; Yhâng é matú, hkyô lhoq nyhang to keq.' gâ ri."✠
ga myiqhtoi Esai-aq taí tô é sù yuq nghut ri.

⁴ Yohan gi, gola-uq shomaú èq saí é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosô byo-î pé nghut ri. ⁵ Yerusalem wà mó mâ é bang, Yuda mau banshoq mâ é bang eq Yodan làng awui ayàm lhunglhang mâ é bang gi, yhâng chyáng htoq e bum akô. ⁶ Yhangmoq gi, yhumsing é mara lé yín yú kôluí, yhâng chyáng mai Yodan làng má wui-myhup hkâm yu bum akô nghut ri.

* 3:2 Mauhkûng mingdán gi, chyâng lò bê gâ é lichyúm gi, Garai up râ ahkýing chyâng lò bê gâ é nghut lhê. ✠ 3:3 Esai 40:3

⁷ Nghut kôlhang, yhang gi, yhang wui-myhup hkâm byí é jang má, Hparishe pé eq Saduke pé myo myo lé lo nyi kô é lé myàng jáng, yhangmoq lé taí é gi, "Duq htân lhangmuí amyû pé ê, jé lô râ yubak dam mai wó hpanq lut kó sháng gaq ga, nungmoq lé ó yuq taí pûn é lhú? ⁸ Myit lhîng hkyô eq gingdán é ashi pé zui keq. ⁹ 'Ngamoq gi, Abraham é yhangzo yhangshú pé nghut lhê.' nghû luí, yhumsing é i-myit unghkaú má hkâlum to kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. ¹⁰ Ahkuí lhang, Garai Gasang gi, Yhâng é wazung lé haú siggâm wang pé má tô to bê nghut ri; haú mù, ge é ashi a zuí é agàm hkangmó lé gi, htuq lhêng pyám mù, myi má dú kat pyám râ nghut lhê.

¹¹ Ngò gi, nungmoq myit lhîng kó sháng gaq nghû, wui èq za wui-myhup hkâm byí lhê. Nghut kôlhang, ngá htoq má wum-o a-tsam je bo é sù rayuq, ngá htâng má jé lé lô shirâ nghut luí, ngò gi, Yhâng é hkyî-tsung chûng byi râ lhang a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi râ nghut lhê. ¹² Yhang gi, loq má byò chung to mù, guq chyârâng mâ é guq bùm lé hik sân pyám luí, já é guq cham lé gi, guqchyí má tsîng kat to mù, guqsôm lé kúm gi, hkânám le shi byuq a sê é myí èq nyhê hkyô pyám râ nghut lhê." gâ ri.

Yesuq, Wui-myhup Hkâm Yu É Hkyô

Mrk 1:9-11; Luk 3:21-22

¹³ Haú hkûn, Yesuq gi, Yohan chyáng wui-myhup hkâm yù râ ga, Galile mau mai Yodan làng má jé lé lo ri. ¹⁴ Nghut kôlhang, Yohan gi, "Ngò sheq Náng chyáng wui-myhup hkâm yù râ sù ru nghut lhê nhîng! Nàng sheq ngá chyáng lé lo lhê lhú?" ga luí, lhom taí hkûm ri.

¹⁵ Haú hkûn, Yesuq gi, "Dingmán hkyô banshoq lé, nga-nhúng lhoq dik râ é yanmai, Ngo lé wui-myhup hkâm byi laq." ga tû taí ri. Haú mù, Yohan le, gyo byi bê nghut ri.

¹⁶ Yesuq gi, wui-myhup hkâm yù eq yhang, wui mai htoq lo ri. Haú hkûn, mauhkûng bóng lô mù, Garai Gasang é

Woi-nyí gi, hpûngkyui gungghkyâng sù é dông mai, Yhâng ahtoq má lé gyó nô tô é lé, Yhang myang kat ri. ¹⁷ Haú hkûn, "Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

4

Yesuq, Gúnglaú Huí É Hkyô

Mrk 1:12-13; Luk 4:1-13

¹ Hau htâng má, Chyoiyúng Woi-nyí gi, Yesuq lé, nat Tsadán èq gunglaú é hui nhâng râ matú, yoso shut shuí ê ri. ² Yesuq gi, zoshuq gám é myi xê nyí myi xê myìn jé jáng, zòmút hui bê nghut ri. ³ Haú hkûn, gunglaú sù gi, Yhâng chyáng lé mù, "Nàng, Garai Gasâng é Yhangzo nghut le gi, luqgok shí pé lé muk dut nhâng aq." ga taí ri.

⁴ Haú jáng, Yesuq gi, "Byù gi, muk èq za asak duì râ a nghut; Garai Gasâng é nhut mai htoq lo é mungdang hkanmó èq sheq asak duì râ nghut lhê." ga luí, Chyúmdang má kê tô ri." ga yhang lé tû taí ri.

⁵ Haú hkûn, nat Tsadán gi, Yesuq lé, chyoyúng myuq* má shuí ê mù, noqkuq yhum je myhang é shùhtâng htoq má yap nhang to luí, ⁶ "Nàng, Garai Gasâng é Yhangzo nghut le gi, byam gyó kat wú aq. Hkâsu mù gâ le,

'Náng é matú, Garai Gasang gi, Yhâng é maumang lagyô pé lé taí to râ nghut mù,

luqgok má Náng é hkyî a ló htung shoq,

yhangmoq é loq èq Nang lé lhom bún yû kó râ nghut lhê." ga luí, Chyúmdang má kê tô ri." ga taí ri.

⁷ Nghut kôlhang, Yesuq gi, "Haú Yhum-sîng, nungmoq é Garai Gasang lé, wó chyam wú râ a nghut." ga luí le, Chyúmdang má kê tô ri." ga, yhang lé tû taí ri.

⁸ Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq haú pê é hkikhkâm hkyô lé tûn shit ri. ⁹ Hau htâng, yhang gi, "Nàng hkyihput htúq mù, ngo lé noq é nghut jáng, shí pé banshoq, Nang lé ngò byi râ." ga, Yesuq lé taí ri.

¹⁰ Haú hkûn, Yesuq gi, "Tsadán nàng, ló byuq aq! Hkâsu mù gâ le, 'Haú Yhumsîng

náng é Garai Gasang lé za, nàng noqkuq dojaú ra râ nghut lhê." ga luí, Chyúmdang má kê tô ri." ga, yhang lé taí ri.

¹¹ Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akô nghut ri.

Yesuq Mungdang Hko Hi Lô É Hkyô

Mrk 1:14-15; Luk 4:14-15

¹² Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taú ló bê nghut ri. ¹³ Yhang gi, Nazaret wà mai htoq ló mù, Zebulun eq Nahtali mau mâ é nhông yàm má joq é Kaperna-um wà má ló nyi nyi ri. ¹⁴ Haú gi, myiqhtoi Esai-aq laiká má,

¹⁵ "Zebulun mau eq Nahtali mau, wuimau mâ é hkyô, Yodan làng yàm, tûng-baù pé nyi é Galile mau ê,

¹⁶ mauchut hkaú má nyi nyi é bang, maubó mó lé myàng bê nghut ri;

shí wup hkaú má nyi to bâng é matú, maubó lô bê nghut ri." ga

ga kê tô é dang lé lhoq dik râ matú nghut ri.

¹⁷ Haú hkûn mai, Yesuq gi, "Myit lîng keq! Mauhkûng mingdán gi, chyâng lò bê nghut ri." ga, mungdang hko hi e ló bê nghut ri.

Yesuq É Chángzo Hí Dut Bang

¹⁸ Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dú nyi akô nghut ri.

¹⁹ Haú mù, Yhang gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí ri. ²⁰ Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

²¹ Yesuq gi, jowò haú mai xoq sô e ló le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhaí hkaú má gùn hpo nyi akô. Yhangnhik lé, Yesuq wut kat jáng, ²² yhangnhik gi, radá dâm, yhangnhik é yhângwa eq lhaí haú lé, tô pyâm to kôluí Yesuq htâng cháng bekô nghut ri.

☆ 4:4 Tarâ Pun 8:3 * 4:5 chyoyúng myuq gi, Yerusalem lé gâ lhê. ☆ 4:6 Hkya-on 91:11-12 ☆ 4:7 Tarâ Pun 6:16 ☆ 4:10 Tarâ Pun 6:13 ☆ 4:16 Esai 9:1-2

Nò Bang Lé, Yesuq Lhoq Gê Byî É Hkyô
Luk 6:17-19

²³ Yesuq gi, Galile mau ramau gón má htoq ê mù, tarajong pé má, mhoqshit luí, mauhkûng mingdán eq sêng é gabú danglù lé, hko kyo uchyang, byu pê chyáng mâ é nòhpyo ajung jung hui bang eq noli nojàng amyû myû dap bang lé, lhoq gê byî wún ri. ²⁴ Yesuq eq sêng é hkyô ludang gi, Suriq ramau gón má byo myín ló mù, byu pé gi, awáng nòhpyo ajung jung huí é bang, hkê-nhò jamjaú nyi é bang, nat gang wang júng é bang, mhúngtuq tuq é bang, gùngjum shi é bang lé, shuí lé lô kôluí, Yhang gi, haú bang lé lhoq gê byî ri. ²⁵ Galile mau, Dekapoli,† Yerusalem, Yuda mau eq, Yodan làng tû tap mâ é byù moq mó gi, Yesuq htâng châng bum akô nghut ri.

5

Hkungsô Wó É Tarâ
Luk 6:20-23

¹ Yesuq gi, byù moq mó lé myàng jáng, bùm má doq ló luí, ló zung tô ri. Haú hkûn, Yhâng é chángzô pé gi, Yhâng chyáng lé lô kôjáng, ² Yhang nhut hkum hpóng luí, yhangmoq lé mhoqshit é gi:

³ "Woi-nyí má, asho awui dut é bang gi, hkungsô wó nyi ri; hkâsu mù gà le, mauhkûng mingdán gi, yhangmoq é mingdán nghut nyi ri.

⁴ Myit iyon huí é bang gi, hkungsô wó nyi ri; hkâsu mù gà le, yhangmoq gi, nhik lhoq tîng é hui kó râ nghut lhê.

⁵ I-myt nú-nhâm é bang gi, hkungsô wó nyi ri; hkâsu mù gà le, yhangmoq gi, mingkan lé wó sîng kó râ nghut lhê.

⁶ Dingmán hkyô lé mut shit nyi é bang gi, hkungsô wó nyi ri; hkâsu mù gà le, yhangmoq gi, nhik dik shoq myàng zo kó râ nghut lhê.

⁷ Shogyo nhikmyin myit bo é bang gi, hkungsô wó nyi ri; hkâsu mù gà le, yhangmoq gi, shogyo nhikmyin yu é hui kó râ nghut lhê.

⁸ Myit sansêng é bang gi, hkungsô wó nyi ri; hkâsu mù gà le, yhangmoq gi, Garai Gasang lé myàng kó râ nghut lhê.

⁹ Nguingón hkyô sô xoq byî é bang gi, hkungsô wó nyi ri; hkâsu mù gà

le, yhangmoq gi, Garai Gasâng é yhangzô pé gà é hui kó râ nghut lhê.

¹⁰ Dingmán hkyô é yanmai zing-ri huí é bang gi, hkungsô wó nyi ri; hkâsu mù gà le, mauhkûng mingdán gi, yhangmoq é nghut nyi ri.

¹¹ Ngá é yanmai, byu pê èq, nungmoq lé rhoi é, zing-rî é, a teng a mán é đông agê ashop é dang amyû myû taí tso kô é hkûn, nungmoq hkungsô wó nyi ri. ¹² Nguingón gabú nyí keq, hkâsu mù gà le, nungmoq é matú kô é chyunghuq gi, mauhkûng mingdán má joq tô ri. Nungmoq é hí lhê é myiqhtoí pé lé le, yhangmoq gi, haú đông zing-rî laí lo wú bekô nghut ri.

Xo Eq Maubó

Mrk 9:50; Luk 14:34-35

¹³ Nungmoq gi, myidàm htoq mâ é xo nghut nyi lhê. Nghut kôlhang, xo gi, màn kân byuq jáng, haú lé hai èq dum wó lhoq ngam yù râ lhú? Shinggan shut dú pyám mù, byu pê èq nâng pyeq pyâm é mai lai luí, hai akyû le bò râ a nghut lo.

¹⁴ Nungmoq gi, mingkân é maubó nghut akô; bùm htoq mâ é myuq lé gi, wó nghop to râ a nghut. ¹⁵ Myibung lé tap mù, mûng èq nghop tô é ó a kut wú kó; haú su kut râ malaí, yhúmhmaú má lúng tô é bang yuq hkanmó myoq wó myàng râ matú, tsung-jang má kúm tsung to râ nghut lhê. ¹⁶ Haú eq rajung za, byu pé gi, nungmoq é ge é muzó pé lé byu-myàng luí, mauhkûng htoq mâ é nungmoq é Ìwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

¹⁷ Ngò gi, myiqhtoí pê é dang eq jep é tarâ lé lhoq hpoyq pyám râ matú, jé lé é nghut nhò hkâ-ngâm kó; haú pé lé lhoq dik râ matú sheq jé lé é ru nghut lhê. ¹⁸ Ngò, nungmoq lé teng za taí kôlé, mauhkûng eq myigùng byuq byuq le lháng, haú pé a ban lhoq dik dik gi, jep é tarâ mâ é tiq dik é dangjí eq myihkyet zo ralhúmháng byuq byuq râ a nghut. ¹⁹ Jep é tarâ shí pé mâ é tiq dik é dang rahkun lé lu lai luí, góbang lé le, haú su kut râ matú mhoq byî é sù ó yuq nghut kôle, mauhkûng mingdán má tiq dik sù gà é hui râ nghut lhê; nghut kôlhang, jep é tarâ shí pé lé châng kut luí, mhoq byi

† 4:25 Dekapoli gà é gi, Grik đông myuq raxê lé gà lhê.

sû kúm gi, mauhkûng mingdán má, hkik sú gâ é hui râ nghut lhê. ²⁰Ngò, nungmoq lé taí kôlé, nungmoq dingmán é hkyô má, haû Hparishe pé eq tarâ sará pé dingmán é htoq je a gyaú le gi, mauhkûng mingdán má, nungmoq wó wâng kó râ a nghut.

Byù Hkâsat

²¹'Byù hkâsat, ☆ sat é sù gi, jéyáng é hui râ nghut lhê' ga, hí hpyang lhê é bang lé taí tô é dang, nungmoq wó gyô wú bê nghut lhê.

²²Nghut kôlhang, Ngò, nungmoq lé taí kôlé, gumang rayuq yuq lé nhikjum yô é sù gi, jéyáng é hui râ nghut lhê. Hau htoq agó, gumang hpó lé, 'Byù gang' * ga taí é sù gi, Yudaq byin tú wapdoq má jéyáng é hui râ nghut lhê; 'Byù bam ê' ga wut é sù gi, ngaraí myi eq gingdán nyi ri.

²³Haû mù, hkungga gyap má, nàng hkungga nhông râ dâ é hkûn, náng é gumang rayuq yuq, nang lé mara hun é hkyô rajung jung joq é lé, myit bûn kat é nghut jáng, ²⁴náng é hkungga lé, haû hkungga gyap hí má tô pyâm to mù, náng é gumang hpó haû yuq eq hí nguingón hkyô ló yû lui sheq, hkungga lé nhông byi aq.

²⁵Nang lé yui tsuq sù gi, nang lé tarâ rûng má dé e ló é hkûn, hkyô má ru nghut nyi ashî u lé, yhang eq nguingón hkyô hí hàn yù aq. Haû a nghut jáng, haû yuq gi, nang lé, tarâ agyi chyáng ê ap pyám mù, haû tarâ agyi gi, nang lé htóng hkyô pyám râ matú, htóng suwún hpô é loq má ap pyám râ nghut lhê. ²⁶Ngò, nang lé teng za taí lé, yuichyîn haû a ban xap xap gi, htóng haû mai nàng wó htoq ló râ a nghut.

Su-myi Sulàng Lú É Hkyô Eq Séng Luî Mho-qshit É Dang

²⁷'Su-myi sulàng hkâlú' ☆ gâ é dang lé, nungmoq wó gyo wú bê nghut lhê. ²⁸Nghut kôlé, Ngò, nungmoq lé taí kôlé, myiwe rayuq lé shut nau é myit èq wú é sù gi, yhâng é myit hkaû má, myiwe haû yuq eq su-myi sulàng lú hkyô kut é sù nghut bê.

²⁹Haû mù, náng é loqyo myoq èq, nang lé mara kut shut nhang é nghut le gi, haû lé lap choq yû mù, dú pyám aq. Hkâsu mù gâ le, náng é ragùngdu gón ngaraí ming gyó râ htoq má, náng é gungsho rajung jung za htên byuq é nghut le gi, náng é matú je

ge ri. ³⁰Haû eq rajung za, náng é loqyo loq èq, nang lé mara kut shut nhang é nghut le gi, haû lé hpyit yû mù, dú pyám aq. Hkâsu mù gâ le, náng é ragùngdu gón ngaraí ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

Myi Làng Gâng É Hkyô Eq Séng Luî Mho-qshit É Hkyô

Mht 19:9; Mrk 10:11-12; Luk 16:18

³¹'Yhumsing é yhangmyi lé kâng é sù gi, lhoq kang laiká byi râ dut lhê.' ☆ gâ é dang joq lhê. ³²Nghut kôlhang, Ngò, nungmoq lé taí kôlé, myiwe dông mai làng shut é a nghut é za, yhumsing é yhangmyi lé kâng é sù gi, myiwe haû lé sulàng lú sù dut nhâng bê nghut ri; hau htoq agó, yhumsing yhanglâng eq gang bê myiwe lé hâng yu é sù le, su-myi lú é sù dut bê nghut ri.

Danggidiq

³³Hau htoq agó, 'Danggidiq a zùng hkâmû; Yhumsing lé byi tô é danggidiq eq rajung za cháng aq.' ga lui, hí hpyang lhê é bang lé, taí tô é dang lé nungmoq wó gyô wú bê nghut lhê. ³⁴Nghut kôlhang, Ngò, nungmoq lé taí kôlé, hai èq le hkâdakâm kó: mauhkûng lé lang lui le, hkâdakâm kó; hkâsu mù gâ le, haû gi, Garai Gasâng é zùng tanghkuq nghut lhê; ³⁵myigùng lé lang lui le, hkâdakâm kó; hkâsu mù gâ le, haû gi, Garaí é hkyî nang jang nghut lhê; Yerusalem lé lang lui le, hkâdakâm kó; hkâsu mù gâ le, haû gi, Hkohkâm mó é myuq nghut lhê. ³⁶Hau htoq agó, yhumsing é ulhûm èq le, hkâdakâm kó; hkâsu mù gâ le, xâm rahkat lé lhang hpyû shoq noq shoq, nàng wó kut é a nghut. ³⁷Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, taí aq; haû mai lai é gi, haû agè ashop su chyáng mâ é nghut ri.

Lató Hpuq É Hkyô

Luk 6:29-30

³⁸'Myoqjí matú myoqjí xap, zui matú zui xap' ☆ gâ é dang lé, nungmoq wó gyô wú bê nghut lhê. ³⁹Nghut kôlhang, Ngò, nungmoq lé taí kôlé, agè ashop kut é sù lé lató hkâhpûq. Náng é loqyo bowâm má pyuq byi sù lé, loqpaí hkyam le hkâm byi

☆ 5:21 Htoq Ló 20:13 * 5:22 Byù gang gâ é lé, Grik dông "Raka" gâ lhê. ☆ 5:27 Htoq Ló 20:14 ☆ 5:31 Tarâ Pún 24:1 ☆ 5:38 Htoq Ló 21:24

shi aq. ⁴⁰Byù rayuq yuq, nang lé mara tsuq mù, náng é buzo lé yu pyám byî é nghut jáng, bumó lé le, hkyut byi shi aq. ⁴¹Byù rayuq yuq, nang lé zik mù, radéng é nhâng jáng, yhang eq rahá í déng châng ê byi aq. ⁴²Nang lé dung sù lé, byi aq; náng chyáng mai chyí naû sù lé le, nunghtáng hkâlhik pyám.

Gyè Lé Chyitdap Râ É Hkyô

Luk 6:27-28, 32-36

⁴³Náng é chyangnâm mâ é bang lé gi, chyitdap mù, náng é gyè lé gi, a jú kut aq[✠] gâ é dang lé, nungmoq wó gyô wú bê nghut lhê. ⁴⁴Nghut kôlhang, Ngò, nungmoq lé táí kôlé, nungmoq gi, mauhkûng htoq mâ é nungmoq é Îwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyûdung byi keq; ⁴⁵hkâsu mù gâ le, Yhang gi, agè ashop bâng é ahtoq má le, gè bâng é ahtoq má le, bui tsô byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sù nghut ri. ⁴⁶Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó râ lú? Kang guq bang lháng, haû su kut lhê a nghut kó lú? ⁴⁷Hau htoq agó, nungmoq é gumang wuì lé za shi-kyâm kô le gi, nungmoq kut é muzó gi, góbâng htoq má haí wá laklaí râ lú? Tungbaù pé lháng haû su kut lhê a nghut kó lú? ⁴⁸Haû mù, mauhkûng htoq mâ é nungmoq é Îwâ gumjup é su, nungmoq le gumjup nyi keq.

6

Alu Byî É Hkyô

¹Nungmoq dingmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyi keq. Haû su kut é nghut jáng, mauhkûng htoq mâ é nungmoq é Îwâ chyáng mai, chyunghuq wó yû kó râ a nghut.

²Haû mù, haû gegùn labyoq kut bang gi, byu pé èq shigyaú é hui sháng gaq ga, tarajong pé hká, hkyô pé hká kut é su, nàng gi, alu byî é hkûn, tut htê su hkâlhoq htoq. Ngò, nungmoq lé teng za táí kôlé, haû bang gi, yhangmoq é chyunghuq lé hkúm shoq wó yû bekô nghut lhê. ³Ra châ to bang lé

nàng alu byî é hkûn, náng é loqyo loq kut é hkyô lé, loqpaì loq lé lháng hkâsé nhâng. ⁴Haû hkûn, nàng alu byî é lé, ó a châng sé râ nghut lhê. Haû jáng sheq, ó a sé loshoq kut é hkyô lé myang é sù, náng é Îwâ gi, nang lé chyunghuq shigyaú râ nghut lhê.

Kyûdung É Hkyô

Luk 11:2-4

⁵Nungmoq kyûdung le, gegùn labyoq kut bang su hkâkut kó; hkâsu mù gâ le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung râ ô nau akô. Ngò, nungmoq lé teng za táí kôlé, haû bang gi, yhangmoq é chyunghuq lé wó yû bekô nghut ri. ⁶Nghut kôlhang, nàng kyûdung le, náng é gok hkaû má wang ló mù, hkum myhî pyám luì, a byu-myang é náng é Îwâ chyáng dung aq. Haû jáng, ó a byu-myang é lé myàng sù, náng é Îwâ gi, nang lé jeju dum tau byi râ nghut lhê. ⁷Haû mù, kyûdung le, tungbaù pé su kut luì, dang puq hkâhtau kó; hkâsu mù gâ le, yhangmoq gi, dang hîng chín luì dung jáng sheq, gyo byi nhô ngam akô nghut ri. ⁸Haû bang su hkâkut kó; hkâsu mù gâ le, nungmoq é Îwâ gi, nungmoq râ é hkyô lé, nungmoq a dung shi mai sê to Sù nghut lhê.

⁹Haû mù, nungmoq kyûdung le,

'Mauhkûng htoq tsáng myhâng mâ é ng-amoq é Áwa ê,

Náng é myìng gi, chyoyúng nyi sháng gaq,

¹⁰Náng é mingdán jé lô sháng gaq,

Nàng ô nau é hkyô, mauhkûng htoq má dik é su, myigùng htoq má le dik sháng gaq ô.

¹¹Ngamoq nyi wuì râ é zoshuq lé, ngamoq lé hkû-nyí byi laq.

¹²Ngamoq lé shut é bâng é mara lé ngamoq hkyut pyám byî é su,

ngamoq é mara lé le hkyut pyám byi laq.

¹³Ngamoq lé, agúng alaú hkyô má a wàng nhang é za,

agè ashop jang mai hkyi yù laq ô.

(Hkâsu mù gâ le, kô dik é up sîng hkyô, a-tsam eq hpungwup shîngkang gi, pyat dedu ahtum abyuq Náng chyáng ru joq nyi ri ô! Amen.)^{*}

ngû dung keq. ¹⁴Supê èq, nungmoq lé kut shut é mara lé, nungmoq hkyut pyám byî é

✠ 5:43 Nhung 19:18

* 6:13 Chyúmlaiká ra-am má, shí túm a bo é nghut lhê.

nghut le gi, mauhkûng htoq mâ é nungmoq é îwa le, nungmoq lé mara hkyut pyám byi râ nghut lhê. ¹⁵ Nghut kôlhang, haú bang é mara lé, nungmoq a hkyut pyám byi é nghut le gi, nungmoq é îwa le, nungmoq é mara lé hkyut pyám byi râ a nghut.

Zoshuq Gám É Hkyô

¹⁶ Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gâ le, haú bang gi, yhangmoq zoshuq gám é hkyô lé, tân shit râ matú myoqdong lhoq nyhuí shit akô nghut ri. Ngò, nungmoq lé teng za taí kôlé, haú bang gi, yhangmoq é chyunghuq wó yû bekô nghut ri. ¹⁷ Nungmoq kúm gi, zoshuq gám é hkûn, nungmoq zoshuq gám é hkyô lé, byu pê hí má de de a dut é za, nungmoq a byu-myang é îwa za myàng sháng gaq, myoq chî pyám luí, u xû but keq; ¹⁸ haú jáng sheq, ó a sé loshoq kut é hkyô lé myang é Sû, nungmoq é îwa gi, nungmoq lé chyunghuq shigyaú râ nghut lhê.

Mauhkûng Htoq Mâ É Sutzè

Luk 12:33-34

¹⁹ Jàngkon, jogyik èq wó lhoq htên pyâm é eq hkaú su èq le wó wang hkaú yu pyám byi é myigùng htoq má, nungmoq é matú, sutzè lé hkâhkong to kó. ²⁰ Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyâm byi é mauhkûng htoq má sheq, nungmoq é matú sutzè hkong to keq. ²¹ Hkâsu mù gâ le, náng é sutzè joq jang má, náng é i-myt le jé nyi râ nghut lhê.

²² Myoqjí gi, gungdû é myibung nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. ²³ Nghut kôlhang, náng é myoqjí a ge é nghut le gi, náng é gungdu gón gi, mauchut tuq dut nyi râ nghut lhê. Náng chyáng bo é maubó gi, mauchut byuq é nghut jáng, mauchut haú gi, hkâ-í yhang htû râ lhâ!

²⁴ Ó yuq nghut kôle, yhumsîng í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé gi, chyitdap râ nghut lhê; haú a nghut jáng, rayuq lé lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut.

Hkâ-myt Chiq Kó

Luk 12:22-31

²⁵ Haú mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdû matú haí wut haí tsang râ lé, hkâ-myt chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó lhú? ²⁶ Maulat mâ é nghoqzô pé lé wú wú keq; yhangmoq gi, kyô hkyô kyô shu a kut é htoq agó, chyí pé má le haí a tsîng kat to kô é nghut le lháng, mauhkûng htoq mâ é nungmoq é îwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpau nyi lhê a nghut kó lhú? ²⁷ Nungmoq má, ó yuq wá, myit chiq é èq, yhumsîng é asak lé radúng kó wó jat yù kó râ lhú?

²⁸ Haú nghut le nhîng, haí mù, mebû matú myit chiq akô lhú? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkyîng le a duí kó nghut ri. ²⁹ Nghut kôlhang, Ngò, nungmoq lé taí kyo kôlé, hkohkâm Sholumon hpung kô dik u lé wut é mebu lháng, ban haú rabó lé a hkyit nghut ri.

³⁰ Lumjîng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lháng, Garai Gasang haú su kut hut é nghut le gi, nungmoq lé je riyhang hut râ a nghut kó lhú? ³¹ Haú mù, 'Haí zo râ lhi?' 'Haí shuq râ lhi?' 'Haí wut râ lhi?' nghû hkâ-myt chiq myhíng kó. ³² Tûngbaù pé kúm gi, haú pé banshoq lé châng hkat ho nyi akô; nghut kôlhang, mauhkûng htoq mâ é nungmoq é îwa gi, haú pé lé nungmoq râ é hkyô, sé byi nyi lhê. ³³ Nghut kôlhang, Yhâng é mingdán eq dingmán hkyô lé hí hô keq, haú jáng, haú pé banshoq, nungmoq lé puq byi râ nghut lhê. ³⁴ Haú mù, napmá lhê é matú hkâ-myt chiq kó; hkâsu mù gâ le, napmá gi, yhâng é yhang myit chiq râ nghut lhê. Hkû-nyí é wuîhke hkyô gi, hkû-nyí é matú gé bê nghut ri.

7

A Jéyáng Râ Hkyô

Luk 6:37-38, 41-42

¹ Nungmoq jéyáng é a hui kó sháng gaq, ó lé le, hkâjéyáng kó. ² Hkâsu mù gâ le, nungmoq jéyáng é su, nungmoq le, jéyáng

é hui kó râ nghut é htoq agó, nungmoq lik byi é bung èq, nungmoq lé dum lik byi râ nghut lhê.

³Yhumsing myoq hkaû má lúng tô é siktúm lé lhang a myit wú é nhîng, haî mù luî, nunggu nungmâng é myoqwàng lé myang lhê lúhú? ⁴Yhumsing é myoq má siktúm lhung to luî nhîng, 'Náng myoq má lúng tô é myoqwàng lé, ngò choq pyám byi lé.' nghû luî, náng é gumang hpó lé hkâsu wó taí râ lúhú? ⁵Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmâng é myoq má wang tô é myoqwàng choq pyám byi râ matú, nàng san za myàng râ nghut lhê.

⁶Hkuî pé lé, yunglhô é zê hkâbyi kó; waq pê hí má, nungmoq é palhé wuizo lé hkâdú byi kó. Haû su kut jáng, haû bang gi, zè haû pé lé nàng pyeq pyám mù, nungmoq lé dum taû ngat lò râ nghut lhê.

Dung Keq, Hô Keq, Hkum Má Kok Keq
Luk 11:9-13

⁷Dung keq, haû jáng, nungmoq lé byi râ nghut lhê; hô keq, haû jáng, nungmoq myàng kó râ nghut lhê; hkum má kok keq, haû jáng, nungmoq lé hpóng byi râ nghut lhê. ⁸Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

⁹Nungmoq má, ó yuq wá, yhumsing yhangzo muk dúng le, luqgok byi kó râ lúhú? ¹⁰Ngozo dúng le, lhangmui* byi kó râ lúhú? ¹¹Agè ashop é bang nungmoq lhang gi, nungmoq é zo wuî lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é îwa gi, Yhang lé dúng é bang lé, je riyhang ge é chyunghuq byi râ nghut lhê! ¹²Haû mù, hai hkyô má nghut kôlhang, nungmoq gi, yhumsîng ô nau é dông supé lé kut nhâng nau é su, yhangmoq lé le kut byi keq. Haî mù gâ le, haû gi, jep é tarâ eq myiqhtoî pê é dang lo jup tô é nghut ri.

Chyap É Hkúmdong Eq Lam É Hkúmdong
Luk 13:24

¹³Chyap é hkúmdong mai wàng keq. Hkâsu mù gâ le, lam é hkúmdong eq hkyô mó gi, htên byoq hkyô shut shuî e é nghut mù luî, haû dông wàng bang gi, myô akô

nghut ri. ¹⁴Chyap é hkúmdong eq hkyô zo kúm gi, asak hkyô shut shuî e é nghut mù luî, haû lé myang ho é bang gi, shaû akô nghut ri.

Agàm Eq Ashi
Luk 6:43-45

¹⁵Nungmoq chyáng jé lé lo é myiqhtoî pyoq pé lé, sidiq nyi keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq shuq nau é wamhkuî pé nghut akô. ¹⁶Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubyap mai tsibiyiq shi, zugâm mai maihpáng-shi wó yu wú akô lúhú? ¹⁷Ge é agàm gi, ge é ashî zui mù, a ge é agàm gi, a ge é ashî za dat zui ri. ¹⁸Ge é agàm gi, a ge é ashî a wó zui, a ge é agàm le, ge é ashî a wó zui nghut ri. ¹⁹Ge é ashî a zui é shigâm hkangmó lé gi, htuq pyám mù, myi má dú kat pyám râ nghut lhê. ²⁰Haû mù, yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê.

²¹Ngo lé, 'Yhumsîng ê, Yhumsîng ê,' ga, wut é bang yuq hkangmó gi, mauhkûng mingdán má myang wàng kó râ a nghut; haû mauhkûng htoq mâ é Ngá Wa ô nau é dông kut sù za sheq, myang wàng râ nghut lhê. ²²Haû buinyi má, byù myo myo gi, 'Yhumsîng ê, Yhumsîng ê, Náng é myîng mai, ngamoq gi, myiqhtoî le htoi bê; nat gang lé hkat htoq bê; laklaí kumlhá ajung jung lé, kut bê a nghut lúhú?' ga luî, Ngo lé myi kó râ nghut lhê. ²³Haû hkûn, Ngò gi, 'Nungmoq lé, Ngò hkâ-nhâm le a sé; agè ashop hkyô kut é bang nungmoq, Ngá chyáng mai gâng ló byuq keq.' nghû, yhangmoq lé san za tú taî kat râ nghut lhê.

Hpaqchyî Bò Sù Eq Ngok Sù
Luk 6:47-49

²⁴Haû mù, Ngá é dang shí pé lé wó gyô yù luî, châng kut é sù gi, hpaqchyî bò mù, lunghtân htoq má, yhûm saî é sù eq wuî nyi ri. ²⁵Mau wô, wuî je, laidun lò mù, yhûm haû lé lo htung kôlhang, yhûm haû gi, a htên byoq byuq râ nghut lhê; hkâsu mù gâ le, yhûm haû gi, lunghtân htoq má tsuq tô é yanmai nghut ri. ²⁶Nghut kôlhang, Ngá é dang lé, wó gyô yù mù, a châng sù gi, semuî-jàng má, yhûm saî é byù ngok eq wuî nyi râ nghut lhê. ²⁷Mau wô, wuî je, laidun

* 7:10 Garai Gasang gi, lhangmui a zo râ matú, Yudaq byu pé lé hkunmó hkyô tô é nghut lhê.

wò yup dut lò mù, yhûm haú lé lo htung jáng, yù whuî a mù loshoq htên byoq byuq râ nghut lhê." gâ ri.

²⁸ Yesuq mungdang ban taî é hkûn, shiwa byu pé gi, Yhang mhoqshit é hkyô lé maúhong bum akô; ²⁹ hkâsu mù gâ le, Yhang gi, yhangmoq é tarâ sará pé eq a pung é za, ahkáng ayá wó sù rayuq su, mhoqshit é yanmai nghut ri.

8

Manggâm Dap É Byù Rayuq

Mrk 1:40-45; Luk 5:12-16

¹ Yesuq gi, bùm htoq mai gyó lo é hkûn, byù moq mó gi, Yhâng htâng châng bum akô nghut ri. ² Haú hkûn, manggâm dap é byù rayuq gi, Yhâng é hí má, lé mù, hky-ihput htuoq luî, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga taî ri.

³ Yesuq gi, loq lhâm kat mù, haú yuq lé ê záng luî, "Ngò dóng lhê, sân-yúng aq hkoi." ga taî kat ri. Haú hkûn jáng, haú yuq é manggâm gi, ge byuq bê nghut ri. ⁴ Haú hkûn, Yesuq gi, "Nàng, shí hkyô ó lé le hkâtaî kyo. Nghut kôlhang, náng é gungdu lé, hkyangiong hpô chyáng ló tûn shit mù, yhangmoq é matú saksé dut sháng gaq, Mosheq taî tô é eq rajung za, hkungga ló nhông byi aq." ga haú yuq lé taî kat ri.

Gyezau Hpô É Lumjîng Myit

Luk 7:1-10; Yhn 4:43-54

⁵ Yesuq, Kaperna-um wà má wang e ló le, Romaq gyezau hpó rayuq gi, Yhâng chyáng lé jé mù, ⁶ "Yhumsîng ê, ngá é dui-nhâng zoshâng gi, gùngjum shi é htoq agó, yhûm má gyaí no jamjaû leq tô ri." ga garúm lé dung ri.

⁷ Haú hkûn, Yesuq gi, yhang lé, "Ngò, lé lhoq gê byi râ." ga taî kat ri.

⁸ Gyezau hpó haú, Yhang lé dum tû taî é gi, "Yhumsîng ê, Nàng, ngá é laishîn-htâng má, lé nang râ lháng ngò má a gingdán. Nàng, dang rahkun za taî kat laq; haú hkûn, ngá é dui-nhâng zoshâng ge ló râ nghut lhê. ⁹ Hkâsu mù gâ le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê; rayuq lé, 'Ê aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jûn lé le, 'Shî kut aq!' nghu le, yhang kut lhê." gâ ri.

¹⁰ Yesuq gi, dang haú lé wó gyo jáng, maú byuq luî, Yhâng htâng châng bang lé, "Ngò, nungmoq lé teng za taî kôlé, Israelaq amyû má lháng, shî í lumjîng é sù lé, Ngò, rayuq lé le a myàng wú é nghut lhê. ¹¹ Ngò, nungmoq lé taî kôlé, buihtoq buiwàng hkyam mâ é byu pé myo myo gi, mauhkûng mingdán má, Abraham, Isak, Yakup pé eq rahá, zoshuq poî mó má myang zùng kó râ nghut lhê. ¹² Nghut kôlhang, mingdán haú má wàng âng é bang kúm gi, shinggan mauchut hkaú shut dú pyâm é hui luî, haú jowò má ngaubyi ngaù nhap eq zuì kyik kyik shoq hpuzò nyi bùm bekô râ nghut lhê." ga taî ri.

¹³ Hau htâng, Yesuq gi, gyezau lé, "Ló aq hkoi! Nàng lumjîng é eq rajung za, dut râ nghut lhê." ga taî ri. Haú-u má yhang, haú dui-nhâng zoshâng gi, ge byuq bê nghut ri.

Byù Myo Myo Lé Lhoq Gê Byî É Hkyô

Mrk 1:29-34; Luk 4:38-41

¹⁴ Yesuq gi, Petruq é yhûm má jé wang e é hkûn, Petruq é yhâng-aumó gyai yhang no leq tô é lé, é myang ri. ¹⁵ Yesuq gi, yhâng é loq má ê záng kat é hkûn, Petruq yhâng-aumó gi, nòhpyo ge byuq mù, toq luî, Yhang lé wó gaí tso gaí huq bê nghut ri.

¹⁶ Myinhtâng mauchut lô jáng, nat gang wang júng nyi é bang myo myo lé, Yhâng chyáng shuî lé lo akô. Yhang gi, agè ashop é nat gâng pé lé dang eq hkat htoq pyám mù, nòhpyo huî é bang banshoq lé lhoq gê byî ri. ¹⁷ Haú gi,

"Yhang gi, nga-nhûng é noli nojàng lé yu pyám byi mù, nga-nhûng é noli nojàng lé, wùn waq pyám byi bê nghut ri."✠

ga, myiqhtoi Esai-aq taî tô é dang lhoq dik râ matú nghut ri.

Yesuq Htâng Cháng Râ Bang

Luk 9:57-62

¹⁸ Yesuq gi, Yhâng é lhîngkhyuq má byù moq mó zup míng nyi é lé myàng jáng, Yhâng é chángzô pé lé, nhông hé hpoq shut gû dap ê sháng gâ ri. ¹⁹ Haú hkûn, tarâ sará rayuq gi, lé lò mù, "Sarâ ê, ngò gi, Nàng hká e le hká cháng râ nghut lhê." ga Yhang lé lé taî ri.

²⁰ Haú jáng, Yesuq gi, "Wamhkuî pé gi, hkyûng wó akô; nghoq pé le, nghoqsut wó

✠ 8:17 Esai 53:4

akô. Nghut kôlhang, haû Byu Yhangzo gi, u nghê jowò lhang a wó nghut ri." ga lhom taí kat ri.

²¹ Haú hkûn, chángzo rayuq gi, "Yhum-sîng ê, ngá wa lé ló yhûm pyám râ ahkáng hí byi shilaq." ga taí kat ri.

²² Nghut kôlhang, Yesuq gi, "Shî bê bang gi, shî bê bang yhangchang yhûm lhum kó sháng gaq, nàng gi, Ngá htâng cháng aq." ga dum taú taí ri.

Laidun Lhoq Zîm Ê Hkyô

Mrk 4:35-41; Luk 8:22-25

²³ Hau htâng, Yesuq lhaî hkaû má wàng mù, Yhâng é chángzô pé le, Yhâng htâng châng wàng bekô nghut ri. ²⁴ Haú hkûn, nhông má byodan-htik laidun mó lò mù, wuìlhêng pé gi, lhaî má bat ùm lò bê nghut ri. Nghut kôlhang, Yesuq gi, yhup myhî tô ri. ²⁵ Chángzô pé gi, Yhâng chyáng jé ê mù, Yhang lé nhaû pun luí, "Yhumsîng ê, hkyi yù laq ô! Nga-nhúng myup ló nyi ri." ga taí akô.

²⁶ Yhang gi, "Lumjîng myit shaû é bang ê! Haî mù, haû-í gyuq bum akô lhu?" ga taí kat ri. Hau htâng, Yhang gi, toq luí, laidun eq wuìlhêng pé lé tân kat jáng, banshoq zîm byuq bê nghut ri.

²⁷ Byù haú bang gi, maúhong byuq kômù, "Shí yuq gi, hkasû é byù lha? Lài eq wuìlhêng pé lhang gi, Yhâng é dang lé gyo byî ri myhi-nhung!" ga luí, rayuq eq rayuq myî lhum bum akô nghut ri.

Nat Wang Júng Su Nhik Lé, Lhoq Gê Byî Ê Hkyô

Mrk 5:1-20; Luk 8:26-39

²⁸ Yesuq gi, Gadara byu pé é mau hpoq má jé dap ló jáng, nat gang wang júng é byù í yuq gi, lupdùng mai htoq lé lo kômù, Yhang lé lé huí akô. Haú nhik gi, haú hkyô mai ó lhang a wám lai loshoq wuí é su nhik nghut akô. ²⁹ Yhangnhik gi, Yesuq lé, "Garai Yhangzo ê, Nàng, ngamoq eq haî sêng lhu? Ahkyíng a jé shimá, ngamoq lé zing-ri râ matú jé lé lo é nghut lhu?" ga taí garú akô.

³⁰ Haú mai a lúm wê é jowò má, waq rajùm mó gi, myî dû but zô nyi bum akô nghut ri. ³¹ Nat gâng pé gi, Yesuq lé, "Nàng, ngamoq lé hkat htoq râ nghut jáng, hê waq pé chyáng wàng nhâng laq." ga dúng akô.

³² Yesuq gi, "Htoq ló keq!" ga taí kat ri. Haû mù, yhangmoq gi, htoq ló luí, waq pé chyáng wàng mù, waq haú jùm gi, gampyoq mai nhông hkaû shut din yán wang ló kôluí, wuì hkaû má myup shi byuq bekô nghut ri. ³³ Waq zúng bang gi, myuq hkaû shut h pang din wang ló kômù, dut lai lo é hkyô banshoq lé le, nat gang wang júng huí su nhik hkâsu dut é hkyô lé le, ló taí kyo akô nghut ri. ³⁴ Haû mù, rawa bang gi, Yesuq lé hui râ matú htoq lé lo bùm kômù, Yhang lé myàng jáng, yhangmoq é mau mai htoq ló byuq râ matú, chôm dúng tôngbán akô nghut ri.

9

Gungjum Shî Sû Lé Lhoq Gê Byî Ê Hkyô

Mrk 2:1-12; Luk 5:17-26

¹ Yesuq gi, lhaî má wàng mù, yhumsing é wà shut jî dap ló bê nghut ri. ² Byù ra-am gi, gungjum shî sû rayuq lé, taphkang mai Yhâng chyáng waq lé lo akô. Yesuq gi, yhangmoq é lumjîng myit lé byu-myàng jáng, haú gungjum shî sû lé, "Ngá zo ê, nhik hkâ-ngê; náng é yubak mara lé hkyut pyám byi bê." ga taí ri.

³ Haú hkûn, tarâ sará pé ra-am gi, yhangmoq é i-myt hkaû má, "Byù shí yuq gi, Garai Gasang lé rhoi dang taí nyi ri." ga myit nyi bum akô nghut ri.

⁴ Yesuq gi, yhangmoq myit nyi é hkyô lé sé mù, "Nungmoq é i-myt hkaû má, haû su agè ashop é đông haî mù myit nyi akô lhu? ⁵ 'Náng é yubak mara lé hkyut pyám byi bê.' nghu taí râ eq 'Toq luí, hkyô so aq.' nghu taí râ má, hká hkun je taí lui lhu? ⁶ Nghut kôlhang, haû Byu Yhangzo gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhu." ga taí luí, haú gungjum shî sû lé, "Toq aq, náng é taphkang yu chùng luí, yhûm taú ló aq hkoi." ga taí kat ri. ⁷ Haû mù, haú yuq gi, toq mù, yhûm shut ló byuq bê nghut ri. ⁸ Byù hpúng mó gi, haú hkyô lé myàng kôjáng, gyuq maú kômù, byu pé lé haû su é ahkáng ayá byi tô é Garai Gasang lé hkya-on kungton bum akô nghut ri.

Mahte lé shuî yu é hkyô

Mrk 2:13-17; Luk 5:27-32

⁹ Yesuq gi, haú jowò mai sô e ló é hkûn, kang guq zúm má zung tô é Mahte ga sù lé myàng mù, "Ngá htâng cháng aq." ga

taí jáng, haú yuq gi, toq luí, Yhâng htâng cháng bê nghut ri.

¹⁰ Yesuq gi, Mahte é yhûm má myinzang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô. ¹¹ Haú lé, Hparishe pé myàng kôjáng, Yhâng é chángzô pé lé, "Nungmoq é sará gi, haí mù luí, kang guq bang eq yubak dap bang eq rahá zo shuq nyi lhê lú?" ga myí akô.

¹² Yesuq gi, haú su ga kô é lé wó gyo jáng, "Wángzán bang gi, chi sará a ra kó; nòhpyo hui bang za sheq ru râ lhê. ¹³ Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê." ¹⁴ gâ é lichyúm lé mhoq yû keq. Hkâsu mù gâ le, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga tû taí kat ri.

Zoshuq Gám É Eq Sêng É Hkyô

Mrk 2:18-22; Luk 5:33-39

¹⁴ Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lhê; nghut kôle, Náng é chángzô pé gi, haí mù a gám kô é lú?" ga luí, lé myí akô.

¹⁵ Haú mù, Yesuq tû taí é gi, "Bíng pé gi, lusik eq rahá nghut nyi to ashî hkûn, hkâsu ge yón kó râ lú? Lusik lé, yhangmoq chyáng mai shuí yu pyâm é hkyíng jé râ nghut lhê; haú hkûn kúm gi, yhangmoq zoshuq gám kó râ nghut lhê.

¹⁶ Ó yuq le, mebu xau má pán sik èq a lhaq hpo wú kó; hkâsu mù gâ le, pán sik kun byuq jáng, mebu xau le je lhoq cheq pyám râ nghut lhê. ¹⁷ Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik soq htân luí, htûng buq goq byuq mù, tsibiyiq wing le yui shun byuq, htûng le htên byuq, dut râ nghut lhê. Haú mù, tsibiyiq wing asik lé, shokuq htûng sik má kat jáng sheq, haú í jûng é a hten râ nghut lhê." gâ ri.

Shî Bê Myiwe Zo Eq No É Myiwe Myhí

Mrk 5:21-43; Luk 8:40-56

¹⁸ Yesuq haú su ga taí nyi é hkûn, suwún rayuq jé lé lô mù, Yhâng é hí má hkyihput htuaq luí, "Ngá zo byizo gi, ahkuí za shi byuq

bê. Nghut kôlhang, Nàng lé mù, yhâng é ahtoq má loq lé ke byi laq, haú jáng, yhang, asak dum dui lò râ nghut lhê." ga taí ri. ¹⁹ Yesuq gi, toq mù, Yhâng é chángzô pé eq rahá, haú yuq htâng châng e ló akô.

²⁰ Haú hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huí lé mù, Yhâng é bushi htâng má ê záng kat ri. ²¹ Myiwe myhí haú gi, yhang gûng yhang, "Ngò, Yhâng é buhtâng má ê wó záng jáng gi, ge byuq râ nghut lhê." ga, wó myit é yanmai nghut ri.

²² Yesuq gi, lhing wú kat luí, yhang lé myàng jáng, "Ngá zo ê, nhik hkâ-ngê, náng é lumjíng myit gi, nang lé lhoq gê byi bê nghut ri." ga taí ri. Haú hkûn jáng yhang, myiwe myhí haú gi, ge byuq bê nghut ri.

²³ Yesuq gi, suwún hpô é yhûm má jé wang ló é hkûn, sampyí mut bang eq garu garín dut nyi é bang lé, ê myâng mù, ²⁴ yhangmoq lé, "Hui keq. Myiwe zo gi, shi byuq é a nghut, yhup myhí tô é sheq ru nghut lhê." ga taí jáng, yhangmoq gi, Yhang lé wuizui kut pyám byí akô. ²⁵ Yesuq gi, byù hpûng lé, shinggan shut htoq ló nhâng mù, Yhang wang ê luí, myiwe zo haú lé loq èq zú kat jáng, myiwe zo haú gi, dum dui toq lo ri. ²⁶ Haú hkyo é danglù gi, ramau gón yhang jam ló byuq bê nghut ri.

Myoqjit Í Yuq Eq Nhut Jit Sû Rayuq Lé, Lhoq Gê Byí É Hkyô

²⁷ Yesuq gi, haú jowò mai xoq e ló nyi le, Yhâng é htâng má, myoqjit í yuq gi, châng dîn uchyang, "Dawiq é Yhangzo ê, ngá-nhik lé shogyô yù laq ô!" ga wut taí akô.

²⁸ Yesuq gi, yhúmhkaú má jé wang ló é hkûn, myoqjit su nhik châng wang lò kômù, haú nhik lé, "Ngò wó kut byí é lé, nungnhik lumjíng akô luq?" ga myí ri.

Haú hkûn, yhangnhik gi, "Lumjíng lhê ô, Yhumsîng ê." ga tû taí akô.

²⁹ Hau htâng, Yhang gi, haú nhik é myoqjí má ê záng htung luí, "Nungnhik lumjíng é eq rajung za dut sháng gaq." ga taí ri. ³⁰ Haú mù, yhangnhik gi, myoq wó myâng bekô nghut ri. Yesuq gi, "Shí hkyô, ó lé le hkâsé nhâng kó." ga, yhangnhik lé htân htân sidiq byí ri. ³¹ Nghut kôlhang, yhangnhik gi,

haú hkyô lé, haú mau ramau gón yhang taí pyo ló bekô nghut ri.

³² Haú nhik htoq ló nyî kô é hkûn, nat gang wang júng luí, dang a wó nyô sù rayuq lé, Yesuq chyáng shuí lé lo akô. ³³ Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpûng mó gi, haú lé wú maú byuq kômù, "Shî su dut é hkyô lé, Israelaq amyú má radàm lhang a myang wú." ga taí bum akô.

³⁴ Nghut kôlhang, Hparishe pé kúm gi, "Nat gâng pé é zaú é wum-o a-tsam eq za, nat gâng pé lé hkat htoq pyâm é nghut ri." ga taí bum akô nghut ri.

Mû Zui Byù Shaú Ri

³⁵ Yesuq gi, myuq pé eq wà pé banshoq má wàng luí, haú pé mâ é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nõhpyo ajung jung eq noli nojàng hui bang yuq hkangmó lé, lhoq gê byî wún ri. ³⁶ Yesuq gi, byù moq mó lé myàng jáng, wú shogyô nyi ri. Hkâsu mù gâ le, yhangmoq gi, sau zúng sù a nyi é sau pé su, awui ahke dut é eq byo myín bûm kô é yanmai nghut ri. ³⁷ Haú mù, Yhang gi, Yhâng é chángzô pé lé, "Kyôshú yù râ myo shoq joq kôlhang, mù zui râ byù gi, shaú nyi ri. ³⁸ Haú mù, haú kyô Yhumsîng lé, Yhâng é kyô yô má, kyô shu byù myo myo nhâng byi râ matú, dung keq." ga taí ri.

10

Raxe Í Yuq Lé Nhang Htoq Kat É Hkyô

Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17

¹ Yesuq gi, Yhâng é chángzô raxe í yuq lé wut yù mù, agè ashop é nat pé lé wó hkat htoq râ eq, noli nojàng eq nõhpyo ajung jung lé wó lhoq gê râ ahko ahkáng yhangmoq lé byî ri.

² Haú lagyo raxe í yuq é myîng gi, (Petruq ga sù) Simun eq yhanggu Andre; Zebedi é yhangzô nhiktang Yakuq eq yhanggu Yohan; ³ Hpilip eq Barhtolume; Htomaq eq kang guq sù Mahte; Alhpe é yhangzô Yakuq, Htade, ⁴ Zelutuq* dut é Simun eq, Yesuq lé ap pyám râ sù, Yudaq Iskarut pé nghut akô.

* 10:4 Zelutuq gâ é lichyúm gi, yhumsîng zui saí é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

⁵ Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, "Tûngbaù pé chyáng le hkâ-ê kó; Samariq wà rawà má le hkâwâng kó. ⁶ Haú byuq byuq é sau pé su nghut nyi é Israelaq byu pé chyáng sheq ê keq. ⁷ Nungmoq gi, ê mù, 'Mauhkûng mingdán gi, chyâng lò bê nghut ri.' nghu é danglù lé hko kyo keq. ⁸ Nò bang lé lhoq gê byi, shî bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Laí laí wó é lé, laí laí byi keq. ⁹ Nungmoq é hpyihit má, hîng, ngùn eq gyi pé hkâkat chûng kó; ¹⁰ hkyowui é matú, etap, mebu htaí, hkyî-tsung eq dumbáng pé hkâyü chûng kó; hkâsu mù gâ le, mù zui sù gi, zoshuq wó gíng lhê.

¹¹ Hká wâ hká dum má jé wang ló le le, haú mâ é gingdán é byù lé hô mù, haú mai htoq ló é hkûn jé shoq, haú yuq é yhûm má za nyi nyi keq. ¹² Haú yhûm má wang é hkûn, shichyên yù keq. ¹³ Haú yhûm gi, gingdán é nghut jáng, nungmoq shimân byi é hkyô, yhangmoq chyáng joq nyi sháng gaq; a gingdán é nghut jáng, nungmoq chyáng dum taù lò sháng gaq. ¹⁴ Nungmoq lé a lhom hap yu é eq nungmoq é dang lé a lhom gyo byi kô é nghut jáng, haú yhûm haú wâ mai htoq ló é hkûn, nungmoq é hkyiwa má dap é hpuilhaú lé ko hkyô pyâm to keq. ¹⁵ Ngò, nungmoq lé teng za taí kôlé, tarâ jéyáng é buinyî má, haú wâ gi, Sodom eq Gomoraq myuq htoq má je hpuzo râ nghut lhê. ¹⁶ Wamhkuí hpúng má nhang hâng kat é sau pé lé su, Ngò, nungmoq lé nhang kat é nghut lhê. Haú mù, lhangmuí su hpaqchyî bò luí, hpúngkyui su nú-nhâm nyi keq.

¹⁷ Byu pé lé sidiq keq; hkâsu mù gâ le, yhangmoq gi, nungmoq lé, tarâ rûng pé má ê ap pyám kó râ nghut é htoq agó, yhangmoq é tarajong pé má, nungmoq lé nhuq bat kó râ nghut lhê. ¹⁸ Nungmoq gi, Ngá é yanmai, mauzau wuè eq hkohkam pé é hí má shuí jé é hui luí, yhangmoq é hí má le, tûngbaù pé é hí má le, saksé myang hkám kó râ nghut lhê. ¹⁹ Nghut kôlhang, nungmoq lé ap pyám kô é hkûn, nungmoq hkâsu taí râ eq haí taí râ lé, hkâ-myit chiq

kó. Haú hkûn taí rã dang, nungmoq wó kó rã nghut lhê. ²⁰ Hkâsu mù gã le, haú gi, nungmoq é dang a nghut, nungmoq é Yhângwã é Woi-nyí sheq, nungmoq dông taí rã ru nghut lhê.

²¹ Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó rã nghut lhê; zo wuî gi, mó wuî lé gumlau toq mù, sat pyám nhâng kó rã nghut lhê. ²² Byù lhunglhang bang gi, Ngá é yanmai, nungmoq lé a nguî kut kó rã nghut lhê; nghut kôlhang, jhtâm jé shoq wó hkam jân nyi é sù gi, hkyi yu é hui rã nghut lhê. ²³ Rawò má zing-ri é hui jáng, rawò shut hpang ê keq. Ngò, nungmoq lé teng za taí kôlé, Israelaq byu pê é myuq pé má, nungmoq a ban wang ngap shimá, haú Byu Yhangzo jé rã nghut lhê.

²⁴ Jongzo gi, sará htoq, dui-nhâng zoshâng gi, yhumsing htoq, gyaú rã a nghut. ²⁵ Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lhang Bezebulaq† ga kô le gi, Yhâng é yhumbyù wuî lé gi, je riyhang nghû kó rã a nghut lhú?

²⁶ Haú mù, yhangmoq lé hkâgyuq kó. A byông htoq loshoq wó zaú nghop tô é haí le a joq rã nghut lhê; a sé loshoq wó haq tô é le, haí a joq rã nghut lhê.

²⁷ Ngò, nungmoq lé mauchut hkaú má taí é hkyô lé, myoq myàng maubó má taí kyo keq; Ngò, nungmoq lé dangsoq soq kyo é hkyô lé, yhumhkung htoq mai taí pyô keq.

²⁸ Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraí ming má wó lhoq htên é Sù lé sheq, gyuq nyi keq. ²⁹ Johkyáng í du lé, gyi htingchap rachap èq wó ùng pyâm lhê a nghut kó lhú? Nghut kôlhang, haú radu lhang, nungmoq é Îwã é myit èq a nghut jáng, myigùng má wó byit gyó rã a nghut. ³⁰ Nungmoq é ulhum mã é xãm banshoq lé lhang, nghap to gù nghut lhê.

³¹ Haú mù, hkâgyuq kó; nungmoq gi, haú johkyáng myo myô htoq má lhang gù je bo é bang nghut lhê.

³² Byu pê hí má, Ngo lé lhom yín yu é sù ó yuq lé nghut kôle, mauhkung htoq mã é

Ngá Wã é hí má, Ngò lhom yín yu rã nghut lhê. ³³ Byu pê é hí má, Ngo le he-ngik pyâm é sù ó yuq lé nghut kôle, mauhkung htoq mã é Ngá Wã é hí má, Ngò he-ngik pyám rã nghut lhê.

³⁴ Ngo lé, haú myidàm htoq mã simsaq hkyô byi rã matú lé lo é sù su hkâ-ngâm kó. Ngò gi, simsaq hkyô byi rã matú lé lo é a nghut, shâm byi rã matú sheq lé lo é ru nghut lhê.† ³⁵ Hkâsu mù gã le,

'Yuqzo gi, yhangwa eq, byizo gi, yhangnu eq, dumó gi, yhangmhoí eq, byoq lhum kó rã nghut lhê.

³⁶ Yhumsing é yhumbyù wuî gi, yhumsing é gyè taú dut rã nghut lhê.†*

gã tô é matú sheq, Ngò jé lé é ru nghut lhê.

³⁷ Ngo lé chyit é htoq yhumsing é ìnu îwa lé je chyit é sù ó yuq nghut kôle, Ngá é chángzo kut rã gingdán sù a nghut; Ngo lé chyit é htoq yhumsing é zo wuî lé je chyit é sù ó yuq nghut kôle, Ngá é chángzo kut rã gingdán sù a nghut; ³⁸ Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut rã gingdán sù a nghut. ³⁹ Yhumsing é asak lé ha bûn é sù ó yuq nghut kôle, asak sum rã nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó rã nghut lhê.

⁴⁰ Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haú Ngo lé nhang kat Sù lé hap yu é sù nghut bê. ⁴¹ Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yu rã nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chyunghuq lé wó yu rã nghut lhê. ⁴² Shí, tiq bang mã é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhâng é chyunghuq lé hkyak myang hkam yù rã za nghut lhê." gã ri.

11

Yesuq Eq Wui-myhup Sará Yohan

Luk 7:18-35

¹ Yesuq gi, Yhâng é chángzo raxe í yuq lé dang ban pying é htâng mã, Galile mau mã é wã pé mã mhoshit rã matú eq hko kyo

† 10:25 Bezebulaq gã é gi, Tsadán é myíng rajà nghut lhê. ‡ 10:34 Yesuq gi, simsaq hkyô byi sù nghut lhê. Nghut kôlhang, Yhang é yanmai, byu pé mabyoq htoq rã nghut é hkyô lé sé mù, haú su ga taí é nghut lhê. ✧ 10:36 Mihka 7:6

râ matú, haú jowò mai htoq e ló bê nghut ri.

² Wui-myhup Sará Yohan gi, Hkrisduq kut nyi é hkyô lé, htóng hkaú má wó gyo jáng, ³ "Nàng gi, haú jé lé lô râ Sû nghut lhê lú? Haú a nghut jáng, ngamoq gi, góyuq lé lán ra shirâ lú?" ga, yhâng é chángzô pé lé myí nhang kat ri.

⁴ Yesuq tû taí é gi, "Nungmoq wó gyo wó myang é hkyô, Yohan lé ló taí kyo keq; ⁵ myoqjit bang, myoq wó myâng bekô; hkyí hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ⁶ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

⁷ Yohan é chángzô pé taú ló kô é u lé, Yohan eq séng luí, byù moq mó lé Yesuq taí é gi; "Nungmoq gi, haí lé hpuy wú râ matú, haú yoso shut e akô lú? Lài èq hik nhùn é jamgàm lé wú râ matú nghut akô lú? ⁸ Haú a nghut jáng, haí lé wú râ matú e akô lú? Nú-nhâm é mebu wut sù lé wú râ matú e akô lú? A nghut. Nú-nhâm é mebu wut bang gi, hkohkâm-wâng pé má sheq rû nyi lhê. ⁹ Haú nghut lé gi, haí lé wú râ matú ê kô é lú? Myiqhtoi rayuq lé lú? Haú kúm nghut ri; Ngò, nungmoq lé taí kôlé, Yohan gi, myiqhtoi htoq lán gyaú sù nghut lhê. ¹⁰ Haú yuq é hkyô lé, Chyúmdang má kâ tô é gi,

'Wú aq, Náng é hkyô lajang lán râ matú, Ngá é lagyo lé, Náng é hí má Ngò nhang kat râ nghut lhê.'[☆]

gâ ri. ¹¹ Ngò, nungmoq lé teng za taí kôlé, myiwe wui mai hku kat é bang má, Wui-myhup Sará Yohan htoq je kô é rayuq lán a htoq wú shi; nghut kôlhang, Garaí Gasâng é mauhkung mingdán má je tiq dik sù gi, Yohan htoq je kô lhê. ¹² Wui-myhup Sará Yohan é buinyi mai ahkuí jé shoq, mauhkung mingdán gi, lú chyín wang nyi é hui mù, sarhé pé gi, haú lé wó yú bekô nghut ri. ¹³ Hkâsu mù gâ le, Yohan é ahkýng jé shoq, haú myiqhtoi pé banshoq eq tarâ gi, haú hkyô eq séng luí, myiqhtoi htoí to gù nghut lhê. ¹⁴ Nungmoq hap yù nau é nghut jáng, Yohan gi, haú jé lé lô râ ga

sù Eliyaq nghut lhê.[☆] ¹⁵ Gyô yù râ nohkyap dap sù gi, gyô yù sháng gaq.

¹⁶ Shí ipyat lhê é byu pé lé, Ngò, hai eq taí kê wú râ lú? ¹⁷ Yhangmoq gi,

'Nungmoq é matú, ngamoq sampyí mut byi kôlhang, nungmoq gi, a gó kó; ngamoq, ngaú hkyangsâng kôlhang, nungmoq gi, a ngaú kó.'

ga luí, gài pé má zùng mù, góbang lé wut taí lhum nyi é zoshâng wui eq wui akô.

¹⁸ Hkâsu mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga taí akô. ¹⁹ Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. Nghut kôlhang, hpaqchyí byéng-yá gi, yhâng é muzó èq saksé tûn shit nyi ri." gâ ri.

Myit A Lhing É Wà Mó Pê Hkyô

Luk 10:13-15

²⁰ Hau htâng, Yesuq gi, laklaí kumlhá pé je myo kut shit bê nghut kôlhang, myit a lhing é myuq pé lé tân é gi, ²¹ "Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhing mù, jimê tû wut lhê, myiwap kyaq gyûn lhê kut bekô râ nghut lhê. ²² Ngò, nungmoq lé taí kôlé, tarâ jéyáng é buinyi má, nungmoq gi, Turuq myuq eq Sidun myuq htoq má je hpuzo kó râ nghut lhê. ²³ Dum mù, Kaperna-um wà nàng ê, nàng gi, mauhkung jé shoq waq toq é hui râ lú? A nghut, mosumhkung má sheq gyó râ nghut lhê. Náng chyáng kut shit é laklaí kumlhá lé, haú Sodom wà má kut shit é ru nghut le gi, myuq haú hkû-nyí jé shoq joq nyi râ nghut lhê. ²⁴ Ngò, nungmoq lé taí kôlé, tarâ jéyáng é buinyi má, Sodom wà hpuzô é gi, náng htoq shau râ nghut lhê." gâ ri.

Ngú Nyí Bâng É Matú Bánno Jang

Luk 10:21-22

²⁵ Haú u lé, Yesuq taí é gi, "Mauhkung eq myigung é Yhumsing, Áwa ê, Nàng gi, haú pé lé, hpaqchyí byéng-yá bò bang eq myit hpaqchyí sé bâng é hí má nghop to luí,

zoshâng wuì lé tûn shit bê nghut é yanmai, Ngò, Nang lé hkya-on lhê ô. ²⁶ Nghut bê, Âwa ê, haù gi, Nàng ô nau é hkyô nghut ri.

²⁷ Ngá Wa gi, lhunglháng lé Ngá é loq má ap byî to bê. Haù Zo lé, Âwa mai lai luì ó le a sé; Âwa lé le, haù Zo eq haù Zo mai sé nhâng râ matú hkyin yu é bang mai lai luì ó a sé.

²⁸ Ngú é eq wòlai wun é lhunglhâng bang ê, Ngá chyáng lé keq; Ngò, nungmoq lé bánno nhâng râ nghut lhê. ²⁹ Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yû keq; haù hkûn, nungmoq é asak woi-nyí bánno kó râ nghut lhê.

³⁰ Haù mù gà le, Ngá é kandang gi, waq lui é htoq agó, Ngá é wò le sôm lhê." gà ri.

12

Bánno Buinyi É Yhumsîng

Mrk 2:23-28; 3:1-6; Luk 6:1-5, 6-11

¹ Haù yoq lhê é Bánno buinyi ra-nyí má, Yesuq gi, Yhâng é chángzô pé eq rahá yò hkaù mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yû mù, zô akò nghut ri. ² Hparishe pé gi, haù lé myàng kôjáng, "Wú aq! Náng é chángzô pé gi, Bánno buinyi má a ge kut jung lé kut nyi akò." ga taí kat akò.

³ Haù hkûn, Yesuq tû taí é gi, "Dawiq lháng gi, yhâng htâng châng é bang eq rahá zòmut huì é hkûn hkâsu kut é hkyô lé, nungmoq a nghap wú kó lhú? ⁴ Dawiq gi, Garai Gasâng é yhúmhaù má wang ê mù, hkyangjông pé mai lai luì, ó le a ge zô é, kyâng tô é muk lé, yhang eq yhâng htâng châng é bang yù zo kô é a nghut kó lhú? ⁵ Hau htoq agó, Bánno buinyi má, hkyangjông pé gi, noqkuq yhúmhaù má Bánno buinyi é tarâ lé shut kôlhang mara a wó é lé, haù tarâ laiká má nungmoq a nghap wú kó lhú? ⁶ Ngò, nungmoq lé taí kôlé, haù noqkuq yhâm htoq je ko sù gi, shí má nghut nyi lhê. ⁷ Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê"☆ gá é lichyúm lé nungmoq sé kô é ru nghut le gi, mara a bò bang lé mara hùn kó râ a nghut.

⁸ Hkâsu mù gà le, haù Byu Yhangzo gi, haù Bánno buinyi é Yhumsîng nghut lhê." gá ri.

☆ 12:7 Hos 6:6 ☆ 12:21 Esai 42:1-4

⁹ Hau htâng, Yhang gi, haù jowò mai e ló mù, yhangmoq é tarajong má wang e ló ri.

¹⁰ Loq rahkyam ajum shi byuq é byù rayuq le, haù má nyi tô ri. Yhangmoq gi, Yesuq lé, "Bánno buinyi má, nòhpyo lhoq gê byi le, tarâ wang lhê lhú?" ga myi é dông, Yhang lé mara hùn râ hkyô ho akò nghut ri.

¹¹ Haù hkûn, Yesuq gi, "Nungmoq chyáng mâ é ó yuq wá, yhumsîng é sau radu, Bánno buinyi má dong gyó tô le, a xe htoq yu é nyi kó râ lhú? ¹² Byù gi, saù htoq má hpau dap dik é nghut lhê! Haù mù, Bánno buinyi má ge é hkyô kut le, tarâ wang lhê." ga yhangmoq lé tû taí ri.

¹³ Hau htâng, Yhang gi, haù loq jum shí sù lé, "Náng é loq nyhang kat aq." ga taí kat jáng, haù yuq gi, loq nyhang kat jáng, loq haù gi, a no é loq su ge byuq bê nghut ri.

¹⁴ Hparishe pé kúm gi, htoq ló kômù, Yesuq lé hkâsu kut wó sat pyám râ hkyô lé, chôm hpyê lhùm bum akò nghut ri.

Garai Hkyin Tô É Dui-nhâng Zoshâng

¹⁵ Yesuq gi, haù hkyô lé sé jáng, haù jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nòhpyo hui bang banshoq lé lhoq gê byi luì,

¹⁶ Yhang ó yuq nghut é hkyô lé, a taí byông htoq râ matú, yhangmoq lé taí hkûm tô ri.

¹⁷ Haù gi, myiqhtoi Esai-aq é nhut dông mai taí tô é dang lé lhoq dik râ matú nghut ri. Dang haù pé gi,

¹⁸ "Shí yuq gi, Ngò chyit, Ngò myit nguì luì, hkyin tô é Ngá é dui-nhâng zoshâng nghut lhê;

Ngò gi, Ngá é Woi-nyí, Yhang lé kat byi râ nghut mù,

Yhang gi, tarâ dingmán é hkyô lé byù myû banshoq pé má taí kyo râ nghut lhê.

¹⁹ Yhang gi, haù a hpuy tû é htoq agó, a garu râ nghut lhê; Yhâng é htê lé, hkyô mó pé má wó gyo râ a nghut.

²⁰ Yhang gi, tarâ dingmán é hkyô lhoq ung é hkûn jé shoq,

nâng chap pyám bê jàm gàm lé le, lhoq hkyui râ a nghut, myihkau za htoq nyî bê myi lé le, lhoq sat pyám râ a nghut.

²¹ Byù myû chângjup gi, Yhâng é myìng má myit myoqbyù kó râ nghut lhê."☆

gâ ri.

Yesuq Eq Bezebulaq

Mrk 3:20-30; Luk 11:14-23; 12:10; 6:43-45

²²Hau htâng, agè ashop é nat gang wang júng luí, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gê byî ri; haú mù, haú yuq gi, dang le wó nyô, myoq le wó myâng dut bê nghut ri. ²³Byù hpûng mó gi, haú lé wú maú byuq kômù, "Shí yuq, Dawiq é Yhangzo za gi, nghut lhê laq?" ga taí bum akô.

²⁴Nghut kôlhang, Hparishe pé gi, haú lé wó gyo kôjáng, "Shí yuq gi, nat gâng pé é zau Bezebulaq* é wum-o a-tsam èq za nat gâng pé lé wó hkat htoq é nghut ri." ga taí bum akô nghut ri.

²⁵Yhangmoq myit nyi é hkyô lé Yesuq sé mù, yhangmoq lé taí é gi, "Hká mingdán nghut kôle, ahkaú má byoq gâng lhûm nyi kô é nghut jáng, htên byoq byuq râ za nghut lhê; haú eq rajung za, myuq ralhum nghut nghut, yhumhtu ralhum nghut nghut, yhangchang byoq lhûm nyi kô é nghut jáng, haú gi, wó gîng nyi râ a nghut.

²⁶Tsadán gi, Tsadán lé hkat htoq pyâm é nghut jáng, yhumsing gûng yhumsing lhoq hpyoq nyi gù bê nghut ri. Haú su nghut jáng, yhâng é mingdán gi, hkâsu kut wó gîng to râ lú? ²⁷Haú mù luí, Ngò gi, Bezebulaq é wum-o a-tsam èq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam èq hkat htoq pyâm kô é nghut lhê lú? Haú su nghut jáng, haú bang gi, nungmoq lé tarâ jéyáng bang dut kó râ nghut lhê. ²⁸Nghut kôlhang, Ngò gi, Garai Gasâng é Woi-nyí èq nat gâng pé lé hkat htoq pyâm é nghut jáng, Garai Gasâng é mingdán gi, nungmoq chyáng jé bê nghut ri.

²⁹Ó yuq nghut kôle, wum-o bò sù lé hí tuí zing pyâm é a nghut le gi, yhâng é yhûm má lú wâng mù, yhâng é sutzè lé hkâsu wó lú yû râ lú? Haú yuq lé hí tuí zing pyâm jáng sheq, yhâng é sutzè lé wó lú yû râ nghut lhê.

³⁰Ngá hkyam shut a dap sù gi, Ngo lé gye kut sù nghut lhê; Ngò eq rahá a shûm tsing sù gi, lhoq pyo pyâm é sù nghut nyi ri.

³¹Haú mù, Ngò, nungmoq lé taí kôlé, byu pé

é yubak mara hkanmó eq Garai Gasang lé rhoi dang taí pyâm é lhunglhang gi, mara hkyut byî é wó hui râ nghut lhê. Nghut kôlhang, haú Chyoiyúng Woi-nyí lé rhoi dang taí pyâm é gi, mara hkyut byî é hui râ a nghut. ³²Haú Byu Yhangzo lé dang dông shut é sù gi, mara hkyut byî é wó hui râ nghut lhê; nghut kôlhang, haú Chyoiyúng Woi-nyí lé dang taí shut é sù gi, shí ipyat má le, htang pyat má le, mara hkyut byî é hui râ a nghut.

³³Ashi lé wú luí, agàm lé sé râ nghut é yanmai, agàm lé lhoq gê jáng, ashi le gè râ nghut lhê; agàm lé a lhoq gê jáng, ashi le gè râ a nghut; ³⁴Duq htân lhangmuí amyû è, nungmoq gi, agè ashop é bang nghut to kôluí nhîng, dang gè hkâsu wó taí kó râ lú? Hkâsu mù gâ le, i-myit unghkaú má byíng mui tô é lé za, nhut mai taí htoq lo é nghut lhê. ³⁵Ge é sù gi, yhumsing é i-myit unghkaú mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaú mâ é agè ashop é sutdò mai, agè ashop é zè pé lé lhoq htoq shit lhê. ³⁶Ngò, nungmoq lé taí kôlé, byu gi, yhumsing taí kat é akyû a bo é dang pé é matú, tarâ jéyáng é buinyi má taí sân kyo ra kó râ nghut lhê. ³⁷Hkâsu mù gâ le, yhumsing mara lut râ le, ó le ó taí é dang pé mai; mara byî é hui râ le, ó le ó taí é dang pé mai, nghut râ nghut lhê." gâ ri.

Limik Kumlhá Lé Dung Kô É Hkyô

Mrk 8:11-12; Luk 11:29-32; 11:24-26

³⁸Hau htâng má, Hparishe pé eq tarâ sará pé ra-am gi, "Sará ê, ngamoq gi, Nang, limik kumlhá kut shit râ lé myàng nau ri." ga Yhang lé dúng akô.

³⁹Haú mù, Yhang tú taí é gi, "Agè ashop é eq lhum a zuí é ipyat shî gi, limik kumlhá dung nyi ri myhi-nhung! Myiqhtoi Yonaq é kumlhá mai lai luí, gotû haí le tûn shit râ a nghut. ⁴⁰Hkâsu mù gâ le, Yonaq gi, ngo mó é wamdau hkaú má sum nyí sum myîn lúng é su, haú Byu Yhangzo le, myigùng káng má sum nyí sum myîn lúng râ nghut lhê.

⁴¹Ninewe wà byù wui gi, Yonaq mungdang hko kyô é hkûn myit lhîng kô é nghut mù, tarâ jéyáng é buinyi má, ipyat shí mâ é bang eq rahá toq lò luí, ipyat shí mâ é bang lé mara hûn kó râ nghut lhê; haú Yonaq htoq

* 12:24 Bezebulaq gâ é gi, Tsadán é mying rajà nghut lhê.

ko sũ gi, ahkuĩ shĩ má jé nyi to bê. ⁴²Maupyĩ má é hkohkãm myhĩ gi, maumyĩ ló htâng é mai lé lô mù, Sholumon é hpaqchyĩ dang lé, lé gyô yù bê nghut mù, haũ tarã jéyáng é buinyĩ má, ipyat shĩ má é bang eq rahá toq lô luĩ, ipyat shĩ má é bang lé mara hũn rã nghut lhê; haũ Sholumon htoq ko sũ gi, ahkuĩ shĩ má jé nyi to bê.

⁴³Haũ agè ashop é nat gi, byù rayuq chyáng mai htoq ló mù, kyuq huĩ é jowò pé má sô yông e ló luĩ, no rã jowò hkat ho wú le, a myang hô nghut ri. ⁴⁴Haũ hkũn, yhang gi, 'Ngò nyi laĩ lo é yhũm má dum taũ ló wú rã.' ga taĩ ri. Yhang dum taũ jé ló wú le, yhũm haũ lé, ó le a sing yu hpyuq é htoq agó, san za rago dut to lánq é lé ló myang ri. ⁴⁵Haũ jáng, yhang gi, dum taũ ê mù, yhâng htoq je wuĩ é nat nyhit nat lé shuĩ lò luĩ, haũ má lo wang nyi to bekô. Haũ mù, haũ yuq é nyi yap sãmlai gi, hí lhê htoq má je wuĩ lò bê nghut ri; agè ashop é ipyat shĩ le, haũ eq rajung za dut rã nghut lhê." gã ri.

Yesuq É Yhângnu Eq Yhanggũ Pé

Mrk 3:31-35; Luk 8:19-21

⁴⁶Yesuq, shiwa byu pé lé dang rũ nyo nyi ashĩ hkũn, yhângnu eq yhanggu pé gi, Yhang lé nyò naũ kômù, shinggan má lé yap tô akô nghut ri. ⁴⁷Haũ mù, Yesuq lé, "Náng nu eq nunggu pé gi, Nang lé nyò naũ mù, shinggan má lánq yap bum akô." ga taĩ kyô akô.

⁴⁸Haũ hkũn, Yhang gi, "Ô pé gi, Ngá nu eq Ngá gu pé nghut akô lhú?" ga tũ taĩ kat ri. ⁴⁹Hau htâng, Yhang gi, Yhâng é chángzô pé lé loq tun luĩ, "Wú keq, shĩ bang gi, Ngá nu eq Ngá é gumang wuĩ nghut bê. ⁵⁰Hkãsu mù gã le, mauhkũng htoq mã é Ngá Wa ô nau é hkyô châng é sũ ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq taĩ ri.

13

Kyôshi Sãn É Dangtũ

Mrk 4:1-20; Luk 8:4-15

¹Haũ nyĩ má yhang, Yesuq gi, yhũmhkaũ mai htoq ló mù, wuĩ nhông yãm má ê zung tô ri. ²Byù hpũng mó gi, Yhâng é lhĩnghkyuq má zup zĩng lé bũm kô é yanmai, Yhang gi, lhaĩ hkaũ má doq zũng tô ri. Shiwa byu pé kũm gi, gin-gau htoq

má yap tô bum akô. ³Hau htâng, Yhang gi, haũ bang lé, dangtũ pé dông myo myo taĩ é má, "Kyô hkyó sũ rayuq gi, kyôshi san rã ga htoq e ló ri. ⁴Yhang, kyôshi sãn kat é hkũn, ra-am gi, hkyô má gyó ang mù, nghoq pê èq lé hte zô pyám ri. ⁵Ra-am gi, myi-tse a htu é luqgok yò pé má gyó ang mù, myi-tse a htu é yanmai, luĩ za yuq htoq lô kôle, ⁶amyit a wó chĩn hing é nghut mù, buĩ htoq lô jáng, lhap kyuq pyám bê nghut ri. ⁷Dum ra-am gi, zugyóm hkaũ má gyó ang luĩ, zubyap haũ pé kô lò mù, wup pyám ri. ⁸Ra-am dum nghut jáng, myihpũn bo é jang má gyó ang luĩ, ashi zũ lo é gi, sãn kat é htoq rashô tú, hkyuq xê tú, sum xê tú, myô jat lo é nghut ri. ⁹Gyô yù rã nohkyap dap sũ gi, gyô yù sháng gaq." ga le taĩ ri.

¹⁰Haũ hkũn, chángzô pé gi, Yhâng chyáng lé mù, "Nàng gi, haĩ mù, shĩ bang lé, dangtũ dông taĩ lhê lhú?" ga myĩ akô.

¹¹Haũ jáng, Yhang tũ taĩ é gi, "Mauhkũng mingdãn eq sêng é sê gyo wuĩ é hkyô pé lé sê gyo rã ahko ahkáng, nungmoq lé byĩ to bê, nghut kôlhãng, yhangmoq lé gi, a byi shĩ é nghut lhê. ¹²Wó to sũ lé gi, yhang agùn agó wó rã matũ, jat byi shirã nghut lhê. A wó su chyáng mai kũm gi, yhang wó tô é lé lháng yu pyám byi shirã nghut lhê. ¹³Yhangmoq gi, wú to kôlhãng, a myàng kó; gyô nyi kôlhãng, a wó gyo, a sê gyo kó nghut é yanmai, yhangmoq lé Ngò dangtũ dông taĩ rã é nghut lhê. ¹⁴Haũ gi,

'Nungmoq gi, wó gyô tô nyi kôlhãng, sê gyo kó rã a nghut;

myang tô nyi kôlhãng, wú sé kó rã a nghut.

¹⁵Hkãsu mù gã le, byù shĩ bang gi, myit nhikshĩ jit byuq bê;

yhangmoq é nohkyap gi, a wó gyo kó, myoqjĩ le chũm byuq bekô nghut ri.

Haũ su a nghut le gi, yhangmoq, myoq myàng no gyo mù,

i-myt bun bóng luĩ, lhĩng lò kômù,

Ngò, yhangmoq lé yã gè byi berã nghut lhê.¹⁶☆

gã é, Esai-aq é myiqhtoi dang lé lhoq dik é nghut ri. ¹⁶Nghut kôlhãng, nungmoq é myoq gi, wó myàng mù, nungmoq é nohkyap gi, wó gyô é yanmai, nungmoq gi, hkungsô wó nyi ri. ¹⁷Hkãsu mù gã le, Ngò, nungmoq lé teng za taĩ kôlé, nungmoq wó

☆ 13:15 Esai 6:9-10

myâng, wó gyô é pé lé, myiqhtoî pé eq dingmán bang myo myo gi, myàng nau gyo nau kôlhang, a wó myâng, a wó gyo kó nghut ri.

¹⁸ Ahkuî, kyôshi san sù eq sêng é dangtú é lichyúm lé rago gyô wú keq; ¹⁹ Hkyô má gyó âng é kyôshi gi, mauhkûng mingdán eq sêng é danglù lé wó gyo kôlhang, a sê gyô é yanmai, haû agè ashop sù lé lô mù, yhâng é i-myt hkaû má san kat tô é kyôshi lé, lé yu pyám byî é hui sù lé gá nau é nghut lhê. ²⁰ Luqgok yò pé má gyó âng é kyôshi gi, mungdang lé wó gyo jáng, radá dâm gabú myit èq hap yù kôlhang, ²¹ amyit a wó chin é yanmai, razup zo za yuq mù, mungdâng é yanmai, wuîhkê é eq zing-ri é hui kôjáng, hân hân htak ló byuq é sù lé gá nau é nghut lhê. ²² Zugyóm má gyó âng é kyôshi gi, haû mungdang lé wó gyô yù kôlhang, shí ipyat lhê é myit wui myit hke hkyô pé eq hkyô shuî nghoq jung ngùn hîng zèhkoq èq hup pyâm é yanmai, ashi a wó zuî é sù lé gá nau é nghut lhê. ²³ Nghut kôlhang, myîhpún bo é jang má gyó âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haû yuq ashi zuî é gi, san kat é htoq rashô tú, hkyuq xê tú, sum xê tú, myô jat lo é nghut ri.

Myoqgàm Dangtú

²⁴ Yesuq, yhangmoq lé dangtú dông xoq taî kyô é gi, "Mauhkûng mingdán gi, ge é kyôshi lé, yò má san kat sù rayuq eq du ri. ²⁵ Byu pé yhup myhî tô bum é u lé, yhâng é gyè gi, lé jé mù, guq gàm gyoro má, myoqshi lé sân to hkó luî, taû ló byuq bê nghut ri. ²⁶ Guq gàm yuq lò mù, guq nhâm htoq lo é hkûn, myoqgàm le bo yuq htoq lo ri.

²⁷ Yhumsîng hpô é dui-nhâng zoshâng wuî gi, yhâng chyáng lé jé mù, 'Yhumsîng ê, ge é kyôshi lé za yò má sân tô é a nghut lhú? Myoqgàm pé gi, hkâmai htoq lo é lhú?' ga myî kôjáng, ²⁸ haû yhumsîng hpó gi, 'Gumlau gye èq kut é nghut ri.' ga tû taî ri.

Haû jáng, dui-nhâng zoshâng wuî gi, 'Ngamoq, myoq haû pé lé ê nut pyám râ lé, nàng ô nau ri lhú?' ga myî akô.

²⁹ Haû hkûn, yhang gi, 'Hká nut pyám kó; hkâsu mù gâ le, nungmoq, myoq haû pé lé nut é hkûn, guq gàm pé lé le bo záng

nut pyám kó râ nghut lhê. ³⁰ Kyôshu yoq jé shoq rahá yuq to kó sháng gaq; haû hkûn, myoqgàm pé lé hí hkyin tsíng yù mù, nyhê hkyô pyám râ matú hkyom dîng to luî, guq lé kúm gi, shù yù mù, ngá é chyî má tsíng kat to râ matú, kyô shu bang lé ngò taî râ nghut lhê.' ga tû taî ri." gâ ri.

Angshi Cham Eq Múnchi Dangtú

Mrk 4:30-34; Luk 13:18-21

³¹ Hau htâng, Yesuq gi, yhangmoq lé gotú dangtú ralhum dum xoq taî é gi; "Mauhkûng mingdán gi, byù rayuq èq, yhâng hkyâm má hô tô é angshi cham eq wuî ri. ³² Angshi cham haû gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

³³ Yhang, gotú dangtú dum xoq taî é gi, "Mauhkûng mingdán gi, myiwe rayuq èq sungso mún sum bûng má yu nyhó luî, haû pé banshoq lé wó lhoq dau nhang é múnchi eq wuî ri." gâ ri.

³⁴ Yesuq gi, byù moq mó lé, haû pé banshoq dangtú dông mai chyat taî ri; yhangmoq lé, dangtú a bo é haî lháng a taî wú nghut ri. ³⁵ Haû gi,

"Ngá nhut lé hpóng mù, dangtú dông mai taî râ; mingkan lé sân-hi hpan é mai zaú tô é hkyô pé lé taî sân kyo râ nghut lhê."☆

ga, myiqhtoi dông taî tô é dang lo dik é nghut ri.

Myoqgàm Dangtú Lé Taî Sân Kyô É Hkyô

³⁶ Hau htâng má, Yesuq gi, byù moq mó mai htoq lò mù, yhúmhkaû má wang ló ri. Haû hkûn, Yhâng é chángzô pé gi, Yhâng chyáng lé lô kômù, "Yò mâ é myoqgàm dangtú eq sêng é hkyô lé taî sân kyo laq." ga taî akô.

³⁷ Haû jáng, Yhang tû taî é gi, "Ge é kyôshi san sù gi, haû Byu Yhangzo nghut ri. ³⁸ Yò gi, mingkan nghut ri; ge é kyôshi gi, mauhkûng mingdán é yhangzô pé nghut akô. Myoqgàm pé kúm gi, haû Tsadán é yhangzô pé nghut akô; ³⁹ haû lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htûm é ahkyíng

nghut ri; kyô shu bang gi, maumang lagyô pé nghut akô.

⁴⁰ Haû myoqgàm pé lé, nut yù mù, myi má nyhê pyâm é su, haû mingkan htûm é ahkyíng má dut râ nghut lhê. ⁴¹ Haû Byu Yhangzo gi, Yhâng é maumang lagyô pé lé nhâng râ nghut lhê; haû mù, haû bang gi, hkyô lhoq nghoq nhang é bang banshoq eq agè ashop hkyô kut é bang lhunglhang lé, Yhâng é mingdán mai hkyin she htoq yù mù, ⁴² gyúng nyi é myibung hkyûng hkaû má dú kat pyám kó râ nghut lhê; hau má, ngaubyi ngaù nhap eq zùi kyik kyik shoq hpuzô nyi kó râ nghut lhê. ⁴³ Haû hkûn, dingmán bang gi, yhangmoq Yhângwâ é mingdán má bui su duqbó nyi kó râ nghut lhê. Nohkyap dap sù gi, gyô yù sháng gaq.

Haq Tô É Sutzè Dangtú

⁴⁴ Mauhkûng mingdán gi, yò má haq tô é sutzè eq wuí ri. Sutzè haû lé myang é sù gi, haû lé saí haq to mù, gabú myit eq taû lô luí, yhang wó é banshoq lé ûng pyám mù, yò haû lé wui yu ri.

⁴⁵ Dum, mauhkûng mingdán gi, réng é palhé lé châng ho wún é hpugá hpó eq wuí ri. ⁴⁶ Yhang gi, gyai hpaû é palhé lé myàng jáng, yhang wó é banshoq lé lô ûng pyám mù, haû lé wui yu ri.

Gùn Lé Dangtú Yu É Hkyô

⁴⁷ Mauhkûng mingdán gi, nhông má, ngozo ajà jà lé wó dú nghop yu é gùn eq le wuí ri. ⁴⁸ Gùn haû má ngozo byíng jáng, ngo kóng bang gi, wui yàm má she htoq yù mù, zung to luí, ge é pé lé gi, ngo-pyap má guq kat yù luí, a ge é pé lé gi, dú pyâm akô. ⁴⁹ Haû eq rajung za, mingkan htûm é ahkyíng má le, maumang lagyô pé gi, gyó lé lô mù, agè ashop é bang lé, dingmán bâng chyáng mai gam htoq yù luí, ⁵⁰ ngaubyi ngaù nhap eq zùi kyik kyik shoq hpuzô nyi râ nghut é, gyúng nyi é myibung hkyûng hkaû má dú kat pyám kó râ nghut lhê.

⁵¹ Shí hkyô banshoq lé nungmoq sê gyo bekô lúhú?" gâ ri.

Haû hkûn, yhangmoq gi, "Sê gyo bê." ga tû taí akô nghut ri.

⁵² Hau htâng, Yesuq gi, yhangmoq lé, "Mauhkûng mingdán eq séng luí mhoq yù bê é tarâ sará ó nghut kôle, yhang mhoq é hkyô gi, yhumsing é sut-púnglhung hkaû

mai zè sik zè xau lé yu htoq é yhumsîng hpó rayuq eq wuí ri." ga dum taí ri.

Myiqhtoi, Myoqdong A Wó Dut É Jang

Mrk 6:1-6; Luk 4:16-30

⁵³ Yesuq gi, dangtú haû pé lé ban taí jáng, haû jowò mai htoq e lô bê nghut ri.

⁵⁴ Yhang gi, Yhâng é yhummau má jé lô jáng, byu pé lé, yhangmoq é tarajong má mhoqshit ri; haû hkûn, yhangmoq gi, gyô maú byuq kôluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê lhà?

⁵⁵ Yhang gi, laksîma hpô é yhangzo a nghut lúhú? Yhângnû é myíng gi, Mariq gâ lhê a nghut lúhú? Yhanggû pé gi, Yakuq, Yosep, Simun eq Yudaq gâ é bang a nghut kó lúhú?

⁵⁶ Yhâng nhammó pé le, nga-nhung eq rahá nghut nyi lhê a nghut kó lúhú? Haû su nghut le nhîng, haû pé banshoq lé, Yhang hkâmai wó yu é nghut lhê lhà?" ga myí bùm kômù, ⁵⁷ Yesuq lé myit a ngón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhumsing é yhûm má za, myoqdong a lhaq wó wú é nghut lhê." ga tû taí kat ri.

⁵⁸ Yhangmoq lumjîng myit a bò kô é yanmai, Yesuq gi, haû má, laklaí kumlhá myo myo a kut shit lo nghut ri.

14

Wui-myhup Sará Yohan Shi Byuq É Hkyô

Mrk 6:14-29; Luk 9:7-9

¹ Haû hkûn, mauzau Herut gi, Yesuq eq sêng é ludang lé wó gyo jáng, ² yhâng a-ô mâ é bang lé, "Shí yuq gi, Wui-myhup Sará Yohan nghut ri-nhung; Yhang gi, shi é mai dum dui toq lo é nghut mù, hpungwup a-tsam haû pé lé wó kut é nghut ri." ga taí ri.

³ Herut haû su gâ é gi, yhanggu Hpilip é yhangmyi Herudiaq é yanmai, Yohan lé chyup tuí yù mù, htóng hkyô pyâm é yanmai nghut ri. ⁴ Hkâsu mù gâ le, Yohan gi, yhang lé, "Nàng, myiwe haû lé hâng yu é gi, tarâ a wang é nghut lhê." ga taí byí nyi é yanmai nghut ri. ⁵ Herut gi, Yohan lé sat pyám naû kôlhang, mingbyû wui lé gyuq é yanmai, a wám sat nghut ri; haî mù gâ le, yhangmoq gi, Yohan lé myiqhtoi tsuq nyi kô é yanmai nghut ri.

⁶ Nghut kôlhang, Herut é hkû ladu hkyúm buinyi má, Herudiaq é yhangzo

byizo gi, yhangmoq é hí má gó shit é lé, Herut gi, gyai yhang wú myit nguì mù, ⁷ byizo haú lé, yhang haí dung le haí byi râ ga dakam é danggidiq byî ri. ⁸ Byizo haú gi, yhângnu hpaqchyî byî é lé gyô yù mù, "Shî, bó má, Wui-myhup Sará Yohan é ulhum lé, kat byi laq." ga, Herut lé dúng ri. ⁹ Mauzau hpó gi, myit a ngón dut byuq kôlhang, yhang dakam tô é danggidiq é yanmai le, bíng pê é myoqdong lé tê nau é yanmai le, yhang dúng é lé, byi râ matú, ¹⁰ htóng hkaú má lúng tô é Yohan é ulhum lé hpyit râ hkunmó hkyô kat bê nghut ri. ¹¹ Yohan é ulhum lé bó má kat luí, myiwe zo haú lé byi jáng, myiwe zo haú gi, haú lé yhângnú chyáng yu ló byî ri. ¹² Haú mù, Yohan é chángzô pé gi, yhâng é mâng lé lé yû luí, myhup pyám bekô nghut ri. Hau htâng, yhangmoq gi, Yesuq lé ló taí kyô akô nghut ri.

Byù Ngo Hkyîng Lé Byi Tsô É Hkyô

Mrk 6:30-44; Luk 9:10-17; Yhn 6:1-14

¹³ Yesuq gi, haú hkyô lé wó gyo jáng, haú mai lhaí ji mù, tsím tsâm é jowò shut Yhang baú e ló ri. Haú lé, byu pé wó gyô bùm kôjáng, wà mó pé mai htoq lé lô kômù, hkyî hkyô Yhâng htâng châng e ló akô nghut ri. ¹⁴ Yesuq gi, lhaí mai gyó dap ló é hkûn, byù moq mó nyi to lánng é lé myàng jáng, yhangmoq lé wú shogyo luí, nò bang lé lhoq gê byî ri.

¹⁵ Myinhâng jé lô jáng, haú chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bui le gyum ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wuí kó sháng gaq, yhangmoq lé nhang kat aq hkoi." ga taí akô.

¹⁶ Haú hkûn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tû taí kat ri.

¹⁷ Haú su ga jáng, yhangmoq gi, "Muk ngo long eq ngozo í du za ru wó lhê." ga dum tû taí akô.

¹⁸ Haú jáng, Yesuq gi, "Yu lò keq." ga tû taí mù, ¹⁹ shiwa byu pé lé, wàhu yò má zùng nhang ri. Hau htâng, Yhang gi, haú muk ngo long eq ngozo í du lé yù mù, mauhkung shut tu wú to luí, jeju ban hkya-on jáng, muk lé hpê gàm mù, chángzô pé lé byî ri. Haú chángzô pé gi, shiwa byu pé lé gàm byî akô nghut ri. ²⁰ Yhangmoq banshoq bang zô

gyî bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashî kô nghut ri. ²¹ Haú má zô é bang gi, myiwe wuì eq zoshâng wuì lé a nghap lhôm é za, yuqgè baú ngo hkyîng kô bo ri.

Yesuq, Wui Htoq Má Sô É Hkyô

Mrk 6:45-56; Yhn 6:15-21

²² Yesuq gi, haú shiwa byu pé lé byo ló nhang nyi é hkûn jáng, chángzô pé lé lhaí má wang ji nhâng mù, tû tap shut dap ló lánng nhang ri. ²³ Shiwa byu pé lé nhang pyám é htâng má, Yhang gi, kyûdung râ ga, Yhang baú bùm shut doq e ló ri. Myinhâng chutshúm zó jé shoq, Yhang baú haú má nyi nyi ri. ²⁴ Haú u lé, lhaí gi, gin-gau mai tsómra wê é jowò má jé é hkûn, lài tau mut é yanmai, wuìheng èq gyai yhang lo bat nhûn é hui zô ri.

²⁵ Htang napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri. ²⁶ Haú mù, chángzô pé gi, Yesuq nhông htoq má sô nyi é lé myàng kôjáng, gyuq dàn kômù, "Sobyô ô!" ga gyuq nán é èq taí garû akô nghut ri.

²⁷ Haú jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

²⁸ Haú hkûn, Petruq gi, "Yhumsîng ê, Nàng yhang ru nghut le gi, ngo lé, wuì htoq mai sô lé lô nhâng laq." ga taí kat ri.

²⁹ Haú jáng, Yesuq gi, "Lé lô aq." ga tû taí kat ri.

Haú mù, Petruq gi, lhaí mai gyó mù, wuì htoq mai Yesuq chyáng sô e ló ri. ³⁰ Nghut kôlhang, yhang gi, laidun htan é lé myang kat jáng, wú gyuq luí, wuì má nop ló nyi mù, "Yhumsîng ê, ngo lé hkyi yù laq." ga wut garû kat ri.

³¹ Yesuq gi, radá dâm yhâng é loq lham kat luí, Petruq lé lánng zing to mù, "Lumjîng myit shau sô ê, nàng haí mù úng-âng lhê lhu?" ga taí ri.

³² Yhangnhik, lhaí má wàng kôjáng, laidun le zîm byuq bê nghut ri. ³³ Hau htâng, haú lhaí má lúng tô é bang gi, Yhang lé paí gop mù, "Nàng gi, gè gè yhang, Garai Gasâng é Yhangzo nghut bê." ga taí akô nghut ri.

³⁴ Yhangmoq gi, gû dap ló kômù, Gene-sarat mau má jé wang ló bekô nghut ri.

³⁵ Haú mau mâ é bang gi, Yesuq lé wú sé kôjáng, awui ayàm mâ é bang banshoq lé kyô kat akô. Haú mù, byu pé gi, nõhpyo hui bang lhunglhang lé, shuí lé lô kômù, ³⁶ nõhpyo hui bang lé, Yhâng é bushi htâng má za lhang záng nhâng râ matú dúng tóngbán akô; Yhang lé záng é lhunglhang bang gi, lhoq gê byî é huî bekô nghut ri.

15

Sansêng É Hkyô Eq A Sansêng É Hkyô

Mrk 7:1-23

¹ Hau htâng má, Hparishe pé eq tarâ sará pé ra-am gi, Yerusalem wà mó mai Yesuq chyáng jé lé lô kômù, ² "Náng é chángzô pé gi, haî mù luî, ìchýí îwa pê é htungli lé a cháng kut akô lú? Yhangmoq gi, loq hí a chí é zang zô akô nghut ri." ga, lé taí akô.

³ Haú jáng, Yesuq tû taí é gi, "Nungmoq gi, haî mù, nungmoq é htungli é yanmai, Garai Gasâng é hkunmó lé a cháng kô é lú? ⁴ Hkâsu mù gâ le, Garai Gasang gi, 'Nungmoq é înu îwa lé, hkungga keq.'[✠] ga le, 'Înu îwa lé, nhîng é sù ó yuq nghut kôle, sat pyâm é hui râ lhê.'[✠] ga le, taí tô é nghut lhê. ⁵ Nghut kôlhang, nungmoq taí é gi, 'byù rayuq yuq, yhumsing é yhângnu yhângwa lé byi âng é zè lé, Garai Gasang lé byi râ chyunghuq nghut lhê ga taí é nghut jáng, ⁶ haú yuq gi, yhângwa lé hkungga nó a ra.' gâ akô nghut ri. Haú dông mai, nungmoq gi, nungmoq é htungli é yanmai, Garai Gasâng é mungdang lé he-ngik pyâm akô nghut ri. ⁷ Gegùn labyoq kut bang ê! Nungmoq eq séng luî, myiqhtoi Esai-aq htoî tô é dang gi, têng ri. ⁸ Myiqhtoi dang haú gi,

'Byù shí bang gi, nhut htoq mai za Ngo lé hkunggâ akô;

yhangmoq é myit nhiklhum gi, Ngò eq wê gâng nyi akô.

⁹ Yhangmoq, Ngo lé noqkuq nyi kô é gi, akôm má za nghut nyi ri;

hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.'[✠]

gâ é nghut lhê." gâ ri.

¹⁰ Hau htâng, Yesuq gi, shiwa byu pé lé, Yhâng chyáng wut yù luî, "Gyô yù mù, sé lo keq. ¹¹ Nhut má wang lo é haî jung le,

byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga taí ri.

¹² Haú hkûn, haú chángzô pé gi, Yhâng chyáng lé lô kôluî, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sê lhê lú?" ga myi kôjáng,

¹³ Yhang gi, "Mauhkûng htoq tsáng my-hâng mâ é Ngá Wa a hô tô é agàm hkangmó gi, apûn eq roq nut pyâm é hui râ nghut lhê. ¹⁴ Yhangmoq é yanmai, myit hkâ-myô kó; yhangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she lhâm é nghut le gi, í yuq é yhang donghkong má byit gyó kô râ za nghut lhê." ga tû taí ri.

¹⁵ Haú hkûn, Petruq gi, "Ngamoq lé, dangtú hau é lichyúm taí sân kyo laq." ga taí jáng, ¹⁶ Yesuq gi, "Nungmoq, ahkuî le haú-í yhang go nyi ashi kô luq? ¹⁷ Nhut má wang lo é haî jung le, wamdau hkaú má jé wang ló mù, gungdu mai dum htoq ló é nghut lhê. ¹⁸ Nghut kôlhang, nhut mai htoq lo é gi, myit nhiklhum mai htoq lo é nghut mù, byù lé a sanséng dut nhang ri. ¹⁹ Hkâsu mù gâ le, myit nhiklhum mai htoq lo é gi, agè ashop é dông myit é hkyô pé, byù sat é hkyô, su-myi sulàng lú hkyô, ashop é dông gungsho zùm yap é hkyô, hkaú é hkyô, a tengmán é saksé hkâm é hkyô, lumù gansang é hkyô pé nghut ri. ²⁰ Haú pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga taí ri.

Hkanan Myiwe Myhí Rayuq É Lumjîng Myit

Mrk 7:24-30

²¹ Hau htâng, Yesuq gi, haú mai Turuq eq Sidun mau shut htoq e ló bê nghut ri.

²² Haú hkûn, haú mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsîng ê, ngo lé shogyô yù laq ô! Ngá byizo gi, nat gang wang júng mù, gyai yhang nò gyîn nyi ri." ga taí garû ri.

²³ Nghut kôlhang, Yesuq gi, dang rahkun le a tû taí nghut ri. Haú mù, Yhâng é chángzô pé gi, Yhâng chyáng lé jé kômù, "Myiwe myhí haú lé ló nhang pyâm aq; haî

mù gâ le, yhang gi, nga-nhông é htâng má châng garû nyi ri." ga taî akô.

²⁴ Yesuq gi, "Byuq byuq é sau pé su nghut nyi é Israelaq byu pé chyáng sheq, Ngo lé nhang kat é ru nghut lhê." ga taî ri.

²⁵ Haú hkûn, myiwe myhí haú gi, Yhâng é hí má lé mù hkyihput htuq luí, "Yhumsîng ê, ngo lé garúm yû laq ô!" ga taî ri.

²⁶ Yesuq gi, "Zô wui chyáng mâ é zoshuq lé yù mù, hkuí pé lé byi tsô é jung a nghut." ga tû taî jáng, ²⁷ myiwe myhí haú gi, "Yhumsîng ê, haú kúm nghut ri; nghut kôlhang, hkuí pé lháng, yhumsîng hpô é zohpoq mai gyó é zang cham zang htâng lé, zô akô mhaî." ga dum taî ri.

²⁸ Haú mù, Yesuq gi, "Myiwe zo ê, náng é lumjîng myit gi, kô nyi ri! Nàng dúng é hkyô lé gyo byi bê nghut lhê." ga tû taî ri. Haú hkûn jáng, myiwe myhí hau é byizo le ge byuq bê nghut ri.

Byù Myi Hkyîng Lé Byi Tsô É Hkyô
Mrk 8:1-10

²⁹ Yesuq gi, haú mai htoq ló luí, Galile nhông yàm má ê jé mù, bùm shut doq ló luí, ló zung nyi ri. ³⁰ Haú hkûn, byù moq mó gi, hkyî hten bang, myoqjit bang, gung-yùn bang, nhut jit bang eq nò bang gotû myo myo lé shuí lé lô kômù, Yhâng é hkyî wang má lé nyhi to kô é nghut luí, Yhang gi, haú bang lé lhoq gê byî ri. ³¹ Haú shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkyâ-ôn bum akô nghut ri.

³² Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhangmoq gi, Ngò eq rahá nghut nyi é sum nyí bò bê, haî le a myàng zo kó nghut ri. Yhangmoq, hkyolat má mut yut ló yut kó abe, yhangmoq zòmut to gû lé, Ngò a nhang kat naù." ga taî ri.

³³ Haú hkûn, Yhâng é chángzô pé gi, "Isû é yoso má nhîng, byù shî myhò bang lé luq shoq byi tso râ zoshuq gi, hkarâ é wó râ lhú?" ga myî akô.

³⁴ Yhang gi, "Nungmoq, muk hkâ-myhò long wó akô lhú?" ga tau myi jáng, yhangmoq gi, "Muk nyhit long eq ngo-nú zo ratsuí wó lhê." ga tû taî akô.

³⁵ Haú mù, Yhang gi, byù hpûng lé, myigùng htoq má zùng nhang ri. ³⁶ Hau htâng, Yhang gi, haú muk nyhit long eq ngozo lé yù mù, jeju ban hkyâ-on jáng, myhik hpé luí, haú chángzô pé lé byi jáng, yhangmoq gi, byù hpûng lé gàm byî akô nghut ri. ³⁷ Yhangmoq lhunglhâng bang zô gyî bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsîng yu ashí kô nghut ri. ³⁸ Haú hkûn zô é bang má, myiwe wui eq zoshâng wui lé a nghap lhôm é za, yuqgè wui baú myi hkyîng yuq bo ri. ³⁹ Yesuq gi, byù hpûng lé ló nhang pyâm é htâng má, lhaî má wang ji mù, Magadan mau shut dap e ló bê nghut ri.

16

Kumlhá Dung Kô É Hkyô
Mrk 8:11-13; Luk 12:54-56

¹ Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkûng mâ é kumlhá kut shit râ matú, dúng akô.

² Haú mù, Yhang gi, yhangmoq lé, "Nungmoq gi, myinhâng jé jáng, 'Mau hpong râ nghut lhê, hkâsu mù gâ le, mauhkûng ne ri.' ga le, ³ napkyó lé nghut jáng, 'Hkû-nyí laidun lò râ nghut lhê, hkâsu mù gâ le, mauhkûng nè mù, noq ri.' ga le, lhaq taî akô. Nungmoq gi, mauhkung é isâm lé wú mù sê gam hkoq yû kô é nghut kôlhang, shí ipyat lhê é kumlhá lé gi, a sê gam hkoq yû kó nghut ri. ⁴ Agè ashop é eq lhum a zuí é ipyat shî gi, limik kumlhá lé ho nyi akô; nghut kôlhang, Yonaq é kumlhá mai lai luí, gotû haî le tûn shit râ a nghut." ga taî ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pê É Múnchi
Mrk 8:14-21

⁵ Yhangmoq, nhông hé hpoq shut gû dap ló kô é hkûn, haú chángzô pé gi, muk yu chûng râ lé tô-myhí pyâm akô. ⁶ Haú hkûn, Yesuq gi, "Hparishe pé eq Saduke pê é múnchi lé, sidiq luí, koi pyâm nyi keq." ga, yhangmoq lé taî kat ri.

⁷ Yhangmoq gi, "Nga-nhúng, muk a yu chung é yanmai, haú su ga taî é nghut ri." ga luí, taî lhum bum akô nghut ri.

⁸ Yhangmoq haú su taî lhôm nyi kô é lé Yesuq sé jáng, yhangmoq lé, "Lumjîng myit

shaû é bang ê, muk a bo é hkyô lé, haî mù taî lhûm nyi akô lhú? ⁹ Ahkuî jé shoq, nungmoq gi, a sê gyo shi kó lhú? Muk ngo lông èq byù ngo hkyîng lé byi tsô é htâng, nungmoq hkâ-myhó mung wó dum guq tsîng yù kô é lé le, ¹⁰ muk nyhit lông èq byu myi hkyîng lé byi tsô é htâng, nungmoq hkâ-myhó mung wó dum guq tsîng yù kô é lé le, nungmoq a myit bun kó lhú? ¹¹ Ngò gi, muk eq séng luî taî é a nghut é lé, nungmoq, hkâsu mù a sê gyo kô é lhú? Hparishe pé eq Saduke pé é múnchi lé koi pyám keq nghû taî é ru nghut lhê." ga taî ri. ¹² Haú hkûn sheq, Yhang taî é gi, muk má chung é múnchi lé koi pyám rà matú taî é a nghut e za, Hparishe pé eq Saduke pé é mhoqshit hkyô lé koi pyám rà matú taî é ru nghut é lé, yhangmoq sê gyô akô nghut ri.

Yesuq Lé, Petruq Yín Yu É Hkyô
Mrk 8:27-30; Luk 9:18-21

¹³ Yesuq gi, Kesare-Hpilipi wà mó nâm mâ é mau má jé é hkûn, Yhâng é chángzô pé lé, "Haú Byu Yhangzo gi, ó yuq nghut lhê ga, byu pé taî akô lhú?" ga myî ri.

¹⁴ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotû myiqhtoi rayuq yuq nghut ri ga, taî akô." ga tû taî kôjáng, ¹⁵ Yhang gi, "Haú jáng, nungmoq gi, Ngo lé ó yuq nghut lhê nghu akô lhú?" ga, yhangmoq lé xoq myî ri.

¹⁶ Haú hkûn, Simun Petruq gi, "Nàng gi, rû dui nyi é Garai Gasâng é Yhangzo, Hkrisduq nghut ri." ga tû taî ri.

¹⁷ Haú mù, Yesuq tû taî é gi, "Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé haú hkyô tân shit é gi, byù mai a nghut, mauhkûng htoq má nyi é Ngá é Íwa mai tân shit é ru nghut lhê. ¹⁸ Ngò, nang lé taí lé, nàng gi, Petruq* nghut luî, luqgok shî má, Ngò, Ngá é noqkuq hpúng lé xuq to rà nghut mù, haú moming hkúmdong pé gi, hpúng haú lé wó ûng rà a nghut. ¹⁹ Mauhkûng mingdán é zoqshi pé lé, Ngò, nang lé ap byi rà nghut lhê; myigùng htoq má, nàng tuî to má tuî to lé, mauhkûng htoq má le, tuî to rà nghut lhê; myigùng htoq má, nàng lhoq lhut má lhoq lhut lé, mauhkûng htoq má le, lhoq

lhut byi rà nghut lhê." gâ ri. ²⁰ Hau htâng, Yhang Hkrisduq nghut é hkyô lé, ó lé le a taî kyo rà matú, Yhâng é chángzô pé lé taî hkûm kat ri.

Yesuq Gi, Yhang Shî Râ Lé Hí Te Taî É Hkyô
Mrk 8:31—9:1; Luk 9:22-27

²¹ Yesuq gi, Yhang Yerusalem wà mó má ló mù, suwún wuî, hkyangjong agyi pé eq tarâ sará pé é loq má, zing-rî é myo myo hui zo luî, sat pyâm é hui ra rà nghut kôle, sum nyí nghû rà buinyì má, lhoq toq yu é hui rà nghut é hkyô lé, haú hkûn mai, Yhâng é chángzô pé lé taî kyo hi ló bê nghut ri.

²² Haú mù, Petruq gi, Yhang lé rahkyam shut shuî htoq yù mù, "Yhumsîng ê, haú hkyô Nàng chyáng hkâ-nhám le a dut sháng gaq." ga Yhang lé tân ri.

²³ Yesuq gi, lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq séng é hkyô lé a myit e za, byù eq séng é hkyô lé za myit é sù nghut mù, Ngá é matú myit leqbat jowò nghut ri." ga taî ri.

²⁴ Hau htâng, Yhang gi, Yhâng é chángzô pé lé, "Ngá htâng cháng naú sù ó yuq nghut kôle, yhumsîng gùng yhumsîng he- ngik pyám mù, yhumsîng é tapzîng lé waq chûng luî, cháng ra rà nghut lhê. ²⁵ Hkâsu mù gâ le, yhumsîng é asak lé hkyi yù naú sù ó yuq nghut kôle, asak sum rà nghut lhê; nghut kôlhang, Ngá é yanmai, yhumsîng é asak sùm pyâm é sù kúm gi, asak wó yù rà nghut lhê. ²⁶ Byù gi, mingkan gón lé wó sing to kôlhang, yhumsîng é asak woi-nyí sùm byuq é nghut le gi, yhang é matú, hai akyû bò rà lhú? Byù gi, yhumsîng é asak woi-nyí lé, hai èq wó htaî yù rà lhú? ²⁷ Haú Byu Yhangzo gi, Yhâng Wâ é hpungwup shingkang bo é èq, Yhâng Wâ é maumang lagyô pé eq rahá jé lé lô rà nghut lhê; haú hkûn, Yhang gi, yuq hkangmó lé, yhumsîng kut lai bê eq rajung za akyû byi rà nghut lhê. ²⁸ Ngò, nungmoq lé teng za taí kôlé, ahkuî shí má yap to bang ra-am gi, haú Byu Yhangzo, Yhâng é mingdán eq jé lé lo é lé, a myang é za shî kó rà a nghut." ga taî ri.

* 16:18 Grik đông Petruq gâ é gi, luqgok lé gâ é nghut lhê.

17

Yesuq, Isâm Htaî Lo É Hkyô

Mrk 9:2-13; Luk 9:28-36

¹ Hkyuq nyí laî htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chûng mù, yhangmoq baú myhang é bùm ralhum má doq ló akô.

² Haú má, yhangmoq é myoq hí tê má, Yesuq é ihpyô isâm htaî byuq mù, Yhâng é myoqdong gi, bui su duqbó tô é eq, Yhâng é mebu gi, maubó su hpyu zan tô ri. ³ Haú hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dâng nyo lhûm nyi akô.

⁴ Haú mù, Petruq gi, Yesuq lé, "Yhumsîng ê, shí jowò má nga-nhúng nyi le ge ri. Nâng ô nau é nghut le gi, Nâng é matú ralhum, Mosheq é matú ralhum, Eliyaq é matú ralhum kut, ngò zúm sùm lhum saí bá." ga tâ ri.

⁵ Petruq dang ru tâ nyi ashî le, duqbó é mhut gi, yhangmoq lé htup zîng lô mù, mhut hkaû mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

⁶ Haú su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô nghut ri.

⁷ Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat luí, "Toq keq, hkâgyuq kó." ga tâ ri. ⁸ Yhangmoq tu wú kat kô le, Yesuq mai lai luí, ó lé le a myàng lo kó nghut ri.

⁹ Bùm mai taú gyô lô kô é hkûn, Yesuq gi, "Ahkuí nungmoq myang é hkyô lé, haú Byu Yhangzo shi é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé taí hkûm tô ri.

¹⁰ Haú jáng, chángzô pé gi, "Eliyaq hí lé ra râ nghut lhê ga, tarâ sará pé haí mù taí kô é lhú?" ga, Yesuq lé myî akô.

¹¹ Haú hkûn, Yesuq gi, "Eliyaq hí lé luí, lhunglhang lé hen lajâng to râ gâ é gi, têng lhê. ¹² Nghut kôlhang, Ngò, nungmoq lé taí kôlé, Eliyaq gi, jé lé bê nghut lhê; nghut kôlé, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haú eq rajung za, haú Byu Yhangzo le, yhangmoq é loq má hpuzo

râ nghut lhê." ga tâ ri. ¹³ Haú hkûn sheq, Yhang tâ nyi é gi, Wui-myhup Sará Yohan eq sêng é hkyô nghut é lé, haú chángzô pé sê gyô akô nghut ri.

Nat Wang Júng Sû Lé Lhoq Gê Byî É Hkyô

Mrk 9:14-32; Luk 9:37-45

¹⁴ Yhangmoq, byù moq mó pé chyáng dum taú jé lô kô é hkûn, byù rayuq gi, Yesuq chyáng lé jé mù, hkyihput htuq luí, ¹⁵ "Yhumsîng ê, ngá é yuqzo lé shogyô yù laq; yhang gi, mhûngtuq tuq luí, gyai yhang jamjaú nyi ri. Myihkyóm má le, wuì má le, anum num lêng wàng wàng dut nyi ri. ¹⁶ Yhang lé, Nâng é chángzô pé chyáng shuí ê kôlhang, yhangmoq a wó lhoq gê byi kó nghut ri." ga tâ ri.

¹⁷ Haú mù, Yesuq gi, "Lumjîng myit a bo é eq agè ashop é amyû pé ê, Ngò gi, hkâ-myhâng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuí lé lô keq." ga tâ kat ri. ¹⁸ Yesuq gi, nat gang lé tâ kat jáng, nat gang haú gi, yuqgè zo haú yuq chyáng mai htoq ló byuq bê nghut mù, haú hkûn jáng, yuqgè zo haú gi, ge byuq bê nghut ri.

¹⁹ Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, haí mù, nat haú lé a wó hkat htoq é lhú?" ga, lé myi kôjáng, ²⁰ Yhang gi, "Nungmoq é lumjîng myit shaú é yanmai nghut ri. Ngò, nungmoq lé teng za taí kôlé, nungmoq é lumjîng myit angshi cham í za hkâlhang bò kô é nghut le gi, bùm shí lé, 'Hé shut htot ló aq.' ga tâ le, htot râ nghut lhê. Nungmoq a wó kut é haí lhang joq râ a nghut. ²¹ Shí jung gi, kyûdung é eq zoshuq gám é dông za a nghut jáng, a htoq ló é nghut lhê.*" ga dum tâ ri.

²² Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haú Byu Yhangzo gi, byu pé é loq má ap pyâm é hui zo râ nghut lhê. ²³ Haú bang gi, Yhang lé sat pyâm kó râ nghut lhê; nghut kôlhang, Yhang gi, shi é htâng sum nyi nghû râ nyi má lhoq dui toq é hui râ nghut lhê." ga tâ ri. Haú mù, haú chángzô pé gi, gyai yhang gyô yón nyi bekô nghut ri.

Noqkuq Yhûm Hkansê Kat É Hkyô

²⁴ Yesuq eq Yhâng é chángzô pé gi, Kaperna-um wà má jé kô é hkûn, noqkuq

* 17:21 Chyúbun shí gi, chyúmding myo myo má a bo é nghut lhê.

yhûm hkansê hkyuî bang gi, Petruq chyáng lé jé kômù, "Nungmoq é sará gi, noqkuq yhûm hkansê a kat lúhú?" ga myî akô.

²⁵ Petruq gi, "Kat lhê." ga tû taí ri.

Hau htâng, Petruq yhúmhaû má wang ló le, Yesuq hí lhom taí é gi, "Simun ê, mingkan hkohkam pé gi, kang eq hkansê pé lé, ô pê chyáng mai guq yu akô lúhú? Yhumsing byu pê chyáng mai lúhú? Haû a nghut jáng, góbâng chyáng mai lúhú? Nang, hkâsu wó myit lhê lúhú?" gâ ri.

²⁶ Haû mù, Petruq gi, "Góbâng chyáng mai nghut ri." ga tû taí jáng, Yesuq gi, "Haû su nghut le gi, yhumsing byu pé gi, lut akô nghut ri. ²⁷ Nghut kôlhang, yhangmoq é i-myit a ngón a dut kó sháng gaq, nhông má ê mù, ngo-nhe ê hkyó aq. Sâng-hi wó nhê yu é ngozô é nhut lé lêng há kat jáng, ngùn htingchap rachap lé myàng râ nghut lhê. Haû lé yù mù, Ngá é matú eq náng é matú, yhangmoq lé ló byi aq." ga taí ri.

18

Kô Dik Sû Gi, Ó Yuq Nghut Lhê Lúhú?

Mrk 9:33-37, 42-48; Luk 9:46-48; 17:1-2

¹ Haû hkûn, haû chángzô pé gi, Yesuq chyáng lé jé kômù, "Mauhkûng mingdán má, kô dik sù gi, ó yuq nghut lhê lúhú?" ga myî akô.

² Yesuq gi, zoshâng zo rayuq lé wut yù mù, yhangmoq é gung gûng má shap to luî, ³ taí é gi, "Ngò, nungmoq lé teng za taí kôlé, nungmoq gi, myit htaí lhik luî, zoshâng zo wuî su dut kô é za a nghut jáng, mauhkûng mingdán má hkâ-nhám le wó wâng kó râ a nghut. ⁴ Haû mù, zoshâng zo shí yuq su, yhumsing é i-myit wó lhoq nyhum é sù ó yuq nghut kôle, mauhkûng mingdán má, kô dik sù nghut ri.

⁵ Shî sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê. ⁶ Nghut kôlhang, Ngo lé lumjìng é zoshâng wuî mâ é rayuq yuq lé, mara kut shut nhang é sù gi, yhâng é lingzing má luqlú long mó tûi hut byi luî, nik é wuimau má, dú hkyô pyâm é huî é nghut le gi, yhâng é matú je gè râ nghut lhê.

⁷ Haû mingkan gi, byu pé lé mara kut shut nhâng jang joq é yanmai, dingnyé wó ri. Haû mara kut shut nhâng hkyô gi, htoq

lugu bê; nghut kôlhang, haû lé lhoq htoq sù gi, dingnyé wó ri. ⁸ Náng é loq èq, a nghut jáng, náng é hkyi èq, nang lé mara kut shut nhang é nghut le gi, haû lé hpyit dú pyâm aq. Ahtum abyuq é myi má, hkyî hkúm loq hkúm gû dú hkyô pyâm é hui râ htoq má, hkyî loq a hkúm é za, asak wó yu é nghut le gi, náng é matú je ge ri. ⁹ Náng é myoqjì èq, nang lé mara kut shut nhang é nghut le gi, haû lé lap choq yù mù, dú pyâm aq; myoqjì í jí dap gû ngaraí myi má dú hkyô pyâm é hui râ htoq má, myoq rají eq za, asak wó yu é nghut le gi, náng é matú je ge ri.

Byuq Byuq É Sau

Luk 15:3-7

¹⁰ Shî sù é zoshâng zo wuî mâ é rayuq lé lhang a wú tiq râ matú, sidiq nyi keq. Hkâsu mù gâ le, Ngò, nungmoq lé taí kôlé, mauhkûng mâ é yhangmoq é maumang lagyô pé gi, mauhkûng htoq mâ é Ngá Wâ é myoqdong lé, hkâ-nhám le myang nyi akô. ¹¹ (Hkâsu mù gâ le, haû Byu Yhangzo gi, byuq byuq bê bang lé hkyi yù râ matú, jé lé é nghut lhê.)*

¹² Byù rayuq gi, sau rashô du wó é nghu sháng, sau haû gû mâ é radu byuq byuq é nghut jáng, haû gaú xe gaú du lé, bùm pé má nyhi pyâm to luî, byuq byuq é sau lé a châng ho é nyi râ lúhú? Haû lé, nungmoq hkâsu wó myit ngam akô lúhú? ¹³ Ngò, nungmoq lé teng za taí kôlé, yhang gi, haû byuq byuq é sau haû lé myang ho é hkûn, a lám byuq é sau gaú xe gaú dû é matú gabú é htoq má, haû dû matú je riyhang gabú ri. ¹⁴ Haû eq rajung za, mauhkûng htoq mâ é nungmoq é îwa gi, shî tiq bang mâ é rayuq htên byoq byuq râ lé lhang, ô nau é a nghut.

Mara Kut Shut É Gumang Hpó Lé Hkâsu Kut Râ Hkyô

¹⁵ Náng é gumang hpó, nang lé mara kut shut é nghut jáng, yhâng chyáng ê mù, nungnhik baú za nghut é hkûn, yhâng é mara lé tûn shit aq. Yhang, náng é dang lé gyô é nghut jáng, nàng gi, gumang rayuq dum wó bê nghut ri. ¹⁶ Nghut kôlhang, yhang, náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lòm jáng, wó lhoq teng sháng gaq.'* gâ tô é eq rajung za, nàng, gotú

* 18:11 Bun zo shí gi, chyúmding myo myo má a bo é nghut lhê. ✧ 18:16 Tarâ Pun 19:15

byù ra-í yuq lé shuí chùng aq. ¹⁷Yhang gi, haú bâng é dang lé le a lhom yu é nghut jáng, haú hkyô lé, noqkuq hpúng má shit kyo aq; hpúng é dang lé le a gyô é nghut jáng, yhang lé, a lumjúng é byù rayuq dông le, kang guq sù rayuq dông le sôn pyám aq.

¹⁸Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkúng htoq má le, tuí to râ nghut lhê; myigùng htoq má, nungmoq lhoq lhut má lhoq lhut lé, mauhkúng htoq má le, lhoq lhut byi râ nghut lhê.

¹⁹Ngò, nungmoq lé dum taí kôlé, myigùng htoq má, nungmoq mâ é í yuq myit hui luí, haí lé dung kôlhang, mauhkúng htoq mâ é Ngá Wa gi, haú nhik lé gyo byi râ nghut lhê. ²⁰Hkâsu mù gâ le, Ngá myíng lé lang luí, í yuq sum yuq zup zúng é jang hkâmá nghut kôlhang, haú bâng é gyoro má Ngò nyi lhê." gâ ri.

Shogyo Nhikmyin A Sê É Jùn Hpô É Dangtú

²¹Haú hkûn, Petruq gi, Yesuq chyáng huí é mù, "Yhumsing ê, ngá é gumang, ngo lé mara kut shut é nghut le, yhang lé hkâmýhó dâm mara hkyut byi ra râ lúhú? Nyhit dâm jé shoq hkyut byi ra râ lúhú?" ga myí ri.

²²Haú jáng, Yesuq tû taí é gi, "Ngò, nang lé taí lé, nyhit dâm za a nghut, nyhit xe nyhit tú dâm hkyut byi râ lhê.

²³Mauhkúng mingdán gi, yhumsing é dui-nhâng zoshâng wui é jihpán lé jep nau é hkohkâm rayuq eq du ri. ²⁴Yhang gi, jihpán lé jep hi ló é u lé, yhâng chyáng ngùn wan myo myo chyîn dap to sù lé shuí lé lo akô. ²⁵Haú yhumsing hpó gi, haú yuq chyîn a wó xap é yanmai, chyîn wó yû râ matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ûng pyám râ hkunmó hkyô kat ri.

²⁶Haú mù, dui-nhâng zoshâng haú yuq gi, yhâng é hí má hkyihput htuq luí, 'Ngo lé myit hîng byi shi laq; banshoq lé, ngò xap râ.' ga dúng tôngbán ri. ²⁷Haú dui-nhâng zôshang é yhumsing hpó gi, haú yuq lé wú shogyo luí, chyîn banshoq lhut pyám byi mù, nhang kat ri.

²⁸Nghut kôlhang, dui-nhâng zoshâng haú gi, htoq ló mù, yhang lé, denari† rashô chyîn dap tô é dui-nhâng zoshâng luzúm rayuq lé myàng jáng, haú yuq é lingzing

má gyaq myhik zing to mù, 'Ngo lé dap tô é chyîn hân xap aq!' ga taí ri.

²⁹Haú hkûn, yhâng é luzúm dui-nhâng zoshâng haú gi, yhâng é hí má hkyihput htuq luí, 'Ngo lé myit hîng byi shi laq; ngò xap râ.' ga dúng tôngbán ri.

³⁰Nghut kôlhang, yhang gi, a gyo byi e za, yhâng é chyîn dum wó xap é hkûn jé shoq, haú yuq lé htóng hkyô pyám nhâng ri. ³¹Gotû dui-nhâng zoshâng wui gi, haú hkyô lé myàng kôjáng, i-myit wú nô kôluí, yhangmoq é yhumsing hpó lé, haú hkyô banshoq ló taí kyô akô.

³²Haú mù, haú yhumsing hpó gi, dui-nhâng zoshâng haú lé wut hâng yù mù, 'Agè ashop é dui-nhâng zoshâng ê, nang, ngo lé dúng tôngbán é yanmai, nang, ngo lé dap é chyîn banshoq lé, ngò lhut pyám byi bê nghut lhê mhaí. ³³Haú su é nhîng, ngò, nang lé shogyô yu é su, nang é luzúm dui-nhâng zoshâng lé, nang ge shogyô yu lhê a nghut lúhú?' ga taí luí, ³⁴yhang gi, nhikjum yo mù, yhâng é chyîn ban xap é hkûn jé shoq, jamjau hui zo râ matú, yhang lé, htóng suwún pè chyáng ap byi pyám bê nghut ri.

³⁵Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkúng htoq tsáng myhâng mâ é Ngá Wa le, nungmoq lé haú dông kut râ nghut lhê." gâ ri.

19

Myi Làng Gâng É Hkyô

Mrk 10:1-12

¹Yesuq gi, mhoqshit é dang haú pé lé ban taí jáng, Galile mau mai htoq ló mù, Yodan làng tû tap mâ é Yuda mau má ê jé ri. ²Byù moq mó gi, Yhâng htâng cháng kô é nghut mù, Yhang gi, haú bang mâ é nòhpyo hui bang lé, haú má lhoq gê byi ri.

³Haú hkûn, Hparishe pé ra-am gi, Yhâng chyáng lé jé kômù, Yhang lé chyam wú é dông, "Byù rayuq gi, hai hkyô mai nghut nghut, yhumsing é yhangmyi lé lhoq kâng pyâm le, tarâ wang lhê lúhú?" ga myí akô.

⁴Haú jáng, Yhang tû taí é gi, "A-nham sâng-hi lé, Hpân Sù, 'byu hpan é hkûn, yuqgè eq myiwe lé hpan é nghut lhê.'*

⁵Hau é yanmai, yuqgè gi, yhumsing é înu

† 18:28 Denari rachap gi, ra-nyí lhê é byù rayuq é zuihpau eq wuí ri. ☆ 19:4 Apûn 1:27

îwâ chyáng mai htoq luí, yhangmyi eq rahá rading ralhum za kut nyî mù, yhangnhik gi, gungsho ralhum za dut byuq kó rà nghut lhê.⁶ ✧ ga kâ tô é lé, nungmoq a nghap wú kó lhú? ⁶Haû mù luí, yhangnhik gi, í yuq a nghut lô e za, rayuq za dut bê nghut ri. Haû mù luí, Garai Gasang lhoq tsûm tô é lé, byû gi, a lhoq kang sháng gaq." gâ ri.

⁷Haû hkûn, yhangmoq gi, "Haû lé nhîng, yuqgè rayuq gi, lhoq kang laiká za ká byi mù, yhangmyi lé wó nhang pyâm lhê ga, haî mù, Mosheq, hkunmó hkyô tô lhê lhú?" ga, Yhang lé dum taû myî akô.

⁸Haû mù, Yesuq gi, "A-nham sâng-hi mai gi, haû dông a nghut. Nghut kôlhang, nungmoq é myit nhiklhum htân kô é yan-mai, nungmoq é yhangmyî pé lé lhoq kang râ ahkáng, Mosheq byî tô é ru nghut lhê. ⁹Ngò, nungmoq lé taí kôlé, sulàng lú é za a nghut jáng, yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù dut bê." ga, yhangmoq lé dum tâi ri.

¹⁰Haû hkûn, haû chángzô pé gi, "Myi làng hkyô má haû dông ru nghut le gi, a yu le lháng je ge nyo ri." ga taí akô.

¹¹Haû mù, Yesuq gi, "Yuq hkangmó gi, dang haû lé wó hap yu é a nghut, wó hkâm râ jeju wó é bang za sheq, wó hap yu é nghut lhê. ¹²Byû ra-am gi, înú unghkaû mai yhang, yuqgè a jé gû hku lé lo é bang nghut akô; ra-am gi, gôbâng èq kut é yanmai, yuqgè a jé dut byuq akô; ra-am nghut jáng, mauhkûng mingdán é matú, yuqgè a jé râ dông kut yu pyâm akô nghut ri. Shí hkyô lé wó hap yù sù gi, hap yù sháng gaq." ga dum taí ri.

Zoshâng Wui Eq Yesuq

Mrk 10:13-16; Luk 18:15-17

¹³Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuí lé lo akô. Haû chángzô pé kúm gi, haû shuí lé lô bang lé lhom tân hkûm akô nghut ri.

¹⁴Nghut kôlhang, Yesuq gi, "Haû zoshâng wui lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, mauhkûng mingdán gi, haû sù é bâng é mingdán ru nghut lhê." ga taí kat ri. ¹⁵Yhang gi, zoshâng wui htoq má loq ke

shimân byi mù, haû jowò mai htoq lô bê nghut ri.

Sùt Wó É Zorâm Rayuq É Hkyô

Mrk 10:17-31; Luk 18:18-30

¹⁶Byû rayuq gi, Yesuq chyáng lé jé mù, "Sarâ ê, ahtum abyuq é asak wó yû râ matú, ge é muzó haî kut ra râ lhú?" ga myî ri.

¹⁷Haû jáng, Yesuq gi, "Ge é hkyô eq séng luí, haî mù Ngo lé myî lhê lhú? Ge é Sû gi, rayuq za nyi lhê. Nàng, asak dui é má wàng nau é nghut le gi, jep é tarâ pé lé cháng aq." ga tâi ri.

¹⁸Haû yuq gi, "Hká gû lé lhú?" ga dum myi jáng, Yesuq gi, "Byû hkâsat, su-myi hkâlú, hkâhkau, a teng a mán é saksé hkâhkám, ¹⁹nángnu nángwa lé hkungga aq, ✧ ga le, 'náng gûng lé nàng chyitdap e su, náng é chyangnâm mâ é bang lé le chyitdap aq.' ✧ ga le bo tô ri." ga tâi kat ri.

²⁰Haû hkûn, zorâm hpó haû gi, "Haû pé banshoq lé, ngò cháng bê nghut lhê; haî kut râ ashî lhú?" ga dum taû myî ri.

²¹Yesuq gi, "Nàng, gumjup sù dut nau le gi, lô mù, nàng wó é sutzè pé lé ûng pyám luí, myùng bang lé byî pyám aq; haû jáng, nàng, mauhkûng htoq má sutzè wó râ nghut lhê; haû mù, Ngá htâng lé cháng aq." ga tâi ri.

²²Zorâm hpó haû gi, sutzè gyai wó sù nghut é yanmai, dang haû lé wó gyo jáng, gyai yhang myit a ngón é èq lô byuq bê nghut ri.

²³Hau htâng, Yesuq gi, Yhâng é chángzô pé lé, "Ngò, nungmoq lé teng za taí kôlé, sutzè wó bang gi, mauhkûng mingdán wó wâng râ gyai yhang wui ri. ²⁴Hau htoq agó, Ngò, nungmoq lé taí kôlé, sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." ga tâi ri.

²⁵Haû chángzô pé gi, haû su gâ é lé wó gyo kôjáng, haû ru nghut le gi, ó yuq za hkyi yu é hui râ nghut lhê lhú?" ga Yhang lé myî akô nghut ri.

²⁶Haû hkûn, Yesuq gi, yhangmoq lé wú kat mù, "Haû hkyô lé byû mai gi, wó kut râ a nghut; nghut kôlhang, Garai Gasang gi, lhunglhang lé wó kut é Sù nghut lhê." ga tâi ri.

²⁷ Haú hkûn, Petruq gi, Yhang lé, "Ng-amoq gi, wó é gû lhunglhang lé tô pyâm to luí, Náng htâng cháng bê nghut lhê. Ngamoq, haí wá wó râ nghut lhê lúhú?" ga myí kat ri.

²⁸ Haú mù, Yesuq tû taí é gi, "Ngò, nungmoq lé teng za taí kôlé, lhunglhang lé asik dum saí dut nhang é má, haú Byu Yhangzo gi, Yhâng é hpungwup bo é hkohkâm-tanghkuq má zùng tô é hkûn, Ngá htâng châng é bang nungmoq le, hkohkâm-tanghkuq raxe í lhûm htoq má zùng to kômù, Israelaq amyû raxe í hú lé jéyáng kó râ nghut lhê. ²⁹ Ngá é yanmai, yhumsing é yhûm, nhiktâng wuì, ínu íwa, zo dù wuì eq yò pé rajung jung lé tô pyâm tô é sù ó yuq nghut kôle, rashô tú akyû myo jat shoq wó râ nghut é htoq agó, ahtum abyuq é asak le, wó yû râ nghut lhê. ³⁰ Nghut kôlhang, hí nghut nyí é bang myo myo gi, htâng gyó byuq kó râ nghut mù, htâng gyó nyí bang yuq gi, hí bekô râ nghut lhê.

20

Tsibiyiq Hkyâm Mû Zui Bang Lé Dangtú Yu É Hkyô

¹ Hkâsu mù gâ le, mauhkûng mingdán gi, yhumsing é tsibiyiq hkyâm má mù zui nhâng râ langchyang é lûng râ ga, napsûn noq le htoq e ló é hkyâm yhumsing eq du ri. ² Yhang gi, ra-nyí é matú denari rachap byi râ đông, haú bang eq myit huí yù mù, yhangmoq lé, yhâng é tsibiyiq hkyâm má nhang hâng kat ri.

³ Napkyó gau hkyíng* kô má, yhang gi, htoq e ló le, hai mù le a kut é za, gài má yap tô é bang ra-am lé ê myang ri. ⁴ Haú mù, yhang gi, haú bang lé, 'Nungmoq le, ngá é hkyâm má mù ê zui keq; byi âng é ahpau, ngò, nungmoq lé byi râ nghut lhê.' ga taí jáng, yhangmoq gi, e ló bekô nghut ri.

⁵ Hau htâng, yhang gi, raxe í hkyíng má le, myinhâng sum hkyíng kô má le, dum htoq ê mù, haú eq rajung za langchyang pé ê lung kat ri. ⁶ Myinhâng ngo hkyíng kô má, yhang dum htoq e ló wú le, góbang ra-am le yap tô bum é lé, ê myâng mù, haú bang lé, 'Nungmoq gi, haí le a kut é za, ra-nyí buí haí mù shí má yap tô bum akô lúhú?'

* 20:3 Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hi lhê.

ga myi jáng, ⁷ haú bang gi, 'Ngamoq lé, ó yuq eq le a lûng kô é yanmai nghut lhê.' ga tû taí akô.

Haú hkûn, yhang gi, 'Nungmoq le, ngá é hkyâm má mù ê zui keq.' ga taí ri.

⁸ Myinhâng jé jáng, tsibiyiq hkyâm yhumsing gi, yhâng é mù shuí u sù lé, 'Haú langchyang pé lé ji yù mù, je htâng má lung yu é bang mai hí luí, sâng-hi lung yu é bang jé shoq, mù zui hpau byi aq.' ga taí ri.

⁹ Myinhâng ngo hkyíng má mù wàng bang le, denari rachap chap wó yu bum akô. ¹⁰ Haú mù, je hí má mù wàng

bang gi, yhangmoq je myo wó nhô ngam akô. Nghut kôlhang, yhangmoq le, rayuq denari rachap chap za wó akô nghut ri.

¹¹ Yhangmoq gi, haú myhó za wó yu bùm kô é yanmai, haú hkyâm yhumsing lé, ¹² 'Shí bang gi, je htâng má mù lé wâng mù, nayí rahkum za mù zui kôlhang, nàng gi, ra-nyí buigyùm chap buí htân yò má mù zui é bang ngamoq eq rajung za byí ri.' ga mara hûn dang taí akô.

¹³ Nghut kôlhang, haú hkyâm yhumsing gi, haú bang má é rayuq lé, 'Buinùm hpó é, ngò, nang lé a tarâ é đông kut é a nghut. Denari rachap byi râ nghû, nàng eq ngò myit huí to bê a nghut lúhú? ¹⁴ Nàng wó âng é lé yu chûng mù, ló aq. Je htâng má mù lé wang é sù lé le, nang lé byí é myhó, ngò byí nau ri. ¹⁵ Ngá é ngùn lé, ngò kut nau é su a ge kut lúhú? Ngò, ge é kut le, nàng manôn ri lúhú?' ga taí ri.

¹⁶ Haú mù luí, htâng gyó nyí bang gi, hí bekô râ nghut mù, hí nghut nyí bang gi, htâng gyó byuq kó râ nghut lhê." gâ ri.

Yesuq Gi, Yhang Shí Râ Hkyô Lé Dum Taí Ri Mrk 10:32-34; Luk 18:31-34

¹⁷ Ahkuí, Yesuq gi, Yerusalem wà mó shut doq ló nyi é u lé, haú chángzo raxe í yuq lé, gotû kut wut yù mù, ¹⁸ "Nga-nhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pé é loq má ap byí pyâm é huí râ nghut lhê; haú bang gi, Yhang lé, shí râ mara byi kó râ nghut é htoq agó, ¹⁹ jóng pyâm é, nhuq bat é eq tapzîng má jén sat pyâm é huí râ matú, haú tûngbau pé é loq má ap pyám kó râ nghut lhê. Nghut kôlhang, Yhang gi, sum nyí nghû râ buinyí

má, lhoq dui toq é dum hui râ nghut lhê." ga taí ri.

Zô N्हik Matú Ínu Èq Dung Byí É Hkyô

Mrk 10:35-45

²⁰ Hau htâng má, Zebedi é yhangzô nhik-tang é yhângnu gi, yhangzô nhik eq rahá jé lé lô kômù, rajung dung râ matú, Yesuq é hí má hkyihput htuaq nyi ri.

²¹ Haú mù, Yesuq gi, "Nàng, haí ô nau ri lhú?" ga yhang lé myi jáng, yhang gi, "Náng é mingdán má, shí ngá zô nhiktâng lé, Náng é loqyò hkyam má rayuq, loqpaí hkyam má rayuq kut, zùng râ ahkáng byi laq." ga taí ri.

²² Haú hkûn, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq râ góm† lé, nungnhik wó shuq kó râ lhú?" ga myi jáng, yhangnhik tâng gi, "Wó shuq lhê." ga tâ taí akô nghut ri.

²³ Haú mù, Yesuq gi, yhangnhik lé, "Ngò shuq râ góm lé, nungnhik shuq ra kó râ za nghut lhê. Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byí jung a nghut. Jowò haú pé gi, Ngá Wa hen to byi bâng é matú za ru nghut lhê." ga taí ri.

²⁴ Gotú chángzo raxê yuq gi, haú hkyô lé wó gyo kôjáng, haú nhiktâng lé nhik-yô akô nghut ri. ²⁵ Haú mù, Yesuq gi, yhangmoq banshoq bang lé wut tsing yù luí, "Tungbaù pé lé uphkan é ga bang gi, tungbaù pé lé up zô nyi kô é hkyô lé le, haú eq rajung za, yhangmoq é ming up suwún wú le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê. ²⁶ Nungmoq chyáng gi, haú su a dut kó sháng gaq; haú Byu Yhangzo lhang gi, dojaú é lé hkam yù râ matú jé lé é a nghut é za, dojaú râ matú eq byù myo myô é matú, shíhtaí gunglik hkungga dông, Yhâng é asak lé byi pyám râ matú sheq, jé lé é ru nghut é su, ²⁷ nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra râ nghut lhê. ²⁸ Hau htoq agó, nungmoq má ushuq dut naù sù ó yuq nghut kôle, nungmoq é jùn dut ra râ nghut lhê." ga taí ri.

Myoqjit Í Yuq Myoq Dum Myang É Hkyô

Mrk 10:46-52; Luk 18:35-43

²⁹ Yesuq eq Yhâng é chángzô pé gi, Yerihko myuq mai htoq ló nyi kô é hkûn, byù moq mó gi, yhangmoq é htâng má châng e ló bum akô. ³⁰ Haú hkyô yàm má zung tô é myoqjit í yuq gi, Yesuq laí ló nyi é hkyô lé wó gyo kôjáng, "Dawiq é Yhangzo, Yhumsing ê, ngá-nhik lé shogyô yù laq ô!" ga, wut garû kat akô nghut ri.

³¹ Byù moq mó gi, yhangnhik zím byuq râ matú tân hkúm kôlhang, yhangnhik gi, "Dawiq é Yhangzo, Yhumsing ê, ngá-nhik lé shogyô yù laq ô!" ga, je riyhang htê mó eq wut garû kat akô nghut ri.

³² Haú mù, Yesuq gi, yap kat mù, "Ngò, nungnhik lé haí kut byi râ ô nau akô lhú?" ga, yhangnhik lé wut myí kat ri.

³³ Haú hkûn, yhangnhik gi, "Yhumsing ê, ngá-nhik myoq myàng nau ri." ga tâ taí akô.

³⁴ Yesuq gi, yhangnhik lé wú shogyo luí, yhangnhik é myoqjí má ê záng byí ri. Haú hkûn jáng, yhangnhik gi, myoq wó myàng kômù, Yhâng htâng cháng bekô nghut ri.

21

Yesuq, Yerusalem Wà Mó Má Wang E Ló É Hkyô

Mrk 11:1-11; Luk 19:28-38; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyâng lo nyi kô é hkûn, Tsanlun Bùm mâ é Bethpage wà má jé ló kôjáng, Yesuq gi, chángzo í yuq lé, ² "Nungnhik, hí mâ é wà má ê keq; wà haú má, logúng zing radu lé, logúng zo eq rahá tuí to lán é lé, ê myàng kó râ nghut lhê; haú lé hpyi yù mù, Ngá chyáng she lò keq. ³ Byù rayuq yuq, nungnhik lé rajung jung gâ lò jáng, 'Shí í du lé, haú Yhumsing chùng râ ri.' gâ nghú tâ taí keq; haú jáng, yhang, radá dâm nhâng byi râ nghut lhê." ga Yesuq taí luí, nhang kat ri.

⁴ Haú gi, myiqhtoi dang lhoq dik râ matú dut lo é nghut ri. ⁵ Myiqhtoi dang haú gi, "Zi-un byizo* lé, shí su nghú keq; 'Wú aq, náng é hkohkâm gi, nú-nhâm é myit eq logúng htoq má ji mù, nghut bê, logúng zo htoq má ji mù, náng chyáng lé lô bê nghut ri.'"☆ ga ri.

† 20:22 Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê. * 21:5 Zi-un byizo gâ é lichyúm gi, Yerusalem byu pé gâ é nghut lhê. ☆ 21:5 Zhk 9:9

⁶ Haû chángzô nhik gi, e ló mù, Yesuq taî kat é eq rajung za ê kut bekô nghut ri.

⁷ Yhangnhik gi, logúng me lé she lò mù, yhangnhik é buhîng pé lé, haû logúng mê é htoq má ke byi kôjáng, Yesuq gi, doq jî ri.

⁸ Byù moq mó mâ é myo myo gi, yhangmoq é buhîng lé, hkyô má hkyut hkang byî akô; ra-am gi, mhandíng pé lé zân hkyô yù mù, hkyô má hkang byî akô nghut ri. ⁹ Yhâng é hí má htâng má châng sô nyi bum é bang gi,

"Dawiq é Yhangzo gi, hosana† nghut nyî sháng gaq ô!"

"Haû Yhumsing é myìng mai jé lé lô Sû gi, hkungsô wó nyî sháng gaq ô!"✠

"Htoq tsáng myhâng má, hosana nghut nyî sháng gaq ô!"

ga luî, taî garû bum akô nghut ri.

¹⁰ Yesuq, Yerusalem wà mó má wang ló é hkûn, rawà gón é bang gi, gabyông lo bùm kômù, "Shí yuq gi, ó wá nghut lhê lhà?" ga luî, myi lhùm bum akô.

¹¹ Haû hkûn, byù moq mó gi, "Shí yuq gi, Galile mau, Nazaret wà byù Yesuq gâ é myiqhtoi nghut lhê." ga taî akô nghut ri.

Yesuq, Noqkuq Yhûm Lé Lhoq Sansêng Pyâm É Hkyô

Mrk 11:15-19; Luk 19:45-48; Yhn 2:13-22

¹² Yesuq gi, noqkuq yhûm má wang ê mù, haû mâ é zè ung zè wuì kut nyi é bang banshoq lé, hkat htoq pyám luî, ngùn htaî zo bâng é siboî pé eq hpûngkyui ung zo bâng é tanghkuq pé lé, tu mhuq pyám byî ri. ¹³ Haû hkûn, Yhang gi, "Ngá yhûm gi, kyûdung yhûm ga râ nghut lhê."✠ ga kê to kôlhang, nungmoq gi, jowò shî lé 'damaq hkyûng'✠ kut nyi akô." ga, yhangmoq lé taî ri.

¹⁴ Yesuq, noqkuq yhûm má nyi tô é hkûn, myoqjit bang eq hkyî hten bang Yhâng chyáng lé lô kômù, Yhang gi, haû bang lé lhom lhoq gê byî ri. ¹⁵ Nghut kôlhang, hkyangjong agyi pé eq tarâ sará pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhûm má zoshâng wuì garû nyi bùm kô é lé le, myàng kôjáng, wú nhik-yô bum akô nghut ri.

¹⁶ Haû mù, yhangmoq gi, "Zoshâng shí bang haî taî nyi kô é lé, Nàng wó gyô lhê lhú?" ga, Yesuq lé myi kôjáng, Yhang gi, "Wó gyô ri. Nungmoq gi,

'Zoshâng wuì eq nyheqnú pê é nhut mai hkya-on kungtôn râ matú, nàng la-jâng to bê nghut ri.'✠

ga kê tô é lé, Chyúmdang má a nghap wú kó lhú?" ga yhangmoq lé taî ri.

¹⁷ Hau htâng má, Yhang gi, haû bang lé nyhi to luî, wà hkaû mai htoq ló mù, Behtani wà má ê jé luî, haû myîn, haû má bíng yu ri.

Maihpáng Gâm Nyhuî Kyuq Shi Byuq É Hkyô

Mrk 11:12-14, 20-24

¹⁸ Yhang gi, htang napkyó noq le, Yerusalem wà mó shut dum taû ló é hkûn, hkyô má zòmùt hui bê nghut ri. ¹⁹ Haû mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai luî, haî lé le a myàng nghut ri. Haû mù, Yhang gi, shigâm haû lé, "Nàng má, hkâ-nhám le ashi a zui sháng gaq." ga taî kat ri. Haû hkûn jáng, agàm haû gi, nyhuî kyuq shi ló byuq bê nghut ri.

²⁰ Haû chángzô pé gi, haû lé myàng kôjáng, maú byuq kômù, "Maihpáng gâm shî gi, haî mù haû-í hân nyhuî kyuq shi ló lhê lhà?" ga myî akô.

²¹ Yesuq gi, "Ngò, nungmoq lé teng za taî kôlé, nungmoq, úng-âng é myit a bo é za, lumjíng kô é nghut le gi, maihpáng gâm má Ngò kut é muzó lé, nungmoq wó kut kó râ nghut é htoq agó, bùm shî lé, 'Htot mù, wuimau má ló gyó wàng aq.' ga taî jáng, taî é eq rajung za dut râ nghut lhê. ²² Nungmoq, lumjíng myit èq dung kô é nghut jáng, haî dúng le le wó yû kó râ nghut lhê." ga tû taî ri.

Yesuq É Ahkáng Ayá Lé Myî Chyam É Hkyô
Mrk 11:27-33; Luk 20:1-8

²³ Yesuq gi, noqkuq yhûm wàng hkaû má wang ê mù, mhoqshit nyi é hkûn, hkyangjong agyi pé eq mingbyu é suwún wuî gi, Yhâng chyáng lé jé kômù, "Hai ahko ahkâng èq, Nàng, shí pé lé kut nyi lhê lhú? Ahko ahkáng shî, Nang lé ó yuq byî é lhú?" ga myî akô.

† 21:9 Hebre dang má, hosana gâ é gi, "ahkuî hkyi yù laq" gâ é nghut lhê. Nghut kôlhang, bun zo 9 má gi, hkya-on dang đông chung é nghut lhê. ✠ 21:9 Hkya-on 118:26 ✠ 21:13 Esai 56:7 ✠ 21:13 Yer 7:11 ✠ 21:16 Hkya-on 8:2

²⁴ Haú hkûn, Yesuq gi, "Ngò le, nungmoq lé rajung myî wú kôlé, nungmoq wó tû taí kô é nghut jáng, hai ahko ahkâng èq, Ngò, shí pé kut é hkyô lé taí kyo râ nghut lhê."
²⁵ Yohan byî é baptisma gi, ó yuq é ahko ahkâng mai nghut lhê lhú? Mauhkûng mai lhú? A nghut jáng, byu chyáng mai lhú?" ga taú myî kat ri.

Haú hkûn, yhangmoq, chôm hpyê lhum kô é gi, "'Mauhkûng mai nghut lhê.' nghû, nga-nhúng taí jáng le, 'Haú nghut le nhîng, haí mù, yhang lé a lumjîng kô é lhú?' ga râ nghut; ²⁶ 'Byu chyáng mai nghut lhê.' nghû jáng le, yhangmoq lhunglhâng bang gi, Yohan lé, myiqhtoi rayuq ga lumjîng bûm kô é nghut lhê yanmai, haú bang lé, nga-nhúng gyuq râ lhê nghut." gâ akô.

²⁷ Haú mù, yhangmoq gi, Yesuq lé, "Ng-amoq a sé." ga tû taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

Yuqzô Nhiktâng Lé Dangtú Yu É Hkyô

²⁸ Yesuq xoq taí é gi, "Nungmoq hkâsu wó myit akô lhú? Byù rayuq gi, yuqzo í yuq wó ri. Yhang gi, ko sù yuq chyáng ê mù, 'Ngá zo ê, nàng, hkû-nyí tsibiyiq hkyâm má mù é zui aq.' ga taí jáng, ²⁹ yuqzo haú gi, 'Ngò a kâm ê.' ga tû taí ri; nghut kôlhâng, htâng má, yhang gi, myit dum lhîng mù, ê bê nghut ri.

³⁰ Hau htâng, yhângwa gi, yhang zo tiq sù yuq chyáng ê mù, rajung za ga ê dum taí jáng, yuqzo haú gi, 'Ê râ, âwa!' ga yín yû kôlhâng, a ê kut ri.

³¹ Haú nhiktâng mâ é hká yuq sheq, yhângwa ô nau é hkyô lé kut sù nghut ri lhú?" gâ ri.

Haú hkûn, yhangmoq gi, "Ko sù nghut ri." ga tû taí akô.

Haú mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhî pé gi, Garai Gasâng é mingdán má, nungmoq a wàng shimá, wang ló nyi bùm kó râ nghut lhê. ³² Hkâsu mù gâ le, Yohan gi, nungmoq chyáng lé jé mù, dingmán hkyô lé tûn shit kôlhâng, nungmoq gi, yhang lé a jîng kut akô nghut ri; nghut kôlhâng, haú kang guq bang eq shiwa myhî pé gi, yhâng dang lé jîng akô nghut ri. Nungmoq gi, haú hkyô lé myang é

nghut kôlhâng, myit a lhîng kô é htoq agó, yhang lé a lumjîng shi kó nghut ri.

Tsibiyiq Hkyâm Saí Bang Lé Dangtú Yu É Hkyô

Mrk 12:1-12; Luk 20:9-19

³³ Gotú dangtú lé gyô wú shi keq; hkyâm yhumsîng rayuq gi, tsibiyiq hkyâm ralhum saí to mù, lhîngkyuq kyâm to luí, tsibiyiq wing pyik htoq râ donghkong dú to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byî to mù, gó ming shut e ló byuq bê nghut ri. ³⁴ Kyôshu yoq jé jáng, yhang gi, yhang eq sêng é tsibiyiq shí ê yû râ matú, yhâng é dui-nhâng zoshâng wuì lé, haú hkyâm saí zo bâng chyáng nhang kat ri.

³⁵ Haú hkyâm saí zo bang gi, dui-nhâng zoshâng wuì lé, lhom chyup yû kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luqgok èq lhom dú sat pyám, kut akô nghut ri. ³⁶ Hau htâng má, yhang gi, hí dam lhê htoq je myo shoq gotú dui-nhâng zoshâng wuì lé dum nhang kat le le, haú hkyâm saí zo bang gi, hí lhê bang lé su lhom dum kut akô nghut ri. ³⁷ Ló htâng má, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhang zo lé, haú bâng chyáng nhang kat ri.

³⁸ Nghut kôlhâng, haú hkyâm saí zo bang gi, yhang zo lé myàng kôjáng, 'Shí yuq gi, silí wunlí sing yù râ sù nghut lhê; lé keq, yhang lé sat pyám mù, yhâng é silí wunlí lé yu pyám byi sháng.' ga, rayuq eq rayuq taí lhûm bum akô nghut ri. ³⁹ Haú mù, yhangmoq gi, yhang lé, chyup yû luí, hkyâm shinggan shut dú htoq kômù, sat pyám bekô nghut ri.

⁴⁰ Haú mù luí, tsibiyiq hkyâm yhumsîng lé jé é hkûn lé, haú hkyâm saí zo bang lé hkâsu kut nhô ngam akô lhú?" ga Yesuq myî ri.

⁴¹ Haú hkûn, haú hkyangjong agyi pé eq suwún wuì gi, "Haú agè ashop bang lé gi, agè ashop é đông sat pyám râ nghut lhê. Haú tsibiyiq hkyâm lé gi, kyô shu yoq má, yhâng é gambùm lé byi râ bang lé, htot ngho byî pyám râ nghut lhê." ga, tû taí akô nghut ri.

⁴² Haú jáng, Yesuq dum taí é gi, "Chyúm-dang má,

'Yhûm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.

Shí hkyô gi, haû Yhumsîng kut é nghut luî, nga-nhûng é myoq hí má mauhpo dut bê nghut ri.[☆]

ga bo tô é lé, nungmoq a nghap wú kó lúhú?

⁴³ Haû mù, Ngò, nungmoq lé taí kôlé, Garai Gasâng é mingdán lé, nungmoq chyáng mai yù mù, hau é ashi wó zui râ byuhú lé byî pyám râ nghut lhê. ⁴⁴ Luqgok haú má gyó záng é sù gi, gyûi gyop byuq râ nghut lhê. Luqgok hau èq gyó nhê záng é sù le, nhê pyeq pyâm é hui râ nghut lhê." gâ ri.

⁴⁵ Hkyangjong agyi pé eq Hparishe pé gi, haû Yesuq taí é dangtú pé lé wó gyo kôjáng, yhangmoq lé taí nyi é hkyô lé, sê gyô akô nghut ri. ⁴⁶ Haû mù, yhangmoq gi, Yhang lé chyup yû râ hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum tô kô é yanmai, yhangmoq gi, haú bang lé gyuq akô nghut ri.

22

Myiháng Poî Dangtú Pé

Luk 14:15-24

¹ Yesuq, dangtú pé dông yhangmoq lé dum taí é gi, ² "Mauhkûng mingdán gi, yhumsing yhangzô é matú myiháng poî hen lajâng to byî é hkohkâm rayuq eq du ri. ³ Hkohkâm hpó haû gi, yhang ji tô é bang, haû poî má lé lô râ matú, yhâng é dui-nhâng zoshâng wuî lé é tsing taí nhang ri; nghut kôlhang, haú bang gi, a lé kut akô nghut ri.

⁴ Hau htâng má, yhang gi, gotû dui-nhâng zoshâng wuî lé, 'Ngò haî le hen to bê; ngá é no eq xu-myum é gau-nyhaú pé lé sat mù, jung hkangmó rì rì nghut to bê. Myiháng poî má lé lò keq hkoi nghû, haû ji tô é bang lé é taí keq.' ga pyîng luî, nhang kat ri.

⁵ Nghut kôlhang, haû ji to huî é bang gi, dang haú lé haî su a gyô ngàm kômù, rayuq gi, yohtung shut, rayuq gi, hpugá dînggá hkyô shut é byuq bekô nghut ri. ⁶ Ram dum nghut jáng, yhâng é dui-nhâng zoshâng wuî lé lhom chyup yû kômù, nhuq bat luî, sat pyám byî akô nghut ri. ⁷ Haû mù, hkohkâm gi, nhikjum yo luî, yhâng é gyezô

pé lé, haû byù sat bang lé sat pyám nhâng mù, yhangmoq é myuq lé nyhê hkyô pyám nhang ri.

⁸ Hau htâng má, yhang gi, yhâng é dui-nhâng zoshâng wuî lé, 'Myiháng poî gi, rì rì nghut to bê; nghut kôlhang, haû ji to huî é bang gi, lé râ a gingdán kó nghut ri. ⁹ Haû mù, hkyô kang pé má ê luî, myang é yuq hkangmó lé, poî má lé râ matú é jî keq.' ga taí ri. ¹⁰ Haû jáng, dui-nhâng zoshâng haú bang gi, hkyô kang pé má htoq ê luî, myang é byù gè byù gang lhunglhang lé ji tsîng yù kô é nghut mù, myiháng poî gi, bíng pé zung byíng bùm bê nghut ri.

¹¹ Nghut kôlhang, bíng haú bang lé, hkohkâm hpó, lé wang wú é hkûn, myiháng poî wàng hking a wut tô é byù rayuq lé, yhang byu-myang ri. ¹² Haû mù, yhang gi, haú yuq lé, 'Buinùm hpó ê, nàng gi, myiháng poî wàng hking le a wut é nhîng, shí má hkâsu kut wang lo é lúhú?' ga myi jáng, haú yuq gi, haî le a dat tû taí lo nghut ri.

¹³ Haú hkûn, hkohkâm hpó gi, yhâng é dui-nhâng zoshâng wuî lé, 'Yhâng é hkyî loq má tui luî, haû ngaubiyi ngaù nhap eq zui kyik kyik shoq hpuzô nyi râ nghut é shînggan mauchut hkaû má, dú htoq pyám keq.' gâ ri.

¹⁴ Hkâsu mù gâ le, byù myo myo gi, ji yu é hui kôlhang, hkyin yù huî é bang gi, shaû ri." gâ ri.

Kehtaq Lé Kang Kat Byî É Hkyô

Mrk 12:13-17; Luk 20:20-26

¹⁵ Hau htâng má, Hparishe pé gi, htoq lô kômù, Yhâng é dang pé má mara chyup râ hpaqchyî dâ akô nghut ri. ¹⁶ Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù, "Sarâ ê, Nàng gi, tengmán sù nghut é eq, Garai Gasâng é hkyô lé, tengmán é dông mhòqshit é sù nghut é lé le, Nàng gi, ó haî ga râ lé le haî su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê. ¹⁷ Haû mù, hkoséng Kehtaq lé kang kat byî le gi, ge lhê lúhú? A gè lúhú? Nàng, hkâsu wó myit é hkyô taí kyô wú aq." ga taí akô nghut ri.

¹⁸ Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang

ê, nungmoq gi, haî mù, Ngo lé lé chyam wú akô lhú? ¹⁹Kang kat râ ngùn htingchap rachap, Ngo lé byî wú keq." ga taî kat ri. Haú hkûn, yhangmoq gi, denari rachap yù byî akô. ²⁰Haú mù, Yhang gi, yhangmoq lé, "Shí má, ó yuq é alhô eq masat laiká dap tô ri lhú?" ga myi jáng, ²¹yhangmoq gi, "Kehtaq é nghut ri." ga tû taî akô. Haú mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taî kat ri.

²²Haú su gâ é lé, wó gyo kôjáng, haú bang gi, maú byuq kômù, Yhâng chyáng mai htoq ló byuq bekô nghut ri.

Saduke Pé, Yesuq Lé Myî Chyam É Hkyô
Mrk 12:18-27; Luk 20:27-40

²³Haú nyí má yhang, haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô. ²⁴Yhangmoq myi kô é gi, "Sarâ ê, 'Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê.' ga, nga-nhúng lé, Mosheq taî tô é nghut lhê. ²⁵Hí hpyang lé, ngamoq chyáng, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za yhangmyi lé shi lhuí pyâm to bê nghut ri. ²⁶Haú eq rajung za, Lanong, Lalaq mai Lahká jé shoq, chuimó haú lé gon luí, ó le zo dù a dap é za shi ló byuq bùm bekô nghut ri. ²⁷Ló htáng má, myiwe myhí haú le châng shi ló byuq bê nghut ri. ²⁸Haú mù luí, haú dum dui toq é buinyì má, myiwe myhí haú gi, haú nhiktâng wuì nyhit yuq mâ é hká yuq é yhangmyi nghut râ lhú? Hkâsu mù gâ le, yhang gi, haú nhiktâng wuì banshoq bâng é yhangmyi dut wú bê sù nghut ri." gâ akô.

²⁹Haú hkûn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri. ³⁰Haú dum dui toq é buinyì má gi, myi byi myi yù hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê. ³¹Shi é mai dum dui toq bang eq séng luí, ³²Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.' ✧

ga, nungmoq lé taî tô é lé, nungmoq a nghap wú kó lhú? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê." ga taî ri.

³³Byù moq mó gi, dang haú wó gyo kôjáng, Yhang mhoqshit é hkyô lé maú byuq bum akô nghut ri.

Ahkyak Dik É Jep É Tarâ

Mrk 12:28-34; Luk 10:25-28

³⁴Saduke pé lé, Yesuq lhoq zîm pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zîng lé bum akô. ³⁵Yhangmoq má bo é tarâ sará rayuq gi, Yesuq lé chyam wú é dông, ³⁶"Sarâ ê, jep é tarâ má, hká lhum gi, je ahkyak dik lhê lhú?" ga myî ri.

³⁷Haú mù, Yesuq gi, "'Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq eq, chyitdap râ lhê.' ✧ gâ é nghut lhê. ³⁸Tarâ haú gi, je hí lhum eq je ahkyak dik é lhum nghut lhê. ³⁹Hau htang lhum le haú eq du é nghut mù, 'Náng gûng lé nàng chyitdap é su, náng é chyangnâm mâ é bang lé le chyitdap aq.' ✧ gâ é nghut lhê. ⁴⁰Tarâ haú í lhum gi, jep é tarâ banshoq eq myiqhtoi laiká banshoq é dangchyûng nghut lhê." ga, yhang lé taî kat ri.

Hkrisduq Gi, Ô Yuq É Yhangzo?

Mrk 12:35-37; Luk 20:41-44

⁴¹Hparishe pé zup zîng to kô é hkûn, Yesuq gi, yhangmoq lé, ⁴²"Nungmoq gi, Hkrisduq eq séng luí hkâsu myit ngam akô lhú? Yhang gi, ó yuq é yhangzo nghut lhê lhú?" ga myi jáng, yhangmoq gi, "Dawiq é yhangzo nghut ri." ga tû taî akô.

⁴³Haú mù, Yhang gi, yhangmoq lé, "Haú hkûn, Dawiq gi, Woi-nyí dông mai, Yhang lé, 'Yhumsîng' ga, haî mù wut lhê lhú? Hkâsu mù gâ le, Dawiq taî é gi,

⁴⁴'Haú Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga taî ri.' ✧

gâ ri. ⁴⁵Haú mù, Dawiq yhang lhang, Hkrisduq lé, 'Yhumsîng' gâ é nghut le gi, yhangzo za hkâsu ge nghut râ lhú?" ga taî

ri. ⁴⁶Haû mù, ó yuq le, dang rahkun lháng a wó tû taí lo kô é nghut mù luí, haú nyí mai, ó yuq lháng Yhang lé dangmyi a wám myi lo kó nghut ri.

23

Tarâ Sará Pé Eq Hparishe Pé Lé Sidiq Râ Hkyô

Mrk 12:38-40; Luk 11:37-52; 20:45-47

¹Hau htâng, Yesuq gi, byù moq mó eq Yhâng é chángzô pé lé taí é má, ²Tarâ sará pé eq Hparishe pé gi, Mosheq é tanghkuq má zung akô. ³Haû mù, yhangmoq mhò-qshit é hkyô chângjup lé, nungmoq châng kut ra kó râ nghut lhê. Nghut kôlhang, yhangmoq kut é dông gi, hkâkut kó; hkâsu mù gâ le, yhangmoq gi, yhangmoq taí é dông a kut kó nghut ri. ⁴Yhangmoq gi, byu pê é goqsân má wôlai ke byi kôlhang, yhangmoq yhang gi, wò haú pé lé bo waq râ matú, loqnyhui lháng a kâm lhoq tuí kó nghut ri.

⁵Yhangmoq kut é hkyô lhunglháng gi, byu pé myàng râ matú za kut shit é nghut akô; haû chyúmbun bo é showuî-htung pé lé lhoq kô yù kômù, buhîng pé mâ é banbyaú pé lé lhoq hing yu akô nghut ri; ⁶yhangmoq gi, poí pé mâ é réng é jowò pé eq tarajong pé mâ é ahkyak dik é zùng jang pé má, myang zùng râ lé ô nau nyi akô; ⁷yhangmoq gi, gai pé má lhom shi-kyâm yù kó râ eq, byu pé mai, yhangmoq lé, 'Rabai'^{*} ga lhom wut kó râ lé ô nau nyi bum akô.

⁸Nungmoq kúm gi, 'Rabai' ga wut râ lé hkâ-ô naù kó; hkâsu mù gâ le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê. ⁹Haû mù, myidàm htoq má, ó yuq lé le, 'âwa' hkâ-nghû kó; hkâsu mù gâ le, mauhkûng htoq mâ é Îwa rayuq za, nungmoq é Îwa nghut lhê. ¹⁰Hau htoq agó, 'sarâ' ga wut râ lé, hkâ-ô naù kó; hkâsu mù gâ le, Hkrisduq za, nungmoq é Sará nghut lhê. ¹¹Nungmoq mâ é je gyaú sù gi, nungmoq é dui-nhâng zoshâng dut râ nghut lhê. ¹²Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê, yhumsing gùng lé lhoq nyhâm sù kúm gi, waq toq é hui râ nghut lhê.

¹³Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byu pê hí má, mauhkûng mingdán hkyô lé xaú tô akô; nungmoq yhang le a wàng kó, wàng nau nyi bang lé le a wàng nhâng kó nghut ri. ¹⁴(Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, chuimó pê é yhâm-yò pé lé hpyoq zo hpyoq shuq é eq kyû hîng hîng dîng shit mhaû é bang nghut akô; haû mù, dam byî é je myo hui zo kó râ nghut lhê.)†

¹⁵Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byù rayuq lé nungmoq é noqkuq htung má wó lhoq lhik yû râ matú, myi hkyô, wui hkyô, châng jón wún kômù, wó lhoq lhik yu é sù lé gi, nungmoq su ngaraí byù í tú shuî dut akô nghut ri.

¹⁶Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhâm lé lang luí dakam é sù gi, haí a ra; noqkuq yhâm mâ é hîng lé lang mù dakam é sù kúm gi, cháng ra bê.' ga lhaq taí akô. ¹⁷Myoqjit é byù nâ pé ê! Haû hîng eq hîng lé lhoq yúnglhô é noqkuq yhâm gi, hká lhum je ahkyak lhê lú? ¹⁸Hau htoq agó, nungmoq gi, 'Haû hkungga gyap lé lang luí dakam é sù gi, haí a ra, nghut kôlhang, haû hkungga zè lé lang mù dakam é sù gi, cháng ra bê.' ga le, lhaq taí akô nghut ri. ¹⁹Myoqjit pé ê! Haû hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lú? ²⁰Haû mù, haû hkungga gyap lé lang luí dakam é sù gi, haû hkungga gyap eq hau é ahtoq má ke tô é zè banshoq lé lang luí dakam é sù dut bê nghut ri. ²¹Noqkuq yhâm lé lang luí dakam é sù gi, haû noqkuq yhâm eq haú má nyi é Sù lé lang luí dakam é sù dut bê nghut ri. ²²Hau htoq agó, mauhkûng lé lang luí dakam é sù gi, Garai Gasâng é tanghkuq eq haú má zung é Sù lé lang luí dakam é sù dut bê nghut ri.

²³Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, xun-mân nghut é gau-tsáng shingtón, bantsaí,

* 23:7 Aramaik dang dông rabai gâ é gi, sará gâ é lichyúm nghut lhê. † 23:14 Chyúmding ra-am má gi, bun zo 14 shí a bo é nghut lhê.

hpakkyí pé mâ é xê gambùm ragambùm lé gi, byí nyí kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaí pyâm tô akô nghut ri. Hí lhum lé kut é su, htang lhum lé le kut râ lhê. ²⁴ Hkyô-u she é myoqjit pé ê! Nungmoq, pyup lé gi, jân pyâm kômù, gola-ug lé gi, myui pyâm akô nghut ri.

²⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwáng zat é myit byíng zan tô ri. ²⁶ Hparishe myoqjit pé ê! Zo hkoq shuq góm é ahte lé hí chí yúng pyâm keq, haú jáng, ahtoq le sân-yúng râ nghut lhê.

²⁷ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, but hpyu tô é lup pé eq du akô; haú pé gi, ahtoq má wú yúng kôlhang, ahkaú má gi, mâng bup showui pé eq achay achyut é chângjup byíng tô é nghut ri. ²⁸ Haú eq rajung za, nungmoq gi, byu pê hí má, ahtoq pyâm dingmán é su kut shit kôlhang, ahkaú má gi, gegùn labyoq kut é eq agè ashop é hkyô pé byíng zan tô ri.

²⁹ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, myiqhtoí pé é lup lé luqtsuq tsuq kômù, dingmán bâng é lup pé lé mhón byi kôluí, ³⁰ Ngamoq gi, ngamoq é íchýí îwa pé é ipyat má nyí âng é ru nghut le gi, haú myiqhtoí pé é sui lhoq shun é bang má, ngamoq bo lòm râ a nghut." ga lhaq taí akô. ³¹ Haú su mù, nungmoq gi, haú myiqhtoí pé lé sat pyâm bâng é awut ashín pé nghut é hkyô lé, nungmoq gùng nungmoq saksé hkam yu nyi akô nghut ri. ³² Haú mù, nungmoq é íchýí îwa pé hi tô é muzó lé, banshoq châng kut pán keq!

³³ Lhangmuí pé ê, duq htân lhangmuí amyû pé ê! Ngarai mîng é dam byi hkyô mai, hkâsu wó hpanq lut kó râ lhú? ³⁴ Haú é yanmai, myiqhtoí pé, hpaqchyî bò bang eq chyúm sará pé lé, Ngò, nungmoq chyáng nhang kat râ nghut lhê. Haú bang mâ é ra-am lé gi, nungmoq lhom sat pyâm mù,

tapzîng má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rí wún kó râ nghut lhê. ³⁵ Haú é yanmai, haú dingmán sù Abelaq é sui mai hí luí, noqkuq yhùm eq hkungga gyap gyoro má nungmoq sat pyâm é, Berehkiq é yhangzo Zahkariq é sui jé shoq, myidàm htoq má shun pyâm é dingmán bang banshoq é sui gi, nungmoq é ahtoq má jé lô râ nghut lhê. ³⁶ Ngò, nungmoq lé teng za taí kôlé, shí hkyô banshoq gi, ipyat shi é ahtoq má jé râ nghut lhê.

³⁷ Yerusalem ê, Yerusalem ê, myiqhtoí pé lé sat pyâm pyâm kut mù, náng chyáng nhang kat é bang lé luqgok èq dú sat sat kut é myuq nàng ê, woqzîng gi, yhangzô pé lé, yhâng é dùng hkaú má tsîng lhùng yu é su, nungzô pé lé, Ngò, hkâ-myhó dâm shuí tsîng yù nau kôlhang, nàng a dóng nghut ri. ³⁸ Wú keq, nungmoq é yhùm gi, nungmoq é matú chamchyuiyui dut pyâm to berâ nghut lhê. ³⁹ Hkâsu mù gâ le, Ngò, nungmoq lé taí kôlé, 'Yhumsing é myîng mai jé lé lo é Sù gi, hkungsô wó nyí sháng gaq. ✧ ga, nungmoq a taí taí gi, Ngo lé wó myâng kó râ a nghut lo." gâ ri.

24

Ló Htâng Buinyí Má Dut Lò Râ Hkyô

Mrk 13:1-31; Luk 21:5-33

¹ Yesuq gi, noqkuq yhùm mai htoq e ló é u lé, Yhâng é chángzô pé gi, Yhâng é nàm má huí lé lô kômù, haú noqkuq yhum é loqmú pé lé tûn shit akô. ² Haú hkûn, Yesuq gi, yhangmoq lé, "Haú pé banshoq lé, nungmoq myang lhê a nghut kó lhú? Ngò, nungmoq lé teng za taí kôlé, luqgok haú pé gi, rachâm htoq racham lhang a kê lhum loshoq, hpyoq hpyi pyâm é hui râ nghut lhê." ga taí ri.

³ Yesuq gi, Tsanlun Bùm má zung tô é hkûn, haú chángzô pé gi, yhangmoq baú Yhâng chyáng lé jé kômù, "Haú hkyô pé gi, hkâ-nhám dut lò râ lhú? Nàng gyó lé râ hkûn eq ló htâng buinyí má, hkasû é kumlhá htoq lô râ nghut lhê lhú? Ngamoq lé taí kyô wú laq." ga, Yhang lé myî akô.

⁴ Haú hkûn, Yesuq, yhangmoq lé tû taí é gi, "Nungmoq lé, ó yuq èq le a wó shuí nghoq sháng gaq, sidiq nyí keq. ⁵ Hkâsu mù

gâ le, 'Ngò gi, haù Hkrisduq nghut lhê.' ga, Ngá myîng lé lîng é byù myo myo pô htoq lô mù, byù myo myo lé hkyô shuî nghoq kó râ nghut lhê. ⁶Nungmoq gi, majan dut nyi é hkyô eq majan eq sêng é danglâm pé lé, wó gyo kó râ nghut lhê; nghut kôlhâng, hkâgyuq dàn kó. Haù hkyô pé gi, dut lò râ za nghut lhê; nghut kôlhâng, lô htâng é buinyi gi, a nghut shi. ⁷Byù ra-myû eq ra-myû, mingdân ralhûm eq ralhûm majan zân lhûm lò kó râ nghut lhê. Jowò myo myo má, mutmó gyó é pé eq layàng nún é pé dut lò râ nghut lhê. ⁸Haù pé gi, wuîhke jamjau hkyo é apûn awang za ru nghut ashî. ✧

⁹Haù hkûn, nungmoq gi, zing-rî é eq sat pyâm é hui zo râ matú, ap pyâm é hui kó râ nghut lhê. Byù myû lhunglhâng bang gi, Ngá é yanmai, nungmoq lé a nguì kut kó râ nghut lhê. ¹⁰Haù u lé, byù myo myo gi, lumjîng myit lé tô pyâm kômù, rayuq eq rayuq a nguì lhum dut é htoq agó, rayuq eq rayuq ap pyâm lhum kó râ nghut lhê. ¹¹Hau htoq agó, myiqhtoi pyoq pé myo myo pô htoq lô kômù, byù myo myo lé hkyô shuî nghoq kó râ nghut lhê. ¹²Agè ashop é hkyô myô jat lo é yanmai, byù myo myô é chyitdap myit gi, kân lô byuq râ nghut lhê; ¹³ nghut kôlhâng, jihtûm jé shoq wó hkam jân nyi é sù gi, hkyi yu é hui râ nghut lhê. ¹⁴Byù myû banshoq má saksé dut râ matú, haù mingdân eq sêng é gabú danglù lé, mingkan gón má hko kyo râ nghut lhê. Hau htâng má sheq, lô htum buinyi jé râ nghut lhê.

¹⁵Haù mù luî, myiqhtoi Danielaq dông mai taî tô é eq rajung za, 'haù lhoq hten lhoq hpyoq é achâq achyut hkyô' ✧ gi, chyoiyúng jowò má shap tô é lé, nungmoq myàng kó râ nghut lhê. (Chyúmlaika ng-hap sù gi, sê gyo sháng gaq). ¹⁶Haù hkûn, Yuda mau má nyi é bang gi, bùm pé shut hpang doq lô kó sháng gaq. ¹⁷Yhumhkûng htoq má nyi tô é sù gi, yhúmhaû má é zè haî lé le, a lô gyó wang yù lo sháng gaq. ¹⁸Yò má nyi tô é sù gi, yhâng é buhîng lé a lô taû yu nyi lo sháng gaq. ¹⁹Haù buinyi pé má, zogûng dut é myiwe eq naú huq ashî nghut é înu wuì gi, gyai yhang wuîhke jamjau kó râ nghut lhê. ²⁰Haù nungmoq hpâng râ buinyi gi, gyoqmyò,* a nghut jáng, Bánno

buinyi má a ang râ matú, kyûdûng nyi keq. ²¹Hkâsu mù gâ le, mingkan lé joq é hkûn mai ahkuî jé shoq, hkâ-nhâm le a dut wú shî é wuîhke jamjau mó gi, haù buinyi pé má dut lò râ nghut lhê; haù sù é hkyô gi, htângnùng má hkâ-nhâm le dum dut lo râ a nghut. ²²Buinyi haù pé lé lhoq shaù pyâm é za a nghut le gi, ó yuq le asak wó lut râ a nghut; nghut kôlhâng, Garai Gasang eq hkyin yù hui bâng é matú gi, buinyi haù pé lé, lhoq shaù pyâm byi râ nghut lhê. ²³Haù ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haù a nghut jáng, 'Wú keq, Yhang hê má nyi ri.' ga taî jáng, nungmoq hkâjîng kó. ²⁴Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lháng, wó lhoq nghoq shoq ga, kumlhá mó pé eq laklaî kumlhá pé lé kut shit kó râ nghut lhê. ²⁵Gyo keq, shí hkyô a dut shimá, Ngò, nungmoq lé taî kyô nyi gù nghut lhê.

²⁶Haù mù, rayuq yuq eq, nungmoq lé, 'Yhang gi, yoso má nyi ri.' gâ jáng le, hkâ-é kó; 'Yhang gi, shî gok hkaû má lúng tô ri.' ga jáng le, hkâjîng kó. ²⁷Hkâsu mù gâ le, bui htoq hkyam má lhâp hpyat é gi, bui wang hkyam má lháng jé shoq duqbo é su, haù Byu Yhangzo jé lé é hkûn le, dut râ nghut lhê. ²⁸Màng leq é jang má, langdâ pé, lé zîng bùm râ nghut lhê.

²⁹Buinyi haù pé mâ é wuîhke jamjau lai eq yhang,

'Bui gi, noq byuq mù, lhamó gi, a tsô dut byuq râ nghut lhê; kyî pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huì bùm kó râ nghut lhê.' ✧

³⁰Haù hkûn, haù Byu Yhangzô é kumlhá gi, mauhkûng má htoq shit lô râ nghut mù, myidâm htoq mâ é byù myû lhunglháng gi, yón ngau bùm kó râ nghut lhê. Haù Byu Yhangzo gi, mauhkûng mai, mhut ji mù, hpungwup a-tsam mó eq le, hpungwup shingkâng eq le, gyó lé lo é lé, yhangmoq byu-myàng kó râ nghut lhê. ³¹Hau htâng má, Yhang gi, Yhâng é maumang lagyô pé lé, tut htê mó eq nhang kat luî, yhangmoq gi, maumyî chyûn myi chyûn eq

✧ 24:8 Esai 19:2 ✧ 24:15 Dan 9:27; 11:31; 12:11 ✧
wuîhke é ahkyíng nghut lhê. ✧ 24:29 Esai 13:10; 34:4

24:20 Israelaq mau má gi, gyoqmyò lé hkyô htoq le gyai

mauhkûng rahkyam mai, gó hkyam htum shoq mâ é, Yhang hkyin yu tô é bang lé shuí tsîng yù kó râ nghut lhê.

³² Maihpáng gâm lé wú mù, mhoq yû keq; agàm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê. ³³ Haû eq rajung za, shí hkyô banshoq† lé, nungmoq myàng kôjáng, Yhang gi, chyáng bê nghut mù, hkúmdong má lháng nghut nyí bê hkyô lé, nungmoq sé lo keq. ³⁴ Ngò, nungmoq lé teng za taí kôlé, shí pyat mâ é byu pé a ban shi byuq shimá, haû hkyô pé‡ banshoq dut byuq râ nghut lhê. ³⁵ Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyí râ nghut lhê.

Haû Buinyi Eq Ahkyíng Lé, Ó Le A Sé

Mrk 13:32-37; Luk 17:26-30, 34-36; 12:35-48

³⁶ Buinyi eq ahkyíng haû lé gi, ó yuq le a sé; mauhkûng htoq mâ é maumang lagyô pé lháng a sé; haû Zo le a sé; haû Íwa za ru sê lhê. ³⁷ Noaq é tsîn pyat má dut é su, haû Byu Yhangzo lé lo é hkûn le, dut râ nghut lhê. ³⁸ Hkâsu mù gâ le, dowuî a dîng shí é buinyi pé má, byu pé gi, Noaq, wui-sanghpo mó hkaû má wang é hkûn jé shoq, zo zo shuq shuq, myi byi myi yû, kut nyi bum akô nghut ri; ³⁹ yhangmoq gi, dowuî dîng lô mù, yhangmoq banshoq lé ûm sat pyâm é hkûn jé shoq, haû dut lò râ lé, a sé kó dut bùm é su, haû Byu Yhangzo lé lo é hkûn le, dut râ nghut lhê. ⁴⁰ Haû hkûn, yò má rahá nyi tô é byù í yuq mâ é rayuq gi, shuí yu é hui mù, rayuq gi, myit gyó to râ nghut lhê. ⁴¹ Luqlú chôm lîng nyi é myiwe í yuq mâ é rayuq gi, shuí yu é hui mù, rayuq gi, myit gyó pyâm to râ nghut lhê.

⁴² Haû su mù, haû nungmoq é Yhumsîng gi, hká nyí jé lé lô râ lé, nungmoq a sê kô é yanmai, sidiq machya nyi keq. ⁴³ Myín hká u má hkau sù jé lé lô râ lé, yhumsîng sê é ru nghut le gi, yhang é yhûm má a wó hput wâng nhâng loshoq, yhang machya nyi râ nghut é lé, nungmoq sê gyô nyi keq. ⁴⁴ Haû mù, nungmoq le rì rì nghut nyí keq; hkâsu mù gâ le, haû Byu Yhangzo gi, a bún nùng má jé lé lô râ nghut lhê.

† 24:33 Shí hkyô banshoq gâ é gi, Yesuq jé lé râ hí má dut râ hkyô pé lé taí é nghut lhê. ‡ 24:34 Haû hkyô pé gâ é gi, Yerusalem noqkuq yhûm htên byoq râ lé taí é nghut lhê.

⁴⁵ Yhumsîng hpô é dui-nhâng zoshâng wui lé, uphkâng râ eq ahkyíng jé jáng zoshuq gàm byi râ matú, yhumsîng hpô èq mù nhang tô é, lhumsuzi luí, hpaqchyí bo é dui-nhâng zoshâng gi, ó yuq nghut râ lhú? ⁴⁶ Yhumsîng hpó dum taû lo é hkûn, haû su kut nyí lîng é dui-nhâng zoshâng gi, hkungsô wó nyi ri. ⁴⁷ Ngò, nungmoq lé teng za taí kôlé, yhumsîng hpó haû gi, yhang é sutzè banshoq, dui-nhâng zoshâng haû yuq lé ap to râ nghut lhê. ⁴⁸ Nghut kôlhang, laq má mù, dui-nhâng zoshâng haû yuq gi, agè ashop sù nghut luí, 'Ngá é yhumsîng hpó jé lô râ gyai myáng ashí.' ga, yhang é i-myt unghkaû má myit yù mù, ⁴⁹ gotû dui-nhâng zoshâng luzúm wui lé nhuq bat é htoq agó, î shuq wut bang eq rahá zo zo shuq shuq kut nyi é nghut le gi, ⁵⁰ dui-nhâng zoshâng hau é yhumsîng hpó gi, yhang a myitngam tô é buinyi eq yhang a sê tô é ahkyíng má jé lô mù, ⁵¹ yhang lé jap pyám luí, gegùn labyoq kut bang hkâm zô é, ngaubyi ngaù nhap eq zuí kyik kyik shoq hpuzô nyi râ jowò má hkyô pyám râ nghut lhê.

25

Zomyi Raxê Yuq Lé Dangtú Yu É Hkyô

¹ Haû hkûn, mauhkûng mingdán gi, myibung yu chûng mù, lusik lé te yù râ ga, htoq e ló é zomyi raxê yuq eq pûng râ nghut lhê. ² Haû bang má, ngo yuq gi, nhik a gyíng kó; ngo yuq gi, nhik gyíng akô nghut ri. ³ Haû nhik a gyíng é bang gi, myibung yu chûng kôlhang, xû a yu chûng kó nghut ri. ⁴ Nghut kôlhang, haû nhik gyíng é bang kúm gi, yhangmoq é myibung lé le, xû bo é bông lé le yu chung akô nghut ri. ⁵ Lusik jé lé lô râ myáng nyi é yanmai, yhangmoq banshoq bang gi, yhup mui lò kômù, yhup myhí byuq bekô nghut ri.

⁶ Myín gunggàm jé jáng, 'Lusik jé bê ô! Yhang lé te yù râ matú, htoq lé lô keq hkoi ô!' ga, garú é htê htoq lo ri.

⁷ Haû hkûn, zomyi haû bang banshoq gi, toq lô mù, yhangmoq é myibung lé hen lajâng akô nghut ri. ⁸ Haû nhik a gyíng bang gi, 'Ngamoq lé, xû ratsuí byi kó laq; hkâsu mù gâ le, ngamoq é myibung shi ló nyi ri.' ga, haû nhik gyíng bâng chyáng dîng akô.

⁹ Haú hkûn, haú nhik gying bang gi, 'Nungmoq eq ngamoq é matú ga jáng, luq râ a nghut. Haú mù, nungmoq é matú, xú ung bâng chyang ê wui yù keq.' ga tû taí kat akô.

¹⁰ Yhangmoq, xú wui e ló kô é hkûn, lusik gi, jé lé lô mù, haú rì rì hen tô é zomyi wui gi, yhang eq rahá myiháng pôi má wang ló bekô. Hkum le myhî byuq bê nghut ri.

¹¹ Hau htâng má, hau htâng gyó tô é zomyi wui gi, tau jé lô kômù, 'Yhumsîng ê! Yhumsîng ê! Ngamoq lé, hkum hpóng byi laq ô!' ga taí akô.

¹² Nghut kôlhang, haú lusik gi, 'Ngò, nungmoq lé teng za taí kôlé, nungmoq lé ngò a sé.' ga tû taí kat ri.

¹³ Haú mù luí, haú Byu Yhangzo jé lé râ buinyì eq ahkýing lé, nungmoq a sé kô é yanmai, sidiq machya nyì keq.

Dui-nhâng Zoshâng Sum Yuq Lé, Dangtú Yu É Hkýô

Luk 19:11-27

¹⁴ Mauhkûng mingdán gi, byù rayuq byìn we htoq râ hen nyi é nghut mù, yhâng é dui-nhâng zoshâng wui lé wut yù luí, yhâng é sutzè lé ap byì to sù eq pung ashì nghut ri. ¹⁵ Yhang gi, yhangmoq é a-tsam má cháng luí, rayuq lé gi, ngùn ngo joí, rayuq lé gi, í joí, htâng rayuq lé gi, rajoí kut byì to mù, byìn we shut htoq ló byuq bê nghut ri. ¹⁶ Ngùn ngo joí wó yù sù gi, haú hkûn jáng htoq ló mù, hpugá gá luí, ngùn ngo joí wó myat yù bê nghut ri. ¹⁷ Haú eq rajung za, ngùn í joí wó yù sù le, í joí wó myat yù bê nghut ri. ¹⁸ Nghut kôlhang, rajoí za wó yù sù gi, htoq e ló mù, myigùng má du luí, yhâng yhumsîng hpô é ngùn lé haq myhup tô ri.

¹⁹ Hau htâng tsómra myáng jáng, dui-nhâng zoshâng haú bâng é yhumsîng hpó gi, dum taú jé lô mù, yhangmoq é ngùn chyarâng lé, lo jep ri. ²⁰ Ngùn ngo joí wó yù sù gi, amyat ngo joí lé le yu lé lô mù, 'Yhumsîng ê, nàng, ngo lé, ngùn ngo joí ap tô é nghut lhê. Wú aq, amyat ngo joí wó ho jat yù bê.' ga taí ri.

²¹ Haú hkûn, haú yhumsîng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lhê.

Náng yhumsîng hpô é gabú hkýô má bo wang lòm aq hkoi!' ga tû taí ri.

²² Haú eq rajung za, í joí wó yù sù le, lé lô mù, 'Yhumsîng ê, nàng, ngo lé ngùn í joí ap tô é nghut lhê. Wú aq, amyat í joí wó ho jat yù bê.' ga, lé taí ri.

²³ Haú hkûn, haú yhumsîng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsîng hpô é gabú hkýô má bo wang lòm aq hkoi!' ga tû taí ri.

²⁴ Hau htâng, rajoí wó yù sù le, lé lô mù, 'Yhumsîng ê, nàng gi, byù wui nghut mù, yhumsîng a hô tô é jang mâ é shù yù nau é htoq agó, yhumsîng, kyôshi a sân hkýô tô é jang mâ é tsîng yù nau sù nghut é lé, ngò sê lhê. ²⁵ Haú mù, ngò gi, gyuq luí, htoq ê mù, náng é ngùn lé, myigùng má ê haq myhup tô é nghut lhê. Wú aq, shì gi, nàng é ngùn nghut lhê.' ga taí ri.

²⁶ Haú mù, yhumsîng hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsîng a hô tô é jang mâ é shù yù nau é eq, yhumsîng, kyôshi a sân hkýô tô é jang mâ é tsîng yù nau sù nghut é lé, nàng sê to gù nghut le nhîng, ²⁷ ngá é ngùn lé, ngò dum taú jé lô jáng, aráng eq amyat wó yù shoq, ngùn hpún kat jang má, haú mù a kat tô é lú?

²⁸ Haú mù, haú ngùn rajoí lé, náng chyang mai yù luí, raxê joí wó to sù lé, byì pyám nhâng râ nghut lhê. ²⁹ Hkâsu mù gâ le, wó sù ó yuq lé nghut kôle, yhang agùn agó wó râ matú, jat byi râ nghut lhê. A wó su chyang mai kúm gi, yhang wó tô é lé lhang yu pyám byi shirâ nghut lhê. ³⁰ Haú mù, haú akyû a bo é dui-nhâng zoshâng lé gi, ngaubyi ngàu nhap eq zuì kyik kyik shoq hpuzô nyì râ jowò nghut é, shinggan mauchut hkaú má dú htoq pyám keq.' gâ ri.

Sau Eq Bainám

³¹ Haú Byu Yhangzo gi, Yhâng é hpungwup shingkang mai, maumang lagyo lhunglhang bang eq rahá jé lé lo é hkûn, Yhâng é hpungwup shingkang bo é hkohkâm-tanghkuq htoq má zùng râ nghut lhê. ³² Haú hkûn, byù myû chângjup gi, Yhâng é hí má zîng lé lo bùm kó râ nghut mù, Yhang gi, sau zúng sù mai, sau

eq bainám lé gotû tû kut gam hkoq é su, byu pé lé gam hkoq pyám râ nghut lhê.

³³ Yhang gi, sau pé lé, loqyo hkyam shut, bainám pé lé, loqpaî hkyam shut kut, nyhi to râ nghut lhê.

³⁴ Hau htâng má, haû Hkohkâm gi, Yhâng é loqyo hkyam shut mâ é bang lé, 'Ngá Wâ chyáng mâ é shimân jeju hkam yu é hui bang ê, lé keq; mingkan lé hpan é hkûn mai, nungmoq é matú ga hen lajâng tô é muì mingdán má wang ló keq. ³⁵ Hkâsu mù gâ le, Ngò zòmút é u lé, nungmoq, Ngo lé byi tso kô é nghut lhê; Ngò wuìshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê; ³⁶ Ngò gùngchîn dut é u lé, nungmoq, Ngo lé byi hut kô é nghut lhê; Ngò nòhpyo huì é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé kum kô é nghut lhê.' ga taí râ nghut lhê.

³⁷ Haú hkûn, haû dingmán bang gi, Yhang lé, 'Yhumsîng ê, Nàng zòmút huì é lé, ngamoq, hkâ-nhám myàng luì, byi tsô wú é lhú? Nàng wuìshit é lé, ngamoq, hkâ-nhám myàng luì, byi huq wú é lhú? ³⁸ Nàng bíng kut wún é lé, ngamoq, hkâ-nhám myàng luì, lhom hkulum wú é lhú? Nàng gùngchîn dut é hkûn, ngamoq, hkâ-nhám byi hut wú é lhú? ³⁹ Nàng nòhpyo huì é lé le, htóng lúng é lé le, ngamoq, hkâ-nhám myàng luì, lé gon lé kûm wú é lhú?' ga myi kó râ nghut lhê.

⁴⁰ Haú hkûn, haû hkohkâm gi, 'Ngò, nungmoq lé teng za taí kôlé, shí, Ngá gumang wuì mâ é je tiq sù lé, nungmoq kut byí é hkyô haí le, Ngo lé kut byí é nghut bê.' ga tû taí râ nghut lhê.

⁴¹ Hau htâng má, Yhang gi, Yhâng é loqpaî hkyam shut mâ é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pê é matú hen tô é, ahtum abyuq é myi má wang ló keq. ⁴² Hkâsu mù gâ le, Ngò zòmút é u lé, nungmoq, Ngo lé a byi tso kó; Ngò wuìshit é u lé, nungmoq, Ngo lé a byi huq kó; ⁴³ Ngò bíng kut wún é u lé, nungmoq, Ngo lé a lhom hkulum yù kó; Ngò gùngchîn dut é u lé, nungmoq, Ngo lé, mebu a byi hut kó; Ngò nòhpyo huì é eq htóng lúng é u lé, nungmoq, Ngo lé a gon kó nghut ri.' ga taí râ nghut lhê.

⁴⁴ Haú hkûn, yhangmoq gi, 'Yhumsîng ê, nàng zòmút wuìshit é, bíng kut wún é, gùngchîn dut é, nòhpyo huì é eq htóng lúng é lé, ngamoq, hkâ-nhám myàng luì, a wú gon kut wú é lhú?' ga taú myi kó râ nghut lhê.

⁴⁵ Haú hkûn, Yhang gi, 'Ngò, nungmoq lé teng za taí kôlé, shí bang mâ é je tiq sù lé, nungmoq, a kut byí é hkyô haí le, Ngo lé a kut byí é nghut bê.' ga, yhangmoq lé tû taí râ nghut lhê.

⁴⁶ Haú mù luì, haú bang gi, ahtum abyuq mara dam byí é má wang ló kó râ nghut lhê; haû dingmán bang kúm gi, ahtum abyuq é asak má wang ló kó râ nghut lhê." ga Yesuq taí ri.

26

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

¹ Yesuq gi, haú hkyô pé lé ban taí é htâng má, Yhâng é chángzô pé lé, ² "Nungmoq sê tô é eq rajung za, í nyí lai é htâng má, Lhoqlhai Poî jé râ nghut mù, haû Byu Yhangzo gi, tapzîng má jén sat é hui râ matú, ap pyâm é hui râ nghut lhê." ga taí ri.

³ Haú u lé, hkyangjong agyi pé eq suwún wuì gi, Kayahpaq gâ é hkyangjong mó rayuq é yhumwàng má zup zîng to kômù, ⁴ Yesuq lé haq chyup yû râ eq sat pyám râ hkyô lé, hpyê lhûm bum akô nghut ri. ⁵ Nghut kôlhang, yhangmoq gi, "Byu pé gabyông lò kó abe, poî gyoro má gi, a kut shi sháng." ga, taí lhûm akô nghut ri.

Yesuq, Xû Hut Gyun Huì É Hkyô

Mrk 14:3-9; Yhn 12:1-8

⁶ Yesuq gi, Behtani wà má nyi é manggâm dap wú sù Simûn é yhûm má nyi tô é hkûn, ⁷ myiwe myhí rayuq gi, gyai hpaû é namngón xû bo é luq hpyû bòng yu lé lô mù, Yesuq zo shuq nyi é hkûn, namngón xû haú lé, Yhâng é ulhum má hut gyun byí ri.

⁸ Haú hkyô lé, haú chángzô pé myàng kôjáng, wú nhik-yo kômù, "Haí mù luì, haú lé aha agó kut pyâm lhê lhú? ⁹ Xû haú lé, ahpaû myo myô eq ûng pyám mù, myùng bang lé byí le ge lhê mhai!" ga taí kat akô.

¹⁰ Yesuq gi, haú hkyô lé sé luì, "Haí mù, myiwe zo haú lé, i-myt lhoq myô nyi akô lhú? Yhang gi, Ngá é ahtoq má ge

é hkyô kut bê nghut ri. ¹¹ Haû myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sô a nghut. ¹² Yhang, Ngá gûng má namngón xû hut gyûn é gi, Ngá gûng lé yhum râ matú, hen lajang é hkyô nghut ri. ¹³ Ngò, nungmoq lé teng za taí kôlé, haû gabú danglù lé, mingkan gón hko kyô é jowò hkanmó má, yhang lé myit bún é dông, yhang kut é hkyô shî lé, taí kyo bekô râ nghut lhê." ga taí kyo ri.

Yesuq Lé, Yudaq Êq Ung Zô Pyâm É Hkyô
Mrk 14:10-11; Luk 22:3-6

¹⁴ Hau htâng, haû chángzo raxe í yuq má bo é Yudaq Iskarut ga sô gi, hkyangjong agyi pê chyáng ê mù, ¹⁵ "Ngò, Yesuq lé nungmoq é loq má ap byî é nghut jáng, nungmoq, ngo lé haî byi kó râ lú?" ga myî ri. Haû mù, yhangmoq gi, yhang lé ngùn denggá sum xê chap nghap byî akô. ¹⁶ Haû hkûn mai, Yudaq gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mrk 14:12-26; Luk 22:7-23; Yhn 13:21-30

¹⁷ Múnchi a kat é Muk Zo Poî sâng-hi nyi má, haû chángzô pé gi, Yesuq chyáng lé lô kômù, "Nàng zo râ Lhoqlhai Poî zoshuq lé, ngamoq hkâmá món to râ lú?" ga myî akô.

¹⁸ Haû mù, Yhang gi, "Myuq hkaû shut wang ló mù, byù rayuq chyáng ê luî, haû yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhúm má Lhoqlhai Poî kut râ nghut lhê.' gâ Sará taí ri nghû, ê taí keq." ga pyíng kat ri. ¹⁹ Haû mù, haû chángzô pé gi, Yesuq pyíng kat é eq rajung za ê taí kômù, Lhoqlhai Poî lé món to bekô nghut ri.

²⁰ Myinhâng jé lô jáng, Yesuq gi, haû chángzo raxe í yuq eq rahá, zohpoq má zung tô ri. ²¹ Yhangmoq zô nyi bùm kô é u lé, Yesuq gi, "Ngò, nungmoq lé teng za taí kôlé, nungmoq má é rayuq sô gi, Ngo lé ap pyám râ nghut lhê." ga taí ri.

²² Haû hkûn, yhangmoq gi, gyai gyô yón kômù, rayuq htâng rayuq, "Yhumsing ê, ngò a nghut hkaî?" ga, Yhang lé chôm myî akô.

²³ Haû hkûn, Yesuq gi, "Ngò eq rahá, hkoq shí má loq lap bê sô gi, Ngo lé ap pyám râ sô

nghut lhê. ²⁴ Haû Byu Yhangzo gi, Yhang eq séng luî kê tô é eq rajung za, shî râ za nghut lhê. Nghut kôlhang, haû Byu Yhangzo lé ap pyâm é sô gi, dingnyé wó ri; haû yuq gi, a hku lé le lhang, je ge ri." ga dum taí kat ri.

²⁵ Hau htâng, Yhang lé ap pyám râ sô, Yudaq gi, "Rabai ê, ngò a nghut hkaî?" ga myi jáng, Yesuq gi, "Nàng nghut ri." ga tû taí kat ri.

²⁶ Yhangmoq zô nyi kô é u lé, Yesuq gi, muk lé yù mù, jeju hkya-on luî, muk lé myhik hpé mù, "Shî gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byî ri.

²⁷ Hau htâng, Yhang gi, góm lé le, yù mù, jeju hkya-on luî, yhangmoq lé byi mù, taí é gi, "Nungmoq banshoq bang, shuq keq. ²⁸ Shî gi, yubak mara hkyut pyám byi râ, byù myo myô é matú htoq pyâm é, dangshikaq eq séng é Ngá sui nghut lhê. ²⁹ Ngò, nungmoq lé taí kôlé, ahkuî mai gi, Ngò, Ngá Wâ é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga taí ri.

³⁰ Yhangmoq gi, hkya-on mahkôn ralhûm ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Lé, Te Taí É Hkyô

Mrk 14:27-31; Luk 22:31-34; Yhn 13:36-38

³¹ Hau htâng má, Yesuq gi, yhangmoq lé, "Nungmoq lhunglhâng bang gi, hkû-myîn yhang jáng, Ngá é yanmai, myit lingbat kó râ nghut lhê; hkâsu mù gâ le,

'Haû sau zúng sô lé, Ngò bat sat pyám mù, sau hpúng mâ é sau pé gi, lhoq pyo pyâm é hui kó râ nghut lhê.'✠

ga kê tô ri. ³² Nghut kôlhang, Ngò gi, lhoq dui toq é huî htâng má, Galile mau shut, nungmoq é hí má e ló lánng râ nghut lhê." gâ ri.

³³ Haû hkûn, Petruq gi, "Náng é yanmai, góbang banshoq myit lingbat kôlhang, ngò gi, hkâ-nhám le myit lingbat râ a nghut." ga tû taí ri.

³⁴ Yesuq gi, "Ngò, nang lé teng za taí lé, hkû-myîn yhang jáng, woq a tûn shimá, nàng, Ngo lé sum dâm he-ngik pyám râ nghut lhê." ga tû taí ri.

³⁵ Nghut kôlhang, Petruq gi, "Ngò, Nàng eq rahá shî râ dut kôlhang, Nang lé ngò he-ngik pyám râ a nghut." ga sâi taí ri. Haú chángzô pé góbang banshoq le, haú su ga châng taí bum akô nghut ri.

Get-samane Gâ É Jowò Má Kyûdûng É Hkyô
Mrk 14:32-42; Luk 22:39-46

³⁶ Hau htâng má, Yesuq gi, Yhâng é chángzô pé eq rahá Get-samane gâ é jowò má ê kômù, yhangmoq lé, "Ngò, hé má ê mù, kyûdûng nyi é u lé, nungmoq shí má zùng láng keq." ga taí ri. ³⁷ Yesuq gi, Petruq eq Zebedi yhangzô nhik lé shuî chûng ri. Yhang gi, myit gyai a ngón é eq myit wui nhik hkyik dut lò bê nghut ri. ³⁸ Hau htâng, Yhang gi, yhangmoq lé, "Ngò gi, shî râ í yhang myit yón nyi ri; nungmoq gi, Ngò su machyâ luí, shî má láng nyî keq." ga taí ri.

³⁹ Yesuq gi, haú mai ratsuí zo sô ê mù, myigùng má ngóm gop to luí, "Áwa ê, wó dut é nghut le gi, góm* shí lé, Ngá chyáng mai lhaí pyám byi laq. Nghut kôlhang, Ngò ô nau é đông a nghut, Nàng ô nau é đông sheq nghut sháng gaq." ga kyûdûng ri.

⁴⁰ Hau htâng, Yhang gi, Yhâng é chángzô pé chyáng dum taú lo le, yhangmoq yhup myhî to kô é lé lo myàng ri. Haú mù, Yhang gi, Petruq lé, "Nungmoq gi, hkyíng hkum rahkum za lhang, Ngò eq rahá a wó machya nyi kó lú? ⁴¹ Gunglaú é a hui sháng gaq, machyâ luí, kyûdûng nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

⁴² Yhang gi, radàm dum ê mù, "Áwa ê, góm shî lé, Ngò a shuq é a wó lai râ nghut jáng gi, Nàng ô nau é đông nghut sháng gaq hkoi." ga kyû dum dûng ri.

⁴³ Yhang dum taú lo le, yhangmoq gi, myoqkuq lai kô é yanmai, yhup myhî to láng kô é lé, lo dum myàng ri. ⁴⁴ Haú mù, Yhang gi, yhangmoq lé tô pyâm to mù, sum dâm nghû râ dâm dum ê luí, hí lé dûng é dang lé roq ê dum dûng ri.

⁴⁵ Haú mù, Yhang gi, haú chángzô pé chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashî kó lú? Wú keq! Haú ahkyíng gi, jé bê nghut luí, haú Byu Yhangzo gi, yubak dap bâng é loq má ap pyâm é hui râ nghut bê.

⁴⁶ Toq keq! Ló losháng hkoi! Ngo lé ap pyám râ sô gi, jé lé bê nghut ri." ga taí ri.

Yesuq, Chyup Yû Huí É Hkyô

Mrk 14:43-50; Luk 22:47-53; Yhn 18:3-12

⁴⁷ Yesuq, dáng nyo nyi ashî u lé, haú chángzo raxe í yuq má bo é Yudaq gi, jé lé lo ri; haú hkyangjong agyi pé eq mingbyu é suwún wui chyáng mai nhang kat é bang nghut é, shâm eq dumbáng pé chung tô é byù moq mó le, yhang eq rahá nghut akô. ⁴⁸ Yesuq lé ap pyám râ sô gi, haú bang lé, "Ngò, bopuq puq é sô gi, haú yuq nghut bê; Yhang lé chyup yû keq." ga kumlhá byî tô ri. ⁴⁹ Yudaq gi, Yesuq chyáng hkyê za ê mù, "Rabai ê, wángzán nyi lhê lú?" ga taí luí, Yhang lé bopuq puq byî ri.

⁵⁰ Haú hkûn, Yesuq gi, "Buinùm hpó ê, nàng kut râ muzó lé kut aq hkoi." ga tû taí kat ri.

Hau htâng, yhangmoq gi, hí shut huí ê luí, Yesuq lé chôm zuí zìng mù, chyup yû bekô nghut ri. ⁵¹ Haú mù, Yesuq eq rahá nyi bang mâ é rayuq gi, shâm she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁵² Haú jáng, Yesuq gi, haú yuq lé, "Náng é shâm lé, xâng pyám aq; hkâsu mù gâ le, shâm shê sô gi, ó yuq nghut kôle, sham èq shî râ nghut lhê. ⁵³ Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi râ nghut é lé, nungmoq a sé kó lú? ⁵⁴ Nghut kôlhang, haú su nghut é nghut jáng, shí hkyô dut lò râ nghut lhê ga Chyúmdang pé má bò tô é hkyô gi, hkâsu wó dik lò râ lú?" ga taí kat ri.

⁵⁵ Hau htâng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chûng mù, lé lo akô lú? Ngò gi, nyí wuí, noqkuq yhûm má zùng mù, mhòqshit nyi kôlhang, nungmoq, Ngo lé a chyup yû kô é nghut lhê. ⁵⁶ Nghut kôlhang, shî su dut é hkyô pé banshoq gi, haú myiqhtoí pé kê tô é hkyô pé lo dik râ matú dut é nghut ri." ga taí ri. Haú hkûn, haú chángzô pé banshoq gi, Yesuq lé tô pyâm to kôluí, hpang byo byuq bekô nghut ri.

* 26:39 Góm gâ é gi, Yesuq, jamjau hui râ hkyô eq shî râ hkyô lé, taí nau é nghut lhê.

Yudaq Byìn Tú Wapdoq Má Jep Huê É Hkyô
Mrk 14:53-65; Luk 22:54-55, 63-71; Yhn 18:13-14, 19-24

⁵⁷ Yesuq lé chyup yu é bang gi, haù tarâ sará pé eq suwún wuê zup zîng nyi é jang, hkyangjong mó Kayahpaq é yhûm má, Yhang lé shuê e akô. ⁵⁸ Petruq gi, hkyangjong mó é yhumwàng hkaù má châng jé wâng shoq, we we mai Yesuq htâng châng tô ri. Yhang gi, hkâsu dut lò râ lé myàng naù luê, wâng hkaù má wang é mù, zúng bang eq rahá zung tô ri.

⁵⁹ Haù hkyangjong agyi pé eq Yudaq byìn tú wapdoq mâ é góbang gi, Yesuq lé sat pyám nhâng râ matú, a têng é saksé ho nyi akô. ⁶⁰ A têng é saksé myo myo htoq lô kôlhang, wó sat râ í é saksé a myàng kó nghut ri.

Ló htáng má, byù í yuq gi, lé lô kômù, ⁶¹ "Shí yuq gi, 'Ngò gi, haù Garai Gasâng é noqkuq yhûm lé lhoq hten pyám mù, sum nyí gyoro má dum wó saì lhê,' ga taí sù nghut ri." ga taí akô.

⁶² Haù hkûn, haù hkyangjong mó gi, toq yap mù, "Nàng, haì le a tû taí luq? Shí bang, Nang lé mara hun nyi é saksé gi, hká đông nghut lhê lú?" ga, Yesuq lé myî ri. ⁶³ Nghut kôlhang, Yesuq gi, jit le a ga nyi tô ri.

Haù mù, hkyangjong mó gi, Yhang lé, "Haù rû dui nyi é Garai Gasâng é myìng lé lang luê, ngò, Nang lé myî wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé taí kyô wú aq." ga taí jáng, ⁶⁴ Yesuq gi, "Nàng taí é eq rajung za nghut lhê. Ngò, nungmoq banshoq lé taí kôlé, nungmoq gi, ahkuí mai htâng hpyang má, haù Byu Yhangzo gi, a-tsam bo dik Su é loqyo hkyam má zung tô é lé le, mhuthtui ji mù, mauhkûng mai lé lo é lé le, nungmoq myàng kó râ nghut lhê." ga taí ri.

⁶⁵ Haù hkûn, hkyangjong mó gi, yhang é bu lé lêng cheq pyám mù, "Yhang gi, Garai Gasang lé rhoì dang taí bê nghut ri! Nga-nhúng, hai saksé râ ashî lú? Yhang, Garai Gasang lé rhoì dang taí é lé, nungmoq, ahkuí wó gyo bekô nghut lhê. ⁶⁶ Nungmoq hkâsu wó myit akô lú?" ga myi jáng, yhangmoq gi, "Yhang gi, shî gíng sù nghut lhê." ga tû taí akô nghut ri.

⁶⁷ Hau htâng má, yhangmoq gi, Yesuq é myoqdong má sôkan byé gyun luê, loqtsup èq htui byî akô nghut ri. Góbang gi, Yhang

lé bo-pyuq pyuq byi luê, ⁶⁸ "Hkrisduq Nàng, Nàng lé bat sù ó yuq nghut é lé, myiqhtoi htoí wú aq." ga taí akô.

Yesuq Lé, Petruq He-ngik Pyâm É Hkyô
Mrk 14:66-72; Luk 22:56-62; Yhn 18:15-18, 25-27

⁶⁹ Petruq gi, wâng hkaù má nyi tô é u lé, dui-nhâng zoshâng myhí rayuq gi, yhang chyáng lé jé mù, "Nàng le, haù Galile byù Yesuq eq rahá nyi sù nghut ri." ga taí ri.

⁷⁰ Nghut kôlhang, Petruq gi, haù bang banshoq é hí má yhang, "Nàng haì taí nyi é lé, ngò a sé." ga he kat ri.

⁷¹ Hau htâng, yhang gi, wâng hkúmdong shut htoq e ló le, haù jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sù nghut ri." ga, haù mâ é bang lé taí kat ri.

⁷² Haù hkûn, yhang gi, "Byù haù yuq lé, ngò a sé!" ga dakam é đông he pyâm ri.

⁷³ Hau htâng razup zo má, haù jowò má yap to bang gi, Petruq chyáng huê ê kômù, "Nàng le, haù bang má bò sù yhang nghut ri; náng é danghtê lé sê gyô ri." ga taí akô.

⁷⁴ Haù hkûn, yhang gi, yhanggùng yhang nhing luê, "Haù yuq lé, ngò a sé." ga dakâm dang taí ri.

Haù-u yhang, woq tûn bê nghut ri. ⁷⁵ Haù mù, Petruq gi, "Woq a tûn shi má, nàng, Ngo lé sum dâm he pyám râ nghut lhê." ga, Yesuq, yhang lé taí é dang lé, myit bûn kat mù, shinggan shut htoq ê luê, gyai yhang é ngau ri.

27

Yudaq Juishi É Hkyô

Mrk 15:1; Luk 23:1-2; Yhn 18:28-32

¹ Napsûn noq le, hkyangjong agyi pé banshoq bang eq mingbyu é suwún wuê gi, Yesuq lé sat pyám nhâng râ matú chôm myit hpyit yû bekô nghut ri. ² Haù mù, yhangmoq gi, Yhang lé tûi yù luê, shuê htoq ê kômù, mauzau Pilat chyáng ê ap byî akô nghut ri.

³ Yesuq lé ap pyâm é sù Yudaq gi, Yesuq lé jéyáng doqdân é hkyô lé myang sé jáng, nungngham wó mù, haù ngùn sum xê chap lé, hkyangjong agyi pé eq suwún wui chyáng ló dum taù byî ri. ⁴ Haù mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga taí

jáng, yhangmoq gi, "Haú hkyô, ngamoq eq haí sêng lhê lú? Haú gi, nàng eq sheq ru sêng lhê." ga lhom taí kat akô nghut ri.

⁵Haú mù, Yudaq gi, ngùn haú lé, noqkuq yhúmhaú má dú pyâm to luí, htoq ló mù, yhang gûng yhang ê juíshi byuq bê nghut ri.

⁶Haú hkyangjong agyi pé gi, ngùn chap haú pé kui yù luí, "Shí gi, sui hpau ngùn nghut lhê yanmai, alu sidek má a ge kat." ga taí akô. ⁷Haú mù, yhangmoq gi, tungbaù pé é lupdùng kut râ matú, au saí zo su é maumyí lé, ngùn hau èq wui hpyit yù râ dông, chôm myit hpyit to bekô nghut ri. ⁸Hau é yanmai, ahkuí jé shoq, haú jowò lé, sui myigùng ga myhîng tô akô nghut ri. ⁹Haú gi, "Haú Israelaq byu pé mai, Yhang lé gù hpyit tô é ngùn sum xê chap lé, yhangmoq yù mù, haú Yhumsîng Garai, ngo lé pying tô é eq rajung za, ¹⁰haú au saí zo su é maumyí lé, yhangmoq wui yù bekô nghut ri." ga myiqhtoi Yeremiaq taí tô é dang lo dik é nghut ri.

Yesuq Lé, Pilat Myí Jep Wú É Hkyô

Mrk 15:2-15; Luk 23:3-5, 13-26; Yhn 18:33—19:16

¹¹Haú u lé, Yesuq gi, mauzau hpô é hí má yap tô é nghut mù, haú mauzau hpó gi, Yhang lé, "Nàng gi, Yudaq byu pé é hkohkâm nghut lhê lú?" ga myi jáng, Yesuq gi, "Nàng taí é eq rajung za nghut lhê." ga tú taí ri.

¹²Haú hkyangjong agyi pé eq suwún wuí gi, Yhang lé, mara hùn kôjáng, Yhang gi, haí le a tú taí nghut ri. ¹³Haú hkûn, Pilat gi, Yhang lé, "Yhangmoq, Nang lé mara hùn saksé haú-í hkâm nyi kô é lé, Nàng a wó gyo lú?" ga saí myí ri. ¹⁴Nghut kôlhang, Yesuq gi, dang rahkun lhang a tú taí é yanmai, haú mauzau hpó gi, gyai máu byuq bê nghut ri.

¹⁵Haú Lhoqlhai Poí u lé, mingbyû wui ô nau é má cháng luí, haú mauzau hpó gi, htóng byû rayuq yuq lé nhâng byí é htung joq ri. ¹⁶Haú u lé, a gè mying htoq é htóng byû, Barabaq ga sù rayuq nyi ri. ¹⁷Haú mù, byù moq mó zup zîng lò kô é hkûn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lú? Barabaq luq? Haú a nghut jáng, Hkrisduq gâ é Yesuq lé luq?" ga myí ri. ¹⁸Yhang haú su ga myí é gi, yhangmoq, Yesuq lé manôn

kôluí, yhâng chyáng lé ap byi kô é hkyô lé sê é yanmai nghut ri.

¹⁹Pilat gi, tarâ jéyáng tingnyâng htoq má zung tô ashî hkûn, yhangmyi gi, "Haú mara a bò Sù lé, haí le hkâkut; hkâsu mù gâ le, hkû-nyí za lhang, yhupmoq má, haú yuq é yanmai, ngò tsómra hpuzô pyâm bê nghut lhê." ga, yhâng chyáng dang pying kat ri.

²⁰Nghut kôlhang, haú hkyangjong agyi pé eq suwún wuí gi, Barabaq lé dúng htoq yù râ eq Yesuq lé sat pyám nhâng râ matú, shiwa byu pé lé wum byi bekô nghut ri.

²¹Haú mauzau hpó gi, "Shí í yuq mâ é hká yuq lé, nhâng byi nhâng nau akô lú?" ga myi jáng, yhangmoq gi, "Barabaq!" ga tú taí akô nghut ri.

²²Haú mù, Pilat gi, "Haú jáng gi, Hkrisduq gâ é Yesuq lé, ngò hkâsu kut râ lú?" ga dum myí kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tú taí akô nghut ri.

²³Nghut kôlhang, yhang gi, "Haí mù luí lú? Yhang gi, hai mara kut shut bê lú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq!" ga je riyhang garû lo bum akô nghut ri.

²⁴Pilat gi, hká dông le a dat kut lô é eq byu pé gabyông lò kó râ nghut é hkyô lé myàng luí, uchyam yù mù, shiwa byu pé hí má loq chi luí, taí é gi, "Shí yuq é sui gi, ngò eq haí a séng; nungmoq eq za ru sêng lhê." gâ ri.

²⁵Haú shiwa byù lhunglhang bang gi, "Yhâng é sui gi, ngamoq eq ngamoq é yhangzo yhangshû pé htoq má joq nyi sháng gaq." ga, dum tú taí kat akô nghut ri.

²⁶Haú hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byí kat bê nghut ri.

Yesuq Lé, Gyezô Pé Rhoi É Hkyô

Mrk 15:16-21; Yhn 19:2-3

²⁷Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaú má shuí wang ló kômù, Yhâng é lhanghkyuq má, gyedap gón lé ji tsing tô akô. ²⁸Yhangmoq gi, Yesuq é mebu hkyut pyám byi kôluí, zam zam ne é buhîng hut byi kômù, ²⁹zujanmaú rallhum saí yù kôluí, Yhâng é ulhum má tsung byí akô nghut ri. Yhangmoq gi, jàm-yang rahkat lé, Yhâng é loqyo loq má kat byi kômù, Yhâng é hí

má hkyihput htuq kôluí, "Yudaq byu pé é hkohkâm hpó ê! Chyung hing xê hing nyí sháng gaq ô!" ga, jihpoi dang taí akô.³⁰ Yhangmoq gi, Yhang lé sôkan byé gyun luí, Yhâng é loq mai jâm-yang lú yú mù, Yhâng é ulhum má dum bat bat kut akô nghut ri.³¹ Yhangmoq gi, Yhang lé rhoí jihkyoí ban kut yú kôjáng, Yhang wut tô é buhíng lé hkyut yú kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

Yesuq Lé Jén Pyâm É Hkyô

Mrk 15:22-32; Luk 23:27-43; Yhn 19:17-27

³² Yhangmoq htoq e ló nyi le, Kuruni myuq byú nghut é Simun ga sù lé myàng kômù, yhang lé, zik luí tapzîng waq nhang akô nghut ri.³³ Yhangmoq gi, Golgahta gâ é jowò má jé e ló bekô nghut ri. Golgahta gâ é lichyúm gi, ugyap joq é jowò lé gâ é nghut lhê.³⁴ Haú má jé jáng, yhangmoq gi, Yesuq lé, hkô jung eq nyhô tô é tsibiyiq wing lé byi huq akô; nghut kôlhang, Yhang gi, haú lé chyam wú mù, a shuq byi kut pyâm ri.³⁵ Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é dông gam yu pyâm byí akô.³⁶ Hau htâng, yhangmoq gi, haú jowò má zung to mù, Yhang lé zúng nyi akô nghut ri.³⁷ Yhâng é u htoq má, "SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kê tap tô akô.³⁸ Haú hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri.³⁹ Hkyô sô laí ló é bang gi, nyhap é dông u-ngut ngut mù, taí kô é gi,⁴⁰ "Noqkuq yhûm lé hpyoq pyám luí, sum nyí gyoro má dum wó saí lhê ga Sù ê! Nàng, Garai Gasâng é Yhangzo nghut le gi, Náng gûng nàng hkyi yú luí, tapzîng mai gyó lo wú aq mhaí!" ga akô nghut ri.

⁴¹ Haú eq rajung za, hkyangjong agyi pé, tarâ sará pé eq suwún wuí le, Yhang lé rhoí jihkyoí kut mù, taí kô é gi,⁴² "Shí yuq gi, góbang lé hkyi yú sù nghut kôlhang, Yhânggùng yhang gi, a wó hkyi yú nghut ri myhi-nhung! Yhang gi, Israelaq byu pé é hkohkâm nghut lhê lhà! Ngamoq wó lumjîng râ matú, Yhang, tapzîng mai gyó lo wú sháng gaq.⁴³ Yhang gi, Garai Gasang

lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yú sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga taí ri." ga bum akô nghut ri.⁴⁴ Haú eq rajung za, Yhang eq rahá tapzîng má jén to huí é damyaq í yuq le, Yhang lé rhoí dang taí akô nghut ri.

Yesuq Soqkâng Byit É Hkyô

Mrk 15:33-41; Luk 23:44-49; Yhn 19:28-30

⁴⁵ Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri.⁴⁶ Myinhtâng sum hkyíng kô má, Yesuq gi, "Eloi, Eloi, lama sabakhtani?" ga, htê mó eq garú kat ri. Hau é lichyúm gi, "Ngá Garai ê, Ngá Garai ê, Nàng, haí mù, Ngo lé tô pyâm tô lhê lú?" gâ é nghut ri.✧

⁴⁷ Haú nâm má yap tô é bang ra-am gi, haú lé wó gyo kôjáng, "Yhang gi, myiqhtoi Eliyaq lé wut nyi ri." ga taí akô.

⁴⁸ Haú hkûn jáng, yhangmoq mâ é rayuq gi, din e ló mù, wuimaú lé ê yu ri. Yhang gi, haú lé tsibiyiq wing chyîn má jum yú luí, jâm-yang má tuí tap mù, Yesuq shuq râ matú yhun byí ri.⁴⁹ Góbang gi, "Yhang lé, Eliyaq, lé hkyi yu lhê laq, nga-nhúng chôm lánng wú sháng." ga taí akô nghut ri.

⁵⁰ Haú hkûn, Yesuq gi, htê mó eq dum garú kat luí, Yhâng é soqkâng byit bê nghut ri.

⁵¹ Haú u lé, haú noqkuq yhûm mâ é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri.⁵² Lup pé gi, bóng lô mù, shi byuq bê é chyoiyúng bang myo myo gi, lhoq dui é hui akô.⁵³ Haú bang gi, Yesuq dum dui toq é htâng, lup mai htoq lô kômù, chyoiyúng myuq* má wang ê luí, byú myo myô hí má htoq shit akô nghut ri.

⁵⁴ Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô banshoq lé myàng kôjáng, gyuq dàn kômù, "Yhang gi, gè gè yhang, Garai Gasâng é Yhangzo nghut ri-nhung!" ga taí akô nghut ri.

⁵⁵ Myiwe wuí myo myo le, we we mai wú nyi bum akô. Haú bang gi, Yesuq râ é má garúm râ matú, Galile mau mai

✧ 27:46 Hkya-on 22:1

* 27:53 Chyoiyúng myuq gâ é gi, Yerusalem wà mó lé gâ é nghut lhê.

Yhang htâng châng lé é bang nghut akô.
⁵⁶Haú bang má, Magadalaq wà mà é Mariq,
 Yakuq eq Yose nhiktâng é yhângnu Mariq
 eq Zebedi é yhangzô nhiktang é yhângnu
 pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-42

⁵⁷Myinhâng jé lô jáng, Yesuq é chángzo
 dut bê nghut é, sùt wó sù, Aramahti myuq
 byù Yosep ga sù lé lo ri. ⁵⁸Yhang gi,
 Pilat chyáng ê mù, Yesuq é gungsôm lé ê
 dung jáng, Pilat gi, yhang lé byi râ matú
 hkunmó hkyô kat bê nghut ri. ⁵⁹Yosep gi,
 gungsôm lé yù mù, pán yúng èq htup yup
 luí, ⁶⁰luqgok lé kyûng tô é, yhâng é lup sik
 hkaú má ê kat tô ri. Hau htâng, yhang gi,
 luphkum má, luqlông èq lhêng chí pyâm to
 luí, lô byuq bê nghut ri. ⁶¹Magadalaq wà mà
 é Mariq eq goyuq Mariq gi, lup hí má zung
 tô akô nghut ri.

Lup Zúng É Hkyô

⁶²Haú Hên Lajang Buinyi lái é htâng nyí
 lé, hkyangjong agyi pé eq Hparishe pé gi,
 Pilat chyáng ê mù, ⁶³"Yhumsîng ê, Yhang,
 asak dui nyi ashí hkûn, 'Sum nyí nghû râ
 buinyi má, Ngò dum dui toq lô râ.' ga,
 haú byù mhaú taí é dang lé, ngamoq bún
 nyi lhê. ⁶⁴Haú mù, haú sum nyí nghû râ
 buinyi jé shoq, lup lé rago za zúng nhang
 to aq. Haú a nghut jáng, Yhâng é chángzô
 pé, mâng lé lé hkaú yu lô mù, Yhang shi é
 mai dum dui toq lô bê ga, byu pé lé taí kó râ
 nghut lhê. Shí, lô htâng dâm mhaú é hkyô
 gi, sâng-hi dâm htoq je wui râ nghut lhê."
 ga, lé taí akô nghut ri.

⁶⁵Haú hkûn, Pilat gi, "Nungmoq sê é
 dông, lup lé haí a dut loshoq, gyezô pé lé
 zúng nhang to keq." ga tû taí kat ri. ⁶⁶Haú
 mù, yhangmoq gi, ê luí, lup lé gau shoq ga,
 luqgok má dizik htung mù, lup zúng byú
 nyhi to bekô nghut ri.

28

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

¹Bánno buinyi lai jáng, rabat é sâng-
 hi nyí maubó zó má, Magadalaq wà mà é
 Mariq eq goyuq Mariq gi, lup má ê wú râ
 ga, e lô akô.

²Haú hkûn, layàng mó nún lo ri; hkâsu
 mù gâ le, Yhumsîng Garaí é maumang

lagyo rayuq gi, mauhkûng mai gyô lé lô mù,
 lup má ê luí, haú luqlong lé tu lheng mù,
 hau ahtoq má zung tô ri. ³Yhâng é isâm gi,
 lhap su duqbó mù, Yhâng é mebu gi, gyo su
 hpyu zan tô ri. ⁴Zúng nyi é bang gi, yhang
 lé lúm wú gyuq kômù, pyik pyik nán luí, shí
 gùng su dut bùm bekô nghut ri.

⁵Haú maumang lagyo gi, myiwe haú nhik
 lé, "Hkâgyuq kó! Haú tapzîng má jén sat
 huí é Yesuq lé, nungnhik ho nyi kô é lé, ngò
 sê lhê. ⁶Yhang gi, shí má a nyi lo; Yhang
 taí tô é eq rajung za, lhoq dui toq é hui bê
 nghut ri. Yhang lé lhez é jowò lé, lé wú keq.
⁷Haú mù, hân taú lô luí, Yhâng é chángzô
 pé lé, 'Yhang, shi é mai lhoq dui toq é hui
 bê nghut ri; nungmoq é hí má, Galile mau
 shut lô láng berâ. Nungmoq, Yhang lé, haú
 má lô myâng kó râ nghut lhê.' nghû lô taí
 kyo keq. Nungnhik lé, ngò taí é lé matsîng
 chûng keq." ga taí kat ri.

⁸Haú mù luí, myiwe myhí haú nhik gi,
 gyuq kôlhâng, gyai gabú é myit èq lup mai
 hân taú lô mù, Yhâng é chángzô pé lé lô taí
 kyo râ matú, din lô bê nghut ri. ⁹Haú hkûn,
 Yesuq gi, radá dâm yhangnhik lé lhom tê
 mù, "Wángzán nyí kó sháng gaq." ga taí ri.
 Haú mù, yhangnhik gi, huí ê luí, Yhâng é
 hkyí má po zing to mù, Yhang lé noqkuq
 akô. ¹⁰Haú hkûn, Yesuq gi, yhangnhik lé,
 "Hkâgyuq kó. Ngá é gumang wui lé, Galile
 mau shut e lô keq nghû lô taí kyo keq; haú
 má, yhangmoq, Ngo lé myàng kó râ nghut
 lhê." ga taí kat ri.

Zúng Nyi É Gyezô Pé Taí É Danglù

¹¹Myiwe haú nhik hkyô má ru nghut nyi
 ashí le, lup zúng é gyezô pé ra-am gi, myuq
 hkaú má wang lô mù, dut lai lo é hkyô
 banshoq lé, haú hkyangjong agyi pé lé lô
 taí kyo akô nghut ri. ¹²Haú hkyangjong
 agyi pé gi, suwún wui eq huí lhum luí, hpyê
 lhùm é htâng má, haú gyezô pé lé, ngùn
 myo myo tsup byi mù, ¹³"Myín lé, ngamoq
 yhup myhí tô é hkûn, Yhâng é chángzô
 pé lé lô mù, mâng lé, lé hkaú yu lô bekô
 nghut ri.' nghû taí keq. ¹⁴Shí hkyô lé, haú
 mauzau hpó wó gyô é nghut jáng, yhang
 myit ngón shoq, ngamoq taí râ nghut lhê;
 haú hkûn, nungmoq gi, hai manghkáng a
 htoq râ nghut lhê." ga taí kat ri. ¹⁵Haú
 mù, gyezô pé gi, ngùn haú pé lé yù luí,
 yhangmoq lé taí kat é eq rajung za kut bekô

nghut ri. Haû su mù, haú hkyô gi, Yudaq byu pé má taí pyo myhîn lô bê nghut mù, ahkuî jé shoq taí nyi bum akô nghut ri.

Chángzô Pé Kut Râ Sasana Muzó

Mrk 16:14-18; Luk 24:36-49; Yhn 20:19-23; Lagyo 1:6-8

¹⁶Hau htâng má, haû chángzô raxe rayuq gi, yhangmoq lé, Yesuq ê nhang tô é Galile mau má é bùm shut e lô bekô nghut ri.

¹⁷Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dê jíng kó nghut ri. ¹⁸Hau htâng, Yesuq gi, yhangmoq chyáng lé lô mù, "Mauhking eq myigùng htoq má é ahkáng ayá banshoq, Ngo lé byî to bê nghut lhê. ¹⁹Haû mù, nungmoq gi, htoq ê luî, byù myû chângjup lé, Ngá é chángzô pé dut nhâng mù, haû Îwa, Yhangzo, Chyoiyúng Woi-nyí é myìng lang luî, wui-myhup hkám byi mù, ²⁰nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhoqshit keq. Ngò gi, mingkan pyat htûm é hkûn jé shoq lhang, nungmoq eq rahá ru nghut nyî râ nghut lhê." ga pying tô ri.

MARKUQ é Gabú Danglù Laiká (The Gospel of Mark)

*Yesuq É Matú Hkyô Htong Byí É Hkyô
Mht 3:1-12; Luk 3:1-18; Yhn 1:19-28*

¹ Haú Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, ² haú myiqhtoi Esai-aq laiká má:

"Náng é hkyô lajang lángrâ matú, Ngá é lagyo lé, Náng é hí má Ngò nhang kat râ nghut lhê." ☆

ga luí le,

³ Haú yoso má, byù rayuq garú taí é htê gi, 'Haú Yhumsing é matú, hkyô hen to keq; Yhâng é matú hkyô lhoq nyhang to keq.'" ☆

ga luí le, kê tô é eq rajung za nghut lhê.

⁴ Haú mù, Wui-myhup Sará Yohan gi, yoso hkaú má jé lé luí, wui-myhup hkám byí nyi é eq, yubak mara hkyut pyám byí é hui râ matú myit lhîng mù, wui-myhup hkâm yù râ hkyô lé, hko kyô nyi ri. ⁵ Haú hkûn, Yuda mau jowò hkangmó mâ é bang eq Yerusalem wà mó mâ é banshoq bang gi, yhâng chyáng htoq e bum akô. Yhangmoq gi, yhumsing é mara lé yín yû kôluí, yhâng chyáng mai Yodan làng má wui-myhup hkâm yu bum akô nghut ri. ⁶ Yohan gi, gola-uq shomaú èq saí é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosô byo-í pé lé zo sù nghut ri. ⁷ Yhang taí kyô é dang gi, "Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyî-tsung tui lé hpyî râ lháng a gingdán é nghut lhê. ⁸ Ngò gi, nungmoq lé, wui èq za wui-myhup wó hkám byi lhê; nghut kôlhang, Yhang gi, Chyoiyúng Woi-nyí má nungmoq lé wui-myhup hkám byi râ nghut lhê." gâ ri.

Yesuq, Wui-myhup Hkâm Yu É Hkyô Eq Gunglaú Huí É Hkyô

Mht 3:13-17; 4:1-11; Luk 3:21-22; 4:1-13

⁹ Haú yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkâm yu ri. ¹⁰ Yesuq gi, wui mai htoq lo é u lé,

mauhkûng bóng lo é lé le, Woi-nyí gi, hpûngkyui gunghkyâng sù é dông mai, Yhang ahtoq má gyó lé lo é lé le, Yhang myang kat ri. ¹¹ Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

¹² Haú hkûn jáng, Woi-nyí gi, Yhang lé yoso shut wang e ló nhang ri. ¹³ Haú mù, Yhang gi, yoso má myi xê nyí nyi luí, Tsadán èq gunglaú é huí ri; tân jung yosô zè pé le, Yhang eq rahá nghut nyi ri; maumang lagyo pé gi, Yhang lé, lé dojaú nyi akô nghut ri.

Sâng-hi Lhê É Chángzô Pé

Mht 4:12-22; Luk 4:14-15; 5:1-11

¹⁴ Yohan htóng gyó é htâng má, Yesuq gi, Galile mau má ló jé mù, ¹⁵ Ahkyíng gi, jé bê; Garai Gasâng é mingdán gi, chyâng lò bê nghut ri; myit lhîng mù, haú gabú danglù lé lumjîng keq hkoi." ga luí, Garai Gasâng é gabú danglù lé hkô kyo wún ri.

¹⁶ Yesuq gi, Galile nhông yàm mai sô lai ló le, Simun eq yhanggu Andre nhiktâng, nhông má gùn dú nyí kô é lé, myang ri; haú nhik gi, ngozo kóng zo su nhik nghut akô.

¹⁷ Haú mù, Yesuq gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí ri. ¹⁸ Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

¹⁹ Yesuq gi, radun zo dum sô e ló é hkûn, Zebedi é yhangzo, Yakuq eq yhanggu Yohan nhiktâng, lhaí hkaú má gùn hpo nyi kô é lé, myang ri. ²⁰ Haú hkûn, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhângwa Zebedi eq langchyâng pé lé, lhaí hkaú má nyhi pyâm to kôluí, Yhang htâng cháng bekô nghut ri.

Nat Lé, Yesuq Hkat Htoq Pyâm É Hkyô

Luk 4:31-37

²¹ Yhangmoq gi, Kaperna-um wà má e akô; Bánno buinyi nyí jé jáng, Yesuq gi, tarajong má wang ê mù, mhoqshit hi ló bê nghut ri. ²² Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq

su, yhangmoq lé mhoqshit é yanmai nghut ri. ²³ Haú u lé, agè ashop é nat wang júng é byù rayuq tarajong má bo lom nyi lui, wut garú kat é gi, ²⁴ "Nazaret wà byù Yesuq ê, ngamoq gi, Nàng eq haí sêng lhê lhu? Ngamoq lé lhoq hten râ matú, Nàng jé lé é nghut lhê lhu? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

²⁵ Haú hkûn, Yesuq gi, "Hkâjop, yhang chyáng mai htoq ló aq." ga yhang lé tân kat ri. ²⁶ Haú hkûn, agè ashop é nat haú gi, byù haú yuq lé wum kat langhtân nhâng lui, htê mó èq garu uchyang htoq ló byuq bê nghut ri.

²⁷ Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasû é dang wá nghut lhê lhu? Ahko ahkáng bo é đông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lhang gyo byi akô nghut ri." ga lui, taí lhûm bum akô nghut ri. ²⁸ Yesuq eq sêng é ludang gi, Galile mau jam shoq, yang é đông byo myín ló bê nghut ri.

Byù Myo Myo Lé, Yesuq Lhoq Gê Byi É Hkyô
Mht 8:14-17; Luk 4:38-41

²⁹ Yhangmoq gi, tarajong mai htoq lui, haú hkûn jáng, Yakuq eq Yohan nhik le mù, Simun eq Andre nhiktâng é yhûm má wang e ló bekô nghut ri. ³⁰ Simûn é yhâng-aumó gi, gyai yhang nò leq tô é nghut mù lui, yhangmoq gi, Yesuq lé haú yuq no é hkyô lhom taí kyô akô nghut ri. ³¹ Haú mù lui, Yesuq gi, yhâng chyáng huí ê mù, yhâng é loq má zui lui tu tsung ri; haú hkûn jáng, nò ge byuq lui, yhang gi, yhangmoq lé gaí tso gaí huq bê nghut ri.

³² Haú nyi buiwang é htâng má, byu pé gi, no é bang eq nat gang wang júng nyi é bang banshoq lé, Yesuq chyáng shuí lé lo bum akô nghut ri. ³³ Rawa bang, hkúmdong nàm má lé zup zing tô akô. ³⁴ Haú mù, Yesuq gi, awáng nòhpyo ajung jung huí é bang myo myo lé lhoq gê byi ri; nat gang myo myo lé le, hkat htoq pyâm ri; nghut kôlhâng, Yhang ó nghut é lé nat gang haú bang sé kô é yanmai, nat gang haú bang lé dang a taí nhâng nghut ri.

³⁵ Yesuq gi, htang napkyó mau lhang a bó shimá, toq mù, gaú é jowò ralhûm má htoq ê lui, kyú ê dúng ri. ³⁶ Simun eq yhâng é luzúm wuí kúm gi, Yhang lé châng hô

kômù, ³⁷ Yhang lé myang hô kôjáng, "Yuq hkangmó gi, Nang lé châng hkat ho nyi akô." ga lui, taí kyô akô nghut ri.

³⁸ Haú hkûn, Yesuq gi, yhangmoq lé, "Awui ayâm mâ é wà pé má le, ngò, mungdang wó hkô râ matú ê sháng, hau é matú ngò lé é ru nghut lhê." ga taí ri. ³⁹ Haú mù lui, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyâm byi wún ri.

Manggâm Dap Sù Lé, Yesuq Lhoq Gê Byi É Hkyô

Mht 8:1-4; Luk 5:12-16

⁴⁰ Manggâm dap é byù rayuq gi, Yesuq chyáng lé mù, hkyihput htuq lui, "Nàng dóng é nghut le gi, ngò lé Nàng wó lhoq sân-yúng byi râ nghut lhê." ga dung wut ri.

⁴¹ Haú hkûn, Yesuq gi, yhang lé wú shogyo lui, loq lhâm kat mù, haú yuq lé ê záng lui, "Ngò dóng lhê, sân-yúng aq hkoi." ga taí ri. ⁴² Haú hkûn jáng, manggâm ana byuq byuq lui, yhang gi, gè bê nghut ri.

⁴³⁻⁴⁴ Yesuq gi, "Nàng, shí hkyô ó lé le hkâtaí kyo. Nghut kôlhâng, náng é gungdu lé, hkyangjong hpô chyáng ló tân shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé gyai yhang sidiq byi mù, radá dâm nhang kat bê nghut ri. ⁴⁵ Nghut kôlhâng, haú yuq gi, htoq ló mù, haú hkyô lé je taí pyo myhín ló bê nghut ri. Hau é yanmai, Yesuq gi, wà hkaú má de de a ge wang ló lo mù, shinggan mâ é chamchuyiui dut é jowò má za nyi nyi ri. Nghut kôlhâng, byu pé gi, jowò hkangmó mai Yhâng chyáng ru zîng lé nyi bum ashî kó nghut ri.

2

Gùngjum Shî Sù Lé, Yesuq Lhoq Gê Byi É Hkyô

Mht 9:1-8; Luk 5:17-26

¹ Buinyi hkâ-myháng a myáng má, Yesuq gi, Kaperna-um wà má dum wang lò jáng, Yhang yhûm dum taú jé lô bê gâ é hkyô lé, byu pé wó gyô bum akô nghut ri. ² Haú mù, byù myo myo zîng lé lô kôlui, yhúmhkaú má jowò a joq lô é htoq agó, hkumtot má lhang a joq lo nghut ri; Yesuq gi, yhangmoq lé mungdang hko kyô nyi ri. ³ Haú hkûn, byù myi yuq gi, gùngjum shî sù rayuq lé

chôm dang waq luî, Yhâng chyáng lé lo akô.
⁴ Yhangmoq gi, byù lûm myô chyîn chyap to mù, byù haú yuq lé Yesuq chyáng a wó shuí jé ê kô é yanmai, Yesuq é u htoq mâ é yhumhkûng lé dong htông yù luî, gùngjum shî sù lé taphkang eq roq hkyô kat akô nghut ri. ⁵ Yesuq gi, yhangmoq é lumjîng myit lé byu-myàng jáng, gùngjum shî sù lé, "Ngá zo ê, náng é yubak mara lé hkyut pyám byi bê." ga taí ri.

⁶ Haú hkûn, tarâ sará pé ra-am gi, haú má zung to kôluî, yhangmoq é i-myt unghkaú má, ⁷ "Byù shí yuq gi, haí mù luî haú su gâ lhê laq? Yhang gi, Garai Gasang lé rhoî dang taí nyi ri; Garai Gasang mai lai luî, ó yuq wá mara wó hkyut byi râ lhú?" ga luî, myit són wuî nyi bum akô nghut ri.

⁸ Yesuq gi, yhangmoq é unghkaú má myit wú nyi kô é hkyô lé, radá dâm Yhang é myit mai sé mù, "Nungmoq é i-myt hkaú má, haí mù haú su nghû myit són wuî nyi bum akô lhú? ⁹ Haú gùngjum shî sù lé, 'Náng é yubak mara lé hkyut pyám byi bê.' nghû taí é dang eq, 'Toq aq, náng é taphkang lé yù mù, hkyô so aq.' nghû taí râ má, hká hkun je taí lui lhê lhú? ¹⁰ Nghut kôlhang, haú Byu Yhangzo* gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga, yhangmoq lé taí kat ri. ¹¹ Hau htâng, Yhang gi, haú gùngjum shî sù lé, "Ngò, nang lé taí bá, toq aq, náng é taphkang lé yu chûng luî, yhûm taú ló aq hkoi." ga taí ri. ¹² Haú yuq gi, toq mù, yhâng é taphkang lé yu chûng luî, yhangmoq banshoq bang wú tsuq tô é myoq hí mai sô htoq ló byuq bê nghut ri. Hau é yanmai, yuq hkanmó gi, mauhong bùm kômù, "Isú é hkyô gi, hkâ-nhám lháng a myàng wú shi." ga, Garai Gasang lé hkya-on kungton bum akô nghut ri.

Lewiq (Mahte) Lé Wut Yu É Hkyô
Mht 9:9-13; Luk 5:27-32

¹³ Yesuq gi, nhông yàm má radàm dum htoq e ri. Haú hkûn, byù moq mó gi, Yhâng chyáng jé lé lo bùm kômù, Yhang gi, haú bang lé lhom mhoqshit nyi ri. ¹⁴ Yhang gi, sô yông ló nyi é hkûn, kang guq zúm má zung tô é, Alhpe yhangzo Lewiq lé myang kat luî, "Ngá htâng cháng aq." ga taí ri. Haú

hkûn, Lewiq gi, toq luî, Yhang htâng cháng bê nghut ri.

¹⁵ Yesuq gi, Lewiq é yhûm má myinzang ê zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ le, Yhang htâng châng é bang gi, ajùm ayò nghut é yanmai nghut ri. ¹⁶ Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haí mù luî, kang guq bang eq yubak dap bang eq rahá zo shuq nyi lhê lhú?" ga myi bum akô nghut ri.

¹⁷ Haú su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chi sará a ra kó, nõhpyo hui bang za sheq ru râ lhê. Haú eq rajung za, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga taí kat ri.

Zoshuq Gám É Eq Sêng É Hkyô
Mht 9:14-17; Luk 5:33-39

¹⁸ Yohan é chángzô pé eq Hparishe pé gi, zoshuq gám nyi akô nghut ri. Haú mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akô; nghut kôlhang, náng é chángzô pé gi, haí mù a gám kô é lhú?" ga luî, myi akô nghut ri.

¹⁹ Haú hkûn, Yesuq tû taí é gi, "Bíng pé gi, lusik eq rahá nghut nyi tô ashí hkûn, zoshuq hkâsu wó gám râ lhú? Yhangmoq gi, lusik eq rahá nghut nyi é u lé, zoshuq gám kó râ a nghut. ²⁰ Nghut kôlhang, lusik lé yhangmoq chyáng mai shuí yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê.

²¹ Ó yuq le, mebu xau má pán sik èq a lhaq hpo wú kó; haú su kut é nghut jáng, pán sik gi, kun byuq mù, mebu xau le je lhoq cheq pyám râ nghut lhê. ²² Haú eq rajung za, tsibiyiq wing asik lé le, shokuq htông axau má ó a kat wú kó. Kat é nghut jáng, tsibiyiq wing asik gi, htông lé lhoq buq goq nhâng luî, tsibiyiq wing eq shokuq htông htên byuq râ nghut lhê. Haú mù, tsibiyiq

* 2:10 Byu Yhangzo gâ é gi, Yesuq Yhânggùng yhang lé le taí é nghut lhê, Mesaia lé le taí é nghut lhê.

wing asik gi, shokuq htông sik má za ge kat é nghut lhê.

Bánno Buinyi É Yhumsîng

Mht 12:1-14; Luk 6:1-11

²³ Bánno buinyi ra-nyí má, Yesuq gi, Yhâng é chángzô pé eq rahá yò hkaû mai sô laí ló é hkûn, Yhâng é chángzô pé gi, kyôshi ratsuí langshap yu akô nghut ri. ²⁴ Haû mù, Hparishe pé gi, Yesuq lé, "Wú aq, Bánno buinyi má a ge kut jung lé, haû mù, náng é chángzô pé kut nyi akô lú?" ga taí akô.

²⁵ Haû hkûn, Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut hui luí, zoshuq râ tô é hkûn, hkâsu kut é hkyô lé, nungmoq hkâ-nhám le a nghap wú kó lú?" ²⁶ Abiahta, hkyangjong mó kut nyi é u lé, Dawiq gi, Garai Gasâng é yhúmhkaû má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhang htâng châng é bang lé le ratsuí tsuí byi tso é nghut lhê." ga tû taí ri.

²⁷ Hau htâng, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut. ²⁸ Haû mù, haû Byu Yhangzo gi, haû Bánno buinyi é Yhumsîng lháng nghut lhê." ga xoq taí ri.

3

¹ Yesuq gi, tarajong má radàm dum wang e le, loq raloq ajum shi byuq é byù rayuq nyi to lánq ri. ² Haû hkûn, haû má nyi tô é bang ra-am gi, Bánno buinyi má, Yesuq mai haû yuq lé lhoq gê byi râ lú ga, mara hûn râ matú gyám wú nyi akô nghut ri. ³ Yesuq gi, haû loq jum shî sù lé, "Banshoq bâng é hí má, toq yap shit aq." ga taí kat ri.

⁴ Hau htâng, Yhang gi, haû má nyi tô é bang lé, "Bánno buinyi má, ge é muzó kut râ, a ge é muzó kut râ, byù asak hkyî râ eq byù sat râ hkyô pé má, hká lhum kut le sheq tarâ wang lhê lú?" ga myî kat jáng, yhangmoq kúm gi, jit le a ga kó nghut ri.

⁵ Haû mù, Yhang gi, nhik-yô nau é myit èq haû bang lé lhíng wú mù, yhangmoq myit htan é hkyô lé, wú yón luí, haû loq jum shî sù lé, "Náng é loq nyhang kat aq." ga taí kat jáng, haû yuq gi, loq nyhang kat luí, yhâng é loq gi, shoq za ge byuq bê nghut

ri. ⁶ Hau htâng má, Hparishe pé gi, htoq ló kômù, Yesuq lé hkâsu kut wó sat pyám râ hkyô lé, Herut é byu pé eq chôm hpyê lhúm bum akô nghut ri.

Byù Ajùm Ayò, Yesuq Htâng Cháng Kô É Hkyô

⁷ Yesuq gi, Yhâng é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htâng châng e ló bum akô nghut ri. ⁸ Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui ayàm jé shoq mâ é bang, ajùm ayò gi, Yhang kut nyi é hkyô banshoq lé wó gyo kôjáng, Yhâng chyáng jé lé bum akô nghut ri. ⁹⁻¹⁰ Yesuq gi, byù myo myo lé lhoq gê byi é yanmai, nòhpyo hui to bang gi, Yhang lé wó záng shoq ga, chyîn chyap wang ló bum akô. Byù lùm myo luí, Yesuq gi, Yhang lé a nhê pyet pyám sháng gaq ga, Yhâng é chángzô pé lé lhaí rallhum hen to nhang ri. ¹¹ Agè ashop é nat pé gi, Yhang lé myàng hkangmó, Yhâng é hí má lêng ngop to luí, "Nàng gi, Garai Gasâng é Yhangzo nghut ri." ga luí, taí garû akô. ¹² Nghut kôlhang, Yesuq gi, Yhang ó yuq nghut é hkyô lé a taí byông htoq râ matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyô

Mht 10:1-4; Luk 6:12-16

¹³ Yesuq gi, bùm shut doq ló mù, Yhang ô nau é bang lé ji kat luí, haû bang gi, Yhâng chyáng jé lé lo bum akô nghut ri. ¹⁴ Haû hkûn, Yesuq gi, byù raxe í yuq lé hkyin yù luí, lagyo ayá byi ri; haû bang gi, Yhang eq rahá nyi râ matú le, mungdang hkô râ matú Yhang nhang htoq kat râ eq, ¹⁵ nat gâng pé lé hkat htoq râ ahko ahkáng wó râ matú le, nghut akô nghut ri. ¹⁶ Haû raxe í yuq gi, Simun (Yesuq mai Petruq ga myìng myhíng byi sù); ¹⁷ Zebedi é yhangzô nhiktâng Yakuq eq yhanggu Yohan (Yhâng nhiktâng lé Yesuq mai Buanerga ga myìng myhíng byi ri; hau é lichyúm gi, maugum zô nhik gà é nghut lhê.); ¹⁸ Andre, Hpilip, Barhtolume, Mahte, Htomaq, Alhpe é yhangzo Yakuq,

* 3:18 Zelutuq gà é lichyúm gi, yhumsîng zui saí é hkyô má gyai yhang myit lòm shirong é sù lé gà lhê. Haû u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gà lhê.

Htade, Zelutuq* dut é Simun eq, ¹⁹Yhang lé ap pyám râ sù, Yudaq Iskarut pé nghut akô.

Yesuq Eq Bezebulaq

Mht 12:22-32; Luk 11:14-23; 12:10

²⁰Hau htâng, Yesuq gi, yhûm má wang ló le, byù ajùm ayò dum zîng lé lô kômù, Yhang eq Yhang é chángzô pé gi, zang zo hkyíng lháng a wó kó nghut ri. ²¹Yhâng é yhumbyù wuì gi, haú hkyô lé wó gyo kôjáng, "Yhang, myit a gyng lo nghut ri." ga luì, Yhang lé hung shuí yù râ matú, e akô nghut ri.

²²Yerusalem wà mó mai gyó lé lo é tarâ sará pé gi, "Shí yuq gi, Bezebulaq gâ é nat gâng pé é zau lúng sù nghut ri-nhung! Yhang gi, nat zaû é wum-o a-tsam èq za, nat gâng pé lé hkat htoq pyâm é nghut ri." ga taì bum akô nghut ri.

²³Haú mù luì, Yesuq, yhangmoq lé wut yù mù, dangtú dong taì é gi, "Tsadán gi, Tsadán lé hkâsu kut wó hkat htoq râ lúhú?

²⁴Mingdán ralhum gi, ahkaú má byoq gâng lhûm nyì kô é nghut jáng, mingdán haú wó gîng nyì râ a nghut. ²⁵Yhumhtu ralhum má le, ikun byù yhangchang byoq gâng lhûm nyì é nghut le gi, yhumhtu haú wó gîng nyì râ a nghut. ²⁶Haú eq rajung za, Tsadán le, yhânggùng yhang lhoq hpyoq luì, gam hkoq nyì é nghut le gi, yhang wó nyì nyì râ a nghut, htûm byuq râ za nghut lhê. ²⁷Ó yuq nghut kôle, wum-o bò sù lé hí tui zing pyâm é a nghut le gi, yhâng é yhûm má lú wâng mù, yhâng é sutzè lé wó lú yù râ a nghut: Haú yuq lé hí tuì zing pyám jáng sheq, yhâng é sutzè lé wó lú yù râ a nghut lhê. ²⁸Ngò, nungmoq lé teng za taì kôlé, byu pé kut shut é mara banshoq eq rhoì dang taì pyâm é pé lé gi, mara wó hkyut pyám byì lhê. ²⁹Nghut kôlhang, haú Chyoiyúng Woi-nyí lé rhoì dang taì pyâm é sù gi, hkâ-nhám le, mara hkyut byì é wó hui râ a nghut; haú yuq gi, ahtum abyuq yubak wó sù nghut nyì ri." gâ ri.

³⁰Yhang haú su ga taì é gi, yhangmoq mai, "Yhang gi, agè ashop é nat wó sù nghut ri." ga kô é yanmai nghut ri.

Yesuq É Yhângnu Eq Yhanggu Pé

Mht 12:46-50; Luk 8:19-21

³¹Hau htâng, Yesuq é yhângnu eq yhanggu pé gi, jé lé mù, yhûm hkun má yap to kôluì, Yesuq htoq lô râ matú, byù rayuq

lé wang taì nhang akô nghut ri. ³²Byù ajùm ayò gi, Yhâng é lhîngghkyuq má zung tô akô; haú bang gi, Yhang lé, "Wú aq, náng nu eq nunggu pé gi, nang lé hui naù luì, shinggan má lánq bum akô." ga taì kyô akô nghut ri.

³³Haú hkûn, Yhang gi, "Ô pé gi, Ngá nu eq Ngá gu pé nghut akô lúhú?" ga myi kat ri.

³⁴Hau htâng, Yhang gi, Yhâng é lhîngghkyuq má zung hkyuq tô é bang lé wú mù, taì é gi, "Shí bang gi, Ngá nu eq Ngá é gumang wuì nghut bê! ³⁵Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

4

Kyôshi Sân É Dangtú

Mht 13:1-23; Luk 8:4-15

¹Yesuq gi, nhông yàm má radàm dum mhoqshit hi ló bê nghut ri. Haú hkûn, Yhâng é lhîngghkyuq má byù moq mó lûm yán zîng lé lo bùm kô é yanmai, Yhang gi, nhông hkaú mâ é lhaì má wang zung tô ri; haú u lé, byù moq mó gi, nhông yàm gin-gau htoq má nyi míng bum akô nghut ri. ²Yhang gi, haú bang lé, dangtú pé dông myo myo mhoqshit byì nyi ri; Yhang mhoqshit é má, ³"Gyo wú keq! Kyô hkyó sù rayuq gi, kyôshi san râ gâ htoq e ló ri. ⁴Yhang, kyôshi sân kat é hkûn, ra-am gi, hkyô má gyó ang mù, nghoq pé èq lé hte zô pyám ri. ⁵Ra-am gi, myi-tse a htu é luqgok yò pé má gyó ang mù, myi-tse a htu é yanmai, luì za yuq htoq ló kôle, ⁶amyit a wó chîn hing é nghut mù, buì htoq lô jáng, lhap kyuq pyám bê nghut ri. ⁷Dum ra-am gi, zugyóm hkaú má gyó ang luì, zubyap haú pé kô lò mù, wup pyâm é yanmai, ashi a wó zui nghut ri. ⁸Nghut kôlhang, ra-am gi, myìhpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lháng, zui myô lo é nghut ri." gâ ri.

⁹Hau htâng, Yesuq dum taì é gi, "Gyo yù râ nohkyap dap sù gi, gyô yù sháng gaq." gâ ri.

¹⁰Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq sêng é hkyô lé, lé myì akô. ¹¹Haú hkûn, Yhang, yhangmoq lé taì kyô é gi, "Garai Gasâng é mingdán eq sêng é sê gyo wuì é hkyô lé sé gyo râ ahko

ahkáng, nungmoq lé byî to lugù nghut bê. Nghut kôlhang, góbâng é matú gi, jung hkgangmó lé dangtú dông chyat taí é nghut lhê. ¹²Haû mù luí,

'Yhangmoq gi, myang nyì kôlhang, a wú sé kó, gyô nyì kôlhang, a sê gyo kó; sé wú sê gyo kô é ru nghut le gi, lhîng taû lò mù, mara hkyut pyám byî é hui kó râ nghut lhê!'[☆] gâ ri." ga tô ri.

¹³Hau htâng, Yhang, yhangmoq lé dum xoq taí é gi, "Nungmoq, dangtú shî lé a sê gyo kô é nghut le gi, gotú dangtú pé lé hkâsu kut ung sê gyo kó râ lú? ¹⁴Yò mù zui sù san kat é kyôshi gi, mungdang nghut lhê. ¹⁵Byù ra-am gi, hkyô má gyó âng é kyôshi eq wuí akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng má é mungdang lé lé yù pyám byî ri. ¹⁶Ra-am gi, luqgok yò pé má gyó âng é kyôshi eq wuí akô; yhangmoq gi, mungdang lé wó gyo jáng, radá dâm gabú myit èq hap yù akô. ¹⁷Nghut kôlhang, yhangmoq gi, amyit a wó chin é yanmai, razup zo za yuq kômù, mungdang é yanmai, wuîhke é eq zing-rî é pé hui kôjáng, hân hân htak lò byuq kó râ nghut lhê. ¹⁸Dum ra-am nghut jáng, zugyóm hkaû má gyó âng é kyôshi eq wuí akô; yhangmoq gi, mungdang lé wó gyô yù kôlhang, ¹⁹shí ipyat lhê é myit wui myit hke hkyô, hkyô shuí nghoq jung ngùn hîng zèhkoq eq gotú zè pé lé ô nau é hkyô pé, yhangmoq chyáng wang lò jáng, haû mungdang lé hup pyâm é yanmai, ashi a wó zui dut kó râ nghut lhê. ²⁰Ra-am kúm gi, myihpún bo é jang má gyó âng é kyôshi eq wuí akô; yhangmoq gi, haû mungdang lé gyô yù mù, lhóm yù luí, sân kat é htoq sum xê tú, hkyuq xê tú, rashô tú lhang myo shoq ashi zuí lò kó râ nghut lhê." gâ ri.

Myibung Htûn É Hkyô

Luk 8:16-18

²¹Yesuq, yhangmoq lé xoq taí é gi, "Nungmoq gi, myibung lé yù mù, tsung-jang má a tsung e za, mûng èq nghop tô é, a nghut jáng, yhupchong ô má tsung tô é, ó yuq wá kut wú akô lú? ²²Hkâsu mù gâ le, haq tô é zè haí jung le htoq ze lò râ eq, zaú tô é pé haí jung le byông htoq lô râ

nghut lhê. ²³Gyô yù râ nohkyap dap sù ó yuq nghut kôle, gyô yù sháng gaq." gâ ri.

²⁴Hau htoq agó, Yhang dum taí é gi, "Nungmoq gi, wó gyô yu é hkyô lé rago myit wú keq; nungmoq lik byî é bung èq, nungmoq lé dum lik byi râ nghut lhê; hau htoq lhang myo shoq wó kó râ nghut lhê. ²⁵Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyám byi shirâ nghut lhê." gâ ri.

Kyôshi Yuq Kô Lo É Dangtú

²⁶Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri. ²⁷Byù haû yuq gi, myín lé yhup tô é nghut nghut, nyí lé toq lo é nghut nghut, kyôshi gi, zuí htoq lò mù, yuq kô lo nyi ri; nghut kôlhang, yhang gi, hkâsu kut yuq lo nyi é hkyô lé a sé nghut ri. ²⁸Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù luí, ashi zui shoq kut é nghut lhê. ²⁹Kyôshi myhíng jáng, kyô shu yoq jé bê nghut é yanmai, yhang gi, zaiyik èq yâm yù râ nghut lhê." gâ ri.

Angshi Cham Lé Dangtú Yu É Hkyô

Mht 13:31-32; Luk 13:18-19

³⁰Yesuq dum xoq taí é gi, "Garai Gasâng é mingdán lé, hai èq lhoq whuí wú râ lú? Haí jung dangtú yù mù, shit wú râ lú? ³¹Garai Gasâng é mingdán gi, angshi cham eq wuí ri. Angshi cham haû gi, myigùng má hô é kyômyui jí pé má je tiq é nghut lhê. ³²Nghut kôlhang, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luí, hau é buishûm hkaû má, maulat nghoq zô pé lé wó zung nô nyi é nghut lhê." gâ ri.

³³Haû sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri. ³⁴Yhang gi, yhangmoq lé, dangtú a bo é haí lhang a taí wú nghut ri; nghut kôlhang, Yhang eq chángzô pé baú nghut nyi é hkûn kúm gi, jung hkgangmó é lichyúm lé taí sân kyô ri.

Laidun Mó Lé, Yesuq Lhoq Zîm Pyâm É Hkyô

Mht 8:23-27; Luk 8:22-25

[☆] 4:12 Esai 6:9-10

³⁵Haù nyí, myinhâng lé, Yesuq gi, Yhâng é chángzô pé lé, "Nga-nhúng nhông hé hpoq shut dap e ló sháng." ga taí ri. ³⁶Haù hkûn, chángzô pé gi, byù moq mó lé nyhi pyâm to luí, Yhang zung tô é lhaí mai yhang, Yhang lé shuí gû dap ló bekô; gotû lhaí pé le, yhangmoq eq rahá bo gû dap ló akô nghut ri. ³⁷Haù u lé, laidun mó jé lô mù, wuìlhêng hta toq lô luí, lhaí má lo bat hâng é yanmai, wuì byíng lô bê nghut ri. ³⁸Haù hkûn, Yesuq gi, lhaí htâng má uhkuq hkuq mù yhup myhî tô ri; haù chángzô pé gi, Yhang lé nhaù pun luí "Sarà ê, nga-nhúng myup shi ló râ dut é lé, nàng a chiq byi lú?" ga taí akô nghut ri.

³⁹Yesuq gi, toq mù, laidun lé tan luí, wuìlhêng lé, "Zim aq." ga taí kat jáng, haù laidun num ló byuq luí, banshoq zîm byuq bê nghut ri.

⁴⁰Hau htâng, Yhang gi, Yhâng é chángzô pé lé, "Haí mù, haù-i gyuq bum akô lú? Nungmoq gi, lumjîng myit a bò shi kó lú?" ga taí ri.

⁴¹Yhangmoq gi, gyai yhang gyuq dan bùm kômù, "Shí yuq gi, hkasû é byù nghut lè lè? Lài eq wuìlhêng pé lhang gi, Yhâng é dang lé gyo byi ri-nhung!" ga luí, rayuq eq rayuq myí lhum bum akô nghut ri.

5

Nat Gang Hkat Htoq Pyâm É Hkyô

Mht 8:28-34; Luk 8:26-39

¹Yhangmoq gi, nhông hé hpoq mâ é Gerase byu pé é mau má jé dap e ló akô.

²Yesuq lhaí mai htoq ló é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huí ri. ³Haù yuq gi, lupdùng má za nyi é sù nghut ri; yhang lé, ó yuq èq le, shamtoq-tuì èq lhang a wó tuí zing wú kó nghut ri. ⁴Hkâsu mù gâ le, adàm dàm, yhâng é loq eq hkyî má shamtoq-tuì èq tuí tô wú kôlhâng, yhang gi, loq mâ é shamtoq-tuì pé lé lhang hpyit pyám pyám kut mù, hkyî mâ é shamtoq kyum lé lhoq hkyop pyám pyám kut ri. Yhang lé, ó yuq èq le a wó hkuq yù kó nghut ri. ⁵Yhang gi, nyí myín aga lupdùng eq bùm pé má puk garu uchyang, yhumsing gùng lé luqgok èq dîn cheq wún ri.

⁶Yhang gi, Yesuq lé, we mai myang kat jáng, dîn e ló mù, Yhâng é hí má hkyihput htuoq ngop luí, ⁷htê mó èq, "Myhang htâng

é Garaí Yhangzo Yesuq ê! Nàng gi, ngò eq haí sêng lè lú? Nàng gi, ngo lé a zing-ri râ matú, Garaí Gasâng hí má danggidiq byi laq." ga taí garú ri. ⁸Haí mù gâ le, Yesuq gi, yhang lé, "Agè ashop é nat nàng ê, byù shí yuq chyáng mai htoq ló aq." ga taí kat é yanmai nghut ri.

⁹Hau htâng, Yesuq gi, "Náng myîng haí gâ lè?" ga, yhang lé myi jáng, yhang gi, "Ngamoq gi, myo myo nghut é yanmai, Legio gâ lè." ga tû taí ri. ¹⁰Hau htâng, yhang gi, haù jowò mai yhangmoq lé a kôn pyám râ matú, Yesuq lé dum dung dung kut nyi ri.

¹¹Haù u lé, waq rajùm mó gi, bùm yàm má dû but zô nyi bum akô nghut ri. ¹²Haù mù luí, nat gâng pé gi, "Ngamoq lé, waq pê chyáng nhang kat luí, yhangmoq chyáng wàng nhâng laq." ga luí, Yesuq lé dung akô.

¹³Haù hkûn, Yesuq gi, yhangmoq lé ahkáng byi kat jáng, haù agè ashop é nat pé gi, haù yuq chyáng mai htoq ló kôluí, waq pê chyáng wang ló byuq bekô nghut ri. Haù mù, haù í hkyîng kô bo é waq hpúng gi, gampyoq mai nhông hkaù shut rut dîn yán wang ló kôluí, myup shi byuq bekô nghut ri.

¹⁴Waq zúng bang gi, hpang dîn wang ló kômù, myuq hkaù mã é bang eq awui ayàm mã é bang lé, haù hkyô ló shit kyo kô é yanmai, byù haù bang gi, dut laí lò bê hkyô lé, ê htoq wú akô nghut ri. ¹⁵Yhangmoq gi, Yesuq chyáng jé lé kô é hkûn, nat gang myo myo wang júng wú é sù, mebu wut luí, byù gè rayuq su zung to lánng é lé myàng kômù, gyuq dan bùm bekô nghut ri. ¹⁶Haù hkyô lé myang é bang gi, nat gâng pé wang júng sù eq waq pê chyáng hkâsu dut é hkyô, góbang lé taí kyo akô nghut ri. ¹⁷Hau htâng, byu pé gi, Yesuq lé yhangmoq é mau mai htoq ló byuq râ matú, chòm dúng tôngbán akô nghut ri.

¹⁸Yesuq lhaí hkaù má wang ló é u lé, haù nat gâng pé wang júng laí lò bê sù gi, Yesuq htâng cháng râ matú, Yesuq lé dung tôngbán ri. ¹⁹Nghut kôlhâng, Yesuq gi, yhang lé ahkáng a byi e za, "Nàng, yhùm shut sheq ló mù, haù Yhumsing, nang lé hkâ-í kut byi bê hkyô eq hkâsu kut shogyo nhikmyin yu é hkyô lé, náng é yhumbyù buinùm ji-myi wuì lé ló taí kyo aq." ga taí kat ri. ²⁰Haù mù, byù haù yuq gi, ló luí,

yang lé Yesuq hkâ-í kut byi bê hkyô lé, Dekapoli* mau bang lé ló taí kyô ri. Haú hkûn, wó gyô é bang banshoq gi, mauhong bum akô nghut ri.

Shi Byuq Bê Myiwe Zo Eq No É Myiwe Myhi Rayuq É Hkyô

Mht 9:18-26; Luk 8:40-56

²¹ Yesuq gi, lhaí ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò gi, Yhâng é lnhnghkyuq má lé zng bum akô nghut ri; ²² haú hkûn, Ya-iruuq gâ é, tarajong má up bang mâ é rayuq gi, haú má lé luí, Yesuq lé myang kat jáng, Yhâng é hkyô wang má paí gop to mù, ²³ "Ngá zo byizo gi, kâng byit ló nyi ri; yang ge lò mù asak dum duí shi sháng gaq, nàng lé mù, yhâng é ahtoq má loq lé ke byi laq." ga, wum kat dng tôngbán nyi ri. ²⁴ Haú mù, Yesuq gi, haú yuq htàng châng e ló ri; byù ajùm ayò le, Yhâng é awui ayàm má châng chyîn chyap wún bum akô.

²⁵ Haú hkûn, raxe í zân suí yui nyi é myiwe myhí rayuq le haú hpúng má bo tô ri. ²⁶ Yhang gi, chi sará myo myô pê chyáng yang wó é ngunzè banshoq lhoq pán mù, nò hkâm luí yâ wú kôlhang, ge é hkyô a joq é htoq agó, je lhang wuîhke lò ri. ²⁷ Yhang gi, Yesuq é hkyô lé wó gyo jáng, byù hpúng mai Yesuq é nunghtáng má huí lé mù, Yhâng é bu má ê záng kat ri. ²⁸ Haí mù luí gâ le, yang gi, "Ngò, Yhang é bu má za lhang ê wó záng é nghut le gi, ge byuq râ nghut lhê." ga wó myit é yanmai, haú su kut é nghut ri. ²⁹ Haú hkûn jáng, yhâng chyáng suí yui é kân byuq luí, yang gi, hpuzô nyi é mai wó lut bê hkyô lé, yhanggùng má sê gyô kat bê nghut ri.

³⁰ Yesuq gi, Yhâng é gùng mai hpungwup a-tsam htoq ló é lé, radá dâm châng sê kat luí, byù moq mó shut lhing wú mù, "Ngá é bu má ó yuq záng bê lhú?" ga myi kat ri.

³¹ Haú hkûn, Yhâng é chángzô pé gi, "Náng é lnhnghkyuq má byù ajùm ayò chyîn chyap nyi é lé, myang to luí nhng, 'Ngo lé, ó yuq záng bê lhú?' nghú myi lhê lhú?" ga tû taí kat akô.

³² Nghut kôlhang, Yesuq gi, Yhang lé lé záng sú lé myàng râ matú, ho lhing wú nyi ashî nghut ri. ³³ Haú hkûn, myiwe myhí haú

gi, yhâng chyáng hkâsu dut lai lò bê hkyô lé sê é yanmai, Yesuq é hí má lé mù, gyuq nán é èq Yhang é hkyô wang má ngóm gop to luí, yhâng chyáng dut lai lò bê hkyô banshoq lé taí kyô ri. ³⁴ Haú mù, Yesuq gi, myiwe myhí haú lé, "Byizo ê, náng é lumjng myit gi, nàng lé lhoq gê byi bê nghut ri; náng é nõhpyo ge byuq bê nghut ri; ngón za ló aq hkoi!" ga taí ri.

³⁵ Yesuq gi, dang ru taí nyi ashî hkûn, tarajong má up sù Ya-iruuq é yhâm mai byù ra-am jé lé mù, "Nang é byizo gi, shi byuq bê; haí mù luí, haú sará lé lhoq hkyik nyi lhê lhú?" ga luí, lé taí kat akô.

³⁶ Yesuq gi, haú bang taí é dang lé gyô lhaí pyám mù, "Hkâgyuq, za lumjng aq." ga, haú tarajong má up sù lé taí kat ri.

³⁷ Hau htàng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htàng a cháng nhng nghut ri. ³⁸ Yhangmoq, haú tarajong má up sù é yhâm má jé lé kô é hkûn, Yesuq gi, byu pé garu garín ga yón ngau gabyông nyi bum é lé, myàng ri. ³⁹ Yhang gi, yhúmhkaú shut wang ló mù, haú bang lé, "Haí mù, yón ngau gabyông nyi bum akô lhú? Haú zoshâng gi, shi byuq é a nghut, yhup myhí tô é sheq ru nghut lhê." ga taí ri. ⁴⁰ Nghut kôlhang, yhangmoq gi, Yhang lé wuizui kut pyám byí akô.

Yhang kúm gi, haú bang banshoq lé hkat htoq pyám mù, zoshâng é yhangnu yhângwa nhik eq Yhâng é chángzô pé lé za shui luí, zoshâng lé lheq tô é gok má wang e akô nghut ri. ⁴¹ Yesuq gi, myiwe zo hau é loq má zuí to mù, "Talihta ku-mi" (haú é lichyúm gi, "Myiwe zo ê, ngò, nang lé taí bá, toq aq." gâ é nghut lhê.) ga taí ri. ⁴² Myiwe zo haú gi, haú hkûn jáng, toq luí, sô wún ri (yang gi, asak raxe í zân bò bê sù nghut ri.). Yhangmoq gi, haú sù dut é hkyô lé gyai yang maú byuq bùm bekô nghut ri. ⁴³ Yhang gi, haú hkyô ó lé le a sé nhng râ matú, yhangmoq lé taí hkúm kat luí, myiwe zo haú lé, zô jung byi tso râ matú le, yangmoq lé taí ri.

6

Yhumsing Wà Má Myoqdong A Wó É Hkyô Mht 13:53-58; Luk 4:16-30

* 5:20 Dekapoli gâ é gi, Grik đông myuq raxê lé gâ lhê.

¹ Yesuq gi, haú jowò mai htoq e ló mù, Yhâng é yhum mau shut taú ló ri; Yhâng é chángzô pé le, Yhang eq rahá bo châng ló akô nghut ri. ² Bánno buinyì jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haú pé lé hkâmá mhoq yu é lhà? Yhang wó yu é hpaqchyí byéng-yá gi, hkasú é wá nghut mù luí, laklaí kumlhá lé lhang kut lhê laq? ³ Shí yuq gi, Mariq é yhangzo, laksíma hpó nghut lhê, a nghut lhu? Yhang gi, Yakuq, Yose, Yudaq, Simun pé é yhangmang nghut lhê, a nghut lhu? Yhâng nhammó pé le, nga-nhúng eq rahá nghut nyi lhê, a nghut kó lhu?" ga luí, Yhang lé myit a ngón dut bùm bekô nghut ri.

⁴ Yesuq, yhangmoq lé taí é gi, "Myiqhto rayuq gi, yhumsing é yhum mau, yhâng é buinùm ji-myi wui eq yhumsing é yhum má za, myoqdong a lhaq wó wú é nghut lhê." gâ ri. ⁵ Yhang gi, nò byù ra-am lé loq ke byi mù, lhoq gê byí é mai lai luí, gotú laklaí kumlhá haí le, haú má a wó kut shit nghut ri. ⁶ Haú mù, Yesuq gi, yhangmoq lumjéng myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô
Mht 10:5-15; Luk 9:1-6

⁷ Yesuq gi, haú lagyo raxe í yuq lé wut yù mù, agè ashop é nat pé lé ûng râ a-tsam byi luí, í yuq yuq kut nhang htoq kat ri.

⁸ Yhang, yhangmoq lé châng pying kat é dang gi, "Hkyowui é matú má, dumbáng mai lai luí, zoshuq le, etap le, ngùn le, gotú haí le, hkâyú chûng kó; ⁹ hkyí-tsung kúm gi, tsûng chûng keq; nghut kôlhang, bu í dung hkâwut chûng kó. ¹⁰ Hká má nghut kôlhang, rayhùm yhùm má nungmoq wang bing kô é nghut le gi, haú wâ mai dum htoq ló é buinyì jé shoq, haú yhùm má za nyi nyi keq. ¹¹ Jowò rawò wò mâ é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyâm to mù, haú jowò mai htoq ló keq." gâ ri.

¹² Haú mù, yhangmoq gi, htoq e ló luí, myit lêng râ é hkyô, byu pé lé hkô kyô akô. ¹³ Hau htoq agó, yhangmoq gi, nat gâng pé

myo myo lé hkat htoq pyám byi mù, no é bang myo myo lé le xú but byi luí, lhoq ge byí akô nghut ri.

Yohan, Ulhum Hpyit Huí é Hkyô

Mht 4:1-12; Luk 9:7-9

¹⁴ Yesuq é mying hú lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, haú shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri." ga luí, taí bum akô nghut ri.

¹⁵ Ra-am gi, "Yhang gi, Eliyaq nghut ri." ga taí akô nghut ri.

Dum, ra-am taí kô é gi, "Yhang gi, hí hpyang lhê é myiqhtoí pé su, myiqhtoí rayuq nghut ri." gâ ri.

¹⁶ Herut kúm gi, haú lé wó gyo jáng, "Ngò, ullum hpyit pyám byí é Yohan gi, shi é mai dum dui toq bu-nhung!" ga taí ri.

¹⁷ Herut gi, yhanggu Hpilip é yhangmyi Herudiaq lé hâng yu pyâm é hkyô é yanmai, Yohan lé chyup tuí yù nhâng mù, htóng hkyô pyám nhang wú é sù nghut lhê. ¹⁸ Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tará a wang é nghut lhê." ga luí, taí byí nyi é yanmai nghut ri. ¹⁹ Haú mù, Herudiaq gi, Yohan lé gyai a jú dut byuq luí, sat pyám naú kôlhang, a wó sat dut nyi ri. ²⁰ Haí mù gâ le, Herut gi, Yohan, dingmán chyoiyúng é sù nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôlhang, yhang taí é dang pé lé ru gyô nau nyi ashí nghut ri.

²¹ Nghut kôlhang, Herut gi, yhâng é hkú ladu hkyúm buinyì má, byù mó pé, gyezau pé, Galile mau suwún wui pé lé, ji yù mù zoshuq poí mó kut é yanmai, haú nyí gi, Herudiaq é matú, buinyì gè dut bê nghut ri. ²² Herudiaq é yhangzo byizo gi, wang lé lô mù, gó shit é hkún, Herut eq yhâng é bing pé gi, myit ngón bum akô nghut ri.

Haú mù, hkohkâm gi, myiwe zo haú lé, "Nàng ô nau é haí nghut kôle, dung aq, ngò nàng lé byi râ nghut lhê." ga, dakam é danggidíq byí ri. ²³ Hau htoq agó, yhang gi, myiwe zo haú lé, "Nàng dung é haí nghut kôle, ngò byi râ; ngá é mingdán rawuí

gû lhang, byi râ nghut lhê." ga, dakam é danggidiq byi ri.

²⁴ Haú hkûn, myiwe zo haú gi, htoq ló mù, yhang nu lé, "Haí dúng le gè râ laq?" ga myi jáng, yhangnu gi, "Wui-myhup Sará Yohan é ulhum dung aq." ga tû taí kat ri.

²⁵ Myiwe zo haú gi, radá dâm hân hân wang ló mù, hkohkâm lé, "Ahkuí yhang, Wui-myhup Sará Yohan é ulhum lé, bó má kat mù byi laq." ga, dúng tôngbán ri.

²⁶ Haú su ga jáng, hkohkâm gi, myit gyai yhang a ngón dut byuq kôlhang, yhang dakam tô é danggidiq é yanmai le, bíng pè é myoqdong lé tê nau é yanmai le, myiwe zo haú taí é dang lé a kâm he pyám lo nghut ri. ²⁷ Haú mù, hkohkâm gi, zúng é gyezo rayuq lé, Yohan é ulhum é hpyit lô râ matú, radá dâm hkunmó hkyó mù nhang kat ri. Haú mù, haú yuq gi, htóng hkaú má ê luí, Yohan é ulhum lé, ê hpyit mù, ²⁸ bó má kat luí, myiwe zo haú lé lo byi ri; myiwe zo haú gi, ulhum haú lé, yhangnú chyáng yu ló byi ri. ²⁹ Yohan é chángzô pé gi, haú hkyô lé wó gyo kôjáng, yhang é mâng lé lé yû luí, lup má ló myhup pyám bekô nghut ri.

*Byù Ngo Hkyîng Lé Byi Tsô É Hkyô
Mht 14:13-21; Luk 9:10-17; Yhn 6:1-14*

³⁰ Lagyo pé gi, Yesuq chyáng dum jé zîng lò kômù, yhangmoq kut lai lo é hkyô pé eq mhoqshit bê hkyô pé banshoq, Yhang lé taí kyô akô nghut ri. ³¹ Hau htâng, byù myo myo gi, yhangmoq chyáng htoq htoq wàng wàng kut nyí kô é yanmai, yhangmoq gi, zang zo ahkyíng lhang a wó kó nghut ri. Haú mù, Yesuq gi, chángzô pé lé, "Nga-nhúng, tsím tsâm é jowò ralhú má ê mù, ê nô yù sháng." ga taí ri.

³² Haú mù, yhangmoq gi, yhangmoq baú lhai racham má ji mù, tsím tsâm é jowò shut e ló akô nghut ri. ³³ Nghut kôlhang, yhangmoq e ló é lé châng myang é bang myo myo gi, yhangmoq lé wú sé kôluí, wà hkgámó mai hkyí hkyô châng din é kômù, yhangmoq é hí má jé to lánng akô nghut ri. ³⁴ Yesuq gi, lhai mai gyó dap ló é hkûn, byù moq mó nyi to lánng lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luí, myo myo mhoqshit byí hi ló bê nghut ri.

³⁵ Bui gyum ló yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsâm é jowò nghut é htoq agó, bui le gyum ló bê; ³⁶ yhangmoq gi, awui ayám má é yhúm pé eq wà pé má, zoshuq ló ho wui zo kó sháng gaq, yhangmoq lé ló nhâng aq hkoi." ga taí akô nghut ri.

³⁷ Haú hkûn, Yhang gi, "Nungmoq, yhangmoq lé rajung jung byi tso keq." ga tû taí jáng, yhangmoq gi, "Shí myhó é bang zo râ matú, ngamoq gi, ê luí, denari* í sho èq muk é wui byi ra râ luq?" ga dum taí myí akô nghut ri.

³⁸ Nghut kôlhang, Yhang gi, "Nungmoq chyáng muk hkâ-myhó wó akô? Ê wú wú keq." ga myí ri. Haú mù, yhangmoq gi, myang hô jáng, "Muk ngo long eq ngozo í du wó lhê." ga, dum tû taí akô nghut ri.

³⁹ Hau htâng, Yesuq gi, banshoq bang lé ahpúng hpúng kut wàhu yò má zúng nhâng râ matú, Yhang é chángzô pé lé taí kat ri.

⁴⁰ Haú mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekô nghut ri. ⁴¹ Yesuq gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpè gam ri. Hau htâng, Yhang gi, byu pè hí má châng hkat to byi râ matú, Yhang é chángzô pé lé byi ri. Ngozo í du lé le, Yhang yù mù, banshoq bang lé gám byi ri. ⁴² Yhangmoq banshoq bang gi, zô gyí bùm bekô nghut ri. ⁴³ Hau htâng, haú chángzô pé gi, zô myhit tô é muk eq ngozo lé, raxe í mung byíng shoq wó guq tsíng yu ashí kó nghut ri. ⁴⁴ Haú hkûn, zô é bang gi, yuqgè wui baú lhang, byù du ngo hkyîng nghut ri.

*Yesuq, Wui Htoq Má Sô É Hkyô
Mht 14:22-33; Yhn 6:15-21*

⁴⁵ Yesuq gi, haú shiwa byu pé lé byo ló nhang nyi é hkûn jáng, Yhang é chángzô pé lé lhai má wang ji nhâng mù, tû tap má é Bet-saida wà mó shut dap ló lánng nhang ri. ⁴⁶ Yhangmoq lé shi-kyâm kat é htâng, Yhang gi, kyúdung râ ga, Yhang baú bùm shut doq e ló bê nghut ri.

⁴⁷ Buigyum htâng, lhai gi, nhông gùng má jé tô é u lé, Yesuq gi, Yhang baú za myí htoq má nyi tô ashí nghut ri. ⁴⁸ Lai tau mut é yanmai, haú chángzô pé gi, lhai

* 6:37 Denari rachap gi, byù rayuq é ra-nyí lhê é zuihpau eq wuí ri.

lhu wuîhkê nyi kô é lé, Yesuq myang ri. Napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló luí, yhangmoq é nàm mai lai ló rã dâ ri. ⁴⁹ Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garû bum akô nghut ri. ⁵⁰ Hkâsu mù gâ le, yhangmoq banshoq bang gi, Yhang lé myàng kôluí, gyuq dàn kô é yanmai nghut ri.

Nghut kôlhang, Yhang, radá dâm yhangmoq lé dâng nyo kat é gi, "Hkâgyuq kó. Ngò ru nghut lhê; zim za nyi keq." gâ ri. ⁵¹ Hau htâng, Yhang gi, lhai htoq má yhangmoq eq rahá ê doq ji jáng, lai gi, zîm byuq bê nghut ri; hau mù, yhangmoq gi, gyai yhang mauhong byuq bùm bekô nghut ri. ⁵² Hkâsu mù gâ lé, yhangmoq gi, muk gam é laklai kumlhá eq séng luí a sê gyo kô é htoq agó, myitbun a bóng kô é yanmai nghut ri.

⁵³ Yhangmoq gi, gû dap ló kômù, Gensarat mau má jé wang lò jáng, lhai lé hau má ló shap tô akô nghut ri. ⁵⁴ Yhangmoq lhai mai gyó é hkûn jáng, byu pé gi, Yesuq lé lhom wú sê akô nghut ri. ⁵⁵ Hau mù, yhangmoq gi, hau mau ramau gón má din jón mù, nò bang lé taphkang mai waq luí, Yesuq nyi rí gâ é jowò hkanmó má, shuí lé lo bum akô nghut ri. ⁵⁶ Yesuq jé é wà hkanmó, myuq hkanmó, awui ayàm mâ é wà hkanmó pé má, yhangmoq gi, nò byù lé gai pé má lé lhez to kôluí, Yhâng é bushi htâng má za lhang, hau bang lé byi záng nhâng rã matú, Yhang lé dúng tóngbán akô. Yhang lé záng é lhunglhang bang gi, lhoq gê byi é huí akô nghut ri.

7

A Sanséng Dut Nhang É Hkyô Pé Mht 15:1-20

¹ Hau Hparishe pé eq tarã sarã pé ra-am gi, Yerusalem wà mó mai jé lé lô kômù, Yesuq é nàm má lé zup zîng bum akô. ² Hau hkûn, Yhâng é chángzô pé ra-am gi, htungli dông a chí pyâm é, a sanséng é loq èq zo shuq nyi kô é lé, yhangmoq myang akô nghut ri. ³ (Hparishe pé eq Yudaq byù banshoq bang gi, yhangmoq é îchyí îwã pé é htungli lé châng é bang nghut lhê mù luí, loq hí a chí é gi, hai le a zô wú kó nghut

ri. ⁴ Yhangmoq gi, gai pé mai taû lò jáng le, gùng hí a chí pyâm é, zojung a zo kó nghut é htoq agó, góm pé, hkoq pé, gyi chòkon pé lé chí é htungli gotû pé lé le, châng akô nghut ri.)

⁵ Hau mù, Hparishe pé eq tarã sarã pé gi, Yesuq lé, "Náng é chángzô pé gi, hai mù luí, îchyí îwã pé é htungli lé a châng e za, a sanséng é loq èq zo shuq nyi akô lhu?" ga myi akô.

⁶ Hau hkûn, Yesuq gi, yhangmoq lé, "Gegùn labyoq kut bang ê, nungmoq eq séng luí myiqhtoi Esai-aq htoî tô é dang má, 'Byù shí bang gi, nhut htoq mai za Ngo lé hkunggã akô; yhangmoq é myit nhiklhun gi, Ngò eq wê gâng nyi akô.

⁷ Yhangmoq gi, akôm má za, Ngo lé noqkuq nyi akô; hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri. ⁸ ☆

ga kã tô é gi, têng ri. ⁸ Nungmoq gi, Garai Gasang tô tô é hkunmó lé tô pyâm luí, byu é htungli lé za, myhik zing tô akô nghut ri." ga luí tũ taí ri.

⁹ Hau htâng, Yhang xoq taí é gi, "Nungmoq gi, yhumsing é htungli lé za châng rã matú, Garai Gasang é hkunmó lé he-ngik pyâm é má, hpaqchyí gyai bo akô nghut ri.

¹⁰ Hkâsu mù gâ le, Mosheq gi, 'Nungmoq é înu îwã lé, hkungga keq. ¹¹ ☆ ga le, 'înu îwã lé, nhîng é sù ó yuq nghut kôle, sat pyâm é hui rã lhê. ¹² ☆ ga le, kã tô é nghut lhê. ¹³ Nghut kôlhang, nungmoq taí é gi, byù rayuq yuq, yhumsing é yhângnu yhângwã lé byi âng é zè lé, Korban za (Garai Gasang lé byi rã chyunghuq) nghut lhê gã nhang akô. ¹⁴ Hau mù, hau yuq lé, yhângnu yhângwã é matú, hai a kut byi nhâng lô é dông dut bê nghut ri. ¹⁵ Hau dông mai, nungmoq gi, nungmoq chung gyó lo é htungli é yanmai, Garai Gasang é mungdang lé he-ngik pyâm akô; hau sũ é hkyô myo myo lé le, nungmoq kut akô nghut ri." gâ ri.

¹⁶ Yesuq gi, shiwa byu pé lé Yhâng chyáng dum wut yù mù, taí é gi, "Nungmoq banshoq bang, ngò taí é lé gyô yù mù, sé lo keq; ¹⁷ Shinggan mai wang lo é hai jung le, byù lé a sanséng dut nhang é a nghut, nghut

kôlhang, byu é unghkaû mai htoq ló é zè kúm gi, byù lé a sanséng dut nhang lhê." gâ ri. ¹⁶(Gyo râ nohkyap dap é sù gi, gyô yù sháng gaq.)" ga taî ri.*

¹⁷Yhang gi, byù moq mó mai htoq ló mù, yhúmhaû má jé wang ló é hkûn, Yhâng é chángzô pé gi, dangtú haû eq séng luî, Yhang lé lhom myî akô nghut ri. ¹⁸Haû mù, Yhang gi, yhangmoq lé, "Nungmoq gi, haû-í yhang go akô luq? Shinggan mai wang lo é haî jung le, byù lé a sanséng nhâng wó dut râ a nghut é hkyô lé, a sé kó lhú? ¹⁹Hkâsu mù gâ lé, haû gi, byu é myit nhiklum hkaû má wang ló é a nghut e za, wamdau hkaû má sheq wang ló é nghut mù, shinggan shut dum lhoq htoq pyâm é nghut lhê." ga taî ri. (Yhang isu ga taî é gi, zoshuq lhunglhang sansêng lhê gâ nau é đông nghut ri.)

²⁰Hau htoq agó, Yhang xoq taî é gi, "Byù mai htoq ló é haî jung le, byù lé a sanséng nhâng wó dut é nghut lhê. ²¹Hkâsu mù gâ lé, ahkaû mai htoq lo é gi, byu pé é myit mai htoq ló é nghut mù, agè ashop é đông myit é hkyô pé, ashop é đông gungsho zùm yap é hkyô, hkaû é hkyô, byù sat é hkyô, su-myi sulàng lú hkyô, ²²myoqnoq é hkyô, agè ashop é hkyô, mhaû zô é hkyô, achaq achyut zùm yap lhûm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê; ²³Agè ashop é hkyô shí pé banshoq gi, byu é unghkaû mai htoq lo é nghut mù, byù lé a sanséng dut nhang ri." gâ ri.

Tûngbaù Myiwe Myhí Rayuq É Lumjîng Myit

Mht 15:21-28

²⁴Yesuq gi, haû jowò mai htoq ló mù, Turuq eq Sidun maukyo shut e ló luî, yhûm ralhum má wang ê ri; Yhang nyi é hkyô lé, ó yuq lé lé a sé nhâng nau kôlhang, a wó zaú to nghut ri. ²⁵Haû mù, agè ashop é nat wang júng tô é myiwe zo rayuq é yhângnu gi, Yhang nyi tô é hkyô lé wó gyô é hkûn jáng, Yhâng chyáng jé lé mù, Yhâng é hkyî wang má lé paî gop to luî, ²⁶yhang zô chyáng mai nat gang lé hkat htoq pyâm byi râ matú, Yhang lé dúng tôngbán ri. Myiwe haû gi,

Suru-Hpiniki mau mâ é Grik byuhú nghut ri.

²⁷Yesuq gi, "Zo wuî† hí zô gyi kó sháng gaq; haî mù gâ le, zô wui chyáng mâ é zoshuq lé yù mù, hkuî pé‡ lé byi tsô é jung a nghut." ga yhang lé taî kyô ri.

²⁸Haû hkûn, yhang gi, "Yhumsîng ê! Haû kúm nghut ri; nghut kôlhang, siboî ô mâ é hkuî lhang, zô wui é zô myhit shuq htâng lé, ge zo lhê a nghut lhú?" ga dum tû taî ri.

²⁹Haû mù, Yesuq gi, yhang lé, "Nàng tû taî é dang hau é yanmai, ló lo aq hkoi; haû nat gang gi, nung zô chyáng mai htoq ló byuq bê nghut ri." ga taî kat ri.

³⁰Myiwe myhí haû gi, yhûm má dum taù jé lo é hkûn, yhang zo chong htoq má leq to lánng é lé le, nat gang htoq byuq bê nghut é lé le, lo myang ri.

Nojit É Eq Dang A Hkyang É Sù Lé Lhoq Gê Byî É Hkyô

³¹Yesuq gi, Turuq mau mai dum htoq ló mù, Sidun mai sô laî ló luî, Dekapoli mau hkaû đông laî byit mù, Galile nhông shut gyó jé ló ri. ³²Haû hkûn, byù ra-am gi, nojit é eq dang a hkyang é byù rayuq lé, Yhâng chyáng shuî lé lô kômù, haû yuq é ahtoq má loq ke byi râ matú, Yhang lé dúng tôngbán akô nghut ri.

³³Yesuq gi, haû yuq lé baú za byù hpúng mai shuî htoq yù mù, yhâng é nohkyûng má loqnyhui htaû háng byi luî, sôkan byé tik yù mù, haû yuq é shô má htau byî ri. ³⁴Hau htâng, Yhang gi, mauhkûng shut tu wú mù, soq mó shê luî, "Ehpahta!" (Lichyúm gi, "Bóng aq hkoi!") ga luî, haû yuq lé taî kat ri. ³⁵Haû hkûn, haû yuq é nohkyap le bóng byuq luî, shô le nyhôm byuq mù, balang hkyâng hkyâng dang wó nyô bê nghut ri.

³⁶Yesuq gi, haû hkyô ó lé le a taî kyo râ matú, yhangmoq lé hkúm kôlhang, yhangmoq gi, je hkúm le, je taî pyo akô nghut ri. ³⁷Byu pé gi, gyai yhang mauhong byuq bùm kôluî, "Yhang gi, haî lé le, ge é đông chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga luî, taî bum akô nghut ri.

* 7:16 Bun zo shí gi, Chyúmlaika ra-am má bo lhê, ra-am má a bò. † 7:27 Zo wuî gâ é gi, Yudaq byu pé lé gâ é nghut lhê. ‡ 7:27 Hkuî pé gâ é gi, tûngbaù pé lé gâ é nghut lhê.

8

Byù Myi Hkyîng Lé Byi Tsô É Hkyô
Mht 15:32-39

¹Haú yoq má, gotû byù moq mó gi, lé zîng bum akô; haú bang zoshuq langhpyut to kô é yanmai, Yesuq gi, Yhâng é chángzô pé lé wut yù mù, ²"Ngò, shí bang lé wú shogyo ri; yhangmoq gi, Ngò eq rahá nghut nyi é sum nyí bò bê, haî le a myàng zo kó nghut ri. ³Yhangmoq chyáng mâ é ra-am gi, mau we mai lé é bang nghut é yanmai, yhangmoq lé, zòmút gû yhûm shut nhang kat é nghut le gi, hkyolat má mutyut yut é ló hui kó rá nghut lhê." ga taî ri.

⁴Haú hkûn, Yhâng é chángzô pé gi, Yhang lé, "Ísu é yoso má nhîng, shî myhò bang lé luq shoq byi tso rá zoshuq gi, hkâmá ê yû rá lú?" ga taî akô.

⁵Yesuq gi, "Nungmoq, muk hkâ-myhó long wó akô lú?" ga taî myi jáng, yhangmoq gi, "Nyhit long." ga, dum tû taî akô nghut ri.

⁶Haú mù, Yhang gi, byù hpûng lé myigùng htoq má zùng nhang to luî, muk haú nyhit long lé yù mù, jeju ban hkya-on jáng, myhik hpé luî, haú bang lé gàm byi rá matú, Yhâng é chángzô pé lé byî kat ri; haú mù, yhangmoq gi, haú bang lé gàm byî akô nghut ri. ⁷Yhangmoq gi, ngo-nú zo ratsuí le wó akô nghut ri; haú mù, Yhang gi, ngozo haú pê é matú jeju hkya-on luî, chángzô pé lé dum gàm byî nhang ri. ⁸Yuq hkangmó zô gyî bùm kô é htàng má, haú chángzô pé gi, amyit ahtâng lé nyhit mung byíng shoq wó guq tsîng yu ashî kó nghut ri. ⁹Zô é bang gi, byù myi hkyîng kô nghut ri; Yesuq gi, haú bang lé, nhang kat luî, ¹⁰Yhâng é chángzô pé eq rahá, lhaî má wang ji mù, Dalamauhta mau má ê jé akô nghut ri.

¹¹Hparishe pé gi, lé mù, Yesuq eq dang htíng htîng lhûm akô; hau htoq agó, yhangmoq gi, mauhkûng mâ é kumlhá lé dúng é dông, Yhang lé chyam wú akô nghut ri. ¹²Yesuq gi, myit nò-kying kying luî, yhangmoq lé taî é gi, "Haî mù luî, shí ipyat lhê é byu pé gi, limik kumlhá dúng akô lú? Ngò teng za taî kôlé, shí ipyat mâ é bang lé, hai kumlhá le tûn shit rá a nghut." gâ ri. ¹³Hau htâng, Yhang gi, yhangmoq lé pyâm

to mù, lhaî má dum taû wang ló luî, tû tap shut gû dap e ló bê nghut ri.

Hparishe Pé Eq Herut É Múnchi
Mht 16:5-12

¹⁴Haú chángzô pé gi, muk yu chûng rá lé tô-myhî pyám kôluî, lhaî hkaû má muk ralong za ru wó akô nghut ri. ¹⁵Yesuq gi, yhangmoq lé, "Nungmoq gi, Hparishe pé eq Herut é múnchi* lé, sidiq luî, koi pyâm nyi keq." ga taî ri.

¹⁶Haú hkûn, yhangmoq gi, "Nga-nhûng chyáng muk a bo é yanmai, haú su ga taî é nghut ri." ga luî, rayuq eq rayuq taî lhûm bum akô nghut ri.

¹⁷Haú su ga taî lhûm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haî mù taî lhûm nyi akô lú? Ahkuî jé shoq, nungmoq gi, a byu-myàng, a sê gyo shi kó lú? Nungmoq é myit nhiklhum gi, ru htan nyi ashî kó lú? ¹⁸Myoq dap to kôluî nhîng, a myàng kó lú? Nohkyap dap to kôluî nhîng, a wó gyo kó lú? ¹⁹Ngò, muk ngo long lé myhik hpé mù, byù ngo hkyîng lé byi tsô é hkûn, zô myhit shuq htàng lé, nungmoq hkâ-myhó mung wó guq tsîng yu é lé, bun ashî kó lú?" ga myi jáng, yhangmoq gi, "Raxe í mung." ga tû taî akô.

²⁰Dum, Yesuq gi, "Ngò, muk nyhit long lé myhik hpé mù, byù myi hkyîng lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsîng yu kô é lú?" ga myi jáng, yhangmoq gi, "Nyhit mung." ga dum tû taî akô.

²¹Haú hkûn, Yesuq gi, "Haú nghut le nhîng, ahkuî le, a sê gyo shi kó lú?" ga, yhangmoq lé myî ri.

Myoqjit Sû Rayuq Lé Lhoq Gê Byî É Hkyô

²²Yhangmoq gi, Bet-saida wà mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lò mù, haú yuq lé záng byi rá matú, dúng tôngbán akô.

²³Yesuq gi, myoqjit sù haú yuq é loq lé zui mù, wà shinggan shut shuí htoq ló luî, yhâng é myoq má sôkan byé tik byi mù, loq ke byi luî, "Nàng, rajung jung lé myang ri lú?" ga myî kat ri.

²⁴Haú jáng, yhang gi, tu wú kat luî, "Byu pé gi, sikgâm su dut luî, hkyô sô wún é lé, ngò myang ri." ga taî ri.

* 8:15 Shí má taî é múnchi gi, Hparishe pé eq Herut é mhoqshit hkyô lé, lhoq pyo é lé gâ lhê.

²⁵ Hau htâng, Yesuq gi, haú yuq é myoq má Yhâng é loq dum ke byî ri; haú hkûn, haú yuq é myoq gi, bóng lô mù, ge byuq luî, haí lé le san za myàng bê nghut ri. ²⁶ Yesuq gi, haú yuq lé, "Wà hkaû má hkâwang lô lo." ga tái luî, yhâng é yhûm shut lô nhang kat bê nghut ri.

Hkrisduq Ga, Petruq Yín Yu É Hkyô

Mht 16:13-20; Luk 9:18-21

²⁷ Yesuq eq Yhâng é chángzô pé gi, Kesare-Hpilipi wà mó awui ayàm mâ é wà pé shut e lô é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, tái akô lhú?" ga myî ri.

²⁸ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga tái akô." ga, Yhang lé tû tái akô.

²⁹ Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myi jáng, Petruq gi, "Nàng gi, Hkrisduq† nghut ri." ga tû tái ri.

³⁰ Yesuq gi, haú hkyô ó lé le a tái kyo râ matú, yhangmoq lé tái hkúm ri.

Byu Yhangzo Gi, Sat Pyâm É Hui Luî, Dum Dui Toq Râ Hkyô

Mht 16:21-28; Luk 9:22-27

³¹ Hau htâng, Yhang gi, yhangmoq lé mhoqshit é má, "Haú Byu Yhangzo gi, zing-rî é myo myo hui zo luî, suwún wuî, hkyangjong agyi pé, tarâ sará pê èq he-ngik pyâm é hui mù, sat pyâm é hui ra râ nghut lhê; nghut kôlhâng, sum nyí nghû râ buinyì má, dum dui toq râ nghut lhê." gâ ri.

³² Yesuq gi, haú hkyô lé san za dut shoq tái nyi é yanmai, Petruq gi, Yhang lé rahkyam shut shuí htoq yû mù, Yhang lé tân ri.

³³ Nghut kôlhâng, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

³⁴ Hau htâng, Yhang gi, byù moq mó eq Yhâng é chángzô pé lé wut yù mù, tái é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyám mù, yhumsing é tapzîng lé waq chûng luî,

cháng ra râ nghut lhê. ³⁵ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhâng, Ngá é yanmai le, haú gabú danglù é yanmai le, yhumsing é asak sùm pyâm é sù kúm gi, asak hkyi yu é hui râ nghut lhê. ³⁶ Byù gi, mingkan gón lé wó sing to kôlhâng, yhumsing é asak woi-nyí sùm byuq é nghut le gi, yhâng é matú, hai akyû bò râ lhú? ³⁷ Byù gi, yhumsing é asak woi-nyí lé, hai èq wó htaí yù râ lhú? ³⁸ Yubak mara myô é eq su-myi sulàng shut é ipyat shí má, Ngò eq Ngá é dang lé hoq pyâm é sù ó yuq lé le, haú Byu Yhangzo gi, Yhâng Wâ é hpungwup shing kang bo é èq, haú chyoiyúng maumang lagyô pé eq rahá jé lé é hkûn, hoq pyám râ nghut lhê."☆ gâ ri.

9

¹ Hau htâng, Yesuq gi, yhangmoq lé, "Ngò, nungmoq lé teng za tái kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shí kó râ a nghut." ga tái ri.

Yesuq É Ihpyô Isâm Htaí Lo É Hkyô

Mht 17:1-13; Luk 9:28-36

² Hkyuq nyí lai htâng má, Yesuq gi, Petruq lé le, Yakuq eq Yohan lé le, shuí chûng mù, yhangmoq baú myhang é bùm ralhûm má doq lô akô; haú hkûn, yhangmoq é myoq hí tê má, Yesuq é ihpyô isâm htaí lo ri. ³ Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haú-í hpyû shoq a wó xaú hpyu wú é nghut lhê. ⁴ Eliyaq eq Mosheq gi, yhangmoq é hí má htoq shit mù, Yesuq eq dáng nyo lhûm nyi akô.

⁵ Haú mù, Petruq gi, Yesuq lé, "Rabai ê, shí jowò má nga-nhúng nyi le ge ri; haú mù, Náng é matú ralhûm, Mosheq é matú ralhûm, Eliyaq é matú ralhûm kut, ngamoq lé, zúm sùm lhum saí nhâng laq." ga tái ri. ⁶ Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, tái tái râ le a sé mù, haú su gâ é nghut ri.

⁷ Hau htâng, mhut htoq lô luî, yhangmoq lé htup zîng lô mù, mhut hkaû mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhâng é dang gyo keq." gâ ri.

† 8:29 Grik dong Hkrisduq gâ é gi, xû but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê. ☆ 8:38 Yer 3:8; Ezk 23:37; Hos 2:2-10

⁸ Haú hkûn jáng, chángzô pé gi, lhinghkyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

⁹ Yhangmoq, bùm mai taú gyó lô kô é hkûn, Yesuq gi, haú Byu Yhangzo shi é mai a dum dui toq toq gi, yhangmoq myang é hkyô lé, ó lé le a taí kyo râ matú taí hkúm tô ri. ¹⁰ Chángzô pé gi, dang haú lé myit má kat to kôluí, "Shi é mai dum dui toq rá." gâ é lichyúm lé, rayuq eq rayuq myí lhúm bum akô nghut ri.

¹¹ Haú htâng, yhangmoq gi, "Eliyaq hí lé ra râ nghut lhê ga, tarâ sará pé haí mù taí kô é lhu?" ga, Yesuq lé myí akô.

¹² Haú hkûn, Yesuq gi, "Eliyaq hí jé lé é gi, teng bê nghut luí, lunglhang lé dum lajâng tô é nghut ri. Nghut kôlhang, haú Byu Yhangzo gi, myo myo hpuzo luí, hengik pyâm é hui ra nghut lhê ga le, Chyúmdang má kê to ashî, a nghut kó lhu?" ¹³ Ngò, nungmoq lé taí kôlé, Eliyaq gi, jé lé bê nghut mù, yhang eq séng luí Chyúmdang má kê tô é eq rajung za, yhangmoq gi, ô nau é dông banshoq kut bekô nghut ri." ga tû taí ri.

Nat Dap É Yuqgè Zo Rayuq Lé Lhoq Gê Byí É Hkyô

Mht 17:14-20, 22-23; Luk 9:37-45

¹⁴ Yhangmoq gi, chángzô pè chyáng dum taú jé lô kô é hkûn, haú bang é lhinghkyuq má byù moq mó zîng lé é lé le, tarâ sará pé, haú bang eq dang htíng htîng lhúm nyi kô é lé le, myang akô. ¹⁵ Haú má nyi tô é lunglhang bang gi, Yesuq lé myang kat é eq, maú byuq kôluí, din ê mù, ê shi-kyâm akô nghut ri.

¹⁶ Haú hkûn, Yesuq gi, yhangmoq lé, "Nungmoq gi, yhangmoq eq haí lé dang htíng htîng lhúm nyi akô lhu?" ga myí ri.

¹⁷ Byù hpúng hkaú mâ é rayuq tû taí kat é gi, "Sará ê! Nhut jit nhang é nat wang júng tô é ngá é yuqzo lé, Náng chyáng shuí lé lo lhê. ¹⁸ Nat haú gi, yhang chyáng wàng hkanmó, yhang lé myí htoq má lhoq leqbat nhang ri; haú mù, yhang gi, nhut mai guttsû htoq lhê, zui kyik kyik lhê, langhtan lo lhê, dut ri; hau é yanmai, nat haú lé hkat htoq pyám byi râ matú, Náng é chángzô pé lé dúng wú kôlhang, yhangmoq a wó dut kó nghut ri." gâ ri.

¹⁹ Haú hkûn, Yesuq gi, "Lumjîng myit a bo é amyú pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhu? Yuqgè zo haú lé, Ngá chyáng shuí lé lô keq." ga taí kat ri.

²⁰ Haú mù, yhangmoq gi, yuqgè zo haú lé shuí lé lo akô; nat haú gi, Yesuq lé myang kat é eq yhang, yuqgè zo haú lé langhtan nhang ri; yuqgè zo haú gi, myigùng má lêng leq luí goleng leng mù, nhut mai tsû-myup htoq nyi ri.

²¹ Haú hkûn, Yesuq gi, yhangwa lé, "Yhang, isu dut é hkâ-myháng myáng bê lhu?" ga myi jáng, yhang wa gi, "Zoshâng hkûn mai nghut bê. ²² Nat haú gi, yhang lé lhoq sat pyám naú mù, myi má le, wui má le, anum num lêng wàng nhang wú bê nghut lhê; nghut kôlhang, Nàng, rajung jung wó kut byí é nghut le gi, ngá hpe lé shogyo yù laq, garúm yù laq." ga tû taí ri.

²³ Yesuq gi, "Nàng, wó kut byí é nghut le gi, nghú, haí mù taí lhê lhu? Lumjîng myit bò su é matú gi, haí le wó dut lhê." ga, yhang lé taí ri.

²⁴ Haú zôshang é yhangwa gi, radá dâm, "Ngò lumjîng lhê; nghut kôlhang, ngá é lumjîng myit gi, shaú ashî nghut é yanmai garúm yù laq." ga taí garú ri.

²⁵ Yesuq gi, byù hpúng din zîng lé lô kô é lé, myàng jáng, haú agè ashop é nat lé, "Nojit, nhutjit nhang é nat ê! Ngò, nang lé hkunmó hkyô lhê, yhang chyáng mai htoq ló aq; hkâ-nhám le, yhang chyáng hkâdum wàng lo." ga tân kat ri.

²⁶ Haú hkûn, nat haú gi, garu mù, zoshâng haú lé wum kat langhtan nhang luí, htoq ló byuq bê. Zoshâng haú gi, shî mâng gùng su dut byuq é yanmai, byù myo myo gi, "Yhang shî bê nghut ri." ga taí akô. ²⁷ Nghut kôlhang, Yesuq gi, zôshang é loq má zui luí, tu toq kat ri; haú mù, zoshâng gi, yap to bê nghut ri.

²⁸ Yesuq, yhúmhkaú má wang ló é htâng, Yhang é chángzô pé gi, "Ngamoq gi, haí mù, nat haú lé a wó hkat htoq é lhu?" ga, tsik za Yhang lé myí akô.

²⁹ Yesuq gi, "Haú jung nat lé gi, kyûdùng é dông za a nghut jáng, wó hkat htoq râ a nghut." ga, yhangmoq lé tû taí ri.

³⁰ Yhangmoq gi, haú jowò mai htoq ló mù, Galile mau mai lai lô akô; nghut kôlhang, Yesuq gi, ó lé le a sé nhâng naú nghut

ri. ³¹ Haû mù gâ le, Yhang gi, "Haû Byu Yhangzo gi, byu pê é loq má ap pyâm é hui râ nghut lhê; haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyí nghû râ nyí má, dum dui toq râ nghut lhê." ga, Yhâng é chángzô pé lé mhoqshit byí nyí é yanmai nghut ri. ³² Yhâng é chángzô pé gi, dang haú lé a sê gyo kôlhang, Yhâng chyáng a wám myi kó nghut ri.

Kô Dik Sû Gi, Ó Yuq Nghut Lhê Lhú?

Mht 18:1-5; Luk 9:46-48

³³ Yhangmoq gi, Kaperna-um wà má jé e akô nghut ri. Yesuq gi, yhúmhkaû má nyí tô é hkûn, chángzô pé lé, "Hkyô má, nungmoq, hai hkyô lé dang chyin chyin lhum kô é lhú?" ga myí ri. ³⁴ Nghut kôlhang, yhangmoq gi, zim za nyí tô akô; hkâsu mù gâ le, ko dik sû gi, ó yuq nghut lhê nghû é hkyô lé, hkyolat má, yhangmoq dang chyin chyin lhum kô é yanmai nghut ri.

³⁵ Yesuq gi, zùng mù, haû chángzo raxe í yuq lé, wut yù luí, "Kô dik naû sù ó yuq nghut kôle, tiq dik sù eq banshoq bâng é dui-nhâng zoshâng dut ra râ nghut lhê." ga taí ri.

³⁶ Hau htâng, Yhang gi, zoshâng rayuq lé shuí yù mù, yhangmoq é gung gung má shap to luí, dum bún yù mù, yhangmoq lé taí é gi, ³⁷ "Shí sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê; Ngo lé hap yu é sù ó yuq nghut kôle, Ngo lé za hap yu é a nghut, Ngo lé nhang kat é Sù lé hap yu é le nghut lhê." gâ ri.

Nga-nhúng Lé Gyè A Kut É Sû Gi, Nga-nhúng É Hkyam Shut Nghut Lhê Gâ É Hkyô

Luk 9:49-50

³⁸ Haú hkûn, Yohan gi, "Sarâ ê! Náng é myìng lang luí, nat gâng pé lé hkat pyám byí wún é byù rayuq lé, ngamoq myang ri. Yhang gi, nga-nhúng chyáng a lòm sù nghut é yanmai, yhang lé ngamoq hkûm pyâm é nghut lhê." ga taí ri.

³⁹ Yesuq kúm gi, "Yhang lé hkâhkúm kó; Ngá myìng lé lang luí, laklaí kumlhá kut é sù gi, razup za má, Ngò eq séng luí, a ge é hkyô pé lé taí râ a nghut; ⁴⁰ Hkâsu mù gâ le, nga-nhúng lé gyè a kut é sù gi, nga-nhúng é hkyam shut nghut lhê. ⁴¹ Ngò,

nungmoq lé teng za taí kôlé, nungmoq gi, Hkrisduq eq sêng é bang nghut lhê gâ é yanmai, ngá é myìng lé lang luí, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù râ za nghut lhê.

Mara Shut Nhang É Hkyô

Mht 18:6-9; Luk 17:1-2

⁴² Ngo lé lumjìng é zoshâng wuì má é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má ê dú hkyó pyâm é huí é nghut lé gi, yhang é matú je gè râ nghut lhê. ⁴³ Náng é loq èq, nang lé mara kut shut nhang é nghut le gi, haú lé hpyit dú pyám aq; loq í loq dap luí, hkâ-nhám le, myiduoq a dat shum é ngaraí ming wàng râ htoq má, loq raloq eq za ahtum abyuq é asak wó râ shut wàng le gi, náng é matú je ge ri. ⁴⁴ (Haû ngaraí ming gi, 'yhangmoq lé hkê nyí é luq le a shí, myiduoq le a shûm' é jowò nghut lhê.)* ⁴⁵ Náng é hkyi èq, nang lé mara kut shut nhang é nghut le gi, haú lé hpyit dú pyám aq; hkyí í hkyí dap luí, hkâ-nhám le, myiduoq a dat shum é ngaraí ming má dú hkyô pyâm é hui râ htoq má, hkyí rahkyí za dap luí, ahtum abyuq é asak wó râ shut wang le gi, náng é matú je ge ri. ⁴⁶ (Haû ngaraí ming gi, 'yhangmoq lé hkê nyí é luq le a shí, myiduoq le a shûm' é jowò nghut lhê.) ⁴⁷ Náng é myoqjí èq, nang lé mara kut shut nhang é nghut le gi, haú lé lap choq pyám aq; myoqjí í jí dap gú, ngaraí ming má dú hkyó pyâm é hui râ htoq má, myoq rají eq za, Garai Gasâng é mingdán má wang le gi, náng é matú je ge ri.

⁴⁸ (Haû ngaraí ming gi, 'yhangmoq lé hkê nyí é luq le a shí, myiduoq lé a shûm' é jowò nghut lhê.)✧

⁴⁹ Hkâsu mù gâ le, hkungga sho lé xo kat luí lhoq sansêng é su, myi gi, yuq hkangmó lé lhoq sanséng râ nghut lhê.✧

⁵⁰ Xo gi, ge lhê. Nghut kôlhang, xomân kân byuq jáng gi, hkâsu kut dum wó lhoq ngam yù râ lhú? Nungmoq gi, xo su ngam nyí mù, rayuq eq rayuq nguìngón nyí keq." ga taí ri.

* 9:44 Bun zo 44, 46, gi, Chyúmlaika myo myo má a bo é nghut lhê. ✧ 9:48 Esai 66:24 ✧ 9:49 Nhang 2:13

10

Myi, Làng Gâng É Hkyô

Mht 19:1-12; Luk 16:18

¹Hau htâng má, Yesuq gi, Kaperna-um mai htoq ló mù, Yuda mau mâ é maukyo má ê jé luí, Yodan làng tû tap má dap ló bê nghut ri; byù myo myo gi, Yhâng chyáng dum zîng lé lô kôluí, Yesuq gi, Yhang lhaq kut nyi é eq rajung za, haú bang lé mhoqshit byî ri.

²Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarâ wang lhê lú?" ga myí é dong, Yhang lé chyam wú akô.

³Yesuq gi, "Mosheq gi, nungmoq lé, hkâsu ga hkunmó hkyó tô é lú?" ga taú myî ri.

⁴Haú hkûn, yhangmoq gi, "Yuqgè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byî tô ri." ga tû taí akô.

⁵Yesuq dum tû taí é gi, "Nungmoq é myit nhiklhum htân kô é yanmai, Mosheq gi, tarâ haú lé kâ tô é nghut lhê. ⁶Nghut kôlhang, mau htoq xâng hkun lé, Garai Gasang gi, 'yuqgè eq myiwe lé hpan é nghut lhê'.[☆] ⁷'Hau é yanmai, yuqgè gi, yhumsing înu îwâ chyáng mai htoq luí, yhangmyi eq rahá rading ralhumm za kut nyí mù, ⁸yhangnhik gi, gungsho ralhumm za dut byuq kó rà nghut lhê'.[☆] Haú mù luí, yhangnhik gi, í yuq a nghut lo é za, rayuq za dut bê nghut ri. ⁹Haú mù luí, Garai Gasang lhoq tsûm tô é lé, byù gi, a lhoq kang sháng gaq." gâ ri.

¹⁰Yhumhkaú má, yhangmoq nyi tô é hkûn lé, chángzô pé gi, haú hkyô eq séng luí, Yhang lé dum saí myí akô. ¹¹Haú hkûn, Yhang gi, "Yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù dut bê nghut mù, yhangmyi lé shut é sù nghut bê. ¹²Myiwe rayuq le, yhumsing é yhanglâng lé kâng pyám mù, yuqgè góyuq eq dum hâng é nghut le gi, sulâng lú é hkyô lé kut bê nghut ri." ga tû taí ri.

Zoshâng Wuí Eq Yesuq É Hkyô

Mht 19:13-15; Luk 18:15-17

¹³Byu pé gi, zoshâng wuí lé Yesuq záng byi sháng gaq ga, Yesuq chyáng shuí lé lo

akô; nghut kôlhang, chángzô pé gi, yhangmoq lé lhom tân hkûm akô nghut ri. ¹⁴Haú lé Yesuq myàng jáng, Yhang gi, wú nhik-yo naú luí, "Haú zoshâng wuí lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haú su é bâng é mingdán ru nghut lhê. ¹⁵Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haú má wó wàng râ a nghut." ga yhangmoq lé taí ri. ¹⁶Hau htâng, Yesuq gi, zoshâng wuí lé bún yù mù, yhangmoq ahtoq má loq ke luí, shimân byî ri.

Sùt Wó É Zorâm Rayuq É Hkyô

Mht 19:16-30; Luk 18:18-30

¹⁷Yesuq gi, hkyô dum so xoq e ló é hkûn, byù rayuq gi, òn lé lô mù, Yhâng é hí má hkyihput htuq luí, "Ge é Sará ê, ahtum abyuq é asak wó yù râ matú, ngò haí kut ra râ lú?" ga myî ri.

¹⁸Haú mù, Yesuq gi, "Haí mù, Ngo lé ge é Sará nghu lhê lú? Garai Gasang mai lai luí, ge é ó yuq le a nyì. ¹⁹Jep e tarâ má, 'Byù hkâsat, su-myi sulâng hkâlú, hkâhkau, a teng a mán é saksé hkâhkâm, hkâmô zo, nángnu nángwa lé hkungga aq!' [☆] ga bo tô é lé, nàng sê lhê." ga tû taí ri.

²⁰Haú hkûn, haú yuq gi, "Sará ê, haú pé banshoq lé, ngò, zoshâng hkûn mai cháng bê nghut lhê." ga taí ri.

²¹Yesuq gi, haú yuq lé wú tsuq to mù, yhang lé chytidap luí, taí é gi, "Nàng kut rà rajung rà tô ashî; ló mù, nàng wó miwó lé ûng pyám luí, myùng bang lé byî pyám aq; haú jáng, nàng, mauhkûng htoq má sutzè wó rà nghut lhê; haú mù, Ngá htâng lé cháng aq." gâ ri.

²²Haú yuq gi, dang haú lé wó gyo jáng, sutzè gyai wó sù nghut é yanmai, myoq-dong shum byuq mù, gyai yhang myit a ngón é èq ló byuq bê nghut ri.

²³Yesuq gi, lnhnghkyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng râ matú, haú-í yhang wuí ri-nhung!" ga taí ri.

²⁴Chángzô pé gi, Yhang taí é dang é yanmai, mauhong bum akô nghut ri. Nghut kôlhang, Yesuq dum xoq taí é gi, "Zo wuí ê, Garai Gasâng é mingdán má wàng râ

matú, haú-í yhang wuî ri-nhung! ²⁵ Sutzê wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." gâ taí ri.

²⁶ Haú hkûn, chángzô pé gi, je riyhang maú byuq kômù, rayuq eq rayuq, "Haú su ru nghut le gi, ó yuq za hkyi yu é hui râ nghut lhê lú?" ga, taí lhûm bum akô nghut ri.

²⁷ Haú hkûn, Yesuq gi, yhangmoq lé wú kat mù, "Haú hkyô lé, byù mai gi, wó kut râ a nghut; nghut kôlhang, Garai Gasang gi, wó dut lhê; hkâsu mù gâ le, Garai Gasang gi, lhunglhang lé wó kut é Sù nghut lhê." ga taí ri.

²⁸ Haú hkûn, Petruq gi, Yhang lé, "Ngamoq gi, wó é gû lhunglhang lé tô pyâm to lui, Náng htâng cháng bê nghut lhê." ga taí ri.

²⁹ Haú mù, Yesuq tû taí é gi, "Ngò, nungmoq lé teng za taí kôlé, Ngá é yanmai le, gabú danglu é yanmai le, yhumsing é yhûm, gumang gu-nhá, înu îwa, zo dù wuî eq yò pé lé tô pyâm tô é sù ó yuq nghut kôle, ³⁰ shí pyat lhê é yhûm pé, gumang gu-nhá wuî, înu pé, zo dù wuî eq yò pé lé, rashô tú wó hkam yù lui, zing-rí é hkyô pé lé le hui kó râ nghut é htoq agó, htang pyat má le, ahtum abyuq é asak wó yù râ nghut lhê.

³¹ Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê." gâ ri.

Yesuq, Yhang Shî Râ Hkyô Lé Dum Taí Ê Hkyô

Mht 20:17-19; Luk 18:31-34

³² Yhangmoq gi, Yerusalem wà mó shut doq ló nyi kô é u lé, Yesuq gi, yhangmoq é hí má sô tô ri; haú hkûn, htâng má sô é bang gi, gyuq nyi bùm kô é u lé, haú chángzô pé gi, maú byuq bum akô nghut ri; Yesuq gi, haú chángzo raxe í yuq lé gotû kut dum wut yù mù, Yhâng chyáng dut lò râ hkyô, yhangmoq lé taí kyô é gi, ³³ "Wú keq, nganhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pé é loq má ap byî pyâm é hui râ nghut lhê; haú bang gi, Yhang lé, shî râ mara byi lui, tûngbau pé é loq má ap byî pyám kó râ nghut lhê. ³⁴ Haú bang gi, Yhang

lé, wuizui kut pyâm é, sôkan byé gyûn é, nhuq bat é kut yù mù, sat pyám kó râ nghut lhê. Hau htâng sum nyí má, Yhang dum dui toq lô râ nghut lhê." gâ ri.

Yakuq eq Yohan nhik dung é hkyô

Mht 20:20-28

³⁵ Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sarâ ê, ngá-nhik dúng é gû banshoq, Nàng kut byi râ lé, ngá-nhik ô nau ri." ga taí akô.

³⁶ Haú hkûn, Yhang gi, "Ngò, nungnhik lé haí kut byi râ ô nau akô lú?" ga myî ri.

³⁷ Yhangnhik gi, "Náng é hpungwup shingkang hkaú má, ngá-nhik tâng lé, Náng é loqyò hkyam má rayuq, loqpaî hkyam má rayuq kut, zùng nhâng laq." ga tû taí akô.

³⁸ Nghut kôlhang, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq râ góm* lé, nungnhik wó shuq kó râ lú? Ngò hkam yù râ baptisma lé, nungnhik wó hkam yù kó râ lú?" ga yhangnhik lé tû taí ri.

³⁹ Haú hkûn, yhangnhik gi, "Nga-nhik wó dut lhê." ga tû taí kôjáng, Yesuq gi, "Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù kó râ nghut lhê. ⁴⁰ Nghut kôlhang, Ngá é loqyò, loqpaî hkyam má zùng râ ahkáng lé gi, Ngò byî jung a nghut. Jowò haú pé gi, hen to byî é hui bâng matú za nghut lhê." ga yhangnhik lé taí ri.

⁴¹ Haú su gâ é hkyô lé, haú gotû chángzo raxê yuq wó gyo kôjáng, yhangmoq gi, Yakuq eq Yohan nhik lé nhik-yô akô nghut ri. ⁴² Yesuq gi, yhangmoq banshoq bang lé wut tsing yù lui, "Tûngbau pé lé uphkan é ga bang gi, tûngbau pé lé up zô nyi kô é hkyô lé le, haú eq rajung za, yhangmoq é ming up suwún wuî le, yhumsing é ahkáng ayá lé chûng mù, up zô nyi kô é hkyô lé le, nungmoq sê lhê. ⁴³ Nghut kôlhang, nungmoq chyáng gi, haú su a dut kó sháng gaq, nungmoq má, byù mó dut nau sù ó yuq nghut kôle, nungmoq é dui-nhâng zoshâng dut ra râ nghut lhê. ⁴⁴ Hau htoq agó, nungmoq má ushuq dut nau sù ó yuq nghut kôle, banshoq bâng é jùn dut ra râ nghut lhê. ⁴⁵ Hkâsu mù gâ le, haú Byu Yhangzo lhang gi, dojaú é lé hkam yù râ

* 10:38 Góm eq baptisma gâ é gi, jamjau hui râ eq shî râ lé, taí nau é nghut lhê.

matú jé lé é a nghut e za, dojaú rã matú eq byù myo myô é matú, shihtaí gunglik hkungga dông, Yhâng é asak lé byi pyám rã matú sheq, jé lé é ru nghut lhê." ga, yhangmoq lé taí ri.

Myoqjit Sû Barateme, Myoq Dum Myang É Hkyô

Mht 20:29-34; Luk 18:35-43

⁴⁶ Hau htâng, yhangmoq gi, Yerihko wã má jé ló akô nghut ri. Yesuq eq Yhâng é chángzô pé gi, byù moq mó eq rahá, wã mai htoq ló nyí kô é hkûn, Barateme (Teme é yhangzo) gã é myoqjit sù rayuq gi, hkyô yàm má dung zô zung tô ri. ⁴⁷ Yhang gi, Nazaret wã byù Yesuq laí ló é lé wó gyo jáng, "Dawiq é Yhangzo Yesuq ê, ngo lé shogyo yù laq ô!" ga garû kat ri.

⁴⁸ Haú mù, byù myo myo gi, zim za nyí rã matú yhang lé tân hkûm akô; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang garû kat ri.

⁴⁹ Haú mù luí, Yesuq gi, yap nô kat mù, "Yhang lé ji kat keq." ga taí jáng, yhangmoq gi, "Myit ngón aq hkoi; Yhang, nàng lé ji nyí ri; toq aq." ga myoqjit sù haú lé taí akô. ⁵⁰ Haú hkûn, haú yuq gi, yhâng é buhîng lé hkyut pyám mù, byam chyù luí, Yesuq chyáng lé jé ri.

⁵¹ Yesuq gi, yhang lé, "Ngò, nang lé haí kut byi rã ô nau ri lú?" ga myi jáng, yhang gi, "Sarã ê, ngò myoq myàng nau ri." ga tú taí ri.

⁵² Yesuq gi, "Ló aq hkoi, náng é lumjîng myit gi, nàng lé lhoq gê byi bê nghut ri." ga taí kat é hkûn jáng, yhang gi, myoq wó myâng mù, Yesuq e ló é hkyô shut cháng e ló bê nghut ri.

11

Yesuq, Yerusalem Wã Mó Má Wang Ló É Hkyô

Mht 21:1-11; Luk 19:28-40; Yhn 12:12-19

¹ Yesuq eq Yhâng é chángzô pé gi, Yerusalem wã mó eq chyâng lo nyí kô é hkûn, Tsanlun Bùm mã é Bethpage wã eq Behtani wã má jé ló kôjáng, Yesuq gi, Yhâng é chángzo í yuq lé, ² "Nungnhik, hí mã é wã mã ê keq; wã haú mã wang é hkûn jáng, ó le a jî wú shí é logúng zo tuí to láng

* 11:9 Hebre dang mã, hosana gã é gi, "ahkuí hkyi yù laq" gã é nghut lhê. Nghut kôlhang, bun zo 9, 10 mã gi, hkyá-on dang dông chung é nghut lhê. ☆ 11:10 Hkyá-on 118:25-26

é lé, ê myâng kó rã nghut lhê; haú lé hpyi yù mù, Ngá chyáng she lò keq. ³ Byù rayuq yuq mai, "Haí mù, haú su kut nyi akô lú?" ga nungnhik lé lhom myi jáng, "Shí du lé, haú Yhumsîng rã ri ga, razup mã dum taú dé byi rã nghut lhê." nghû tú taí keq." ga pyîng luí, nhang kat ri.

⁴ Haú nhik gi, e ló mù, hkyô mó yâm mã é hkumdong nãm mã tuí tô é logúng zo radu lé, ê myâng kôluí, haú lé tuí hpyi nyi akô.

⁵ Haú hkûn, haú mã yap tô é bang ra-am gi, "Haí mù, logúng tuí hpyi nyi akô lú?" ga myí akô.

⁶ Haú jáng, yhangnhik gi, Yesuq pyîng kat é eq rajung za taí kyo kôjáng, yhangmoq gi, she ló rã ahkáng byí kat akô nghut ri. ⁷ Yhangnhik, logúng zo haú lé Yesuq chyáng she jé lo é hkûn, logúng hau é gùng htoq mã, yhangmoq é buhîng pé buí jáng, hau é ahtoq mã, Yesuq doq jî ri.

⁸ Byù myo myo gi, yhangmoq é buhîng pé lé, hkyô mã hkyut hkang byí akô; ra-am gi, yò pé mã zân yu é mhandîng lé hkang byí akô nghut ri. ⁹ Hí mã so bang eq htâng mã châng é bang gi,

"Hosana!*

Haú Yhumsîng é myîng mai jé lé lô Sù gi, hkungsô wó nyí sháng gaq ô!

¹⁰ Jé lé lô rã nghut é, nga-nhûng é îwa Dawiq é mingdán gi, hkungsô wó nyí sháng gaq ô!

Htoq tsáng myhâng mã hosana nghut sháng gaq ô! ☆ ga luí, taí garû bum akô nghut ri.

¹¹ Yesuq gi, Yerusalem wã mó mã jé mù, noqkuq yhûm mã wang ê luí, lînhghkyuq mã é jung hkangmó lé wú ri; nghut kôlhang, buí gyum ló bê nghut é yanmai, Yhâng é chángzo raxe í yuq eq rahá, Behtani wã shut htoq e ló bekô nghut ri.

Maihpáng Gãm Ashi A Zui Rã Matú Taí É Hkyô

Mht 21:18-19

¹² Hau htang nyí, yhangmoq, Behtani wã mai htoq ló kô é hkûn, Yesuq gi, zo mut bê nghut ri. ¹³ Yhang gi, ahaq wúm é maihpáng gãm ragàm lé, we we mai byu-myang kat jáng, agàm haú mã ashi zú lhê laq ga é jé wú le, ahaq mai lai luí, haí le a myàng nghut ri. Haí mù gã le, maihpáng-shi zui

yâm a nghut é yanmai nghut ri. ¹⁴Haû mù, Yesuq gi, shigâm haû lé, "Ahkuî mai gi, náng chyáng mâ é ashi, ó yuq le a myàng zo lo kó sháng gaq." ga taí ri. Yhâng é chángzô pé gi, haû su ga taí é dang lé wó gyô yu akô nghut ri.

Yesuq, Noqkuq Yhûm Lé Lhoq Sansêng Pyâm É Hkyô

Mht 21:12-17; Luk 19:45-48; Yhn 2:13-22

¹⁵Yhangmoq, Yerusalem wà mó má jé é hkûn, Yesuq gi, noqkuq yhûm má wang ê mù, haú mâ é zè ung zè wuì kut nyi é bang lé, hkat htoq pyám luî, ngùn htaí zo bâng é siboi pé eq hpûngkyui ung zo bâng é tanghkuq pé lé tu mhuy pyám byî ri. ¹⁶Hau htoq agó, Yhang gi, ó yuq lé nghut kôle, ung zê lé noqkuq yhûm mai a waq lai nhâng kut pyâm ri. ¹⁷Yesuq, yhangmoq lé mhoshit é gi,

"Ngá yhûm gi, byû myû lhunglhâng bâng é matú, kyûdung yhûm ga râ nghut lhê. ✧

ga kâ tô é a nghut kó lú? Nghut kôlhâng, nungmoq gi, 'damaq hkyûng' kut pyám bekô nghut ri." gâ ri. ✧

¹⁸Hkyangjong agyi pé eq tarâ sará pé gi, haú lé wó gyo kômù, Yhang lé hkâsu kut wó sat pyám râ hkyô ho nyi akô; nghut kôlhâng, shiwa byu pé gi, Yhang mhoshit é hkyô má, myit zìng zuq bùm kô é yanmai, yhangmoq gi, Yhang lé gyuq bum akô nghut ri.

¹⁹Myinhâng jé jáng, Yesuq eq Yhâng é chángzô pé gi, wà hkaû mai htoq ló bekô nghut ri.

Maihpáng Gâm Nyhuî Shi Byuq É Hkyô

Mht 21:20-22

²⁰Htang napkyó, yhangmoq sô lai ló le, maihpáng gâm gi, amyit mai yhang nyhuî kyuq shi byuq é lé myang akô. ²¹Petruq gi, myit bûn kat luî, "Rabai ê, wú aq! Nang nhîng pyâm é maihpáng gâm gi, nyhuî shi byuq bê nghut ri." ga luî, Yesuq lé taí ri.

²²Haú hkûn, Yesuq gi, "Garai Gasang lé lumjîng keq. ²³Ngò, nungmoq lé teng za taí kôlé, ó yuq nghut kôle, i-myit má úng-âng é hkyô a bo é za, yhumsîng taí é hkyô gi, dut lò râ nghut lhê ga lumjîng kô é nghut le gi, bùm shî lé, 'Htot mù, wuimau má ló gyó wâng aq.' ga taí le lháng, haú hkyô

dut byi râ nghut lhê. ²⁴Haû mù luî, Ngò, nungmoq lé taí kôlé, nungmoq haí dîng le le wó yû râ nghut lhê nghû lumjîng kô é nghut le gi, wó yû kó râ za nghut lhê.

²⁵Mauhkûng htoq mâ é nungmoq é Îwa gi, nungmoq é mara lé hkyut pyám byi sháng gaq, nungmoq gi, kyûdung yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq; ²⁶(Nghut kôlhâng, nungmoq mai mara a hkyut pyám byî é nghut le gi, mauhkûng htoq mâ é nungmoq é Îwa le, nungmoq é mara lé hkyut pyám byi râ a nghut.)" ga tâ taí ri. †

Yesuq É Ahko Ahkáng Lé Myî Chyam É Hkyô
Mht 21:23-27; Luk 20:1-8

²⁷Yhangmoq, Yerusalem wà mó má dum jé mù, Yesuq gi, noqkuq yhûm wàng hkaû má sô yông wún é u lé, hkyangjong agyi pé, tarâ sará pé eq suwún wuî gi, Yhâng chyáng lé jé kômù, ²⁸"Hai ahko ahkâng èq, Nang, shí pé lé kut nyi lhê lú? Haû su kut râ ahko ahkáng, Nang lé ó yuq byî é lú?" ga myî akô.

²⁹Haû jáng, Yesuq gi, "Ngò le, nungmoq lé rajung myî wú kôlé, tâ taí wú keq; haú hkûn, hai ahko ahkâng èq, Ngò, shí pé kut é hkyô lé taí kyo râ nghut lhê. ³⁰Yohan byî é baptisma gi, mauhkûng mai lú? A nghut jáng, byu chyáng mai lú? Taí wú keq!" ga taú myî kat ri.

³¹Haú hkûn, yhangmoq chòm hpyê lhum kô é gi, "'Mauhkûng mai nghut lhê' nghû nga-nhúng taí jáng le, 'Haû nghut le nhîng, haí mù, yhang lé a lumjîng kô é lú?' ga râ nghut; ³²'Byu chyáng mai nghut lhê.' nghû jáng le..." gâ ri. (Yohan gi, myiqhtoi rayuq gè gè nghut lhê ga, lhunglhâng bang lumjîng bùm kô é yanmai, yhangmoq gi, haú byu pé lé gyuq bum akô nghut ri.)

³³Haû mù, yhangmoq gi, Yesuq lé, "Ng-amoq a sé." ga tâ taí akô.

Haú hkûn, Yesuq gi, "Haû jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

✧ 11:17 Esai 56:7 ✧ 11:17 Yer 7:11 † 11:26 Bun zo shî gi, Chyúmlaiká ra-am má za bo lhê.

12

Tsibiyiq Hkyâm Saí Bang Lé Dangtú Yu É Hkyô

Mht 21:33-46; Luk 20:9-19

¹Hau htâng, Yesuq, dangtú dông yhangmoq lé taí é gi, "Byù rayuq gi, tsibiyiq hkyâm rahkyam saí to mù, lhîngkyuq kyâm to luí, tsibiyiq wing pyik htoq râ donghkong dû to mù, machya ralhüm saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byí to mù, gó ming shut e ló byuq bê nghut ri. ²Kyôshu yoq jé jáng, yhang gi, yhang yù âng é tsibiyiq shi ê yù râ matú, dui-nhâng zoshâng rayuq lé, hkyâm saí zo bâng chyáng nhang kat ri. ³Nghut kôlhang, haú bang gi, haú yuq lé lhom chyup bat luí, loq kôm taú nhang kat akô. ⁴Haú mù, yhang gi, gotú dui-nhâng zoshâng rayuq lé, yhangmoq chyáng dum nhang kat ri; yhangmoq gi, haú yuq lé le, ulhum má lhom bat cheq byi kôluí, hoq lhoq hpû kat akô nghut ri. ⁵Hau htâng, rayuq lé dum nhang kat jáng, haú yuq lé gi, lhom sat pyâm akô; Yhang gi, góbang myo myo lé le, yhangmoq chyáng nhang kat ashî nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

⁶Ló htáng má, yhang gi, yhang chyitdap é zo lé nhang kat râ za ru nghut alô; haú mù, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhangzo lé nhang kat ri.

⁷Nghut kôlhang, haú bang gi, 'Shí yuq gi, silí wunlí sing yù râ sù nghut lhê; lé keq, yhang lé sat pyám sháng, haú jáng sheq, silí wunlí pé lé nga-nhúng wó yù râ nghut lhê.' ga rayuq eq rayuq taí lhûm bum akô. ⁸Haú mù, yhang lé chyup yù luí, sat pyám mù, hkyâm shinggan shut dú htoq pyâm akô nghut ri.

⁹Haú jáng, tsibiyiq hkyâm yhumsîng gi, yhangmoq lé hkâsu kut râ lhú? Yhang gi, ê mù, haú hkyâm saí zo bang lé sat pyám luí, hkyâm haú lé, góbang lé htot ngho byí pyám râ nghut lhê. ¹⁰Chyúmdang má, 'Yhûm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.

¹¹Shí hkyô gi, haú Yhumsîng kut é nghut luí, nga-nhûng é myoq hí má mauhpo dut bê nghut ri.' ga bò tô é lé, nungmoq a nghap wú kó lhú?*" ga ri.

¹²Hau htâng, yhangmoq gi, dangtú haú, yhangmoq lé lhoq ang luí taí é hkyô lé, sé kô é yanmai, Yhang lé chyup yù râ matú hkyô ho nyi akô. Nghut kôlhang, yhangmoq gi, byù moq mó lé gyuq kô é yanmai, Yhang lé nyhi pyâm to luí, htoq ló byuq bekô nghut ri.

Kehtaq Lé Kang Kat Byí É Hkyô*

Mht 22:15-22; Luk 20:20-26

¹³Hau htâng má, yhangmoq gi, Yesuq é dang má mara hô luí Yhang lé chyup yù râ matú, Hparishe pé ra-am eq Herut é byu pé ra-am lé, Yesuq chyáng nhang kat akô. ¹⁴Haú bang gi, Yhâng chyáng lé jé kômù, "Sarâ ê, Nàng gi, tengmán sù nghut é lé, ngamoq sê lhê. Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byí é za, Garai Gasâng é hkyô lé, tengmán é dông mhoqshit é sù nghut ri. Haú mù, Kehtaq lé kang kat byí le gi, ge lhê lhú? ¹⁵Ngamoq kat ra râ lhú? A kat ra râ lhú?" ga Yhang lé taí akô.

Yesuq kúm gi, yhangmoq, gegùn labyoq kut nyí kô é lé sé mù, "Nungmoq gi, haí mù, Ngo lé lé chyam wú akô lhú? Denari ngùn rachap yu lé keq, ngò wú wú bá." ga taí kat ri. ¹⁶Haú hkûn, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lhú?" ga myí ri.

Yhangmoq gi, "Kehtaq é nghut ri." ga tû taí akô.

¹⁷Haú mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasâng lé byi keq." ga taí jáng, yhangmoq gi, maú byuq bùm bekô nghut ri.

Saduke Pé, Yesuq Lé Myí Chyam É Hkyô

Mht 22:23-33; Luk 20:27-40

¹⁸Haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myí akô. ¹⁹Yhangmoq myi kô é gi, "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggi gi, yhangmang é awut ashín xoq byi râ matú, yhang rhat lé chui gon ra râ nghut lhê ga,

* 12:11 Hkya-on 118:22-23 * 12:12 Kehtaq gâ é gi, "hkoséng" gâ é nghut lhê.

nga-nhúng lé, Mosheq kê to byî ri. ²⁰ Hí hpyang lé, gumang nhiktâng wuî nyhit yuq nyi akô. Lagám yuq gi, myiwe yù luî, zo dù a dap é za shi ló byuq bê nghut ri. ²¹ Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haû eq rajung za dut byuq bê nghut ri. ²² Haû nhiktâng wuî nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haû le châng shi ló byuq bê nghut ri. ²³ Haû mù luî, haû dum dui toq é buinyi má, myiwe myhí haû gi, hká yuq é yhangmyi nghut râ lú? Hkâsu mù gâ le, yhang gi, haû nyhit yuq é yhangmyi dut wú bê sù nghut ri." gâ akô.

²⁴ Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kê é yanmai nghut lhê, a nghut kó lú? ²⁵ Haû shi byuq bê bang dum dui toq é hkûn gi, myi byi myi yû hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê. ²⁶ Shi é mai dum lhoq dui toq é hkyô eq séng luî, Mosheq kê tô é laiká má lháng, haû nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.' ✧ ga kê tô é lé, nungmoq a nghap wú kó lú? ²⁷ Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga taî ri.

Ahkyak Dik É Jep É Tarâ

Mht 22:34-40; Luk 10:25-28

²⁸ Tarâ sará rayuq gi, lé lô mù, yhangmoq taî htîng lhum nyi kê é lé, lé wó gyô ri. Yhang gi, haû bang lé, Yesuq rago tû taî nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lú?" ga myî ri.

²⁹ Haû jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nga-nhúng é Yhumsîng Garai Gasang za, Garai Gasang nghut lhê. ³⁰ Haû Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, náng myit é hkyô banshoq, náng é wum-o banshoq eq, chyitdap râ lhê.' ✧ gâ é nghut lhê. ³¹ Hau htang lhum gi, 'Náng gûng lé

nàng chyitdap é su, náng é chyangnâm mâ é bang lé le chyitdap aq.' ✧ gâ é nghut lhê. Shî í lhûm htoq kê é tarâ gotû a joq lo." ga yhangmoq lé tû taî ri.

³² Haû hkûn, tarâ sará haû yuq gi, "Gyo naû bê, Sará ê! Garai Gasang rayuq za nghut lhê, gotû a nyi lo ga náng taî é gi, têng ri. ³³ Garai Gasang lé, náng é myit nhiklhum banshoq eq le, náng é sê gyo é nyan banshoq eq le, náng é wum-o banshoq eq le, chyitdap râ lhê gâ é eq, náng gûng lé náng chyitdap é su, náng é chyangnâm mâ é bang lé le chyitdap râ lhê gâ é gi, myi nyhé hkungga eq gotû hkungga pé banshoq htoq má, je ahkyak lhê." ga taî ri.

³⁴ Yesuq gi, yhang hpaqchyî bo é dông tû taî nyi é lé myàng jáng, "Nàng gi, Garai Gasâng é mingdán eq a we lo nghut ri." ga yhang lé taî kat ri. Haû hkûn mai gi, ó yuq le, Yhang lé dangmyi a wám myi lo kó nghut ri.

Hkrisduq Gi, Ó Yuq É Yhangzo?

Mht 22:41-46; Luk 20:41-44

³⁵ Yesuq, noqkuq yhûm má mhoqshit nyi é hkûn lé taî é dang gi, "Haî mù, haû tarâ sará pé gi, Hkrisduq lé, Dawiq é yhangzo za nghut lhê gâ akô lú? ³⁶ Dawiq gi, Chyoiyúng Woi-nyí eq taí nhang é má, 'Haû Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga taî ri.' ✧ gâ ri. ³⁷ Haû mù, Dawiq yhang lháng, Hkrisduq lé, Yhumsîng gâ é nghut le gi, yhangzo za hkâsu ge nghut râ lú?" gâ ri.

Byù hpûng mó gi, Yhâng é dang lé, gabú myit eq gyô nyi bum akô nghut ri.

³⁸ Yesuq gi, mhoqshit uchyang taî é má, "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luî, gai pé má lhom shi-kyâm yù râ lé le, ³⁹ tarajong pé mâ é ahkyak dik é zùng jang pé eq poí pé mâ é réng é zùng jowò pé má myang zùng râ lé le, ô nau nyi bum akô. ⁴⁰ Yhangmoq gi, chuimó pé é yhûm-yò pé lé hpyoq zo hpyoq shuq kôluî, kyû hîng hîng dîng shit mhaû é bang nghut akô. Haû su

é bang gi, dam byî é je riyhang hui zo kó rá nghut lhê." gâ ri.

Chuimó Myhí Kat É Alu Ngùn

Luk 21:1-4

⁴¹Yesuq gi, alu sidek nàm má zung to mù, noqkuq yhûm mâ é alu sidek haú má, byù moq mó ngùn kat nyi é lé wú nyi ri. Sùt wó bang myo myo gi, ngùn ga-myhó myhó kat bum akô. ⁴²Haú hkûn, myung é chuimó myhí rayuq gi, lé mù, gyi htingchap ngùn zo í chap lé kat ri.

⁴³Yesuq gi, Yhâng é chángzô pé lé wut yù mù, "Ngò, nungmoq lé teng za taí kôlé, shî myung é chuimó myhí gi, góbang banshoq htoq má je myo kat bê nghut ri. ⁴⁴Haú góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng é asak lé baú râ ngùn banshoq lé, kat bê nghut ri." ga taí ri.

13

Ló Htâng Buinyì Má Dut Lò Râ Hkyô

Mht 24:1-21, 29-35; Luk 21:5-33

¹Yesuq, noqkuq yhûm mai htoq ló é hkûn, Yhâng é chángzo rayuq gi, "Sarâ é, wú aq; hkâ-í ko é luqgok pé! Hkâ-í hkik é yhûm pé!" ga Yhang lé taí kat ri.

²Haú hkûn, Yesuq gi, "Nàng, yhûm mó shí pé lé myàng lhê a nghut lú? Luqgok shí pé gi, rachâm htoq racham lhang a kê lhum loshoq, hpyoq hpyi pyâm é hui râ nghut lhê." gâ tû taí ri.

³Yesuq gi, Tsanlun Bùm má, noqkuq yhûm shut hù mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù, ⁴"Haú hkyô pé gi, hkâ-nhám dut lò râ lú? Haú dut lò râ hkûn, hkasû é kumlhá htoq lô râ nghut lhê lú? Ngamoq lé taí kyô wú laq." ga Yhang lé baú myî akô nghut ri.

⁵Haú mù, Yesuq gi, yhangmoq lé, "Nungmoq lé, ó yuq èq le a wó shuí nghoq sháng gaq, sidiq nyi keq. ⁶Hkâsu mù gâ le, 'Ngò gi, haú yuq* nghut lhê.' ga, Ngá myîng lé lhang é byù myo myo pô htoq lô mù, byù myo myo lé shuí nghoq kó râ nghut lhê. ⁷Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dàn kó. Haú hkyô pé gi, dut lò râ za nghut lhê; nghut kôlhang, ló

htâng é buinyì gi, a nghut shi. ⁸Byù ra-myû eq ra-myû, mingdán ralhûm eq ralhûm majan zân lhûm lò kó râ nghut lhê. Jowò myo myo má, layàng nún é, mutmó gyó é pé dut lò râ nghut lhê. Haú pé gi, wuîhke jamjau hkyo é apûn awang za ru nghut ashî.

⁹Nungmoq gùng nungmoq sidiq nyi keq. Hkâsu mù gâ le, yhangmoq gi, nungmoq lé, tarâ rûng pé má é ap pyâm kó râ nghut é htoq agó, tarajong pé má nungmoq lé nhuq bat kó râ nghut lhê. Hau htoq agó, nungmoq gi, Ngá mying é yanmai, mauzau wuî eq hkohkam pé é hí má, saksé dông yap ra kó râ nghut lhê. ¹⁰Haú gabú danglù gi, amyû banshoq lé hí hko kyo ra râ nghut lhê. ¹¹Nungmoq gi, chyup yu é hui lú, jep huî é hkûn, haí taí râ lé, hkâ-myit chiq kó. Ahkyíng jé jáng, nang lé myit htoq lô nhang é dong za taí aq; hkâsu mù gâ le, dang haú pé gi, nungmoq taí é a nghut, haú Chyoiyúng Woi-nyî èq taí nhang é ru nghut lhê.

¹²Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wuî gi, mó wuî lé gumlau toq mù, sat pyâm nhâng kó râ nghut lhê. ¹³Byù lhunglhang bang gi, Ngá é yanmai, nungmoq lé a nguî kut kó râ nghut lhê; nghut kôlhang, jiltûm jé shoq wó hkam jân nyi é sù gi, hkyi yu é hui râ nghut lhê.

¹⁴'Haú lhoq hten lhoq hpyoq é achay hkyô'☆ gi, yhang a nyi âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hpanq doq ló kó sháng gaq. ¹⁵Yhumhkûng htoq má nyi tô é sù gi, yhúmhaû mâ é zè haí lé le, a ló gyó wang yù lo sháng gaq. ¹⁶Yò má nyi tô é sù gi, yhâng é buhîng lé a ló taû yu nyi lo sháng gaq. ¹⁷Haú buinyì pé má, zogùng dut é myiwe wuî eq naú huq ashî nghut é înu wuî gi, hkâ-í yhang wuîhke bekó nghut ri myhi-nhung. ¹⁸Haú hkyô gi, gyoqmyò má a dut sháng gaq, kyûdûng nyi keq. ¹⁹Hkâsu mù gâ le, Garai Gasang, mingkan lé hpan tô é hkûn mai ahkuî jé shoq, hkâ-nhám le a dut wú shî é wuîhke jamjau mó gi, haú buinyì pé má dut lò râ nghut lhê; haú su é hkyô gi, htàngnùng

* 13:6 Haú yuq gâ é gi, Hkrisduq lé gâ é nghut lhê. ☆ 13:14 Dan 9:27; 11:31; 12:11

má hkâ-nhám le dum dut lo râ a nghut.
²⁰Buinyì haú pé lé, haú Yhumsîng Garai mai a lhoq shaú é nghut le gi, ó yuq le asak wó lut râ a nghut. Nghut kôlhang, Yhang hkyin yù bê nghut é, hkyin yù hui bâng é matú gi, buinyì haú pé lé, Yhang lhoq shaú pyám byi bê nghut ri. ²¹Haú ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga le, 'Wú keq, Yhang hê má nyi ri.' ga le, taí jáng, nungmoq hkâjíng kó. ²²Hkâsu mù gâ le, Hkrisduq apyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq laklaí kumlhá pé lé kut shit kó râ nghut lhê. ²³Haú mù, nungmoq sidiq nyi keq; ahkyíng a jé shi mai, ngò, nungmoq lé, jung hkangmó taí kyô nyi gù nghut lhê.

²⁴Buinyì haú pé má, wúhke jamjau haú pé laí é htâng, 'Buì gi, noq byuq mù, lhamó gi, a tsò dut byuq râ nghut lhê;

²⁵kyí pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huì bùm kó râ nghut lhê.[✠]

²⁶Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shing kang eq le, gyó lé lo é lé, byu pé byu-myàng kó râ nghut lhê. ²⁷Hau htâng má, Yhang gi, Yhâng é maumang lagyô pé lé nhang kat mù, maumyî chyûn hkangmó eq myigùng htum shoq, mauhkûng htáng shoq mai, Yhang hkyin yu tô é bang lé shuí tsîng yù nhâng râ nghut lhê.

²⁸Maihpáng gâm lé wú mù, mhoq yù keq; agâm mai a-nyuq nyún lô mù, ahaq htut lô jáng, buì nyé nám chyâng lò bê lé, nungmoq sê lhê. ²⁹Haú eq rajung za, shí hkyô pé dut nyi é lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyi bê hkyô lé, nungmoq sé lo keq. ³⁰Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé banshoq dut byuq râ nghut lhê. ³¹Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyi râ nghut lhê.

Haú Buinyì Eq Ahkyíng Lé, Ó Le A Sé
Mht 24:36-44

³²Buinyì eq ahkyíng haú lé gi, ó yuq le a sé; mauhkûng htoq mâ é maumang lagyô pé lhang a sé; haú Zo le a sé; haú Íwa za ru sê lhê. ³³Haú mù, nungmoq gi, ahkyíng haú hkâ-nhám jé râ lé, a sé kô é yanmai, sidiq nyi keq! Machya nyi keq! ³⁴Haú gi, byù rayuq, yhâng é dui-nhâng zoshâng wui lé, ó le ó eq sêng é mù lé gâm byi to mù, hkum zúng sù lé le, machya nyi râ matú pying to luí, yhâng yhûm lé, haú dui-nhâng zoshâng wui chyáng ap pyâm to mù, byìn we shut htoq ló byuq é sù eq pung ri.

³⁵Haú mù, haú Yhumsîng hpó gi, myihtâng laq, myín gunggâm laq, woqtún hkun laq, maubó zó laq, hkâ-nhám jé lô râ lé nungmoq a sê kô é yanmai, sidiq machya nyi keq. ³⁶Haú a nghut jáng, Yhang, dàn loq tung tau jé lo é hkûn, nungmoq yhup myhí tô é lé, lo myang pyám râ nghut lhê. ³⁷Ngò, nungmoq lé, 'sidiq machya nyi keq,' nghû taí é eq rajung za, yuq hkangmó lé le, taí é nghut lhê." ga taí ri.

14

Yesuq, Xû But Byi Huí É Hkyô

Mht 26:1-16; Luk 22:1-6; Yhn 11:45-53; 12:1-8

¹Ahkuí, haú Lhoqlhai Poí eq múnchi a kat é Muk Zo Poí jé râ í nyí za ru ra alô hkûn, hkyangjong agyi pé eq tarâ sará pé gi, Yesuq lé hkâsu kut wó haq chyup yù mù, sat pyám râ matú, hkyô ho nyi akô nghut ri. ²Nghut kôlhang, yhangmoq gi, "Byu pé gabyông lô kó abe, poí gyoro má gi, a kut shi sháng." ga taí akô.

³Yesuq gi, Behtani wà má nyi é manggâm dap wú sù Simûn é yhûm, siboí má nghe zung tô é hkûn, myiwe myhí rayuq gi, nardu amyit mai za saí yu é, gyai hpaú é namngón xû bo é alabasta (luq hpyû) bông yu lé lô mù, bông haú lé lhang hkyui luí, namngón xû haú lé Yesuq é ulhum má hut gyun byi ri.

⁴Haú má nyi tô é bang ra-am gi, wú nhikyô é myit èq, rayuq eq rayuq taí lhum kô é gi, "Haí mù, namngón xû lé aha agó kut pyâm lhê laq? ⁵Haú namngón xû lé, denari* súm sho eq ung luí, myùng bang lé byi le

✠ 13:25 Esai 13:10; 34:4

* 14:5 Denari rachap gi, byù rayuq é ra-nyí lhê é zuihpau eq wuí ri.

ge lhê mhaî!" gâ akô. Yhangmoq gi, myiwe myhí hau lé le, gyai chôm tân akô.

⁶ Nghut kôlhang, Yesuq gi, yhangmoq lé, "Myiwe zo haú lé, hkâtân nyi kó; haí mù, yhang lé i-myt lhoq myo nhang nyi akô lhú? Yhang gi, Ngá é ahtoq má ge é hkyô kut bê nghut ri. ⁷ Haú myùng bang gi, nungmoq eq rahá hkâ-nhám le nyi râ nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shî má nungmoq eq rahá ayang nyi nyi râ sù a nghut. ⁸ Yhang gi, yhang wó dut é í kut bê nghut ri. Yhang, Ngá gûng má, namngón xû hut gyûn é gi, Ngá gûng lé yhum râ matú, hí hen lajâng tô é ru nghut lhê. ⁹ Ngò, nungmoq lé teng za taí kôlé, haú gabú danglù lé mingkan gón hko kyô é jowò hkangmó má, yhang lé myit bûn é đông, yhang kut é hkyô shî lé, taí kyo bekô râ nghut lhê." ga taí kyo ri.

¹⁰ Hau htâng, haú chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pè chyáng e ri. ¹¹ Haú bang gi, haú hkyô lé lhom wó gyo kôjáng, gyô gabú luí, yhang lé ngùn byi râ ga, danggidiq byi akô. Haú mù, yhang gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mht 26:17-30; Luk 22:7-23; Yhn 13:21-30

¹² Haú htungli joq é eq rajung za, Lhoqlhai Poí hkungga sauzo jaú byi é, múnchi a kat é Muk Zo Poí sâng-hi nyi má, Yesuq é chángzô pé gi, Yesuq lé, "Nàng zo râ Lhoqlhai Poí lé, ngamoq hkâmá ê món to râ lhú?" ga myi akô.

¹³ Haú mù, Yhang gi, chángzo í yuq lé, "Nungnhik, myuq hkaú shut wang ló keq, wuì yambú waq é byù rayuq lhom hui râ nghut lhê; haú hkûn, nungnhik gi, yhang htâng cháng keq. ¹⁴ Haú yuq, wang ló é yhûm mâ é yhumsing lé, 'Ngò, Ngá é chángzô pé eq rahá, Lhoqlhai Poí lé zo râ bíng wap hkâmá nghut lhê lhú ga, Sará myi nhang kat ri.' nghú taí keq. ¹⁵ Haú hkûn, hen to gû nghut é, ahtoq mâ é wap mó lé lhom tân shit râ nghut lhê. Wap haú má, nga-nhûng é matú ê hen to keq." ga taí luí, nhang kat ri.

¹⁶ Chángzo haú nhik gi, htoq e ló mù, myuq hkaú má wang e ló le, Yesuq taí kat

é eq roq za ê myâng kômù luí, Lhoqlhai Poí lé, món to bekô nghut ri.

¹⁷ Myinhtâng jé lô jáng, Yesuq gi, haú chángzo raxe í yuq eq rahá, haú má lé jé bekô nghut ri. ¹⁸ Yhangmoq gi, siboí má nghê mù, zô nyi bùm kô é u lé, Yesuq gi, "Ngò, nungmoq lé teng za taí kôlé, Ngò eq rahá zô nyi é bang nungmoq mâ é rayuq sù gi, Ngo lé ap pyám râ nghut lhê." ga taí ri.

¹⁹ Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myi akô.

²⁰ Haú hkûn, Yhang gi, "Haú yuq gi, haú raxe í yuq mâ é rayuq nghut lhê. Ngò eq rahá, hkoq shí má muk jùmzo sù nghut lhê. ²¹ Haú Byu Yhangzo gi, Yhang eq séng luí kâ tô é eq rajung za, shí râ za nghut lhê. Nghut kôlhang, haú Byu Yhangzo lé ap pyám é sù gi, dingnyé wó ri; haú yuq gi, a hku lé le lhang, je ge ri.

²² Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shî gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byi ri.

²³ Hau htâng, Yhang gi, góm lé le, yù mù, jeju hkya-on luí, yhangmoq lé byi ri; yhangmoq banshoq bang gi, haú lé yù shuq akô nghut ri.

²⁴ Yesuq gi, yhangmoq lé, "Shî gi, byù myo myô é matú htoq pyám é, dangshikaq eq séng é Ngá sui nghut lhê. ²⁵ Ngò, nungmoq lé teng za taí kôlé, Ngò, Garai Gasâng é mingdán má, tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga taí ri.

²⁶ Yhangmoq gi, hkya-on mahkôn rahum ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Hkyô Lé, Te Taí É Hkyô

Mht 26:31-35; Luk 22:31-34; Yhn 13:36-38

²⁷ Yesuq gi, yhangmoq lé, "Nungmoq lhunglhang bang gi, myit lingbat kó râ nghut lhê; hkâsu mù gâ le,

'Haú sau zúng sù lé, Ngò bat sat pyám mù, sau pé gi, lhoq pyo pyám é hui kó râ nghut lhê.'✠

ga kâ tô ri. ²⁸ Nghut kôlhang, Ngò gi, lhoq dui toq é huí htâng má, Galile mau shut,

nungmoq é hí má e ló lánq râ nghut lhê." ga taí ri.

²⁹ Haú hkûn, Petruq gi, "Góbang banshoq myit lingbat kôlhang, ngò gi, myit lingbat râ a nghut." ga taí kat ri.

³⁰ Haú mù, Yesuq gi, "Ngò, nàng lé teng za taí lé, hkû-nyí, hkû-myín yhang jáng, woq í dâm a tûn shimá, nàng, Ngo lé sum dâm he-ngik pyám râ nghut lhê." ga tû taí ri.

³¹ Nghut kôlhang, Petruq gi, "Ngò, Nàng eq rahá shí râ dut kôlhang, Nang lé ngò he-ngik pyám râ a nghut." ga zuq zuq taí ri. Góbang banshoq le, haú su ga châng taí bum akô nghut ri.

Get-samane Gà é Jowò Má Kyûdûng É Hkyô
Mht 26:36-46; Luk 22:39-46

³² Yhangmoq gi, Get-samane gà é jowò má jé ló kômù, Yesuq gi, Yhâng é chángzô pé lé, "Ngò, kyû ê dûng nyi é u lé, shí má zùng lánq keq." ga taí ri. ³³ Yesuq gi, Yhang eq rahá Petruq, Yakuq, Yohan pé lé, shuí chûng ri. Haú hkûn, Yhang gi, myit gyai a ngón é eq myit wuîhke é hui mù, ³⁴ yhangmoq lé, "Ngò gi, shí râ í yhang myit yón nyi ri; nungmoq gi, machyâ luî, shí má lánq nyí keq." ga taí ri.

³⁵ Yesuq gi, haú mai ratsuí zo sô ê mù, myigùng má gop byên to luî, ahkyíng haú lé ge lhoq lhaí pyám byí le gi, Yhâng chyáng mai lhoq lhaí pyám byi râ matú, ³⁶ "Aba,† Áwa ê, Nàng gi, haí le wó dut é Sû nghut lhê. Góm‡ shí lé, Ngá chyáng mai yu pyám byi laq. Nghut kôlhang, Ngò ô nau é dông a nghut, Nàng ô nau é dông sheq nghut sháng gaq." ga kyûdûng ri.

³⁷ Hau htâng, Yhang gi, Yhâng é chángzô pê chyáng dum taú lo le, yhangmoq yhup myhî to kô é lé lo myang ri. Haú mù, Yhang gi, Petruq lé, "Simun, nàng yhup ngón nyi lhê lhú? Razup za lánq a wó machya nyi lhú? ³⁸ Gunglaú é a hui sháng gaq, machyâ luî, kyûdûng nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

³⁹ Yesuq gi, radàm dum ê mù, hí lé dûng é dang lé za, ê dung ri. ⁴⁰ Yhang dum taú lo le, yhangmoq gi, myoqkuq lai kô é yanmai, yhup myhî to lánq kô é lé, lo dum myang

ri. Yhangmoq gi, Yhang lé haí taí râ a sé dut byuq akô nghut ri.

⁴¹ Yesuq gi, sum dâm nghû râ lîng má, yhangmoq chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lhú? Gé bê! Haú ahkyíng gi, jé bê nghut luî, haú Byu Yhangzo gi, yubak dap bâng é loq má ap pyám é hui râ nghut bê. ⁴² Toq keq! Ló losháng hkoi! Ngo lé ap pyám râ sù gi, jé lé lô bê nghut ri." ga taí ri.

Yesuq, Chyup Yû Huí É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dâng nyo nyi ashí u lé, haú chángzo raxe í yuq má bo é Yudaq gi, haú hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lé lo ri.

⁴⁴ Yesuq lé ap pyám râ sù gi, yhangmoq lé, "Ngò bopuq puq é sù gi, haú yuq nghut bê; Yhang lé chyup yû mù, zúng shuí ló keq." ga kumlhá byí to bê nghut ri. ⁴⁵ Yudaq gi, Yesuq chyáng hkyê za ê mù, "Rabai ê." ga taí luî, Yhang lé bopuq puq byí ri. ⁴⁶ Haú hkûn, yhangmoq gi, Yesuq lé chôm zû zìng mù, chyup yû bekô nghut ri. ⁴⁷ Haú mù, nàm má yap tô é byù rayuq gi, yhâng é shâm lé she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chûng mù, lé lo akô lhú? ⁴⁹ Ngò gi, nyí wuî, nungmoq eq rahá nyi luî, noqkuq yhûm má mhoqshit byí nyi kôlhang, nungmoq, Ngo lé a chyup yû kô é nghut lhê. Nghut kôlhang, Chyúm-dang pé gi, dik ra râ nghut lhê." ga taí ri. ⁵⁰ Haú hkûn, haú chángzô pé gi, Yesuq lé tô pyám to kôluî, hpang byo byuq bekô nghut ri.

⁵¹ Buhîng za wut é zorâm rayuq gi, Yesuq htâng châng wún ri. Yhangmoq gi, haú yuq lé, wó kyaq zui kô é hkûn, ⁵² yhang gi, buhîng lé hkyut hkyô pyám to mù, gùngchîn hpang ló byuq bê nghut ri.

† 14:36 Aba gà é gi, Aramaik dang dông "Áwa" gà é lichyúm nghut lhê. ‡ 14:36 Góm gà é gi, Yesuq, jamjau hui râ hkyô eq shí râ hkyô lé, taí nau é nghut lhê.

Yudaq Byìn Tú Wapdoq Má Jéyáng Huî É Hkyô

Mht 26:57-68; Luk 22:54-55, 63-71; Yhn 18:13-14, 19-24

⁵³ Yhangmoq gi, Yesuq lé, hkyangjong mó chyáng shuí e akô; haû hkyangjong agyi pé lhunglhang bang, suwún wuî eq tarâ sará pé le, lé zup zîng bum akô.

⁵⁴ Petruq gi, hkyangjong mó é yhumwàng hkaû má châng jé wâng shoq, we we mai Yesuq htâng châng tô ri. Yhang gi, haû má, zúng bang eq rahá, myihkyóm yâm má gyoq gang zung tô ri.

⁵⁵ Haû hkyangjong agyi pé eq Yudaq byìn tú wapdoq gón gi, Yesuq lé sat râ saksé hô kôlhang, haî le a myàng kó nghut ri. ⁵⁶ Byù myo myo gi, a têng é saksé hkám kôlhang, yhangmoq é dang gi, a tsûng lhum kó nghut ri.

⁵⁷ Hau htâng, ra-am gi, toq yap mù, a têng é saksé hkám kô é gi, ⁵⁸ "Yhang gi, 'Byu loq èq saî é noqkuq yhûm shî lé, Ngò hpyoq hpyi pyám mù, sum nyí gyoro má, byu loq èq a saî é, gotû ralhum dum saî râ nghut lhê.' ga taî é lé, ngamoq wó gyô ri." ga akô.

⁵⁹ Nghut kôlhang, yhangmoq é saksé gi, a tsûng lhum kó nghut ri.

⁶⁰ Hau htâng má, hkyangjong mó gi, yhangmoq é hí má toq yap mù, "Nàng, haî le a tú taî luq? Shí bang, Nang lé mara hun nyi é saksé gi, hká dông nghut lhê lú?" ga luî, Yesuq lé myî ri. ⁶¹ Nghut kôlhang, Yesuq gi, jit le a ga nyi tô ri.

Haû mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lhê lú?" ga dum myî ri.

⁶² Haû hkûn, Yesuq gi, "Nghut lhê; haû ngò Byu Yhangzo gi, a-tsam bo dik Su é lo-qyo hkyam^s má zung tô é lé le, mhuthtui ji mù, mauhkûng mai lé lo é* lé le, nungmoq myàng kó râ nghut lhê." ga taî ri.

⁶³ Haû hkûn, hkyangjong mó gi, yhang é bu lé lêng cheq pyám mù, "Nga-nhúng, hai saksé râ ashî lú? ⁶⁴ Yhang, Garai Gasang lé rhoî dang taî é lé nungmoq wó gyo bê nghut lhê. Nungmoq hkâsu wó myit akô lú?" ga myî ri; yhangmoq banshoq bang gi, shî gíng sù nghut ri ga, chòm myit huî akô. ⁶⁵ Haû mù, ra-am gi, Yhang lé sôkan

byé gyun é eq, myoq má nghop pyám byi luî, loqtsup èq htui byî lhê kut mù, "Nang lé ó yuq htui é, myiqhtoi htoî wú aq." ga taî akô. Haû zúng bang gi, Yhang lé shuí yù mù, nhuq bat akô nghut ri.

Yesuq Lé, Petruq He-ngik Pyâm É Hkyô

Mht 26:69-75; Luk 22:56-62; Yhn 18:1-18, 25-27

⁶⁶ Petruq gi, wàng hkaû má nyi tô é u lé, haû hkyangjong mó é dui-nhâng zoshâng myhí rayuq jé lé lo ri. ⁶⁷ Haû yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taî ri.

⁶⁸ Nghut kôlhang, yhang gi, "Nàng taî é hkyô lé, ngò, sé le a sé, gyo le a sê gyo." ga he pyám luî, wâng hkúmdong shut htoq e ló bê nghut ri.†

⁶⁹ Dui-nhâng zoshâng myhí haû gi, Petruq lé, haû má dum myàng jáng, awui ayâm má yap tô é bang lé, "Shí yuq le, haû hpúng má lom é sù rayuq nghut ri." ga dum taî ri. ⁷⁰ Petruq gi, radàm dum he pyâm ri; hau htâng razup zo má, haû nàm má yap tô é bang gi, Petruq lé, "Nàng gi, Galile byù rayuq nghut é yanmai, haû hpúng mâ é byù rayuq hkyak nghut lhê." ga taî akô.

⁷¹ Haû hkûn, yhang gi, yhanggùng yhang nhing luî, "Haû nungmoq taî é byù lé, ngò a sé." ga dakam ri.

⁷² Haû u yhang, woq radàm dum tun kat bê nghut ri. Haû mù, Petruq gi, "Woq í dâm a tân shimá, nàng, Ngo lé sum dâm he-ngik pyám râ nghut lhê." ga, Yesuq, yhang lé taî é dang lé, myit bûn kat mù, wum kat ngau ri.

15

Pilat Hí Má Yesuq Jé Nyi É Hkyô

Mht 27:1-2, 11-26; Luk 23:1-5, 13-25; Yhn 18:28-19:16

¹ Haû napkyó noq za má, hkyangjong agyi pé gi, suwún wuî, tarâ sará pé, Yudaq byìn tú wapdoq gón bang eq rahá kut, chòm bóng yû kômù, Yesuq lé tuî yû luî, shuí htoq é kômù, mauzau Pilat chyáng é ap byî akô nghut ri.

² Pilat gi, Yesuq lé, "Nàng gi, Yudaq byu pê é hkohkâm nghut lhê lú?" ga myi jáng,

§ 14:62 Loqyò hkyam gâ é gi, ahko ahkáng wó é jowò lé gâ é nghut lhê. * 14:62 Mhuthtui ji mù, mauhkûng mai lé lo é gâ é gi, Danielaq 7:14 má bò lhê. † 14:68 Chyúmding ra-am má Haû hkûn jáng, woq tân bê nghut ri gâ é le bo ri.

Yesuq gi, "Nàng taí é eq rajung za nghut lhê." ga, tû taí ri.

³ Haû hkyangjong agyi pé gi, Yhang lé mara gyai myo shoq chôh hun akô. ⁴ Haû mù, Pilat gi, Yesuq lé, "Wú aq, yhangmoq, nàng lé mara haû myhó hun nyi le, nàng, haí le a tû taí lhú?" ga myî ri.

⁵ Nghut kôlhang, Yesuq gi, haí le a tû taí kut jáng, Pilat gi, maú byuq bê nghut ri.

⁶ Haû Lhoqlhai Poí u lé, mingbyû wui dúng é htóng byû rayuq yuq lé, mauzau mai lhaq lhoq htoq byi byi kut é htông joq ri. ⁷ Haú hkûn, Barabaq gâ é byû rayuq gi, gumlau gabyông é hkûn, byû sat é gumlau bang eq rahá, htóng gyó tô ri. ⁸ Byû hpông mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.

⁹ Haû mù, yhang gi, "Yudaq byu pê é hkohkâm lé nhang htoq kat byi râ lé, nungmoq ô nau akô lhú?" ga myî ri. ¹⁰ Pilat, haû su ga myî é gi, haû hkyangjong agyi pé, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri.

¹¹ Nghut kôlhang, haû hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga, haû byû moq mó lé i-myt lhoq toq byi akô.

¹² Pilat gi, "Haû jáng, nungmoq mai Yudaq byu pê é hkohkâm ga sù yuq lé, ngò hkâsu kut râ lhú?" ga yhangmoq lé myî ri.

¹³ Haú hkûn, yhangmoq gi, "Yhang lé tapzîng má jén sat pyám aq." ga chôh garu akô.

¹⁴ Haû jáng, Pilat gi, "Haí mù luí lhú? Yhang haí kut shut bê lhú?" ga dum myi jáng, yhangmoq gi, htê mó eq, "Yhang lé tapzîng má jén sat pyám aq." ga je riyhang garû lo bum akô nghut ri.

¹⁵ Pilat gi, haû byû moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byî kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2-3

¹⁶ Gyezô pé gi, Yesuq lé, Pretori yhumwàng (mauzau hpô é yhumwàng) mó hkaû má shuí wang lô kômù, gyedap gón lé ji tsîng yu akô. ¹⁷ Hau htâng, yhangmoq

gi, Yesuq lé buhîng nè radung hut byi mù, zujanmaú saí yù kôluí, Yhâng é ulhum má tsung byi akô. ¹⁸ Hau htâng, yhangmoq gi, "Yudaq byu pê é hkohkâm hpô ê! Chyung hîng xê hing nyi sháng gaq ô!" ga wut garû akô. ¹⁹ Hau htoq agó, yhangmoq gi, Yhâng é ulhum má dumbáng eq adàm dàm bat kômù, sôkan byé gyun luí, Yhâng hí má hkyihput htuq mù, paí mhaû akô nghut ri. ²⁰ Yhangmoq gi, Yhang lé rhoí jihkyoí ban kut yû kôjáng, Yhang wut tô é buhîng nè lé hkyut yû kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e lô bekô nghut ri.

Yesuq Lé Jén Pyám É Hkyô

Mht 27:31-44; Luk 23:27-43; Yhn 19:17-27

²¹ Alesander eq Ruhpu nhiktang é yhângwa, Kuruni myuq byû nghut é Simun ga sù gi, yosô wà mai lò mù, haú jowò mai laí lô ri. Haû hkûn, gyezô pé gi, yhang lé, tapzîng waq nhang akô nghut ri. ²² Yhangmoq gi, Yesuq lé, Golgahta gâ é jowò má shuí e akô (Golgahta gâ é gi, ugyap joq é jowò lé gâ é nghut ri). ²³ Hau htâng, yhangmoq gi, Yhang lé, mura* eq nyhò tô é tsibiyiq wing huq akô; nghut kôlhang, Yhang gi, a lhom shuq byi nghut ri. ²⁴ Hau htâng má, yhangmoq gi, Yhang lé tapzîng má jén tap to kôluí, Yhâng é mebu pé lé, hkyîn shosé shê mù, âng é dông gam yu pyám byi akô nghut ri.

²⁵ Yhangmoq, Yesuq lé tapzîng má jén tap pyám é hkûn gi, napkyó gau hkyíng nghut bê nghut ri. ²⁶ Hau htoq agó, Yhang lé mara hun é dông kê tap to kô é gi, "YUDAQ BYU PÊ É HKOHKÂM" gâ ri. ²⁷ Yhangmoq gi, damyaq í yuq lé le, Yhâng é loqyo hkyam shut rayuq, loqpaí hkyam shut rayuq kut, tapzîng htoq má jén tap tô akô nghut ri. ²⁸ (Haû gi, "Yhang gi, yubak dap bâng chyáng nghap lhôm é hui bê nghut ri."* gâ é Chyúmdang lé lhoq dik é nghut ri.)† ²⁹ Hkyô sô laí lô é bang gi, nyhap é dông ungut ngut mù, taí kô é gi, "Noqkuq yhûm lé hpýoq pyám luí, sum nyí gyoro má dum wó saí lhê ga Sù ê! ³⁰ Náng gùng nàng hkyi yù luí, tapzîng mai gyó lò wú aq mhaí!" ga akô nghut ri.

* 15:23 Mura gi, chi wó kut jung xù nghut lhê. ☆ 15:28 Esai 53:12 † 15:28 Bun zo shí gi, chyúmding axau ra-am pé má za bo é nghut lhê.

³¹ Haú eq rajung za, hkyangjong agyi pé eq tarâ sará pé le, yhangmoq hkaú má, "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung!" ³² Nga-nhúng wó myâng mù, lumjínng rã matú, shí, Israelaq byu pé é hkohkâm, Hkrisduq gi, tapzîng mai gyó lo wú sháng gaq." ga, Yhang lé rhoi dang taí akô. Yhang eq rahá tapzîng má jén tap to huí é su nhik le, Yhang lé rhoi dang taí akô nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-30

³³ Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri. ³⁴ Myinhâng sum hkyíng jé é hkûn, Yesuq gi, "Eloi, Eloi, lama sabakhtani." ³⁵ ga, htê mó èq garú kat ri. Haú é lichyúm gi, "Ngá Garai ê, Ngá Garai ê, Nang, hái mù, Ngo lé tô pyâm tô lhê lú?" gá é nghut ri.

³⁵ Haú nãm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, taí akô.

³⁶ Haú hkûn, byù rayuq gi, din e ló mù, wuimaù lé tsibiyiq wing chyín má jum yù luí, jãm-yang má tuí tap mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nga-nhúng chôm lánng wú sháng." ga taí ri.

³⁷ Yesuq gi, htê mó èq garú kat luí, kâng byit byuq bê nghut ri.

³⁸ Noqkuq yhûm mâ é pán-gyang gi, ah-toq mai a-ô í hkyam byáng dut byuq bê nghut ri. ³⁹ Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut ri-nhung!" ga taí ri.

⁴⁰ Myiwe wuì ra-am gi, we we mai wú nyi bum akô. Haú bang má, Magadalaq wà mâ é Mariq, Yakuq tiq sù yuq eq Yose niktang é yhângnu Mariq eq Salome pé le bo akô nghut ri. ⁴¹ Haú bang sum yuq gi, Galile mau má, Yesuq htâng cháng mù, Yhâng rã é hkyô pé lé châng kut byí é bang nghut akô. Yesuq eq rahá, Yerusalem wà mó má doq lé lo é myiwe wuì, góbang myo myo le haú má nyi tô bum akô nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-42

⁴² Haú nyí gi, Hên Lajang Buinyi (Bánno buinyi é hí nyí) nghut ri. Haú mù, myinhâng jé lô jáng, ⁴³ Yudaq uphkâng hpúng má bo é, aróng wó é, Garai Gasâng é mingdán lé lánng nyi é sù, Aramahti wà byù Yosep gi, myit wum lhoq kîng yù mù, Pilat chyáng wàng luí, Yesuq é gungsôm lé ê dúng ri. ⁴⁴ Pilat gi, Yesuq shí bê gá é hkyô lé wó gyo jáng, maú byuq ri; haú mù, yhang gi, shô up gyezau lé wut yù mù, Yesuq shí teng bê lú ga myí ri. ⁴⁵ Shí teng bê hkyô lé, shô up gyezaù chyáng mai wó sê yù jáng, Pilat gi, Yesuq é gungsôm lé yù rã ahkáng, Yosep lé byi kat ri. ⁴⁶ Haú mù, Yosep gi, pán yúng lé wui yù luí, gungsôm lé yu hkyó mù, htup yup luí, luqgok lé kyûng tô é lup hkaú má ê kat tô ri. Hau htâng, yhang gi, luphkum má, luqlông èq lhêng chí pyâm tô ri. ⁴⁷ Magadalaq wà mâ é Mariq eq Yose é yhângnu Mariq gi, Yesuq lé, hkâmá lhezq tô é lé, ê myang akô nghut ri.

16

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

¹ Bánno buinyi lai jáng, Magadalaq wà mâ é Mariq, Yakuq é yhângnu Mariq eq Salome pé gi, Yesuq é gùng má, ê but byi rã matú namngón jung ê wui akô. ² Bánno buinyi htang napkyó bui htoq lo é hkûn yhang, yhangmoq gi, lup shut e ló akô. ³ Yhangmoq gi, "Luphkum mâ é luqgok lé, ó yuq chyûn lhêng pyám byi rã lú?" ga, rayuq eq rayuq taí lhum akô.

⁴ Nghut kôlhang, yhangmoq tu wú kat kô é hkûn, luqlong haú gi, lhoq lhêng to lánng é lé, myàng akô nghut ri; luqlong haú gi, gyai kô é nghut lhê. ⁵ Yhangmoq gi, lup hkaú má wang ê kô é hkûn, hpyu é buhîng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

⁶ Haú hkûn, haú yuq gi, "Hkâgyuq dàn kó! Nungmoq gi, haú tapzîng má jén sat huí é, Nazaret wà byù Yesuq lé ho akô, a nghut lú? Yhang dui toq ló bê! Yhang gi, shí má a nyi lo. Yhang lé, lhezq tô é jowò lé wú wú keq. ⁷ Ahkuí, nungmoq gi, ló mù, 'Yesuq gi, nungmoq hí má, Galile mau shut so lánng rã nghut lhê. Nungmoq lé, Yhang taí tô é eq

rajung za, nungmoq gi, Yhang lé haú má ló myâng kó râ nghut lhê.' nghû, Yhâng é chángzô pé eq Petruq lé ló taí kyo keq." ga lhom taí kat ri.

⁸ Haú mù, myiwe myhí haú bang gi, byòdàn gyuq nán é eq, lup mai hpang htoq ló akô; yhangmoq gi, lûm gyuq byuq kô é yanmai, ó yuq lé lé, haí le a taí kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

Yesuq Htoq Shit É Hkyô

Mht 28:9-10, 16-20; Luk 24:13-53; Yhn 20:11-23; Lagyo 1:6-11

⁹ Yesuq gi, Bánno buinyì htang napsûn lé, Yhang dui toq é htâng, Yhang mai nat gang nyhit du hkat htoq pyám byi bê sù, Magadalaq wà mâ é Mariq lé hí htoq shit ri. ¹⁰ Mariq haú gi, ló mù, haú Yesuq eq nyi laí lò bê bang, yón ngau nyi kô é hkûn, haú hkyô lé ló taí kyô ri. ¹¹ Yhangmoq gi, Yesuq dum dui bê gâ é hkyô lé le, Yhang lé, Mariq myang é gâ é hkyô lé le, wó gyo kôlhang, a jing kó nghut ri.

¹² Hau htâng má, Yesuq gi, yosô wà shut htoq e ló nyi é chángzo í yuq lé, gotû gunghkyâng dong htoq shit ri. ¹³ Haú nhik gi, taú lò mù, gotû chángzô pé lé haú hkyô lò shit kyo akô; nghut kôlhang, yhangmoq gi, haú lé le a jing byi kó nghut ri.

¹⁴ Hau htâng má, Yesuq gi, haú chángzo raxe rayuq baú za zang zô nyi kô é hkûn, yhangmoq chyáng lé htoq shit ri. Yhangmoq chyáng lumjing myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jing é za myit htan to kô é yanmai le, Yhang gi, yhangmoq lé tân ri.

¹⁵ Hau htoq agó, Yesuq gi, yhangmoq lé, "Mingkan jàm shoq htoq ê mù, waxâng zo wuì lunglhang lé, haú gabú danglù hko kyo keq. ¹⁶ Lumjing mù, wui-myhup hkâm yu é sù ó yuq nghut kôle, hkyi yu é hui râ nghut lhê. Nghut kôlhang, a lumjing é sù ó yuq nghut kôle, mara byí é hui râ nghut lhê. ¹⁷ Lumjing é bang wó kut shit râ kumlhá pé gi, Ngá é mying lé lang luí, nat gâng pé lé wó hkat htoq kó râ eq laklaí é mying pé lé dat nyò kó râ nghut lhê; ¹⁸ yhangmoq gi, lhangmuì pé lé le, wó kui zui kó râ nghut lhê; muí shi jung duq lé, shuq kôlhang, haí dut kó râ a nghut. Nò bâng é htoq má,

yhangmoq é loq ke byi jáng, nò bang ge byuq kó râ nghut lhê." ga taí ri.

¹⁹ Haú Yhumsing Yesuq gi, yhangmoq lé dang ban taí é htâng má, mauhkung shut shuí toq yu é hui luí, Garai Gasâng é loqyo hkyam má zung to bê nghut ri. ²⁰ Hau htâng, haú chángzô pé gi, htoq ê mù, jowò hkangmó má mungdang ê hko kyô akô nghut ri; haú Yhumsing gi, yhangmoq eq rahá nghut nyi mù luí, Yhâng é mungdang têng é hkyô lé tân shit râ matú, yhangmoq lé, kumlhá pé wó kut é a-tsam byí é nghut ri. Amen.

LUKAQ é Gabú Danglù Laiká (The Gospel of Luke)

¹Aróng wó dik é sù Htohpilug ê, ngamoq chyáng dut lai lò bê hkyô pé lé, sâng-hi mai yhumsing myoq eq yhang, myang é bang eq, mungdang wùn waq é bang mai shap kyô gyó lô mù luí, ²byù myo myo gi, shikut luí kâ to bekô nghut ri. ³⁻⁴Ngò le haú pé banshoq lé awang mai ahpyo hpyot jihkúm nuqguq ho myí yù luí, nàng wó sê yu to bê hkyô pé gi, je lhoq gîng é dut sháng gaq nghû, náng é matú banshoq tok za kâ kat byi râ lé, ngò wó myit ri.

Wui-myhup Sará Yohan Hku Lé Lô Râ Gà É Hkyô

⁵Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyû mâ é, Elizabet ga sù nghut ri. ⁶Haú nhik gi, Yhumsîng Garaî é jep é tarâ eq htûngtarâ banshoq lé, rago za cháng mù, Garaî Gasâng é hí má dingmán é su nhik nghut akô. ⁷Nghut kôlhang, Elizabet gi, baùdung dung sù nghut é yanmai, yháng nhâm gi, zo dù a dap kó. Yhangnhik gi, asak ipyat le ko bekô nghut ri.

⁸Ahkuí, Zahkariq gi, dum lhing hkyuq lo é hkyangjong mù lé, yhâng é hpúng eq rahá, Garaî Gasâng é hí má lé zui le, ⁹haú Yhumsing é noqkuq yhûm ahkaú má namngón hkungga ê wang nyhé râ matú, hká yuq nghut râ lé hkyangjông pé é htûngli eq rajung za byù hkyín shosé she wú é hkûn, yhâng chyáng âng ri. ¹⁰Haú mù yhang namngón hkungga lé nyhé é u lé, shiwa byù banshoq gi, yhumpán má, kyûdûng nyi akô.

¹¹Haú hkûn, Yhumsîng Garaî é maumang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri. ¹²Zahkariq gi, maumang lagyo haú lé myàng jáng, dan gyuq nyi ri. ¹³Nghut kôlhang, maumang lagyo gi, "Zahkariq ê, hkâgyuq, náng é kyûdung dang lé Garaî Gasang gyo byi bê. Haú mù luí, náng é yhumsîng myhí Elizabet gi, náng é matú yuqzo rayuq bau byi berâ nghut lhê; nàng

gi, yhang lé Yohan nghû myhíng byi ra râ nghut lhê. ¹⁴Yhang gi, náng é matú gabú hpo eq nuingón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê. ¹⁵Hkâsu mù gâ le, yhang gi, haú Yhumsîng Garaî é hí má ahko ahkáng wó mù luí, byù mó dut râ sù nghut lhê. Yhang gi, tsibyiq wing eq îhpe lé ge shuq râ sù a nghut; yhâng nû é unghkaú mai yhang, Chyoiyúng Woi-nyí eq byíng nyí râ sù nghut lhê. ¹⁶Yhang gi, Israelaq yhangzo yhangshû pé myo myo lé, Yhumsîng yhangmoq é Garaî Gasâng chyáng lhing lò nhâng râ sù nghut lhê. ¹⁷Îwâ pê é myit nhiklhum lé gi, zô wui shut, nyo é a gyo bang lé gi, dingmán bâng é hpaqchyí hkyô shut lhing lò nhâng luí, haú Yhumsîng jé lé râ matú hen tô é byù myú dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e lô râ nghut lhê." ga luí, yhang lé taí ri.

¹⁸Haú hkûn, Zahkariq gi, "Haú hkyô lé ngò hkâsu kut wó sé râ lú? Ngò le mang byuq bê, ngá é yhumsîng myhí le asak ipyat ko bê." ga luí, maumang lagyo lé tû taí ri.

¹⁹Maumang lagyo haú gi, "Ngò gi, Garaî Gasang eq rahá nyi é sù Gabrielaq nghut lhê. Nang lé gabú danglù shî taí kyo aq ga luí, Yhang, ngo lé nhang kat é nghut lhê. ²⁰Ahkyíng jé jáng, ngá dang gi, gè gè dut lò râ nghut lhê. Dang shí pé lé nàng a lumjíng é yanmai, mù haú dut lo é buinyí jé shoq, nàng gi, nhut jit byuq râ nghut lhê." ga luí, yhang lé tû taí ri.

²¹Haú u, shiwa byu pé gi, Zahkariq no-qquq yhûm ahkaú má haú-í myáng shoq lúng byuq é hkyô lé lánng maú nyi akô. ²²Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haú mù luí, yhangmoq gi, noqkuq yhûm ahkaú má yhang myoqwup shing-rán rajung jung myàng ang bê lé, wú sê yu akô nghut ri.

²³Ahkuí, Zahkariq gi, hkyangjong jong âng é buinyí ngap jáng, yhûm shut dum taú ló byuq bê. ²⁴Hau htâng má, yhâng é yhumsîng myhí Elizabet gi, zogûng dut lò mù luí, hká le a htoq e za lhamó ngo hkyap yhúmhaú má lúng byuq ri. ²⁵Haú hkûn, yhang gi, "Byu pé hí má ngò hui zô é hoq hpu hkyô lé, Garaî Gasang gi, myàng byi luí, shî su dut nhang é dông mai huí sêng pyám

byî é buinyî má, Yhang ge é hkyô lé, ngo lé tún shit bê nghut ri." ga taî ri.

Yesuq Hku Lé Lô Berâ Gà É Hkyô

²⁶ Ahkuî, Elizabet zogûng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zomyi gyíng rayuq chyáng nhang kat ri. ²⁷ Zomyi hau é myíng gi, Mariq gà ri; yhang gi, Dawiq amyû mâ é Yosep gá su èq dúng tô é zomyi nghut ri. ²⁸ Maumang haû gi, Mariq chyáng jé jáng, "Mariq ê, nguínón nyî sháng gaq; Nàng, hkungsô wó nyi ri; Haû Yhumsîng Garai gi, nàng eq rahá nyi nyi ri ò!" ga taî ri.

²⁹ Mariq gi, dang haû lé gyo sing nán mù, shî su gà é dang gi, haí jung gá naû é nghut lhê lhú ga luî, myit maú nyi ri. ³⁰ Haû hkûn, haû maumang lagyo gi, "Mariq ê, hkâgyuq, nàng gi, Garai Gasâng é hí má myoqdong wó bê nghut ri. ³¹ Wú aq, nàng zogûng dut lò mù luî, yuqzo rayuq bau râ nghut lhê. Yhâng é myíng lé gi, 'Yesuq' nghû luî, nàng myhíng byi ra râ nghut lhê. ³² Yhang gi, hpung bô sù dut râ nghut mù, Myhang htáng htúm Su é Yhangzo gà é hui râ nghut lhê. Yhumsîng Garai Gasang gi, yhang lé, yhâng é îchyí îwa Dawiq é hkohkâm tanghkuq lé, byi râ nghut mù luî, ³³ Yhang gi, Yakup yhûm* lé hkâ-nhám le ru-up nyi râ nghut lhê. Yhâng é mingdán le htum nghu é joq râ a nghut." ga luî, yhang lé taî ri.

³⁴ Haû hkûn, Mariq gi, "Ngò gi, zomyi gyíng ru nghut ashî, haû gi, hkâsu wó dut râ lhú?" ga luî, maumang lagyo lé tû taî ri.

³⁵ Haû maumang lagyo gi, "Choyiýung Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luî, haû baû lò râ Choyiýung sù le gi, Garai Gasâng é Yhangzo ga kó râ nghut lhê. ³⁶ Hau htoq agó, wú aq, náng é amyû suisho baùdung myhí Elizabet lháng, mang bê le yuqgè zo wun to bê. Ahkuî, zogûng dut é lhamó hkyuq hkyap wàng bê nghut ri. ³⁷ Hkâsu mù gà le, Garai Gasang a wó kut é haî le a joq." ga luî, yhang lé tû taî ri.

³⁸ Haû hkûn, Mariq gi, "Yhumsîng é jùn-myhí ngò nghut nyi lhê; náng é dang eq rajung za ngá chyáng dut lò sháng gaq."

* 1:33 Yakup yhûm nghu e gi, Israelaq amyû lé gà lhê.

ga tû taî ri. Hau htâng, maumang lagyo gi, yhâng chyáng mai lò byuq bê.

Elizabet Lé Mariq Ê Huî É Hkyô

³⁹ Hau htâng hkâ-í a myáng má, Mariq gi, Yuda mau bum mau mâ é wà rawà shut hân hân e lò luî, ⁴⁰ Zahkariq é yhûm má wàng mù, Elizabet eq huî nyo lhûm ri. ⁴¹ Mariq é danghtê lé Elizabet wó gyo jáng, yhâng é unghkaû mâ é zoshâng gi, byam chyû lo ri. ⁴² Elizabet le, Choyiýung Woi-nyí byíng to mù luî, Mariq lé htê mó èq taî é gi, "Myiwe banshoq má, nàng gi, hkungsô wó dik sù nghut ri. Náng é unghkaû mâ é zoshâng le hkungsô wó nyi ri ô! ⁴³ Ngá Yhumsîng é yhângnu ngá chyáng jé lé é jeju gi, hai é yanmai nghut bê lhú? ⁴⁴ Wú aq, náng danghtê lé wó gyo kat jáng, ngá unghkaû mâ é zoshâng gi, gabú luî byam chyû nyi ri. ⁴⁵ Haû Yhumsîng taî é dang gi, gè gè dik lò râ nghut lhê ga luî, lumjîng é myiwe gi, hkungsô wó nyi ri." gà ri.

Mariq É Hkya-on Dang

⁴⁶ Haû hkûn, Mariq gi, "Ngá é i-myt mai haû Yhumsîng lé hkya-on nyi lhê, ⁴⁷ ngá é woi-nyí le, Garai Gasang ngá é hkyi yù Sù má gabú nyi lhê. ⁴⁸ Ngò Yhâng é jùnmyhí myit nyhum nyi é lé, Yhang myàng byi bê nghut ri. Wú aq, ahkuî mai ipyat dedu má, ngo lé gi, hkungsô wó nyi sù, gà nyi bekô râ nghut lhê.

⁴⁹ Hkâsu mù gà le, Wum-o Bo Dik é Garai Gasang gi, ngo lé mauhpo mù mó kut byi bê nghut ri, Yhâng é myíng gi, choyiýung nyi ri ô. ⁵⁰ Yhang lé gyuq hoq nyi bâng é ahtoq má, Yhang shogyo nhikmyîn é hkyô gi, pyat bán hkangmó jé shoq hkâ-nhám le joq nyi râ nghut lhê.

⁵¹ Yhâng é wum-o bo é loq èq mauhpo mù mó pé lé tún shit bê. Yhumsîng myit é hkyô má nghutbùn nyi é bang lé, Yhang lhoq pyo pyám bê.

⁵² Zaugun suwún wuî lé gi, zau zûng tanghkuq mai lhoq hkyô pyám mù, i-myt nyhûm bang lé gi, lhoq myhâng bê nghut ri.

⁵³ Zòmüt hui bang lé gi, ge é zoshuq gyi shoq byi tso mù, sutzè wó bang lé gi, akôm nhang kat bê nghut ri.

⁵⁴⁻⁵⁵ Nga-nhông é îchyi îwâ pé lé taî tô é dang eq rajung za, Abraham eq yhangzo yhangshu pé lé,

hkâ-nhám le shogyo nhikmyîn nyi râ gâ e lé myit bün nyi é yanmai,

Yhâng é dui-nhâng zoshâng Israelaq byu pé lé hku baú nyi ri."

ga luî, taî ri.

⁵⁶ Mariq gi, Elizabet chyáng lhamó sum hkyap kô nyi mù luî, yhâm shut dum taú lò byuq bê.

Wui-myhup Sará Yohan Baú É Hkyô

⁵⁷ Hau htâng, Elizabet gi, zoshâng bau râ buinyi jé mù, yuqgè zo bau bê. ⁵⁸ Yhang lé haû-í kô é jeju Yhumsîng tân shit é hkyô lé, yhâng é yhumkyo buinùm wuì eq mung moq gumang wuì wó gyo kojáng, yhang eq rahá gabú nyi akô.

⁵⁹ Ahkuî shit nyi jé jáng, yhangmoq gi, zoshâng haû lé ahpyo-kuq hpyit byi râ matú lé kôluî, yhâng wâ é myìng eq rajung za, Zahkariq ga myhíng byi râ dâ akô.

⁶⁰ Nghut kôlhâng, yhâng nu gi, "A nghut, Yohan nghû sheq myhíng râ nghut lhê." ga tû taî ri.

⁶¹ Yhangmoq gi, "Náng é amyû suisho má le, haû su gâ é myìng rayuq le a bo wú shi." ga luî, yhang lé taî akô.

⁶² Haû hkûn, zoshâng haû lé hkâsu nghû myhíng nau lhê laq ga, yhâng wa lé loq lik lik shit mù myi akô. ⁶³ Zahkariq gi, kâ jung longpá dũng yù mù, "Yhâng é myìng gi, Yohan nghut lhê." ga kâ shit ri. Haû mù, lhunglhâng bang gi, maú byuq bum akô. ⁶⁴ Haû hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkya-ôn nyi ri. ⁶⁵ Haû su dut é hkyô lé, wó gyô é awui ayàm lhíngkyuq mâ é lhunglhâng bang gi, gyuq maú byuq bùm kômù, Yuda mau bum mau ramau gón taî pyo ló bum akô. ⁶⁶ Wó gyô é lhunglhâng bang gi, haû hkyô lé yhumsîng é i-myit unghkaú má kat to mù, "Zoshâng shi gi, hkâsu dut lò râ sù nghut lhê lú?" ga myit wú nyi akô. Haî mù gâ le, haû Yhumsîng é

loq gi, yhang eq rahá nghut nyi é yanmai nghut ri.

Zahkariq É Myiqhtoi Dang

⁶⁷ Haû hkûn, zôshang é yhângwa Zahkariq gi, Chyoiyúng Woi-nyí byíng lô mù, myiqhtoi dang dong taî é gi,

⁶⁸ "Haû Yhumsîng, Israelaq é Garai Gasang lé hkya-on sháng ô!

Haî mù gâ le, Yhang gi, Yhâng é amyû lé, lé kûm wú mù luî, lé hkyi yù bê nghut ri.

⁶⁹ Garai Gasang gi, Yhâng é dui-nhâng zoshâng, Dawiq é amyû mai nga-nhông é matú

wum-o bo é hkyi yu é hkyuî† lé, yuq htoq lô nhâng bê.

⁷⁰ Shí hkyô gi, a-nham pyat mai yhâng é chyoyúng myiqhtoî pê é nhut mai taî tô é eq rajung za nghut ri.

⁷¹ Haû hkyuî gi, nga-nhông lé nga-nhông é gye pê chyáng mai le, a nguì a nau bang banshoq é loq mai le, hkyi yù râ nghut lhê.

⁷² Îwa Garai gi, nga-nhông é îchyi îwa pé lé shogyo nhikmyin hkyô lé tân shit râ matú, Yhang byi tô é chyoyúng dangshikaq lé a tô-myhí nghut ri.

⁷³ Haû gi, nga-nhông é chyiké Abraham lé byi tô é danggidiq nghut lhê.

⁷⁴⁻⁷⁵ Nga-nhông lé gye pê loq mai hkyi yù râ eq, nga-nhông asak dui tô é buinyi banshoq má,

Yhâng é hí má a gyuq a kyum é za, chyoyúng é eq dîngmán é hkyô mai,

Yhang lé wó dojaú nyi nhâng râ matú, Yhang jé lé é nghut lhê.

⁷⁶ Ngá zo ê, nàng gi, Yhumsîng é hí má, e ló mù luî, Yhâng é hkyô lé hen lajang byi râ sù nghut é yanmai,

nang lé Myhang htáng htúm Su é myiqhtoi ga kó râ nghut lhê.

⁷⁷ Nàng gi, Garai Gasâng é byu pé lé, yhangmoq é yubak mara hkyut pyám byi é dong,

hkyi yu é hui râ hkyô lé taî kyo râ sù nghut lhê.

⁷⁸ Haî mù gâ le, Garai Gasâng é shogyo nhikmyin é yanmai, napsûn bui‡ gi,

† 1:69 Hkyi yu é hkyuî gi, Yhumsîng Yesuq lé taî é nghut ri.

‡ 1:78 Napsûn bui gâ é gi, Yesuq lé taî é nghut lhê.

mauhkûng mai nga-nhûng chyáng htoq lé lô râ nghut lhê.

⁷⁹Yhang gi, mauchut hkaû[§] eq shî wup hkaû má lúng to bang lé builoq su duqbó byi râ eq,

nga-nhúng lé nguingón simsaq é hkyô shut shuí e lô râ sù nghut lhê." ga ri.

⁸⁰Zoshâng haû gi, kô lò mù, woi-nyí wum-o bo lò luí, Israelaq byu pê chyáng htoq shit lo é buinyì jé shoq, yoso pé má nyí nyí ri.

2

Betlehem Wà Mó Má Yesuq Hku Lo É Hkyô Mht 1:18-25

¹Buinyì haû pé má, Romaq hkoséng ming banshoq mâ é byù lhunglhâng bang gi, myìng jihpán kat râ matú, hkoséng Kehtaq Augustuq chyáng mai mungdang htoq ri. ²Jihpán haû lé sâng-hi dàm guq hi é gi, Kuireni ga sù Suriq mau má mauzau kut nyi é hkûn nghut ri. ³Haû hkûn, byù du jup gi, myìng jihpán kat râ matú, ó le ô é wà shut lô bum akô.

⁴Haû mù, Yosep le Dawiq é awut ashín nghut é yanmai, Galile mau Nazaret wà mai, Yuda mau mâ é Betlehem gâ é Dawiq é wà shut, ⁵yhang dúng tô é myiwe Mariq eq rahá myìng kat lhóm râ matú jé doq lô akô; Mariq kúm gi, gungloq lái to bê nghut ri. ⁶Haû Betlehem má nyi tô ashí le, Mariq gi, zo hkû râ buinyì jé mù, zomún yuqzo lé bau bê. ⁷Yhang gi, zoshâng haû lé panchoq èq htup mù no tso langhkang má lheq tô ri; haû mù gâ le, bíng yhûm má yhangmoq nyi râ jowò a joq lo é yanmai nghut ri.

Sau Zúng Bang Yesuq Chyáng Jé Lé É Hkyô

⁸Ahkuí, haû ginwáng mâ é sau zúng zo bang gi, sau zúng jang má yhangmoq é sau hpúng lé, myín lé zúng nyi akô. ⁹Haû hkûn, Yhumsîng é maumang lagyo gi, yhangmoq é hí má lé htoq yap shit to mù, Yhumsîng é hpungwup shíngkang gi, awui ayàm má duqbang lò luí, yhangmoq gyai gyuq bum akô. ¹⁰Maumang lagyo gi, "Hkâgyuq kó, byù lhunglhâng bâng é matú, gyai yhang gabú é danglù, ngò nungmoq chyáng wun lé lo lhê. ¹¹Hkû-nyí lhê buinyì má, Hkrisduq* nghu é Yhumsîng nghut é hkyi yù Sù

gi, Dawiq é wà má nungmoq é matú hku to bê. ¹²Nungmoq é matú kumlhá gi, zoshâng nyheqnú rayuq panchoq èq htup mù, no tso langhkang má lheq to lánng ra nghut lhê." ga luí, yhangmoq lé taí ri.

¹³Haû hkûn jáng yhang, mauhkûng bang rajùm rayò htoq lô mù, maumang lagyo haû eq rahá Garai Gasang lé hkya-ôn é dang gi,

¹⁴"Htoq tsáng myhâng má, Garai Gasang gi, hpungwup shíngkang bo nyi sháng gaq ô!

Myigùng htoq má le, Yhang ô nau é byu pé má, nguingón é gi, hkâ-nhám le joq nyi sháng gaq ô!"

gâ akô.

¹⁵Maumang lagyo pé, yhangmoq chyáng mai, mauhkûng shut dum lô byuq jáng, sau zúng bang gi, "Sà! Betlehem wà mó má jé shoq yhang, nga-nhúng è mù, ahkuí za Yhumsîng nga-nhúng lé lé shit kyô lái lô bê hkyô lé è gôn wú sháng." ga luí, rayuq eq rayuq taí lhûm akô.

¹⁶Hau htâng, yhangmoq gi, hân hân è luí, Mariq eq Yosep lé le, no tso langhkang má lheq tô é zoshâng nyheqnú lé le, è myàng akô. ¹⁷Zoshâng haû lé, yhangmoq myàng kôjáng, zoshâng haû eq séng luí yhangmoq lé, lé taí kyô é dang lé, taí pyô kat bekô.

¹⁸Wó gyô é bang banshoq gi, haû sau zúng bang taí kyô é dang lé, maú byuq bum akô.

¹⁹Mariq kúm gi, dut lo é hkyô pé eq wó gyô é dang banshoq lé unghkaû má matsîng yù mù luí, nik nik myit wú nyi ri. ²⁰Sau zúng bang gi, yhangmoq lé maumang lagyo taí kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkya-on kungtôn uchyang dum taú lô bekô nghut ri.

Yesuq Lé, Noqkuq Yhûm Má Shuí E É Hkyô

²¹Zoshâng haû, shit nyí jé mù ahpyo-kuq hpyit byi râ buinyì má, yhang unghkaû má a lúng shi mai maumang lagyo myhîng tô é myìng eq rajung za, yhang lé, "Yesuq" ga luí, myhîng byí akô.

²²Mosheq é tarâ eq rajung za, yhangmoq é lhoq san lhoq sêng é buinyì byíng jáng, Yhumsîng é tarâ má, "Zomún yuqzo

[§] 1:79 Mauchut hkaû gâ é gi, Garai lé a sé mù woi-nyí má shi tô é bang lé gâ lhê. * 2:11 Grik dong Hkrisduq gâ é gi, xù but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê. ✨ 2:22 Htoq Lô 13:2,12

hkanqmó gi, haû Yhumsing é hí má chyoyúng sù wó nghû râ matú, Yhumsing chyáng ê ap byi râ lhê." ✧ gâ é eq,
²³ "Hpúngkyui razúm, haû a nghut jáng, nghoqmyhû zo í du," ✧ hkungga byi râ lhê ga kê tô é eq rajung za, ²⁴ Mariq eq Yosep gi, zoshâng haû lé shui mù Yerusalem wà mó shut ê akô.

²⁵ Haû hkûn, Simeon gâ é mangzo rayuq, Yerusalem wà mó má nyi ri. Haû yuq gi, dingmán é eq tarâ cháng sù nghut mù, Israelaq lé nhik lhoq títng râ ahkyíng lé láng nyí sù nghut ri; haû Chyoyúng Woi-nyí le, yhâng é ahtoq má nyi nyi ri. ²⁶ Yhang gi, haû Yhumsîng Hkrisduq lé a myang é za, shî râ a nghut, ga Chyoyúng Woi-nyí èq tûn shit tô é hui sù nghut lhê. ²⁷ Yhang gi, Chyoyúng Woi-nyí èq shui mù, noqkuq yhúmhaû má é jé nyi tô é hkûn lé, Mariq eq Yosep gi, zoshâng Yesuq lé htûng tarâ eq rajung za kut byi râ matú, noqkuq yhúmhaû má shuí wang ló kôjáng, ²⁸ Simeon gi, zoshâng lé loq èq lhom bún yú mù, Garai Gasang lé hkya-ôn é dang gi,

²⁹ "Yhumsîng ê, náng é danggidiq gi, dik bê nghut ri; hkû-nyí náng é jùn ngò gi, nguínón é èq wó shi ló berâ nghut lhê.

³⁰ Haû mù gâ le, byù lhunghâng bâng é matú, náng lajang tô é hkyi yù hkyô lé, ngá myoq èq yhang wó myâng bê.

³¹ Haû gi, byù myû chângjup wó myâng râ matú, náng lajang to byí é nghut mù,

³² tûngbaù pé lé, tengmán hkyô má bui su duqbó mù hpông shit râ matú le, náng é amyû Israelaq é hpungwup shingkang matú le nghut nyi ri."

gâ ri.

³³ Yhângnu eq yhângwâ nhik gi, zoshâng Yesuq é hkyô lé Simeon taí é yanmai, maú byuq akô. ³⁴ Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shî gi, Israelaq ming mâ é byù myo myô é matú lingbat jowò eq myo myô é matú kô lò myhang lò râ hkyô le, byù myo myo taí he pyám râ kumlhá matú le, hkyin tô é hui sù nghut ri. ³⁵ Haû mù, byù myo myô é unghkaû má, myit mi-myt lé lhoq htoq shit râ nghut lhê. Náng é myit

nhiklum má, shâm chûn èq htaû kyâng kat é su gâ é lé, náng hui zo râ nghut lhê." ga taí ri.

³⁶ Ashe amyû mâ é Hpanuelaq é yhangzo, Annaq gâ é myiqtoi myhí rayuq nyi ri; yhang gi, ipyat gyai ko bê. Yhang gi, zomyí pyat mai, yhanglâng eq nyhit zân za nyi luí, shit xe myi zân jé shoq chuimó mó nyi to sù nghut ri. ³⁷ Myiwe haû gi, noqkuq yhûm mai a htoq ê za, nyí myín a ga noqkuq dojaú nyí mù, zoshuq gám luí kyûdûng nyi ri. ³⁸ Simeon dang ban taí jáng, Annaq gi, hui lé lô mù, Garai Gasâng jeju lé hkya-on luí, Yerusalem wà mó lé Garai Gasang hkyi yù râ gâ é lé, myit lum to bang lhunghâng lé, zoshâng hau é hkyô taí kyô ri.

³⁹ Yosep eq Mariq gi, kut râ pé lé haû Yhumsing é tarâ joq é dông ban kut jáng, Galile mau mâ é yhangmoq wà Nazaret shut dum taù ló bekô. ⁴⁰ Zoshâng haû gi, kô lò mù, wum-o bò lo é eq, hpaqchyí byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

Noqkuq Yhúmhaû Má Zoshâng Yesuq Jé Nyi É Hkyô

⁴¹ Yhângnu yhângwâ nhik gi, Lhoqlhai Poí jé hkanqmó, zàn wuì Yerusalem wà mó má é ê kut akô. ⁴² Yesuq raxe í zân jé jáng, poí haû, ê bo lòm ra htûngli joq é eq rajung za, yhangme wuì yhanghpe wuì doq ló akô. ⁴³ Haû poí buinyí lai luí, dum taù lo é hkûn, zoshâng Yesuq gi, Yerusalem wà mó má nyi gyó tô ri; nghut kôlhang, yhângnu yhângwâ nhik gi, a sé kó. ⁴⁴ Yesuq lé rahá lo é luzúm wui chyáng bò râ su ngàm kômù luí, Yosep eq Mariq gi, ra-nyí buigyùm chap sô ló bê htâng má, mung moq wuì eq, sê lhûm é buinùm ji-myi wui chyáng Yhang lé châng ho akô. ⁴⁵ Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taù jé e ló bekô. ⁴⁶ Ahkuí, sum nyí nghû râ nyí sheq, noqkuq yhúmhaû má, tarâ sará pé é gung gung má zùng to mù, yhangmoq é dang lé gyo yù luí, dum taù myi myi kut nyi é lé, yhangnhik ê myàng akô. ⁴⁷ Yhâng é dang wó gyô é bang banshoq gi, Yhâng é unuq nyau é hkyô lé le, Yhang tû taí é dang lé le, maú nyi akô. ⁴⁸ Yhang lé myàng jáng, yhangnhik maú byuq kômù luí, yhângnu

gi, "Ngá zo ê, haî mù luî ngá-nhik lé isu kut lhê lhú? Wú aq, náng wa eq ngá-nhik gi, myit myo myit chiq é eq, nàng lé jaq châng ho pyám bê." ga luî, Yhang lé taî ri.

⁴⁹Yhang gi, "Haî mù luî, ngo lé châng ho akô lhú? mauhkûng mâ é ngá Wâ é yhûm má ngò nyi râ lhê le gi, nungnhik a sé kó lhú?" ga luî, yhangnhik lé tâ taî ri. ⁵⁰Nghut kôlhang, yhangnhik gi, Yesuq taî é dang lichyúm lé, a sê gyo kó.

⁵¹Yesuq kúm gi, yhangnhik eq rahá Nazaret wà shut taû jé gyó ló luî, yhangnhik nyo é dang lé gyo mù nyi tô ri. Yhângnu Mariq gi, dut lai lò bê hkyô pé banshoq lé, yhâng é myit nhiklhûm má matsîng tô ri.

⁵²Yesuq gi, hpaqchyî byéng-yá kûng zet lo é eq, gungghyâng kô myhang lò mù, Garai Gasâng é hí má le, byu hí má le, myoqdong wó lo nyi ri.

3

Wui-myhup Sará Yohan Mhoqshit É Hkyô Mht 3:1-12; Mrk 1:1-8; Yhn 1:19-28

¹Romaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má; ²Anna eq Kayahpaq gi, hkyangjong mó mû má, kut nyi akô. Haú hkûn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri. ³Haú mù, yhang gi, Yodan làng yàm jowò hkangmó má, sô jón wún luî, yubak mara hkyut pyám byî é hui râ matú myit lhîng mù, wui-myhup hkâm* yù râ hkyô lé, hko kyô nyi ri. ⁴Haú gi, myiqhtoi Esai-aq laiká má, "Haú yoso má, byù rayuq garû taî é htê gi, 'Haú Yhumsing é matú, hkyô hen to keq, Yhâng é matú hkyô lhoq nyhang to keq;

⁵wuîhkung langhkop hkangmó lé lhoq pyíng ra râ nghut lhê; bùm eq wingkáng hkangmó lé hpyit pyám ra râ nghut lhê;

agoi aguq é hkyô hkat hkangmó lé lhoq nyhâng ra râ nghut lhê;

ahkung ahkop dut é hkyô hkat hkangmó lé lhoq rhá ra râ nghut lhê.

⁶Haú hkûn, byù banshoq gi, Garai Gasâng é hkyi yù hkyô lé myàng râ nghut lhê."[☆] ga luî, kê tô é eq rajung za nghut ri.

⁷Shiwa byù rajùm rayò gi, Yohan é loq má wui-myhup hkâm yù râ ga luî htoq lé lô kôjáng, Yohan taî é gi, "Duq htan é lhangmuì amyû pé† ê, jé lô râ yubak dam mai wó hpang lut kó sháng gaq ga, nungmoq lé ó yuq taî pûn é lhú? ⁸Myit lhîng hkyô eq gingdán é ashi zui keq. 'Nga-nhúng gi, Abraham é yhangzo yhangshû pé nghut lhê.† nghû luî, yhumsing é i-myit unghkaû má hkâtaí kó. Hkâsu mù gâ le, ngò, nungmoq lé taî kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. ⁹Ahkuî lháng, Garai Gasang gi, Yhâng é wazung lé haú sîkgâm wang pé má tô to bê nghut ri; haú mù, ge é ashi a zui é agàm hkangmó lé gi, htuq lhêng pyám mù, myi má dú kat pyám râ nghut lhê." gâ ri.‡

¹⁰Haú hkûn, shiwa byu pé gi, "Haú nghut le gi, ngamoq hkâsu kut le gè râ lhú?" ga luî, yhang lé myî akô.

¹¹Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq." ga luî, yhangmoq lé tâ taî kat ri.

¹²Kang guq bang le, wui-myhup hkâm yù râ ga lé lò mù, "Sarâ ê, ngamoq gi, hkâsu kut le ge râ lhú?" ga luî, yhang lé myî akô.

¹³Yhang gi, "Nungmoq hkyui yù râ masat tô é htoq lai shoq hkâyû kó." ga luî, yhangmoq lé tâ ri.

¹⁴Gyezô pé ra-am le, "Ngamoq gi, hkâsu kut le gè râ lhú?" ga luî, yhang lé lé myî akô.

Yohan gi, "Ó lé le hkâkyuq zo ko; a tara é dông mara le hkâhûn kó; nungmoq wó e ahpauê eq gé bûn nyi keq." ga luî, yhangmoq lé tâ ri.

* 3:3 Wui-myhup hkâm gâ é gi, baptisma lé gâ é nghut lhê. ☆ 3:6 Esai 40:3-5 † 3:7 Lhangmuì amyû pé gâ é gi, Lukaq 3:7-10 má bo é Hparishe eq Saduke pé lé taî é nghut ri. ‡ 3:8 Nga-nhúng gi, Abraham é yhangzo yhangshû pé nghut lhê gâ é gi, Abraham é yhangzo yhangshu nghut é yanmai, Garai Gasang jéyáng é lé a hui râ ga, myit yu é hkyô nghut ri. § 3:9 Bun zo shí lhûm é lichyúm gi, myit a lhîng bang lé, Garai Gasang jéyáng é buinyi jé râ nghut lhê ga nau é nghut ri.

¹⁵ Shiwa byu pé kúm gi, Hkrisduq lé myit lánq nyi tô é bang nghut é yanmai, Yohan lé haú yuq nghut lhê laq ga yhumsing é i-myit unghkaú má myit wú nyi bum akô.

¹⁶ Haú hkûn, banshoq bang lé Yohan taî é gi, "Ngò gi, nungmoq lé, wui èq za wui-myhup hkám byî lhê; nghut kôlhang, ngá htoq má wum-o a-tsam je bo é sù rayuq jé lé lô râ nghut lhê. Ngò gi, yhâng é hkyî-tsung tui lé hpyî râ lhang a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkám byi râ nghut lhê. ¹⁷ Yhang gi, loq má byò chung to mù, guq chyarâng mâ é guq bùm lé hik sân pyám luî, já é guq cham lé gi, guqchyî má tsing kat to mù, guqsôm lé kúm gi, hkâ-nhám le shi byuq a sê é myî èq nyhê hkyô pyám râ nghut lhê." gâ ri.* ¹⁸ Haú mù, Yohan gi, byù haú bang lé gotû dang myo myo èq lhoq pun lhoq kying mù, gabú danglù lé hko kyô nyi ri.

¹⁹ Nghut kôlhang, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotû a ge é mù banshoq é yanmai, Yohan gi, yhang lé tân mhoqshit bê nghut ri. ²⁰ Mara haú pê htoq agó, Herut dum kut jat yu é mara gi, Yohan lé htóng má lhûng kat é nghut ri.

Yesuq, Wui-myhup Hkâm Yu É Hkyô

Mht 3:13-17; Mrk 1:9-11

²¹ Yohan lé htóng má a lhûng kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyûdûng nyi le, mauhkûng bóng lô mù, ²² haú Chyoiyúng Woi-nyí gi, hpûngkyui gunghkyâng sù é dông mai Yhâng ahtoq má lé gyó nô ri. Haú hkûn, "Nàng gi, Ngò chyitdap é Ngá zo nghut lhê; Nàng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

Yesuq É Byù Xik Shap Kyô É Hkyô

Mht 1:1-17

²³ Yesuq gi, Yhang mù zuî hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo,

²⁴ Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo,

²⁵ Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo, ²⁶ Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo, ²⁷ Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo, ²⁸ Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo, ²⁹ Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo, ³⁰ Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo, ³¹ Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo, ³² Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo, ³³ Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo, ³⁴ Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo, ³⁵ Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo, ³⁶ Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo, ³⁷ Lamek gi, Mehtusela é yhangzo, Mehtusela gi, Enuq é yhangzo, Enuq gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo,

* 3:17 Haú eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lhê.

³⁸ Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

4

Yesuq Lé Tsadán Gunlaú É Hkyô

Mht 4:1-11; Mrk 1:12-13

¹ Yesuq gi, Chyoiyúng Woi-nyí eq byíng mù, Yodan làng mai dum taú lo é hkûn, Chyoiyúng Woi-nyí gi, Yhang lé yoso shut shuí e ri. ² Haú má, Yesuq gi, buinyí myi xê nyí jé shoq, nat Tsadán eq gunglaú é huí ri. Buinyí haú gyoro má, Yesuq gi, haí le a zô é yanmai, zòmút hui bê nghut ri.

³ Haú mù luí, nat Tsadán gi, "Nàng, Garai Gasâng é Yhangzo nghut le gi, luqgok shí lé muk dut nhâng aq." ga luí, Yhang lé taí ri.

⁴ Haú hkûn, Yesuq gi, "Byù gi, muk eq za asak duí râ a nghut." ga luí, Chyúmdang má kê tô ri. ⁵ ga yhang lé tú taí ri.

⁵ Hau htâng, nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq lé razup má za tûn shit luí, ⁶ "Shí ahkáng ayá banshoq eq haú mingdán é hkikhâm hkyô banshoq, ngò nang lé wó byí lhê; hkâsu mù gâ le, haú pé banshoq gi, ngo lé ap byí to bê nghut mù, ngò byí nau é sù ó yuq lé nghut kôlhang, byí râ nghut lhê. ⁷ Haú mù, Nàng, ngo lé noq é nghut jáng, shí pé banshoq Nàng é dut râ nghut lhê." ga, Yesuq lé taí ri.

⁸ Haú hkûn, Yesuq gi, "Haú Yhumsîng náng é Garai Gasang lé za, nàng noqkuq dojaú ra râ nghut lhê." ga luí, Chyúmdang má kê tô ri." ga luí, yhang lé tú taí ri.

⁹ Nat Tsadán gi, Yesuq lé Yerusalem wà mó má shuí ê mù, noqkuq yhum je myhang é shúhtâng htoq má yap nhang to luí, "Nàng, Garai Gasâng é Yhangzo nghut le gi, shí mai byam gyó kat wú aq. ¹⁰ Hkâsu mù gâ le,

'Nang lé upzúng byí nyí râ matú, Garai Gasang gi, Yhâng é maumang lagyô pé lé taí to râ nghut mù,

¹¹ luqgok má náng é hkyí a ló htung shoq, yhangmoq é loq eq Nang lé lhom bún yú kó râ nghut lhê." ¹²

ga luí, Chyúmdang má kê tô ri." ga taí ri. ¹² Nghut kôlhang, Yesuq gi, "Haú Yhumsîng, nungmoq é Garai Gasang lé, wó chyam wú râ a nghut." ¹³ ga luí, Chyúmdang má bo tô ri." ga, yhang lé tú taí ri.

¹³ Nat Tsadán gi, gunglaú é hkyô pé banshoq ban kut jáng, ahko ahkáng lánng wú uchyang yhâng chyáng mai byam gâng nyi byuq ri.

Yesuq Lé Nazaret Wà Bang He-ngik Pyâm É Hkyô

Mht 4:12-17; 13:53-58; Mrk 1:14-15; 6:1-6

¹⁴ Yesuq kúm gi, Chyoiyúng Woi-nyí wum-o byíng é eq Galile mau shut dum taú lo ri. Haú mau jowò hkangmó má, Yhâng é hkyô lé taí pyo ló bùm bekô. ¹⁵ Yhangmoq é tarajong pé má, Yesuq mhoqshit byi mù, lhunglhâng bang gi, Yhang lé taí hkyâ-ôn nyi bum akô.

¹⁶ Hau htâng má, Yhang nyi kô lo é Nazaret wà má dum taú jé ló bê; Yhang gi, hkâ-nhám le kut nyi é eq rajung za, Bánno buinyí* lé tarajong má wang ê mù, laiká nghap râ ga toq yap é hkûn, ¹⁷ Yhang lé myiqhtoi Esai-aq chyúmding byi kôjáng, Yhang chyúmding haú lé hpông kat le, ¹⁸ "Yhumsîng é Woi-nyí gi, ngá é ahtoq má nyi nyi ri; hkâsu mù gâ le, asho awuí é bang lé gabú danglù hkô kyo râ matú, Yhang ngo lé hkyin yú bê.

Htóng lúng bang lé lhoq htoq râ hkyô eq, myoqjit bang lé myoq dum myàng nhâng râ hkyô hkô kyo râ matú le, zik zo huí é bang lé nhang kat nhâng râ eq,

¹⁹ Yhumsîng, Yhâng é byu pé lé hkyi yú râ ahkýing zanwut lé hkô kyo râ matú le, Yhang, ngo lé nhang kat bê nghut ri." ²⁰

ga luí, kê tô é jowò lé myang záng mù nghap ri.

²⁰ Hau htâng, Yesuq gi, chyúmding haú lé ding mù, shuí-u sù lé tau byí pyám luí, dum zung tô ri; tarajong mâ é byù lhunglhâng bang gi, Yesuq lé chôm wú tô é hkûn, ²¹ Yesuq gi, "Nungmoq é nohkyap má, ahkuí wó gyô é Chyúmdang shí gi, hkû-nyí yhang lo dik bê." ga luí, yhangmoq lé taí hi kat ri.

¹² 4:4 Tarâ Pun 8:3 ¹³ 4:8 Tarâ Pun 6:13 ¹⁴ 4:11 Hkyâ-on 91:11-12 ¹⁵ 4:12 Tarâ Pun 6:16 ¹⁶ 4:16 Bánno buinyí gâ é gi, Yudaq byu pé nòmu é buinyí lé gâ lhê. Ahkui lhê é dông ga jáng, Bánno buinyí gi, bat htoq hkyuq nyí lé âng ri. ¹⁷ 4:19 Esai 61:1-2

²² Lhunglhâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maú kôluí, "Shí yuq gi, Yosep é yhangzo a nghut lhu?" ga taí bum akô.

²³ Haú mù luí, Yesuq gi, "Nungmoq gè gè yhang, 'Chi sará ê, yhumsing gùng lé lhoq ge yù aq.'† gâ é sanghkyang èq le, 'Nàng, Kaperna-um và má kut shit wú é hkyô ngamoq wó gyo bê, haú eq rajung za, nàng, náng é yhum mau má le, kut shit wú aq.' ga luí le, ngo lé taí kó râ nghut lhê." ga taí ri.

²⁴ Yhang dum xoq taí é gi, "Ngò, nungmoq lé teng za taí kôlé, myiqhtoi ó yuq le yhumsing é yhum mau má myoqdong wó wú é a nghut. ²⁵ Ngò, nungmoq lé teng za taí kôlé, Eliyaq é pyat lé, Israelaq ming má chuimó myo myo nyi bum akô. ²⁶ Nghut kôlhâng, haú ming má sùm zan eq lhamó hkyuq hkyap yhang, mau a wò dut byuq mù, mutmó gyó tô é hkûn, Garai Gasang gi, yhangmoq mâ é rayuq chyáng le, Eliyaq lé a nhang kat é za, Sidun mau Zarephta và mâ é, chuimó myhí rayuq chyáng sheq nhang kat byí é nghut lhê. ²⁷ Myiqhtoi Elisha é pyat má le, Israelaq ming má, manggâm dap é byù myo myo nyi kôlhâng, yhangmoq chyáng mâ é rayuq le wó sân-yúng yù kô é a nghut; Suriq byù Naman ga sù tûngbaù hpó za sheq wó sân-yúng é nghut lhê." ga taí ri.

²⁸ Tarajong hkaú mâ é lhunglhâng bang gi, haú hkyô lé wó gyo kôjáng, gyai yhang nhik-yo nau bùm kômù, ²⁹ toq yap luí, Yhang lé và mai hkat htoq mù, yhangmoq é và xuq tô é bùm gùng htoq mâ é gampyoq má, ê chyûn hpyit hkyô pyám râ ga shuí e ló akô. ³⁰ Nghut kôlhâng, Yesuq kúm gi, byù hpúng haú mai so hkoq htoq ló byuq bê nghut ri.

Agè Ashop É Nat Lé Yesuq Hkat Htoq É Hkyô Mrk 1:21-28

³¹ Hau htâng, Yesuq gi, Galile mau mâ é Kaperna-um và má jé é mù, Bánno buinyi má byu pé lé mhoqshit hi ló bê nghut ri.

³² Yhangmoq gi, Yhang mhoqshit é hkyô lé mauhong nyi akô; hkâsu mù gâ le, Yhang gi, ahko ahkáng bo é dang dông taí nyi é yanmai nghut ri.

³³ Yesuq, tarajong hkaú má mhoqshit byi nyi é hkûn, nat gang wang júng é byù rayuq htê mó o mó èq taí é gi, ³⁴ "Ê, Nazaret và byù Yesuq ê, ngamoq gi, Nàng eq haí sêng lhê lhu? Ngamoq lé lhoq hten râ matú, Nàng jé lé é nghut lhê lhu? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

³⁵ Haú hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat jáng, nat gi, haú yuq le yhangmoq é gung gûng má lhoq lheq to mù, a nò nhang é za, yhâng chyáng mai htoq ló byuq ri.

³⁶ Haú mù luí, shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasú é dang và nghut lhê lhu? Yhang gi, ahkáng ayá èq le, wum-o bo é èq le, agè ashop é nat pé lé hkunmó hkyó jáng, haú bang htoq ló byuq akô." ga taí lhùm bum akô. ³⁷ Haú hkûn, haú mau mâ é awui ayàm jowò hkangmó má jam shoq, Yhâng é hkyô lé taí pyo hù ló bùm bekô nghut ri.

Yesuq Nòhpyo Lhoq Gê Byí É Hkyô

Mht 8:14-17; Mrk 1:29-34

³⁸ Yesuq gi, haú tarajong mai toq ló mù, Simun é yhùm má wang ló ri. Simun é yhâng-aumó gi, ali gyai nyé no nyi é nghut mù luí, lhoq gê byí râ matú, Yesuq lé garúm dung byí akô. ³⁹ Yesuq gi, Simun é yhâng-aumó nàm má yap to mù, nòhpyo haú lé tân kat jáng, Simun é yhâng-aumó gi, ge ló byuq bê; haú hkûn jáng, yhang gi, toq mù, yhangmoq lé gaí tso gaí huq bê nghut ri.

⁴⁰ Bui wang ló jáng, nòhpyo hui bang eq awáng nòhpyo ajung jung dap é bang lhunglháng lé, Yesuq chyáng shuí lé lô kômù, yhangmoq rayuq htâng rayuq é ahtoq má Yesuq gi, loq ke byi luí, lhoq gê byí ri. ⁴¹ Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó taí loshoq, Yesuq tân pyâm ri.

⁴² Maubó lô jáng, Yesuq gi, htoq ló mù, gaú é jowò yoso hkaú má é nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai

† 4:23 Chi sará ê, yhumsing gùng lé lhoq ge yù aq gâ é sanghkyang gi, "Mesaia nghut le gi, mauhpo mù wó tûn shit râ nghut lhê." gâ é nghut lhê.

a ló byuq râ matú châng hkûm wú akô.
⁴³ Nghut kôlhang, Yesuq gi, "Garai Gasâng é mingdán é gabú danglù lé, gó wâ pé má le ngò hko kyo râ râ ashí, haú é matú, Garai Gasang gi, ngo lé nhang kat bê nghut lhê." ga luí, yhangmoq lé taí ri. ⁴⁴ Haú mù, Yesuq gi, Yuda mau mâ é tarajong pé má, hko kyô wún nyi ri.

5

Sâng-hi Ji Yù Huí É Chángzô Pé

Mht 4:18-22; Mrk 1:16-20

¹ Radàm má lé, Yesuq gi, Genesarat nhông yàm má yap tô le, Garai Gasâng é mungdang gyo râ ga, shiwa byu pé, Yhâng chyáng chyín chyap wang lé lô kô é hkûn, ² nhông gin-gau yàm má lhaí razúm joq tô é lé, Yhang myang kat ri. Ngogûn dú bang kúm gi, lhaí mai htoq mù, yhangmoq é gùn pé lé chí nyi akô. ³ Yesuq gi, Simûn é lhaí má wàng mù gin-gau mai rachyit lhoq kang nhâng luí, haú lhaí htoq má zung to mù, shiwa byu pé lé mhoqshit taí kyô nyi ri.

⁴ Dang ban taí jáng, Yesuq gi, Simun lé, "Wuì nik é shut hui luí, ngozo wó kông yù râ matú, nungmoq é gùn pé lé dú hkyô kat keq." ga taí ri.

⁵ Simun gi, "Yhumsîng ê, ngamoq amàn ra-myin mau shikut wú kôlhang, haí le a wó; nghut kôlhang, náng dang é yanmai, ngò gùn dú hkyô kat râ nghut lhê." ga tû taí ri.

⁶ Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq ló râ su dut é yanmai, ⁷ lhaí gó lhum mâ é luzúm wuì lé, lé garúm yù râ matú loq lik lik kat kôjáng, haú bang lé lô mù, haú lhaí í lhum aluq myup ló shoq ngozo lé kat pyíng bekô.

⁸ Simun Petruq gi, haú lé myàng jáng, Yesuq é hkyî wang má hkyihput htuq mù, "Yhumsîng ê, ngá chyáng mai ló byuq aq, haí mù gâ le, ngò gi, yubak dap é byù nghut nyi lhê." ga taí ri. ⁹ Haí mù luí gâ le, Simun le, yhang eq nyi tô é lhunglhang bang le, haú su ngozo wó yu é yanmai, maú nyi bùm kômù nghut ri. ¹⁰ Simûn é luzúm nhik, Zebedi é yhangzo Yakuq eq Yohan le, haú su chôm maú byuq akô.

Hau htâng, Yesuq gi, "Hkâgyuq, ahkuí mai nàng gi, byù lé châng kóng sù dut râ nghut lhê." ga luí, Simun lé taí ri.

¹¹ Yhangmoq gi, wuiyàm má jé jáng, lhaí pé eq yhangmoq é zè banshoq lé tô pyâm to luí, Yesuq htâng châng bekô nghut ri.

Manggâm Dap Bang Lé Yesuq Lhoq Gê Byî É Hkyô

Mht 8:1-4; Mrk 1:40-45

¹² Radàm lé, Yesuq gi, wà rawà má nyi tô lé, ragùngdû é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuq luí, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga dúng wut ri.

¹³ Yesuq gi, loq lham kat mù, haú yuq lé é záng luí, "Ngò dóng lhê, sân-yúng aq hkoí." ga taí ri; haú hkûn jáng, haú yuq é manggâm gi, ge byuq bê nghut ri.

¹⁴ Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tûn shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé taí hkûm kat ri.

¹⁵ Nghut kôlhang, Yesuq é hkyô gi, je riyhang taí pyo hû jam ló mù luí, shiwa byù rajùm rayò gi, Yhâng é dang gyo râ matú le, yhangmoq é nòhpyo lhoq gê byí nhâng râ matú le, lé zup míng tô akô. ¹⁶ Yesuq kúm gi, Yhang baú tsik za yoso shut htoq ê mù, kyû ê dung dung kut ri.

Gùngjum Shí Sù Lé, Yesuq Lhoq Gê Byî É Hkyô

Mht 9:1-8; Mrk 2:1-12

¹⁷ Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap hkangmó mâ é bang eq Yuda mau, Yerusalem wà mó mâ é bang nghut akô. Yhumsîng Garaí é wum-o a-tsam le nòhpyo lhoq gê râ matú Yesuq eq rahá nghut nyi ri. ¹⁸ Haú hkûn, byù ra-am gi, gùngjum shí sù rayuq lé taphkang mai waq lé lô kômù, haú yuq lé, yhúmhaú má nyi tô é Yesuq é hí má, wó lhez byi shoq ga hkyô ho nyi akô. ¹⁹ Byù lûm myô chyín chyap to mù, haú nò sù lé hká dông le a wó shuí wàng kôluí, haú yhumhkûng htoq shut waq doq ló mù, haú yuq lé taphkang eq roq, shiwa hpong gung gûng, Yesuq é hí ang ang má hkyô hang kat akô.

²⁰ Yesuq gi, yhangmoq é lumjínq myit lé byu myàng jáng, "Byù nàng ê! Náng é yubak mara lé hkyut pyám byi bê." ga taí ri.

²¹ Haú hkûn, Hparishe pé eq tarâ sará pé gi, "Shí su ga luí, Garai Gasang lé rhoí dang taí é sù gi, ó yuq wá nghut lhê lhú? Garai Gasang za a nghut jáng, yubak mara wó hkyut pyám byi sù gi, ó yuq wá nghut lhê lhú?" ga luí, myit són wuî nyi bum akô.

²² Yesuq gi, yhangmoq myit són wuî nyi é hkyô lé sé mù, "Nungmoq é i-myt hkaú má, haí mù shí pé lé myit són wuî nyi akô lhú? ²³ 'Náng é yubak mara lé hkyut pyám byi bê.' nghú taí râ eq, 'Toq luí, hkyô so aq.' nghú taí râ má, hká hkun je taí lui lhê lhú? ²⁴ Nghut kôlhang, haú Byu Yhangzo* gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga mù, haú gùngjum shí sù lé, "Ngò, nàng lé taí bá, toq aq, náng é taphkang yu chùng luí, yhûm taú ló aq hkoi." ga taí ri. ²⁵ Haú hkûn jáng, yhang gi, yhangmoq é hí má toq yap mù, yhâng é taphkang waq chùng luí, yhâng é yhûm shut Garai Gasang lé hkya-on kungtôn uchyang ló byuq bê. ²⁶ Byù banshoq bang gi, gyai maú byuq kômù luí, Garai Gasang lé hkya-on kungton akô nghut ri. Yhangmoq gyai gyuq maú dik é èq le, "Hkû-nyí, nga-nhúng, mauhpo amú pé lé myàng bê." ga taí nyi akô.

Yesuq Gi, Lewiq É Yhûm Má Yubak Dap Bang Eq Rahá Zo Shuq É Hkyô

Mht 9:9-13; Mrk 2:13-17

²⁷ Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé ê myàng mù, haú yuq lé, "Ngá htâng cháng aq." ga taí ri. ²⁸ Lewiq gi, haú má é zè banshoq lé tô pyâm to mù, toq luí, Yhâng htâng cháng bê nghut ri.

²⁹ Hau htâng, Lewiq gi, yhâng é yhûm má Yesuq é matú zoshuq poí mó kut byí ri; poí haú má kang guq bang myo myo eq byù góbang le, yhangmoq eq rahá za zô zung nyi bum akô. ³⁰ Haú mù luí, Hparishe pé eq yhangmoq hpúng má é tarâ sará pé kúm gi, "Nungmoq gi, haí mù luí kang guq bang eq yubak dap bang eq rahá zo shuq nyi akô

lhú?" ga, Yhâng é chángzô pé lé mara hûn dang taí akô.

³¹ Yesuq gi, yhangmoq lé, "Wángzán bang chi sará a ra kó, nõhpyo hui bang za sheq ru râ lhê. ³² Ngò gi, ðingmán bang lé wut yù râ matú jé lé é a nghut, yubak dap bang myit lhîng râ matú sheq jé lé é ru nghut lhê." ga tû taí ri.

Zoshuq Gám Hkyô Eq Séng Luí, Yesuq Taí É Hkyô

Mht 9:14-17; Mrk 2:18-22

³³ Dum, yhangmoq gi, "Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haú su kut akô; nghut kôlhang, náng é chángzô pé gi, haí mù zô nyi shuq nyi akô lhú?" ga Yesuq lé taí akô.

³⁴ Yesuq, yhangmoq lé tû taí é gi, "Bíng pé gi, lusik eq rahá nghut nyi to ashî hkûn, yhangmoq lé zo shuq wó gám nhâng râ lhú? ³⁵ Nghut kôlhang, lusik† lé yhangmoq chyáng mai shuî yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê." gâ ri.

³⁶ Dangtú ðong mai le, Yesuq, yhangmoq lé taí é gi, "Mebu sik mâ é lãng cheq yû mù, mebu xau má hpo é gi, ó a kut wú kó; haú su kut é nghut jáng, mebu sik lé le lãng cheq pyâm é dut mù, pán jap sik le mebu xau eq du lhum râ a nghut. ³⁷ Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng mù, tsibiyiq wing le yui shun byuq, htûng le htên byuq, dut râ nghut lhê. ³⁸ Haú su a dut shoq gi, tsibiyiq wing asik lé, shokuq htûng asik má kat ra râ nghut lhê. ³⁹ Tsibiyiq wing axau shuq nyí bê sù gi, asik lé a shuq naú nghut râ; hkâsu mù gâ le, 'Axau sheq je nghâm ri.' ga taí râ." gâ ri.

6

Bánno Buinyi Má, Yesuq É Chángzô Pé Kyôshi Shap Zô É Hkyô

Mht 12:1-8; Mrk 2:23-28

¹ Bánno buinyi ra-nyí má, Yesuq gi, Yhâng é chángzô pé eq yò hkaú mai sô laí ló é hkûn, Yhâng é chángzô pé gi, kyôshi ratsuí langshap yû mù, loq èq nè hpuq

* 5:24 Byu Yhangzo gâ é gi, Yesuq Yhânggùng yhang lé le taí e nghut lhê, Mesaia lé le taí é nghut lhê. † 5:35 Lusik gâ é gi, Yesuq lé taí nau é nghut lhê.

zô akô. ² Haû mù luí, Hparishe pé ra-am gi, "Bánno buinyi má a ge kut jung lé, nungmoq gi, haû mù luí haû su kut akô lhú?" ga taí akô.

³ Yesuq gi, yhangmoq lé, "Dawiq lháng gi, yhang htâng châng é bang eq rahá zòmut huí é hkûn, hkâsu kut é hkyô lé, nungmoq a nghap wú kó lhú? ⁴ Dawiq gi, Garai Gasâng é yhûm* hkaû má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhang htâng châng é bang lé le, byi tsô é a nghut kó lhú?" ga tû taí ri. ⁵ Hau htâng, Yhang gi, "Haû Byu Yhangzo gi, haû Bánno buinyi é Yhumsîng nghut lhê." ga yhangmoq lé taí ri.

Loq Jum Shî Sû Lé Yesuq Lhoq Gê Byî É Hkyô Mht 12:9-14; Mrk 3:1-6

⁶ Gotû Bánno buinyi má le, Yesuq gi, tara-jong má wàng mù mhoqshit nyi é hkûn, loqyo loq ajum shi byuq é byù rayuq haú má nyi tô ri. ⁷ Haú hkûn, tarâ sará pé eq Hparishe pé gi, Bánno buinyi má nòhpyo lhoq gê byi râ lhú ga luí, Yhang lé mara wó hûn shoq ga gyám wú nyi akô. ⁸ Yesuq kúm gi, yhangmoq é i-myt lé sé sù nghut luí, loq jum shî sù lé, "Toq mù, banshoq bâng é hí má, yap shit aq." ga taí kat ri. Haú yuq le, toq mù yap tô ri.

⁹ Haú hkûn, Yesuq gi, "Ngò nungmoq lé myî wú kôlé, Bánno buinyi má, ge é muzó kut râ, a ge é muzó kut râ, byù asak hkyî râ eq lhoq hten râ pé má hká lhum kut le sheq tarâ wang lhê lhú?" ga luí, yhangmoq lé taí ri.

¹⁰ Hau htâng má, yhangmoq banshoq lé lhing wú mù, haû loq jum shî sù lé "Náng é loq nyhang kat aq." ga taí kat é hkûn lé, yhang le loq nyhang kat luí, yhang é loq gi, shoq za ge byuq bê nghut ri. ¹¹ Nghut kôlhang, yhangmoq gi, myoq chum nhô chik yhang nhik-yo naú kômù luí, "Yesuq lé hkâsu wá kut pyám râ lhú?" ga luí, rayuq eq rayuq taí lhûm nyi akô.

Raxe Í Yuq Lé Lagyo Ga Myhîng Yu É Hkyô Mht 10:1-4; Mrk 3:13-19

¹² Haû yoq ra-nyí má, Yesuq gi, kyûdung râ ga bùm shut htoq e ló luí, ra-myin mau Garai Gasang lé kyûdung nyi ri. ¹³ Maubó

jáng Yhâng é chángzô pé lé wut yù mù, yhangmoq chyáng mâ é raxe í yuq lé hkyin yù luí, lagyô pé ga myhîng to byî ri. ¹⁴ Haú bang gi, Yesuq èq Petruq ga mying myhîng byî é Simun eq, yhanggu Andre, Yakuq eq Yohan, Hpilip eq Barhtolume, ¹⁵ Mahte eq Htomaq, Alhpe é yhangzo Yakuq eq Zelutuq† dut é Simun, ¹⁶ Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

Hkungsô Wó É Hkyô Eq Dingnyé Wó É Hkyô Mht 4:23-25; 5:1-12

¹⁷ Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wà mó mâ é bang, wuîshuq lung-aû ayàm mâ é Turuq myuq eq Sidun myuq mâ é bang, rajùm rayò gi, ¹⁸ Yhâng é dang gyô yù râ eq yhangmoq é nòhpyo lhoq gê nhâng râ matú, rahá za zup míng tô akô. Agè ashop é nat èq zing-ri huí é bang le ge byuq akô. ¹⁹ Yhâng é gùng mai htoq é wum-ô èq byù banshoq lé lhoq gê byî nyi é yanmai shiwa byu pé le Yhang lé wó záng shoq ga, ho nyi akô.

²⁰ Haú hkûn, Yesuq gi, Yhâng é chángzô pé lé wú kat luí taí é gi,

"Myùng bang nungmoq gi, hkungsô wó nyi ri, hkâsu mù gà le, Garai Gasâng é mingdán‡ gi, nungmoq é mingdán nghut nyi ri.

²¹ Ahkuí, zòmut wuîshit huí nyi é bang nungmoq gi, hkungsô wó nyi ri, hkâsu mù gà le, nungmoq nhik dik shoq myàng zo kó râ nghut lhê.

Ahkuí, ngau nyi bang nungmoq gi, hkungsô wó nyi ri, hkâsu mù gà le, nungmoq myang wuì kó râ nghut lhê.

²² Haû Byu Yhangzô é yanmai nungmoq lé su èq a nguì é, lhoq hpyoq lhoq kâng é, hoq hpu nhang é, agè ashop nghut é dong jihpoi gamhkuì huí é hkûn, nungmoq gi, hkungsô wó nyi ri.

²³ Haú hkûn lé, gabú byam chyû nyi keq, hkâsu mù gà le, wú keq, nungmoq é matú kô é chyunghuq gi, mauhkûng mingdán

* 6:4 Garai Gasâng é yhûm nghu é gi, Yerusalem wà mó má joq é saksé zúm lé gà é nghut lhê. † 6:15 Zelutuq gà é lichyúm gi, yhumsîng zui saí é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gà lhê. ‡ 6:20 Garai Gasâng é mingdán gà é gi, Garai Gasang up é lé gà lhê.

má joq tô ri. Ngò, nungmoq lé taí lhê, hkâsu mù gâ le, yhangmoq é îchyi îwa pé le myiqhtoí pé[§] lé haû su kut wú bekô."

²⁴ Nghut kôlhang, sùt wó bang nungmoq gi, dingnyé wó râ, hkâsu mù gâ le, nungmoq gi, yhumsing gùng má nhik shî nhik dik é hkyô lé huí yù bekô.

²⁵ Ahkuî, gyi gyi dau dau myàng zo myàng shuq nyi é bang nungmoq gi, dingnyé wó râ, hkâsu mù gâ le, nungmoq zòmút wuîshit é hui kó râ nghut lhê.

Ahkuî, wui nyi é bang nungmoq gi, dingnyé wó râ, hkâsu mù gâ le, iyon yôn é eq ngaubyi ngau-nhap htoq é hui kó râ nghut lhê.

²⁶ Byù banshoq bang, nungmoq lé ge é byù ga kôjáng, nungmoq gi, dingnyé wó râ, hkâsu mù gâ le, yhangmoq é îchyi îwâ pé le, myiqhtoi pyoq pé* lé, haû su ga taí wú bekô.

Gye Pé Lé Chyitdap Râ Hkyô

Mht 5:38-48; 7:12

²⁷ Hau htoq agó, ngá dang gyô nyi bang nungmoq lé ngò taí kôlé, nungmoq é gye pé lé chyitdap nyi keq; nungmoq lé a naù a wôm é bang lé ge é hkyô kut keq; ²⁸ nungmoq lé nhîng é bang lé, shimân byi keq; nungmoq lé rhoi é bang lé kyûdung byi keq. ²⁹ Nang lé bo-pyuq rahkyam shut pyuq byi sù lé, rahkyam dum hkâm byi shi aq; náng bumó hkyut yu é sù lé, buzo le dum hkyut byi shi aq; ³⁰ nang lé rajung jung dúng é sù lé le, byi pyám aq; náng zè yu pyám byi é su chyáng mai le, hkâdúng yù lo. ³¹ Nungmoq ô nau é dông supé lé kut nhâng nau é su, yhangmoq lé le kut byi keq.

³² Nungmoq lé chyitdap é bang lé za chyitdap kô le gi, nungmoq é matú hai akyû bò kó râ lhú? Yubak dap bang le, yhumsing lé chyitdap é bang lé gi, chyitdap nyi akô. ³³ Nungmoq lé ge é dông kut nyi é bang lé za, ge é dông kut nyi kô le gi, nungmoq é matú hai akyû bò kó râ lhú? Yubak dap bang le haû su kut nyi akô. ³⁴ Supé lé zè chyí byi le, dum wó tau byi râ su dut é bang lé za, chyí

byi le gi, nungmoq é matú hai akyû bò kó râ lhú? Yubak dap bang lháng chyí byi é myhó dum wó yù shoq, yubak dap é bang lé chyí byi akô. ³⁵ Nghut kôlhang, nungmoq gi, nungmoq é gye pé lé chyitdap mù, ge é dông kut byi nyi keq. Dum wó taù yù râ lé myoq a byu é za, chyí ngho byi keq; haû su kut jáng, nungmoq wó é chyunghuq kô râ eq, Myhang htáng htúm Su é yhangzô pé dut râ nghut lhê; hkâsu mù gâ le, Yhang gi, jeju a dat bun bang eq agè ashop é bang lé ge é kut nyi ri. ³⁶ Nungmoq é Îwa Garai Gasang shogyo nhikmyin sê é su, nungmoq le shogyo nhikmyin nyi keq.

A Jéyáng Râ Hkyô

Mht 7:1-5

³⁷ A jéyáng é za nyi keq; haû jáng, nungmoq le jéyáng é a hui kó râ nghut lhê. A doqdân é za nyi keq; haû jáng, nungmoq le doqdân é a hui kó râ nghut lhê. Mara hkyut byi keq; haû jáng, nungmoq le mara hkyut byi é hui kó râ nghut lhê. ³⁸ Byi keq, haû jáng, nungmoq le dum byi é hui kó râ nghut lhê. Mán é búng mai byíng mui shûn shoq nhûn chyíng, dùn chyíng kat mù, nungmoq é tanghkoí hkaû má lik kat byi é hui kó râ. Hkâsu mù gâ le, nungmoq lik byi é bung èq, nungmoq lé dum lik byi râ nghut lhê." gâ ri.

³⁹ Hau htoq agó, Yhang dangtú ralhum dông yhangmoq lé dum taí é gi, "Myoqjit sù gi, myoqjit sù lé hkyô wó tûn shit lhê lhú? Yhangnhik í yuq é donghkong má byit gyó kó râ nghut lhê, a nghut kó lhú? ⁴⁰ Jongzo gi, sará htoq gyaù râ a nghut; nghut kôlhang, gúm shoq mhoq yù bê sù ó nghut kôlhang, yhumsing é sará su dut râ nghut lhê.

⁴¹ Yhumsing myoq hkaû má lúng tô é siktúm† lé lháng a myit wú é nhîng, haî mù luí, nunggu nungmâng é myoqwàng‡ lé myang lhê lhú? ⁴² Yhumsing é myoq má lúng tô é siktúm lé lháng a myàng sù nhîng, 'Gumang hpó ê, náng myoq má lúng tô é myoqwàng lé, ngò choq pyám byi lé.' nghu luí, náng é gumang hpó lé hkâsu wó taí râ lhú? Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmang é myoq

§ 6:23 Myiqhtoí pé le zing-ri huí é yanmai, yhangmoq chyunghuq wó nyi akô. Haû eq rajung za, jamjau huí é bang nga-nhúng le chyunghuq wó râ nghut lhê. * 6:26 Myiqhtoi pyoq pé gi, Garai Gasang jéyáng é hui râ. † 6:41 Siktúm nghu e gi, yubak mara kô é lé taí lhê. ‡ 6:41 Myoqwàng nghu e gi, yubak mara atiq azo lé taí é nghut lhê.

má wang tô é myoqwàng lé choq pyám byi râ matú, nàng san za myàng râ nghut lhê.

Agàm Eq Ashi

Mht 7:17-20; 12:34-35

⁴³ A ge é ashi zuí é, ge é shigâm hkâmá le a joq. Ge é ashi zuí é, a ge é shigâm le a joq. ⁴⁴ Haú mù luí, shigâm hkangmó lé, zuí é ashi lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zugyóm mai le tsibiyiq shi a wó hpyoq yu wú. ⁴⁵ Ge é sù gi, yhumsing é i-myt unghkaû mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myt unghkaû mâ é agè ashop é sutdò mai, agè ashop é zè pé lé lhoq htoq shit lhê. Haí mù gà le, yhâng é i-myt unghkaû má byíng mui tô é lé za, yhâng é nhut mai taí htoq lo é nghut lhê.

Luqhtân Htoq Má Yhûm Saí Sù Eq Myì Chîn Dum Má Yhûm Saí Su É Hkyô

Mht 7:24-27

⁴⁶ Ngò taí é eq rajung za lhang a wó châng kut kô é nhîng, haí mù luí, nungmoq Ngo lé 'Yhumsîng ê, Yhumsîng ê.' nghu nyi akô lhu? ⁴⁷ Ngá chyáng lé mù, ngá dang gyô yù luí, châng kut é sù ó nghut kôle, hkasû é sù eq wuí é lé ngò nungmoq lé shit kyo kôle. ⁴⁸ Haú yuq gi, wahpang yhûm saí le, nik nik du luí a dui é lunghtân htoq má apûn awang hi é sù eq wuí lhê. Wuì jê lò luí wuibaù pê èq yhûm haú lé lo gùn kôlhang, ging ging tíng tíng saí to bê nghut luí, haú lé a wó gun nhún. ⁴⁹ Ngá dang gyô yù mù, a châng sù gi, apûn awang a saí é za myì chîn dum má wahpang yhûm saí sù eq wuí nyi ri. Wuìbaù pê èq yhûm haú lé lo gun kat é eq, haú hkûn jáng, lêng gyop byuq ri. Yhûm haú byoq hten byuq é gi, yù whuí a bò loshoq dut byuq râ nghut lhê." gâ ri.

7

Romaq Gyezau Rayuq É Lumjîng Myit

Mht 8:5-13; Yhn 4:43-54

¹ Yesuq gi, shiwa byu pé lé ban mhooqshit é htâng má, Kaperna-um wà shut wang ló ri. ² Haú hkûn, Romaq gyezau rayuq é chyitdap dui-nhâng zoshâng gi, shî-nò no nyi ri. ³ Haú u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi râ matú, Yesuq lé ê ji lò keq ga, Yudaq suwún wuí lé nhang kat ri.

⁴ Haú bang gi, Yesuq chyáng jé ê kô é hkûn, "Yhang gi, nàng shí hkyô kut byi râ matú gingdán é sù, yhang nghut nyi ri; ⁵ hkâsu mù gà le, yhang gi, nga-nhûng amyû lé chyitdap é eq, ngamoq matú tarajong le kut byi sù nghut ri." ga luí, Yhang lé zuq zuq dúng wut nyi akô. ⁶ Haú mù luí, Yesuq gi, yhangmoq eq rahá za e ló ri.

Haú yhûm eq hká hé a wê é má jé jáng, Romaq gyezau hpó, yhâng é luzúm wuí lé taí nhang kat é gi, "Yhumsîng Yesuq ê, náng gûng lé hkâlhoq hkyik lo. Nàng, ngá é laishîn-htâng má, lé nang râ lhang ngò má a gingdán. ⁷ Haú mù, ngò, náng chyáng jé lé râ matú gingdán é sù a nghut; Nàng, dang rahkun za taí kat laq, haú hkûn, ngá é dui-nhâng zoshâng ge ló râ nghut lhê. ⁸ Hkâsu mù gà le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jûn lé le, 'Shî kut aq!' nghu le, yhang kut lhê." gâ ri.

⁹ Yesuq gi, dang haú lé wó gyo jáng, haú yuq é hkyô lé maú byuq luí, Yhang htâng châng é shiwa byu pé lé lhing wú mù, "Ngò, nungmoq lé taí kôlé, Israelaq amyû má lhang, shî í lumjîng é sù lé, Ngò a myang wú." ga taí ri. ¹⁰ Nhang kat é bang yhûm má dum taú jé jáng, no nyi é dui-nhâng zoshâng gi, ge to lánng é lé ló myang akô.

Shî Sù Lé Dum Lhoq Tui É Hkyô

¹¹ Hau htâng hkâ-myhâng a myáng má, Yesuq gi, Yhâng é chángzô pé eq, shiwa byu moq mó le mù rahá za Na-in gâ é wà shut e ló akô. ¹² Haú wà wàng hkum má jé lo é hkûn lé, chuimó myhí é yuqzo te gi, shî mù, yhâng é mâng lé waq htoq lé lo akô. Wà byu myo myo le, chuimó myhí haú eq rahá châng lé lo akô. ¹³ Yhumsîng gi, haú chuimó myhí lé myàng jáng, yhang lé wú shogyo luí, "Hkâ-ngaú." ga taí ri.

¹⁴ Yesuq gi, gung shut huí ê mù, loq eq é záng kat ri. Haú hkûn, waq tô é bang le jáng yap to byi akô. Yhang gi, "Zorâm ê, ngò, nang lé taí lhê, toq aq." ga taí ri. ¹⁵ Haú hkûn, shî bê sù gi, toq zûng mù dang taí lo ri. Yesuq gi, zorâm haú lé yhângnû chyáng dum ap byi ri.

¹⁶ Byù lunglhang bang gyuq maú bùm kôluí, Garai Gasang lé hkya-ôn é dang gi,

"Myiqhtoi mó, nga-nhung chyáng lé pò htoq bê nghut ri. Garai Gasang gi, Yhâng é amyû lé garúm râ ga lé kûm wú nyi ri." ga taí nyi akô. ¹⁷Haû Yesuq é hkyô eq sêng é ludang lé, Yuda mau eq haû mau awui ayàm jowò hkangmó má taí pyo myhîn lô bum akô.

Yesuq Eq Wui-myhup Sará Yohan É Hkyô Mht 11:1-19

¹⁸Haû hkûn, wui-myhup sará Yohan é chángzô pé gi, haû hkyô banshoq yhang lé lo taí kyô akô. ¹⁹Haû mù luí, Yohan gi, yhâng é chángzo í yuq lé ji yù mù, haû Yhumsing chyáng nhang kat luí, "Nàng gi, haû jé lé lô râ Sû nghut lhê lú? Haû a nghut jáng, ngamoq, góyuq lé láng ra shirâ lú?" ga, myí nhang kat ri.

²⁰Haû nhik gi, Yesuq chyáng jé jáng, "Nàng gi, haû jé lé lô râ sù nghut lhê lú? Haû a nghut jáng, ngamoq góyuq lé myoqbyu láng nyí ra shirâ lú?" ga luí, Wui-myhup Sará Yohan gi, ngá-nhik lé náng chyáng myí nhang kat ri." ga taí akô.

²¹Haû u yhang, Yesuq gi, nò zo hpyo zo, nolì nojàng huí é bang eq agè ashop é nat dap jun dap é byù myo myo lé, lhoq gê byí ri. Myoqjit bang myo myo lé le, myoq dum myàng nhang ri. ²²Haû hkûn, Yesuq gi, yhangnhik lé, "Myàng mi-myàng, wó gyo má wó gyo, Yohan lé lô taí kyo keq; myoqjit bang, myoq wó myàng bekô; hkyî hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyí bê nghut lhê. ²³Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

²⁴Yohan é chángzô nhik lô byuq é htâng má, Yesuq gi, Yohan eq séng luí, byù moq mó lé taí é gi, "Nungmoq gi, haí lé hpuq wú râ matú, haû yoso shut e akô lú? Lai èq hik nhùn é jamgàm lé wú râ matú nghut akô lú? ²⁵Haû a nghut jáng, haí lé wú râ matú e akô lú? Nú-nhâm é mebu wut sù lé wú râ matú e akô lú? A nghut! Wú keq, gyai hpaû é mebu wut luí agùn agó wó bang gi, hkohkâm-wâng pé má sheq ru nyi lhê. ²⁶Haû nghut le gi, haí lé wú râ matú ê kô

é lú? Myiqhtoi rayuq lé lú? Haû kúm nghut ri. Ngò, nungmoq lé taí kôlé, Yohan gi, myiqhtoí htoq lhang gyaú sù nghut lhê. ²⁷Haû yuq é hkyô lé, Chyúmdang má kâ tô é gi,

'Wú aq, Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê.'[☆]

gâ ri. ²⁸Ngò, nungmoq lé taí kôlé, myiwe wui mai hku kat é bang má, Yohan htoq je kô é rayuq lhang a nyí, nghut kôlhang, Garai Gasâng é mingdán má je tiq dik sù gi, Yohan htoq je kô lhê." gâ ri.

²⁹Mingbyû lhunglhang bang eq kang guq bang gi, dang haû pé lé wó gyo kôjáng, Yohan byí é baptisma lé hkâm yù kô é nghut mù luí, Garai Gasâng é dingmán é hkyô lé sê gyô yu akô. ³⁰Hparishe pé eq tarâ sará pé kúm gi, Yohan byí é baptisma a hkâm yù kô mù luí, Garai Gasang hen lajang é hkyô lé yhumsing gung é matú he-ngik pyâm akô.

³¹Yesuq dum taí é gi, "Haû mù luí, byù myû shí lé, Ngò, hai èq taí kê wú râ lú? Yhangmoq hai eq wuí akô lú?"

³²Yhangmoq gi,

'Nungmoq é matú, ngamoq sampyí mut byi kôlhang, nungmoq gi, a gó kó, ngamoq ngaù hkyangsâng kôlhang, nungmoq gi, a ngaù kó.'

ga luí, gài pé má zùng uchyang rayuq eq rayuq wut taí lhùm nyi é zoshâng wui eq wuí akô. ³³Hkâsu mù gâ le, Wui-myhup Sará Yohan jé lé luí, muk a zo, tsibiyiq a shuq é nyi le le, 'Yhang gi, nat gang dap sù nghut ri.' ga luí, nungmoq taí akô.

³⁴Haû Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. ³⁵Nghut kôlhang, hpaqchyí byéng-yá é yhangzô pé gi, hpaqchyí byéng-yá tengmán é hkyô lé saksé hkâm byí nyi akô."^{*} gâ ri.

Yubak Dap É Myiwe Rayuq, Yesuq Lé Xû But Byí É Hkyô

³⁶Hparishe rayuq gi, Yesuq lé yhâng chyáng zang zo râ matú ji kat ri. Haû mù, Yesuq gi, haû Hparishe é yhùm má wàng

[☆] 7:27 Mál 3:1 ^{*} 7:35 Nghut kôlhang, Garai Gasâng é hpaqchyí byéng-yá lé lhom hap yu é banshoq bang gi, Garai Gasâng é hpaqchyí byéng-yá haû, tengmán ri ga saksé hkâm nyi akô.

luí zo râ matú zung tô ri. ³⁷ Haú hkûn, wú keq, haú wâ mâ é yubak dap é myiwe rayuq gi, Yesuq haú Hparishe é yhûm má zô zung tô é lé sé jáng, gyai hpau dap é namngón xû bo é luq hpyû bông yu lé luí, ³⁸ Yesuq é nunghtáng hkyî wàng má ngau yap to mù, Yhâng é hkyî má ngaubyî èq záng lhoq teq byi jáng, ûxam èq but sut pyám byî ri. Dum nghut jáng, nhut èq puq luí mura lé but byî ri.

³⁹ Yesuq lé ji é Hparishe wá gi, haú lé myàng jáng, "Shí yuq myiqhtoi nghut le gi, Yhang lé záng htûng é sù, ó yuq nghut é eq hkâsû é yubak dap é myiwe nghut é lé, Yhang sé râ nghut lhê." ga luí, yhâng é unghkaû má myit nyi ri.

⁴⁰ Yesuq gi, "Simun ê, Ngò, nang lé taí râ rajung joq ri." ga taí ri.

Simun le, "Sarâ ê, taí aq." ga taí kat ri.

⁴¹ Haú hkûn, Yesuq gi, "Ngùn chyí zo sù rayuq chyáng, chyín dap é byù í yuq nyi ri. Rayuq gi, denari† ngo shô chap, rayuq gi, ngo xê chap dap ri. ⁴² Haú nhik gi, chyín xap râ ngùn a wó kôluí, chyín yhumsîng gi, yhangnhik lé xap a ra lò gâ pyâm ri. Haú mù luí, haú nhik mâ é hká yuq gi, yhang lé je chyitdap râ lhú?" ga myî ri.

⁴³ Simun gi, "Je myo lhoq lhut hui sù, nghut râ su ngam ri." ga tû taí ri.

Yesuq gi, "Nàng myit e đông jô ri." ga taí ri.

⁴⁴ Haú hkûn, Yesuq, myiwe zo haú lé lhing wú luí, Simun lé, "Nàng myiwe zo shí lé myang lhê lhú? Ngò, nàng é yhûm má wang le, hkyî chi râ uchyam, nàng a byi, yhang kúm gi, ngaubyî èq ngá hkyî lé tik byi luí, yhâng é xam èq sut pyám byi bê.

⁴⁵ Nàng gi, ngo lé nhut èq a puq nghut ri; yhang kúm gi, ngò yhúmhaû má wang é mai ngá hkyî má a no loshoq puq nyi râ.

⁴⁶ Nàng gi, ngá ullum má xû a but byî wú, yhang kúm gi, ngá é hkyî má nàm ngón é mura but byi bê nghut ri. ⁴⁷ Haú su mù, ngò, nàng lé taí lé, haú myiwe gi, je chyitdap luí, yhang wó é yubak myo myo lé hkyut pyám byî é hui bê. Shau za mara hkyut pyám byî é hui sù gi, shau za chyitdap sù nghut ri." ga taí ri.

⁴⁸ Yesuq gi, myiwe haú lé le, "Ngò, nàng é yubak mara hkyut pyám byi bê." ga taí ri.

⁴⁹ Rahá zung tô é bang gi, "Yubak mara lháng wó hkyut pyám byi sù, shí yuq gi, ó wá nghut lhê lhú?" ga luí, myit nyi bum akô.

⁵⁰ Yesuq gi, "Náng é lumjîng myit èq nang lé hkyi yù bê, ngón za ló aq hkoi." ga luí, myiwe haú lé taí kat ri.

8

Yesuq Htâng Châng É Myiwe Wui

¹ Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglù lé taí kyo uchyang, Yhâng é lagyo raxe í yuq eq rahá za, rawa htâng rawà jé e ló ri. ² Hau htoq agó, nat gang dap é mai le, nõhpyo mai le Yesuq èq lhoq ge yu é myiwe wui, nat nyhit nat lhoq htoq pyám byi huí é, Magadalaq wà mâ é Mariq le, ³ Herut é ikun zum sù Kuza é yhumsîng myhí Yoanaq le, Susannaq le, gotû myiwe wui myo myo le, Yesuq eq rahá nghut akô. Haú bang gi, yhumsîng wó du é í Yesuq eq lagyo pé lé byi zo byi huq nyi akô.

Kyôshi Sân É Hkyô

Mht 13:1-23; Mrk 4:1-20

⁴ Wà hkang wà mó mâ é bang gi, Yesuq chyáng zup zîng lé lo bùm kômù shiwa byù moq mó zup míng tô é hkûn, Yesuq dangtú đông taí kyô é gi, ⁵ "Kyô hkyó sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu èq záng nâng pyeq pyâm lhê, maulat nghoq pê èq hte zo pyâm lhê dut ri. ⁶ Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akô. ⁷ Ra-am gi, zugyóm hkaû má gyó ang luí, zubyap eq rahá yuq htoq lô mù, wup pyâm é hui bê nghut ri. ⁸ Nghut kôlháng, ra-am gi, myihpún bo é jang má gyó ang mù, yuq kô lò jáng, rashô tú myô jat lo ri." ga taí ri.

Yhang haú su ga taí nyi é hkûn, "Gyô yù râ nohkyap dap sù gi, gyô yù sháng gaq!" ga le, htê mó èq taí kat ri.

⁹ Haú hkûn, Yhâng é chángzô pé gi, dangtú shí hai lichyúm nghut lhê lhú ga, Yhang lé myî akô. ¹⁰ Yhang gi, "Garai Gasâng é mingdán eq sêng é sê gyo wui é hkyô pé lé

† 7:41 Denari rachap gi, ra-nyí lhê é byù rayuq é zuihpau eq wuí ri. ✨ 8:10 Esai 6:9

sê gyo râ ahko ahkáng, nungmoq lé byî to bê. Nghut kôlhang, gôbâng matú gi, 'Wú to kôlhang, a myàng kó sháng, gyô nyî kôlhang, a sê gyo kó sháng.'[☆] nghû, ngò dangtú đông taî lhê.

¹¹ Ahkui lhê é dangtú shi é lichyúm gi, îsu nghut ri: kyôshi gi, Garai Gasâng é mungdang nghut nyi lhê. ¹² Hkyô má gyó âng é kyôshi gi, haî eq wuí lhê lú gâ le, haû mungdang lé byu pé wó gyô é htâng má, lumjîng é má le, hkyi yu é má le, a jé kó sháng gaq ga luî, yhangmoq é i-myt hkaû mai nat Tsadán èq mungdang haû lé, lé yu pyâm é hui bang eq wuí lhê. ¹³ Luqgok yò pé má gyó âng é kyôshi gi, haî eq wuí lhê lú gâ le, haû mungdang lé wó gyo jáng, gabú myit èq hap yù kôlhang, amyit a wó chín mù, rayoq rabun za lumjîng luî, gunglau huî é nyî má, dum htak ló byuq é bang eq wuí lhê. ¹⁴ Zugyóm má gyó âng é kyôshi gi, haî eq wuí lhê lú gâ le, haû mungdang lé gyô yù luî, yhumsing é asak dui e ló é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luî, mo é ashi a zuî é bang eq wuí lhê. ¹⁵ Hpún bo é myigùn má gyó é kyôshi kúm gi, haî eq wuí lhê lú gâ le, haû mungdang lé lhumzui luî ge é i-myt èq ban gyô yù mù, ging tíng shoq zuî zìng luî, wó jân é i-myt èq ashi zuî é bang eq wuí lhê.

Myibung Htûn É Hkyô

Mrk 4:21-25

¹⁶ Myibung lé tap mù, aû èq nghop tô é le, yhupchong ô má tô tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. ¹⁷ Hkâsu mù gâ le, a htoqzê loshoq haq tô é zè haî le a joq, a sé a byông htoq loshoq wó zaú tô é zè le haî a joq nghut ri. ¹⁸ Haû mù luî, nungmoq hkâsu wó gyô yu é hkyô lé sidiq nyî keq, haî mù gâ le, wó to sù lé gi, jat byi shirâ, a wó su chyáng mai kúm gi, yhang wó to bûn é mâ é lé lhang, yu pyám byi shirâ nghut lhê." ga taî ri.

Yesuq É Yhângnu Eq Yhanggu Pé

Mht 12:46-50; Mrk 3:31-35

¹⁹ Haû hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lûm chyûn chyap to kômù, Yhâng chyáng a wó wang ê kó nghut ri.

²⁰ Haû hkûn, Yhang lé, "Náng nu eq nunggu pé gi, nang lé hui naû luî, shinggan má láng yap bum akô." ga taî kyo akô.

²¹ Yesuq gi, yhangmoq lé, "Garai Gasâng é mungdang lé gyô yù luî, châng é bang gi, Ngá nu eq Ngá gû pé nghut akô." ga luî, yhangmoq lé tû taî kat ri.

Laidun Mó Lé Yesuq Lhoq Zîm É Hkyô

Mht 8:23-27; Mrk 4:35-41

²² Ra-nyî lé, Yesuq gi, Yhâng é chángzô pé lé, "Nga-nhúng nhông he hpoq shut dap e ló sháng." ga taî luî, lhaî má wàng mù gû dap e ló akô. ²³ Yhangmoq gû dap e ló é hkûn lé, Yesuq gi, yhup myhî tô ri. Haû u lé, nhông haû má laidun mó lò luî, lhaî má wui byíng lô mù, yhangmoq myup shî râ su dut lò nyî bekô nghut ri.

²⁴ Haû mù, yhangmoq gi, Yesuq chyáng huî ê luî, Yhang lé nhaû pun mù, "Yhum-sîng ê, Yhumsîng ê, nga-nhúng myup ló nyi ri." ga taî akô.

Haû hkûn, Yhang toq luî, laidun eq wuîl-hêng pé lé tân kat jáng, haû pé gi, zim za dut ló byuq bê. ²⁵ Haû mù, Yesuq gi, "Nungmoq é lumjîng myit gi, hkâmá nghut akô lú?" ga luî, yhangmoq lé myî ri.

Yhangmoq kúm gi, gyuq maú byuq bùm kôluî, "Shí yuq gi, hkasû é byù nghut lhê là? Yhang hkunmó hkyó jáng, lài eq wuîlhêng pé lhang gyo byi ri-nhung!" ga luî, rayuq eq rayuq myî lhum bum akô nghut ri.

Nat Lé Hkat Htoq Byî É Hkyô

Mht 8:28-34; Mrk 5:1-20

²⁶ Hau htâng, yhangmoq gi, Galile mau tû tap mâ é Gerase byu pê é mau má jé dap e ló bekô. ²⁷ Yesuq kong shut doq ló le, haû wâ mâ é nat gang dap é sù rayuq gi, Yhang lé hui ri. Haû yuq gi, yhûm má le a nyi é za, mebu a dap é, lupdùng má myáng myáng nyi nyi sù nghut ri. ²⁸ Haû yuq gi, Yesuq lé myàng jáng, wut garu luî, yhâng é hkyî wang má paî gop to mù, "Myhang htâng é Garai Yhangzo Yesuq ê, Nang gi, ngò eq haî séng lhê lú? Ngo lé a zing-ri râ matú, ngò nang lé dúng nyi lhê." ga luî, htê mó èq taî garu nyi ri. ²⁹ Hkâsu mù gâ le, Yesuq gi, agè ashop é nat lé haû yuq gùng mai htoq ló râ matú, tân pyâm é yanmai nghut ri. Byù haû yuq lé nat gâng èq adàm dàm wang júng hkangmó, loq eq hkyî má toqjâng tuî èq tuî

shung, kyum xâng tô é eq, zúng tô é nghut kôlhang, lêng hpyit pyám pyám kut é htoq ago, nat gâng eq yhang lé yoso hkaû shut lêngmhap yù yù kut nyi ri.

³⁰ Yesuq gi, yhang lé, "Náng myíng haî gâ lhê?" ga myî kat é hkûn, yhang gi, "Legio* gâ lhê." ga tû taî ri. Haî mù gâ le, yhang chyáng nat gang myo myo wang lúng tô é yanmai nghut ri. ³¹ Nat jùm gi, yhangmoq lé nik dik htûm é Lasang-dong shut a kôn kat râ matú, Yesuq lé chôm dúng nyi bum akô.

³² Haú u lé, waq rajùm mó gi, bùm yàm má dû but zô nyi bum akô nghut ri. Haú mù, yhangmoq gi, waq pê chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi kat ri. ³³ Haú mù luí, nat gang jùm gi, byù haú yuq chyáng mai htoq ló kôluí, waq pê chyáng wàng byuq bekô nghut ri. Haú hkûn, waq haú jùm gi, gampyoq mai nhông hkaû shut rut din yán wang ló kôluí, myup shi byuq bekô nghut ri.

³⁴ Waq zúng bang gi, haú su dut é lé myàng jáng, hfang din ló kômù, myuq hkaû mâ é bang eq awui ayàm mâ é bang lé ló taî kyô akô nghut ri. ³⁵ Haú mù, wó gyô é bang gi, haú hkyô lé wú râ matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyî wang má mebu wut to luí, byù gè rayuq su zúng to lánng é lé myàng kômù, gyuq dan bùm bekô nghut ri. ³⁶ Nat dap sù lé hkâsu kut luí lhoq ge yu é hkyô lé myang é bang gi, góbang lé taî kyô akô nghut ri.

³⁷ Haú hkûn, Gerase byu pê é mau mâ é lhunglhâng bang gi, gyuq dan dik kôluí, Yesuq lé yhangmoq é mau mai htoq ló byuq râ matú, chôm dúng tôngbán akô. Haú mù luí, Yesuq gi, taú ló byuq râ matú lhaî má wàng bê nghut ri.

³⁸ Nat htoq byuq huí é sù gi, Yesuq htâng cháng râ matú, Yesuq lé dúng tôngbán ri.

³⁹ Nghut kôlhang, Yesuq gi, "Nàng, yhûm shut sheq ló mù, Garai Gasang, nang lé hkâ-í kut byi bê hkyô lé, ló taî kyo aq." ga luí, yhang lé ló nhâng bê nghut ri. Haú hkûn, yhang htoq ló mù, Yesuq yhang lé hkâ-í kut

byi bê hkyô lé, haú wà rawà bang lé ló taî kyô ri.

Ya-iruaq É Yhangzo Byzô É Hkyô Eq, Yesuq É Bu Lé Lé Záng É Myiwe Rayuq É Hkyô

Mht 9:18-26; Mrk 5:21-43

⁴⁰ Ahkuí, Galile byu pé gi, Yesuq dum taú lò râ lé lánng nyî kô é nghut mù, Yhang dum taú gû dap lo é hkûn gabú myit eq lhom te yu akô. ⁴¹ Haú hkûn, Ya-iruaq gâ é tarajong má up sù rayuq gi, jé lé lô mù, Yesuq é hkyî wang má hkyihput htuq luí, yhang yhûm má lé râ matú ji nyi ri. ⁴² Hkâsu mù gâ le, raxe í zân bò bê é, yhangzo byizo te gi, shi ló nyi é yanmai nghut ri.

Haú mù, Yesuq cháng e ló le, shiwa byu pé gi, Yhang lé záng htung lo bum akô.

⁴³ Haú u lé, raxe í zân sui yuí luí ngunzè lhunglhâng ban pyám shoq chi sará pê chyáng yâ wú kôlhang, hká yuq le a wó yâ gè byi é† myiwe myhí rayuq le haú hkaû má bo tô ri. ⁴⁴ Myiwe haú gi, Yesuq é nunghtáng má huí lé mù, Yhang é bushi htâng má ê záng kat eq, suí yui é ana gi, ge byuq bê nghut ri.

⁴⁵ Haú hkûn, Yesuq gi, "Ngo lé, ó yuq záng bê lhú?" ga luí myi jáng, lhunglhâng bang gi, a sé ga he nyi bùm kô é hkûn lé, Petruq gi, "Yhumsîng ê, shiwa byu pé gi, náng é lhinghkyuq mai náng chyáng chyín chyap wang lo bùm kô é yanmai, nang lé záng bekô râ nghut lhê?" ga taî ri.

⁴⁶ Yesuq gi, "Byù rayuq ngo lé lé záng mù, ngá chyáng mâ é hpungwup a-tsam htoq ló é lé, ngò châng sé kat ri." ga taî ri.

⁴⁷ Haú jáng, myiwe myhí haú gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyî wang má ngóm gop kat luí, haî mù Yhang lé záng é hkyô eq, hká dông ge ló byuq é hkyô pé lé, shiwa byù banshoq bâng é hí má Yesuq lé taî kyô nyi ri. ⁴⁸ Yesuq gi, "Ngá zo ê, náng é lumjîng myit gi, nang lé lhoq gè byi bê nghut ri, ngón za ló aq hko!" ga luí, myiwe haú lé taî kat ri.

⁴⁹ Yesuq gi, dang ru taî nyi ashî hkûn, tarajong má up sù Ya-iruaq é yhûm mai byù rayuq jé lé lô luí, "Nung zo gi, shi byuq bê, haú sará lé hkâlhoq hkyik nyî lo." ga luí, Ya-iruaq lé taî kyô ri.

* 8:30 Legio gâ é lichyúm gi, gyezo 4000 eq 6000 gyoro bo é gyedap lé taî ri. † 8:43 Ngunzè lhunglhâng ban pyám shoq chi sará pê chyáng yâ wú kôlhang, hká yuq le a wó yâ gè byi gâ é, Chyúmdang ra-am má gi, bo lhê; ra-am má gi, a bò.

⁵⁰ Yesuq gi, dang haû lé wó gyo jáng, "Hkâgyuq, za lumjîng aq, haû jáng, yhang ge byuq râ nghut lhê." ga luî, Ya-iruoq lé taî ri.

⁵¹ Yesuq gi, Ya-iruoq é yhûm má jé é hkûn lé, Petruq, Yohan, Yakuq, eq haû myiwe zô é yhangnu eq yhangwa mai lai luî, yhûm haú má, ó lé le a wàng nhâng kut ri. ⁵² Haú u lé, lhunglhâng bang zoshâng hau é yanmai, ngaubyi ngau-nhap èq yón nyi akô. Yesuq kúm gi, "Hkâ-ngaû kó, yhang shi byuq é a nghut, yhup myhî tô é sheq ru nghut lhê." ga luî, yhangmoq lé taî ri.

⁵³ Zoshâng gi, shi byuq bê lé yhangmoq sé kôluî, yhangmoq gi, Yesuq lé wuizui kut pyám byî akô. ⁵⁴ Yhang kúm gi, myiwe zo hau é loq má zuî to mù, "Zoshâng ê, toq aq." ga taî kat ri. ⁵⁵ Haû mù luî, yhang woi-nyî dum taû wàng mù, haú hkûn jáng toq yap ri. Haû jáng, Yesuq gi, zoshâng haû lé zôjung byi keq, ga yhangmoq lé taî kat ri. ⁵⁶ Haû myiwe zô é yhangnu eq yhangwa nhik gi, gyai maú byuq akô. Nghut kôlhâng, Yesuq gi, haû dut é hkyô ó lé le a taî kyo râ matú, yhangnhik lé taî hkûm tô ri.

9

Lagyo Raxe Í Yuq Lé Nhang Htoq Kat É Hkyô
Mht 10:5-15; Mrk 6:7-13

¹ Yesuq gi, haû lagyo raxe í yuq lé wut yù mù, nat gang banshoq lé wó hkat htoq pyám râ matú eq, noli nojàng wó lhoq gê râ matú, yhangmoq lé wum-o a-tsam eq ahko ahkáng byî ri. ² Hau htâng má, Garai Gasâng é mingdán hkyô hko kyo râ eq, nõhpyo lhoq gê byi râ matú nhang htoq kat ri. ³ Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaî lháng hkâwûn hkâchûng kó. ⁴ Nungmoq hká yhûm má wàng kôlhâng, haú wâ mai dum htoq ló é buinyî jé shoq, haú yhûm má za nyi nyi keq. ⁵ Nungmoq lé a lhom hap yu é bang lé gi, yhangmoq é wâ mai htoq ló é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaû lé yhangmoq é myoq hí má ko hkyô pyâm to keq." ga taî kat ri. ⁶ Haû mù, yhangmoq gi, htoq e ló luî, wâ hkang wâ mó má haú gabú danglù hko kyo uchyang, hká jé hkâmá nõhpyo lhoq gê byî wún akô.

Herut Maú Úng-âng É Hkyô
Mht 14:1-12; Mrk 6:14-29

⁷ Haû su dut é hkyô banshoq lé, mauzau Herut wó gyô yù luî myit wuî nyi ri. Hkâsu mù gà le, ra-am gi, Yohan shi é mai dum dui toq lô bê ga, ⁸ ra-am gi, Eliyaq dum pô htoq lo ri ga, haû mai, ra-am gi, hí hpyang lhê é myiqhtoi rayuq yuq dum dui toq lô bê ga luî, taî bùm kô é yanmai nghut ri. ⁹ Herut gi, "Yohan é ulhum lé, ngò hpyit pyám nhâng bê, nghut kôlhâng, shî í wâ taî byông bùm kô é gi, ó wâ nghut lhê lhú?" ga luî, Yesuq lé myàng shoq ga ho nyi ri.

Byù Ngo Hkyîng Lé Yesuq Zoshuq Byi Tsô É Hkyô

Mht 14:13-21; Mrk 6:30-44; Yhn 6:1-14

¹⁰ Lagyo pé dum taû lo é hkûn, yhangmoq kut lai lo é hkyô pé, Yesuq lé taî kyô akô. Haú hkûn, Yesuq gi, yhangmoq lé shuí chûng mù, Bet-saida gà é wâ mó shut tsik za e ló byuq ri. ¹¹ Shiwa byu pé gi, haú hkyô lé châng sé kômù, Yhâng htâng châng e ló akô. Yesuq le yhangmoq lé lhom hap yù mù, Garai Gasâng é mingdán hkyô lé taî kyo luî, nõhpyo gè naù bang lé, lhoq gê byî ri.

¹² Buigyùm zó má, lagyo raxe í yuq gi, Yhâng chyáng huî ê mù, "Haû shiwa byu pé lé, awui ayàm mâ é yhûm pé eq wâ pé má ló mù, zoshuq hô zo luî ló yhup kó sháng gaq, ló nhâng aq. Hkâsu mù gà le, ahkuî nga-nhúng gi, yoso má nghut nyi ri." ga luî, Yhang lé taî akô.

¹³ Haú hkûn, Yesuq gi, "Nungmoq, yhangmoq lé rajung jung byi tso keq." ga tû taî ri.

Yhangmoq gi, "Shî myhò bang lé tso râ zoshuq a ê wui le gi, ngamoq chyáng muk-yo muk ngo long eq ngozo í du mai lai luî, haî le a wó nghut ri." ga taî akô. (Hkâsu mù gà le, yuqgè wuî baú lháng ngo hkyîng kô nghut ri.)

¹⁴ Nghut kôlhâng, Yesuq gi, "Shí bang lé rahpúng má ngo xê xê kô kut luî, zùng nhang to keq." ga luî, Yhâng e chángzô pé lé taî ri. ¹⁵ Yhangmoq lé Yesuq taî é eq rajung za, banshoq bang lé zùng nhang to bekô. ¹⁶ Haú hkûn, Yesuq gi, haû muk ngo long eq ngozo í du lé yù mù, mauhkûng shut tu wú to luî, jeju ban hkya-on jáng, haú lé ajap jap hpé luî, shiwa byu pé lé, châng to byi râ matú, Yhâng é chángzô pé lé byi kat ri. ¹⁷ Haú hkûn, yhangmoq

banshoq bang zô gyî bùm kô é htâng má, haû chángzô pé gi, zô myhit tô é pé lé, raxe í mung byíng shoq wó guq tsíng yu ashî kô nghut ri.

Yesuq Gi, Hkrisduq Nghut Lhê Ga Petruq Taí É Hkyô

Mht 16:13-28; Mrk 8:27—9:1

¹⁸ Radàm lé, Yesuq gi, Yhang baú kyûdung nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhê ga, taí akô lhú?" ga myî ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq lo é nghut ri ga, taí akô." ga luî, yhangmoq tû taí akô.

²⁰ Dum, Yhang gi, yhangmoq lé, "Nghut kôlhang, nungmoq gi, ngo lé ó yuq nghut lhê nghu akô lhú?" ga myî ri.

Haû hkûn, Petruq gi, "Nàng gi, Garai Gasang nhâng byí é Hkrisduq nghut ri." ga tû taí ri.

²¹ Shí hkyô ó lé le a taí kyo sháng gaq ga, Yesuq, yhangmoq lé taí hkûm pyâm ri.

²² Haû mù, Yhang gi, "Haû Byu Yhangzo gi, zing-rî é myo myo hui zo luî, suwún wuî, hkyangjong agyi pé, tarâ sará pê èq he-ngik pyâm é hui mù, sat pyâm é hui ra râ nghut lhê, hau htâng sum nyí nghû râ buinyi má, lhoq toq yu é hui râ nghut lhê." ga taí ri.

²³ Hau htâng, banshoq bang lé Yhang dum xoq taí é gi, "Ngá htâng cháng naû sù ó yuq nghut kôle, yhumsing gùng yhumsing he-ngik pyâm mù, nyí wuî yhumsing é tapzîng lé waq chûng* luî, cháng ra râ nghut lhê. ²⁴ Hkâsu mù gâ le, yhumsing é asak lé hkyi yu naû sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é hui râ nghut lhê.

²⁵ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, haí akyû bò râ lhú? ²⁶ Ngò eq Ngá é dang lé, lhom hap yu râ lé hoq é sù ó yuq lé le, haû Byu Yhangzo gi, yhumsing é hpungwup shingkang eq, Yhâng Wâ é hpungwup shingkang, haû chyoyúng maumang lagyô pê é hpungwup shingkang èq jé lé é hkûn, hoq pyâm râ

nghut lhê. ²⁷ Ngò, nungmoq lé teng za taí kôlé, shi má yap tô é bang ra-am gi, Garai Gasâng é mingdán lé a myang é za shí kó râ a nghut." gâ ri.

Mosheq Eq Eliyaq Yesuq Lé Hui Nyo É Hkyô Mht 17:1-8; Mrk 9:2-8

²⁸ Dang haû taí é htâng, shit nyí kô nghut jáng, Yhang gi, kyûdung râ ga Petruq, Yohan, Yakuq pé lé shuí chûng mù, bùm shut doq ló ri. ²⁹ Kyû dung nyi le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq bang lo ri. ³⁰ Haû hkûn, wú keq, Mosheq eq Eliyaq gi, hpungwup shingkang eq htoq lé lò luî, Yesuq eq dâng nyo lhúm nyi akô. ³¹ Yhangmoq gi, Garai Gasang myit tô é hkyô Yerusalem wà mó má Yesuq shí hkâm é dông mai dik lò râ nghut é hkyô lé taí lhúm nyi akô.

³² Petruq eq yhâng luzúm nhik gi, yhup mui nyi akô; nghut kôlhang, yhangmoq bûn lo é hkûn lé, Yesuq é hpungwup shingkang lé le, Yhang eq rahá yap to su nhik lé le, myang kat akô. ³³ Haû nhik Yesuq chyáng mai gâng ló nyi é hkûn, Petruq gi, Yesuq lé, "Yhumsing ê, shí jowò má nga-nhúng nyi le ge ri, haû mù, Nàng é matú ralhú, Mosheq é matú ralhú, Eliyaq é matú ralhú kut, ngamoq lé, zúm sùm lhum saí nhâng laq." ga taí kat kôlhang, yhang haí taí nyi é lé, yhang a sé.

³⁴ Petruq dang taí nyi ashî hkûn lé, mhut jé mù, yhangmoq lé htup zíng lo nyi ri. Mhut haû htup lo nyi é yanmai, yhangmoq gi, gyuq byuq akô. ³⁵ Haû mhut hkaû mai htoq lo é htê gi, "Shí yuq gi, Ngá zo nghut lhê; Ngò hkyin yu é Sù le nghut lhê; Yhâng é dang gyo keq." gâ ri. ³⁶ Dang htê haû zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haû bun haû yoq má, ó lé le a taí kyô é zim za nyi byuq akô.

Nat Gang Dap É Yuqgè Zo Rayuq Lé Lhoq Gê Byí É Hkyô

Mht 17:14-18; Mrk 9:14-27

³⁷ Hau htâng nyí, yhangmoq bùm haû mai gyó ló kô le, byù moq mó gi, Yesuq lé lhom te yu akô. ³⁸ Haû hkûn, byù hpúng haû mâ é byù rayuq wut garû htoq ló é gi, ³⁹ "Sarâ ê, wú aq, ngá é zo te yuqzo gi, nat wang júng mù dàn so dàn loq garû lo lhê, guttsû

* 9:23 Tapzîng lé waq chûng nghu é gi, Yesuq é yanmai jamjau huî é lé taí é nghut lhê.

gi, agut gut dut shoq langhtân nhang lo lê kut mù, nat gi, yhang lé gyai myáng shoq zing-rî yù yù kut nyi ri. ⁴⁰Nat haù lé hkat pyám byi kó laq nghû luí, Náng é chángzô pé lé ngò dúng wú kôlhang, yhangmoq a wó hkat pyám byi kó. Haù mù, ngá zo lé lhoq gê byi râ matú, ngò gi, nang lé gyai myit lum é eq dúng kat lhê." gâ ri.

⁴¹Haù mù luí, Yesuq gi, "Lumjínng myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Nung zo lé, shí shut shuí lé lô aq." ga tû taí ri.

⁴²Zoshâng haù, lé lo nyi le lhang, nat gang gi, yhang lé lhoq lhêng to mù langhtân nhang ashî. Yesuq kúm gi, haù agè ashop é nat lé tân kat luí, zoshâng haù lé lhoq gê byi mù, yhang wa lé dum ap byi ri. ⁴³Nyi mi-nyì gi, Garai Gasâng é kô dik é hpungwup a-tsam lé maú hong nyi bum akô.

Lhunglhang bang gi, Yesuq kut é muzó haù lé maú nyi bùm kô le, Yesuq gi, ⁴⁴"Haù Byu Yhangzo gi, byu pé é loq má ap pyâm é hui zo râ nghut lhê. Dang shí hkun lé nungmoq é no má rago gyô wun to keq." ga luí, chángzô pé lé taí ri. ⁴⁵Yhangmoq kúm gi, dang haù lé a sê gyo kó, hkâsu mù ga le, haù gi, yhangmoq é matú a sê gyo sháng gaq ga luí, nghop tô ashî yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

Ó Yuq Gi, Kô Dik Sû Nghut Râ Lhú?

Mht 18:1-5; Mrk 9:33-40

⁴⁶Hau htâng, lagyô pé gi, hká yuq sheq, kô dik sù nghut lhê lhú ga, rayuq eq rayuq taí myíng myô lhúm nyi akô. ⁴⁷Yesuq kúm gi, yhangmoq é unghkaù má myit nyi é hkyô lé sé byi luí, zoshâng rayuq lé shuí yù mù, Yhâng nàm má shap to luí, ⁴⁸"Shí zoshâng lé Ngá é myíng mai hap sù ó yuq nghut kôle, Ngo lé hap yu é sù nghut bê; Ngo lé hap yù sù ó yuq nghut kôle, haù Ngo lé nhang kat é Sù lé hap yu é le nghut lhê. Haù mù luí, nungmoq banshoq má, je tiq sù gi, je ko sù nghut lhê." ga luí, yhangmoq lé taí ri.

⁴⁹Haù hkûn, Yohan gi, "Yhumsîng ê, Náng é myíng lánng luí, nat gâng pé lé hkat pyám byi wún é byù rayuq lé, ngamoq

myang ri. Yhang gi, ngamoq chyáng a lòm sù nghut é yanmai, yhang lé ngamoq hkûm pyâm é nghut lhê." ga taí ri.

⁵⁰Yesuq kúm gi, "Yhang lé hkâhkúm kó, nungmoq é gyè hkyam shut a nyi sù gi, nungmoq é hkyam shut nyi sù nghut lhê." ga luí, yhang lé taí ri.

Samariq Wà Bang Yesuq Lé A Lhom Hap Yu É Hkyô

⁵¹Ahkuí, Yesuq gi, Yhang lé mauhkûng shut shuí toq yù râ buinyi chyâng lò bê nghut mù, Yerusalem wà mó shut ê râ lé myit hpyit to luí, Yhâng é hí má lagyo nhang kat ri. ⁵²Lagyo haù bang gi, Yhâng matú râ é hkyô lajang lánng râ ga, Samariq wà rawà má wang ló akô. ⁵³Nghut kôlhang, Yesuq gi, Yerusalem wà mó shut laí e ló é sù nghut é yanmai, haù wâ bang gi, Yhang lé a lhom hap yù kó. ⁵⁴Haù hkûn, lagyo Yakuq eq Yohan nhik gi, haù lé myàng jáng, "Yhumsîng ê, yhangmoq lé lhoq htên pyám râ matú, ngá-nhik mauhkûng mai myi wut hkyó le, a gè lhú?" ga luí, Yesuq lé myí akô. ⁵⁵Yhang kúm gi, lhing wú luí yhangnhik lé, tân pyâm ri, ⁵⁶haù mù luí, yhangmoq gi, gó wâ shut e ló byuq akô.

Yesuq É Htâng, Hkâsu Kut Cháng Râ Hkyô Mht 8:19-22

⁵⁷Yhangmoq haù hkyô má e ló kô le, byù rayuq gi, "Nàng hká e le hká ngò cháng râ." ga luí, Yesuq lé taí ri.

⁵⁸Yesuq gi, haù yuq lé, "Wamhkuí pé gi, hkyûng wó akô, nghoq pé le, nghoqsut wó akô. Nghut kôlhang, haù Byu Yhangzo gi, ullum to jang lhang a wó é nghut ri." ga taí pyám ri.

⁵⁹Dum rayuq lé, "Ngá htâng cháng aq." ga taí jáng, haù yuq gi, "Yhumsîng ê, ngá wa lé, ló yhâm pyám râ ahkáng hí byi shi laq." ga taí ri.

⁶⁰Yesuq gi, yhang lé, "Shí bê bang† gi, shí bê bang yhangchang yhâm lhum kó sháng gaq; nghut kôlhang, nàng gi, Garai Gasâng é mingdán hkyô lé, ê hko kyo aq." ga taí ri.

⁶¹Byù rayuq dum, Yhang lé, "Yhumsîng ê, ngò le náng htâng cháng râ, nghut kôlhang, ngá yhumbyù lé hí hkyang ló shit to râ ahkáng byi shi laq." ga taí ri.

⁶²Yesuq gi, "Yò hpuq li zui mù htâng shut lhing wú sù ó yuq nghut kôlhang, Garai

† 9:60 Shí bê bang gâ é gi, woi-nyí má shi to bang lé gâ lhê.

Gasâng é mingdán eq a gingdán." ga luí, yhang lé taí ri.

10

Yesuq, Chángzô Pé Nyhit Xê Yuq Lé, Nhang Htoq Kat É Hkyô

¹ Hau htâng má, Yhumsîng gi, gotû chángzô pé nyhit xê yuq* lé hkyin yù mù, Yhang e ló râ wà eq jowò hkanmó shut í yuq razúm zúm kut luí, Yhâng é hí má ê nhang kat ri. ² Yesuq gi, yhangmoq lé, "Kyô† shù yù râ myo shoq joq kôlhang, mù zui râ byù gi, shaú nyi ri. Haú mù, haú kyô Yhumsîng lé, Yhâng é kyô yò má, kyô shu byù‡ myo myo nhâng byi râ matú, dung keq. ³ Nungmoq e ló keq! Wamhkuí hpúng má nhang hâng kat é sau zô pé lé su, Ngò, nungmoq lé nhang kat é nghut lhê. ⁴ Ngùn htông eq, etap, hkyî-tsung pé hkâyú chùng kó, hkyô má ó lé le hkâshichyên kún nyi kó.

⁵ Nungmoq gi, hká yhûm má wàng e ló kô le, 'Shi yhûm nguínón nyî sháng gaq.' nghû luí, hí taí keq. ⁶ Haú yhûm má nguínón hkyô eq gingdán sù nyi é nghut le gi, nguínón hkyô haú gi, haú yuq é ahtoq má joq to râ nghut lhê. Haú a nghut jáng, nguínón hkyô haú gi, nungmoq chyáng dum taú lo byuq râ nghut lhê. ⁷ Haú yhûm má nyi to mù, yhangmoq haí byî le haí zo haí shuq keq; hkâsu mù gâ le, mù zui sù gi, zuihpau wó yù gíng lhê; haú mù, nungmoq rayhum htâng rayhûm hkâhtot nyi wún kó.

⁸ Nungmoq hká wà má wang ló kôlhang, yhangmoq lhom hap yù kô é nghut le gi, nungmoq é hí má yhangmoq htung to byî é zoshuq lé, zo keq, shuq keq. ⁹ Haú mâ é nò bang lé lhoq gê byi mù, 'Garai Gasâng é mingdán gi, nungmoq eq chyâng lò bê nghut ri.' nghû luí, yhangmoq lé taí kyo keq. ¹⁰ Nghut kôlhang, nungmoq hká wà má wang ló kô le, yhangmoq a lhom hap yu é nghut le gi, haú wà mâ é hkyô mó má htoq ê mù, ¹¹ 'Ngamoq é hkyî má dap tô é nungmoq wà mâ é hpuilhaú lhang, nungmoq lé hkyang pû tsô nyi râ matú ngamoq ko hkyô pyâm to byi bê. Nghut kôlhang,

Garai Gasâng é mingdán gi, chyâng lò bê hkyô lé, sé to keq.' nghû luí taí keq. ¹² Ngò, nungmoq lé taí kôlé, haú buinyì§ lé, haú wà gi, Sodom wà htoq má je hpuzo râ nghut lhê.

¹³ Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tú wut lhê, myiwap kyaq gyûn lhê kut zung ngûng to bekô râ nghut lhê. ¹⁴ Haú mù, tarâ jéyáng é nyí jé jáng, nungnhik gi, Turuq myuq eq Sidun myuq htoq má je hpuzo* kó râ nghut lhê. ¹⁵ Dum mù, Kaperna-um wà nàng ê, nàng gi, mauhkûng jé shoq waq toq é hui râ lú? A nghut, mosumhkung má sheq gyó râ nghut lhê." ga taí ri.

¹⁶ Hau htâng má, chángzô pé lé dum xoq taí é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." gâ ri.

Nyhit Xê Yuq Dum Taú Jé Lo É Hkyô

¹⁷ Hau htâng, haú chángzo nyhit xê yuq gi, gabú myit eq dum taú lò mù, "Yhumsîng ê, náng é myîng lé lang jáng, nat gâng pé lhang ngamoq é dang lé gyô bum akô." ga taí akô.

¹⁸ Haú su ga taí kôjáng, Yesuq tú taí é gi, "Tsadán gi, mauhkûng htoq mai lhap hpyat é su byit gyó lo é lé ngò myang kat bê. ¹⁹ Wú keq! Ngò gi, nungmoq lé, lhangmui eq gogok pé lé wó nang râ eq gumlau gyè pé é wum-o a-tsam banshoq lé wó ûng râ ahko ahkáng lé byi bê nghut mù luí, hai eq le nungmoq lé wó lhoq hten râ a nghut lo. ²⁰ Nghut kôlhang, nat pé nungmoq é dang gyô é lé za hkâgabú nyî kó, mauhkûng htoq mâ é asak jihpán laiká buk má nungmoq é myîng bo to bê lé sheq gabú nyî keq." ga taí ri.

²¹ Haú u lé, Yesuq gi, Chyoiyúng Woi-nyí má gabú é myit byíng lô mù, "Mauhkûng eq myigung é Yhumsîng, Áwa ê, Nàng gi, haú

* 10:1 Chyúmdang ra-am má gi, chángzo nyhit xê í yuq ga le kê tô ri. † 10:2 Kyô nghû é gi, Yesuq lé lumjîng nài kôlhang taí kyo râ bang a nyi luí láng tô é bang nghut ri. ‡ 10:2 Kyô shu byù nghu é gi, Yesuq é hkyô gabú danglù lé taí kyo bang nghut ri. § 10:12 Haú buinyì gâ é gi, Garai Gasâng tarâ jéyáng é buinyì lé gâ lhê. * 10:14 Nungnhik je hpuzô é hkyô gi, mauhpo kumlhá myo myo myang é nghut kôlhang, myit a lhîng kô é yanmai nghut ri.

pé lé, hpaqchyî byéng-yá bò bang eq myit hpaqchyî sé bâng é hí mai haq nghop to luî, zoshâng wui lé tún shit bê nghut é yanmai, Ngò, Nang lé hkya-ôn lhê ô. Nghut bê, Áwa ê, haû gi, Nang ô nau é hkyô nghut ri.

²² Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luî ó le a sé; Áwa ó nghut é lé le, haû Zo eq haû Zo mai sé nhâng râ matú hkyin yu é bang mai lai luî, ó a sé." ga tâ ri.

²³ Hau htâng má, Yhâng é chángzô pé shut lhing wú luî, yhangmoq lé baú za haq taí kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri. ²⁴ Hkâsu mù gâ le, Ngò, nungmoq lé taí kôlé, nungmoq wó myàng, wó gyô é pé lé, myiqhtoí pé eq hkohkam pé myo myo gi, myàng nau gyo nau kôlhang, a wó myàng, a wó gyo kó nghut ri." ga tâ ri.

Gè É Samariq Byù

²⁵ Haû hkûn, wú keq, tarâ sará rayuq gi, toq luî, Yesuq lé, "Sarâ ê, ahtum abyuq é asak lé wó yú shoq, ngò hkâsu kut râ lâ lhê lhú?" ga luî, Yhang lé myî chyam wú ri.

²⁶ Yesuq gi, "Mosheq é tarâ má hkâsu ga kê tô ri lhú? Nang haû lé hkâsu nghap yu nyi lhê lhú?" ga luî, yhang lé myî ri.

²⁷ Haû yuq gi, "'Haû Yhumsîng náng é Garai Gasang lé, náng é myit nhikhum banshoq, náng é asak woi-nyí lhum gón, náng é wum-o banshoq, náng myit é hkyô banshoq èq, chytidap râ lhê; [✠] 'náng gûng lé nàng chytidap é su, náng é chyangnâm mâ é bang lé le chytidap aq. [✠]" ga tâ ri.

²⁸ Yesuq gi, "Nang tâ é dang jô ri; haû su yhang kut aq, haû jáng nàng gi, asak ùi râ nghut lhê." ga yhang lé tâ ri.

²⁹ Nghut kôlhang, haû yuq gi, yhâng gungdu dingmán é lé, tân shit nau luî, "Ngá é chyangnâm mâ é sù gi, ó yuq nghut lhê lhú?" ga luî, Yesuq lé myî ri.

³⁰ Yesuq tâ é gi, "Byù rayuq gi, Yerusalem wà mó mai Yeriho wà shut gyó ló le, damyaq eq htûng huí ri. Damyaq haû bang gi, yhâng é mebu pé lé hkyut shang pyám byi kôluî, rayúm gyut shoq bat nha mù, aluq shoí shí jáng sheq tô pyâm to kôluí ló byuq bekô. ³¹ Haû u lé, hkyangjong rayuq gi, haû hkyô mai lai âng ló le, haû damyaq

hui sù lé myàng jáng, koi lai ló byuq ri.

³² Haû eq rajung za, Lewiq rayuq le, haû mai lai ló é hkûn, haû yuq lé myàng jáng, koi lai ló byuq ri. ³³ Nghut kôlhang, Samariq byù rayuq le, haû mai lai ló é hkûn, haû yuq leq tô é lé myàng jáng, wú shogyo luî yhâng chyáng huí ê mù, ³⁴ yhâng é dâm má, xù eq tsibiyiq wing shoq gyun luî, rago za htup byi mù, yhâng é logúng má, haû yuq lé bún ke luî, bing-yhûm ralhûm má jé shoq shuí ló mù, gôn lajang byî ri. ³⁵ Htang nyí lé, yhang gi, haû bing-yhûm yhumsîng lé ngùn Denari í chap shê byi mù, tâ é gi, 'Shí yuq lé wú lajang byi laq, yhâng gùng má nàng myo chung záng é banshoq lé ngò dum taú lò jáng, lo xap râ.' gâ ri." gâ ri.

³⁶ Hau htâng, tarâ sará lé, "Nang gi, byù haû bang sum yuq má damyaq huí sù é chyangnâm mâ é đông nghut sù gi, hká yuq nghut râ su ngam ri lhú?" ga luî, Yesuq myî ri.

³⁷ Haû tarâ sará gi, "Haû yuq lé shogyo sù nghut ri." ga tâ ri.

Yesuq gi, "Nang le haû đông ló kut aq." ga luî, yhang lé tâ kat ri.

Mariq Eq Mahtaq Nhik Chyáng Yesuq Ê Jé É Hkyô

³⁸ Ahkuí, Yesuq eq Yhâng é chángzô pé hkyô xoq sô e ló kô le, wà rawà má jé wang ló é hkûn, Mahtaq gâ é myiwe rayuq gi, Yesuq lé yhâng yhûm má lhom te yu ri.

³⁹ Mahtaq gi, Mariq gâ é yhanggu myiwe zo rayuq wó ri. Mariq haû gi, Yhumsîng Yesuq é hkyî wang má zung to mù, Yhang mhoqshit é dang lé gyô nyi ri. ⁴⁰ Mahtaq kúm gi, saí tso saí huq é amû myo luî, gyin bûn nyi ri. Haû mù luî, yhang huí ê mù, "Yhumsîng ê, ngá gu gi, saí tso saí huq é amû má, ngo lé baú za rap kut tô é lé, nàng a bo myàng byi lhú? Ngo lé, lé garúm sháng gaq, yhang lé taí byi laq." ga luî, Yesuq lé tâ ri.

⁴¹ Haû hkûn, Yhumsîng gi, "Mahtaq, Mahtaq, nàng gi, muzó lé za ma nyi mù, myit myo myit chiq é huí nyi ri. ⁴² Nghut kôlhang, je ahkyak é hkyô gi, rahkat za nghut lhê. Mariq kúm gi, haû je ge é hkyô lé hkyin yù bê nghut ri. Haû lé yhâng chyáng mai wó yu pyám byi râ a nghut." ga luî, yhang lé tâ ri.

11

Yesuq Mhoqshit É Kyûdung Dang

Mht 6:9-13; 7:7-11

¹ Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi, "Yhumsíng è, Yohan gi, yhâng é chángzô pé lé kyûdung rá hkyô mhoq byí é su, ngamoq lé le mhoq byi laq." ga Yhang lé taí ri.

² Haú hkûn, Yhang gi, "Nungmoq kyûdung le, 'Mauhkûng htoq tsáng myhâng mâ é ngamoq é Áwa ê,

Náng é myìng gi, chyoyúng nyí sháng gaq. Náng é mingdán jé lô sháng gaq.

³ Ngamoq nyí wuí rá é zoshuq lé, ngamoq lé nyí wuí byi laq.

⁴ Ngamoq lé shut é byù banshoq bâng é mara lé, ngamoq hkyut pyám byí é yanmai, ngamoq é mara lé le hkyut pyám byi laq.

Ngamoq lé, agúng aláú hkyô má hkâwâng nhâng.'

ngû keq." ga luí, yhangmoq lé mhoqshit ri.

⁵ Yesuq yhangmoq lé dum taí é gi, "Dangké, nungmoq chyáng mâ é rayuq sù gi, buinùm wó é ngû sháng, yhang gi, gung-gàm yoq má haú yuq chyáng ê luí, 'Buinùm hpó è, ngo lé muk sùm long byam chyí byí kat laq, ⁶ haí mù gâ le, ngá buinùm rayuq byìn we mai ngá chyáng jé nyi tô ri. Ngò gi, yhang lé byi tso rá haí le a joq byam dut tô ri.' ga taí é hkûn, ⁷ yhúmhaú shut mâ é sù gi, 'Ngo lé, hkâlê lhoq hkyik lo, hkum le myhí pyám bê, ngá zoshâng wuí le ngò eq rahá yhupjang má yhup to bekô. Ngò, nang lé haí le a wó toq yû byi lo.' ga tu kat ri. ⁸ Ngò, nungmoq lé taí kôlé, buinùm ngû é yanmai za gi, muk a kâm toq byi lo kôlháng, zuq zuq dúng nyi é yanmai, haú yuq lé, yhang ra châ é banshoq toq yû byi rá ngûthê.

⁹ Haú mù, ngò, nungmoq lé dum taí kôlé, dung keq, haú jáng, nungmoq lé byi rá ngûthê; hô keq, haú jáng, nungmoq myàng kó rá ngûthê; hkum má kok keq, haú jáng, nungmoq lé hpóng byi rá ngûthê. ¹⁰ Hkâsu mù gâ le, ó yuq ngûthê kôle,

dung sù wó rá; hô sù myàng rá; hkum kok sù lé gi, hpóng byi rá ngûthê.

¹¹ Nungmoq íwâ pé má, ó yuq wá, yhum-sing yhangzo muk dúng le, luqgok byi kó rá lú? Ngozo dúng le, lhangmuí byi kó rá lú? ¹² Woq-ú dúng le, gogok byi kó rá lú? ¹³ Agè ashop é bang nungmoq lhang gi, nungmoq é zo wuí lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Íwa gi, Yhang lé dúng é bang lé, je riyhang haú Chyoyúng Woi-nyí byi rá ngûthê." ga taí ri.

Mara Hûn É Dang Lé Yesuq Tú Taí É Hkyô

Mht 12:22-30, 43-45; Mrk 3:20-27

¹⁴ Radàm lé, Yesuq gi, byù rayuq lé dang a wó nyô shoq kut tô é nat gang lé, haú yuq chyáng mai hkat htoq pyám ri. Nat haú htoq ló byuq é htàng má, dang a wó nyô sù gi, dang wó nyo nyi é yanmai, byù moq mó gi, chòm maú byuq bum akô. ¹⁵ Ngûthê kôlháng, yhangmoq chyáng mâ é ra-am gi, "Yhang gi, nat gâng pé é zau Bezebulaq é wum-o a-tsâm èq za, nat gâng pé lé wó hkat pyám é ngûthê ri." ga taí bum akô ngûthê ri. ¹⁶ Ra-am le, Yhang lé, mauhkûng mâ é kumlhá tûn shit wú laq ga dúng chyam wú akô.*

¹⁷ Yesuq kúm yhangmoq myit nyi é hkyô lé sé mù taí é gi, "Ikun byoq é mingdán hká lhum ngûthê kôle, hten byuq rá za ngûthê; haú eq rajung za, ikun byù yhangchang rayuq eq rayuq byoq lhum é yhúm htu gi, byoq gâng lhum rá za ngûthê. ¹⁸ Nat pé le yhangmoq yhangchang byoq gâng lhum nyi kô é ngûthê le gi, Tsadán é mingdán gi, hkâsu kut wó gîng to rá lú? Ngò isu nghu taí é gi, nungmoq ngo lé Bezebulaq é wum-o a-tsâm èq za, nat gâng pé lé hkat pyám ri ga kô é yanmai ngûthê. ¹⁹ Ngò gi, Bezebulaq é wum-ô èq za, nat gâng pé lé hkat htoq é ngûthê jáng, nungmoq é chángzô pé gi, ó yuq é wum-o a-tsâm èq za, nat gâng pé lé hkat pyám kô é ngûthê lú? Haú mù luí, yhangmoq gi, nungmoq lé jéyáng é bang dut bekô rá ngûthê. ²⁰ Ngûthê kôlháng, Ngò gi, Garai Gasâng é wum-ô èq nat gâng pé lé hkat htoq pyám é ngûthê jáng, Garai Gasâng é

* 11:16 Byu pé gi, Yesuq lé Garai Gasang nhang kat é hkyô lé saksé myàng nau luí, mauhpo kumlhá dúng nyi akô.

† 11:20 Garai Gasâng é mingdán gâ é gi, byù htoq má le, nat htoq má le, Garai Gasâng yhang uphâng é lé gâ é ngûthê.

mingdán† gi, nungmoq chyáng jé bê nghut ri.

²¹ Wum-o bo é sù rayuq gi, yhâng é yhûm lé, shâm, lhâm chûng luí zúng tô é nghut jáng, yhâng é sutzè pé gi, rago za wó joq to râ nghut lhê. ²² Nghut kôlhang, yhâng htoq wum je bo é sù lé luí, haú yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyám byi luí, yhâng é sutzè pé lé, gam yu pyám byi râ nghut lhê.‡

²³ Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuí tsing sù gi, lhoq pyo pyâm é sù nghut nyi ri.

²⁴ Haú agè ashop é nat gi, byù rayuq chyáng mai htoq ló mù, kyuq huí é jowò pé má sô yông e ló luí, no râ jowò hkat ho wú le, a myang hô nghut ri. Haú hkûn, yhang gi, 'Ngò nyi lai lo é yhûm má dum taú ló wú rá.' ga taí ri. ²⁵ Yhang dum taú jé ló wú le, yhûm haú gi, shum pyám mù san za rago dut to lánng é lé ló myang ri. ²⁶ Haú jáng, yhang gi, dum taú ê mù, yhâng htoq je wuí é nat nyhit nat lé shuí lò luí, haú má lo wàng nyi to bekô. Haú mù, haú yuq é nyi yap sâmlai gi, hí lhê htoq má je wuí lò bê nghut ri." ga taí ri.

²⁷ Haú su ga, Yesuq taí nyi é hkûn, haú shiwa hpong mâ é, myiwe zo rayuq htê mó o mó èq Yhang lé taí é gi, "Nang lé wun é ûng wam eq nàng shuq é nauwang gi, hkungsô wó nyi ri ô!" gâ ri.

²⁸ Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó râ nghut lhê." ga taí ri.

Mauhpo Kumlhá Lé Dung Kô É Hkyô

Mht 12:38-42; Mrk 8:12

²⁹ Shiwa byu pé jat myô zup zîng lo é hkûn lé, Yesuq taí é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dîng nyi bùm kôlhang, Yonaq é kumlhá mai lai luí, gotû haí le tûn shit râ a nghut. ³⁰ Yonaq gi, Ninewe wà byù pê hí má kumlhá§ dut é su, haú Byu Yhangzo gi, shí pyat lhê é byu pé hí má, kumlhá dut râ nghut lhê. ³¹ Maupyî mâ é hkohkâm myhí gi, maumyî ló htâng é mai lé lô mù, Sholumon é hpaqchyî dang

lé, lé gyô yù bê nghut mù, haú tarâ jéyáng é buinyì má, shí ipyat mâ é byu pé eq rahá toq lô luí, yhangmoq lé mara hûn râ nghut lhê. Wú keq, Sholumon htoq ko sù gi, ahkuí shí má jé nyi to bê. ³² Ninewe wà byu pé gi, Yonaq, mungdang hko kyô é hkûn myit lhîng kô é nghut mù, tarâ jéyáng é buinyì má, shí ipyat eq rahá toq lô luí, yhangmoq lé mara hûn kó râ nghut lhê. Wú keq, Yonaq htoq ko sù gi, ahkuí shí má jé nyi to bê.

Myibung Su Duqbó Râ Hkyô

Mht 5:15; 6:22-23

³³ Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. ³⁴ Náng é myoq gi, náng gungdû é myibung* nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi râ nghut lhê. ³⁵ Haú mù, náng chyáng bo é maubó gi, mauchut byuq é, a chut byuq é lé wú nyi aq. Nang lumjîng é hkyô eq nàng myit é hkyô gi, mauchut tuq a dut sháng gaq, sidiq nyi aq. ³⁶ Náng é ragûngdu gón má duqbó é nghut le gi, rawò má le mauchut é jowò a joq é za, myibung nang lé duqbó byí nyi é su, náng gungdu gón má duqbó nyí râ nghut lhê." ga taí ri.

Hparishe Pé Eq Tarâ Sará Pé Lé, Yesuq Mara Hun É Hkyô

Mht 23:1-36; Mrk 12:38-40; Luk 20:45-47

³⁷ Yesuq haú su ga ban taí é htâng má, Hparishe rayuq gi, yhang eq zang rahá zo râ matú, Yesuq lé ji ri. Haú mù, Yesuq gi, haú yhûm má wang ê mù zang zo râ ga siboí nàm má zung tô ri. ³⁸ Nghut kôlhang, Hparishe wá gi, zang zo râ hí má Yesuq loq a chí é lé, myàng luí maú nyi ri.†

³⁹ Haú mù luí, Yhumsîng Yesuq yhang lé taí é gi, "Nungmoq Hparishe pé gi, góm eq zanghkoq lé ahtôq shut za chí yúng nyi kômù, nungmoq é unghkaú má gi, lú zo lú

‡ 11:22 Haú eq rajung za, Yesuq gi, Tsadán lé zân ûng bê nghut é yanmai, agè ashop é nat pé lé byu pé chyáng mai, wó hkat pyám bê nghut ri. § 11:30 Kumlhá gi, Yonaq, ngozô wamdau má sum nyi lúng é su, Yesuq le, shí bê mai sum nyi nghû râ nyí má, dum dui toq lô râ hkyô lé taí nau é nghut ri. * 11:34 Myibung gâ é gi, tengmán é mungdang lé wó sê yu é a-tsam lé, taí é nghut ri. † 11:38 Yudaq htûng tarâ má gi, zang a zo shi má loq chi râ lhê.

shuq é eq agè ashop é hkyô pé byíng zan tô ri. ⁴⁰Byù bâm pé ê, ahte† lé le, ahtoq§ lé le, saí sù gi, Garai Gasang rayuq za nghut é lé, a sé kó lúhú? ⁴¹Nghut kôlhang, ahte má bo é zè pé lé, ra châ é bang lé byî pyám keq; haú hkûn, nungmoq é matú banshoq gi, sân-yúng lô râ nghut lhê.

⁴²Hparishe pé ê, nungmoq gi, dingnyé wó ri, hkâsu mù gâ le, nungmoq gi, gau-tsáng, shingtón pé eq zangxun mhan-haq ajù jù mâ é, xê gambùm ragambùm lé gi, Garai Gasang lé byi nyi kômù, tarâ dingmán é hkyô eq Garai Gasang chyitdap é hkyô lé gi, lhai pyâm tô akô. Xê gambùm ragambùm byî é lé le cháng luí, tarâ dingmán é hkyô eq Garai Gasang lé chyitdap é hkyô lé le, kut nyi râ lhê.

⁴³Hparishe pé ê, nungmoq gi, dingnyé wó ri, hkâsu mù gâ le, tarajong pé mâ é ahkyak dik é zùng jang pé lé le, gai pé má hkunggâ é eq shichyên é dang lé le, nungmoq ô nau nyi bum akô.

⁴⁴Nungmoq gi, dingnyé wó ri, hkâsu mù gâ le, nungmoq gi, ahkô a dong lo mù, byu pé a sé luí, ahtoq mai sô lai é lupdùng eq du akô." ga taí ri.

⁴⁵Haú hkûn, tarâ sará rayuq gi, "Sarâ ê, nàng haú su gâ é gi, ngamoq lé le rhoi lhôm nyi é nghut bê." ga Yhang lé tâ taí ri.

⁴⁶Haú su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gâ le, nungmoq gi, byu pé lé, wùn waq râ wuî é noqkuq htúng tarâ wòlai lé wùn nhâng luí, yhumsing yhang gi, wò haú lé loqnyhuî eq lhang, a bo záng wú kó nghut ri.

⁴⁷Nungmoq gi, dingnyé wó ri, hkâsu mù gâ le, nungmoq gi, nungmoq é îchyí îwâ pé sat pyâm é myiqhtoî pé é lup lé luptsuq tsuq akô. ⁴⁸Haú mù luí, nungmoq gi, nungmoq é îchyí îwa pé é muzó lé, myit bo huî é bang nghut nyi akô. Hkâsu mù gâ le, yhangmoq gi, myiqhtoî pé lé sat pyám mù, nungmoq gi, lup haú pé lé luptsuq tsuq akô. ⁴⁹Haú mù luí, Garai Gasang, Yhâng é hpaqchyí byéng-yá mai taí é gi, 'Myiqhtoî pé eq lagyô pé lé, ngò yhangmoq chyáng nhang kat râ nghut lhê; haú bang mâ é ram lé gi, yhangmoq lhom sat pyám mù, ram lé gi, zing-ri kó râ nghut lhê.' gâ ri. ⁵⁰Haú su mù luí, mau htoq xâng hkûn lhê é,

Abelaq é sui mai, hkungga gyap eq noqkuq yhùm gyoro má sat pyám huî é Zahkariq é sui jé shoq, shun pyâm é myiqhtoî pé é sui banshoq bâng é manglat gi, shí pyat mâ é byu pé lé hùn râ nghut lhê. ⁵¹Ngò, nungmoq lé taí kôlé, manglat haú pé lé gi, shí pyat mâ é byu pé lé, gè gè yhang hùn râ nghut lhê.

⁵²Tarâ sará pé ê, nungmoq gi, dingnyé wó ri, hkâsu mù gâ le, nungmoq gi, byu pé Garai Gasang lé sé ra zoqshi lé yu pyám byi kômù, yhumsing yhang le a sé, sé naú bang lé le, hkûm zing tô akô nghut ri." ga taí ri.

⁵³⁻⁵⁴Yesuq haú mai htoq lô é hkûn, tarâ sará pé eq Hparishe pé gi, Yhang lé gyè kut mù, Yhâng é dang má mara wó myâng shoq ga, wuî é dangmyi myo myo myi luí, gyám wú nyi akô nghut ri.

12

Gegùn Labyoq Kut É Bang Lé Sidiq Râ Hkyô Mht 10:28-33; 12:32; 10:19-20

¹Haú u, byù hkyîng mun zup zîng lò mù, rayuq eq rayuq lhang záng nâng lhum shoq dut nyi é hkûn, Yesuq, Yhâng é chángzô pé lé taí hi é gi, "Gegùn labyoq kut é Hparishe pé é múnchi lé koi sidiq pyám keq. ²A byông htoq loshoq wó zaú nghop tô é, haí le a joq râ nghut lhê; a sé loshoq wó haq tô é le, haí a joq râ nghut lhê. ³Haú mù luí, nungmoq, mauchut hkaú má haq taí é dang banshoq lé, myoq myàng maubó má wó gyô bùm kó râ nghut lhê. Gok hkaú má, dangsoq soq é lé le, yhumhkûng htoq mai taí pyo bùm bekô râ nghut lhê.

⁴Ngá buinùm wuî ê, Ngò, nungmoq lé taí kôlé, gungdu lé za wó sat pyám mù, woi-nyí lé haí le a wó kut é bang lé, hkâgyuq kó. ⁵Nghut kôlhang, nungmoq ó lé za gyuq râ é lé gi, Ngò, nungmoq lé taí kyo kôlé, gungdu lé sat pyám é htâng má, woi-nyí lé ngaraî ming shut wó hkyô kat pyâm é a-tsam wó sù lé kúm gi, gyuq keq. Nghut bê, Ngò, nungmoq lé taí kôlé, haú yuq lé za, gyuq nyi keq. ⁶Johkyáng ngo du lé, gyi htingchap í chap eq wó ûng pyâm lhê a nghut kó lúhú? Haú johkyáng radu lé lhang, Garai Gasang gi, tô-myhî pyâm é a nghut. ⁷Garai Gasang gi, nungmoq é ulhum mâ é xâm banshoq lé lhang, nghap to gù nghut

† 11:40 Ahte gâ é gi, i-myt unghkaú lé taí ri. § 11:40 Ahtoq gâ é gi, gungdu lé taí ri.

lhê. Haû mù, hkâgyuq kó; nungmoq gi, haû johkyáng myo myô htoq má lháng gù je bo é bang nghut lhê.

⁸Ngò, nungmoq lé taí kôlé, byu pê hí má Ngo lé lhom yín yu é sù ó yuq nghut kôle, Garai Gasâng é maumang lagyô pê é hí má, haû Byu Yhangzo gi, haû yuq lé lhom yín yû râ nghut lhê. ⁹Nghut kôlhang, byu pê é hí má Ngo lé he-ngik pyâm é sù lé chyaú gi, Garai Gasâng é maumang lagyô pê é hí má, he-ngik pyâm râ nghut lhê. ¹⁰Haû Byu Yhangzo lé dang dông shut é sù gi, mara hkyut byî é wó hui ra nghut lhê; nghut kôlhang, haû Chyoiyúng Woi-nyí lé rhoî dang taí pyâm é sù gi, mara hkyut byî é hui râ a nghut.

¹¹Byu pé nungmoq lé jéyáng râ matú tarajong pé má le, agyî suwún wuî eq ahkáng ayá wó bang é hí má le, shuî e ló kô é hkûn, hkâsu kut râ lé le, hkâsu nghu tû taí râ lé le, hkâ-myt chiq kó. ¹²Hkâsu mù gâ le, haû u lé yhang, Chyoiyúng Woi-nyí gi, nungmoq hkâsu taí râ hkyô lé mhoqshit byi râ nghut lhê." ga taí ri.

Hpaqchyî A Bo É Sahtê Hpó Lé Dangtú Yu Ê Hkyô

¹³Haû hkûn, shiwa hpúng hkaû mai, byu rayuq gi, "Sarâ ê, ngá-nhik tâng wó é muizè pé lé chôm gam lhum râ matú, ngá mang lé bo taí byi laq." ga luí, Yesuq lé taí ri.

¹⁴Yesuq gi, "Byù nàng ê, nungnhik tang ahtoq má tarâ agyî kut luí, ikun zè gâm byi râ gi, ngo lé ó hkyin tô é lhú?" ga luí, yhang lé tû taí ri. ¹⁵Yesuq yhangmoq lé taí é gi, "Myoqnoq é hkyô banshoq mai, nungmoq é i-myt lé hkûm zìng luí, koi sidiq nyi keq. Hkâsu mù gâ le, byu é asak gi, agùn agó é sutzè má bo é a nghut." gâ ri.

¹⁶Dangtú ralhum dông mai le, yhangmoq lé Yesuq taí é gi, "Sahtê rayuq gi, yhang é yò pé má guqzo muilhum gyaí já ri. ¹⁷Haû mù luí, yhang é unghkaû má myit é gi, 'Ngò hkâsu kut wú râ lhi? Ngá é guqzo muilhum pé lé kat to râ jowò a wó lo dut to bê.' gâ ri.

¹⁸Dum nghut jáng, yhang gi, 'Ngò îsu kut wú râ abe, ngá é chyî xau pé lé hpyoq pyám luí, je kô é chyî pé lé saí râ nghut lhê. Chyî haû pé má ngá é guqzo muilhum pé eq sutzè banshoq lé, tsîng kat to luí, ¹⁹ngá é i-myt lé îsu nghu taí râ, "I-myt ê, zanwut

myáng myáng é matú, zè gè myo myo ngò tsîng to bê. I-myt nàng zim za kut nyi aq hkoî. Zo mù, shuq mù, ngón ngón nyi aq." ga' gâ ri.

²⁰Nghut kôlhang, Garai Gasang gi, 'Byù gò ê, náng é asak lé, hkû-myîn yhang, wup yu pyám byî é nghut jáng, nàng tsing hkong tô é zè pé gi, ó yuq é matú dut râ lhú?' ga luí, yhang lé taí ri.

²¹Haû eq rajung za, yhumsing é matú sutzè hkong to mù luí, Garai Gasâng é hí má myung nyi sù gi, haû yuq su nghut râ nghut lhê." gâ ri.

Myit A Chiq É Za Garai Lé Lumjîng Râ Hkyô Mht 6:25-34, 19-21

²²Yesuq, Yhâng é chángzô pé lé dum taí é gi, "Haû mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdú matú haí wut haí tsang râ lé, hkâ-myt chiq kó. ²³Asak gi, zoshuq htoq má, gungdu gi, mebû htoq má, je ahkyak lhê. ²⁴Nghonoq pê é hkyô lé myit wú keq; yhangmoq gi, kyô hkyó kyô shu a kut kó; guqchyî eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haû pê htoq má je riyhang hpauðap nyi lhê a nghut kó lhú? ²⁵Nungmoq má, ó yuq wá, myit chiq é èq, yhumsing é asak lé radúng kô wó jat yù kó râ lhú? ²⁶Haû su mù luí, tiq dik é hkyô lé lháng, nungmoq a wó kut kô é nhîng, haí mù luí gotû hkyô pé lé, myit myô nyi akô lhú?

²⁷Htutbó ban* pé hkâsu kut kô lo é lé, myit wú keq. Haû pé gi, mù le a zui, hkyîng le a duì kó nghut ri. Nghut kôlhang, Ngò, nungmoq lé taí kyo kôlé, Hkôhkâm Sholumon hpúng kô dik u lé wut é mebu lháng, ban haû rabó lé a hkyit nghut ri.

²⁸Lumjîng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lháng, Garai Gasang haû su kut hut é nghut le gi, nungmoq lé, je riyhang hut râ a nghut kó lhú? ²⁹Nungmoq gi, haí zo haí shuq râ lé hkâho nyi kó; haû eq séng luí lé hkâ-myt chiq nyi kó. ³⁰Hkâsu mù gâ le, Garai Gasang lé a sé bang gi, haû hkyô banshoq lé châng hkat ho nyi akô; nghut kôlhang, nungmoq é Îwa Garai Gasang gi, haû pé lé nungmoq

* 12:27 Htutbó ban gi, yúng dik é yosô ban nghut lhê.

râ é hkyô, sé byî nyi lhê. ³¹ Nungmoq kúm gi, Yhâng é mingdán lé ho nyi keq, haû jáng, haû pé, nungmoq lé puq byi râ nghut lhê.

³² Sau hpúng zô pé ê, hkâgyuq ko, hkâsu mù gâ le, nungmoq é Îwa Garai Gasang gi, Yhâng é mingdán nungmoq lé byî nau nyi ri. ³³ Nungmoq wó é zè pé lé ùng pyám luî, myùng bang lé byi keq, yhumsing é matú a dat xau a dat wôm é ngunhtùng saí luî, hkau sù lé a jé, manot èq le a wó zô é sutzè lé mauhkùng htoq má hkong to keq. ³⁴ Hkâsu mù gâ le, náng é sutzè joq jang má, náng é i-myt le jé nyî râ nghut lhê.

Yesuq Dum Jé Lé Lô Râ Hkyíng Lé Machya Nyî Râ Hkyô

Mht 24:45-51

³⁵ Nungmoq gi, hpyihit hit luî, (mù zui râ matú rì rì kut to keq); nungmoq é myibung lé tuq to mù, ³⁶ myiháng poi mai dum taû lò luî, hkúm lo kok é, yhumsing hpó lé radá dâm hkum lhom wó hpông hâng yù shoq, lánng tô é dui-nhâng zoshâng wuî su kut nyî keq. ³⁷ Haû yhumsing jé lo le, machya nyi lánng é dui-nhâng zoshâng wuî gi, hkungsô wó nyi râ. Hkâsu mù gâ le, ngò, nungmoq lé teng za taí kôlé, haû yhumsing hpó gi, yhangmoq lé yuq zung to nhâng luî, yhang gi, dui-nhâng zoshâng su hpyihit hit mù, saí tso saí huq râ nghut lhê. ³⁸ Gunggàm yoq lé nghut kôlhâng, woq tûn hkûn lé nghut kôlhâng, haû su kut machya nyi é lé, yhumsing hpó lo myang é nghut le gi, dui-nhâng zoshâng haû bang hkungsô wó nyi ri. ³⁹ Yhumsing hpó rayuq, hká u má hkau sù lé lô râ lé, sê tô é ru nghut le gi, yhang machya nyi luî, yhâng yhûm lé a wó hpút htong nhâng râ nghut é lé, bûn sê nyi keq. ⁴⁰ Haû mù, nungmoq le rì rì nghut nyî keq; hkâsu mù gâ le, haû Byu Yhangzo gi, a bûn nùng má jé lé lô râ nghut lhê." gâ ri.

⁴¹ Haú hkûn, Petruq gi, "Yhumsing ê, dangtú shî gi, ngamoq lé za, taí é nghut lhê lú? Haû a nghut jáng, lunglhang bang lé taí é dông nghut lhê lú?" ga myî ri.

⁴² Haû jáng, Yesuq gi, "Lumging é eq hpaqchyî bo é sùt zum sù gi, hká yuq nghut lhê lú? Haú yuq gi, yhâng yhumsing é dui-nhâng zoshâng wuî lé ahkyíng jé jáng zoshuq gàm byi râ matú, yhumsing hpó èq

hkyin to sù dut râ nghut lhê. ⁴³ Yhumsing hpó dum taû lo é hkûn, haû su kut nyî lánng é dui-nhâng zoshâng gi, hkungsô wó nyi ri. ⁴⁴ Ngò, nungmoq lé teng za taí kôlé, yhumsing hpó haû gi, yhâng é sutzè banshoq, dui-nhâng zoshâng haû lé ap to râ nghut lhê. ⁴⁵ Nghut kôlhâng, dui-nhâng zoshâng haû gi, yhâng é i-myt unghkaû má, 'Ngá é yhumsing hpó jé lô râ gyai myáng ashî.' ga myit pyám mù, dui-nhâng zoshâng luzúm wuî myiwe, yuqgè lé nhuq bat é eq, zo yê shuq yê î shuq wut nyi é nghut jáng, ⁴⁶ dui-nhâng zoshâng hau é yhumsing hpó gi, yhang a myitbyu tô é buinyi eq yhang a sé tô é ahkyíng má jé lô mù, yhang lé jap pyám luî a lumjing bang eq rahá nyhi pyám râ nghut lhê.

⁴⁷ Yhumsing hpó é i-myt lé sê to kôlhâng, yhang ô nau é dông a cháng, rì rì le a hen tô é dui-nhâng zoshâng gi, yhâng yhumsing èq nhuq bat é lé, myo myo hui zo râ nghut lhê. ⁴⁸ Nghut kôlhâng, a sé mù kut shut sù kúm gi, shau za bat é hui râ nghut lhê. Haû eq rajung za, Garai Gasang gi, myo shoq wó yù su chyáng mai, myo shoq dúng yù râ nghut lhê. Myo myo ap byî tô é hui su chyáng mai, je myo shoq dum dúng yù râ nghut lhê.

Nguingón Nhâng Râ A Nghut, Lhoq Kang Nhâng Râ Ru Nghut Lhê

Mht 10:34-36

⁴⁹ Ngò jé lé é gi, myigùng htoq má, myi nyé nhâng râ matú nghut lhê. Myi haû dap to lánng é nghut le gi, ngò ô nau é hkyô jup byíng bê. ⁵⁰ Nghut kôlhâng, ngò hkam yù râ é baptisma† rajung joq ashî, haû a hkam yù yù gi, ngò gyai yhang hkâm zo wuî nyi ri. ⁵¹ Ngò jé lé é gi, myidàm htoq má simsaq hkyô byi râ matú nghut nhô ngam akô lú? Haú dông a nghut, Ngò, nungmoq lé taí kôlé, byu pé lé lhoq pyô lhoq kang râ matú sheq ru nghut lhê. ⁵² Haû su mù, ahkuî mai rayhûm za mâ é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut lhê. ⁵³ Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoi gi, yhâng dumó eq, yhâng

† 12:50 Shî mâ é baptisma gi, Yesuq, ajung jung hpuzo mù shî hkâm é hkyô lé taí é nghut lhê.

dumó gi, yhangmhoí eq kut, ngá é yanmai, rayuq eq rayuq byoq gâng lhûm bùm bekô râ nghut lhê." ga taí ri.

Dut Lò Râ Hkyo É Kumlhá Lé Sê Gam Hkoq Râ Lhê

Mht 16:2-3; 5:25-26

⁵⁴ Hau htâng shiwa byu pé lé, Yhang taí é gi, "Nungmoq gi, buiwàng hkyam shut mhut htup é lé myàng jáng, 'Maú wo lò berâ.' ga radá dâm lhaq taí taí mu akô, haú eq rajung za le, dut lò lò mu ri. ⁵⁵ Dum nghut jáng, maupyî shut mâ é lài lo le, 'Bui htân berâ.' ga lhaq taí taí mu akô, haú eq rajung za le dut lò lò mu ri. ⁵⁶ Gegùn labyoq kut bang ê, nungmoq gi, myigùng eq mauhkung é kumlhá lé, sê gam hkoq yu nyi akô. Haú su nghut kô le nhîng, haí mù luí, shí ipyat mâ é kumlhá lé gi, a sê gam hkoq dut tô akô lhú?

⁵⁷ Haú eq rajung za, haí mù haú dingmán é hkyô lé yhumsîng yhang yhang a wó doqdân yù kô é lhú? ⁵⁸ Dangké, nang lé yui tsuq sù eq rahá, tarâ agyì wá chyáng e ló le, hkyô má yhang eq ngón shoq byìn hpyé huí yù aq. Haú a nghut jáng, yui yhumsîng gi, nang lé tarâ agyì chyáng ê dé pyám luí, tarâ agyì gi, htóng hkyô su chyáng, nang lé ap pyám luí, yhang gi, nang lé htóng má lhûng pyám râ nghut lhê. ⁵⁹ Ngò, nang lé taí lé, yuichyîn haú a ban xap xap gi, htóng haú mai nàng wó htoq ló râ a nghut." ga taí ri.

13

Myit A Lhîng Jáng Shi Hten Byuq Râ

¹ Haú hkûn, haú má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nóng jaú é hkungga lé nyhô pyâm é hkyô, Yesuq lé lé taí kyô akô. ² Yesuq gi, "Galile byù haú bang haú su kut hui zo kô é yanmai, yhangmoq gi, gotû Galile byu pé banshoq htoq má, yubak je myô akô nghû, nungmoq myit ngam akô lhú? ³ Haú su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kó râ nghut lhê. ⁴ Haú htoq agó, Siloam wà mâ é machya gyop gyó luí, nhê sat huí é byù raxe shit yuq gi, Yerusalem wà mó mâ é byù banshoq bang htoq má mara je kô akô nghû, nungmoq myit ngam nyi akô lhú?

⁵ Haú su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kó râ nghut lhê." ga taí ri.

⁶ Yesuq dangtú dông dum taí é gi, "Byù rayuq gi, yhâng é tsibiyiq hkyâm má, maihpáng gâm ragàm hô tô ri. Yhang agàm haú má, ashi ê ho wú le, zui tô é a myàng nghut ri. ⁷ Haú hkûn, yhang gi, 'Wú aq, ngò sum zân tup maihpáng gâm haú má ashi ê ho wú le, a myàng nghut ri; haú lé htuq pyám aq. Haí mù, maumyî aha agó kut yuq nhang tô lhê lhú?' ga luí, tsibiyiq hkyâm zúng sù lé taí ri.

⁸ Hkyâm zúng sù gi, 'Yhumsîng ê, hkûzân za gi, yuq tô wú shi sháng gaq, shigâm hau é lhîng hkyuq má ngò du lhîng to mù, myìhpún kat luí bóm byi wú shirâ. ⁹ Htang zàn má ashi zui é nghut le gi, yuq to sháng gaq, ashi a zui é nghut le kúm gi, htuq pyám râ nghut lhê.' ga luí, hkyâm yhumsîng lé tù taí ri." gâ ri.

Bánno Buinyì Má Gùng Loq Hten Sù Lé, Lhoq Gê Byî É Hkyô

¹⁰ Bánno buinyì lé, Yesuq gi, tarajong ralhûm má, mhoqshit nyi ri. ¹¹ Haú hkûn, haú má raxe shit zân tup nat dap luí, gùng loq lhoq hten huí é myiwe rayuq le nyi tô ri. Yhang gi, dàngngóm luí, gungdu ratsuí lháng a wó lhoq nyhâng lô é sù nghut ri. ¹² Yesuq gi, myiwe haú lé myàng jáng, yhâng chyáng wut yù mù, "Myiwe myhí ê, nàng, nòhpyo mai gè berâ." ga luí, ¹³ yhâng é ahtoq má loq ke byî ri. Haú hkûn jáng, myiwe haú gi, nyàng za dum wó yap luí, Garai Gasang lé hkya-ôn nyi ri.

¹⁴ Haú mù, Bánno buinyì lé, Yesuq nòhpyo lhoq gê byî é yanmai, tarajong má up sù gi, wú nhik-yo luí, "Mú wó zui é buinyì hkyuq nyí joq tô le, buinyì haú pé má, lé wó lhoq ge yù lhê. Haú mù, Bánno buinyì má gi, hkâkut kó." ga luí, shiwa byu pé lé taí kat ri.

¹⁵ Haú hkûn, Yhumsîng Yesuq gi, "Gegùn labyoq kut bang ê, nungmoq yuq hkangmó gi, Bánno buinyì lé, yhumsîng é no, logúng pé lé, hkup mai hpông htoq yù mù uchyam byi huq huq kut akô a nghut lhú? ¹⁶ Haú nghut le gi, raxe shit zân gón Tsadán èq tuí to huí é, Abraham é yhangzo yhangshu myiwe zo shî lé, Bánno buinyì má Tsadán

loq mai, hkyut byi a gíng râ lhú?" ga tû taí ri.

¹⁷ Haû su ga taí jáng, Yhang eq i-myt shai lhum é bang banshoq gi, hoq hpû byuq bum akô. Shiwa byù banshoq bang kúm gi, Yhang kut é mauhpo amû banshoq é yanmai, gabú nyi bum bekô nghut ri.

Angshi Cham Eq Munchi Dangké

Mht 13:31-33; Mrk 4:30-32

¹⁸ Haû hkûn, Yesuq taí é gi, "Garai Gasâng é mingdán gi, haí eq wuí lhê lhú? Ngò hai eq taí kê wú râ lhú?" ¹⁹ Haû gi, byù rayuq mai, yhang é hkyâm má hô tô é angshi cham eq wuí ri. Angshi cham haû gi, yuq kô lò mù agàm mó dut lò jáng, hau é akoq pé má, maulat nghoq zô pé wó zung nô yu akô." gâ ri.

²⁰ Yhang dum xoq taí é gi, "Garai Gasâng é mingdán lé, ngò hai eq taí kê wú râ lhú?"

²¹ Haû gi, myiwe zo rayuq èq sunsô mún sum búng má yu nyhó luí, haú pé banshoq lé wó lhoq daú nhang é múnchi eq wuí ri." gâ ri.

Chyap É Hkúmdong

Mht 7:13-14, 21-23

²² Hau htâng, Yesuq gi, Yerusalem wà mó shut laí e ló uchyang, rawà bàn rawà má wàng mù, mhoqshit byi ri. ²³ Haû hkûn, byù rayuq gi, "Yhumsîng ê, hkyi yu é hui râ bang gi, shau za nghut râ lhú?" ga luí, Yesuq lé myi ri.

²⁴ Yesuq gi, "Chyap é hkúmdong mai, Garai Gasâng é mingdán má wó wâng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wâng shoq ga shikut wú kó râ. Nghut kôlhâng, a wó wâng kó râ nghut lhê. ²⁵ Yhumsîng hpó,* hkum toq myhí pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsîng ê, ngamoq lé hkum hpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tû taí râ nghut lhê.

²⁶ Haû jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng

mhoqshit byi wú bê nghut lhê.' ga taí bekô râ.

²⁷ Nghut kôlhâng, yhumsîng hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut é bang banshoq ê, ngá chyáng mai gâng ló byuq keq.' ga tû taí kat râ nghut lhê.

²⁸ Garai Gasâng é mingdán má, Abraham, Isak, Yakup pé eq myiqhtôí pé banshoq bang nyi to kô é lé, nungmoq wó myâng kôlhâng, nungmoq gi, shinggan shut hkat pyâm é hui luí, haú jowò má ngaubyi ngaù nhap eq zuí kyik kyik shoq hpuzô nyi bùm bekô râ nghut lhê. ²⁹ Hau hkûn, buihtôq, buiwàng, maupyí, mautsûng má é mingdán myo myo mai byu pé lé luí, Garai Gasâng é mingdán zoshuq poí má myang zùng kó râ nghut lhê. ³⁰ Haû hkûn, ahkuí htâng gyó nyí bang gi, hí bekô râ; ahkuí hî to bang gi, htâng gyó bekô râ." ga luí, yhangmoq lé taí ri.

Yerusalem Wà Mó Eq Séng Luí, Yesuq Taí É Hkyô

³¹ Haú u lé, Hparishe pé ra-am gi, Yesuq chyáng lé luí, "Shí jowò mai htoq ló byuq aq. Hkâsu mù gâ le, Herut gi, nang lé sat râ hen nyi ri." ga luí, Yhang lé taí akô.

³² Haû jáng, Yesuq gi, "'Hkû-nyí, napmá,† ngò nat gang hkat pyám luí, nò zo hpýo zo lhoq gê byi râ nghut lhê; sum nyí nghú râ buinyí‡ má sheq, ngá mù bàn râ nghut lhê.' nghú luí, agè ashop é wamhkuí haú lé ló taí kyo keq. ³³ Haí wá dut kôlhâng, hkû-nyí, napmá, sânghe nyí, ngò gi, e ló râ dut ashí. Hkâsu mù gâ le, myiqhtôí pé gi, Yerusalem wà mó mai lai luí gotû jowò má a shi wú kó nghut ri.

³⁴ Yerusalem ê, Yerusalem ê, myiqhtôí pé lé sat pyám pyám kut mù, náng chyáng nhang kat é bang lé, luqgok èq dú sat sat kut é myuq nàng ê, woqzìng gi, yhangzô pé lé, yhang é dùng hkaú má tsîng lhùng yu é su, nungzô pé lé, Ngò hkâ-myhó dâm shuí tsîng yù nàu kôlhâng, nàng a dóng nghut ri. ³⁵ Wú keq, nungmoq é yhùm gi, nungmoq é matú chamchyuyui dut pyâm to berâ nghut lhê; Ngò, nungmoq lé taí kôlé; 'Yhumsîng é myìng mai jé lé lo é Sù

* 13:25 Yhumsîng hpó gi, Garai nghut lhê. Yhùm gi, Garaí é mingdán lé taí é nghut lhê. † 13:32 Hkû-nyí, napmá gâ é gi, Yesuq mingkan htoq má mù zui râ ahkýng lé taí é nghut lhê. ‡ 13:32 Sum nyí nghú râ buinyí gâ é gi, Yesuq mingkan htoq má mù ban zuí é buinyí lé taí é nghut lhê. ☆ 13:35 Hkya-on 118:26

gi, hkungsô wó nyi sháng gaq.¹☆ nghû, nungmoq a taí taí gi, Ngo lé wó myâng kó râ a nghut lo." ga luí, yhangmoq lé taí ri.

14

Hparishe Rayuq É Yhûm Má Yesuq Jé Nyi É Hkyô

¹Bánno buinyi ra-nyí má, Yesuq gi, zang zo râ ga Hparishe suwún rayuq é yhûm má, ê wang nyi tô le, haú má é bang gi, Yhang lé gyui gyui chôm wú nyi bum akô. ²Haú u lé, wui wam ana dut sù rayuq gi, Yesuq é hí má jé nyi tô ri. ³Haú mù, Yesuq gi, "Bánno buinyi má nõhpyo lé lhoq gê byi é gi, tarâ wang lhê lhú, a wang é lhú?" ga luí, tarâ sará pé eq Hparishe pé lé myi kat ri. ⁴Nghut kôlhâng, yhangmoq gi, zim za dut byuq akô. Haú hkûn, Yesuq gi, nõhpyo hui sù lé, zuí to mù, lhoq gê byi luí, nhang kat ri.

⁵Hau htâng, Yesuq gi, yhangmoq lé, "Nungmoq chyáng má é rayuq yuq gi, yhumsing é yhangzo rayuq yuq, haú a nghut jáng, no myang radu du, Bánno buinyi má, wuihtung má byit gyó le, haú hkûn jáng, a xe htoq yu é za, wó nyi kó râ nghut lhê lhú?" ga myi kat ri. ⁶Yhangmoq kúm gi, dang haú hkun lé, haí le a wó tú taí kó nghut ri.

⁷Haú hkûn, Yesuq gi, ji tô é bang jé réng é zùng jowò pé hkyin yu nyi kô é lé myàng jáng, yhangmoq lé dangtú dông taí é gi, ⁸"Byù rayuq yuq nang lé, myiháng poí má ji é nghut jáng, je réng é jowò má hkâ-ê zùng. Hkâsu mù gâ le, náng htoq je aróng wó sù lé le, ji to shirâ abe. ⁹Ji tô é nghut jáng gi, nungnhik lé ji tô é yhumsing hpó lé lô mù, 'Shí yuq lé jowò hui byi aq.' ga luí, náng lé lé taí jáng, nang hoq hpu luí, hkyi htâng shut huí zùng ra râ nghut lhê. ¹⁰Haú mù luí, supé nang lé ji le, hkyi htâng má ê zûng aq; haú hkûn, nang lé jì sù lé mù luí, 'Buinùm hpó ê, shí je réng é jowò má huí doq zùng aq.' ga luí, nang lé taí jáng, nang eq rahá zung tô é bing lhunglhâng bâng é hí má, nang gi, myoqdong wó râ nghut lhê. ¹¹Hkâsu mù gâ le, yhumsing gùng lé waq toq é sù ó yuq nghut kôle, lhoq nyhum pyâm é hui râ nghut lhê; yhumsing gùng lé, lhoq nyhum é sù kúm gi, waq toq é hui râ nghut lhê." ga taí ri.

¹²Hau htâng, Yesuq yhang lé ji é yhum-sing hpó lé taí é gi, "Napzang, a nghut jáng, myinxûn lé nang byi tso nau le gi, náng é buinùm wui, âgu âmâng pé, mungmoq wui, sùt wó é yhumkyo chang pé lé hkâjî tso. Haú bang lé jì tsô é nghut jáng gi, yhangmoq nang lé dum jì tsô é eq, jeju dum tau kó râ nghut lhê. ¹³Nghut kôlhâng, nang poí kut mù, byi tso byi huq nau é nghut le gi, myùng bang, hkyi gyui loq hten bang eq myoqjit é bang lé, jì tso aq. ¹⁴Haú su kut jáng, nang hkungsô wó nyi râ nghut lhê. Yhangmoq nang lé jeju a wó tau kôlhâng, dingmán bang dum dui toq lo é buinyi má, hau é akyû lé, nang wó hkam yù râ nghut lhê." gâ ri.

Zoshuq Poí Mó Lé Dangtú Yu É Hkyô
Mht 22:1-10

¹⁵Yesuq eq rahá zô zung tô é byù rayuq gi, dang haú wó gyo jáng, "Garai Gasâng é mingdán má é zoshuq poí má wó zo râ sù gi, hkungsô wó nyi sù nghut râ." ga luí, Yesuq lé taí ri.

¹⁶Yesuq haú yuq lé tú taí é gi, "Byù rayuq gi, myinzang byi tso râ ga, zoshuq poí mó ralhûm hen to mù, byù myo myo lé ji tô ri. ¹⁷Zang byi tso râ yàm jé jáng, yhâng é dui-nhâng zoshâng lé, ji tô é bâng chyáng 'Lé keq hkoi, zoshuq jin to bê.' ga ê châng wut nhang ri.

¹⁸Nghut kôlhâng, haú bang banshoq gi, zoshuq poí má a é râ dông chyat he pyâm akô. Rayuq sù gi, 'Ngò yohtung rahkyang wui tô lhê; haú lé ê wú râ dut ri. Haú mù, ngo lé ahkáng byi shi laq.' ga yhang lé taí ri.

¹⁹Dum rayuq le, 'Ngò, nohtó ngo zúm wui tô lhê; haú pé lé dui nhang chyam wú râ dut ri; ngo lé ahkáng byi shi laq.' ga taí wô ho ri.

²⁰Dum rayuq le, 'Ngò myiwe hâng tô é a myáng shi mù, a wó lé.' ga taí wô ho ri.

²¹Haú jáng, dui-nhâng zoshâng taú lò mù, yhâng é yhumsing lé haú hkyô banshoq lò taí kyô ri. Haú hkûn, yhumsing hpó gi, nhikmó gyô yo mù, 'Wà má é hkyô mó hkyô zo hkat hkangmó má hân hân é mù luí, myùng bang, hkyi gyui loq hten bang eq myoqjit bang lé, é ji lò aq.' ga luí, yhâng é dui-nhâng zoshâng lé nhang kat ri.

²²Hau htâng má, dui-nhâng zoshâng gi, 'Yhumsing ê, nang nhang é eq rajung za

ban kut bê; nghut kôlhang, zùng rã jowò gi, mân tô ashî.' ga taí ri.

²³ Haû su ga jáng, yhumsîng hpó gi, 'Ngá yhûm byíng rã matú, wà yàm hkyô pé eq hkyâm yàm hkyô pé má htoq ê mù, myang é bang lé a wó le wó shoq ê tsing shuí lò aq.

²⁴ Nang lé ngò taí lé, hí lé ji to huí é bang rayuq lháng, ngá é zoshuq poí lé wó chyim wú rã a nghut.' ga luí, yhâng é dui-nhâng zoshâng lé taí ri." gâ ri.

Yesuq É Chángzo Wó Dut Rã Matú

Mht 10:37-38; 5:13; Mrk 9:50

²⁵ Byù hpûng mó Yesuq eq rahá e ló kô é hkûn, Yesuq gi, haû bang lé lhing wú luí, ²⁶ "Ngá chyáng lé sù ó yuq nghut kôle, yhumsîng é înu, îwa, yhangmyi, yhangzo eq, yhanggu, yhangmang, yhâng nhammó pé lé le, haû htoq agó, yhumsîng é asak lé le, ngo lé chyitdap é htoq má je chyitdap sù gi, ngá é chángzo a wó dut. ²⁷ Yhumsîng é tapzîng lé a waq é za, Ngá htâng châng é sù ó yuq nghut kôle, Ngá é chángzo a wó dut.

²⁸ Dangké, nungmoq chyáng mâ é byù rayuq yuq, tsehtung yhûm ralhûm saí nau le, yhang gi, yhûm haû ban saí rã matú, ngùn hkâ-myhó bàn rã eq yhang wó tô é ngùn luq a luq é lé, zùng mù luí, hí a sôn wú é byù nyi kó rã lhuí? ²⁹ Laq má mù, apûn awang gi, saí hi to mù luí, a wó lhoq pân é nghut jáng, ³⁰ myàng é bang banshoq èq, 'Shí yuq gi, apûn awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekô rã nghut lhê.

³¹ Dangké, hkohkâm rayuq gi, gyè zan rã hen le, gyezo í mun eq lé sù hkohkâm lé, gyezo ramûn eq za lhom wó zân ûng rã, a wó zân ûng rã lé, zùng mù luí, hí a myit wú é nyi rã lhuí? ³² A ûng rã dut le gi, gyè pé we we má nyi tô ashî hkûn lé, lagyo suwún pé lé nhang kat luí, simsaq rã matú htingrám pyám ra rã nghut lhê. ³³ Haû eq rajung za, nungmoq chyáng mâ é ó yuq nghut kôlhang, yhumsîng wó é zè banshoq lé, a pyâm to sù gi, ngá é chángzo wó dut rã a nghut.

³⁴ Xo gi, gè lhê. Nghut kôlhang, xomân kân byuq jáng gi, haû lé hai èq dum wó lhoq ngam yù rã lhuí? ³⁵ Haû gi, myigung matú le, myìhpún kut rã matú le, akyû a bò lo. Haû mù luí, shinggan shut kúm gi, dú pyám sê akô.

Gyo rã nohkyap dap sù gi, gyô yù sháng gaq." ga taí ri.

15

Byuq Byuq É Sau

Mht 18:12-14

¹ Ra-nyí lé, Yesuq é dang gyo kó rã ga, kang guq bang eq yubak dap bang gi, Yhâng chyáng lé zîng bum akô. ² Haû hkûn, Hparishe pé eq tarã sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shoq nyi ri." ga taí put nyi bum akô.

³ Haû mù, Yesuq yhangmoq lé dangtú dông taí é gi, ⁴ "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyhi pyâm to mù, byuq byuq é sau haû lé, myàng shoq a châng ho yu é, ó yuq wá nyi kó rã lhuí?

⁵ Byuq byuq é sau haû lé myang hô jáng, gyaí gau é i-myt èq goqsân htoq má bún kê chûng mù, ⁶ yhûm má jé jáng, yhâng é buinùm ji-myi wui eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga taí rã nghut lhê. ⁷ Haû eq rajung za, Ngò, nungmoq lé taí kôlé, myit lhing a rã é dingmán bang gaú xe gau yuq lé gabú é htoq, myit lhing é yubak dap sù rayuq é yanmai, mauhkûng htoq má, je riyhang gabú jowò dut rã nghut lhê.

Byuq Byuq É Ngùn Chap

⁸ Dum nghut jáng, dangtú ralhûm gi, myiwe rayuq, ngùn raxê chap wó é má, rachap byuq byuq é nghut le, yhang gi, my-ibung tap mù rayhûm é shum luí, myang yù shoq rago za, ho wú rã a nghut lhuí? ⁹ Haû lé ho myàng jáng le, yhâng é buinùm ji-myi wui eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chôm gabú sháng.' ga taí rã nghut lhê. ¹⁰ Haû eq rajung za, Ngò, nungmoq lé taí kôlé, myit lhing é yubak dap sù rayuq é yanmai, Garai Gasâng é maumang lagyô pé hí má, gabú jowò dut rã nghut lhê." gâ ri.

Byuq Byuq É Yuqzo

¹¹ Yesuq xoq taí é gi, "Byù rayuq gi, yuqzo í yuq wó ri. ¹² Haû nhik mâ é tiq sù yuq gi, yhâng wa lé, 'Âwa ê, ngò wó gíng é sutzè, ngo lé gàm byi laq.' ga dung jáng, yhâng

wa le yhangnhik tâng lé sutzè gàm byî kat ri.

¹³ Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chûng mù, mau we shut ê luî, haú jowò má, mingkan ngón hkyô châng é má yhang wó é ngunzè banshoq lé langsâ pyám bê. ¹⁴ Haú su kut ngunzè wó mi-wó lé ban langsâ pyâm é htâng má, haú mau má mutmó gyo é yanmai, yhang gi, asho awui dut lo nyi bê nghut ri. ¹⁵ Haú mù, haú mau mâ é byù rayuq chyáng, langchyáng ê kut le, haú yuq gi, yhang lé waq rém jang shut nhang kat mù, waq lé lhom zúng nhang ri. ¹⁶ Haú hkûn, yhang gi, waq jùm zô é shigyang cham pé lé lhang, zo naú shoq dut kôlhang, ó yuq le a byi zo kó nghut ri.

¹⁷ Haú mù, yhang myit bûn lo é gi, 'Ngá wâ chyáng nyi é langchyâng pé gi, agùn agó myàng zô nyi kó râ nghut lhê. Nghut kôlhang, ngò gi, shí jowò má, zo mut wuîshit é eq shi ló râ dut bê. ¹⁸ Ahkuî, ngò toq mù, ngá wâ chyáng taú ló luî, "Áwa ê, ngò gi, Garai Gasang lé le, nang lé le, shut bê. ¹⁹ Ahkuî mai ngò gi, nung zo nghû râ a gíng lo, hau é yanmai, náng é langchyáng rayuq dông za ngo lé nyi nhâng laq." nghû luî, ló taí râ.' gâ ri. ²⁰ Hau htâng, yhang toq luî, yhâng wâ chyáng ló le, yhang we we má ru nghut ashî hkûn mai, yhâng wa gi, yhang lé lhom myàng jáng, wú shogyo luî, din ê mù, yhangzô é lingzing má ê po pyik dap to luî, bopuq puq byî ri.

²¹ Haú hkûn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuî mai, ngò gi, nung zo nghû râ a gíng lo.' ga luî, yhâng wa lé dúng tôngbán ri.

²² Yhângwa kúm gi, yhâng é langchyâng pé lé, 'Réng dik é mebu hân hân yu lé mù, yhang lé hut byi keq; yhâng é loq má, loqchyop chyop byi keq; hkyî má le hkyî-tsung tsung byi keq. ²³ Tsô myum tô é nojûng zo le yu sat keq. Haú mù, nganhung gi, zoshuq poî kut mù chôm ngón sháng. ²⁴ Haú mù gâ le, ngá zo shí yuq gi, shi byuq é mai, ahkuî dum duì bê; byuq byuq é mai le, ahkuî dum myàng bê.' ga taí ri. Haú mù, yhangmoq gi, ngón ngón zo shuq ló bekô.

²⁵ Haú u lé, yhangzo ko sù yuq kúm gi, yò má nyi tô ri. Yhang gi, yò mai yhûm shut jé lo nyi é hkûn, zing út bat luî gó nyi é

htê lé lò wó gyô ri. ²⁶ Haú mù, langchyáng rayuq lé wut yù luî, haú hkyô lé yhang myî wú le, ²⁷ langchyáng haú gi, 'Nung gu dum taú jé lô bê. Haú mù, náng wa gi, nung gu wáng wáng zán zán dum taú jé lo é lé lhom myàng luî, tsô myum tô é nojûng zo lé sat bê nghut ri.' ga taí kyô ri.

²⁸ Dang haú lé wó gyo jáng, yhang gi, gyô nhik-yo luî, yhúmhkaú shut a wàng lo kut ri. Haú mù, yhâng wa htoq ê luî, yhang lé ê chyúq ri. ²⁹ Yhangzo kúm gi, 'Wú aq, ngò, shî-myháng shîlo náng é jùn dông kut luî, hkâ-nhám le náng dang lé a lu laí wú. Nghut kôlhang, ngò ngá é luzúm wuî eq ngón kún râ matú, bainám zo radu lhang radàm le nàng a byi wú shi. ³⁰ Shiwa myhî pé eq zum yap wún luî, náng é sutzè lé lhoq pân pyâm é sù nung zo haú dum taú jé lô jáng kúm gi, tsô myum tô é nojûng zo lé, yhâng é matú nàng sat byi bu-nhung!' ga luî, yhâng wa lé tû taí ri.

³¹ Yhângwa gi, 'Ngá zo ê, nàng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq banshoq gi, náng é chyat nghut lhê. ³² Nghut kôlhang, shí nung gu gi, shi byuq é mai ahkuî dum duì bê; byuq byuq é mai le, dum myàng bê. Haú mù, gabú hpo nghut bê.' ga luî, yhang lé taí ri." gâ ri.

16

Hpaqchyî Ge Dâ É Sùt Zum Sù

¹ Yesuq, Yhâng é chángzô pé lé taí é gi, "Sahtê rayuq chyáng sùt zum sù rayuq nyi ri. Haú yuq gi, yhâng yhumsing é sutzè pé lé jai hpyuq pyám ri ga, yhâng yhumsing é hí má, yhang lé mara lé hun akô. ² Haú hkûn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haú gi, hkâsu lhú? Nàng sùt zûm é eq séng luî kut tô é jihpán laiká lé lò shit wú aq. Hkâsu mù gâ le, ahkuî mai nàng gi, sùt zum sù wó kut lo râ a nghut lo.' ga taí ri.

³ Haú jáng, sùt zum sù gi, 'Ahkuî, ngò hkâsu kut lo râ lhú? Ngá é yhumsing gi, ngo lé sùt zum ayá mai lhoq hkyô pyám bê. Myì du myì hkop zo râ le ngò wum a bò; dung zo dung shuq râ le ngò hoq ri. ⁴ Ngo lé sùt zûm é ayá mai hkyô pyâm htâng má, supé ngo lé yhangmoq é yhûm má lhom hap yù râ matú, hkâsu kut râ hkyô lé ngò sé bê.' ga wó myit rot jáng, ⁵ yhang gi,

yhâng yhumsîng hpó lé chyîn dap tô é bang rayuq htâng rayuq lé wut yù mù, sâng-hî yuq lé, 'Ngá yhumsîng hpô chyáng nàng chyîn hkâ-myhó dap tô lhê lú?' ga myi jáng, ⁶haú yuq gi, 'Xû rashô pûng dap lhê.' ga tû taí ri.

Haú jáng, sùt zum sù gi, 'Náng é jihpán yù luí, hân zùng mù, ngo xê pûng kut kê to aq.' ga yhang lé taí ri.

⁷Dum rayuq lé, 'Nàng hkâ-myhó dap tô lhê lú?' ga myi jáng, haú yuq gi, 'Sungsô rashô bûng dap lhê.' ga tû taí ri. Sutzum sù gi, haú yuq lé, 'Náng é jihpán má shit xê bûng kut kê to aq.' ga taí ri.

⁸Haú a dingmán é sùt zum sù lé, yhum-sîng hpó gi, hpaqchyí ge da sù nghut ri ga hkya-ôn ri. Ngò shí lé taí é gi, mingkan zo wuî gi, yhangmoq é mingkan eq sêng é hkyô pé má, maubó gung é yhangzo pê* htoq hpaqchyí je bò kê é yanmai nghut lhê. ⁹Haú mù luí, Ngò nungmoq lé taí kyo kêle, a tara é sutzè pé èq buinùm ho nyi keq, haú mù, sutzè haú htûm byuq jáng, nungmoq lé, ahtum abyuq joq tô é yhûm má, lhom hap yu é hui kó râ nghut lhê.

¹⁰Tiq é mù má wó lum é sù ó yuq nghut kôlhâng, mù mó má le wó lûm râ nghut lhê. Tiq é mù má lhum a zuí é sù ó yuq nghut kôlhâng, mù mó má le lhumzui râ a nghut. ¹¹Haú mù, mingkan sutzè má lháng nungmoq lé a wó lûm kê é nghut le gi, haú tengmán é sutzè lé, nungmoq chyáng ó yuq wá kâm ap byi râ lú? ¹²Supé é sutzè má, nungmoq lé a wó lûm kê é nghut le gi, nungmoq sîng âng é sutzè lé, nungmoq chyáng ó yuq wá kâm ap byi râ lú?

¹³Dui-nhâng zoshâng ó yuq nghut kôlhâng, yhumsîng í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé, chyitdap râ nghut lhê; haú a nghut jáng, rayuq lé gi, lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut." ga taí ri.

¹⁴Ngùn myoqnoq é Hparishe pé gi, dang haú banshoq lé wó gyo kôjáng, Yesuq lé wuizui kut pyám byí akô. ¹⁵Haú mù luí, Yesuq gi, yhangmoq lé, "Nungmoq gi, byu pé hí má yhumsîng gùng lé yhumsîng

dingmán bang su kut shit mhaú é bang nghut akô; nghut kôlhâng, Garai Gasang gi, nungmoq é i-myt unghkaú lé sé sù nghut lhê. Byù é hí má hpaudap é pé gi, Garai Gasâng é hí má achaaq achyut é nghut nyi ri.

¹⁶Jep é tarâ† eq myiqhtoí pê é dang, ahko ahkáng wó tô é ahkýing gi, wui-myhup sará Yohan jé lé é buinyi jé shoq nghut bê. Haú hkýing mai gi, Garai Gasâng é mingdán hkyô gabú danglù lé, hko kyô nyi mù, yuq du jup gi, haú hkyô má htûng chying wang ló bum akô. ¹⁷Jep é tarâ mâ é tiq dik é dangjí eq myihkyet zo ralhum lé wó lhoq hten râ htoq, mauhkûng eq myigùng hten râ gi, je luí râ nghut lhê.

¹⁸Dangké, yhumsîng é yhangmyi lé kâng pyám mù, myiwe gotù dum hâng yu é sù ó yuq nghut kêle, su-myi lú é sù nghut bê; yhumsîng é yhanglâng eq gang bê myiwe lé hâng yu é sù le, su-myi lú é sù dut bê nghut ri." ga taí ri.

Sahtê Hpó Eq Lazaruq

¹⁹Yesuq dum xoq taí é gi, "Radàm lé, sahtê rayuq gi, nè é eq nú-nhâm é mebu wut mù luí, nyí nyí bui bui zo ngón shuq ngón nyi ri. ²⁰Yhâng é hkúmdong má gi, ragùngdû é jeq byi tô é Lazaruq gâ é dung zo sù rayuq lé, lé nyhi tô akô. ²¹Haú yuq gi, sahtê wá é siboí mai gyó é agyó ahtâng lé, wú zô nau nyi ri. Hkui pé le yhâng é dàm pé má, lé yoq byí nyi akô.

²²Htâng má, haú dung zo sù shi byuq jáng, maumang lagyô pé gi, mauhkûng má nyi é Abraham é tanghkoí má yhang lé shuí ló byí akô. Sahtê wá le shi byuq luí, yhûm pyám bekô nghut ri. ²³Sahtê wá gi, ngaraí ming má dik shoq hpuzô nyi mù luí, tu wú kat le, we we má Abraham lé le, yhâng é tanghkoí mâ é Lazaruq lé le, myàng kat ri. ²⁴Haú mù, yhang gi, 'Áwa Abraham ê, ngo lé shogyo yù laq ô. Ngò gi, shí myi htum má achyí aku nyé é hui zô nyi ri. Haú mù, Lazaruq gi, yhâng é loqnyhui û èq wuì má tik yù mù, ngá é shô má wuì ra-poq zo hkâlháng lé tik cham byi sháng gaq, yhang lé ngá chyáng nhang kat byi laq ô!' ga luí, dúng wut nyi ri.

* 16:8 Maubó gung é yhangzô pé nghu é gi, Garai Gasâng é yhangzô pé lé taí é nghut lhê. † 16:16 Jep é tarâ gâ é gi, Garai Gasang, Mosheq mai nga-nhúng lé byí tô é tarâ lé gâ lhê.

²⁵ Haú hkûn, Abraham gi, 'Ngá zo ê, asak dui tô é u lé, nàng nyi ngón yuqyo tô é hkûn, Lazaruq gi, asho awui dut é lé, bûn nyi aq. Ahkuí, yhang kúm gi, shî má lo nyi byán to bê; nàng chyaú gi, jamjau hui zô nyi bê. ²⁶ Haú mai gotû gi, shî mai nungmoq chyáng dap lé naú bang a wó dap shoq le, haú mai ngamoq chyáng ó a wó dap lé râ matú le, ngamoq eq nungmoq é gyoro má, nik dik é langhkung mó eq kyo pyâm to bê nghut ri.' ga tâ ri.

²⁷ Sahtê wá gi, 'Áwa ê, haú nghut le gi, ngò, nang lé dúng nau ri. Ngá gû pé ngo yuq nyi ashî; yhangmoq le ísu hpuzô é jowò má a jé sháng gaq, ²⁸ yhangmoq myit lhîng shoq ló taí pun râ matú, Lazaruq lé ngá wá yhûm shut nhang kat byi laq ô!' ga luí, dúng wut ngau nyi ri.

²⁹ Abraham gi, 'Yhangmoq chyáng, Mosheq eq myiqhtoí pé nyi lhê; haú bang dang lé gyô yù kó sháng gaq.' ga tâ ri.

³⁰ Sahtê wá gi, 'Áwa Abraham ê, haú su a nghut. Shi byuq é bang mâ é rayuq yuq yhangmoq chyáng dum taú lo é nghut le kúm gi, yhangmoq myit lhîng kó râ nghut lhê.' ga tâ ri.

³¹ Abraham gi, 'Mosheq eq myiqhtoí pé é dang lé yhangmoq a gyo kô é nghut le gi, shi byuq é bang mâ é rayuq yuq dum dui toq ló mù, ló taí kyo kôlhâng, kâm gyo kó râ a nghut.' ga luí, yhang lé tâ ri." gâ ri.

17

Mara Hkyut É Hkyô Eq Lumjîng Myit

Mht 18:6-7, 21-22; Mrk 9:42

¹ Yesuq, Yhâng chángzô pé lé taí é gi, "Byu pé lé mara kut shut nhang é hkyô gi, joq htoq lô râ za nghut lhê. Nghut kôlhâng, mara kut shut nhang é hkyô lé lhoq htoq é sù gi, dingnyé wó râ. ² Zoshâng shí bang mâ é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má ê dú hkyô pyâm é huí é nghut le gi, yhang é matú je gè râ nghut lhê. ³ Nungmoq gi, yhumsîng gùng yhumsîng sidiq keq.

Nunggu nungmang nàng lé mara kut shut é nghut le gi, yhang lé tan luí, mho-qshit aq; yhang myit lhîng é nghut le gi, yhang lé mara hkyut pyám byi aq. ⁴ Ra-nyí má za, yhang nang lé nyhit dâm shut mù, 'Ngò myit lhîng bê.' ga luí, nang lé nyhit

dâm dum tôngbán le, tôngbán hkangmó, nàng, yhâng é mara lé hkyut pyám byi aq." gâ ri.

⁵ Haú hkûn, lagyô pé gi, "Ngamoq é lumjîng myit lé lhoq ko byi laq." ga Yhum-sîng lé dúng akô.

⁶ Haú jáng, Yhumsîng gi, "Nungmoq é lumjîng myit angshi cham í za hkâlhang bò kô é nghut le gi, shî hangwâ gàm lé, 'Sikgâm ê, amyit eq roq bún luí, wuìshuq lung-aú má, ê yuq to aq ô.' gâ le, nungmoq é dang lé sikgâm haú gyo byi râ nghut lhê.

⁷ Dangké, nungmoq mâ é rayuq yuq chyáng, yò hpuq é, a nghut jáng, sau zúng é dui-nhâng zoshâng rayuq nyi é nghut le, dui-nhâng zoshâng haú yohtung pá mai jé lo é hkûn, yhang lé, 'Hân zúng mù zang zo aq.' ga luí, ó yuq wá taí kó râ lhú?

⁸ Haú dui-nhâng zoshâng lé sheq, 'Ngò zo râ myinzang lajang aq. Ngò bàn zo shoq hpyidum má hpyihit hit mù, xun zang wú nyí aq. Ngò bàn zo jáng sheq nàng wó zo râ nghut lhê.' ga luí, taí râ a nghut kó lhú?

⁹ Taí mitaí banshoq lé, dui-nhâng zoshâng ban zui saí byí é nghut kôlhâng, yhang lé jeju bûn é dang ó yuq wá taí wú akô lhú?

¹⁰ Haú eq rajung za, nungmoq gi, taí mitaí ban kut jáng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut râ é mù lé za lhoq pân é bang nghut lhê.' nghû taí keq." ga tâ ri.

Manggâm Dap Bang Raxê Yuq Lé, Yesuq Lhoq Gê Byí É Hkyô

¹¹ Ahkuí, Yesuq gi, Yerusalem wà mó shut e ló nyi le, Samariq mau eq Galile mau gyoro mai lai e ló ri. ¹² Yhang, wà rawà shut wang ló é hkûn, manggâm dap é byù raxê yuq eq huí ri. Haú bang gi, we mai yap to mù, Yesuq lé, ¹³ "Yesuq, Zau ê, ngamoq lé shogyô yù laq ô." ga luí, wut garû bum akô.

¹⁴ Yesuq gi, yhangmoq lé myàng jáng, "Nungmoq é gungdu lé, hkyangjông pé chyáng ló tûn shit keq." ga yhangmoq lé taí ri. Yhangmoq gi, hkyô má ru sô nyi ashî le lháng, sân-yúng ló byuq bekô.

¹⁵ Yhangmoq chyáng mâ é rayuq gi, yhumsing gungdu ge byuq é lé myàng jáng, Yesuq chyáng dum taú ê mù, htê mó eq Garai Gasang lé hkya-ôn é eq, ¹⁶ Yesuq é hkyí wang má paí gop to luí, Yhang lé jeju

hkyá-ôn nyi ri. Haú yuq gi, Samariq byù nghut ri.

¹⁷ Haú mù, Yesuq gi, "Sân-yúng byuq é gi, raxê yuq a nghut lú? Gau yuq gi, hká ló byuq bekô? ¹⁸ Shî tûngbaù rayuq mai lai lú, dum taù lé mù Garai Gasang lé hkyá-ôn é byù, rayuq le a nyi lo kó lú?" ga taù ri. ¹⁹ Hau htàng, Yesuq gi, haú yuq lé, "Toq mù ló aq, náng é lumjìng myit gi, nang lé lhoq sân-yúng byi bê nghut ri." ga taù ri.

Garai Gasâng É Mingdán Jé Lô Râ Hkyô
Mht 24:23-28, 37-41

²⁰ Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myî akô. Haú jáng, Yesuq gi, "Garai Gasâng é mingdán jé lé râ gi, myoq èq wú lú myàng râ a nghut. ²¹ Garai Gasâng é mingdán gi, nungmoq yuq jup é ahkaù má nghut nyi é yanmai, 'Wú keq, shí má joq ri, mhó má joq ri.' ga lú le, byu pé gi, wó taí kó râ a nghut." ga lú, yhangmoq lé tû taù ri.

²² Chángzô pé lé le Yesuq taù é gi, "Haú Byu Yhangzô é buinyi ra-nyí lé, nungmoq myàng nau dik é ahkýing jé râ. Nghut kôlhang, nungmoq gi, Byu Yhangzô lé wó myàng kó râ a nghut. ²³ Haú buinyi má, byu pé gi, nungmoq lé, 'Yhang shí má nyi ri.' haú a nghut jáng, 'Yhang hê má nyi ri.' ga taí kó râ nghut lhê. Nghut kôlhang, hkâ-ê; hkâcháng kó. ²⁴ Hkâsu mù gâ le, maumyî rahkyam má hpyat é maulhap gi, maumyî gó hkyam jé shoq duqbó é su, haú Byu Yhangzô dum jé lé é buinyi má le dut râ nghut lhê. ²⁵ Nghut kôlhang, haú su a dut htoq shimá, Yhang gi, zing-rî é myo myo lé le, ipyat shi mâ é byu pê èq he-ngik pyâm é lé le, hui shirâ nghut lhê.

²⁶ Noaq é tsîn pyat má dut é su, haú Byu Yhangzô jé lé é buinyi má le dut râ nghut lhê. ²⁷ Byu pé gi, Noaq, wui-sanghpo mó hkaù má wang é hkûn jé shoq, zo zo shuq shuq, myi byi myi yû, myiháng kut lú, nyi nyi bum akô. Haú hkûn, dowuù dítg lô mù, yhangmoq banshoq lé lo lhoq htên pyám bê nghut ri.

²⁸ Haú eq rajung za, Lot é pyat má le, byu pé gi, zo mù, shuq mù, ung zo wui zo, ho zo ho shuq, yhûm kut lú nyi nyi akô. ²⁹ Nghut kôlhang, Sodom wà mai Lot htoq ló

é buinyi má, mauhkûng mai, myi eq hang gi, mau su wò gyó lô lú, lhunglhang lé lhoq htên pyám bê nghut ri.

³⁰ Haú Byu Yhangzô, lé htoq shit é buinyi má le, haú eq rajung za dut râ nghut lhê. ³¹ Haú buinyi má, yhumhkûng* htoq má nyi tô é sù gi, yhúmkaù mâ é zè lé, a ló gyó wang yù lo sháng gaq. Yò má nyi tô é sù gi, haú eq rajung za, yhûm shut a taù ló lo sháng gaq. ³² Lot é yhangmyi† lé bûn nyi keq. ³³ Yhumsing é asak duì hkyô hô sù ó yuq nghut kôle, asak sum râ nghut lhê; asak sum pyâm é sù kúm gi, asak wó duì râ nghut lhê. ³⁴ Ngò, nungmoq lé taù kyo kôle, haú myîn lé, yhupjang ralhum má byù í yuq nyi to kô le, rayuq gi, shuì yu é hui mù, rayuq gi, myit gyó to râ nghut lhê. ³⁵ Myiwe í yuq lú má rahá za chòm lú nyi tô le; rayuq gi, shuì yu é hui mù, rayuq gi, myit gyó pyâm to râ nghut lhê. ³⁶ Yohtung má byù í yuq nyi to le, rayuq gi, shuì yu é hui lú, rayuq gi, myit gyó pyâm to berâ nghut lhê." gâ ri.

³⁷ Haú hkûn, chángzô pé gi, "Yhumsing Yesuq ê, haú gi, hká gyo má dut râ lú?" ga lú, Yesuq lé myi kôjáng, Yhang gi, "Màng leq é jang má, langdâ pé, lé zing bùm râ nghut lhê." ga lú, yhangmoq lé tû taù ri.

18

Chuimó Myhí Eq Tarâ Agyi É Hkyô Lé Dangtú Yù É Hkyô

¹ Yesuq, Yhâng é chángzô pé lé, myit wum a gyuí é za, hkâ-nhám le kyûdûng nyi râ hkyô lé, dangtú dông mhoqshit é gi, ² "Wà rawà má, Garai Gasang lé le a gyuq hoq, byù lé le haì su a ngàm é tarâ agyi rayuq nyi ri. ³ Haú wà má chuimó myhí rayuq le nyi ri. Yhang gi, haú tarâ agyi wá chyáng è lú, 'Ngò eq amù htoq sù lé, yhâng é mara eq rajung za, jéyáng byi laq.' ga lú, è dum taí taí kut nyi ri.

⁴ Nghut kôlhang, tarâ agyi wá gi, ahkýing rayoq zo jé shoq tarâ a jéyáng byi é tô tô ri. Hau htàng má, yhang gi, 'Ngò, Garai Gasang lé le a gyuq a hoq, byù lé le haì su a ngàm, ⁵ nghut kôlhang, chuimó myhí shí yuq é amù lé, ngò a jéyáng a doqdan byi é nghut le gi, yhang dum lé lé kut mù, ngo lé

* 17:31 Yudaq byu pê é yhumhkûng gi, rá é nghut lhê mù, nyi kún jang kut akô. † 17:32 Lot é yhangmyi gi, Sodom wà shut dum taù lhang wú é yanmai, Garai Gasang lhoq hten pyâm é hui sù nghut lhê.

myit hpêbù nhâng râ dut ri. Haû mù, ngò yhâng é amû lé jéyáng byi râ.' ga, yhâng é unghkaû má myit yu ri." gâ ri.

⁶Haû mù luî, Yhumsing Yesuq gi, "A ding a mán é tarâ agyì wá taí é dang mai mhoq yû keq. ⁷Garai Gasang gi, Yhang lé nyí myín wut dúng nyi é, Yhang hkyin yu to bê bang lé, tarâ é đông a kut byî é gi, myáng myáng nyi to râ lúhú? ⁸Ngò, nungmoq lé taí kôlé, Garai Gasang gi, yhangmoq lé hân yhang tengmán é đông jéyáng byi berâ nghut lhê. Nghut kôlhang, haû Byu Yhangzo jé lé é buinyì má, lumjín hkyô lé gi, mingkan htoq má myang wú shirâ lúhú?" ga taí ri.

Hparishe Eq Kang Guq Sû Kyûdung É Hkyô

⁹Yhumsing gùng lé dingmán bun luî, byù góbang lé wú tiq é bang ra-am lé, Yesuq dangtú đông taí é gi, ¹⁰"Byu í yuq kyûdung kó râ ga, noqkuq yhûm má doq e akô. Rayuq gi, Hparishe, rayuq gi, kang guq sù nghut ri. ¹¹Hparishe hpó gi, yap to luî, 'Garai Gasang ê, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agó, shî kang guq sù su le, a nghut é yanmai, ngò nàng lé jeju bûn lhê ô! ¹²Ngò gi, rabat má zoshuq í dâm gám nyi lhê; ngò wó yu é gû mâ é xê gambùm ragambùm le kat nyi lhê.' ga luî, yhang baú yhang gotû kut dúng nyi ri.

¹³Kang guq sù kúm gi, we we má yap to mù, mauhkûng shut lháng a wám tu wú é za, wànggàng bat luî, 'Garai Gasang ê, shî yubak dap sù ngo lé, shogyô yù laq ò!' ga dúng ri.

¹⁴Ngò, nungmoq lé taí kôlé, kang guq sù kúm gi, Garai Gasang é hí má mara hkyut san byî é lé wó yû luî, yhûm shut dum taû lô bê; nghut kôlhang, Hparishe wá gi, a wó nghut ri. Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê; yhumsing gùng lé lhoq nyhum é sù kúm gi, waq toq é hui râ nghut lhê." ga taí ri.

Zoshâng Wuì Lé Yesuq Shimân Byî É Hkyô
Mht 19:13-15; Mrk 10:13-16

¹⁵Byu pé gi, zonú wuì lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haû lé myàng jáng, lhom tân hkûm akô nghut ri. ¹⁶Nghut kôlhang, Yesuq gi, zoshâng wuì lé, wut yù

luî, "Haû zoshâng wuì lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasang é mingdán gi, haû sù é bang é mingdán ru nghut lhê. ¹⁷Ngò, nungmoq lé teng za taí kôlé, Garai Gasang é mingdán lé, zoshâng su kut a lhom hap yu é nghut le gi, mingdán haû má gè gè yhang wó wâng râ a nghut." ga taí ri.

Ayá Wó É Sahtê Hpó

Mht 19:16-30; Mrk 10:17-31

¹⁸Ayá wó é byù rayuq le, Yesuq lé, "Ge é Sará ê, ahtum abyuq é asak wó yû râ matú, ngò haí kut ra râ lúhú?" ga myî ri.

¹⁹Yesuq gi, "Haî mù, Ngo lé ge é Sará nghu lhê lúhú? Garai Gasang mai lai luî, ge é ó yuq le a nyi. ²⁰Jep é tarâ má, 'Su-myi sulàng hkâlú, byù hkâsat, hkâhkau, a teng a mán é saksé hkâhkám, nángnu nángwa lé hkungga aq.' gâ é dang pé lé, nàng sé gû bê." ga luî, yhang lé tû taí ri.

²¹Haú yuq gi, "Haú pé banshoq lé, ngò, zoshâng hkûn mai cháng bê nghut lhê." ga taí ri.

²²Yesuq gi, dang haú lé wó gyo jáng, "Nàng kut râ rajung râ tô ashî; nàng wó miwó lé ûng pyám luî, myùng bang lé byî pyám aq; haú jáng, nàng, mauhkûng htoq má sutzè wó râ nghut lhê; haû mù, Ngá htâng lé cháng aq." ga luî, yhang lé taí ri.

²³Haú yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri. ²⁴Yesuq gi, haú yuq lé wú luî, "Sutzè wó bang gi, Garai Gasang é mingdán má wàng râ matú, haû-í yhang wuì ri-nhung! ²⁵Sutzè wó sù rayuq, Garai Gasang é mingdán má wó wâng râ htoq, gola-uq radu âpno mai wó wang lai râ gi, je lùì râ nghut lhê." ga taí ri.

²⁶Dang haú lé wó gyô é bang gi, "Haû su ru nghut le gi, ó yuq za hkyi yu é hui râ nghut lhê lúhú?" ga myî bum akô nghut ri.

²⁷Haú hkûn, Yesuq gi, "Byù a wó kut é hkyô lé, Garai Gasang gi, wó kut lhê." ga taí kyô ri.

²⁸Haú hkûn, Petruq gi, Yesuq lé, "Wú aq, ngamoq gi, wó miwó tô pyâm to luî, Náng htâng cháng bê nghut lhê." ga taí jáng,

²⁹Yesuq gi, "Ngò, nungmoq lé teng za taí kôlé, Garai Gasang é mingdán é yanmai, yhumsing é yhûm, yhumsing é yhangmyi, yhumsing é âgu âmang, yhumsing é înu

îwa, yhumsing é yhangzô pé lé, pyâm to sù ó yuq nghut kôle, ³⁰shí pyat má, akyû myo myo wó hkam yù râ htoq agó, htang pyat má le, ahtum abyuq é asak a wó yu é gi, a nyi râ nghut lhê." ga luî, yhangmoq lé taí ri.

Yesuq, Yhang Shî Hkám Râ Lé Dum Taí É Hkyô

Mht 20:29-34; Mrk 10:46-52

³¹Yesuq gi, Yhâng é lagyô pé raxe í yuq lé gotû kut wut yù mù, "Gyô wú keq, ngan-ning gi, Yerusalem wà mó shut doq ló nyi é nghut lhê. Haú má jé jáng, haú Byu Yhangzo eq séng luî, myiqhtoî pé kâ tô é banshoq gi, dik lò berâ nghut lhê. ³²Hkâsu mù gâ le, Byu Yhangzo gi, tûngbaù pé é loq má ap pyâm é hui luî, haú bâng èq Yhang lé, wuizui kut pyâm é, rhoî rip e, sòkan byé gyûn é, nhuq bat é kut yû mù, sat pyám kó râ nghut lhê. ³³Hau htâng sum nyí nghû râ buinyi má, Yhang gi, dum dui toq lô râ nghut lhê." ga luî, yhangmoq lé taí ri.

³⁴Lagyo pé gi, dang haú pé rahkun lé lhang a sê gyo kó; dang hau é lichyúm gi, yhangmoq é hí má zaú nghop tô é nghut é yanmai, Yhang haí taí nyi é hkyô pé lé yhangmoq a sé kó nghut ri.

Dung Zo É Myoqjit Sù Lé, Yesuq, Myoq Dum Myàng Nhang É Hkyô

³⁵Ahkuî, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri. ³⁶Yhang gi, byù rajùm rayò sô laí ló é htê lé wó gyo jáng, haú haí dut nyi é hkyô lé, myi kat ri.

³⁷Haú hkûn, yhangmoq gi, "Nazaret wà byù Yesuq laí ló ri." ga luî, yhang lé taí kyo akô.

³⁸Haú su gâ é lé wó gyo jáng, yhang gi, "Dawiq é Yhangzo Yesuq ê, ngo lé shogyo yù laq ô!" ga wut dúng kat ri.

³⁹Hí má laí ló é bang gi, zim za nyi râ matú yhang lé tân hkúm akô; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang htê mó o mó èq wut dúng kat ri.

⁴⁰Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myoqjit sù Yhâng nàm má jé lé jáng, Yesuq gi, ⁴¹"Ngò, nàng lé haí kut byi râ ô nau ri lhú?" ga, yhang lé myi kat ri.

Haú yuq gi, "Yhumsîng ê, ngò myoq myàng nau ri." ga tû taí ri.

⁴²Hau hkûn, Yesuq gi, "Náng myoq myàng sháng gaq! Náng é lumjîng myit gi, nang lé lhoq gê byi bê nghut ri." ga, yhang lé taí ri. ⁴³Haú yuq gi, haú hkûn jáng, yhang myoq wó myâng mù, Garai Gasang lé hkya-on uchyang Yesuq htâng cháng bê. Lhunglhang bang haú lé myàng kôjáng, Garai Gasang lé hkya-ôn nyi bum akô.

19

Yesuq Eq Zake

¹Yesuq gi, Yerihko wà má wàng mù, sô laí ló nyi ri. ²Haú hkûn, haú wâ má, Zake gâ é kang guq agyì rayuq nyi ri; haú yuq gi, sutzè wó sù nghut ri. ³Yhang gi, Yesuq hká yuq nghut é lé myàng nau kôlhang, nyhûm sù nghut é htoq agó, byù rajùm rayò chyîn chyap tô é yanmai, a wó myâng nghut ri. ⁴Haú mù, yhang gi, Yesuq lé wó myâng shoq ga, Yesuq laí ló râ hkyô hí shut din ê mù, hkohúm gâm htoq má ê doq zung tô ri.

⁵Yesuq gi, haú jowò má jé jáng, tu wú kat luî, "Zake ê, hân gyó lô aq; hkû-nyí ngò náng yhûm má bíng râ nghut lhê." ga taí ri. ⁶Haú jáng, Zake gi, hân hân gyó ló mù, gabú dik é èq Yesuq lé lhom hkulum yu ri.

⁷Haú má nyi bang banshoq gi, haú lé myàng jáng, "Yhang gi, yubak dap sù rayuq chyáng bíng kut râ ga wang e ló bê." ga luî, mara hûn dang taí nyi bum akô.

⁸Zake kúm gi, toq yap mù, "Yhumsîng Yesuq ê, ngò wó é sutzè rawuí gû myùng bang lé gàm byí pyám râ; ngò záng mop zô pyâm é byù rayuq yuq nyi le gi, myi tú dum tau byi râ." ga Yhumsîng Yesuq lé taí ri.

⁹Haú hkûn, Yesuq gi, "Shí yuq le, Abraham é yhangzo* rayuq nghut é yanmai, hkû-nyí shí yhûm má hkyi yù hkyô jé bê, ¹⁰hkâsu mù gâ le, haú Byu Yhangzo gi, byuq byuq bê bang lé, hkat hô mù hkyi yù râ matú, jé lé sù nghut lhê." ga luî, Zake lé taí ri.

Hkohkam É Dui-nhâng Zoshâng Raxê Yuq Mht 25:14-30

¹¹Haú hkyô lé, yhangmoq gyô nyi bùm kô é hkûn, Yesuq gi, Yerusalem wà mó má jé râ chyâng lò bê nghut é yanmai le, Garai

* 19:9 Abraham é yhangzo nghû é lichyúm gi, Abraham su Garai Gasang lé lumjîng é sù lé gâ lhê.

Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhùm dông dum taí jat é gi,¹² "Aróng wó sù byù rayuq gi, hkohkâm ayá ê hkam yù luí, dum taú lò râ ga, wê é ming shut ê râ matú hen nyi ri.¹³ Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joí ap byi luí, 'Ngò dum taú jé lô shoq, shi èq hpugá gá nyí láng keq.' ga luí, yhangmoq lé pying tô ri.

¹⁴ Yhâng é mingbyû wuì kúm gi, yhang lé a ngui bum é nghut mù luí, yhang e ló é htâng má, 'Shí yuq ngamoq ahtoq má up nyi râ lé, ngamoq a ô nau.' ga luí, ê taí râ matú lagyo châng nhang kat akô.

¹⁵ Nghut kôlhang, yhang kúm gi, hkohkâm ayá wó hkam yù luí, dum taú jé lô jáng, yhang ngùn ap byi tô é dui-nhâng zoshâng wuì lé, hpugá gá luí, amyat hkâ-myhó wó ho jat bê hkyô lé sé nau luí, yhangmoq lé wut nhang kat ri.

¹⁶ Haú hkûn, sâng-hî yuq gi, lé mù luí, 'Yhumsîng ê, ngò, náng é ngùn rajoí mai, amyat raxê joí wó ho jat yù bê.' ga taí ri.

¹⁷ Haú hkûn, yhumsîng hpó gi, 'Arâ! Nghut bê, kyet é dui-nhâng zoshâng ê, náng gi, je tiq é mù má lháng wó lum é sù nghut é yanmai, wà raxê lé upzo lo aq hkoi.' ga luí, yhang lé taí ri.

¹⁸ Htang yuq le, lé mù luí, 'Yhumsîng ê, ngò, náng é ngùn rajoí mai, amyat ngo joí wó ho jat yù bê.' gâ ri.

¹⁹ Yhumsîng gi, haú yuq lé, 'Nàng gi, wà ngo wâ lé up lo aq hkoi.' ga taí ri.

²⁰ Dum rayuq le, lé mù luí, 'Yhumsîng ê, náng é ngùn rajoí lé a byuq shoq, ngò panchoq èq htup tô lhê; wú aq, shî nghut lhê.²¹ Nàng gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wuì nghut é yanmai, nang lé ngò gyuq ri.' ga taí ri.

²² Haú hkûn, yhumsîng gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyáng râ nghut lhê. Ngò gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wuì nghut é hkyô lé, náng sê to gù nghut le nhîng,²³ ngá ngùn lé, ngò dum taú jé lô jáng, aráng eq amyat

wó yù shoq, ngùn hpún kat jang má, haí mù a kat tô é lhú?' ga yhang lé taí ri.

²⁴ Haú htâng, yhumsîng hpó gi, ayàm má yap tô é bang lé, 'Haú ngùn rajoí lé yhâng chyáng mai taú yù luí, raxê joí wó sù lé jat byi keq.' ga taí ri.

²⁵ Haú bang gi, 'Yhumsîng ê, yhang gi, raxê joí wó to bê lé nhîng.' ga akô.

²⁶ Haú jáng, yhang gi, 'Ngò, nungmoq lé taí kôlé, wó sù† ó yuq le, jat byi é hui shirâ nghut lhê; a wó su chyáng mai kúm gi, yhang wó tô é lé lháng, yu pyám byi shirâ nghut lhê.²⁷ Ahkuí, yhangmoq ahtoq má ngò hkohkâm kut râ lé a ô nau é, ngá é gyè pé lé, shí má shuí lé mù, ngá hí má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wang E Ló É Hkyô

Mht 21:1-11; Mrk 11:1-11; Yhn 12:12-19

²⁸ Yesuq gi, shí hkyô pé lé ban taí jáng, hí má so luí, Yerusalem wà mó shut doq lô nyi ri.²⁹ Yesuq gi, Yhâng é chángzô pé eq Tsanlun Bùm mâ é Bethpage wà eq Behtani wà má jé lô kojáng, Yhâng é chángzo í yuq lé,³⁰ "Nungnhik, hí mâ é wà má ê keq; wà haú má wang é hkûn jáng, ó le a jî wú shî é logúng zo tuí tô láng é lé, ê myâng kó râ nghut lhê; haú lé hpyi yù mù, Ngá chyáng she lò keq.³¹ Byù rayuq yuq mai, 'Haú haí mù hpyi nyi akô?' ga nungnhik lé myi kôjáng, 'Shí du lé, haú Yhumsîng râ ri gâ.' nghú tû taí keq." ga pyíng luí, nhang kat ri.

³² Nhang kat é sù nhik ê jé lé, Yesuq taí kat é dông yhang, dut to láng é lé ê myang akô.

³³ Yhangnhik logúng zo haú lé hpyi nyi kô é hkûn, yhumsîng wuì gi, "Haú logúng zo lé, haí mù hpyi nyi akô lhú?" ga luí, yhangnhik lé myí akô.

³⁴ Haú jáng, yhangnhik gi, "Shí du lé haú Yhumsîng râ ri gâ." ga taí akô.

³⁵ Yhangnhik gi, haú logúng zo lé Yesuq chyáng she lò mù, yhangmoq é buhîng pé lé logúng ahtoq má buí luí, Yesuq lé doq ji nhang akô.³⁶ Haú su kut, Yhang ji e ló nyi le, byu pé gi, yhangmoq é buhîng pé lé hkyô má hkang byi akô.

³⁷ Ahkuí, Tsanlun Bùm hkêgyó gyó ló é jowò eq chyáng lo é mai gi, chángzô pé banshoq bang, yhangmoq myang é laklaí kumlhá pê é yanmai, gabú myit mai htê mó

† 19:26 Wó sù nghu é gi, yhumsîng a-tsam lé rago dat chûng sù lé taí é nghut lhê.

o mó èq Garai Gasang lé hkya-on kô é dang gi,

³⁸ "Haû Yhumsing é myìng mai jé lé lo é hkohkâm gi, hkungsô wó nyî sháng gaq ô! ✧ Mauhkûng htoq má, ngu-ingón nyî sháng gaq ô!"

Htoq tsáng myhâng má, Garai Gasang gi, hpungwup shingkang bo nyî sháng gaq ô!"

gâ akô.

³⁹ Haû mù luí, haû byù hpûng hkaû má bo é Hparishe pé ra-am gi, "Sarâ ê, náng é chángzô pé lé tân pyám aq." ga luí, Yesuq lé taí akô.

⁴⁰ Haû hkûn, Yesuq gi, "Ngò, nungmoq lé taí kôlé, shí bang zim za nyî kó é nghut le gi, luqgok pé garû lô râ nghut lhê." ga tû taí ri.

⁴¹ Ahkuí, Yesuq, Yerusalem wà mó eq chyâng lò luí, wà mó haû lé myàng jáng, haû wà mó é matú ngaù mù, taí é gi, ⁴² "Wà nàng ê! Hkû-nyî lhê é buinyì má, nguingón é hkyô lé nàng bûn sé tô é nghut le gi, gè râ wá! Ahkuí kúm gi, haû hkyô lé nghop to bê nghut mù luí, nàng a sé lo nghut ri. ⁴³ Hkâsu mù gâ le, náng chyáng Garai Gasang lé kúm jé é hkûn, nàng a bun a sé wú kat é yanmai, náng é gyè pé gi, awui ayàm má gyewap xuq mù, náng é lhîng hkyuq mai nang lé lom tô é buinyì jé lô râ nghut lhê. ⁴⁴ Haû hkûn, nang lé lhoq htên pyám luí, nung zo pé lé le, haû ahkaû má yhang dún nhê pyet sat pyám bekô râ; nàng gi, luqgok racham htoq má racham lháng a kê lhum loshoq, dut byuq râ nghut lhê." gâ ri.

Yesuq, Noqkuq Yhûm Lé Sêng Pyâm É Hkyô
Mht 21:12-17; Mrk 11:15-19; Yhn 2:13-22

⁴⁵ Ahkuí, Yesuq gi, Yerusalem noqkuq yhûm má wàng mù, ung zo ung shuq é bang lé, "Ngá yhûm gi, kyûdung yhûm dut râ nghut lhê. ✧ ga kâ to kôlháng, ⁴⁶ nungmoq gi, jowò shî lé 'damaq hkyûng' ✧ kut akô." ga taí uchyang, hkat htoq pyâm ri.

⁴⁷ Yhang gi, nyî wú noqkuq yhûm má mhoqshit nyi ri. Hkyangjong agyì pé, tarâ sarâ pé eq, byu pè é suwún wú kúm gi, Yhang lé wó sat pyám râ hkyô ho nyi akô.

⁴⁸ Nghut kôlháng, byù banshoq bang gi, Yhâng mhoqshit é dang lé gyo nau nyi kô é yanmai, wó sat râ hkyô lé, a myang hô kó nghut ri.

20

Yesuq É Ahko Ahkáng Lé Myî Chyam Wú É Hkyô

Mht 21:23-27; Mrk 11:27-33

¹ Ra-nyî lé, Yesuq gi, noqkuq yhûm wàng hkaû má, byu pé lé mhoqshit nyi é eq, gabú danglù hko kyô nyi é hkûn, hkyangjong agyì pé gi, tarâ sarâ pé, suwún wú eq rahá kut, Yhâng chyáng lé jé kômù, ² "Hai ahko ahkâng èq Nàng shí pé lé kut nyi lhê lhú? Ahko ahkáng shî, Nang lé ó yuq byî é lhú? Ngamoq lé taí kyô wú aq." ga Yhang lé myî akô.

³ Haû hkûn, Yhang gi, "Ngò le, nungmoq lé rajung myî wú kôlé; ⁴ Yohan byî é bap-tisma gi, mauhkûng mai lhú? A nghut jáng, byu chyáng mai lhú? Ngo lé taí kyô wú keq?" ga yhangmoq lé myî ri.

⁵ Haû hkûn, yhangmoq chòm hpyê lhum kô é gi, "'Mauhkûng mai nghut lhê.', nghû nga-nhúng taí jáng le, 'Haî mù, yhang lé a lumjîng kô é lhú?' ga râ nghut; ⁶ 'Byu chyáng mai nghut lhê.' nghû jáng le, shiwa byù banshoq gi, Yohan lé, myiqhtoï rayuq ga lumjîng to kô é yanmai, yhangmoq, nga-nhúng lé luqgok èq dú sat kó râ nghut." ga akô.

⁷ Haû mù, yhangmoq gi, "Hkâmai nghut é lé, ngamoq a sé." ga tû taí akô.

⁸ Yesuq gi, "Haû jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

Tsibiyiq Hkyâm Yhumsîng Eq Hkyâm Saí Zo Bang

Mht 21:3-46; Mrk 12:1-12

⁹ Byu pé lé, Yesuq dangtú dông xoq taí kyô é gi, "Byù rayuq gi, tsibiyiq hkyâm ral-hum saí to mù, hkyâm saí zo bâng chyáng ngho byî to luí, gó ming shut myáng myáng ê nyi byuq ri. ¹⁰ Kyôshu yoq jé jáng, yhang gi, hkyâm saí zo bâng èq, hkyâm mâ é tsibiyiq shi pé lé lhom byî kat sháng gaq ga, dui-nhâng zoshâng rayuq lé yhang-moq chyáng nhang kat ri. Nghut kôlháng, hkyâm saí zo bang gi, haû yuq lé lhom bat mù, loq kôm taû nhang kat akô. ¹¹ Gotû dui-nhâng zoshâng rayuq lé, yhangmoq chyáng dum nhang kat ri. Nghut kôlháng, yhangmoq gi, haû yuq lé le, lhom bat mù, hoq lhoq hpu luí, loq kôm dum taû nhang kat akô. ¹² Sum yuq nghû râ dui-nhâng

zoshâng lé dum nhang kat ri. Yhangmoq gi, haú yuq lé le bat cheq luí, hkyâm mai hkat htoq kat akô.

¹³ Haú hkûn, tsibiyiq hkyâm yhumsîng gi, 'Ngò hkâsu kut wú râ lhú? Ngò chyitdap é ngá zo lé, nhang kat wú râ nghut ri. Yhang lé kúm gi, yhangmoq lhom hkungga kó abe.' ga taí ri.

¹⁴ Hkyâm saí zo bang gi, yhumsîng hpô é yhangzo lé myàng kôjáng, 'Shí yuq gi, silí wunlí sing yù râ sù nghut lhê; nga-nhúng, silí wunlí haú pé wó yû shoq, yhang lé sat pyám sháng.' ga rayuq eq rayuq taí lhûm bum akô. ¹⁵ Haú mù, yhang lé hkyâm shinggan shut dú htoq kômù, sat pyâm akô.

Haú su kut kôjáng, tsibiyiq hkyâm yhum-sîng gi, yhangmoq lé hkâsu kut râ lhú? ¹⁶ Yhang gi, ê mù, haú hkyâm saí zo bang lé sat pyám luí, hkyâm haú lé góbang lé htot ngho byî pyám râ nghut lhê." gâ ri.

Dang haú lé wó gyo bang gi, "Haú su gi, hkâ-nhám le a dut sháng gaq ô!" gâ akô.

¹⁷ Hau htâng, Yesuq gi, yhangmoq lé byu wú luí, "Haú jáng gi, 'Yhûm saí bâng eq hkyin htoq pyâm é luqgok gi, htungchyûn mâ é ahkyak dik é luqgok dut bê.'[☆]

ga Chyúmdang má kâ tô é gi, haí gá nau é nghut lhê lhú? ¹⁸ Luqgok* haú má gyó záng é sù ó yuq nghut kôle, gyûi gyop byuq râ nghut lhê. Luqgok hau eq gyó nhê záng é sù le, nhê pyeq pyâm é huí râ nghut lhê." ga taí ri.

¹⁹ Tarâ sará pé eq hkyangjong agyi pé gi, dangtú shí gi, yhangmoq lé lhoq ang luí taí é hkyô lé, sé kô é yanmai, haú hkûn jáng lháng Yhang lé chyup yû râ matú hkyô ho nyi akô. Nghut kôlhang, byu pé lé gyuq mù a chyup shí kó nghut ri.

Kang Kat É Hkyô Eq Séng Luí Myi É Dang

Mht 22:15-22; Mrk 12:13-17

²⁰ Haú mù, yhangmoq gi, Yesuq é dang má mara wó chyup yû shoq ga, gegùn labyoq kut bang lé jowú nhang nyi akô. Haú gi, ahkáng ayá wó é mauzaû chyáng Yhang lé wó ap pyám râ matú nghut ri. ²¹ Haú jowú bang gi, "Sará ê, nàng gi, dîng dîng mán mán taí mhòqshit é eq, byu é myoqdong lé a tê byî é za, Garai Gasâng é hkyô lé, tengmán é dông mhòqshit é

sù nghut é lé, ngamoq sê lhê. ²² Hkoséng Kehtaq lé, ngamoq kang kat râ gi, tarâ wang lhê lhú? A wang é lhú?" ga luí, Yhang lé myí wú akô.

²³ Nghut kôlhang, Yesuq gi, haú bâng é myit goí é hkyô lé sé mù luí, yhangmoq lé, ²⁴ "Ngo lé, ngùn rachap tân shit wú keq. Ó yuq é alhô eq masat laiká dap tô ri lhú?" ga myi jáng, ²⁵ yhangmoq gi, "Kehtaq é nghut ri." ga akô.

Haú hkûn, Yesuq gi, "Haú nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga yhangmoq lé taí ri.

²⁶ Yhangmoq gi, byu pé hí má, Yhâng é dang má mara a wó ho myang é eq, Yhang tû taí é dâng é yanmai, maú hong byuq kôluí, zim byuq akô.

Dum Dui Toq Lô Râ Hkyô Eq Séng Luí Myi É Dang

Mht 22:23-33; Mrk 12:18-27

²⁷ Haú hkûn, haú dum dui toq hkyô a joq gâ é Saduke pé ra-am gi, Yesuq chyáng lé jé kômù, ²⁸ "Sará ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kâ to byî ri. ²⁹ Hí hpyang lé, gumang nhiqtâng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. ³⁰ Lanong yuq le, yhangmang mó é chui lé gon mù, zo dù a dap é za shi ló byuq bê. ³¹ Hau htâng, Lalaq yuq mai Lahkâ yuq jé shoq, chuimó haú lé rayuq htâng rayuq dum gon gon kut kôlhang, zo dù a dap é chyat shi ló byuq bùm bekô nghut ri. ³² Ló htáng má, myiwe myhí haú le châng shi ló byuq bê nghut ri. ³³ Haú mù luí, haú dum dui toq é buinyi má, myiwe myhí haú gi, haú nhiqtâng wuì mâ é hká yuq é yhangmyi nghut râ lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." ga luí, Yhang lé myí wú akô.

³⁴ Haú hkûn, Yesuq gi, "Shí mingkan htoq mâ é byu pé gi, ikun kut é eq myi byi myi yû kut nyi bum akô. ³⁵ Shi é mai dum dui toq râ eq, haú pyat má nyi râ gíng bâng é matú gi, ikun kut é eq myi byi myi yû hkyô joq lo râ a nghut. ³⁶ Haú bang gi, maumang lagyô

☆ 20:17 Hkyâ-on 118:22 * 20:18 Luqgok nghu é gi, Yesuq lé taí ri.

pé su dut byuq luí, a dat shî lo kô râ nghut lhê. Yhangmoq gi, dum dui toq lô su é yhangzô pé† nghut é yanmai, Garai Gasâng é yhangzô pé nghut bekô. ³⁷ Haú nyé duq nyi é mhanpúng eq séng luí, Mosheq èq kâ tô é má lháng, Yhumsîng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê. [†]☆ ga bo tô é yanmai, shi é bang dum dui toq lô râ hkyô lé tûn shit to bê nghut ri. ³⁸ Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gâ le, lhunglhâng bang gi, Garai Gasâng é hí má dui nyi é bang chyat nghut akô." ga yhangmoq lé tû taí ri.

³⁹ Haú hkûn, tará sará pé ra-am gi, "Sarâ ê, nâng taí é jô ri." ga akô. ⁴⁰ Haú mù, yhangmoq gi, Yhang lé haí le a wám myí jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

⁴¹ Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù taí akô lhú? ⁴²⁻⁴³ Dawiq yhang yhang lháng gi, Hkya-on Kungtôn Laiká má, 'Haú Yhumsîng Garai gi, ngá é Yhumsîng lé, "Ngò, nâng é gyè pé lé, nâng é hkyî nang tanghkuq kut pyám byí é hkyíngjé shoq, Ngá é loqyo hkyam‡ shut zung nyi shi aq." gâ ri. [†]☆ ga kâ tô ri. ⁴⁴ Haú mù, Dawiq yhang lháng, Hkrisduq lé, Yhumsîng gâ é nghut le gi, Hkrisduq gi, yhangzo za hkâsu ge nghut râ lhú?" ga taí ri.

Tarâ Sarâ Pé Lé Sidiq Râ Hkyô

Mht 23:1-36; Mrk 12:38-40; Luk 11:37-54

⁴⁵ Byù banshoq gyô nyi é u lé, Yesuq, Yhâng é chángzô pé lé taí é gi, ⁴⁶ "Tarâ sarâ pé lé sidiq nyi keq. Yhangmoq gi, réng é buhîng wut chûng mù, sô yông wún luí, gài pé má hkunggâ é èq shichyen râ lé le, tarajong pé mâ é ahkyak dik é zùng jang pé eq poí pé mâ é je réng é zùng jowò pé má myang zùng râ lé le, ô nau nyi bum akô. ⁴⁷ Yhangmoq gi, chuimó pé é yhûm-yò pé lé hpyoq zo hpyoq shuq kôluí, kyû hîng hîng dúng shit mhaú é bang nghut akô. Haú sù

é bang gi, je riyhang htan é dông dam byí é hui zo kó râ nghut lhê." gâ ri.

21

Chuimó Myhí Kat É Alu

Mrk 12:41-44

¹ Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé myang ri. ² Dum nghut jáng, gyi htingchap ngùn zo í chap za kat é, myung é chuimó myhí rayuq lé le myang ri. ³ Haú mù, Yhang gi, "Ngò, nungmoq lé teng za taí kôlé, shî myung é chuimó myhí gi, góbang banshoq htoq má je myo kat bê nghut ri. ⁴ Hkâsu mù gâ le, haú góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng asak lé baú ra ngùn lhunglháng lé kat bê nghut ri." ga taí ri.

Ló Htûm Buinyi Má Dut Lò Râ Hkyô

Mht 24:1-21, 29-35; Mrk 13:1-19, 24-31

⁵ Noqkuq yhûm lé, yúng é luqgok pé èq le, alu chyunghuq pé èq le, mhôn tô ri ga, chángzô pé ra-am hkya-ôn bùm kôjáng, Yesuq gi, ⁶ "Nungmoq myang nyi é shí pé gi, luqgok rachâm htoq racham lháng a kê lhum loshoq, hpyoq hpyi pyâm é buinyi jé râ nghut lhê." ga taí ri.

⁷ Haú su ga jáng, yhangmoq gi, "Sarâ ê, haú nghut le gi, haú hkyô pé gi, hkâ-nhám dut lô râ lhú? Haú dut râ chyâng lò jáng, hkasû é kumlhá htoq lô râ nghut lhê lhú?" ga, Yhang lé myí akô.

⁸ Haú hkûn, Yhang gi, "Nungmoq gi, hkyô shuî nghoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myîng lé lîng é byù myo myo pô htoq lô kó râ nghut lhê. Nghut kôlhâng, nungmoq gi, yhangmoq htâng hkâcháng kó. ⁹ Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haú hkyô pé hí dut lò râ nghut lhê. Nghut kôlhâng, ló htâng é buinyi gi, haú hkûn jáng dut râ a nghut shi." ga taí ri.

¹⁰ Hau htâng, Yhang, yhangmoq lé dum taí é gi, "Ra-myû eq ra-myû, mingdán ralhûm eq ralhûm majan zân lhûm lò kó râ nghut lhê. ¹¹ Jowò myo myo má, layàng mó

† 20:36 Dum dui toq lô su é yhangzô pé gâ é gi, Yesuq lé lumjîng luí, shi é htâng má dum dui toq lo é bang lé gâ lhê.

☆ 20:37 Htoq Lô 3:6 ‡ 20:42-43 Loqyo hkyam ngu é gi, ahko ahkáng wó é jowò nghut lhê. ☆ 20:42-43 Hkya-on

nún lo é, noli nojàng myô lo é eq mutmó gyó lo é pé, dut lò râ nghut lhê; gyuq chiq jung pé eq kumlhá mó le, mauhkúng htoq mai htoq shit lô râ nghut lhê.

¹² Nghut kôlhàng, haû hkyô banshoq a dut shimá, Ngá mying é yanmai, byu pé gi, nungmoq lé chyup yû luí, zing-rî yû mù, tarajong pé eq htóng pé má ap pyám kó râ nghut lhê, hau htoq agó, nungmoq gi, hkohkam pé eq zau pé chyáng ê ap byî é le, hui kó râ nghut lhê. ¹³ Haû su é pé mai, nungmoq gi, ngò eq séng luí, saksé wó hkám râ hkyô htoq lô berâ nghut lhê. ¹⁴ Nghut kôlhàng, hkâsu nghû lhom tû taí râ hkyô lé, hí mai a myit wuî nyî râ lé, nungmoq myit hpyit to keq. ¹⁵ Hkâsu mù gà le, nungmoq é gye pé lhunglhàng bang, haí le a wó lhom tû taí loshoq, ngò, nungmoq lé dang eq hpaqchyî byi râ nghut lhê. ¹⁶ Nghut kôlhàng, nungmoq gi, înu îwâ pé, âgu âmàng pé, mungmoq eq buinùm ji-myi wui èq lháng, ap pyâm é hui kó râ nghut lhê. Yhangmoq gi, nungmoq chyáng mâ é ra-am lé lháng, sat pyám kó râ nghut lhê. ¹⁷ Byù lhunglhàng bang gi, Ngá é yanmai, nungmoq lé a nguî kut kó râ nghut lhê. ¹⁸ Nghut kôlhàng, nungmoq é xâm rahkat lháng wó htên byuq râ a nghut.* ¹⁹ Nungmoq gi, wó jân é hkyô mai, asak lé wó yû kó râ nghut lhê.

²⁰ Yerusalem wà mó lé gyè hpúng mó èq lóm tô é lé, nungmoq myàng jáng, wà mó haû htên byuq râ ahkýing chyâng lò bê lé, bûn sê nyî keq. ²¹ Haû hkûn lé, Yuda mau má nyi é bang gi, bùm pé shut hfang doq ló kó sháng gaq; haû wà hkaû má nyi é bang le, hfang htoq kó sháng gaq; wà tiq wà zo pé má nyi é bang le, wà hkaû shut a wàng kó sháng gaq. ²² Hkâsu mù gà le, Chyúmdang má kê to má kê to banshoq dik lò râ matú, buinyî haû pé gi, mara dam byî é buinyî pé dut râ nghut lhê. ²³ Haû buinyî pé má, zogûng dut é myiwe wuî eq naú huq ashî nghut é înu wuî gi, gyai yhang wuîhke kó râ nghut lhê; hkâsu mù gà le, shí ming ahtoq má wuîhke mó eq, shí amyû ahtoq má Garai Gasang nhikmó-yô é jé lô râ nghut lhê. ²⁴ Yhangmoq gi, shâm lhâm èq sat pyám hui lhê eq, ming hkang ming mó má chyup shuí ló é le hui kó râ nghut

lhê. Tûngbaù pé lé byî tô é buinyî ahkýing htáng shoq, Yerusalem wà mó gi, tûngbaù pé èq nâng zik tô é hui râ nghut lhê.

²⁵ Haû hkûn, bui, kyî, lhamó pé má, kumlhá htoq shit râ nghut lhê. Wuishuq lung-aû mâ é wuîlhêng pé é mying é htê mó é yanmai, myigùng htoq má, byù myû chângjup gi, hkâsu kut râ a sé loshoq mau é eq myit wui myit hkê é hui bekô râ nghut lhê. ²⁶ Byu pé gi, mingkan htoq má dut lò râ é hkyô pé lé, a jé shi mai myit gyuq kô é yanmai, moq byuq ló bûm kó râ nghut lhê; hkâsu mù gà le, mauhkúng mâ é wum-o a-tsam pé gi, lhoq nhûn é huî bùm kó râ nghut lhê. ²⁷ Haû hkûn, haû Byu Yhangzo gi, mhut ji mù, hpungwup a-tsam mó eq le, hpungwup shingkang mó eq le, gyó lé lo é lé, yhangmoq byu-myàng kó râ nghut lhê. ²⁸ Haû hkyô pé dut hi lò jáng, ulhum tû mù wú kat keq, hkâsu mù gà le, nungmoq lé hkyi yû râ buinyî gi, chyâng lò bê nghut ri." gà ri.

²⁹ Yhang, yhangmoq lé dangtú dông xoq taí é gi, "Maihpáng gâm eq siggâm banshoq lé wú wú keq. ³⁰ Sikbu nyún lo é lé myàng jáng, bui nyé nám chyâng lò bê ga luí, nungmoq yhang dat wú sê akô. ³¹ Haû eq rajung za, haû hkyô pé dut nyi é lé, nungmoq myàng kôjáng, Garai Gasâng é mingdán gi, chyáng bê nghut é hkyô lé, nungmoq sé lo keq.

³² Ngò, nungmoq lé teng za taí kôlé, shí pyat mâ é byu pé a ban shi byuq shimá, haû hkyô pé banshoq dut byuq râ nghut lhê. ³³ Mauhkúng eq myigùng gi, a joq lo dut byuq râ nghut lhê; nghut kôlhàng, Ngá é dang gi, ru joq nyî râ nghut lhê.

³⁴ "Nghut kôlhàng, zo myo shuq myô é, î shuq wut é, mingkan htoq mâ é myit wui myit hkê é pé èq, nungmoq é i-myt wò laí nyî luí, haû ngò jé lé é buinyî gi, lhaí bik lo é su, nungmoq ahtoq má byodàn tung a jé lò sháng gaq, sidiq nyî keq. ³⁵ Hkâsu mù gà le, buinyî haû gi, mingkan htoq má nyi é byù banshoq bâng é ahtoq má, haû su jé lô râ nghut lhê. ³⁶ Haû mù luí, haû dut lò râ hkyô banshoq mai, nungmoq wó lut lai mù, haû Byu Yhangzô é hí má, wó yap gîng é bang dut sháng gaq, hkâ-nhám le kyûdung luí, ahkýing hkangmó má machya nyî keq." gà ri.

* 21:18 Shí má gi, asak woi-nyî a shí râ hkyô lé taí é nghut lhê.

³⁷ Yesuq gi, nyí wuî noqkuq yhûm má mhoqshit nyí luí, myìn wuî Tsanlun Bùm gâ é bùm shut htoq ê mù, ê nyi to to kut ri. ³⁸ Byù banshoq bang gi, Yhang mhoqshit é dang gyo râ ga, napsûn noq noq mai noqkuq yhûm má jé lé bum akô nghut ri.

22

Yesuq Lé, Yudaq Êq Ung Zô É Hkyô

Mht 26:1-5,14,16; Mrk 14:1-2, 10-11; Yhn 11:45-53

¹ Ahkuî, Lhoqlhai Poî gâ é Azuma (múnchi a kat é Muk Zo Poî) jé râ chyâng lò bê. ² Haù mù, hkyangjong agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akô; hkâsu mù gâ le, yhangmoq gi, mingbyû wuî lé gyuq bùm kô é yanmai nghut ri. ³ Haù hkûn, lagyo raxe í yuq má bo é Iskarut gâ é Yudaq chyâng Tsadán wàng mù luí, ⁴ yhang gi, htoq ê mù Yesuq lé hkâsu kut ap pyám râ hkyô lé hkyangjong agyi pé, noqkuq yhûm zúng é gyezau pé eq, ê hpyê ri. ⁵ Haù mù, yhangmoq gi, gyô nguì luí, Yudaq lé ngùn byi râ hkyô myit hui bekô. ⁶ Yudaq le hap yù luí, byù hpúng má a nghut é hkûn, Yesuq lé ap pyám râ hkyô ho nyi bê nghut ri.

Lhoqlhai Poî Lé Món É Hkyô

Mht 26:17-30; Mrk 14:12-26; Yhn 13:21-30

⁷ Ahkuî, haù Lhoqlhai Poî mâ é sauzo shigu hkungga sat nhông byi râ é Azuma buinyi jé bê. ⁸ Haù hkûn, Yesuq gi, Petruq eq Yohan lé, "Nga-nhúng zo râ matú Lhoqlhai Poî ê món láng keq." ga luí, nhang kat ri.

⁹ Haù nhik gi, "Hkâmá ê món to nhâng nau ri lú?" ga luí, Yhang lé myî akô.

¹⁰ Haù hkûn, Yesuq gi, "Nungnhik, myuq hkaù shut wang e ló le wuî yambú waq é byù rayuq lhom hui râ nghut lhê; haù yuq chyâng châng ló luí, yhang wang ló é yhûm má châng wàng mù, ¹¹ yhumsing lé, 'Ngò Ngá é chángzô pé eq rahá, Lhoqlhai Poî zo râ bing wap hkâmá nghut lhê lú ga, Sará myí nhang kat ri.' nghu tái keq. ¹² Haù hkûn, hen tô é ahtoq mâ é wap mó lé, nungnhik lé lhom tân shit râ nghut lhê; wap haù má ê món to keq." ga taî kat ri.

¹³ Haù chángzo nhik htoq e ló le, Yesuq taí kat é eq roq za ê myâng kômù, Lhoqlhai Poî lé món to bekô nghut ri.

Yhumsing É Myinzang

¹⁴ Ahkuî, ahkyíng jé jáng, Yesuq eq Yhâng é chángzô pé rahá za zohpoq má zung tô akô. ¹⁵ Haù hkûn, Yesuq gi, "Ngò wuîhke jamjau hpuzô é a hui shi má, Lhoqlhai Poî shî lé nungmoq eq rahá zo râ lé, Ngò gyai ô nau nyi lhê. ¹⁶ Hkâsu mù gâ le, ngò, nungmoq lé tái kôlé, Garai Gasâng é mingdán má poî shî a ló dik dik gi, ngò haù lé dum zo râ a nghut ló." ga luí, yhangmoq lé taî ri.

¹⁷ Hau htâng, Yesuq gi, góm lé yù mù jeju ban hkya-on jáng, "Góm shî lé yù luí, nungmoq yhangchang gám shuq lhum keq. ¹⁸ Ngò, nungmoq lé tái kôlé, ahkuî mai gi, Ngò, Garai Gasâng é mingdán a jé jé tsibiyiq wing lé dum shuq râ a nghut lo." ga taî ri.

¹⁹ Hau htâng, Yhang gi, muk lé yù mù, jeju hkya-on luí, muk lé myhik hpé mù, yhangmoq lé byi uchyang, "Shî gi, nungmoq é matú byî pyâm é, Ngá é gungdu nghut lhê; Ngo lé bûn nyi râ matú, shî su kut nyî keq." ga taî ri.

²⁰ Haù eq rajung za, myinzang ban zo jáng, góm lé le yù mù, "Góm shî gi, nungmoq é matú htoq pyâm é, Ngá é sui má xuq tô é dangshikaq asik nghut lhê. ²¹ Nghut kôlhang, wú keq, Ngo lé ap pyám râ sù gi, zang bó shî má ngò eq rahá nyi tô ri. ²² Haù Byu Yhangzo gi, hkyin to huî é eq rajung za shî râ nghut lhê; nghut kôlhang, Yhang lé ap pyâm é sù gi, dingnyé wó ri." ga taî ri. ²³ Haù su ga jáng, lagyô pé gi, yhangmoq má shí hkyô kut râ sù gi, hká yuq nghut râ lú ga, rayuq eq rayuq myî lhum bum akô.

²⁴ Haù htoq agó, yhangmoq mâ é hká yuq sheq je kô lhê lú ga le, rayuq eq rayuq taî htîng lhûm bum akô. ²⁵ Haù mù luí, Yesuq gi, "Tûngbaù pé é hkohkam pé gi, yhangmoq byù myû pé é ahtoq má up zô nyi kô é nghut luí, byu pé gi, ahkáng ayá wó é bang lé jeju yhumsing pé ga luí, taî hkungga nyi bum akô. ²⁶ Nungmoq kúm gi, haù su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq. ²⁷ Hká yuq sheq je kô lhê lú? Zô zung nyi sù lú? Haù a nghut jáng, saí tsô é sù lú? Zô zung nyi é sù sheq nghut ri. Nghut kôlhang, ngò gi, nungmoq mâ é saí tso sù su za nghut nyi lhê. ²⁸ Nungmoq kúm gi, Ngò jamjau huî nyi le, Ngò eq rahá nyi nyi é bang nghut nyi akô. ²⁹ Haù su mù, Ngá

wa gi, Ngo lé, mingdán ap byî é su, Ngò le, nungmoq lé mingdán ap byi râ nghut lhê. ³⁰ Haú mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq le hkohkâm-tanghkuq má zung to mù, Israelaq amyû raxe í hú lé jéyáng kó râ nghut lhê.

Yesuq Lé, Petruq (Simun) He-ngik Pyâm Râ Hkyô

Mht 26:31-35; Mrk 14:27-31; Yhn 13:36-38

³¹ Simun, Simun ê, wú aq, sungsô cham lé shaí é su, nungmoq lé wó shaí shoq ga, Tsadán wá gi, ahkáng dung bê. ³² Nghut kôlhang, náng é lumjín myit a hten sháng gaq nghû, Ngò, náng é matú kyûdung byi bê; náng dum lhing bûn lò jáng, nung gu nung mâng pé lé wum-o lhoq gíng byi aq." ga taí ri.

³³ Haú hkûn, Simun gi, "Yhumsîng ê, htóng wâng kôlhang, shî kôlhang, ngò gi, náng eq rahá cháng râ matú myit hpyit to bê." ga tû taí ri.

³⁴ Yesuq gi, "Petruq ê, nang lé Ngò taí lé, hkû-nyí* lhang woq a tûn shi má, náng, Ngo lé a sé ga luí sum dâm he-ngik pyâm râ nghut lhê." ga taí ri.

³⁵ Hau htâng, Yesuq, yhangmoq lé taí é gi, "Ngò, nungmoq lé ngunhtûng, jiltûng, hkyî-tsung a wûn a chûng nhang é za, nhang kat é nghut hkûn, nungmoq chyáng haí ra akò lhú?" ga myi jáng, yhangmoq gi, "Haí le a ra lo." ga taí akò.

³⁶ Haú hkûn, Yhang gi, "Ahkuí kúm gi, ngunhtûng wó sù gi, yù wun sháng gaq, jiltûng wó sù le, yù wûn sháng gaq, shâm a wó sù gi, bumó ung luí wuì sháng gaq. ³⁷ Hkâsu mù gâ le, Ngò, nungmoq lé taí kôlé, Ngò eq séng luí Chyúmdang má kâ tô é gi, dut lò berâ nghut lhê; 'Haú yuq gi, yubak mara wó bang má nghap lhôm to bê.'* ga kâ tô é dang gi, Ngá chyáng dik lò râ nghut lhê." ga luí, yhangmoq lé taí ri.

³⁸ Haú mù, lagyô pé gi, "Yhumsîng ê, wú aq, shí má shâm í hkyam joq tô ri." ga taí kôjáng, Yesuq gi, "Gé bê." ga luí, yhangmoq lé taí ri.

Tsanlun Bùm Má Yesuq Kyûdung É Hkyô
Mht 26:36-46; Mrk 14:32-42

* 22:34 Yudaq byu pê é ra-nyí gi, myinhâng búi wang é mai, htang nyí búi wang é jé shoq nghut lhê. Shî mâ é hkû-nyí gi, nga-nhûng é matú myín âng ri. ✨ 22:37 Esai 53:12 † 22:42 góm gâ é gi, Yesuq jamjau hui râ hkyô eq shî râ hkyô lé, taí nau é nghut lhê.

³⁹ Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e lô bê nghut ri; Yhâng é chángzô pé le Yhang htâng châng e lô akò. ⁴⁰ Haú jowò má jé jáng, Yhang gi, "Nungmoq, gunglaú é a hui sháng gaq, kyûdung nyi keq." ga luí, yhangmoq lé taí to mù, ⁴¹ chángzô pé nyi é mai luqgok radú we kô gâng e lô luí, hkyihput htuoq mù, ⁴² "Áwa ê, Náng ô nau é nghut le gi, góm† shî lé Ngá chyáng mai lhaí pyâm byi laq. Nghut kôlhang, Ngò ô nau é dông a nghut, Náng ô é dông sheq nghut sháng gaq." ga kyûdung ri. ⁴³ Haú hkûn, mauhkûng mai maumang lagyo rayuq htoq lé luí, Yhang lé i-myt nhik lé taí tîng ri. ⁴⁴ I-myt hkaú má dik shoq hkâm zo wuì é yanmai, Yhang je riyhang kyûdung wum kat nyi ri; Yhâng é buibù le, sui hkyí sui pat su myigùng má yui gyó ri.

⁴⁵ Haú mù, kyû ban dung jáng, Yhang toq luí, chángzô pê chyáng lô wú le, yhangmoq gi, myit yón mù luí, yhup myhî to kô é lé lô myâng mù, ⁴⁶ "Haí mù yhup nyi akò lhú? Toq keq! Gunglaú é a hui sháng gaq, kyûdung nyi keq." ga luí, yhangmoq lé taí ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

⁴⁷ Haú su ga, ru taí nyi ashî le, wú keq, haú chángzo raxe í yuq má bo é Yudaq gi, hkyô hí mù byù rajum rayò lé shuì lé lô luí, yhang gi, Yesuq lé bopuq puq râ ga huí lé lo ri. ⁴⁸ Haú mù luí, Yesuq gi, "Yudaq ê, náng gi, haú Byu Yhangzo lé bopuq puq é èq gyè pê chyáng ap pyâm lhê lhú?" ga luí, yhang lé lhom myí ri.

⁴⁹ Haú hkûn, Yesuq htâng cháng bang gi, haí dut lò râ lé bûn sé kô é yanmai, "Yhumsîng ê, ngamoq gi, sham èq zân le, gè râ lhú?" ga myí akò. ⁵⁰ Yhangmoq chyáng mâ é rayuq gi, hkyangjong mó é dui-nhâng zoshâng lé zân kat luí, yhâng é loqyo nohkyap byit byuq bê nghut ri.

⁵¹ Yesuq kúm gi, "Gé bê. Yhangmoq ô nau é su nghut kó sháng gaq." ga tû taí mù, haú yuq é nohkyap lé é záng luí lhoq gè byî ri.

⁵² Yesuq gi, Yhang lé chyup râ ga jé lé é hkyangjong agyi pé, noqkuq yhûm zúng é zau pé eq agyi suwún wuì lé, "Nungmoq

gi, damyaq rayuq lé chyup é su, shâm, dumbáng eq kut luí, lé lo akô lhú? ⁵³ Ngò gi, nyí wuî, noqkuq yhûm má nungmoq eq rahá nyi kôlhang, nungmoq Ngo lé chyup yû râ ga a hen wú kó; ahkuí gi, mauchut èq up[†] nyi bê yanmai, nungmoq é ahkyíng nghut nyi ri." ga taí ri.

Yesuq Lé, Petruq Èq He-ngik Pyâm É Hkyô
Mht 26:57-58, 67-75; Mrk 14:53-54, 66-72; Yhn 18:12-18, 25-27

⁵⁴ Haú hkûn, yhangmoq gi, Yhang lé chyup yû mù she ló luí, hkyangjong mó é yhûm shut shuí wang ló akô. Petruq le we we mai châng tô ri. ⁵⁵ Ahkuí, yhangmoq gi, wàng hkaú má myi mut yû luí zung tô bum é hkûn, Petruq le yhangmoq é ahkaú má bo tô ri. ⁵⁶ Langchyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luí, "Shí yuq le Yesuq eq rahá nyi sù nghut ri." ga taí ri.

⁵⁷ Haú hkûn, Petruq gi, "Myiwe myhí ê, nàng taí é sù lé, ngò a sé." ga he pyâm ri.

⁵⁸ Hau htàng hkâ-myháng a myáng má, byù rayuq gi, yhang lé dum myàng luí, "Nàng le yhangmoq chyáng bo nyi sù nghut ri." ga taí kat jáng, Petruq gi, "Byù hpó ê, ngò a nghut." ga tú taí ri.

⁵⁹ Hkyíng hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; haí mù gâ le, yhang gi, Galile byù le nghut ri." ga zuq zuq taí ri.

⁶⁰ Petruq gi, "Byù hpó ê, nàng taí nyi é hkyô lé, ngò a sé." ga tú taí ri. Haú su ga ru taí nyi ashí le, woq tún bê nghut ri. ⁶¹ Haú hkûn, Yesuq gi, lhîng luí, Petruq lé wú kat ri. Haú mù, Petruq gi, "Hkû-nyí lháng, woq a tún shi má, nàng Ngo lé sum dâm he pyám râ nghut lhê." ga luí, Yhumsîng yhang lé taí é dang lé bún kat ri. ⁶² Haú mù, yhang gi, shinggan shut htoq ê luí, gyai yhang é ngau nyi ri.

Gyezô Pé Yesuq Lé Rhoí É Hkyô

⁶³ Yesuq lé zúng nyi é bang gi, Yhang lé rhoí luí nghap myíng nghap htê mu nyi akô. ⁶⁴ Yhangmoq gi, Yhâng é myoqdong nghop pyám byi luí, "Nang lé bat sù gi, ó yuq nghut ri lhú? Myiqhtoi htoí wú aq." ga

myí akô. ⁶⁵ Yhangmoq gi, Yhang lé nyhap é dang ajung jung dông taí rhoi nyi akô.

Suwún Wui É Hí Má Yesuq Jé Nyi É Hkyô
Mht 26:59-66; Mrk 14:55-64; Yhn 18:19-24

⁶⁶ Napkyó myoqmyàng jáng, mingbyû wui é suwún hpúng bang eq rahá, hkyangjong agyi pé, tarâ sará pé, zup hpong kut nyi é má, Yesuq lé shuí ê mù, ⁶⁷ "Nàng Hkrisduq nghut é têng le gi, ngamoq lé taí kyo laq." gâ akô.

Yesuq gi, "Ngò gi, Hkrisduq nghut lhê nghû taí kôlhang, nungmoq jíng kó râ a nghut. ⁶⁸ Ngò, nungmoq lé myi kôlhang, nungmoq gi, tú taí kó râ a nghut. ⁶⁹ Nghut kôlhang, ahkuí mai haú Byu Yhangzo gi, a-tsam bo dik é Garai Gasâng é loqyò hkyam má wó zung nyi berâ nghut lhê." ga luí, yhangmoq lé taí ri.

⁷⁰ Haú hkûn, yhangmoq banshoq bang gi, "Haú nghut le gi, Nàng, Garai Gasâng é Yhangzo nghut lhê lhú?" ga myí akô.

Yesuq gi, "Nungmoq taí é eq rajung za Ngò nghut lhê." ga luí, yhangmoq lé tú taí ri.

⁷¹ Haú hkûn, yhangmoq gi, "Nga-nhúng haí jung saksé wá râ nyi ashí lhú? Yhâng é nhut mai yhang, taí htoq kat é dang lé, nga-nhúng wó gyo bê nghut lhê." ga akô.

23

Yesuq Lé Mara Hun É Hkyô

Mht 27:1-2, 11-14; Mrk 15:1-5; Yhn 18:28-38

¹ Haú hkûn, zup zîng tô é bang banshoq gi, htoq mù, Yesuq lé mauzau Pilat chyáng shuí wang é luí, ² "Shí yuq gi, mingbyû wui lé hkyô shuí nghoq é eq, hkoséng Kehtaq chyáng kang kat râ hkyô lé le hkûm to luí, Yhânggùng yhang gi, haú Hkrisduq nghû é hkohkâm nghut lhê ga luí, taí nyi é lé ngamoq myang ri." ga luí, Yhang lé mara hun akô.

³ Haú hkûn, Pilat gi, Yesuq lé, "Nàng gi, Yudaq byu pé é hkohkâm nghut lhê lhú?" ga myí jáng, Yesuq gi, "Nàng taí é eq rajung za nghut lhê." ga tú taí ri.

⁴ Pilat gi, "Shí yuq lé hûn râ mara ngò a myàng." ga luí, hkyangjong agyi pé eq shiwa byu pé lé taí ri.

⁵ Nghut kôlhang, haú bang gi, "Shí yuq gi, Yuda mau gón má yhang mhoqshit é dông mai, mingbyû wui é i-myt lé shuí gabyông

[†] 22:53 Mauchut èq up gâ é gi, Tsadán èq up é lé gâ ri.

ri. Haû gi, Galile mau mai ahkuî shî má jé shoq nghut bê nghut ri." ga zuq zuq taî bum akô.

⁶ Pilat gi, haû su ga kô é lé wó gyo jáng, Yesuq Galile byù nghut é, a nghut é hkyô lé myî wú ri. ⁷ Yesuq gi, Herut up é mau mâ é byù nghut é lé Pilat sé jáng, haú u lé Yerusalem wà mó má nyi tô é Herut chyáng, ê dé kat nhang ri.

⁸ Herut gi, Yesuq lé myàng jáng, gyai yhang gabú pyâm ri. Hkâsu mù gâ le, Yhâng é hkyô lé wó gyô wú mù, Yhang laklaí kumlhá ralhum lhum kut shit râ lé, wó myàng shoq ga, myit myoqbyu nyi é nghut luî, Yhang lé myàng nau é gyai yhang myáng bê nghut ri. ⁹ Haû mù, yhang gi, Yesuq lé dangmyi myo myô èq myî wú kôlhang, Yesuq gi, dang rahkun lhang a tû taî byi nghut ri. ¹⁰ Hkyangjong agyi pé eq tarâ sará pé gi, yap to mù, Yhang lé mara gyai yhang chôm hun akô. ¹¹ Herut eq yhâng é gyezô pé gi, Yesuq lé rhoi jihkyô kut mù, atam é đông taî hpoî kô luî, réng é mebu hut byi mù, Pilat chyáng dum taû dé nhang kat akô. ¹² Haû nyí jáng, hí hpyang gye dut lhûm é Herut eq Pilat gi, buinùm dut byuq bekô nghut ri.

Yesuq Lé Sat Râ Matú Doqdan É Hkyô

Mht 27:15-26; Mrk 15:6-15; Yhn 18:39-19:16

¹³ Haû hkûn, Pilat gi, hkyangjong agyi pé eq zau suwún wuî, mingbyû wuî lé wut tsîng to mù, ¹⁴ "Shí yuq gi, mingbyû wuî lé hkyô shuî ngoq ri ga, Yhang lé nungmoq ngá chyáng shuî lé lô bekô. Ahkuî, wú keq, nungmoq é hí má, Yhang lé ngò myî wú le, Yhang má nungmoq hun é mara lé ngò a myàng nghut ri. ¹⁵ Hau htoq agó, Herut le, hai mara le a myàng mù, shí yuq lé nganhûng chyáng dum dé kat byi bê nghut ri; haû mù luî, wú keq, shí yuq gi, shí gíng é mara haî le a kut shut nghut ri. ¹⁶ Haû mù, ngò, Yhang lé dam byi luî, nhang pyám râ." ga luî, yhangmoq lé taî ri.

¹⁷ Nghut kôlhang, Lhoqlhai Poî hkangmó má, Pilat gi, mingbyû wuî lé htongbyû rayuq yuq nhang kat byi byi kut é yanmai, ¹⁸ yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luî, chôm wut garu bum akô. ¹⁹ Barabaq gi, wà htum má gumlau kut

é eq byù sat é yanmai, htóng gyó nyi sù nghut ri.

²⁰ Pilat gi, Yesuq lé nhang pyám nau é nghut mù luî, yhangmoq lé dum puq taî ri.

²¹ Nghut kôlhang, yhangmoq gi, "Yhang lé tapzîng má jén tap pyám aq, jén tap pyám aq!" ga luî, wut taî garû nyi bum akô.

²² Haû mù luî, sum dâm nghû râ hkûn, Pilat dum taî é gi, "Haî mù luî lhú? Yhang gi, hai mara kut shut bê lhú? Yhang má shî gíng é mara lé ngò a myàng, haû mù, ngò, Yhang lé bat, nhuq, mhòqshit luî, nhang pyám râ." ga luî, yhangmoq lé taî ri.

²³ Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dúng wut nyi akô nghut é yanmai, wó taî ung yù bekô nghut ri. ²⁴ Haû mù luî, Pilat gi, yhangmoq dúng é eq rajung za myit hpyit doqdan byi ri. ²⁵ Haû su mù, yhang gi, yhangmoq dúng é eq rajung za, wà htum má gumlau kut é eq byù sat é mai, htóng gyó nyi sù lé nhang kat byi luî; Yesuq lé gi, yhangmoq ô nau é đông ap byi kat bê nghut ri.

Yesuq Lé Tapzîng Htoq Má Jén Tap É Hkyô
Mht 27:31-44; Mrk 15:21-32; Yhn 19:17-27

²⁶ Yhangmoq gi, Yesuq lé shuî htoq ló kô é hkûn, yosô wà mai lo é, Kuruni myuq byû nghut é Simun ga sù lé, chyup yû mù, tapzîng waq nhâng luî, Yesuq htâng má cháng nhang akô. ²⁷ Byù rajùm rayò gi, Yhang htâng má châng e ló bum akô. Yhang é yanmai ngaubyi ngau nhap eq iyon yôn é myiwe zo wuî le haú má bo tô ri. ²⁸ Yesuq gi, yhangmoq shut lhîng wú luî, "Yerusalem byizo wuî ê, Ngá é yanmai hkângau nyi kó, nungmoq gi, yhumsing gùng eq yhumsing é zo dù wuî é matú sheq ngau nyi keq. ²⁹ Hkâsu mù gâ le, 'Zogûng a dut wú é eq naú a huq wú é baùdung myhí pé gi, hkungsô wó nyi ri.' ga luî, taî é buinyi gi, jé lô râ nghut lhê. ³⁰ Haú buinyi má, byu pé gi, bùm pé lé,

'Ngamoq ahtoq má byoq nhé aq!'

ga luî le, kong pé lé,

'Ngamoq ahtoq má nghop aq!'

ga luî le, wut taî bùm bekô râ nghut lhê.

³¹ Byu pé gi, sigâm jûm tô ashî le isu kut kô é nghut le gi, màn jáng gi, hkâsu wá dut lò râ lhú?" ga taî ri.

³² Haú hkûn, damyaq í yuq lé le, sat pyám râ ga, Yesuq eq rahá shuî htoq ló akô.

³³ Ahkuî, Ugyap nghu é kong má jé jáng, Yesuq lé tapzîng htoq má jén tap tô é hkûn, damyaq í yuq lé le, loqpai loqyò shut kut luî tapzîng má jén tap tô akô. ³⁴ Haú hkûn, Yesuq gi, "Âwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri." ga taí ri. Gyezô pé gi, Yhâng é mebu pé lé lháng, hkyîn shosé she é đông gam yu pyám byi akô.

³⁵ Mingbyû wuî gi, yap to mù tu wú nyi akô. Zau suwún wuî Yhang lé nyhap é gi, "Yhang gi, byù góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq." ga akô.

³⁶ Gyezô pé le, huî ê mù, rhoî nyaú nyaú akô. Yhangmoq gi, chyîn wing lé yhun byi kôluî, ³⁷ "Nàng gi, Yudaq byu pê é hkohkâm nghut é nghut le gi, Náng gùng yhang nàng, hkyi yu wú aq." ga Yhang lé taí akô.

³⁸ Yhâng é ulhum ahtoq má le, (Grik đông le, Latin đông le, Hebre đông le) "SHÍ YUQ GI, YUDAQ BYU PÊ É HKOHKÂM." gâ é laiká kâ tap tô akô.

³⁹ Tapzîng htoq má bat tap lhâng to huî é damyaq rayuq gi, "Nàng gi, Hkrisduq nghut lhê, a nghut lhú? Haú Náng gùng nàng le, ngá-nhik lé le, hkyi yù aq." ga luî, Yhang lé rhoî ri.

⁴⁰ Damyaq góyuq sù kúm gi, "Nàng le shí yuq eq rajung za jén tô é hui luî nhîng, Garai Gasang lé a gyuq lhú? ⁴¹ Nga-nhik gi, yhumsîng kut shut é mara eq rajung za, jéyáng hui zo gíng é sù nhik nghut lhê; shí yuq kúm gi, hai mara lé kut shut wú sù a nghut." ga luî, haú yuq lé tân kat ri.

⁴² Hau htâng, yhang Yesuq lé taí é gi, "Yesuq ê, Nàng, Náng é mingdán má jé ló jáng, ngo lé myit bun laq ô." gâ ri.

⁴³ Haú hkûn, Yesuq gi, "Ngò, nang lé teng za taí lé, hkû-nyí yhang nàng Ngò eq rahá hparadisu* má nyi râ nghut lhê." ga luî, yhang lé tû taí kat ri.

Yesuq Soqkang Byit É Hkyô
Mht 27:45-56; Mrk 15:33-41; Yhn 19:28-30

⁴⁴ Haú ahkyíng gi, nyí káng raxe í hkyíng nghut luî, myinhâng sum hkyíng jé shoq ramau gón mauchut tuq dut byuq bê nghut ri;† ⁴⁵ hkâsu mù gâ le, builoq shum byuq é yanmai nghut ri. Noqkuq yhûm mâ é pán-gyang le, í hkyam byáng dut byuq bê nghut ri. ⁴⁶ Haú hkûn, Yesuq gi, "Âwa ê, Ngò, Ngá é woi-nyí náng é loq má ap byi lhê." ga htê mó èq garû kat ri. Haú su ga ban taí eq, Yhang kâng byit bê nghut ri.

⁴⁷ Shô up gyezau hpó gi, haú su dut é lé myàng jáng, "Shí yuq gi, gè gè yhang, dingmán sù nghut ri." ga luî, Garai Gasang lé hkya-on kungton ri. ⁴⁸ Haú hkyô lé wú râ ga, lé zîng tô é byù lhunglhâng bang le, haú su dut é hkyô pé lé myàng kôjáng, myit yón kôluî, wànggàng bat mù, dum taú ló byuq bekô. ⁴⁹ Nghut kôlhâng, Yhang lé sê é bang eq Galile mau mai Yhang htâng châng é myiwe wuî gi, we we má yap to mù, haú hkyô pé lé byu wú nyi akô.

Yesuq É Màng Lé Lup Hkaú Má Kat É Hkyô
Mht 27:57-61; Mrk 15:42-47; Yhn 19:38-42

⁵⁰ Haú hkûn, Yuda mau Aramahti gâ é myuq má, Yosep gâ é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasâng é mingdán jé râ hkyô lé myit myoqbyu to sù le, nghut mù luî, ⁵¹ yhang gi, Yudaq uphkâng hpúng mâ é rayuq nghut kôlhâng, hpyé lhûm é hkyô má le, zui saí é hkyô má le, myit a bo huî lom é sù nghut ri. ⁵² Yhang gi, Pilat chyáng wàng luî, Yesuq é gungsôm lé dúng yu ri. ⁵³ Haú mù, gungsôm haú lé tapzîng mai hkyut hkyô yù luî, pán yúng èq htup yup mù, ó lé lháng a kat wú shí é, luqgok lé kyûng tô é luqgok lup hkaú má kat tô ri. ⁵⁴ Haú nyí gi, Hên Lajang Buinyì nghut luî, Bánno buinyì jé râ za nghut bê.

⁵⁵ Galile mau mai Yesuq eq rahá htoq lé lo é myiwe zo wuî le, Yosep htâng má châng ê luî, lup haú lé le, Yesuq é gungsôm lé le, hkâsu kut tô tô é lé, ê myang akô. ⁵⁶ Hau htâng, yhangmoq gi, yhûm shut taú lò mù, Yesuq é gùng sôm lé but byi râ matú, namngón é jung eq mura xû lé hen tô akô. Bánno buinyì má kúm gi, tarâ joq é eq rajung za, yhangmoq yuban bân nyi bum akô nghut ri.

* 23:43 Hparadisu nghu é gi, mauhkûng mingdán lé taí ri. † 23:44 Nga-nhûng é nyí káng raxe í hkyíng gi, Yudaq byù pê é napkýó hkyuq hkyíng nghut lhê; yhangmoq é gau hkyíng gi, nga-nhûng é myinhâng sum hkyíng nghut bê.

24

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

¹ Bánno buinyi htang napsûn noq le, myiwe wui gi, yhangmoq hen tô é namngón jung pé lé yu chûng mù, lup shut e ló akô. ²Yhangmoq gi, lup mâ é luqhkum lêng bóng to lánng é lé, ê myàng kômù, ³wang e wú kô le, haû Yhumsîng Yesuq é gungsôm lé, a myàng lo kó nghut ri. ⁴Yhangmoq maú úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nàm má yap tô akô. ⁵Haû mù, myiwe haú bang gi, gyuq dan bum kôluî, myigùng shut myoqdong ngóm gop tô bum é u lé, haû nhik gi, "Nungmoq gi, dui sù lé, shi to bâng chyáng haî mù ho nyi akô lúhú? ⁶Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashî hkûn lé, ⁷'Haû Byu Yhangzo gi, yubak dap bâng é loq má ap pyâm é hui luî, tapzîng má jén sat to huî é htâng, sum nyí nghû é buinyi má lhoq dui toq yu é hui râ nghut lhê.'" ga luî, yhangmoq lé taî tô é dang lé myit bun keq." ga luî, yhangmoq lé taî ri. ⁸Haú hkûn, yhangmoq gi, Yesuq é dang lé bûn kat bekô nghut ri.

⁹Yhangmoq gi, lup mai dum taû lò mù, lagyo raxe rayuq eq gotû lhunglhâng bang lé, haû hkyô banshoq lo taî kyô akô. ¹⁰Lagyo pé lé lo taî kyo bang gi, Magadalaq wà mâ é Mariq, Yoanaq, Yakuq é yhangnu Mariq eq, yhangmoq eq rahá nyi é myiwe góbang le nghut akô. ¹¹Lagyo pé kúm gi, yhangmoq é dang lé dangsôm su ngam pyám kôluî, a jíng byi kó nghut ri. ¹²Nghut kôlhâng, Petruq gi, toq luî lup má din jé ê mù ngóm wú kat le, mâng htup é pán leq tô é lé za myàng mù luî, haû su dut é hkyô lé maú é èq, yhûm shut dum taû lò byuq bê nghut ri.

Chángzo Í Yuq Lé Yesuq Htoq Shit É Hkyô

Mrk 16:12-13

¹³Haû ra-nyí má za, Yesuq é chángzo pé mâ é í yuq gi, Yerusalem wà mó mai nyhit déng kô wê é Ema-u gâ é wà shut e ló akô. ¹⁴Yhangnhik gi, dut laî ló é hkyô pé banshoq lé, rayuq eq rayuq taî lhûm nyi akô. ¹⁵Yhangnhik gi, haû hkyô pé lé rayuq eq rayuq taî hpyê lhûm e ló kô le, Yesuq gi, yhangnhik chyáng jé lé lô

mù, yhangnhik eq rahá sô nyi ri. ¹⁶Nghut kôlhâng, yhangnhik gi, myoq hpuq hpuq pyám byí é hui kômù, Yhang lé a sê wú byuq kó nghut ri.

¹⁷Hau hkûn, Yesuq gi, yhangnhik lé, "Nungnhik hkyô so uchyang taî lhûm lé lo é gi, haî jung wá nghut akô lúhú?" ga myi kat jáng, yhangnhik gi, myoqdong shûm kut luî, hkyîng yap tô akô. ¹⁸Yhangnhik mâ é Hklupa gâ é sù gi, "Nàng gi, Yerusalem wà mó má lé bíng nyi luî nhîng, shí gyoro lé haû wà má dut lo é hkyô pé lé, a sê é bíng gi, Nàng baú za wá nghut lhê lúhú?" ga myi kat ri.

¹⁹Yhang gi, "Haî jung lúhú?" ga dum myí é hkûn lé, yhangnhik gi, "Nazaret wà byù Yesuq é hkyô nghut lhê; haû yuq gi, Garai Gasâng é hí má le, byù lhunglhâng bâng é hí má le, nhut shô hpaqchyî a-tsam eq hkyî loq a-tsam má wum-o bo é sù myiqhtoi nghut ri. ²⁰Nghut kôlhâng, hkyangjong agyi pé eq ngamoq é zau suwún wui èq haû yuq lé sat pyám râ matú ap byí pyám kômù, yhangmoq gi, Yhang lé tapzîng má jén sat pyám bekô nghut ri. ²¹Ngamoq kúm gi, haû yuq lé, Israelaq byù myû lé hkyi yù râ sù nghut lhê nghû luî, myit myoqbyu nyi bum lhê. Nghut kôlhâng, haû su dut laî ló é gi, hkû-nyí sum nyí lhang bò bê. ²²Hau htoq agó, hkû-nap noq le, lup má ê wú é, ngamoq hpúng mâ é myiwe wui ra-am gi, ngamoq lé, lo lhoq maú akô. ²³Yhangmoq gi, Yesuq é gungsôm lé a myàng jáng dum taû lò mù, 'Haû Yhumsîng dui nyi ri.'" ga luî, taî kyô é maumang lagyo htoq shit é shing-rán lé, myang é hkyô lé lo taî kyô akô. ²⁴Haû mù, ngamoq é luzúm wui ra-am gi, lup má ê wú kô le, myiwe wui taî é eq rajung za, dut to lánng é lé ê myàng akô. Nghut kôlhâng, haû yuq lé gi, yhangmoq a myàng kó gâ." ga luî, Yhang lé taî kyô akô.

²⁵Haú hkûn, Yhang gi, "Myiqhtoi pé taî é dang banshoq lé lumjîng râ matú, hpaqchyî a bo é eq ngha é sù nhik ê, ²⁶Hkrisduq gi, haû su é wuihke jamjau hkâm zô yu é htâng má sheq, Yhâng é hpungwup shing kang má wó wang nyi to râ, a nghut kó lúhú?" ga luî, yhangnhik lé myí ri. ²⁷Yhang gi, yhangnhik lé, Mosheq kê tô é eq myiqhtoi pé banshoq bang kê tô é Chyúmdang pé mai, Yhang má âng é dang banshoq é lichyúm lé, taî hpông kyô ri.

²⁸ Ahkuî, yhangmoq, haú nhik e ló é wà má chyâng lò kôjáng, Yesuq gi, laí ló rã su kut ri. ²⁹ Haú hkûn, yhangnhik gi, "Nga-nhik eq rahá wang bíng sháng; hkãsu mù gã le, buigyùm bê mù, mau le chut lò bê nghut ri." ga luí, Yhang lé wum kat chôm lung nyi akô. Haú mù luí, Yesuq gi, yhangnhik eq rahá wang bíng bê nghut ri.

³⁰ Yesuq gi, zang zo rã ga, yhangnhik eq rahá zung tô é hkûn, muk lé yù luí, jeju hkya-on mù, myhik hpé luí, yhangnhik lé gãm byí ri. ³¹ Haú hkûn, yhangnhik é myoq bóng lò luí, Yesuq nghut é lé bûn sé kat bekô. Yesuq kúm gi, yhangnhik chyáng mai byuq byuq bê nghut ri. ³² Haú mù, yhangnhik gi, "Yhang gi, hkyô má ngã-nhik eq dang nyo lhùm é eq Chyúmdang é lichyúm taí hpóng shit é hkûn, ngã-nhik gi, i-myt unghkaú má, achyí aku dut bê a nghut lhú?" ga luí, yhangnhik yhangchang taí lhùm akô.

³³ Yhangnhik gi, toq mù, radá dâm Yerusalem wà mó shut dum taú ló kô le, lagyo raxe rayuq eq, yhangmoq eq rahá nyi é bang zup míng to kô é lé ló myang akô. ³⁴ Haú bang gi, "Haú Yhumsîng gi, teng za yhang dum dui toq ló bê; Simun lé lháng htoq shit bê nghut ri." ga taí lhùm nyi bum akô. ³⁵ Haú hkûn, yhangnhik gi, hkyô má dut laí ló é hkyô pé eq, muk hpé é hkûn má Yesuq lé bûn sé kat é hkyô lé, taí kyô akô nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18; Yhn 20:19-23; Lagyo 1:6-8

³⁶ Yhangmoq haú hkyô lé chôm taí nyi tô bum ashí le, Yesuq gi, Yhang gûng yhang, yhangmoq é agùng má yap to luí, "Nungmoq nguóngón yuqyo nyi sháng gaq." ga luí, yhangmoq lé taí ri.

³⁷ Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô. ³⁸ Haú mù luí, Yhang gi, "Nungmoq gi, haí mù dan nyi bum akô lhú? Haí mù nungmoq é i-myt unghkaú má úng-âng nyi bum akô lhú? ³⁹ Ngá é loq eq Ngá é hkyô lé wú wú keq. Ngò yhang nghut nyi lhê. Ngo lé sop wú keq. Sobyô nghú é gi, ngo lé nungmoq myang é su, sho eq showui

showang bo é a nghut." ga luí, yhangmoq lé taí kyô ri.

⁴⁰ Yhang gi, haú su ga taí mù, Yhâng é hkyô loq lé tûn shit ri. ⁴¹ Yhangmoq gi, gabú é eq maú nyi bùm kômù, a wó jíng shi dut tô é hkûn lé, Yesuq gi, "Nungmoq shí má zôhpo rajung jung wó akô lhú?" ga luí, yhangmoq lé myi kat ri. ⁴² Haú hkûn, yhangmoq gi, nyhîn nyhoq tô é ngozo rahtung lé, byí akô. ⁴³ Yhang gi, haú lé yù mù, yhangmoq é hí má zô shit ri.

⁴⁴ Hau htâng, Yhang, yhangmoq lé taí é gi, "Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luí kã to má kã to banshoq gi, dik rã chyat nghut lhê nghú luí, nungmoq eq rahá nyi to ashí hkûn lé, Ngò, nungmoq lé taí kyô tô é pé gi, shí nghut bê." ga taí ri.

⁴⁵ Hau htâng, Yhang gi, Chyúmdang pé lé sê gyo shoq ga, yhangmoq é i-myt hkum hpóng byí ri. ⁴⁶ Haú mù, Yhang gi, "Hkrisduq gi, wuîhke jamjau hui zo mù, sum nyí nghú rã buinyi má, shi é mai dum dui toq lò rã hkyô lé le, ⁴⁷ Yerusalem wà mó mai hí luí, byù myû chângjup lé, Yhâng é myèng lé lang luí yubak mara hkyut pyâm byi rã hkyô eq myit lhîng rã hkyô lé le, hko kyo rã hkyô lé, kã to bê nghut ri. ⁴⁸ Nungmoq gi, shí pé é saksé pé nghut nyi akô. ⁴⁹ Ngá Wa byí tô é danggidiq* lé, Ngò, nungmoq é ahtoq má nhang kat rã nghut lhê; nungmoq kúm gi, htoq tsáng myhâng mâ é wum-o a-tsam wó yu é buinyi jé shoq, Yerusalem wà mó má lãng nyí keq." ga luí, yhangmoq lé taí ri.

Yesuq Mauhkûng Shut Shuí Toq Yu Huí É Hkyô

Mrk 16:19-20; Lagyo 1:9-11

⁵⁰ Hau htâng, Yhang gi, yhangmoq lé Behtani wà yàm shut shuí htoq ê mù, Yhâng é loq tu toq luí, shimân byí ri. ⁵¹ Haú su kut shimân byí nyi ashí le, Yhang gi, yhangmoq chyáng mai gâng ló byuq luí, mauhkûng shut shuí toq yu é hui bê nghut ri. ⁵² Yhangmoq kúm gi, Yhang lé noqkuq kômù luí, gyai gabú é myit èq Yerusalem wà mó shut dum taú ló akô. ⁵³ Yhangmoq gi, noqkuq yhùm má nyi to mù, Garai Gasang lé hkya-on kungton nyi bum akô nghut ri.

* 24:49 Ngá Wã byi tô é danggidiq nghu é gi, Chyoiyúng é Woi-nyí lé taí ri.

YOHAN é Gabú Danglù Laiká (The Gospel of John)

Haù Mungdang, Xângzo Byù Gùng Lé Dut É Hkyô

¹A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri. ²Yhang gi, a-nham sâng-hi má, Garai Gasang eq rahá nghut nyi ri.

³Nyì mi-nyì, joq mijoq gi, Yhang đông mai hpan tô é chyat nghut lhê; Yhang đông mai a hpan é gi, haí lhang a joq nghut ri.

⁴Asak chyungxe gi, Yhang má nghut lhê mù, asak haù gi, byu pê é matú maubó nghut ri. ⁵Haù maubó gi, mauchut má duqbó byì nyì kôlhang, mauchut gi, haù lé a hap yù nghut ri. ⁶Garai Gasang mai nhang kat é, Yohan gâ é byù rayuq jé lé ri.

⁷Yhang gi, maubó haù eq sêng é hkyô lé, saksé hkám byi luí, yhang é yanmai byù lhunglhang bang wó lumjínng kó sháng gaq ga, saksé rayuq đông jé lé é sù nghut ri.

⁸Yhang gi, haù maubó a nghut; maubó haù lé saksé hkám byi râ matú za sheq jé lé é ru nghut lhê. ⁹Byù yuq jup lé duqbó byi é, maubó akying haù gi, mingkan htoq má jé nyi to bê.

¹⁰Yhang gi, mingkan htoq má nyi to bê nghut ri; mingkan lé gi, Yhang đông mai hpan tô é nghut kôlhang, mingkan haù gi, Yhang lé a wú sé nghut ri. ¹¹Yhang gi, yhumsîng mau má jé lé kôlhang, Yhang é amyû pé gi, Yhang lé a lhom hap yù kó nghut ri. ¹²Nghut kôlhang, Yhang gi, Yhang lé lhom hap yù luí, Yhang é myìng lé lumjínng é bang lhunglhang lé, Garai Gasâng é yhangzô pé dut râ ahkáng byi bê nghut ri. ¹³Haù bang gi, sui sho đông hku kat é le a nghut, byù ô nau é đông hku kat é le a nghut, gungsho ô nau é đông hku kat é le a nghut e za, Garai Gasang chyáng mai hku kat é bang ru nghut lhê.

¹⁴Haù Mungdang gi, xângzo byù gùng lé dut luí, ngamoq chyáng nyi wú bê nghut lhê. Ngamoq gi, haù jeju eq tengmán hkyô

byìng tô é, Yhang é hpungwup shingkang lé myang wú bê nghut lhê; haù gi, haù Ìwâ é zote rayuq đông, Yhang wó yu é hpungwup shingkang nghut ri.

¹⁵Wui-myhup Sará Yohan gi, Yhang eq sêng é hkyô lé saksé hkâm é hkûn, garû taí é gi, "Ngá é htâng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri." nghû, ngò taí é sù gi, shí yuq nghut bê." gâ ri. ¹⁶Yhâng é gumjup é jeju ahkaù mai, nga-nhúng banshoq bang gi, shimân jeju lé ralhùm htoq ralhùm myang yu nyì bê nghut lhê. ¹⁷Hkâsu mù gâ lé, haù jep é tarâ gi, Mosheq é loq đông mai byì é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê. ¹⁸Garai Gasang lé, ó yuq èq le a myang wú wú é nghut lhê; nghut kôlhang, haù Ìwâ é tanghkoí má lúng tô é, Yhang Zo zote gi, Garai Gasâng é gùng lé lhoq htoq shit bê nghut ri.

*Wui-myhup Sará Yohan Hko Kyô É Hkyô
Mht 3:1-12; Mrk 1:1-8; Luk 3:15-17*

¹⁹Yerusalem wà mó mâ é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myì nhang kat kô é hkûn, Yohan saksé hkâm é gi, a-ô mâ é hkyô pé nghut ri. ²⁰Yhang gi, a hê a zaú tô e za, "Ngò gi, Hkrisduq* a nghut." ga lhom taí kyô ri.

²¹Haù hkûn, yhangmoq gi, "Haù nghut jáng, nàng gi, ó yuq nghut lhê lú? Nàng gi, Eliyaq lú?" ga myi kôjáng, yhang gi, "A nghut." ga taí ri; "Nàng gi, haù Myiqhtoi nghut lhê lú?" ga dum myi kôjáng, yhang gi, "A nghut." ga tû taí ri.

²²Haù mù, yhangmoq gi, "Ngamoq lé nhang kat bâng chyáng ló wó taí kyo râ matú, nàng gi, ó yuq nghut lhê lú? Náng gùng lé nàng hkâsu nghû lhê lú? Taí kyô wú laq." ga dum myì akô.

²³Haù hkûn, Yohan gi, myiqhtoi Esai-aq é dang eq rajung za, "Ngò gi, haù yoso má, 'Yhumsîng é matú hkyô lhoq nyhang to keq.' gâ é htê lé, garû taí é sù nghut lhê." ☆ ga tû taí ri.

²⁴Hparishe pé mai nhang kat é bang ra-am gi, yhang lé, ²⁵"Nàng gi, haù Hkrisduq le a nghut, Eliyaq le a nghut, Myiqhtoi le

* 1:20 Grik dong Hkrisduq gâ é gi, xù but hui Sù gâ é lichyùm nghut mù, Hebre dong "Mesaia" gâ é eq rajung za nghut lhê. ☆ 1:23 Esai 40:3

a nghut é nhing, haî mù luî, wui-myhup hkám byi nyi lhê lhu?" ga dangmyi myî akô.

²⁶ Haú hkûn, Yohan tû taî é gi, "Ngò gi, wui èq za wui-myhup hkám byi lhê; nghut kôlhang, nungmoq a sê é sù rayuq nungmoq chyáng yap tô ri. ²⁷ Yhang gi, ngá htâng má lé é sù yuq nghut bê; ngò gi, Yhâng é hkyî-tsung tui lé hpyî râ lhang a gingdán é nghut ri." gâ ri.

²⁸ Shí pé banshoq gi, Yohan wui-myhup hkám byî nyi é, Yodan làng hé hpoq mâ é Behtani wà má dut é hkyô pé chyat nghut ri.

Yesuq Gi, Garai Gasâng É Sauzo Nghut É Hkyô

²⁹ Hau htang nyí, Yohan gi, yhâng chyáng Yesuq lé lo nyi é lé myàng luî, taî é gi, "Mingkan byu pê é yubak mara lé yu pyám byî é Garai Gasâng é Sauzo lé, wú keq! ³⁰ Shí yuq gi, 'Ngá é htâng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù nghut ri.' nghû, ngò taî é sù yhang nghut bê. ³¹ Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israelaq byu pé wó sé kó sháng gaq nghû, ngò lé jé mù, wui èq wui-myhup hkám byî nyi é nghut lhê." gâ ri.

³² Hau htâng, Yohan saksé hkâm é gi, "Haú Woi-nyí gi, mauhkûng mai hpûngkyui gunghkyâng sù é dông mai gyó lé mù, Yhâng chyáng lé nô tô é lé, ngò myàng ri. ³³ Ngò gi, Yhang ó yuq nghut é lé a sê é nghut kôlhang, wui èq wui-myhup hkám byi râ matú, ngo lé nhang kat é Sù, ngo lé taî kyô é gi, 'Haú Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haú Chyoiyúng Woi-nyí má wui-myhup hkám byi râ sù nghut lhê.' gâ ri. ³⁴ Haú eq rajung za ngò myàng bê nghut luî, shí yuq gi, Garai Gasâng é Yhangzo nghut lhê nghû, ngò saksé hkâm lhê." gâ ri.

Sâng-hi Lhê É Chángzô Pé

³⁵ Hau htang nyí, Yohan gi, yhâng é chángzo í yuq eq rahá, haú má dum nyi tô akô. ³⁶ Haú hkûn, yhang gi, Yesuq lai lô nyi é lé myang kat jáng, "Hê, Garai Gasâng é sauzo lé, wú keq!" ga taî kat ri.

† 1:39 Raxê hkyíng gi, myinhâng myi hkyíng záng ri. "Petruq" gâ é lichyúm gi, luqgok gâ é nghut lhê.

³⁷ Chángzo haú í yuq gi, yhang haú su gâ é lé wó gyo kôjáng, Yesuq é htâng cháng bekô nghut ri. ³⁸ Yesuq gi, lhing wú kat le, yhangnhik châng tô é lé myàng luî, "Nungnhik haî o akô lhu?" ga myi jáng, yhangnhik gi, "Rabai ê, Nàng hkâmá nyi lhê lhu?" ga taî myî kat akô nghut ri. (Rabai gâ é gi, Sará gâ é lichyúm nghut lhê.)

³⁹ Haú hkûn, Yhang gi, "Lé keq, haú jáng, nungnhik myàng kó râ nghut lhê." ga tû taî ri.

(Haú-u gi, raxê hkyíng† kô nghut ri.) Haú mù luî, yhangnhik gi, châng ê mù, Yhang hkâmá nyi é lé, ê myàng kôluî, haú nyí buigyùm shoq, Yhang eq rahá ê nyi nyi akô nghut ri.

⁴⁰ Yohan taî é dang lé wó gyo luî, Yesuq htâng châng é su nhik mâ é rayuq gi, Simun Petruq é yhanggu Andre nghut ri.

⁴¹ Andre gi, yhangmang Simun lé hí myàng luî, "Nga-nhik gi, Mesaia lé myàng bê." ga yhang lé taî kyô ri. (Mesaia gâ é lichyúm gi, Hkrisduq gâ é nghut lhê.) ⁴² Hau htâng, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa‡ gâ é myìng lé, nàng wó yû râ nghut lhê." ga taî ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

⁴³ Hau htang nyí, Yesuq gi, Galile mau shut ê râ matú, myit hpyit yû bê nghut ri. Yhang gi, Hpilip lé myàng jáng, "Ngá htâng cháng aq." ga taî ri.

⁴⁴ Hpilip gi, Andre eq Petruq nhik nyi é Bet-saida wà mó mâ é byù nghut ri.

⁴⁵ Yhang gi, Nahtanelaq lé myàng jáng, "Mosheq mai tarâ laiká má kê tô é eq myiqhtoî pé mai le lhoq ang luî kê tô é sù, Yosep é yhangzo, Nazaret wà byù Yesuq lé, ngamoq myàng bê." ga yhang lé taî kyô ri.

⁴⁶ Haú hkûn, Nahtanelaq gi, "Nazaret wà ô! Haú mai, ge é jung haî wa wó htoq lhê lhu?" ga myi jáng, Hpilip gi, "Ru lé wú aq." ga yhang lé taî ri.

⁴⁷ Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luî, "Wú keq, shí yuq gi, mhaú é myit a bo é

‡ 1:42 Aramaik dang dông Kehpa gâ é eq Grik dang dông

sû, Israelaq byù akying rayuq nghut ri." ga taí ri.

⁴⁸Haú hkûn, Nahtanelaq gi, "Nàng, ngo lé hkâsu kut sê é lhú?" ga myi jáng, Yesuq gi, "Nang lé, Hpilip eq a wut yù shimá, nàng, maihpáng gâm ô má ru nyi tô ashí hkûn, Ngò, nang lé myàng bê nghut lhê." ga tũ taí ri.

⁴⁹Haú mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pé é Hkohkâm le nghut ri." ga taí ri.

⁵⁰Haú hkûn, Yesuq gi, "Ngò, nang lé, maihpáng gâm ô má myang é nghũ taí kyô é yanmai, nàng lumjínghê a nghut lhú? Hau htoq je kô é muzó pé lé, nàng myàng rã nghut lhê." ga taí ri. ⁵¹Hau htàng, Yesuq xoq taí é gi, "Ngò, nungmoq lé teng za taí kôlé, mauhkûng bóng lô luí, haú Byu Yhangzô ahtoq má, Garai Gasâng é maumang lagyô pé doq ló gyó lô kut nyi kô é lé, nungmoq myàng kó rã nghut lhê." ga ri.

2

Wuì Lé Tsibiyiq Wing Dut Nhang É Hkyô

¹Hau htàng, í nyí nghũ rã nyí má, Galile mau má é Hkanaq wà mó má, myiháng poí ralhũm joq ri. Haú má Yesuq é yhàngnu le, bo lom ri. ²Yesuq eq Yhâng é chángzô pé lé le, myiháng poí haú má ji akô nghut ri. ³Tsibiyiq wing jáu tũm to kô é hkûn, Yesuq é yhàngnu gi, "Yhangmoq, tsibiyiq wing a wó lo kó nghut ri." ga, Yesuq lé taí ri.

⁴Haú hkûn, Yesuq gi, "Ânu ê,* haú, nàng gi, Ngò eq haí sêng lhê lhú? Ngá é ahkyíng a jé shi é nghut lhê." ga tũ taí ri.

⁵Nghut kôlhang, Yhâng nu gi, haú dui-nhâng zoshâng wuì lé, "Yhang haí taí le, haí kut keq." ga taí ri.

⁶Haú nãm má, í sum xê galan kô wang é luqgok wúng hkyuq cham joq tô ri; haú gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

⁷Yesuq gi, haú dui-nhâng zoshâng wuì lé, "Wúng haú pé má wuì lhoq pyíng keq." ga taí ri; haú mù, yhangmoq gi, wúng haú pé má byíng shoq shoq lhoq pyíng bekô nghut ri.

⁸Hau htàng, Yhang gi, yhangmoq lé, "Ahkuí, ratsuí hkũ yù mù, poí-up lé yu ló

byi keq." ga taí jáng, yhangmoq gi, yu ló byí akô nghut ri.

⁹Poí-up hpó gi, wuì mai dut é tsibiyiq wing haú lé, shuq chyam wú ri; wuì hkam é dui-nhâng zoshâng wuì gi, tsibiyiq wing haú hkâmai lo é hkyô lé sê to kôlhang, yhang gi, a sé nghut ri. Haú mù, yhang gi, lusik lé, ji yù luí, ¹⁰"Yuq hkangmó gi, tsibiyiq wing mún lé hí jáu mù, bíng pé shuq gyí bùm jáng sheq, tsibiyiq wing apyàng lé ru yu htoq lhê; nghut kôlhang, nàng gi, nghâm é tsibiyiq wing lé, ahkuí jé shoq wó hkong tô ri-nhung!" ga taí ri.

¹¹Galile mau má é Hkanaq wà mó má, Yesuq tũn shit é limik kumlhá gi, Yhang kut é limik kumlhá pé má é sâng-hi dãm nghut ri. Yhang gi, Yhâng é hpungwup shingkang lé, haú dõng lhoq htoq shit é nghut mù luí, Yhâng é chángzô pé gi, Yhang lé lumjínghê bum akô nghut ri.

Noqkuq Yhũm Lé Lhoq Sansêng Pyãm É Hkyô

Mht 21:12-13; Mrk 11:15-17; Luk 19:45-46

¹²Hau htàng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó ló ri; yhangmoq gi, haú má buinyi myi ngò nyi akô nghut ri.

¹³Yudaq byu pé é Lhoqlhai Poí jé rã nghut é hkûn, Yesuq gi, Yerusalem wà mó má doq ló ri. ¹⁴Haú hkûn, noqkuq yhũm wàng má, nojũng, sau, hpũngkyui pé lé ùng nyi é bang lé le, siboi má ngùn htaí zô zung nyi é bang lé le, Yhang ló myàng ri. ¹⁵Haú mù, Yhang gi, tui lé, nhuq rã wase saí yù mù, banshoq bang lé le, sau eq nojũng lé le, haú noqkuq yhũm wàng mai hkat htoq luí, ngùn htaí zo bãng é ngùn htingchap lé gi, tũ hut pyám byi mù, yhangmoq é siboi lé gi, tu mhuq pyám byi ri; ¹⁶haú hpũngkyui ung zô é bang lé le, "Zè shi pé lé yu htoq ló keq! Ngá Wá é yhũm lé, hpugá jowò hkâkut kó!" ga luí nhik-yô ri.

¹⁷Haú mù, Yhâng é chángzô pé gi, "Ngò, Náng é yhũm lé chyitdap kãng tui é hkyô gi, Ngo lé myi su nyhê jôm pyám rã nghut lhê."☆ ga kê tô é lé, myit bũn kat akô nghut ri.

¹⁸Yudaq byu pé gi, Yhang lé, "Nàng, shí pé kut rã ahko ahkáng wó é hkyô lé saksé

* 2:4 Ânu ê gâ é lé, Grik dõng gi, "Myiwe myhi ê" ga bo tô é nghut lhê. ☆ 2:17 Hkya-on 69:9

tùn shit râ matú, ngamoq lé, hái jung limik kumlhá wó tùn shit râ lhú?" ga chòm myí akô nghut ri.

¹⁹ Haú hkûn, Yesuq gi, "Noqkuq yhûm shî lé nungmoq hpyoq pyám keq, sum nyí gyoro má, Ngò, haú lé dum tu shap râ nghut lhê." ga, yhangmoq lé tù taí ri.

²⁰ Haú Yudaq byu pé gi, "Noqkuq yhûm shî lé, myí xe hkyuq zân tup saí é ru nghut lhê; sum nyí gyoro má za, Nàng wó tu shap râ lhú?" ga tu myí akô nghut ri.

²¹ Nghut kôlhang, Yesuq taí é noqkuq yhûm gi, Yhâng é gùng lé lhoq ang luí taí é nghut ri. ²² Haú mù, Yhang, shi é mai lhoq dui toq huí é hkûn sheq, Yhâng é chángzô pé gi, Yhang haú su ga taí é dang lé myit bun kômù, Chyúmdang lé le, Yesuq taí é dang pé lé le, lumjínq akô nghut ri.

²³ Haú Lhoqlhai Poí nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjínq bum akô nghut ri. ²⁴ Nghut kôlhang, Yesuq gi, byù lhunglhâng bâng é myit lé sê é yanmai, yhangmoq chyáng, Yhânggùng lé a ap to nghut ri. ²⁵ Yhang gi, byu é i-myit unghkaú má haí lúng tô é lé sê é yanmai, byù yhangchang saksé hkám byí é a ra nghut ri.

3

Nikodimu Lé, Yesuq Mhoqshit É Hkyô

¹ Nikodimu gâ é Hparishe rayuq nyi ri; yhang gi, Yudaq byu pé é byìn tú wapdoq má bo é sù nghut ri. ² Yhang gi, myín lé, Yesuq chyáng lé mù, "Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut." ga taí ri.

³ Haú hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myâng râ a nghut." ga tù taí ri.

⁴ Haú jáng, Nikodimu gi, "Ipyat kó bê é byù gi, dum hkû é hkâsu kut wó hui râ lhú? Ínû é unghkaú má dum wàng mù, dum hku é hui râ gi, gè gè yhang wó dut râ a nghut!" ga taí ri.

⁵ Haú hkûn, Yesuq gi, "Ngò, nàng lé teng za taí kyo lé, ó yuq nghut kôle, wuì eq Woi-nyí mai hku kat é hui sù za a nghut le gi, Garai Gasâng é mingdán má wó wâng râ a nghut. ⁶ Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri. ⁷ Nungmoq gi, dum hku é hui râ lhê' nghû Ngò taí é dang lé, nàng hkâmaú nyí. ⁸ Haú, laí gi, yhang nau é shut ló lhê. Laí lò htê lé nàng wó gyo kôlhang, laí hkâmai lo é eq, hká shut ló é lé, nàng sé râ a nghut; haú Woi-nyí mai hku kat huí é sù, ó yuq nghut kôle, haú eq rajung za nghut lhê." ga tù taí ri.

⁹ Haú hkûn, Nikodimu gi, "Haú gi, hkâsu wó dut râ lhú?" ga myí ri.

¹⁰ Yesuq tù taí é gi, "Nàng gi, Israelaq byu pé é sará rayuq nghut to luí nhîng, haú hkyô pé lé a sê gyo lhú? ¹¹ Ngò, nang lé teng za taí kyo lé, ngamoq gi, ngamoq sê é hkyô lé taí mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri. ¹² Ngò gi, nungmoq lé, mingkan eq sêng é hkyô lé taí kyô le lhang, a lumjínq kô é nghut le gi, mauhkûng mingdán eq sêng é hkyô lé taí kyô é nghut le gi, hkâsu kut wó lumjínq kó râ lhú? ¹³ Mauhkûng mingdán mai gyó lo é sù, haú Byu Yhangzo mai lai luí, mauhkûng mingdán má ó yuq lhang wó doq ló wú é a nghut. ¹⁴ Mosheq gi, yoso má lhangmuì lé tu shap tô é su, haú Byu Yhangzo le tu shap tô é hui ra râ nghut lhê. ¹⁵ Haú mù, haú Byu Yhangzo lé lumjínq é yuq hkanqmó gi, ahtum abyuq é asak wó yù râ nghut lhê.

¹⁶ Hkâsu mù gâ le, Garai Gasang gi, mingkan lé gyai yhang chyitdap é yanmai, Yhang Zo lé lumjínq é sù ó yuq nghut kôle, htên byoq é a huí e za, ahtum abyuq é asak wó yù sháng gaq ga, rayuq za é Yhâng é Zote lé byí pyám bê nghut ri. ¹⁷ Hkâsu mù gâ le, Garai Gasang gi, mingkan lé mara byi râ matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui râ matú sheq nhang kat é ru nghut lhê. ¹⁸ Yhang lé lumjínq é sù gi, mara byí é hui râ a nghut; nghut kôlhang, Yhang lé a lumjínq é sù kúm gi, Garai Gasâng é Yhangzo zote lé a lumjínq é sù nghut é yanmai, mara byí é huí to gù bê nghut ri. ¹⁹ Maubó gi, mingkan

htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chytit râ malaî, mauchut lé chytit akô nghut ri; haû gi, mara byî é hui râ hkyô yhang nghut ri.

²⁰ Agè ashop hkyô kut é sù ó yuq nghut kôle, maubó lé a nguì nghut ri; haû yuq gi, yhang kut é hkyô lhoq byông htoq kat râ lé gyuq é yanmai, haû maubó shut lé lô râ a nghut.

²¹ Nghut kôlhang, haû tengmán hkyô đông asak dui é sù ó yuq le, yhumsíng kut é hkyô gi, Garai Gasang lom é hkyô lé, san za byu-myàng sháng gaq ga, haû maubó shut lé lo ri." gâ ri.

Yesuq Eq Séng Luî, Wui-myhup Sará Yohan Saksé Hkâm É Hkyô

²² Hau htâng má, Yesuq gi, Yhâng é chángzô pé eq rahá, Yuda mau shut wang ló mù, haû má rayoq zo nyì luî, wui-myhup hkâm byî ri. ²³ Haû u lé, Yohan gi, Salim nàm má é E-nun gâ é jowò má, wui gyai myo joq é yanmai, wui-myhup hkâm byî nyi ri; byu pé gi, abyit alan lé lò kômù, wui-myhup lé hkâm yu nyi bum akô nghut ri. ²⁴ (Haû gi, Yohan lé htóng a lhoq hkyô shî é hkun lhê é hkyô nghut ri.) ²⁵ Haû hkûn, Yohan é chángzô pé ra-am eq Yudaq byù rayuq gi, lhoq san lhoq yúng hking eq séng luî, dang htíng htíng lhùm bum akô nghut ri. ²⁶ Hau htâng, yhangmoq gi, Yohan chyáng lé luî, "Rabai ê, Yodan làng hé hpoq shut nàng eq rahá nyì luî, nàng èq saksé hkâm byî é Sù gi, ahkuî, wui-myhup hkâm byî nyi é nghut mù, yuq hkangmó gi, Yhâng chyáng e bum akô nghut ri mhaî." ga, yhang lé taî akô.

²⁷ Haû eq séng luî, Yohan tû taî é gi, "Byù rayuq gi, mauhkûng mai byî é za a nghut jáng, haî le wó hap yù râ a nghut. ²⁸ 'Ngò gi, Hkrisduq a nghut, Yhang é hí má nhang kat huî é sù za nghut lhê.' nghû, ngò taî é lé, nungmoq yhang saksé nghut bum akô. ²⁹ Myisik wó é sù gi, lusik nghut ri. Lusik lé, lánng yap tô é luzúm hpó gi, lusik é htê lé wó gyô é yanmai, gyai yhang gabú nyi ri. Haû sù é gabú hkyô gi, ngá é gabú hkyô nghut mù, ngò má byíng jup nyi bê nghut ri. ³⁰ Yhang gi, kô jat lò ra râ nghut lhê; ngò gi, yom ló ra râ nghut lhê.

³¹ Ahtoq mai lé é Sù gi, lhunglhang é ahtoq má nghut ri; myigùng htoq mâ é sù kúm gi, myigùng htoq eq sêng é nghut luî, myigùng htoq eq sêng é đông za taî ri; mauhkûng mai lé é Sù gi, lhunglhang é ahtoq má nghut ri. ³² Yhang gi, wó myàng wó gyô é hkyô lé, saksé hkâm kôlhang, Yhang hkâm é saksé lé, ó yuq le a hap yù kó nghut ri. ³³ Yhâng é saksé lé hap yu é sù kúm gi, haû Garai Gasang gi, tengmán sù nghut ri ga, saksé shit é sù nghut bê.

³⁴ Garai Gasâng eq nhang kat é hui Sù gi, Garai Gasâng é mungdang lé taî ri; hkâsu mù gâ le, Garai Gasang gi, haû Woi-nyí lé, laké a kat e za byî é yanmai nghut ri. ³⁵ Haû Îwa gi, Zo lé chytidap luî, jung hkangmó lé Yhâng é loq má ap byi bê nghut ri. ³⁶ Haû Zo lé lumjíng é sù ó yuq nghut kôle, ahtum abyuq é asak wó lhê; nghut kôlhang, haû Zo lé he-ngik pyâm é sù ó yuq nghut kôle, asak haû lé myàng râ a nghut; hkâsu mù gâ le, Garai Gasâng é nhikmo-yo hkyô gi, yhâng chyáng ru joq nyi ri." gâ ri.

4

Yesuq Eq Samariq Myhí Huî É Hkyô

¹ Yesuq gi, Yohan htoq má, chángzo je lhoq myô é eq wui-myhup hkâm byî nyi ri gâ é hkyô lé, haû Hparishe pé wó gyô akô nghut ri. ² (Nghut kôlhang, gè gè ga jáng, Yesuq gi, Yhang wui-myhup hkâm byî é a nghut, Yhâng é chángzô pé sheq ru nghut akô.) ³ Haû hkyô lé, Yesuq sé jáng, Yhang gi, Yuda mau mai htoq mù, Galile mau shut dum taû ló bê nghut ri.

⁴ Ahkuî, Yesuq gi, Samariq mau mai sô lai ló râ dut bê nghut ri. ⁵ Haû mù, Yhang gi, Yakup mai yhang zo Yosep lé byî é maumyí rajap eq chyâng lhùm é, Suhka ga myhíng é, Samariq mau má é wà mó ralhùm má lo jé ri. ⁶ Haû má, Yakup é wuìhtung le joq to luî, Yesuq gi, hkyô sô ngu é yanmai, wuìhtung hau é nàm má zung gyó tô ri. Haû u gi, nyí-káng raxe í hkyíng* nghut bê nghut ri.

⁷ Haû hkûn, Samariq myiwe myhí rayuq wuì lé hkam ri; Yesuq gi, yhang lé, "Ngo lé wuì byi shuq laq." ga taî ri. ⁸ (Haû u gi, Yhâng é chángzô pé, zoshuq wuì râ matú wà hkaû shut e byuq kô é ahkyíng nghut ri.)

* 4:6 Nyí-káng raxe í hkyíng gi, Yudaq byu pé é hkyuq hkyíng nghut ri.

⁹Haù Samariq myiwe myhí gi, Yhang lé, "Nàng gi, Yudaq byù rayuq nghut to luí nhîng, ngò Samariq myiwe myhí chyáng, haí mù shuq wuî dîng lhê lhú?" ga taí ri. (Hkâsu mù gâ le, Yudaq byu pé gi, Samariq byu pé eq a zùm yap kó nghut ri.)

¹⁰Haù hkûn, Yesuq gi, yhang lé, "Nàng gi, haù Garai Gasâng é chyunghuq lé le, nang lé wuî dung sù ó yuq nghut é lé le, sê é nghut le gi, noq mai Yhang lé dîng tôngbán luí, Yhang gi, nang lé asak-wuî byi berâ nghut lhê." ga tû taí ri.

¹¹Myiwe myhí haù gi, "Yhumsîng ê, Nàng gi, wuî hkâm râ zè haí le a wó, wuîhtung le nik ri; haù asak-wuî lé, Nàng hkâmâ é wó yû râ lhú?" ¹²Ngamoq é îwa Yakup gi, ngamoq lé wuîhtung shî byî to bê nghut lhê; yhang yhang le, yhang zo pé le, yhang rém é dusak pé le, wuîhtung shî mâ é wuî shuq bekô nghut ri; Nàng gi, Yakup htoq je kô lhê lhú?" ga Yhang lé taí ri.

¹³Yesuq gi, "Wuî shí lé shuq é sù ó yuq le, wuîshit é dum hui râ nghut lhê." ¹⁴Nghut kôlhâng, Ngò byî é wuî lé shuq é sù ó yuq nghut kôle, wuîshit é hkâ-nhám a hui lo râ nghut lhê. Ngò byî é wuî haù gi, haù yuq má, ahtum abyuq é asak matú wuîbúm dut râ nghut lhê." ga yhang lé tû taí ri.

¹⁵Myiwe myhí haù gi, Yhang lé, "Yhumsîng ê, ngò gi, wuî le a shit lo, shî má wuî hkâm le a lé ra lo sháng gaq, wuî haù ngo lé byi laq." ga taí ri.

¹⁶Haù hkûn, Yesuq gi, "Ló mù, nung làng lé ló wut lò aq." ga, yhang lé taí ri.

¹⁷Yhang gi, "Ngò, làng a wó." ga taí jáng, Yesuq gi, yhang lé, "Nàng, làng a wó gâ é gi, têng ri." ¹⁸Hkâsu mù gâ le, nàng gi, yuqgè ngo yuq wó wú bê sù nghut ri; nàng, ahkuî wó tô é yuqgè le nung làng a nghut. Nàng gi, têng é dang taí bê nghut ri." ga taí ri.

¹⁹Haù hkûn, myiwe myhí haù gi, "Yhumsîng ê, Nàng gi, myiqhtoi rayuq nghut é hkyô lé, ngò wú sé bê." ²⁰Ngamoq é îchyí îwâ pé gi, bùm shî má noqkuq kô é nghut lhê; nghut kôlhâng, nungmoq Yudaq byu pé gi, Yerusalem wà mó za noqkuq jowò nghut lhê ga taí akô nghut ri." ga taí ri.

²¹Haù hkûn, Yesuq taí é gi, "Myiwe myhí ê, Ngo lé jíng aq; bùm shî má le a nghut, Yerusalem wà mó má le a nghut e za,

haù Îwa lé noqkuq râ ahkyíng, jé lò nyi bê nghut ri. ²²Nungmoq Samariq byu pé gi, yhumsîng lháng a sê é lé, noqkuq akô; ngamoq kúm gi, ngamoq sê é lé noqkuq lhê; hkâsu mù gâ le, hkyi yù hkyô gi, Yudaq amyû mai lo é nghut lhê.† ²³Nghut kôlhâng, haù têng é dîng noqkuq é bang gi, woi-nyí mai le, tengmán hkyô mai le, haù Îwa lé noqkuq râ ahkyíng gi, jé lo nyi bê nghut luí, ahkuî lháng jé to bê nghut ri; hkâsu mù gâ le, haù Îwa gi, haù su kut noqkuq é bang lé ô nau ri. ²⁴Garai Gasang gi, woi-nyí nghut lhê; haù mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê." ga taí ri.

²⁵Myiwe myhí haù gi, "Hkrisduq gâ é Mesaia jé lé râ nghut é lé gi, ngò sê lhê. Yhang jé lé jáng, nga-nhúng lé banshoq taí sân kyo râ nghut lhê." ga taí ri.

²⁶Hau htâng, Yesuq gi, "Nàng eq dang nyo nyi é sù ngò gi, haù yuq nghut lhê." ga taí ri.

Haù Chángzô Pé Dum Taù Jé Lo É Hkûn Lhê Hkyô

²⁷Haù u lé, Yhâng é chángzô pé gi, dum taù jé lo bum akô; yhangmoq gi, Yesuq, myiwe rayuq eq dâng nyo nyi é lé lo myàng luí, maú byuq bum akô. Nghut kôlhâng, "Nàng, haí ô ri lhú?" ga le, "Haí mù Yhang eq dâng nyo nyi lhê lhú?" ga le, Yhang lé ó yuq a myi kó nghut ri.

²⁸Hau htâng, myiwe myhí haù gi, yhâng é wuî yambú lé tô pyâm to luí, wà shut taù wang ló mù, wà byù wuî lé ló taí kyô é gi, ²⁹"Ngò kut laí lò bê hkyô pé lhunglháng lé, taí kyô é byù rayuq lé, lé wú keq! Yhang gi, Hkrisduq nghut lhê abe?" gâ ri. ³⁰Haù mù, yhangmoq gi, wà mai htoq lé luí, Yesuq chyáng lé lo bum akô nghut ri.

³¹Haù u lé, Yhâng é chángzô pé gi, Yhang lé, "Rabai ê, zoshuq zo aq." ga chôm taí akô.

³²Haù hkûn, Yhang gi, yhangmoq lé, "Nungmoq a sê é jung zoshuq zo râ Ngò wó lhê." ga tû taí ri.

³³Haù mù, Yhâng é chángzô pé gi, "Yhang lé, rayuq yuq eq zoshuq lé dé byî é abe?" ga, rayuq eq rayuq taí lhùm bum akô.

³⁴Haù hkûn, Yesuq taí é gi, "Ngo lé nhang kat Sù ô nau é hkyô lé kut râ eq Yhâng é

† 4:22 Bun zo shî má, Yesuq taí nau é gi, hkyi yù hkyô lé, Garai Gasang gi, Yudaq byu pé dîng danggidiq byi to é nghut é lé taí nau é nghut ri.

muzó jizó lé lhoq pán râ hkyô gi, Ngá é zoshuq nghut bê. ³⁵ 'Kyôshu yoq jé râ gi, lhamó myi hkyap râ ashî.' ga, nungmoq lhaq taí lhê a nghut kó lúhú? Ngò, nungmoq lé taí kôlé, nungmoq é myoq hpóng luí, haû yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri. ³⁶ Haû kyô hkyó sù eq kyô shu sù gi, rahá wó gabú kó sháng gaq ga, ahkuí lháng, haû kyô shu sù gi, yhang é zuihpau lé myang yù luí, ahtum abyuq é asak é matú, kyôshi shú tsíng to bê nghut ri. ³⁷ Haû su mù, 'Rayuq gi, sân hkyó, góyuq gi, shú yù.' gâ é sanghkyang gi, têng ri. ³⁸ Nungmoq a zui saí tô é jang mâ é shú yù râ matú, nungmoq lé Ngò nhang kat bê nghut lhê. Góbang gi, haú má wum kat zui saí to bê nghut mù, nungmoq gi, haú bang zui saí é akyû lé shu yù bekô nghut ri." gâ ri.

Samariq Byù Myo Myo Lumjínng Kô É Hkyô

³⁹ "Yhang gi, ngò kut lai lò bê hkyô lhunglháng lé, taí kyô ri." ga luí, myiwe myhí haû saksé hkâm é yanmai, haú wâ mâ é Samariq byù myo myo gi, Yesuq lé lumjínng bùm bekô nghut ri. ⁴⁰ Haû mù, Samariq byu pé gi, Yesuq chyáng lé jé kômù, yhangmoq eq nyi râ matú, Yhang lé lung kô é yanmai, Yhang gi, í nyí bo nyi bê nghut ri. ⁴¹ Yhâng é dang pê é yanmai, byù myo myo gi, lumjínng bang dut jat lò bekô nghut ri.

⁴² Yhangmoq gi, myiwe myhí haû lé, "Ahkuí, ngamoq lumjínng é gi, nàng taí é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sù nghut é lé, ngamoq sé bê nghut é yanmai nghut lhê." ga chòm taí akô nghut ri.

Mingsuwún Hpó É Yhangzo Lé Lhoq Gê Byí É Hkyô

Mht 8:5-13; Luk 7:1-10

⁴³ Í nyí lai jáng, Yesuq gi, haû mai Galile mau shut htoq e ló bê nghut ri. ⁴⁴ "Myiqhtoi gi, yhumsing é mau má myoqdong a wó wú é nghut lhê." ga, Yesuq yhang saksé hkâm é nghut lhê. ⁴⁵ Yesuq gi, Galile mau má jé é hkûn, Galile byu pé gi, Yhang lé lhom hkulum yu akô; yhangmoq gi, Yerusalem wâ mó má, Lhoqlhai Poí ê lóm kô é nghut é yanmai, poí u lé, Yesuq kut é hkyô lhunglháng lé, myàng kô é bang nghut ri.

⁴⁶ Yesuq gi, Yhang mai haû wù lé tsibyiq wing dut nhang é, Galile mau mâ é Hkanaq wâ mó má, ê dum kûm ri. Haû ming suwún rayuq é yhangzo yuqzo gi, Kaperna-um wâ má no nyi ri. ⁴⁷ Yesuq gi, Yuda mau mai Galile mau má jé lé bê gâ é hkyô lé, ming suwún haû wó gyo jáng, yhang gi, Yesuq chyáng é mù, shî-nò no nyi é yhangzo lé, lé lhoq gê byi râ matú, Yhang lé dúng tôngbán ri.

⁴⁸ Haú hkûn, Yesuq gi, yhang lé, "Byù nungmoq gi, limik kumlhá pé eq mauhpò muzó pé lé za a myàng kô é nghut le gi, hkâ-nhám lé lumjínng kó râ a nghut." ga taí ri.

⁴⁹ Mingsuwún haû gi, "Yhumsing ê, ngá zo a shí shimá gyó lé laq." ga taí ri.

⁵⁰ Haú hkûn, Yesuq gi, "Nàng wó ló bê; nung zo byùn râ nghut lhê." ga tû taí ri.

Suwún haû gi, Yesuq taí é dang haû lé gyô jínng luí, tau ló bê nghut ri. ⁵¹ Yhang gi, hkyô má ru nghut nyi ashî hkûn, yhang é dui-nhâng zoshâng wù gi, yhang lé lé hui luí, zoshâng haû gè byuq é hkyô, lé taí kyô akô nghut ri. ⁵² Yhang gi, yhang zo hkâ-nhám gè byuq é ahkyíng lé myi wú é hkûn, yhangmoq gi, "A-nyí nap nyí hkyuí rahkyíng má, gùng nyé é chàm ló byuq bê nghut ri." ga taí kyô akô.

⁵³ Haú hkûn, ahkyíng haû gi, "Nung zo byùn râ nghut lhê." ga, yhang lé, Yesuq taí é ahkyíng nghut é lé, haû yhangwa bûn sé bê nghut ri. Haû mù, yhang eq yhang yhumbyù banshoq bang gi, lumjínng bekô nghut ri.

⁵⁴ Haû gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

5

Wuhtum Yàm Má, Nòhpyo Lhoq Gê Byí É Hkyô

¹ Hau htâng a myáng má, Yudaq byu pê é poí ralhú joq é yanmai, Yesuq gi, Yerusalem wâ mó má doq ló ri. ² Ahkuí, haû Yerusalem wâ mó é Sau Hkúmdong nàm má, Hebre myíng dông gi, Betzahta ga myhíng é wuhtum ralhú joq ri; hau é lhinghkyuq má, jiroq ngo lhum joq tô ri. ³ Jiroq haú pé má, myoqjit bang, hkyi hten bang, gùngjum shî bang ajùm ayò leq tô bum akô. (Haú bang gi, wù dui nún râ lé lánng tô é bang nghut akô. ⁴ Hkâsu mù gâ le,

haù Yhumsing é maumang lagyo gyó lé lé kut mù, wuì lé, lé lhu nhún jáng, wuìhtum haù má hí wó wang é sù gi, haí jung ana wa dap to kôlháng, ge byuq é huí é yanmai nghut ri.)^{*} ⁵ Súm xe shit zân tup no nyi é byù rayuq le, haù má bo tô ri. ⁶ Yesuq gi, haù yuq no leq tô é lé myàng mù, haù su no nyi é gyai myáng bê nghut é hkyô lé sé jáng, yhang lé, "Nàng, gè nau ri lhú?" ga myí ri.

⁷ Nò sù haù yuq gi, "Yhumsing ê, wuì dui nún lo é hkûn, wuìhtum má wàng râ matú, ngo lé garúm râ byù ó a nyi; ngò wàng râ nghú jáng, góyuq hí, ngá hí má wàng wàng dut ri." ga tû taí ri.

⁸ Hau htàng, Yesuq gi, yhang lé, "Toq aq! Náng é taphkang yu chûng luí, sô ló aq." ga taí ri. ⁹ Haù yuq gi, radá dâm nò ge byuq bê nghut luí, yhang é taphkang yù mù, sô ló bê nghut ri.

Haù nyí gi, Bánno buinyi nghut ri. ¹⁰ Haù mù, Yudaq byu pé gi, haù nò ge byuq é hui sù lé, "Hkû-nyí gi, Bánno buinyi nyí nghut é yanmai, nàng, taphkang waq é gi, tarâ lu lai bê nghut ri." ga taí akô.

¹¹ Nghut kôlháng, yhang tû taí é gi, "Haù ngo lé lhoq gè byi sù gi, ngo lé, 'Náng é taphkang yu chûng mù, sô ló aq.' ga taí é nghut lhê." gâ ri.

¹² Haù mù, yhangmoq gi, "'Náng é taphkang yu chûng mù sô ló aq.' ga, nang lé taí é sù gi, ó yuq wá nghut ri lhú?" ga myí akô.

¹³ Nghut kôlháng, haù ó yuq nghut é lé, nò ge byuq é hui sù gi, a châng sê kat nghut ri; hkâsu mù gâ le, Yesuq gi, haù mâ é byù moq mó má wang nyó ló byuq é yanmai nghut ri.

¹⁴ Htàng má, Yesuq gi, haù yuq lé no- qkuq yhûm má myàng jáng, "Wú aq, nàng wángzán bê nghut ri; hí lhê htoq má je wuìhke é hkyô a hui zo sháng gaq, mara hkâkut shut lo." ga luí, yhang lé taí ri. ¹⁵ Haù yuq gi, htoq ló mù, yhang lé lhoq gè byi é sù gi, Yesuq nghut ri ga, Yudaq byu pé lé taí kyô ri.

Asak Wó Yû Râ Hkyô

¹⁶ Haù mù, Yudaq byu pé gi, Bánno buinyi nyí má, Yesuq, haù hkyô kut é yanmai, Yhang lé gunjáng lo akô nghut ri. ¹⁷ Haù hkûn, Yesuq gi, yhangmoq lé, "Ngá Wa gi,

hkû-nyí jé shoq, hkâ-nhám le mù zuí nyi é nghut mù, Ngò le mù zuí nyi lhê." ga taí ri.

¹⁸ Haù mù luí, Yesuq gi, Bánno buinyi lé lhoq htên é htoq agó, Garai Gasang lé lháng, Yhâng Wa ga wut é dông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám râ matú, je riyhang shikut lo akô nghut ri.

¹⁹ Yesuq, yhangmoq lé tû taí é gi, "Ngò, nungmoq lé teng za taí kôlé, haù Zo gi, yhumsing é myit dông haí le a wó kut; Yhâng Wa kut é hkyô lé myang é gù za wó kut é nghut lhê; hkâsu mù gâ le, haù Íwa kut é hkyô lé za, haù Zo châng kut é yanmai nghut lhê. ²⁰ Hkâsu mù gâ le, haù Íwa gi, Zo lé chyitdap é nghut luí, Yhang kut é hkyô lhunglháng, haù Zo lé tûn shit ri; nungmoq máu hông shoq, shí pé htoq je ko é hkyô pé lé lháng, haù Zo lé tûn shit shirâ nghut lhê. ²¹ Haù Íwa gi, shí bê bang lé lhoq dui toq mù, yhangmoq lé asak byí é eq rajung za, haù Zo le, Yhang byí nau é bang lé, asak byi râ nghut lhê. ²² Hau htoq agó, haù Íwa lé hkunggâ é eq rajung za, haù Zo lé le, lhunglháng bang hkungga kó sháng gaq ga, haù Íwa gi, ó yuq lé le a jéyáng e za, jéyáng é hkyô lhunglháng, haù Zo lé lum to bê nghut ri. ²³ Haù Zo lé a hkunggâ é sù gi, haù Yhang lé nhang kat é sù Íwa lé le, a hkunggâ é sù nghut ri.

²⁴ Ngò, nungmoq lé teng za taí kôlé, Ngá dang lé gyo luí, Ngo lé nhang kat é Sù lé lumjínng é sù, ó yuq nghut kôle, mara byí é a hui e za, ahtum abyuq é asak wó é nghut lhê; haù yuq gi, shi é mai lut luí, asak dui bê sù nghut ri. ²⁵ Ngò, nungmoq lé teng za taí kôlé, haù Garai Gasang é Yhangzô é htê lé, shi byuq bê bang wó gyo râ ahkyíng gi, jé lo nyi bê nghut ri; ahkuí lháng jé to bê nghut ri. Htê haù lé gyô é bang gi, asak dui kó râ nghut lhê. ²⁶ Hkâsu mù gâ le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri. ²⁷ Hau htoq agó, Yhang gi, haù Byu Yhangzo nghut é yanmai, Garai Gasang gi, tarâ jéyáng râ ahko ahkáng, Yhang lé byi bê nghut ri.

²⁸ Shí hkyô lé hkâ-má hong nyi kó: lup pé má lúng tô é bang banshoq gi, Yhâng é

* 5:4 Bun zo 3 lhum mâ é ahtang túm eq bun zo 4 lhum gi, chyúmding myo myo má a bo é nghut lhê.

htê lé wó gyo kôluí, htoq ló râ ahkyíng jé ló râ nghut lhê. ²⁹Ge é hkyô kut é bang gi, asak duí râ matú, dui toq kó râ nghut lhê; agè ashop hkyô kut é bang gi, mara byí é hui zo râ matú, dui toq kó râ nghut lhê. ³⁰Ngò gi, Ngá myít dông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é dông châng é a nghut e za, Ngo lé nhang kat é Sû ô nau é dông châng é sheq ru nghut lhê.

Yesuq Eq Séng Luí, Saksé Hkâm É Hkyô

³¹Ngá gúng lé ngò saksé hkâm é nghut jáng, ngò za saksé hkâm é hkyô gi, teng râ a nghut. ³²Ngá é hkyô lé saksé hkâm byí é Sû (Ngá Wa) góyuq nyi lhê; Ngò eq séng luí, haú yuq hkâm é saksé gi, têng é hkyô lé, Ngò sê lhê.

³³Nungmoq gi, Yohan† chyáng byù nhang kat wú bekô nghut ri; yhang gi, haú tengmán hkyô lé saksé hkâm byi bê nghut lhê. ³⁴Ngò gi, xângzo byu pé mai saksé hkâm byi râ lé, ra luí a nghut, nghut kôlhang, nungmoq hkyi yu é wó hui râ matú sheq, haú su nghû taí é ru nghut lhê. ³⁵Yohan gi, duq nyi é myibung su duqbó byí é nghut mù luí, nungmoq gi, haú duqbó é hkaú má, rayoq zo ngón nau nyi akô nghut ri.

³⁶Nghut kôlhang, Ngò wó é saksé gi, Yohan byí é saksé htoq je kô lhê; hkâsu mù gâ le, ahkuí Ngò zui saí nyi é muzó gi, Ngò lhoq pán râ matú, haú Íwa, Ngo lé ap byí tô é nghut luí, haú Íwa, Ngo lé nhang kat é hkyô lé, saksé hkâm byí nyi ri. ³⁷Hau htoq agó, haú Ngo lé nhang kat é sù Íwa le, Ngò eq séng luí saksé hkâm byí ri; nungmoq gi, Yhâng é htê lé le, a wó gyô wú kó; Yhâng é gunghkyâng lé le, a myang wú kó; ³⁸haú Yhâng é mungdang le, nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sû lé a lumjíng kô é yanmai nghut ri. ³⁹Nungmoq gi, haú Chyúmdang mai ahtum abyuq é asak wó yú râ nghut lhê ga myit yù kô é yanmai, haú Chyúmdang má ho wú akô nghut ri; nghut kôlhang, Chyúmdang haú gi, Ngò eq séng luí saksé hkâm byí ri; ⁴⁰nghut kôlhang, asak

wó yú râ matú, nungmoq gi, Ngá chyáng a kâm lé kó nghut ri.

⁴¹Ngò gi, byu eq hkyá-ôn é lé a lhom yu é nghut lhê. ⁴²Nghut kôlhang, nungmoq lé gi, Ngò sê lhê; nungmoq é i-myit hkaú má, Garai Gasang lé chyitdap é myit a bò kó nghut ri. ⁴³Ngò gi, Ngá Wâ é myíng mai jé lé é sù nghut kôlhang, nungmoq gi, Ngo lé a lhom hap yù kó; yhâng myíng yhang lang é byù, gotú rayuq jé lé é ru nghut le gi, haú yuq lé, nungmoq lhom hap yù kó râ nghut lhê. ⁴⁴Nungmoq gi, rayuq eq rayuq hkyá-ôn lhúm é lé za hap yù luí, rayuq za nghut é Garai Gasâng chyáng mai lo é hkyá-ôn hkyô lé gi, a hô kô é bang nhîng, hkâsu kut wó lumjíng kó râ lhú?

⁴⁵Nghut kôlhang, haú Íwâ é hí má, Ngò, nungmoq lé mara hùn nhô hkâ-ngâm kó; nungmoq lé mara hun é sù gi, haú nungmoq mai myit myoqbyu tô é Mosheq ru nghut lhê. ⁴⁶Mosheq lé nungmoq gè gè yhang lumjíng kô é ru nghut le gi, Ngo lé le lumjíng kó râ nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri. ⁴⁷Nghut kôlhang, nungmoq gi, yhang kâ tô é pé lé lháng a lumjíng kô é nhîng, Ngá dang lé, hkâsu kut wó lumjíng kó râ lhú?" gâ ri.

6

Byù Ngo Hkyíng Lé Zoshuq Byi Tsô É Hkyô Mht 14:13-21; Mrk 6:30-44; Luk 9:10-17

¹Hau htâng a myáng má, Yesuq gi, Tiberi nhông le gâ é, Galile nhông he hpoq shut gû dap ló bê nghut ri. ²Haú hkûn, byù ajùm ayò gi, haú nò bâng htoq má, Yhang kut shit é limik kumlhá pé lé myàng kô é yanmai, Yhang htâng châng e ló bum akô nghut ri. ³Yesuq gi, bùm shut doq ló mù, Yhâng é chángzô pé eq rahá zung tô ri. ⁴Yudaq byu pé é Lhoqlhai Poí gi, chyâng lo nyi bê nghut ri.

⁵Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hpilip lé, "Shí bang zo râ muk, nga-nhúng, hkâmá ê wó wuí râ lhú?" ga taí ri. ⁶Yesuq, haú su ga taí é gi, yhang lé chyam wú râ matú za nghut ri; hkâsu mù gâ le, hkâsu kut râ hkyô gi, Yhâng é myit má bo to gù bê nghut ri.

† 5:33 Yohan shí yuq gi, Wui-myhup Sará Yohan nghut lhê.

⁷ Hpilip gi, Yhang lé, "Denari* í sho èq muk wui le lhang, rayuq ratsuí tsuí ngap rá a nghut." ga tũ taí ri.

⁸ Haú hkũn, Yhâng é chángzo nghut é, Simun Petruq é yhanggu Andre gi, Yhang lé, ⁹ "Muk-yo muk ngo long eq ngozo í du wó é yuqgè zo rayuq, shĩ má nyi ri; nghut kôlhang, byù shĩ myhò bang lé luq shoq, hkâsu kut wó gãm byi rá lhu?" ga taí htoq kat ri.

¹⁰ Yesuq gi, "Haú shiwa byu pé lé, zùng nhâng keq." ga taí ri. Jowò haú gi, mhán htu é jang nghut mù, yuqgè wui baú lhang, ngo hkyĩng kô zung tô bùm bekô nghut ri; ¹¹ hau htâng, Yesuq gi, muk long pé lé yù mù, jeju hkya-on luí, zung tô é bang lé, yhangmoq o é myhó tsing gãm byi ri. Haú eq rajung za, ngozo lé le haú su kut ri.

¹² Yhangmoq banshoq bang zô gyĩ bùm kô é htâng má Yhang gi, Yhâng é chángzô pé lé, "Myit gyó tô é ajap azo pé lé châng guq tsĩng yù keq. Haĩ le a langsâ pyám sháng gaq." ga taí ri. ¹³ Haú mù, yhangmoq gi, zô myhit tô é muk-yo muk ngo long mã é ajap azo pé lé châng guq tsĩng le, raxe í mung byĩng shoq wó guq tsĩng yu akô nghut ri.

¹⁴ Haú shiwa byu pé gi, Yesuq kut é limik kumlhá lé myàng kô é hkũn, "Shĩ yuq gi, mingkan htoq mã jé lé lô rá gâ é, Myiqhtoi yhang nghut ri-nhung!" ga taí bum akô. ¹⁵ Yesuq gi, yhangmoq lé mù, Yhang lé hkohkâm zik kut nhâng kó rá dâ é hkyô lé, sê é yanmai, Yhang baú tsik za bùm shut dum haq doq ló bê nghut ri.

*Yesuq, Wui Htoq Mã Sô É Hkyô
Mht 14:22-27; Mrk 6:45-52*

¹⁶ Buigyum htâng, Yhâng é chángzô pé gi, haú nhông shut gyó ló mù, ¹⁷ lhaĩ mã wang ji luí, nhông hé hpoq mã é Kaperna-um wà shut gũ e ló akô; haú hkũn, mauchut bê nghut kôlhang, Yesuq gi, yhangmoq chyáng a jé gyó lo shi nghut ri. ¹⁸ Haú u lé, laidun htan lo é yanmai, wuĩlhêng toq lô bê nghut ri. ¹⁹ Yhangmoq gi, sum myi déng kô lhaĩ kôn e ló kô é hkũn, Yesuq gi, nhông htoq mã so luí, haú lhaĩ shut chyáng lé lo nyi é lé myàng kômù, gyuq dan bùm bekô nghut ri. ²⁰ Nghut kôlhang, Yesuq gi, "Hkâgyuq kó, Ngò ru nghut lhê."

ga yhangmoq lé taí ri. ²¹ Haú mù, yhangmoq gi, Yesuq lé gabú myit èq lhaĩ hkaú mã shuĩ hâng yù nau akô. Haú hkũn, lhaĩ haú gi, radá dâm yhangmoq jé nau é jang wuiyàm mã jé bê nghut ri.

²² Nhông hé hpoq mã nyi tô é byù moq mó gi, haú mã lhaĩ racham za joq laĩ lo é hkyô eq, lhaĩ haú mã Yesuq a bo doq jĩ e za, chángzô pé baú ji htoq ló kô é hkyô lé, hau htang nyĩ, bũn sê kat akô nghut ri. ²³ Haú hkũn, haú Yhumsĩng, jeju hkya-ôn é htâng, byu pé muk zô é jowò nãm mã, Tiberi myuq mã é lhaĩ pé jé lé bum ri. ²⁴ Haú byù moq mó gi, Yesuq eq Yhâng é chángzô pé, haú mã a nyi lo kô é hkyô lé sé kô é yanmai, Yesuq lé châng hô rá matú lhaĩ haú pé mã wang ji mù, Kaperna-um wà shut e ló akô nghut ri.

Yesuq, Asak Muk Nghut É Hkyô

²⁵ Yhangmoq gi, nhông hé hpoq mã Yesuq lé myàng kôjáng, "Rabai ê, Nàng gi, shĩ mã hkâ-nhám jé lé é lhu?" ga, Yhang lé myĩ akô.

²⁶ Haú hkũn, Yesuq gi, "Ngò, nungmoq lé teng za taĩ kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê. ²⁷ Htên byuq sê é zoshuq é matú, hkâshikut kó; haú Byu Yhangzo byi rá nghut é ahtum abyuq é asak é matú, ru gĩng nyi é zoshuq wó yũ rá lé sheq shikut nyi keq. Yhâng chyáng gi, haú Īwa Garai Gasang mai Yhâng é saksé dizik tap to bê nghut lhê." ga tũ taí ri.

²⁸ Haú mù, yhangmoq gi, "Garai Gasang ô nau é muzó pé zui saĩ rá matú, ngamoq haĩ kut ra rá lhu?" ga Yhang lé myĩ akô.

²⁹ Haú hkũn, Yesuq gi, "Garai Gasang nhang kat é Sũ lé, lumjĩng é gi, Garai Gasang ô nau é muzó nghut bê." ga tũ taí ri.

³⁰ Haú mù luí, yhangmoq gi, Yhang lé, "Ngamoq myoq èq wó myàng luí, Nàng lé lumjĩng rá matú, Nàng, haĩ jung limik kumlhá kut shit rá lhu? Nàng, haĩ jung kut shit rá lhu? ³¹ Haú Chyúmdang mã, 'Yhang gi, yhangmoq zo rá matú, mauhkũng mai muk byi ri.'* ga kâ tô é eq rajung za, ngamoq é íchỹĩ ĩwa pé gi, haú yoso hkaú mã mannaq muk zo bekô nghut lhê." ga taí akô.

* 6:7 Denari rachap gi, byù rayuq é ra-nyĩ é zuihpau eq wui é nghut lhê. ✧ 6:31 Htoq Ló 16:4

³² Haú hkûn, Yesuq gi, yhangmoq lé, "Ngò, nungmoq lé teng za taí kôlé, nungmoq lé mauhkûng mai muk byî é Sû gi, Mosheq a nghut, haú Ngá Wa sheq, nungmoq lé mauhkûng mai tengmán é muk byî é Sû ru nghut lhê. ³³ Hkâsu mù gâ le, Garai Gasang byî é muk gi, mauhkûng mai gyó lé luí, haú mingkan lé asak byî é Sû nghut lhê." ga taí ri.

³⁴ Yhangmoq gi, "Yhumsîng ê, ahkuí mai, ngamoq lé muk haú hkâ-nhám le byî nyi laq." ga chôm taí bum akô.

³⁵ Haú mù, Yesuq taí kyô é gi, "Ngò gi, asak muk nghut lhê. Ngá chyáng lé é sù gi, hkâ-nhám le zòmut é hui râ a nghut; Ngo lé lumjîng é sù le, hkâ-nhám le wuîshit é hui râ a nghut. ³⁶ Nghut kôlhang, Ngò, nungmoq lé taí wú bê eq rajung za, nungmoq gi, Ngo lé myang wú é nghut kôlhang, a lumjîng shi kó nghut ri. ³⁷ Haú Îwa mai Ngo lé ap byî tô é byû lhunglhâng bang gi, Ngá chyáng lé kó râ nghut luí, Ngá chyáng lé é sù ó yuq lé le, Ngò gi, hkâ-nhám lé hkat htoq pyám râ a nghut. ³⁸ Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sû ô nau é hkyô lé kut râ matú ru nghut lhê. ³⁹ Haú Ngo lé nhang kat Sû ô nau é hkyô gi, Yhang mai Ngo lé ap byî tô é bang mâ é rayuq lé lháng, Ngò, a lhoq hpyuq pyâm e za, jiltûm buinyi má yhangmoq lé dum lhoq dui toq yû râ matú ru nghut lhê. ⁴⁰ Hkâsu mù gâ le, Ngá Wa ô nau é hkyô gi, haú Zo lé wú mù, Yhang lé lumjîng é sù yuq hkanqmó, ahtum abyuq é asak lé wó yû râ matú nghut lhê; Ngò le, jiltûm buinyi má haú bang lé lhoq dui toq râ nghut lhê." gâ ri.

⁴¹ Haú mù, "Ngò gi, mauhkûng mai gyó lé é muk nghut lhê." ga, Yesuq taí é yanmai, Yhang eq séng luí, Yudaq byu pé taí put kô é gi, ⁴² "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lhu? Haú sù é nhîng, ahkuí, 'Ngò gi, mauhkûng mai gyó lé é nghut lhê.' ga, Yhang hkâsu kut wó taí lhê lhu?" gâ bum akô.

⁴³ Haú hkûn, Yesuq gi, "Nungmoq ahkaú má hkâtaí put nyi kó. ⁴⁴ Haú Ngo lé nhang kat é sù Îwa mai shuî jé é sù za a nghut jáng, ó yuq le Ngá chyáng wó jé lé râ a

nghut; jé lé é sù lé gi, jiltûm buinyi má, Ngò lhoq dui toq râ nghut lhê. ⁴⁵ Myiqhtoi laiká pé má, 'Yhangmoq lhunglhâng bang gi, Garai Gasâng eq mhoq byî é hui kó râ nghut lhê.' ⁴⁶ ga kâ tô é eq rajung za, haú Îwa chyáng mai gyo yû, mhoq yu é bang yuq hkanqmó gi, Ngá chyáng lé kó râ nghut lhê. ⁴⁶ Haú gi, rayuq yuq mai, haú Îwa lé myang wú bê nghû nau é a nghut; Garai Gasâng chyáng mâ é Sû za sheq, haú Îwa lé myang wú é Sû nghut lhê. ⁴⁷ Ngò, nungmoq lé teng za taí kôlé, lumjîng é sù gi, ahtum abyuq é asak wó lhê. ⁴⁸ Ngò gi, asak muk nghut lhê. ⁴⁹ Nungmoq é îchyí Îwa pé gi, haú yoso hkaú má mannaq muk zo bekô nghut lhê; nghut kôle, shi byuq bekô nghut ri. ⁵⁰ Nghut kôlhang, shî gi, mauhkûng mai gyó lé lo é muk nghut lhê; haú lé zô é sù gi, a shî lo râ nghut lhê. ⁵¹ Ngò gi, mauhkûng mai gyó lé lo é, haú asak dui é muk nghut lhê; rayuq yuq, muk shî lé zô é nghut le gi, ahtum abyuq dui nyi râ nghut lhê; muk shî gi, mingkan zô wui é asak matú, Ngò byi râ nghut é Ngá gungsho nghut lhê." ga tû taí ri.

⁵² Haú mù, haú Yudaq byu pé gi, "Byû shí yuq gi, nga-nhúng lé, Yhâng é gungsho hkâsu kut wó byi tso râ lhu?" ga, yhangmoq yhangchang dang htîng htîng lhûm bum akô.

⁵³ Haú hkûn, Yesuq gi, yhangmoq lé, "Ngò, nungmoq lé teng za taí kôlé, haú Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó râ a nghut. ⁵⁴ Ngá é gungsho lé zô é eq Ngá é sui lé shuq é sù, ó yuq nghut kôle, ahtum abyuq é asak wó é nghut lhê; Ngò gi, jiltûm buinyi má, haú yuq lé lhoq dui toq yû râ nghut lhê. ⁵⁵ Hkâsu mù gâ le, Ngá é gungsho gi, zojung yhang nghut lhê; Ngá é sui gi, shuqjung yhang nghut lhê. ⁵⁶ Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyi luí, Ngò le haú yuq má nghut nyi bê nghut lhê. ⁵⁷ Haú rû dui nyi é Îwa gi, Ngo lé nhang kat luí, Ngò gi, haú Îwa é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi râ nghut lhê. ⁵⁸ Shî gi, mauhkûng mai gyó lé lo é muk nghut lhê. Nungmoq é îchyí Îwa pé gi, mannaq muk zo kôle, shi byuq bekô nghut ri; nghut

kôlhang, muk shî lé zô é sù gi, ahtum abyuq dui nyi râ nghut lhê." ga taí ri. ⁵⁹Dang haú pé gi, Yesuq, Kaperna-um wà mà é tarajong má mhoqshit nyi é u lé, taí é dang nghut ri.

Chángzô Pé Myo Myo, Yesuq Lé Kâng Pyâm To Kô É Hkyô

⁶⁰Yhâng é chángzô pé myo myo gi, haú lé wó gyo kôjáng, "Dang shî gi, gyai wuî ri. Ó yuq wá wó cháng râ lú?" ga taí bum akô.

⁶¹Yesuq gi, haú eq séng luî, Yhâng é chángzô pé taí put nyi bùm kô é lé Yhâng é myit má sé luî, yhangmoq lé, "Dang shi é yanmai, nungmoq myit htên bum akô lú?" ⁶²Haú Byu Yhangzo gi, Yhang nyi laí lò bê jowò shut taú doq ló é lé, nungmoq myàng kô é nghut le gi, hkâsu nghû kó râ lú? ⁶³Haú Woi-nyí gi, asak byî lhê; gungsho kúm gi, haí le a wó dut nghut ri. Nungmoq lé, Ngò taí é dang pé gi, Woi-nyí le nghut lhê, asak le nghut lhê. ⁶⁴Nghut kôle, nungmoq chyáng mà é ra-am gi, a lumjínng kó nghut ri." ga taí ri. Hkâsu mù gâ le, ô pé gi, a lumjínng kó râ eq, ó yuq gi, Yhang lé ap pyám râ nghut é hkyô lé, Yesuq gi, sâng-hi mai sê to gù bê nghut ri. ⁶⁵Yhang xoq taí é gi, "Haú su mù, haú Îwâ èq ahkáng byí é sù za a nghut le gi, ó yuq le Ngá chyáng wó lé râ a nghut nghû, Ngò, nungmoq lé taí kyo wú bê nghut lhê." gâ ri.

⁶⁶Haú dàm mai, Yhâng é chángzô pé myo myo gi, Yhâng htâng a cháng lo kô e za, taú ló byuq bùm bekô nghut ri.

⁶⁷Haú su mù, Yesuq gi, haú chángzo raxe í yuq lé, "Nungmoq le, ló byuq nau akô, a nghut lú?" ga myî ri.

⁶⁸Haú hkûn, Simun Petruq gi, "Yhumsíng ê, Nang gi, ahtum abyuq é asak mungdang wó Sù nghut to bê lé nhíng, ngamoq gi, ó yuq chyáng ê shirâ lú?" ⁶⁹Nang gi, Garai Gasâng é Chyoiyúng Sù nghut é lé, ngamoq, lumjínng lhê, sê nyi lhê." ga, Yhang lé tû taí ri.

⁷⁰Haú hkûn, Yesuq gi, "Nungmoq raxe í yuq lé, Ngò hkyin yù bê a nghut kó lú? Nghut kôle, nungmoq mà é rayuq gi, nat nghut ri." ga tû taí ri. ⁷¹(Yhang gi, haú Simun Iskarut é yhangzo, Yudaq lé taí nau é nghut ri; haú yuq gi, chángzo raxe í yuq má bò sù nghut kôle, htâng má, Yhang lé ap pyám râ sù nghut ri.)

7

Yesuq Eq Yhâng É Gumang Wuî

¹Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô lhing wún ri. ²Nghut kôlhang, haú Yudaq byu pé é Saksé Zúm Poî chyâng lo nyi é hkûn, ³Yesuq é yhanggu yuqzô pé gi, Yhang lé, "Náng é chángzô pé gi, Nang kut é laklaí kumlhá pé lé myàng kó sháng gaq, Nang, shî mai htoq ló luî, Yuda mau shut e ló aq. ⁴Myìng hu nau é sù gi, hkaú zaú luî haí le a kut wú é nghut lhê. Nang gi, haú pé lé kut nyi bê nghut é yanmai, mingkan lé, Náng gung tûn shit aq." ga taí akô. ⁵Hkâsu mù gâ le, yhanggu síng yuqzô pé lhang, Yhang lé a lumjínng kó nghut ri.

⁶Haú mù luî, Yesuq gi, yhangmoq lé, "Ngá é ahkyíng gi, a jé shi nghut ri; nungmoq é ahkyíng kúm gi, hká hkûn le joq nyi ri. ⁷Haú mingkan gi, nungmoq lé a jú a wó kut kó nghut ri; nghut kôlhang, Ngo lé gi, a jú kó; haí mù gâ le, yhang kut é hkyô gi, agè ashop é nghut é lé, Ngò, saksé tûn shit é yanmai nghut ri. ⁸Nungmoq gi, poí haú shut doq ló keq. Ngò kúm gi, Ngá é ahkyíng a jé shi nghut é yanmai, poí haú shut a doq ló shirâ nghut lhê." ga taí ri. ⁹Haú su ga taí luî, Yhang gi, Galile mau má nyi gyó to bê nghut ri.

¹⁰Nghut kôlhang, Yhang gu pé, haú poí shut doq ló byuq é htâng má, Yhang gi, de de a nghut é dông, tsik za châng doq ló bê nghut ri. ¹¹Yudaq byu pé gi, haú poí má, Yhang lé châng hô kômù, "Haú yuq gi, hkâmá nghut lhê lú?" ga, myi wún akô nghut ri.

¹²Haú byù hpûng hkaú má, Yhang eq séng luî taí lhùm bùm kô é má, ra-am gi, "Yhang gi, byù gè nghut ri." ga taí kôjáng, ra-am gi, "A nghut, Yhang gi, byu pé lé hkyô shuî nghoq sù nghut ri." ga tû taí akô.

¹³Nghut kôlhang, haú Yudaq suwún wuî lé gyuq kô é yanmai, ó yuq le, Yhang eq sêng é hkyô lé de de a wám taí kó nghut ri.

Haú Poí Má, Yesuq Mhoqshit É Hkyô

¹⁴Haú poí rawuí nghut ló é hkûn, Yesuq gi, noqkuq yhùm má doq ê luî, mhoqshit hi ló bê nghut ri. ¹⁵Haú hkûn, Yudaq byu pé gi, gyô maú byuq kômù, "Shí yuq gi, mhoq

yu é hkyô le a joq wú é wá, haû-í hkâsu mù sê lhê laq?" ga myi bum akô.

¹⁶ Haû mù, Yesuq tû taí é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê. ¹⁷ Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasang chyáng mâ é nghut a nghut é eq, Ngá é myit đông taí é dang nghut a nghut é lé, yhang sê gàm hkoq yû râ nghut lhê. ¹⁸ Yhumsing é myit đông taí é sù gi, yhumsing é matú aróng hô sù nghut ri; nghut kôlhang, yhumsing lé nhang kat su é matú, aróng ho é sù gi, tengmán é byû nghut ri; yhang má, a tengmán é hkyô haí le a bò nghut ri. ¹⁹ Mosheq gi, nungmoq lé jep é tarâ byî to bê, a nghut kó lhu? Nghut kôlhang, nungmoq ó yuq le, jep é tarâ haû lé a cháng kó nghut ri. Haí mù luí, Ngo lé sat nau nyi akô lhu?" gâ ri.

²⁰ Haû hkûn, haû byû hpûng gi, "Nàng gi, nat gang wang to sù nghut ri-nhung! Nang lé, ó yuq wá sat nau nyi ri lhu?" ga tû taí akô.

²¹ Yesuq gi, yhangmoq lé, "Ngò, laklái kumlhá ralhum kut jáng, nungmoq ban-shoq bang gi, maú byuq bum akô. ²² Nghut kôlhang, nungmoq gi, ahpyo-kuq hpyit byî é hkyô lé, Mosheq byî é nghut lhê ga luí, Bánno buinyi má, zoshâng lé ahpyo-kuq hpyit byî akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, îchýí îwâ pê chyáng mai lo é ru nghut lhê.). ²³ Haû, Mosheq é jep é tarâ lé a lhoq htên pyám sháng gaq nghû, Bánno buinyi má, zoshâng lé ahpyo-kuq hpyit byî é nghut le gi, haí mù luí, Bánno buinyi má, byû rayuq é gùng gón lé, Ngò lhoq gè byî é yanmai, Ngo lé nhikjum yô akô lhu? ²⁴ Byû du lé wú luí hkâjéyáng kó; tengmán é đông sheq jéyáng keq." ga taí ri.

Yesuq Gi, Hkrisduq Nghut Lhê Lhu?

²⁵ Haû mù luí, Yerusalem wà mó mâ é byu pé ra-am gi, "Haû yhangmoq sat pyám nau nyi é sù gi, shí yuq a nghut lhi? ²⁶ Yhang gi, shí má de de dáng nyo nyi le, yhangmoq gi, Yhang lé, haí le a ga kó myhi-nhung! Yhang gi, Hkrisduq nghut lhê ga, haû ahkáng ayá wó bang gi, gè gè yhang, sê akô abe? ²⁷ Haû Hkrisduq jé lé é hkûn gi, Yhang hkâmai lé lo é lé, ó yuq lhang sé rà a

nghut." ga taí bum akô. Nghut kôlhang, shí yuq gi, hkâmâ é sù nghut é lé, nga-nhung sê lhê;

²⁸ Haû mù, Yesuq gi, noqkuq yhûm wàng má mhoqshit uchyang, htê mó èq taí kat é gi, "Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit đông shí má lé nyi tô é sù a nghut kôlhang, Ngo lé nhang kat é Sù gi, tengmán lhê; nungmoq gi, Yhang lé a sé kôlhang, ²⁹ Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê." gâ ri.

³⁰ Haû mù, yhangmoq gi, Yhang lé chyup râ dâ akô; nghut kôlhang, Yhâng é ahkýing a jé shi é yanmai, Yhang lé chyup râ matú, ó yuq le loq a jé kó nghut ri. ³¹ Nghut kôlhang, byû hpûng hkaû mâ é bang myo myo gi, Yhang lé lumjúng bûm kôluí, "Haû Hkrisduq jé lé é hkûn, Yhang gi, shí yuq htoq má, limik kumlhá pé je wó kut shit râ lhu?" ga taí bum akô nghut ri.

³² Haû Hparishe pé gi, haû byû hpûng hkaû má, Yesuq eq sêng é hkyô lé, haû su ga dangsoq soq lhûm nyi kô é hkyô lé wó gyô yu akô. Haû mù, haû hkyangjong agyi pé eq Hparishe pé gi, Yhang lé ê chyup râ matú, noqkuq yhûm zúng é bang lé nhang kat akô.

³³ Haû hkûn, Yesuq gi, "Ngò gi, nungmoq eq rahá rayoq zo za nyi râ nghut lhê; hau htâng, Ngo lé nhang kat Su chyáng taí ló râ nghut lhê. ³⁴ Haû hkûn, nungmoq gi, Ngo lé hô kôlhang, myang hô kó râ a nghut; Ngò nyi é jang má, nungmoq wó jé kó râ a nghut." ga taí ri.

³⁵ Hau é yanmai, Yudaq byu pé, rayuq eq rayuq taí lhum kô é gi, "Shí yuq gi, Yhang lé nga-nhung a myang hô loshoq, hká shut e byuq râ dâ lhê lhu? Yhang gi, Grik byu pé má nyi byo myín tô é nga-nhung é byu pé nyi é jowò má ê mù, Grik byu pé lé, ê mhoqshit râ dâ lhê lhu? ³⁶ 'Nungmoq gi, Ngo lé hô kôlhang, myang hô kó râ a nghut.' gâ é eq, 'Ngò nyi é jang má, nungmoq wó jé kó râ a nghut.' gâ é, Yhang taí é dang gi, haí jung wá gâ naû é nghut lhê lhu?" gâ akô.

³⁷ Haû lô htâng é eq je ahkyak é Poî buinyi má, Yesuq toq yap luí, htê mó èq taí é gi, "Wuì shit sù gi, Ngá chyáng lé mù, shuq

sháng gaq. ³⁸ Ngo lé lumjínng é sù ó yuq nghut kôle, haù Chyúmdang má taí tô é eq rajung za, 'Yhâng chyáng mai asak uchyâm é wuìlàng yui htoq lô râ nghut lhê.'" ga ri. ³⁹ Yhang haù su gâ é gi, Yhang lé lumjínng é bang myang hap yù râ nghut é, haù Woi-nyí lé taí é nghut ri. Haù hkûn jé shoq, haù Woi-nyí lé a byi kat shi nghut ri. Hkâsu mù gâ le, Yesuq gi, hpungwup shingkang dan hù é a hui nhâng shi é yanmai nghut ri.

⁴⁰ Yhâng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haù nghut ri." ga taí akô.

⁴¹ Ra-am gi, "Shí yuq gi, Hkrisduq nghut ri." ga taí akô. Góbang nghut jáng, "Hkrisduq wá Galile mau mai htoq lé râ nghut lhê lhú? ⁴² Haù Chyúmdang má, Hkrisduq gi, Dawiq é awut ashín mâ é nghut luí, Dawiq nyi laí lo é Betlehem wà mai htoq lô râ nghut lhê gâ é, a nghut lhú?" ga myí bum akô nghut ri. ⁴³ Haù mù luí, Yesuq é yanmai, shiwa byu pé gi, gàm hkoq lò byuq bekô nghut ri. ⁴⁴ Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

Yudaq Byu Pé Lé Shuì U É Bang A Lumjínng Kô É Hkyô

⁴⁵ Hau htâng má, haù noqkuq yhûm zúng bang gi, haù hkyangjong agyi pé eq Hparishe pê chyáng taù lò kô é hkûn, haù bang gi, yhangmoq lé, "Nungmoq, haù mù luí, Yhang lé a shuì lo kô é lhú?" ga lhom myí akô.

⁴⁶ Haù hkûn, haù noqkuq yhûm zúng bang gi, "Shí yuq su ga taí é byù gi, ó le a nyi wú é nghut lhê." ga taí kyô akô.

⁴⁷ Haù mù, haù Hparishe pé gi, "Nungmoq lé le, Yhang èq mhoq hpyoq yù bekô lhú? ⁴⁸ Haù zaù wui chyáng le, Hparishe pê chyáng le, Yhang lé lumjínng é byù bò akô lhú? ⁴⁹ A bò! Nghut kôlhang, haù jep é tarâ lé a sê é byù moq mó shí gi, nhîng pyâm é hui bekô nghut ri." ga nhik-yô é dông tû taí kat akô nghut ri.

⁵⁰ Nghut kôlhang, yhangmoq hpúng má bo é, hí hkûn Yesuq chyáng e wú bê sù nghut é, Nikodimu gi, ⁵¹ "Nga-nhúng é tarâ gi, byù rayuq lé, yhâng é dang hí a gyô wú é eq, yhang haù kut é lé a sê e za, mara byi lhê lhú?" ga, yhangmoq lé myí ri.

⁵² Haù hkûn, yhangmoq gi, "Nàng le, Galile mau byù nghut lhê lhú? Galile mau mai myiqhtoi rayuq lháng a htoq é hkyô lé, nàng gon wú aq, haù jáng sé râ nghut lhê." ga tû taí akô.

⁵³ Hau htâng, yuq hkangmó gi, ó le ô yhûm shut taù lò byuq bùm bekô nghut ri.*

8

Yesuq Lé, Lé Myí Chyam Wú Kô É Hkyô

¹ Yesuq kúm gi, Tsanlun Bùm shut e lò bê nghut ri. ² Htang napkyó napsûn noq le, Yesuq gi, noqkuq yhûm wàng hkaù má dum ê luí, byu pé lhunglháng gi, Yhâng é lhîngkyuq má lé zîng bum akô; haù mù, Yhang gi, zung to luí, yhangmoq lé mhoqshit ri. ³ Haù hkûn, haù tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuì lé lô kômù, gung gûng má shap to kôluí, ⁴ Yesuq lé, "Sarâ ê, myiwe myhí shí lé, sulàng shut nyi é má myang chyup yu é nghut lhê. ⁵ Haù Mosheq é tarâ má gi, shí su é myiwe lé, luqgok èq dú sat pyám keq ga, nga-nhúng lé hkunmó hkyô tô ri. Ahkuí, Nàng gi, hkâsu nghû râ lhú?" ga myí akô. ⁶ Yhangmoq haù su ga myí é hkyô gi, Yhang lé mara wó hûn shoq ga, chyam wú râ matú nghut ri.

Nghut kôlhang, Yesuq gi, ngóm mù, myigùng má loqnyhuí èq htaù kê nyi ri. ⁷ Yhang lé, yhangmoq ru jang myí nyi kô é hkûn, Yhang gi, yap nyhang kat mù, yhangmoq lé, "Nungmoq mâ é mara a wó é sù hí, myiwe myhí shí yuq lé luqgok èq dú sháng gaq." ga taí ri. ⁸ Hau htâng, Yhang gi, dum ngóm luí, myigùng má kê nyi ri.

⁹ Yhangmoq gi, haù su gâ é lé wó gyo kôjáng, je mang bang mai hí luí, rayuq htâng rayuq lò byuq bekô nghut luí, Yesuq baù za myit gyó tô é eq, myiwe myhí haù jâng yap nân tô ri. ¹⁰ Yesuq gi, yap nyhang kat luí, yhang lé, "Myiwe myhí ê, yhangmoq hká lò bekô lhú? Ó yuq èq le, nàng lé mara a byi kó lhú?" ga myí ri.

¹¹ Yhang gi, "Yhumsîng ê, ó yuq le mara a byi kó nghut ri." ga tû taí ri.

Haù hkûn, Yesuq gi, "Ngò le, nàng lé mara a byi, lò aq hkoi, ahkuí mai mara hkâdum kut shut lo." ga taí kat ri.

* 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

Yesuq, Mingkân É Maubó

¹² Yesuq gi, shiwa byu pé lé dum nyo é hkûn, "Ngò gi, mingkân é maubó nghut lhê; Ngá htâng châng é sù ó yuq nghut kôle, mauchut hkaû má hkâ-nhám le so râ a nghut, asak maubó lé wó râ nghut lhê." ga taî ri.

¹³ Haû mù, haû Hparishe pé gi, "Wú aq, Náng gûng Nàng saksé hkâm yu é nghut ri; Náng é saksé gi, teng râ a nghut." ga taî akô.

¹⁴ Haû hkûn, Yesuq gi, "Ngá gûng Ngò saksé hkâm kôlhang, Ngá é saksé gi, têng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri.

¹⁵ Nungmoq gi, byù hkyam dông za jéyáng akô; Ngò gi, ó yuq lé le a jéyáng é nghut lhê. ¹⁶ Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gâ le, Ngò gi, Ngò baú a nghut, haû Ngo lé nhang kat é sù Îwa eq rahá nghut nyi lhê. ¹⁷ Haû nungmoq é tarâ má yhang le, í yuq mai hkâm é saksé gi, têng lhê ga kê tô ri. ¹⁸ Ngò gi, Ngá é matú saksé hkâm yù sù nghut lhê; hau htoq agó, haû Ngo lé nhang kat é sù Îwa le, Ngá é matú saksé hkâm byî é nghut lhê." ga tû taî ri.

¹⁹ Haû mù, yhangmoq gi, Yhang lé, "Náng Wa gi, hkâmá lhu?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kô é nghut le gi, Ngá Wa lé le, sé kó râ nghut lhê." ga tû taî ri. ²⁰ Dang haû pé gi, haû noqkuq yhûm wàng hkaû mâ é alu kat jang nàm má, Yhang mhoqshit nyi é u lé taî é dang nghut ri. Nghut kôlhang, Yhang lé, ó yuq le a chyup kó; hkâsu mù gâ le, Yhâng é ahkyíng a jé shi é yanmai nghut ri.

²¹ Haû mù luí, Yesuq gi, yhangmoq lé, "Ngò gi, ló byuq râ nghut lhê, haû hkûn, nungmoq Ngo lé hô kó râ, yhumsing é mara má le shi kó râ nghut lhê. Ngò ló é jang má, nungmoq wó jé kó râ a nghut." ga, radàm dum puq taî ri.

²² Hau é yanmai, haû Yudaq byu pé gi, "'Ngò ló é jang má, nungmoq wó jé kó râ a nghut.' gâ é gi, Yhânggûng yhang sat shi râ gâ é nghut lhê lhu?" ga myi bum akô.

²³ Nghut kôlhang, Yesuq xoq taî é gi, "Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shi eq sêng é bang nghut akô; Ngò kúm gi, mingkan shi eq sêng é sù a nghut. ²⁴ Haû mù, nungmoq gi, yhumsing é mara má shi kó râ nghut lhê nghû, Ngò taî é nghut lhê. Ngò gi, haû Yuq nghut lhê nghû taî é lé, nungmoq a lumjíng kô é nghut jáng, nungmoq gi, gè gè yhang, yhumsing é mara má shi kó râ nghut lhê." gâ ri.

²⁵ Haû hkûn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le taî nyi bê nghut lhê. ²⁶ Ngò gi, nungmoq eq séng luí, taî râ hkyô eq jéyáng râ hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyô yu é gû lé, Ngò, mingkan lé taî kyô lhê." ga tû taî ri.

²⁷ Yesuq gi, yhangmoq lé, Yhâng Wa eq sêng é hkyô taî kyô nyi é lé, yhangmoq gi, a sê gyo kó nghut ri. ²⁸ Haû mù luí, Yesuq gi, "Haû Byu Yhangzo lé nungmoq tu shap* kat é hkûn sheq, Ngò gi, haû Yuq nghut é hkyô lé le, yhumsing myit dông haî le a kut e za, haû Îwa mhoq byî é dông za taî é hkyô lé le, nungmoq sé kó râ nghut lhê. ²⁹ Haû Ngo lé nhang kat é Sù gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tô pyâm to nghut ri." ga taî ri. ³⁰ Yhang, haû su taî nyi é u lé lhang, byù myo myo gi, Yhang lé lumjíng bûm bekô nghut ri.

Abraham É Awut Ashín Pê Hkyô

³¹ Haû mù, Yesuq gi, Yhang lé lumjíng é Yudaq byu pé lé, "Ngò mhoqshit é hkyô lé châng kut nyi bekô nghut jáng, nungmoq gi, gè gè yhang, Ngá é chángzô pé nghut bekô. ³² Nungmoq gi, haû tengmán hkyô lé sé kó râ nghut luí, haû tengmán hkyô gi, nungmoq lé lhoq lhut kat râ nghut lhê." ga taî ri.

³³ Haû hkûn, yhangmoq gi, "Ngamoq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haû mù, 'nungmoq lé lhoq lhut kat râ' nghû

* 8:28 Tu shap gâ é lichyúm gi, tapzîng htoq má jén sat pyám râ gâ é nghut lhê.

Nàng hkâsu kut wó taí lhê lúhú?" ga tû taí akô.

³⁴ Yesuq dum tû taí é gi, "Ngò, nungmoq lé teng za taí kôlé, mara kut shut é sù gi, marâ é jùn nghut lhê. ³⁵ Jùn gi, yhûm ikun eq hkâ-nhâm le sêng nyi râ a nghut; zo kúm gi, ikun eq ahtum abyuq sêng lhê. ³⁶ Haû mù luí, haû Zo gi, nungmoq lé lhoq lhut kat é nghut jáng, nungmoq gi, gè gè yhang, lut berâ nghut lhê. ³⁷ Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yù kô é yanmai, Ngo lé sat râ dâ akô nghut ri. ³⁸ Ngò gi, Ngá Wâ chyáng mai myang yu é eq rajung za, nungmoq lé taí kyô nyi lhê; nungmoq le, nungmoq é îwa chyáng mai wó gyô yu é eq rajung za kut nyi akô nghut ri." gâ ri.

³⁹ Haú hkûn, yhangmoq gi, "Ngamoq é îwa gi, Abraham nghut lhê." ga tû taí kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó râ nghut lhê. ⁴⁰ Nghut kôlhang, nungmoq gi, haû Garai Gasâng chyáng mai wó gyô yu é tengmán hkyô lé taí kyo sù nghut é Ngo lé, sat pyám nau akô nghut ri. Haû sù é hkyô gi, Abraham a kut é nghut lhê. ⁴¹ Nungmoq gi, nungmoq é îwa kut é muzó lé yhang, kut nyi akô." ga taí ri.

Haú hkûn, yhangmoq gi, "Ngamoq gi, dezo amyû a nghut; ngamoq gi, Îwa rayuq za wó lhê; haû gi, Garai Gasang nghut lhê." ga taí he akô nghut ri.

Zô Wui É A-kyang Gi, Mó Ó Nghut É Hkyô Shit

⁴² Yesuq gi, yhangmoq lé, "Garai Gasang gi, nungmoq é îwa nghut é nghut jáng, nungmoq gi, Ngo lé chyitdap kó râ nghut lhê; hkâsu mù gâ le, Ngò gi, Garai Gasâng chyáng mai lé jé luí, ahkuí, shî má nyi tô é nghut lhê. Ngò gi, Ngá myit dông lé lo é a nghut, Yhang sheq Ngo lé nhang kat é ru nghut lhê. ⁴³ Nungmoq gi, haû mù Ngá é dang lé a sê gyo kô é lúhú gâ le, Ngò taí é dang lé, nungmoq a wó lhom yù kô é yanmai nghut ri. ⁴⁴ Nungmoq gi, haû nungmoq é îwa nghut é nat Tsadán eq sêng é bang nghut luí, nungmoq é îwa ô nau é hkyô lé kut nau bum akô. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai,

yhang gi, haû tengmán hkyô má a yap gêng nyi nghut ri. Yhang gi, mhaû é hkûn, yhang é myit má bo é dông taí ri; hkâsu mù gâ le, Yhang gi, byù mhaû nghut luí, mhaû hkyô pê é îwa nghut ri. ⁴⁵ Haû su mù, Ngò, nungmoq lé, haû tengmán hkyô taí kyô é yanmai, nungmoq gi, Ngo lé a lumjúng kó nghut ri. ⁴⁶ Nungmoq mâ é ó yuq wá, Ngo lé mara bo lhê nghû saksé wó tûn shit akô lúhú? Ngò gi, haû tengmán hkyô lé taí nyi é nghut le nhîng, nungmoq, Ngo lé haû mù a lumjúng kô é lúhú? ⁴⁷ Garai Gasang eq sêng é sù gi, Garai Gasang taí é dang lé gyô lhê. Nungmoq a gyo kô é gi, nungmoq, Garai Gasang eq a séng kô é yanmai nghut ri." ga taí ri.

Yesuq Eq Abraham

⁴⁸ Haú hkûn, haû Yudaq byu pé gi, Yhang lé, "Nàng gi, Samariq byù nghut é htoq agó, nat gang wang júng to sù nghut lhê nghû, ngamoq taí é dang gi, jô lhê a nghut lúhú?" ga myí akô.

⁴⁹ Yesuq gi, "Ngò gi, nat gang wang júng é hui sù a nghut; Ngò gi, Ngá Wa lé sheq hkunggâ é ru nghut lhê; nungmoq kúm gi, Ngo lé taí hpoí nyi akô nghut ri. ⁵⁰ Ngò gi, Ngá é matú aróng ho nyi é a nghut; nghut kôlhang, hô byi Sù rayuq nyi lhê, haû yuq jéyáng sháng gaq. ⁵¹ Ngò, nungmoq lé teng za taí kôlé, Ngá dang lé châng é sù gi, hkâ-nhâm le, shî râ a nghut." ga taí ri.

⁵² Hau é yanmai, haû Yudaq byu pé gi, "Nàng gi, nat gang wang júng to sù nghut é lé, ahkuí, ngamoq sé bê! Abraham gi, shi byuq bê; haû myiqhtoí pé le, shi byuq bekô nghut ri; nghut kôlhang, Nàng gi, 'Ngá dang lé châng é sù gi, hkâ-nhâm le, shî râ a nghut.' ga taí ri. ⁵³ Nàng gi, ngamoq é îwa Abraham htoq hkik lhê lúhú? Yhang gi, shi byuq bê; haû myiqhtoí pé le, shi byuq bekô nghut ri. Nàng gûng nàng ó yuq su ngàm lhê lúhú?" ga taí akô.

⁵⁴ Yesuq gi, "Ngá gûng Ngò lhoq gyaú yu é nghut jáng, Ngá é aróng gi, hai hpauđap é a nghut; nghut kôlhang, haû nungmoq é Garai Gasang nghut lhê ga nungmoq taí é sù, Ngá Wa gi, Ngo lé lhoq gyaú é sù ru nghut lhê. ⁵⁵ Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghû Ngò taí é ru nghut le gi, Ngò le nungmoq su byù mhaû dut râ nghut lhê; nghut kôlhang, Ngò gi, Yhang

lé sé luí, Yhâng é dang gyo sù nghut lhê.
⁵⁶ Nungmoq é îwa Abraham gi, Ngo lé râ buinyì lé myoqbyu gabú nyi é nghut luí, myàng mù, gabú bê nghut ri." ga tû taí ri.

⁵⁷ Haú hkûn, haú Yudaq byu pé gi, Yhang lé, "Nàng gi, asak ngo xê zàn lhang a nghut shí é nhîng, Abraham lé myàng wú é nghut lhê lú?" ga taí akô.

⁵⁸ Yesuq gi, "Ngò, nungmoq lé teng za taí kôlé, Abraham lhang a hkû shi má, Ngò nyi gù bê nghut lhê." ✨ ga tû taí ri. † ⁵⁹ Haú mù luí, yhangmoq gi, Yesuq lé, dú râ ga luqgok kui yu akô; nghut kôlhang, Yesuq gi, haú noqkuq yhûm mai haq htoq ló byuq bê nghut ri.

9

Myoqjit Sù Lé Lhoq Gê Byî É Hkyô

¹ Yesuq gi, sô yông ló nyi é u lé, hku lé é mai myoqjit to gù nghut é byù rayuq lé myang ri. ² Haú hkûn, Yhâng é chángzô pé gi, Yhang lé, "Rabai ê, shí yuq, myoqjit gù hku lé é gi, ó yuq kut shut é yubak é yanmai nghut lhê lú? Yhang kut shut é lú? A nghut jáng, yhâng nu yhâng wa kut shut é lú?" ga myî akô.

³ Yesuq tû taí é gi, "Haú gi, yhang kut shut é yanmai le a nghut, yhâng nu yhâng wa kut shut é yanmai le a nghut; haú Garai Gasâng é muzó lé, yhang má wó lhoq htoq shit râ matú, haú dut é ru nghut lhê. ⁴ Nga-nhúng gi, haú Ngo lé nhang kat Su é muzó lé, nyi nghut tô ashî hkûn, zui saí nyi ra râ dut lhê; myín jé jáng gi, ó yuq le, mù wó zui saí râ a nghut. ⁵ Ngò gi, mingkan htoq má nyi tô é u lé, mingkân é maubó nghut lhê." gâ ri.

⁶ Yhang gi, haú su ga taí luí, myigùng má sôkan byé hkyó mù, tse-nyhaq saí yù luí, haú yuq é myoqjí má but byî ri. ⁷ Hau htàng, haú yuq lé, "Haú Siloam wuhtum má ê chí pyám aq." ga taí ri. (Siloam gâ é gi, nhang é gâ é lichyúm nghut lhê.). Haú mù, haú yuq gi, ê chi mù, myoq myàng luí, yhûm shut ló bê nghut ri.

⁸ Haú yhâng é yhumkyo bang eq yhang dung zô wún é lé myang wú é bang gi, "Shí yuq gi, haú zung to mù, dung zo zo lhaq kut é sù, a nghut kó lú?" ga myî bum akô. ⁹ Ra-am gi, "Haú yuq nghut lhê." gâ bum akô.

Góbang gi, "A nghut, haú yuq su dut e za ru nghut lhê." ga taí akô.

Nghut kôlhang, yhang gi, "Ngò, haú yuq yhang nghut lhê." ga taí ri.

¹⁰ Haú hkûn, yhangmoq gi, "Haú nghut le gi, náng myoq hkâsu kut wó myang é lú?" ga myî akô.

¹¹ Yhang gi, "Haú Yesuq gâ é byù rayuq, tse-nyhaq ratsuí saí yù luí, ngá é myoqjí má but byi mù, 'Siloam wuhtum má ê chí pyám aq.' ga ngo lé taí ri; haú mù, ngò ê chí pyâm é htàng má, ngá myoq wó myang é nghut lhê." ga tû taí ri.

¹² Haú hkûn, yhangmoq gi, "Byù haú yuq gi, hkâmá nyi ri lú?" ga, yhang lé myî akô. Yhang gi, "Ngò a sé." ga taí ri.

Myoq Dum Myang Byuq É Hkyô Lé, Hparishe Pé Gôn Wú É Hkyô

¹³ Yhangmoq gi, haú myoqjit wú bê sù lé, Hparishe pé chyáng shuí lé akô. ¹⁴ Yesuq, tse-nyhaq saí yù mù, haú yuq é myoq lé lhoq myâng byî é buinyì gi, Bánno buinyì nghut ri. ¹⁵ Haú mù, yhang, myoq hkâsu kut wó myang é hkyô lé, haú Hparishe pé le dum myî akô. Haú jáng, yhang gi, "Haú yuq gi, ngá é myoqjí má tse-nyhaq but byi mù, ngò gi, ê chí pyám jáng, ngá myoq myàng bê nghut lhê." ga tû taí ri.

¹⁶ Haú Hparishe pé ra-am gi, "Shí yuq gi, Bánno buinyi é tarâ lé a châng é sù nghut é yanmai, Garai Gasâng chyáng mai lé é sù a nghut." ga taí akô.

Nghut kôlhang, ra-am gi, "Yubak dap sù rayuq gi, haú su é limik kumlhá pé lé, hkâsu wó kut htoq râ lú?" ga myî akô. Haú mù, yhangmoq gi, myit a huí lhum bùm lò kó nghut ri.

¹⁷ Haú mù, yhangmoq gi, haú myoqjit wú sù shut lhîng mù, "Nang lé myoq lhoq myâng byî é sù gi, hkasû é byù nghut lhê nghû, nàng taí râ lú?" ga dum myi kôjáng, "Yhang gi, myiqhtoi rayuq nghut ri." ga, yhang tû taí ri.

¹⁸ Haú Yudaq byu pé gi, haú yuq myoqjit wú é hkyô lé le, ahkuí myoq dum myàng bê nghut é hkyô lé le, haú yhâng nu eq yhâng wa lé, ê ji lò nhang é hkûn jé shoq, a lumjîng kó nghut ri. ¹⁹ Haú mù, Yhangmoq gi, haú yhâng nu eq yhâng wa lé, "Shí yuq

✨ 8:58 Htoq Ló 3:14 † 8:58 Bun zo shí má, Yesuq gi, Yhânggùng yhang Garai Gasang nghut lhê gâ nyi nghut ri.

gi, nungnhik é yhangzo nghut lhê lú? Hku lé é hkûn mai, myoqjit gù nghut lhê lú? Yhang, ahkuí, hkâsu kut wó myang é lú?" ga myí akô.

²⁰ Haú hkûn, yhang nu eq yhang wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê lhê. ²¹ Nghut kôlhang, yhang, ahkuí hkâsu kut wó myang é hkyô lé le, yhang é myoq lé ó yuq èq lhoq myang byí é hkyô lé le, ngá-nhik a sé. Yhang, asak wáng bê, yhang lé myí wú keq, yhanggùng yhang dat taí kyo râ nghut lhê." ga tû taí akô. ²² Haú yhang nu eq yhang wâ nhik gi, Yudaq byu pé lé gyuq kô é yanmai, haú su ga taí kô é nghut ri; hkâsu mù gâ le, Yesuq gi, haú Hkrisduq nghut lhê ga yín yu é sù, ó yuq lé nghut kôle, haú tarajong mai lhoq htoq pyám râ nghut lhê ga, haú Yudaq suwún wú chôm myit hpyit to bekô nghut é yanmai nghut ri. ²³ Hau é yanmai, yhang nu eq yhang wâ nhik gi, "Yhang, asak wáng bê, yhang lé myí wú keq." ga taí kô é nghut ri.

²⁴ Haú Hparishe pé gi, myoqjit wú bê sù haú yuq lé dum ji yù mù, "Garai Gasang lé za hkya-on waq toq aq! Haú yuq gi, yubak dap sù rayuq nghut é lé ngamoq sê lhê." ga taí akô.

²⁵ Haú hkûn, yhang tû taí é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myang bê nghut é lé za, ngò ru sê lhê." gâ ri.

²⁶ Hau htang, yhangmoq gi, "Yhang, nang lé haí kut byí ri lú? Náng é myoq lé, yhang, hkâsu kut lhoq myang byí ri lú?" ga, yhang lé myí akô.

²⁷ Haú hkûn, yhang gi, "Ahkuí za, ngò, nungmoq lé taí kyo bê le, nungmoq sheq a gyo kôluí nhing! Nungmoq gi, haí mù dum gyô nau akô lú? Nungmoq le, Yhang é chángzô pé dut nau akô lú?" ga taú myí ri.

²⁸ Haú mù, yhangmoq gi, yhang lé gyaí rhoí é đông mai, "Nàng gi, haú yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê! ²⁹ Garai Gasang gi, Mosheq lé dáng nyo é hkyô lé, ngamoq sê lhê; nghut kôlhang, haú yuq eq séng luí, Yhang gi, hkâmai lé é sù nghut é lé lhang, ngamoq a sé." ga taí akô.

³⁰ Haú hkûn, haú yuq gi, "Yhang, ngo lé myoq wó lhoq myang byi kôlhang, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê! ³¹ Garai Gasang gi, yubak dap bang é dang lé a gyo byí é hkyô lé, nga-nhung sê lhê. Garai Gasang gi, Yhang lé noqkuq luí, Yhang ô nau é hkyô lé, kut é sù é dang lé kúm gyo byí lhê. ³² Hku lé é hkûn mai myoqjit gù nghut é byù lé, ó yuq èq myoq lhoq myang byí é gâ é hkyô lé, mingkan lé joq é hkûn mai, ó yuq le a wó gyô wú é nghut lhê. ³³ Haú yuq gi, Garai Gasang chyáng mai lé é sù za a nghut le gi, haí le wó kut râ a nghut." ga tû taí ri.

³⁴ Haú su ga jáng, yhangmoq gi, "Nàng gi, yubak htui má hku lé é sù nghut to luí nhing, ngamoq lé wám mhoqshit lhê lú?" ga tû taí kôluí, yhang lé hkat htoq pyám akô nghut ri.

Woi-nyí Má Myoqjit É Hkyô

³⁵ Yesuq gi, haú yuq lé yhangmoq hkat htoq pyám é hkyô lé wó gyo luí, yhang lé myàng hui jáng, "Nàng gi, haú Byu Yhangzo lé lumjíngh lhê lú?" ga myí ri.

³⁶ Haú hkûn, haú yuq gi, "Yhumsing ê, haú gi, ó yuq nghut lhê lú? Yhang lé, ngò wó lumjíngh sháng gaq, taí kyo laq." ga myí ri.

³⁷ Yesuq gi, "Nàng, haú yuq lé myàng wú bê nghut lhê; ahkuí, nàng eq dáng nyo nyi é sù gi, haú yuq yhang nghut lhê." ga taí ri.

³⁸ Haú mù, haú yuq gi, "Yhumsing ê, ngò lumjíngh lhê!" ga taí luí, Yhang lé noqkuq ri.

³⁹ Haú hkûn, Yesuq gi, "Haú myoqjit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng râ matú, mingkan shí má Ngò jé lé é nghut lhê." ga taí ri.

⁴⁰ Yhang eq rahá nghut nyi é Hparishe pé ra-am gi, Yhang haú su ga taí é lé wó gyo kôjáng, "Hkâsu htà? Ngamoq gi, myoqjit bang dut bê lú?" ga myí akô.

⁴¹ Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kó râ nghut lhê; nghut kôlhang, ahkuí, nungmoq gi, myoq myàng bang nghut lhê ga kô é yanmai, nungmoq má yubak mara bo ashí kó nghut ri.

10

Sau Zúng Sù Eq Sau Hpúng

¹Ngò, nungmoq lé teng za tái kôlé, haù sau hkup má, hkúmdong mai a wang e za, gó hkyô dông doq lut wang é sù gi, hkau sù eq damyaq nghut ri. ²Haù hkúmdong mai wang é sù kúm gi, sau zúng sù nghut ri. ³Haù hkum zúng sù gi, yhang lé hkum hpóng byî é htoq agó, haù sau pé gi, yhang é htê lé gyo byî akô. Yhang gi, yhang é sau pé lé, mying lang luî wut yù mù, yhangmoq lé shuí htoq htoq kut nyi ri. ⁴Yhang é sau pé banshoq lé hpông htoq yù mù, yhang gi, hí má sô ri; sau pé gi, yhang é htê lé sê gyo kô é yanmai, yhang é htang má châng akô nghut ri. ⁵Nghut kôlhang, yhangmoq gi, byù bíng é htang má, hkâ-nhám lhang cháng kó rá a nghut e za, yhang chyáng mai kúm hfang byuq kó rá nghut lhê; hkâsu mù gâ le, haù byù bíng é htê lé, yhangmoq a sê gyo kô é yanmai nghut ri." ga tái ri. ⁶Yesuq gi, dangtú haù lé yù mù, yhangmoq lé tái kyô ri; nghut kôlhang, yhangmoq gi, Yhang haì tái kyô nyi é lé, a sê gyo kó nghut ri.

⁷Haù mù, Yesuq dum tái é gi, "Ngò, nungmoq lé teng za tái kôlé, Ngò gi, haù sau pé wang é hkúmdong nghut lhê. ⁸Ngá é hí má lé é lhunglhang bang gi, hkau bang eq damyaq pé nghut akô; haù sau pé kúm gi, yhangmoq é dang lé a lhom gyo byi kó nghut ri. ⁹Ngò gi, hkúmdong nghut lhê; Ngò mai wang é sù ó yuq nghut kôle, hkyi yu é hui rá nghut lhê. Haù yuq gi, htoq htoq wàng wàng wó kut rá eq mhan-yô myang hô rá nghut lhê. ¹⁰Haù hkau sù gi, hkau rá, sat rá eq lhoq htên pyám rá matú, lé e za nghut lhê. Ngo lé é gi, yhangmoq, asak wó yù rá eq byingjup é asak lé wó yù rá matú sheq nghut lhê.

¹¹Ngò gi, ge é sau zúng sù nghut lhê; haù ge é sau zúng sù gi, sau pé é matú, yhumsing é asak lé ap byi pyâm é nghut lhê. ¹²Haù langchyáng kut sù gi, sau pé lé sing é sau zúng sù a nghut; haù mù, yhang gi, haù wamhkuí lé lo é lé myàng jáng, saù pé lé pyâm to mù hfang ló byuq rá nghut lhê; haù hkûn, wamhkuí gi, sau hpúng lé é htím luî, lhoq pyo pyám rá nghut lhê. ¹³Yhang gi, langchyáng hpó nghut luî, haù sau pé é matú haì le a myit chiq byî é yanmai, hfang é nghut ri.

¹⁴Ngò gi, haù ge é sau zúng sù nghut lhê; haù Îwa gi, Ngo lé sê é nghut luî, Ngò le, haù Îwa lé sê é eq rajung za, ¹⁵Ngá é sau pé lé, Ngò sê lhê; Ngá é sau pé le, Ngo lé sê akô nghut ri; Ngò gi, haù sau pé é matú, yhumsing é asak lé ap byî pyâm é nghut lhê. ¹⁶Ngò gi, sau hkup shî mâ é a nghut é gotú sau pé wó ashî; sau haù pé lé le, Ngò, shuí yù ra rá nghut lhê; sau haù pé le, Ngá é htê lé gyo kó rá nghut lhê; haù hkûn, sau hpúng rahpúng za dut luî, sau zúng sù le rayuq za, nghut rá nghut lhê. ¹⁷Ngò gi, Ngá é asak lé dum wó taù yù sháng gaq nghú, yhumsing é asak lé ap byî pyâm é yanmai, Ngá Wa gi, Ngo lé chyitdap é nghut lhê. ¹⁸Ngá é asak lé, ó yuq eq le wó yu pyâm é a nghut, Ngá é myit dông byi pyâm é ru nghut lhê. Ngò gi, yhumsing asak lé ap byi pyám rá ahko ahkáng eq haù lé dum taù yù rá ahko ahkáng wó sù nghut lhê. Haù gi, Ngá Wâ chyáng mai Ngò wó yu é hkunmó nghut lhê." gâ ri.

¹⁹Dang haù pé é yanmai, haù Yudaq byu pé gi, myit a huì lhum dum dut byuq bekô nghut ri. ²⁰Haù mâ é bang myo myo gi, "Yhang gi, nat gang wang júng to luî, nâ byuq bê nghut ri. Yhang é dang lé, haì mù gyô nyi akô lhu?" ga tái bum akô.

²¹Nghut kôlhang, góbang gi, "Dang shi pé gi, nat gang wang júng tô é byù tái é dang a nghut. Nat gang gi, myoqjit sù lé, myoq wó lhoq myàng nhâng rá lhu?" ga tái bum akô nghut ri.

Yudaq Byu Pé A Lumjîng Kô É Hkyô

²²Yerusalem wà mó má, Ap Nóng Poî* jé bê nghut ri. Haù gi, gyoqmyò nám nghut ri. ²³Haù hkûn, Yesuq gi, haù noqkuq yhùm wàng mâ é, Sholumon é Jirop má sô yông wún ri. ²⁴Haù u lé, haù Yudaq byu pé gi, Yhang é lnhghkyuq má lé zîng bùm kômù, "Nàng gi, ngamoq lé hkâ-myháng jé shoq úng-áng nhang nyi rá lhu? Nàng, Hkrisduq nghut le gi, ngamoq lé san za tái kyô pyám laq." ga tái akô.

²⁵Yesuq gi, "Ngò, nungmoq lé tái kyo bê nghut lhê; nghut kôlhang, nungmoq a lumjîng kó nghut ri. Ngá Wâ é mying mai, Ngò kut é laklaí kumlhá haù pé gi, Ngá é matú saksé hkâm byî nyi ri. ²⁶Nghut kôlhang, nungmoq gi, Ngá é sau a nghut

* 10:16 Esai 56:8

* 10:22 Ap Nóng Poî gâ é gi, Garai Gasâng é yhùm lé ap nóng lé gâ lhê.

kô é yanmai, a lumjúng kó nghut ri. ²⁷ Ngá é sau pé gi, Ngá é htê lé dat gyô akô; Ngò gi, yhangmoq lé sê lhê; yhangmoq le, Ngá htàng châng akô nghut ri. ²⁸ Ngò gi, yhangmoq lé, ahtum abyuq é asak byî é nghut mù, yhangmoq gi, hkâ-nhám le htên byoq kó râ a nghut; ó yuq eq le, yhangmoq lé, Ngá é loq mai wó lú yû râ a nghut. ²⁹ Yhangmoq lé, Ngá é loq má ap byi tô é sù, haû Ngá Wa gi, lhunglhang htoq má je gyaú Sû nghut lhê; ó yuq eq le, yhangmoq lé, Ngá Wâ é loq mai wó lú yû râ a nghut. ³⁰ Ngò eq haû Îwa gi, rayuq za nghut lhê." ga tû taî ri.

³¹ Haû hkûn, haû Yudaq byu pé gi, Yesuq lé, dú râ matú luqgok dum kui akô. ³² Nghut kôlhang, Yesuq gi, yhangmoq lé, "Haû Îwâ chyáng mâ é laklaí kumlhá mó pé myo myo, Ngò, nungmoq lé tûn shit bê nghut lhê. Nungmoq, Ngo lé dú râ gi, hká lhûm é yanmai nghut akô lú?" ga myî ri.

³³ Haû Yudaq byu pé gi, "Ngamoq, Nang lé dú râ gi, haû pé hká lhûm é yanmai le a nghut; Nàng gi, byù rayuq nghut to luî, Garai Gasang nghut é đông taí whuí luî, Yhang lé rhoi dang taí é yanmai, dú râ nghû lhê." ga tû taî akô.

³⁴ Haû hkûn, Yesuq gi, yhangmoq lé, "Nungmoq gi, garaî pé nghut akô nghû, Ngò taí bê nghut lhê." ✱ ga nungmoq é tarâ má kâ to lhê a nghut kó lú? ³⁵ Chyúmdang haû lé gi, a ge lhoq hpyoq pyâm é nghut luî, haû Garai Gasâng é mungdang lé wó yu é bang lé, 'garaî pé' gâ é nghut le gi, ³⁶ haû Îwa mai, Yhang é matú hkyin htoq yû luî, mingkan má nhang é Sû eq séng luî gi, hká đông nghû kó râ lú? 'Ngò gi, Garai Gasâng é Yhangzo nghut lhê.' nghû taí é yanmai, Ngò gi, Garai Gasang lé taí hpoî ri nghû, nungmoq, haû mù Ngo lé mara hûn akô lú? ³⁷ Ngá Wâ é muzó pé lé, Ngò kut é a nghut jáng, Ngo lé hkâlumjúng kó. ³⁸ Nghut kôlhang, Ngò, haû pé lé kut é nghut le gi, nungmoq, Ngo lé a lumjúng kôlhang, haû muzó pé lé lumjúng keq; haû hkûn, haû Îwa gi, Ngò má nghut nyi é hkyô lé le, Ngò gi, haû Îwa má nghut nyi é hkyô lé le, nungmoq wó sé luî, sê gyo kó râ nghut lhê." ga tû taî ri. ³⁹ Yhangmoq gi, Yhang lé chyup

râ dum hen akô; nghut kôlhang, Yhang gi, yhangmoq é loq mai wó lut ló bê nghut ri.

⁴⁰ Hau htàng, Yesuq gi, haû Yodan làng he hpoq mâ é, Yohan, wui-myhup hkám byî hi é jowò má ló jé ri. Haû má, Yhang nyi nyi é nghut luî, ⁴¹ byù myo myo gi, Yhâng chyáng lé jé bum akô. Yhangmoq gi, "Yohan gi, limik kumlhá a kut wú é nghut kôlhang, shí yuq eq séng luî, Yohan taí é hkyô lhunglhang gi, têng ri." ga taí bum akô. ⁴² Haû jowò má, byù myo myo gi, Yesuq lé lumjúng bùm bekô nghut ri.

11

Lazaruq Shi Byuq É Hkyô

¹ Ahkuî, Lazaruq gâ é byù rayuq gi, no nyi ri. Yhang gi, haû Mariq eq yhângnhá Mahtaq nhik nyi é Behtani wà mâ é sù nghut lhê. ² Mariq haû gi, Yhumsîng lé namngón-xû hut gyun luî, hkyî má yhâng xam eq sùt byî é sù nghut ri; yhang gi, haû no nyi é Lazaruq é yhângnhá nghut ri. ³ Haû mù, haû yhângnhá nhik gi, "Yhumsîng ê, Nàng chyitdap é sù gi, no nyi ri." ga, Yesuq chyáng é taí nhang akô.

⁴ Yesuq gi, dang haû lé wó gyo jáng, "Nòhpyo haû gi, shî-nò a nghut. Haû Garai Gasâng é Yhangzo gi, hau é yanmai, hpungwup shingkang wó dan hû é hui sháng gaq ga, Garai Gasâng é hpungwup shingkang é matú dut é ru nghut lhê. ⁵ Yesuq gi, Mahtaq eq yhanggu Mariq lé le, Lazaruq lé le, chyitdap ri. ⁶ Haû su mù, Yhang gi, haû Lazaruq no nyi ri gâ é lé, wó gyô é hkûn, haû Yhang nyi é jowò má, í nyí nyi tô ashî nghut ri.

⁷ Hau htàng, Yhang gi, Yhâng é chángzô pé lé, "Nga-nhúng gi, Yuda mau shut dum taû ló sháng." ga taî ri.

⁸ Haû hkûn, yhangmoq gi, "Rabai ê, hkû-yoq za, haû Yudaq byu pé, Nang lé luqgok eq dú sat râ da kô é nghut le nhîng, ahkuî, haû shut dum taû ló râ lú?" ga Yhang lé myî akô.

⁹ Yesuq gi, "Nyí gi, hkyíng hkum raxe í hkum bo lhê a nghut kó lú?" ✱ Nyí má hkyô sô é sù gi, mingkan shi é maubó é yanmai myoq myàng luî, lengbat râ a nghut. ¹⁰ Myín lé hkyô sô é sù kúm gi,

✱ 10:34 Hkya-on 82:6 ✱ 11:9 Nyí gi, hkyíng hkum raxe í hkum bo lhê a nghut kó lú? gâ é gi, ahkyíng a jé shimá, muzó nô é gi, a ge é nghut lhê gâ é nghut ri.

maubó lé a wó é yanmai, lengbat lhê." ga tû taí ri.

¹¹ Haú su ga taí é htâng má, Yhang, yhangmoq lé xoq taí kyô é gi, "Nga-nhông é luzúm Lazaruq yhup myhî byuq bê nghut ri; nghut kôlhang, Ngò gi, yhang lé ê nhaú toq râ nghut lhê." gâ ri.

¹² Haú hkûn, Yhâng é chángzô pé gi, "Yhumsîng ê, yhang yhup myhî tô é nghut le gi, ge lò râ nghut lhê." gâ taí akô. ¹³ Yesuq gi, Lazaruq shi byuq bê hkyô lé taí é nghut ri; nghut kôlhang, Yhâng é chángzô pé gi, gè gè yhup myhî tô é lé taí é su ngam pyâm akô nghut ri.

¹⁴ Haú mù luí, Yesuq, yhangmoq lé san za jáng taí kyô é gi, "Lazaruq gi, shi byuq bê nghut lhê. ¹⁵ Ngò haú má a nyi záng é gi, nungmoq wó lumjîng râ matú nghut luí, nungmoq é matú Ngò gabú byî ri; yhâng chyáng e ló sháng hkoi." gâ ri.

¹⁶ Haú mù, haú Zozûm le gâ é Htomaq gi, gotû chángzô pé lé, "Nga-nhông le, Yhang eq rahá shî sháng gaq, châng e ló sháng." ga taí ri.

Haú Ê-nhâ Nhik Lé, Yesuq Nhik Tîng Ê Hkyô

¹⁷ Yesuq gi, jé e é hkûn, haú Lazaruq lé lup má kat pyâm é myi nyí nghut bê hkyô lé, lhom taí kyô akô. ¹⁸ Behtani wà gi, Yerusalem wà mó eq í déng kô za wê lhôm ri. ¹⁹ Haú mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tîng byi kó râ ga lé jé nyi bum akô nghut ri. ²⁰ Mahtaq gi, Yesuq jé lé lo é hkyô lé wó gyo jáng, htoq ê mù, Yhang lé ê huí ri; nghut kôlhang, Mariq gi, yhôm má nyi tô ri.

²¹ Mahtaq gi, Yesuq lé, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut. ²² Nghut kôlhang, ahkuí le, Garai Gasâng chyáng Nàng hái dung kôlhang, Yhang byi râ nghut é lé, ngò sê lhê." ga taí ri.

²³ Yesuq gi, yhang lé, "Nung gu, dum dui toq râ nghut lhê." ga taí ri.

²⁴ Haú hkûn, Mahtaq gi, "Haú jîhtûm buinyi má dum dui toq é hkûn, yhang le dum dui toq râ nghut é lé, ngò sê lhê." ga tû taí ri.

²⁵ Haú hkûn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjîng é sù gi, shi byuq kôlhang, dum

dui râ nghut lhê. ²⁶ Asak dui nyi luí, Ngo lé lumjîng é sù ó yuq nghut kôle, hkâ-nhám le shi é hui râ a nghut. Nàng gi, dang shî lé lumjîng lhê lhú?" ga taí ri.

²⁷ Haú hkûn, yhang gi, "Yhumsîng ê, ngò lumjîng lhê. Nàng gi, haú mingkan má jé lé lô râ nghut é, Garai Gasâng é Yhangzo, Hkrisduq† nghut é lé, ngò lumjîng lhê." ga, Yhang lé taí kyô ri.

²⁸ Yhang gi, haú su ga taí é htâng má, taú ló mù, yhanggu Mariq lé, tsik za wut yù luí, "Haú Sará jé tô ri; Yhang gi, nang lé myi nyi ri." ga taí kyô ri. ²⁹ Mariq gi, haú lé wó gyo jáng, hân za toq mù, Yesuq chyáng ê bê nghut ri. ³⁰ Haú u lé, Yesuq gi, haú wâ hkaú má a wang ló shî e za, Mahtaq eq huí é jowò má ru nyi tô ashî nghut ri. ³¹ Haú yhúmhkaú má, Mariq lé nhik tîng nyi é Yudaq byu pé gi, yhang hân za toq luí, htoq ló é lé myàng kôjáng, yhang, lup má ê ngaú râ dâ lhê abe ga, myit yù kômù, yhang htâng châng e ló bum akô nghut ri.

³² Mariq gi, Yesuq nyi tô é jang má jé mù, Yhang lé myàng jáng, Yhâng é hkyi wang má ngóm gop to luí, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut." ga taí ri.

³³ Yesuq gi, Mariq ngaú nyi é lé le, haú yhang eq rahá lé lo é Yudaq byu pé ngaú nyi kô é lé le, myàng jáng, Yhâng é myit má gyai yhang hkâm zo wuí é eq myit wui myit hke dut nyi ri. ³⁴ Haú mù, Yhang gi, "Yhang lé, hkâmá tô tô akô lhú?" ga myi jáng, yhangmoq gi, "Yhumsîng ê, lé wú wú aq." ga tû taí akô.

³⁵ Yesuq gi, ngaú bê nghut ri.

³⁶ Haú mù, haú Yudaq byu pé gi, "Wú keq, Yhang gi, Lazaruq lé, haú-í yhang chytit rinhung!" ga taí akô.

³⁷ Nghut kôlhang, ra-am gi, "Haú myoqjit sù lé, myoq wó lhoq myâng byi é Sù gi, shí yuq lé le, a shî lo shoq a wó kut é lhú?" ga taí bum akô nghut ri.

Lazaruq Lé Lhoq Dui Toq Ê Hkyô

³⁸ Yesuq gi, Yhâng é myit má radàm dum gyai yhang hkâm zo wuí é eq, lup má lé jé ri. Lup haú gi, luqhkyûng dong nghut luí, luqgok rachâm eq chî tô akô. ³⁹ Haú mù, Yhang gi, "Luqgok haú lé yu pyám keq." ga taí ri.

† 11:27 Hkrisduq lé Mesaia le gâ lhê.

Haú hkûn, haú shi byuq su é yhangnhá Mahtaq gi, "Yhumsing ê, yhang lé, haú má tô tô é myi nyí lhang nghut bê yanmai, ahkuí gi, bup nàm berâ nghut lhê." ga tái ri.

⁴⁰ Haú mù, Yesuq gi, "Nàng, lumjínng é nghut le gi, haú Garai Gasâng é hpungwup shing kang lé, wó myâng râ nghut lhê nghû, Ngò, nang lé tái kyô wú bê a nghut lhu?" ga tái ri.

⁴¹ Haú mù luí, yhangmoq gi, luqgok haú lé yu pyâm akô. Hau htâng, Yesuq gi, mauhkung shut tu wú luí, "Áwa ê, Nàng, Ngá é dang lé gyo byí é yanmai, Ngò, Nang lé jeju hkyá-ôn lhê. ⁴² Nàng gi, hkâ-nhám le, Ngá é dang lé gyo byí nyi é lé, Ngò sê lhê; nghut kôlhang, Nàng, Ngo lé nhang kat é hkyô lé, shí má yap tô é bang lumjínng kó sháng gaq nghû, yhangmoq é matú, Ngò, isu nghû tái é nghut lhê." ga tái ri.

⁴³ Yhang gi, haú su ga tái luí, "Lazaruq ê, htoq lô aq." ga htê mó eq wut kat ri. ⁴⁴ Haú hkûn, haú shi byuq bê sù gi, yhang é loq hkyí pé má pân eq htup yup to gû eq, yhang é myoqdong má hpajet eq htup to gû htoq lo ri.

Haú mù, Yesuq gi, yhangmoq lé, "Yhang lé hpyi pyám byi mù, nhang kat keq." ga tái ri.

Yesuq Lé Sat Pyám Râ Haq Dâ É Hkyô

Mht 26:1-5; Mrk 14:1-2; Luk 22:1-2

⁴⁵ Haú mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjínng bùm bekô nghut ri. ⁴⁶ Nghut kôlhang, yhangmoq chyáng mâ é ra-am gi, haú Hparishe pê chyáng ló mù, Yesuq kut é hkyô lé, ló tái kyô akô. ⁴⁷ Haú mù, haú hkyangjong agyi pé eq Hparishe pé gi, Yudaq byin tú wapdoq† zuphpong lé ji tsíng to mù, "Byù shí yuq gi, limik kumlhá myo myo kut shit nyi ri. Nga-nhúng, hkâsu kut le gè râ lhu?" ⁴⁸ Nga-nhúng, Yhang lé haú su ru kut nyí nhang é nghut jáng, yuq hkangmó gi, Yhang lé lumjínng kó râ nghut lhê; haú hkûn, Romaq byu pé gi, jé lé mù, nga-nhúng é jowò eq nga-nhúng é byuhú lé, lé lhoq htên pyám kó râ nghut lhê." ga tái akô nghut ri.

⁴⁹ Haú hkûn, yhangmoq chyáng mâ é, haú zân má hkyangjong mó nghut nyi é sù, Kayahpaq gi, yhangmoq lé, "Nungmoq gi,

haí lhang a sé kó nghut ri-nhung! ⁵⁰ Haú byuhú gón htên byoq byuq râ htoq má, byuhú hau é matú, byù rayuq shí hkâm byi le gi, nungmoq é matú je gè râ hkyô lé, nungmoq, a myit jé kó nghut ri." ga tái kat ri.

⁵¹ Yhang haú su ga tái é gi, yhumsing myit đông a nghut e za, haú zân má, yhang gi, hkyangjong mó nghut é eq rajung za, haú Yudaq byuhú é matú, Yesuq shí hkâm byi râ nghut é hkyô lé le, ⁵² byuhú hau é matú baú a nghut e za, haú byo myín tô é, Garai Gasâng é yhangzô pé lé, shuí tsíng yù mù, rading ralhüm za dut nhâng râ matú, shí hkâm byi râ nghut é hkyô lé le, myiqhtoi dang tái é ru nghut lhê. ⁵³ Haú nyí mai, yhangmoq gi, Yesuq lé sat râ matú chôm da bekô nghut ri.

⁵⁴ Hau é yanmai, Yesuq gi, Yudaq byu pé gyoro má, de de a sô shit wún e za, haú mai htoq luí, haú yoso eq chyâng lhum é mau mâ é, Ehprim gâ é wà má ê mù, Yhâng é chángzô pé eq rahá nyi nyi ri.

⁵⁵ Haú Yudaq byu pê é Lhoqlhai Poí jé râ za nghut é hkûn, byù myo myo gi, Lhoqlhai Poí a jé shi má, lhoq san lhoq yúng hking đông yhumsing gùng lé lhoq sân-yúng yú râ matú, yosô wà pé mai, Yerusalem wà mó shut doq ló bum akô. ⁵⁶ Haú mù, yhangmoq gi, Yesuq lé ho nyi kô é nghut luí, haú noqkuq yhüm wàng má yap to uchyang, rayuq eq rayuq, "Nungmoq, hkâsu wó myit akô lhu? Yhang gi, Poí má a lé lô râ gâ lhê lha?" ga myí lhum bum akô. ⁵⁷ Nghut kôlhang, haú hkyangjong agyi pé eq Hparishe pé gi, Yesuq lé wó chyup yú râ matú, Yesuq hkâmá nyi é lé, sê é sù ó yuq nghut kôle, yhangmoq lé lo shit kyo râ lhê ga dangmó hkyó tô akô nghut ri.

12

Yesuq, Namngón-xú But Byi Huí É Hkyô

Mht 26:6-13; Mrk 14:3-9

¹ Haú Lhoqlhai Poí jé râ hkyuq nyí râ ashí hkûn, Yesuq gi, Yhâng eq shi é mai lhoq dui toq yu é sù, Lazaruq nyi é Behtani wà má ló jé ri. ² Haú má, Yesuq lé hkunggâ é đông myinzang byi tsô akô; Mahtaq gi, zoshuq jaú ri; Lazaruq gi, haú Yesuq eq rahá sibôí má zô zung nyi bang mâ é rayuq nghut ri. ³ Haú hkûn, Mariq gi, haú nardu amyit mai

† 11:47 Yudaq byin tú wapdoq lé Grik đông gi, San-hedrin gâ lhê.

za saî yu é, gyai hpaû é namngón-xû raxe í rûng kô yu lé mù, Yesuq é hkyî má hut gyun byi luî, yhâng é uxam èq sùt byî ri. Haû mù, yhûm haû gi, namngón-xû shôm byíng to bê nghut ri.

⁴ Nghut kôlhang, Yesuq lé ap pyám râ nghut é, Yhâng é chángzo rayuq nghut sù, Yudaq Iskarut gi, ⁵ "Haû myùng bang lé byî pyám râ matú, haû namngón-xû lé denari sum sho èq haî mù a ûng pyâm é lhú?" ga taî ri. ⁶ Yhang haû su ga taî é gi, myùng bang lé chiq byî é yanmai taî é a nghut, yhang gi, ngùn htûng chûng sù nghut luî, haû má kat tô é ngùn lé, yhumsing é matú lhaq yu chûng chûng kut é, hkau sù nghut é yanmai taî é nghut ri.

⁷ Yesuq gi, "Nghut shang gaq; yhang gi, Ngo lé myhup yhum râ buinyi é matú, namngón-xû shî lé hkong to byî é nghut lhê. ⁸ Haû myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut." ga tû taî ri.

⁹ Haû u lé, Yudaq byu pé ajùm ayò gi, haû má Yesuq nyi é lé sé kôluî, lé lo akô; haû bang gi, Yesuq é yanmai za lé kô é a nghut, haû Yhâng èq shî bê mai lhoq dui toq yu é Lazaruq lé, lé myâng nau kô é yanmai le nghut ri. ¹⁰ Haû mù, haû hkyangjong agyi pé gi, Lazaruq lé le, sat pyám râ matú chôm hpyê lhûm akô. ¹¹ Hkâsu mù gâ le, yhâng é yanmai, haû Yudaq byu pé myo myo gi, Yesuq chyáng lhing ló kômù, Yhang lé lumjínng bûm kô é yanmai nghut ri.

Yesuq, Yerusalem Wà Mó Má Wang E Ló É Hkyô

Mht 21:1-11; Mrk 11:1-11; Luk 19:28-40

¹² Hau htang nyí, haû Poî má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyô bum akô. ¹³ Haû mù, yhangmoq gi, byùm-haq pé yu chûng mù, Yhang lé ê tê uchyang,

"Hosana!"

Haû Yhumsing é myìng mai jé lé lô Sù gi, hkungsô wó nyî sháng gaq ô!

Haû Israelaq byu pé é Hkôhkâm gi, hkungsô wó nyî sháng gaq!"

* 12:13 Hebre dang má, hosana gâ é gi, "ahkuí hkyi yù aq" gâ é nghut lhê. Nghut kôlhang, bun zo shî má gi, hkya-on dang đông chung é nghut lhê. ✨ 12:13 Hkya-on 118:25-26 † 12:15 Hebre myíng đông Zi-un byizo gâ é gi, Yerusalem má é byu pé lé gâ é nghut lhê. ✨ 12:15 Zhk 9:9

ga, taî garû bum akô nghut ri. ¹⁴ Haû hkûn, Yesuq gi, logúng zo radu lé myàng luî, doq jî ri;

¹⁵ haû gi, "Zi-un byizo† é, hkâgyuq; wú keq, nungmoq é hkôhkâm gi, logúng zo má ji mù lé lo nyi ri." ✨

ga, kâ tô é eq rajung za nghut ri.

¹⁶ Haû pé banshoq lé, Yhâng é chángzô pé gi, sâng-hi lé a sê gyo kó; nghut kôlhang, Yesuq gi, hpungwup shingkang dan hu huî é htâng má za sheq, haû pé gi, Yhang eq séng luî kâ tô é hkyô lé le, haû eq rajung za, Yhang lé, yhangmoq mai kut bê hkyô lé le, bûn sê kat akô nghut ri.

¹⁷ Haû Yesuq gi, lup hkaû mâ é Lazaruq lé wut luî, shi é mai lhoq dui toq yu é hkûn, Yhang eq rahá nghut é shiwa hpúng gi, haû hkyô lé, saksé hkám byî nyi akô. ¹⁸ Haû mù, byù myo myo gi, Yesuq tûn shit é limik kumlhá hau é hkyô lé, wó gyo kô é yanmai, Yhang lé hui râ matú htoq e akô. ¹⁹ Hau é yanmai, haû Hparishe pé gi, "Wú keq, nga-nhúng, hkâsu yhang a ge kut lo nhung! Haû mingkan gón gi, Yhâng htâng châng bùm bekô." ga, rayuq eq rayuq taî lhûm bum akô nghut ri.

Yesuq, Yhang Shî Râ Hkyô Lé Te Taî É Hkyô

²⁰ Haû hkûn, noqkuq râ matú Poî má doq ló é bang má, Grik pé ra-am le bo tô akô.

²¹ Yhangmoq gi, Galile mau, Bet-saida wà mó mâ é Hpilip chyáng lé jé kômù, "Âhkaú ê, ngamoq gi, Yesuq lé myàng nau ri." ga, dung tôngbán akô. ²² Haû mù, Hpilip gi, Andre lé, é taî kyô ri; Andre eq yháng nhik gi, Yesuq lé, é taî kyô akô.

²³ Haû mù, Yesuq gi, "Haû Byu Yhangzo gi, hpungwup shingkang dan hû é hui râ matú, ahkyíng jé bê nghut ri. ²⁴ Ngò, nungmoq lé teng za taí kôlé, sungso racham gi, myigùng má gyó luî, shi byuq e za a nghut jáng, acham roq za dut nyi râ nghut lhê. Nghut kôlhang, shi byuq é nghut le gi, ashi myo myo lhoq htoq râ nghut lhê. ²⁵ Haû yhumsing é asak lé chyitdap é sù gi, asak sùm byuq râ nghut lhê. Mingkan shî má, haû yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to râ nghut lhê. ²⁶ Ngo lé dojaú é

sû ó yuq nghut kôle, Ngá htâng cháng rã lhê; Ngò, hkâmá nyi le, Ngá é dui-nhâng zoshâng le nyi rã nghut lhê. Ngá Wa gi, haú Ngo lé dojaú é sù lé, shigyaú rã nghut lhê.

²⁷ Ahkuî, Ngò, myit wuîhke nyi ri; Ngò hkâsu nghû táí rã lhi? 'Áwa ê, ahkyíng shî mai Ngo lé lhoq lhut yù laq.' nghû táí rã lhú? Nghut kôle, Ngò gi, ahkyíng shi é matú za sheq jé lé é ru nghut lhê. ²⁸ Áwa ê, Náng é myìng lé hpungwup shing kang dan hu nhâng aq hkoi!" ga táí ri.

Haú hkûn, "Ngò gi, Ngá é myìng lé hpungwup shing kang dan hu nhâng bê nghut luí, dum dan hu nhâng shirã nghut lhê." gâ é htê, mauhkûng mai htoq lo ri. ²⁹ Haú má nyi tô é byù moq mó gi, haú lé wó gyo kôjáng, "Maugum gum ri." gâ bum akô; ra-am gi, "Yhang lé, maumang lagyo rayuq nyo ri." ga táí bum akô nghut ri.

³⁰ Haú hkûn, Yesuq gi, "Danghtê shî gi, Ngá é matú a nghut, nungmoq é matú ru nghut lhê. ³¹ Ahkuî gi, mingkan shî lé jéyáng rã ahkyíng nghut bê; mingkan shi é zau gi, ahkuî hkat htoq pyâm é hui rã nghut lhê. ³² Nghut kôlhâng, Ngò gi, myigùng mai tu shap kat é huí é hkûn, byù lhunglhâng bang lé, Ngá chyáng shê yù rã nghut lhê." ga táí ri. ³³ Yhang haú su ga táí é gi, Yhang hkâsu kut shî rã nghut é hkyô lé shit é nghut ri.

³⁴ Haú hkûn, haú byù moq mó gi, "Haú tarã laiká má, Hkrisduq gi, ahtum abyuq dui nyi rã nghut lhê gâ é lé sheq, ngamoq wó gyô wú é ru nghut le nhîng, 'Haú Byu Yhangzo gi, tu shap é hui ra rã nghut lhê.' nghû, Nàng hkâsu kut wó táí lhê lhú? Haú Byu Yhangzo gi, ó yuq nghut lhê lhú?" ga, myî akô.

³⁵ Haú mù, Yesuq gi, yhangmoq lé, "Nungmoq chyáng, haú maubó joq nyi rã ahkyíng gi, a lûm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haú maubó joq nyi ashî hkûn sô nyi keq; hkâsu mù gâ le, haú mauchut má sô nyi é sù gi, yhang hká shut e ló nyi é lé, a sé nghut ri.

³⁶ Nungmoq gi, maubó é yhangzô pé wó dut kó sháng gaq, haú maubó joq nyi ashî hkûn, haú lé lumjínng keq." ga táí ri. Yesuq gi,

dang haú ban táí jáng, yhangmoq chyáng mai htoq ló luí, haq byuq bê nghut ri.

Yudaq Byu Pé, A Lumjínng Ru Dut Nyî Kô É Hkyô

³⁷ Yesuq gi, yhangmoq é hí má, limik kumlhá haú pé banshoq kut shit kôlhâng, yhangmoq gi, Yhang lé a lumjínng shi kó nghut ri. ³⁸ Haú gi,

"Yhumsíng ê, nga-nhûng é danglù lé, ó yuq wá lumjínng byî wú é lhú? Haú Yhumsíng é loq[†] gi, ó yuq lé htoq shit wú é lhú?"[✠]

ga, myiqhtoi Esai-aq táí tô é dang lo dik é nghut ri.

³⁹ Yhangmoq a wó lumjínng kô é hkyô gi, Esai-aq táí é dang má,

⁴⁰ "Yhang gi, yhangmoq é myoqjí lé lhoq chit byi luí, yhangmoq é i-myt lé lhoq htan to byi bê nghut ri;

haú mù, yhangmoq gi, myoqjí èq a wó myâng, i-myt èq a wó sê gyo, Ngò, yhangmoq lé yâ ge byi rã matú, a wó lhing taú lò kó dut rã nghut lhê."[✠]

ga le bo tô é yanmai nghut lhê. ⁴¹ Esai-aq gi, Yesuq é hpungwup shing kang lé myang é yanmai, Yhang eq sêng é hkyô lé, haú su ga táí é nghut ri.

⁴² Nghut kôlhâng, haú uphkâng bang myo myo lháng gi, haú u má, Yesuq lé lumjínng bum akô. Nghut kôle, yhangmoq gi, Hparishe pé èq tarajong mai lhoq htoq pyâm é hui rã lé, gyuq kô é yanmai, yhangmoq lumjínng bê hkyô lé a yín yu bùm kó nghut ri. ⁴³ Hkâsu mù gâ le, yhangmoq gi, Garai Gasâng chyáng mâ é aróng lé, ô nau é htoq má, byu pé chyáng mâ é aróng lé, je ô nau kô é yanmai nghut ri.

⁴⁴ Haú mù, Yesuq, htê mó èq táí é gi, "Ngo lé lumjínng é sù gi, Ngo lé baú lumjínng é a nghut; haú Ngo lé nhang kat é Sù lé le, lumjínng é nghut lhê. ⁴⁵ Ngo lé myang é sù gi, haú Ngo lé nhang kat é Sù lé le myang é nghut lhê. ⁴⁶ Ngò gi, Ngo lé lumjínng é sù ó yuq le, mauchut hkaú má a nyi sháng gaq nghû, maubó dông mingkan má lé jé é nghut lhê.

⁴⁷ Ngò gi, Ngá é dang lé wó gyo luí, a châng é sù ó yuq lé le, jéyáng rã a nghut; hkâsu mù gâ le, Ngò gi, mingkan lé jéyáng

[†] 12:38 Yhumsíng é loq gâ é gi, Yhumsíng é hpungwup a-tsam lé gâ é nghut lhê. [✠] 12:38 Esai 53:1 [✠] 12:40 Esai 6:10

râ matú jé lé é a nghut; haû mingkan lé hkyi yù râ matú sheq, jé lé é ru nghut lhê.
⁴⁸Ngò lé he-ngik luí Ngá é dang lé a hap yu é sù lé, jéyáng râ Sû rayuq nyi lhê; Ngò taí é danghkun haû gi, haû jihtúm buinyi má, haú yuq lé mara byi râ nghut lhê. ⁴⁹Hkâsu mù gâ le, Ngò gi, Ngá é myit đông taí é a nghut; nghut kôlhang, Ngò haí taí râ eq hkâsu nghu taí râ lé gi, haû Ngo lé nhang kat é sù Îwa mai, Ngo lé hkunmó hkyô to bê nghut lhê. ⁵⁰Haû Yhâng é hkunmó gi, ahtum abyuq é asak nghut é lé, Ngò sê lhê. Haû mù luí, Ngò, haí taí kôlé, haû Îwa mai Ngo lé taí kyô é lé za, taí é nghut lhê." gâ ri.

13

Chángzô Pé É Hkyi Chi Byi É Hkyô

¹Haû Lhoqlhai Poí jé râ hí má za, Yesuq gi, Yhang, mingkan shi mai Yhâng Wâ chyáng htot ló râ ahkyíng jé bê hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut luí, jihtúm jé shoq Yhâng é chyitdap myit lé shit râ nghut lhê.

²Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám râ myit kat byi to gû nghut ri. ³Yesuq gi, haû lhunglhang lé Îwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taú ló râ sù nghut é lé le, sê ri. ⁴Haû mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhùm eq hpyihit hit tô ri. ⁵Hau htâng, Yhang gi, jirung má uchyam hut kat mù, Yhâng é chángzô pê é hkyi chi byi luí, haû Yhâng é hpyidum má hit tô é hpajet eq sut huí byi ri.

⁶Yhang gi, Simun Petruq chyáng jé jáng, Simun Petruq gi, "Yhumsîng ê, Nàng gi, ngá hkyi lé chi byi râ nghut lhê lú?" ga myi ri.

⁷Haû hkûn, Yesuq gi, "Ngò, haí kut nyi é hkyô lé, ahkuí, nàng sê gyo râ a nghut; nghut kôlhang, htâng má sê gyo râ nghut lhê." ga tâ ri.

⁸Petruq gi, "Ngá hkyi lé, Nàng, hkâ-nhám le wó chi byi râ a nghut." ga taí jáng, Yesuq gi, "Nang lé, Ngò a chi byi é nghut

jáng, nàng gi, Ngò eq séng râ a nghut." ga tâ ri.

⁹Haû hkûn, Simun Petruq gi, "Yhumsîng ê, haû su nghut jáng gi, ngá é hkyi lé baú za a nghut, ngá é loq eq ulhum lé le chi byi laq!" ga tâ ri.

¹⁰Yesuq gi, "Gùng chi bê sù gi, hkyi za chi jáng, ragùndú é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, sanséng é a nghut." ga tâ ri. ¹¹Hkâsu mù gâ le, Yhang gi, Yhang lé ap pyám râ sù ó yuq nghut é lé, sê é yanmai, "Nungmoq gi, sanséng é bang chyat a nghut." ga taí é nghut ri.

¹²Yesuq gi, yhangmoq é hkyi lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, "Nungmoq gi, ahkuí, ngò kut byi é hkyô lé, sê gyo akô lú?" ¹³Nungmoq, Ngo lé, 'Sará' ga le, 'Yhumsîng' ga le, wut kô é gi, a shut; hkâsu mù gâ le, Ngò gi, haú yuq yhang nghut lhê. ¹⁴Ngò, nungmoq é Sará eq Yhumsîng nghut sù lhang, nungmoq é hkyi lé chi byi é nghut le gi, nungmoq le, rayuq eq rayuq é hkyi lé chi byi lhum râ dut lhê. ¹⁵Nungmoq gi, Ngò, nungmoq lé kut byi é su kut kó sháng gaq nghu, Ngò, nungmoq lé alik kut shit tô é nghut lhê. ¹⁶Ngò, nungmoq lé teng za taí kôlé, duinhâng zoshâng gi, yhumsîng htoq je kô é a nghut; lagyo gi, nhang kat é sù htoq je kô é a nghut. ¹⁷Ahkuí, nungmoq gi, haú pé lé sé bekô nghut luí, châng kut kô é nghut jáng, hkungsô wó kô râ nghut lhê.

Yesuq Lé Ap Pyám Râ Lé, Te Taí É Hkyô

¹⁸Ngò gi, nungmoq banshoq bang lé lhoq ang luí taí é a nghut; Ngò hkyin yu é bang lé gi, Ngò sê lhê. Nghut kôlhang, 'Haû ngá é muk lé bo zô é sù gi, ngo lé, yhâng é hkyihtáng la-nhik eq nàng htíng râ nghut lhê.'* gâ é Chyúmdang lé, lhoq dik râ matú ru nghut lhê.

¹⁹Haû a dut htoq shimá, Ngò, nungmoq lé taí kyô nyi é gi, haû dut é hkûn, Ngò gi, haú Yuq* nghut é lé, nungmoq wó lumjíng kó râ matú nghut lhê. ²⁰Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bê; Ngo lé hap yu é sù ó yuq nghut

* 13:18 Hkya-on 41:9

* 13:19 Haú Yuq gâ é gi, Hkrisduq lé gâ é nghut lhê.

kôle, haû Ngo lé nhang kat é Sû lé hap yu é nghut bê." gâ ri.

²¹ Yesuq gi, haû su ga taî é htâng má, myit wuîhke nyi mù, saksé hkâm é gi, "Ngò, nungmoq lé teng za taî kôlé, nungmoq mâ é rayuq sù gi, Ngo lé ap pyám râ nghut lhê." gâ ri.

²² Haû mù, Yhâng é chángzô pé gi, ó yuq lé taî záng nyi é hkyô lé, rago a sé kô é yanmai, rayuq eq rayuq wú tsuq lhûm bum akô nghut ri. ²³ Haû Yesuq chyitdap é chángzo rayuq gi, Yesuq é tanghkoí nâm má leq nge zung tô ri. ²⁴ Haû mù, Simun Petruq gi, chángzo haû yuq lé, loq lik kat mù, "Yhang, ó yuq lé lhoq ang luí, taî nyi é hkyô lé, myi wú aq." ga taî ri.

²⁵ Haû mù, chángzo haû gi, Yesuq é tanghkoí má saî leq nge zung mù, "Yhumsîng ê, haû gi, ó yuq nghut lhê lú?" ga, Yhang lé myí ri.

²⁶ Yesuq gi, "Ngò, muk jap zo shî lé jum yù mù, byí é sù gi, haû yuq nghut lhê." ga tû taî luí, muk jap zo haû lé jum yù mù, Simun é yhangzo Yudaq Iskarut lé byí ri. ²⁷ Yudaq gi, muk haû lé yù zo kat é eq, Tsadán gi, yhâng chyáng wàng bê nghut ri.

Haû mù, Yesuq gi, "Nàng kut râ é hkyô lé, hân kut aq hkoi." ga yhang lé taî kat ri. ²⁸ Nghut kôlhâng, yhang lé, Yesuq haû su ga haî mù taî é hkyô lé, zohpoq haû má nyi tô é bang gi, rayuq lháng a sê gyo kó nghut ri. ²⁹ Haû Yudaq gi, ngùn zum sù nghut é yanmai, ra-am gi, haû Poí má râ é hkyô lé, ê wuî râ matú, Yesuq taî ri ga luí le, myùng bang lé rajung jung byí nhang ri ga luí le, myit yu bum akô nghut ri. ³⁰ Yudaq gi, muk haû lé lhom yù eq, htoq ló byuq bê nghut ri. Haû u gi, mauchut bê nghut ri.

Petruq He-ngik Pyám Râ Lé, Yesuq Te Taî É Hkyô

Mht 26:31-35; Mrk 14:27-31; Luk 22:31-34

³¹ Haû yuq htoq ló byuq jáng, Yesuq taî é gi, "Ahkuî, haû Byu Yhangzo gi, hpungwup shingkang dan hû é nghut luí, Garai Gasang gi, haû Byu Yhangzô é yanmai, hpungwup shingkang dan hu bê nghut ri. ³² Garai Gasang gi, haû Byu Yhangzô é yanmai, hpungwup shingkang dan hû é nghut jáng, Yhang le, Yhang má haû Zo lé hpungwup shingkang dan hu nhâng râ nghut lhê; radá dâm dan hu nhâng râ nghut lhê.

³³ Ngá zo pé ê, Ngò, nungmoq eq rahá nyi râ gi, razup za ru nghut alô. Nungmoq gi, Ngo lé hô kó râ nghut lhê; nghut kôlhâng, 'Ngò ló é jang má, nungmoq wó jé kó râ a nghut.' nghû, haû Yudaq byu pé lé, Ngò taî é eq rajung za, ahkuî, nungmoq lé le, Ngò taî lhê.

³⁴ Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum râ dut lhê. ³⁵ Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lhunglhâng bang sé kó râ nghut lhê." gâ ri.

³⁶ Haû hkûn, Simun Petruq gi, "Yhumsîng ê, Nàng, hká shut ló râ lú?" ga, Yhang lé myi jáng, Yhang gi, "Ngò ló é jang má, nungmoq, ahkuî a wó châng kó râ nghut lhê. Nghut kôlhâng, htâng má gi, nungmoq cháng ra kó râ nghut lhê." ga tû taî ri.

³⁷ Petruq gi, "Yhumsîng ê, haî mù luí, ahkuî ngò Nàng htâng a wó châng é lú? Ngò gi, Nàng é matú, shí hkám râ rì rì nghut lhê." ga taî ri.

³⁸ Haû mù, Yesuq taî é gi, "Nàng gi, gè gè yhang, Ngá é matú shî hkám râ lú? Ngò, nàng lé teng za taî lé, woq a tûn shimá, nàng, Ngo lé sum dâm he-ngik pyám râ nghut lhê.

14

Yesuq, Yhâng É Chángzô Pé Lé Nhik Tîng É Hkyô

¹ Nungmoq é i-myt nhiklhum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq. ² Ngá Wâ é yhûm má, nyi jowò myo myo joq lhê; a joq é ru nghut le gi, noq mai, Ngò, nungmoq lé taî kyo râ nghut lhê. Ngò, haû má ló é gi, nungmoq é nyi jowò ló hên lán râ matú ru nghut lhê. ³ Ngò gi, ló mù, nungmoq é matú nyi jowò ló hen é nghut jáng, Ngò nyi é jang má nungmoq le wó nyi shoq, Ngò eq rahá nyi râ matú, Ngò dum taî lé mù, nungmoq lé, lé shuî yù râ nghut lhê. ⁴ Ngò ló é jang má jé é hkyô lé, nungmoq sê lhê." gâ ri.

Yesuq Za Hkyô

⁵ Haû hkûn, Htomaq gi, Yhang lé, "Yhumsîng ê, Nàng hká shut ló é lé lháng,

ngamoq a sê le nhîng, hkyô haû lé, ngamoq hkâsu kut wó sé râ lúhú?" ga myî ri.

⁶ Yesuq gi, "Ngò gi, hkyô nghut lhê; haû tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut. ⁷ Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó râ nghut lhê. Ahkuí mai, nungmoq gi, Yhang lé sé kô é htoq agó, myàng le myang wú bekô nghut lhê." ga tû taí ri.

⁸ Haû hkûn, Hpilip gi, "Yhumsîng ê, ngamoq lé, haû Íwa tûn shit laq, haû hkûn, ngamoq nhik shî râ nghut lhê." ga taí ri.

⁹ Yesuq tû taí é gi, "Hpilip ê, Ngò, nungmoq eq shî myáng lháng nyi lò bê le nhîng, nàng, Ngo lé a sé lúhú? Ngo lé myang é sù gi, haû Íwa lé myàng bê nghut ri; haû nghut le nhîng, 'Ngamoq lé, haû Íwa tûn shit laq.' nghû, nàng hkâsu wó taí lhê lúhú? ¹⁰ Ngò gi, haû Íwa má nghut nyî lú, haû Íwa gi, Ngò má nghut nyi é hkyô lé, nàng a lumjîng lúhú? Ngò, nungmoq lé taí é dang haû pé gi, Ngá é myit mai taí é a nghut; haû Ngò má lúng nyi é Íwa sheq, Yhâng é mù zû nyi é ru nghut lhê. ¹¹ Ngò gi, haû Íwa má nghut nyî lú, haû Íwa gi, Ngò má nghut nyi lhê nghû é lé lumjîng keq; haû a nghut jáng, kut shit é limik kumlhá pé dông za lháng, lumjîng keq. ¹² Ngò, nungmoq lé teng za taí kôlé, Ngo lé lumjîng é sù gi, Ngò kut é muzó lé kut râ nghut lhê. Ngò gi, haû Íwâ chyáng ló râ nghut é yanmai, haû yuq gi, hau htoq je kô é muzó pé lé lháng kut râ nghut lhê.

¹³ Haû Yhangzô é yanmai, Íwâ é hpungwup shingkang wó hû ló shoq, Ngá é myîng lé lang lú, nungmoq haí jung dung kôlháng, Ngò gyo byi râ nghut lhê. ¹⁴ Nungmoq gi, Ngá é myîng lé lang lú, haí dung kôlháng, Ngò gyo byi râ nghut lhê.

Chyoiyúng Woi-nyí Byi Râ Danggidia

¹⁵ Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó râ nghut lhê. ¹⁶ Haû Íwa gi, nungmoq eq ahtum abyuq nyi nyi râ nghut é, hpaqchyí byi Sû gotû rayuq, nungmoq lé byi râ matú, Ngò gi, haû Íwa lé dung râ nghut lhê. ¹⁷ Haû yuq gi, tengmán é Woi-nyí nghut lhê. Haû mingkan gi, Woi-nyí haû lé a myàng a sê é yanmai, Yhang lé a wó hap yu é nghut lhê. Nghut kôlháng, Yhang

gi, nungmoq eq rahá nyi nyi é nghut lú, nungmoq má nyi to râ Sû nghut é yanmai, nungmoq gi, Yhang lé sê akô. ¹⁸ Ngò gi, nungmoq lé, chuizô pé dông pyâm to râ a nghut; nungmoq chyáng Ngò dum jé lé râ nghut lhê. ¹⁹ Adê myáng má, haû mingkan gi, Ngo lé a myàng lo râ nghut lhê; nghut kôlháng, nungmoq gi, Ngo lé myàng kó râ nghut lhê. Hkâsu mù gâ le, Ngò gi, asak dui nyi é nghut mù, nungmoq le dui kó râ nghut lhê. ²⁰ Ngò gi, Ngá Wâ chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haû buinyi má, nungmoq sé kó râ nghut lhê. ²¹ Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap râ nghut lhê; Ngò le, haû yuq lé chyitdap lú, Ngá gûng lé yhang, yhang lé shit râ nghut lhê." gâ ri.

²² Hau htâng, (Yudaq Iskarut a nghut sù) Yudaq gi, "Yhumsîng ê, Nàng gi, haû mingkan lé Náng gûng a shit e za, ngamoq lé shit râ nghut é gi, haí mù nghut lhê lúhú?" ga myî ri.

²³ Haû hkûn, Yesuq tû taí gi, "Rayuq yuq, Ngo lé chyitdap é nghut le gi, Ngá dang lé gyo râ nghut lhê. Ngá Wa le, haû yuq lé chyitdap râ nghut lú, Ngá hpe gi, haû yuq chyáng lé mù, yhang eq rahá nyi râ nghut lhê. ²⁴ Ngo lé a chyitdap é sù gi, Ngá dang lé gyo râ a nghut. Nàng wó gyô é dang shí pé gi, Ngá myit mai taí é a nghut; dang haû pé gi, Ngo lé nhang kat é Sû, haû Íwâ é ru nghut lhê.

²⁵ Ngò gi, shî pé banshoq lé, nungmoq eq rahá nyi tô ashî u lé taí bê nghut lhê. ²⁶ Nghut kôlháng, Ngá é myîng dông, haû Íwa nhang kat râ nghut é, hpaqchyí byi Sû nghû é, haû Chyoiyúng Woi-nyí gi, nungmoq lé, jung hkangmó mhoq byi râ eq, Ngò, nungmoq lé taí kyo bê hkyô lhunglháng, nungmoq lé lhoq pun râ nghut lhê. ²⁷ Ngò gi, nungmoq chyáng, nguínón hkyô tô to byi bê; Ngá é nguínón hkyô, Ngò, nungmoq lé byî é nghut lhê. Ngò gi, mingkan byî é dông, nungmoq lé byî é a nghut. Nungmoq é i-myt nhiklum lé, myit wui myit hke é eq gyuq kyûm é hkâdut nhâng kó.

²⁸ 'Ngò gi, ló byuq lú, nungmoq chyáng dum taû lé râ nghut lhê.' nghû, Ngò taí

é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, haû Îwâ chyáng Ngò ló râ nghut é hkyô lé, nungmoq gabú kó râ nghut lhê; hkâsu mù gâ le, haû Îwa gi, Ngá htoq je ko Sû nghut lhê. ²⁹ Haû dut é hkûn, nungmoq lumjîng kó sháng gaq nghû, ahkuî, haû a dut shimá, Ngò, nungmoq lé taî kyô é nghut lhê. ³⁰ Ahkuî mai, Ngò gi, nungmoq lé, dang myo myo wó nyô râ a nghut lo; hkâsu mù gâ le, mingkan shi é zau gi, jé lé lo nyi bê nghut ri. Haû yuq gi, Ngo lé up râ ahkáng haî a wó é sù nghut ri. ³¹ Nghut kôlhang, haû Îwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

15

Tsibiyiq Nuî Eq Akoq Pê É Hkyô

¹ Ngò gi, haû tsibiyiq nuî akýîng nghut lhê; Ngá Wa gi, tsibiyiq hkyâm yhumsîng nghut lhê. ² Yhang gi, ashi a zuî é akoq hkanmó lé, Ngá chyáng mai kyik pyám luî, ashi zuî é akoq hkanmó lé kúm gi, ashi je myo zui sháng gaq ga, shang pyám byî ri. ³ Nungmoq gi, Ngò, nungmoq lé taî é mungdang hau é yanmai, sanséng gû nghut bekô nghut ri. ⁴ Ngò má nyi nyi keq; Ngò le, nungmoq má nyi nyi râ nghut lhê. Akoq hkanmó gi, tsibiyiq nuî má nui nyi é za a nghut jáng, yhang baú ashi wó zuî é a nghut. Haû eq rajung za, nungmoq le, Ngò má nyi nyi e za a nghut jang, ashi wó zui kó râ a nghut.

⁵ Ngò gi, tsibiyiq nuî nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luî, Ngò gi, yhang má nyi nyi é nghut jáng, haû yuq gi, ashi myo myo zui râ nghut lhê; hkâsu mù gâ le, Ngò mai gang jáng, nungmoq gi, haî le a wó kut kô é nghut lhê. ⁶ Ngò má a nyi nyi é sù gi, haû dú pyâm é hui luî, kyuq shi byuq é akoq eq wuí ri; haû sù é akoq pé gi, byu pè èq guq yù mù, myihkyóm má dú kat pyâm é hui luî, nyé gyó byuq râ nghut lhê. ⁷ Nungmoq gi, Ngò má nyi nyi luî, Ngá é dang pé gi, nungmoq má bo nyi é nghut le gi, nungmoq ô nau é haî nghut kôlhang, dung keq; haû hkûn, nungmoq lé byi râ nghut lhê. ⁸ Nungmoq gi, haû ashi ga-myhó

zuî é dông, Ngá Wâ é hpungwup shingkan lé lhoq htoq shit é nghut luî, Ngá é chángzô pé nghut é hkyô lé tún shit nyi bekô nghut ri.

⁹ Haû Îwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuî, Ngá é chyitdap myit má gîng nyi keq. ¹⁰ Ngò gi, Ngá Wâ é hkunmó lé châng é nghut luî, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó râ nghut lhê. ¹¹ Nungmoq má Ngá é gabú hkyô joq nyi râ eq, nungmoq é gabú hkyô wó byîng jup râ matú, Ngò, nungmoq lé, dang shí pé taî é nghut lhê. ¹² Ngò, nungmoq lé chyitdap é su, nungmoq yhangchang chyitdap lhum keq; haû gi, Ngá é hkunmó nghut lhê. ¹³ Haû yhumsîng é luzúm wui é matú, yhumsîng é asak ap byî pyâm é chyitdap myit htoq kô é, chyitdap myit gi, ó yuq chyáng le a bò nghut ri. ¹⁴ Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wui nghut bekô. ¹⁵ Ngò gi, Ngá Wâ chyáng mai Ngò wó gyô yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghû, a wut lô e za, luzúm wui nghû wut é nghut lhê; hkâsu mù gâ le, dui-nhâng zoshâng gi, yhâng yhumsîng hpô é muzó lé a châng sé nghut ri. ¹⁶ Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gîng nyi é ashi zui râ matú hkyin masat tô é ru nghut lhê. Hau hkûn sheq, Ngá é myîng lé lang mù, haû Îwâ chyáng nungmoq haî jung dung kôle, Yhang byi râ nghut lhê. ¹⁷ Nungmoq yhangchang chyitdap lhum keq; haû gi, Ngá é hkunmó nghut lhê.

Haû Mingkan Gi, Chángzô Pé Lé A Jú É Hkyô

¹⁸ Haû mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq. ¹⁹ Nungmoq gi, haû mingkan eq sêng é bang nghut é nghut jáng, haû mingkan gi, yhang eq sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haû mingkan mai hkyin htoq yû bê nghut luî, nungmoq gi, haû mingkan eq a séng lo kô é yanmai, mingkan gi, nungmoq lé a jú é nghut ri. ²⁰ 'Dui-nhâng zoshâng gi, yhâng é yhumsîng htoq je kô é a nghut.' nghû, Ngò, nungmoq lé taî é dang pé lé

bùn nyi keq. Ngo lé lhang, yhangmoq zing-rí yù bekô nghut le gi, nungmoq lé le, zing-ri kó rã nghut lhê. Ngò mhoqshit é hkyô lé, yhangmoq cháng kô é nghut le gi, nungmoq mhoqshit é lé le, cháng kó rã nghut lhê. ²¹ Nghut kôlhang, yhangmoq gi, Ngá é mying é yanmai, nungmoq lé haú su kut kó rã nghut lhê; hkâsu mù gâ le, haú Ngo lé nhang kat é Sû lé, yhangmoq a sé kôluí nghut ri. ²² Yhangmoq lé, Ngò a lé nyo wú é nghut le gi, yhangmoq mara bò kó rã a nghut; nghut kôlhang, ahkuí gi, yhangmoq mara wó taí hkyut rã a nghut lo. ²³ Ngo lé a jú é sũ gi, Ngá Wa lé le a jú é sũ nghut ri. ²⁴ Haú ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó rã a nghut; ahkuí kúm gi, laklaí kumlhá haú pé lé yhangmoq myang nyi kôlhang, Ngò eq Ngá Wa lé a jú kô é nghut ri. ²⁵ Haú gi, 'Yhangmoq gi, jumgúyô má Ngo lé a jú kut akô nghut ri.' [☆] ga, yhangmoq é tarã má kã tô é dang lé lhoq dik é nghut ri.

²⁶ Haú Íwã chyáng mã é, Ngò nhang kat rã nghut é, Íwã mai htoq lé lo é tengmán é Woi-nyí nghut é, haú hpaqchyí byi Sũ jé lé é hkún, Ngá é hkyô lé saksé hkám byi rã nghut lhê. ²⁷ Nungmoq le, Ngò eq rahá sâng-hi mai nyi bekô nghut é yanmai, saksé hkám byi ra kó rã nghut lhê.

16

¹ Nungmoq gi, myit lingbat jowò a joq kó sháng gaq nghú, haú pé banshoq lé, Ngò, nungmoq lé taí kyo bê nghut lhê. ² Yhangmoq gi, nungmoq lé, tarajong mai hkat htoq pyám kó rã nghut lhê; ó yuq nghut kôle, yhang mai nungmoq lé sat pyâm é hkún, yhang gi, haú đông mai Garai Gasang lé dojaú nyi lhê ga myit yu é ahkyíng, gè gè yhang, jé rã nghut lhê. ³ Yhangmoq gi, haú Íwã lé le, Ngo lé le, a sé kô é yanmai, haú su kut kó rã nghut lhê. ⁴ Nghut kôlhang, nungmoq lé, Ngò sidiq byí é hkyô lé, ahkyíng jé jáng nungmoq bún nyi kó sháng gaq nghú, Ngò haú hkyô taí kyô é nghut lhê. Ngò gi, nungmoq eq rahá nghut nyi é yanmai, haú hkyô lé, hí hkún nungmoq lé a taí kyô é nghut lhê.

Chyoiyúng Woi-nyí é muzó

[☆] 15:25 Hkya-on 35:19; 69:4

⁵ Nghut kôlhang, ahkuí, Ngò gi, Ngo lé nhang kat Su chyáng ló rã nghut lhê. Nghut kôlhang, nungmoq ó yuq le, 'Nàng, hká shut ló rã lú?' ga, Ngo lé a myi kó nghut ri. ⁶ Ngò, nungmoq lé, haú hkyô pé taí kyô é yanmai, nungmoq é i-myit unghkaú má iyon hkyô byíng to bekô nghut ri. ⁷ Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè rã hkyô ru nghut lhê. Ngò ló byuq e za a nghut jáng, haú hpaqchyí byi Sũ gi, nungmoq chyáng lé rã a nghut; Ngò ló jáng sheq, Yhang lé, Ngò, nungmoq chyáng nhang kat byi rã nghut lhê. ⁸ Yhang jé lé é hkún, Yhang gi, haú mara wó é eq séng lú le, dingmán hkyô eq séng lú le, tarã jéyáng hkyô eq séng lú le, haú mingkan lé tũn shit rã nghut lhê. ⁹ Haú yubak mara wó é eq séng lú ga jang, byu pé gi, Ngo lé a lumjíng kô é yanmai nghut ri. ¹⁰ Haú dingmán hkyô eq séng lú ga jang, Ngò gi, haú Íwã chyáng ló rã nghut lú, nungmoq, Ngo lé a myàng lo kó rã nghut é yanmai nghut ri. ¹¹ Haú tarã jéyáng hkyô eq séng lú ga jang, mingkan shi é zau gi, mara byí é huí é nghut é yanmai nghut ri.

¹² Ngò gi, nungmoq lé taí rã hkyô myo myo wó ashí; nghut kôlhang, ahkuí, nungmoq wó hkâm kó rã a nghut. ¹³ Nghut kôlhang, haú tengmán é Woi-nyí jé lé é hkún, Yhang gi, tengmán hkyô lhunglhang lé shuí sé rã nghut lhê. Yhang gi, Yhâng myit đông taí rã a nghut; Yhang, wó gyô yu é hkyô lé za taí lú, dut lò rã hkyô pé lé le, nungmoq chyáng taí pyô rã nghut lhê. ¹⁴ Yhang gi, Ngò wó é lé, yù mù, nungmoq lé taí kyô é eq sé nhang é đông, Ngá é hpungwup shingkan lé hũ ló nhâng rã nghut lhê. ¹⁵ Haú Íwã wó é lhunglhang gi, Ngá é chyat nghut lhê. Hau é yanmai, haú Woi-nyí gi, Ngò wó é lé yù mù, nungmoq lé sé nhâng rã nghut lhê nghú, Ngò taí é nghut lhê.

¹⁶ Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê." gã ri.

Changzô Pê É Iyon Hkyô Gi, Gabú Hkyô Taú Dut Rã

¹⁷ Yhâng é chángzô pé ra-am gi, "'Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê.' gâ é eq 'Ngò gi, Íwã chyáng ló rã nghut é yanmai nghut lhê.' ga, Yhang taí é gi, haí jung gá nau é nghut lhê lú?" ga, rayuq eq rayuq myí lhum bum akô. ¹⁸ Hau htoq agó, yhangmoq gi, "'Adê myáng má, gâ é gi, Yhang haí jung gá nau lhê lú? Nga-nhúng gi, Yhang haí taí nau é lé a sê gyo." ga, taí lhum bum akô nghut ri.

¹⁹ Yesuq gi, yhangmoq myi naú kô é hkyô lé sê ri; hau mù, Yhang, yhangmoq lé taí é gi, "'Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê.' nghû, Ngò taí é lé, haí jung gá nau lhê laq nghû, rayuq eq rayuq myi lhum nyi akô lú?" ²⁰ Ngò, nungmoq lé teng za taí kôlé, hau mingkan gi, gabú nyi é u lé, nungmoq gi, ngaú é eq iyon yón é hui kó rã nghut lhê. Nungmoq gi, iyon yón é hui kó rã nghut lhê; nghut kôlhang, nungmoq é iyon hkyô gi, gabú hkyô taú dut rã nghut lhê. ²¹ Myiwe gi, zoshâng hkû rã nghut jáng, zohkû-nò nò rã ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, hau no hpu é hkyô lé a bun byuq lo nghut ri. ²² Hau eq rajung za, ahkuí gi, nungmoq iyon yón é ahkyíng nghut ri; nghut kôlhang, Ngò, nungmoq lé dum huí é hkûn, nungmoq gi, gabú kó rã nghut lhê; nungmoq é gabú hkyô hau lé, nungmoq chyáng mai ó yuq èq le wó yu pyám byi rã a nghut. ²³ Hauí buinyi má, nungmoq gi, Ngo lé, haí le a dung lo kó rã nghut lhê. Ngò, nungmoq lé teng za taí kôlé, nungmoq gi, Ngá myíng lang luí, Ngá Wã chyáng haí dung kôle, Yhang byi rã nghut lhê. ²⁴ Ahkuí jé shoq, nungmoq gi, Ngá myíng lé lang luí, haí le a dúng wú shi kó nghut ri. Dung keq, hauí hkûn, nungmoq myang hap yù kó rã nghut luí, nungmoq é gabú hkyô gi, byíng Jup lò rã nghut lhê.

²⁵ Ngò gi, nungmoq lé, dangtú đông hauí pé taí kyo bê nghut lhê; nghut kôlhang, Ngò gi, dangtú a chùng lô e za, hauí Íwa eq sêng é hkyô, nungmoq lé san za taí kyô é ahkyíng jé rã nghut lhê. ²⁶ Hauí buinyi

má, nungmoq gi, Ngá é myíng lé lang luí dung kó rã nghut lhê. Ngò gi, nungmoq é matú, hauí Íwã chyáng dung byi rã nghut taí nyi é a nghut. ²⁷ Hkâsu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjíng kô é yanmai, hauí Íwa yhang, nungmoq lé chyitdap é nghut lhê. ²⁸ Ngò gi, hauí Íwã chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, hauí Íwã chyáng dum taú ló rã nghut lhê." gâ ri.

²⁹ Hauí hkûn, Yesuq é chángzô pé gi, "Ahkuí, Nàng gi, dangtú a chùng é đông, san za taí kyô nyi é nghut bê! ³⁰ Nàng gi, lhunglhang lé sê é sù nghut é lé le, Nàng lé, ó yuq èq le dangmyi myi nó a rã é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjíng lhê." ga taí bum akô.

³¹ Hauí hkûn, Yesuq tũ taí é gi, "Nungmoq, ahkuí lumjíng bekô lú?" ³² Nghut kôlhang, nungmoq gi, lhoq pyo pyám é hui luí, Ngo lé baú za tô pyám to kômù, ó le ô yhùm shut ló byuq rã ahkyíng jé lo nyi bê nghut ri; ahkuí lhang jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

³³ Nungmoq gi, Ngò má nguínón hkyô wó kó sháng gaq nghû, Ngò gi, hauí hkyô pé lé taí kyô é nghut lhê. Nungmoq gi, mingkan shí má, wuítke hkyô hui kó rã nghut lhê; nghut kôlhang, myit wum lhoq kíng keq. Ngò gi, mingkan lé ung pyám bê nghut lhê." gâ ri.

17

Yesuq Kyûdûng É Hkyô

¹ Yesuq gi, hauí su ga taí é htâng má, mauhkûng shut tu wú luí, kyûdûng é gi, "Áwa ê, ahkyíng jé bê nghut ri; hauí Nung Zo gi, Nang lé hpungwup shíngkang wó hu nhâng sháng gaq, Nung Zo lé hpungwup shíngkang hú ló nhâng laq ô! ² Hkâsu mù gâ le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byù lhunglhang bang lé up rã ahkáng, Yhang lé byi tô é yanmai nghut ri. ³ Nàng za tengmán é Garai Gasang nghut é eq Nàng nhang kat é sù

Yesuq Hkrisduq lé, sê é gi, ahtum abyuq é asak nghut lhê. ⁴ Ngò gi, Nàng, Ngo lé wùn waq nhang é muzó lé lhoq pán é dông, myidàm htoq má, Náng é hpungwup shingkang lé lhoq htoq shit bê nghut lhê. ⁵ Áwa ê, haû mingkan lháng a joq shî mai, Ngò, Nàng eq rahá chôm wó é hpungwup shingkang èq, ahkuî, Náng é myoq hí má, Ngo lé hpungwup shingkang dan hu nhâng laq.

Chángzô pé matú, Yesuq kyûdung byî é hkyô

⁶ Mingkan mai, Nàng, Ngo lé hkyin htoq yû byî é bang lé, Ngò gi, Náng é myìng lhoq htoq shit bê nghut lhê. Yhangmoq gi, Náng é byu pé nghut bekô; Nàng gi, yhangmoq lé, Ngá é loq má ap byi bê nghut luî, yhangmoq gi, Náng é dang lé châng kut bekô nghut ri. ⁷ Nàng, Ngo lé byî é lhunglháng gi, Náng chyáng mâ é nghut é lé, ahkuî, yhangmoq sé bekô nghut ri. ⁸ Hkâsu mù gâ le, Nàng, Ngo lé byi kat é mungdang pé lé, Ngò, yhangmoq lé byi bê nghut luî, yhangmoq gi, haû pé lé hap yù bekô nghut ri; Ngò gi, Náng chyáng mai lé é sù nghut é lé le, yhangmoq hkyak sê akô; Nàng, Ngo lé nhang kat é hkyô lé le, yhangmoq lumjìng bekô nghut ri. ⁹ Ngò gi, yhangmoq é matú kyûdung byî lhê. Ngò gi, haû mingkan byu pé é matú dung byi nyi é a nghut; Nàng, Ngo lé ap byi tô é bâng é matú sheq dung byi nyi é ru nghut lhê; hkâsu mù gâ le, yhangmoq gi, Náng é byu pé nghut akô. ¹⁰ Ngò wó é lhunglháng gi, Náng é chyat nghut mù, Nàng wó é lhunglháng le, Ngá é chyat nghut lhê. Haû mù, Ngò gi, yhangmoq má hpungwup shingkang hú é hui bê nghut lhê. ¹¹ Ngò gi, Nàng chyáng lò râ nghut lhê mù, mingkan htoq má nyi nyi râ a nghut lo; nghut kôlhang, yhangmoq gi, mingkan htoq má nyi nyi shirâ nghut lhê; chyoyíung é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, haû Náng myìng é a-tsam èq yhangmoq lé upzúng nyi aq. ¹² Ngò gi, yhangmoq eq rahá nghut nyi é u lé, yhangmoq lé upzúng bê nghut luî, Nàng, Ngo lé byî é myìng hau èq, yhangmoq lé rago zúng bê nghut lhê. Haû Chyúmdang lhoq dik sháng gaq ga,

haû bang mâ é htên byoq hui râ sù mai lai luî, ó yuq le a byuq byuq é nghut lhê.

¹³ Ngò gi, ahkuî, Náng chyáng lò râ nghut bê; nghut kôlhang, Ngá é gabú hkyô gi, yhangmoq chyáng byíng jup sháng gaq nghû, Ngò gi, haû pé lé mingkan má tai é nghut lhê. ¹⁴ Ngò gi, yhangmoq lé, Náng é mungdang byi bê nghut lhê; haû mingkan gi, yhangmoq lé a jú nghut ri; hkâsu mù gâ le, Ngò gi, mingkan mâ é a nghut é su, yhangmoq le, mingkan mâ é a nghut kô é yanmai nghut ri. ¹⁵ Ngò kyûdung é gi, Nàng, yhangmoq lé mingkan mai shuí htoq yû râ matú dúng é a nghut, haû agè ashop su chyáng mai, yhangmoq lé upzúng yû râ matú sheq dúng é ru nghut lhê. ¹⁶ Ngò gi, mingkan mâ é a nghut é su, yhangmoq le, mingkan mâ é a nghut kó. ¹⁷ Yhangmoq lé, haû tengmán hkyo èq lhoq sân-yúng yû laq; Náng é mungdang gi, tengmán hkyô nghut ri. ¹⁸ Nàng, Ngo lé, mingkan má nhang hâng kat é su, Ngò le, yhangmoq lé, mingkan má nhang hâng kat é nghut lhê. ¹⁹ Yhangmoq lé, tengmán hkyô má wó lhoq sân-yúng yû kó sháng gaq nghû, Ngò gi, yhangmoq é matú, yhumsing gùng lé lhoq sân-yúng yu é nghut lhê.

Lumjìng Bang Lhunglhâng É Matú, Yesuq Kyûdung Byî É Hkyô

²⁰ Ngò gi, yhangmoq é matú baú za kyûdung byî é a nghut; Yhangmoq é danglu é yanmai, Ngo lé lumjìng kó râ bâng é matú le, Ngò kyûdung byî é nghut lhê. ²¹ Haû mù, yhangmoq banshoq bang gi, rading ralhùum za dut nyi kó sháng gaq. Haû mingkan gi, Nàng, Ngo lé nhang kat é hkyô lé wó lumjìng sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq. ²² Ngá hpe gi, ragùng za nghut é su, yhangmoq le, rading ralhùum za dut nyi kó sháng gaq nghû, Ngò gi, Nàng, Ngo lé byî é hpungwup shingkang lé, yhangmoq lé byi bê nghut lhê. ²³ Nàng, Ngo lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, haû mingkan wó sé râ matú, yhangmoq gi, gumjup shoq rading ralhùum za wó dut kó sháng gaq nghû, Ngò gi, yhangmoq má nyi nyi luî, Nàng gi, Ngò má nyi nyi é nghut lhê.

²⁴ Âwa ê, haû mingkan lháng a joq shi mai, Nàng, Ngo lé chytidap luî byi tô é hpungwup shingkan haû lé, Nàng, Ngo lé byi tô é bang, wó myàng kó rà matú le, Ngò nyi é jang má, Ngò eq rahá wó nyi kó rà matú le, Ngò ô nau ri.

²⁵ Dingmán é Âwa ê, haû mingkan gi, Nang lé a sé kôlhang, Ngò gi, Nang lé sê lhê; Nàng, Ngo lé nhang kat é hkyô lé gi, yhangmoq sé akô nghut ri. ²⁶ Nàng, Ngo lé chytidap é chytidap myit gi, yhangmoq má wó joq nyi rà matú le, Ngò gi, yhangmoq má wó nyi nyi rà matú le, yhangmoq lé, Ngò, Nang é hkyô sé nhâng bê nghut luî, xoq mù sé nhang nyi shirâ nghut lhê." gâ ri.

18

Yesuq Chyup Yû Huî É Hkyô

Mht 26:47-56; Mrk 14:43-50; Luk 22:47-53

¹ Yesuq gi, haû su ga kyûdûng é htâng má, Yhâng é chángzô pé eq rahá, Kedron wuîhkung mai lai byit dap ló luî, haû hpoq má joq é hkyâm ralhú má wang e akô nghut ri.

² Hkyâm haû gi, Yesuq eq Yhâng é chángzô pé lhaq hui hui kut é jowò nghut é yanmai, haû Yesuq lé ap pyám rà sù Yudaq le sê ri. ³ Haû mù, Yudaq gi, haû hkyangjong agyi pé eq Hparishe pé chyáng mai nhang kat é noqkuq yhûm zúng bang ra-am eq gyezo rajùm lé, haû jowò shut shuí wang lé lo ri. Haû bang gi, myihu, myibung eq shâm lhâm pé chung lé lo akô.

⁴ Yesuq gi, Yhang má dut lò rà hkyô lhunglháng lé sé gû nghut mù, htoq ê luî, yhangmoq lé, "Nungmoq, ó yuq lé ho akô lhú?" ga myî ri.

⁵ Haû hkûn, yhangmoq gi, "Nazaret wà byù Yesuq lé ho lhê." ga tû taí kôjáng, Yesuq gi, "Ngò gi, haû yuq nghut lhê." ga taí ri. (Yesuq lé ap pyám sù Yudaq le, yhangmoq eq rahá yap tô ri.) ⁶ "Ngò gi, haû yuq nghut lhê." ga Yesuq taí kat é hkûn jáng, yhangmoq gi, nungzut zut mù, myigùng má leng leq ló bum akô nghut ri.

⁷ Yhang gi, "Nungmoq, ó yuq lé ho akô lhú?" ga, yhangmoq lé dum myî kat jáng, yhangmoq gi, "Nazaret wà byù Yesuq lé ho lhê." ga taí akô.

⁸ Haû hkûn, Yesuq gi, "Ngò gi, haû yuq nghut lhê nghû, nungmoq lé taí kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tû taí ri. ⁹ Haû gi, "Nàng, Ngo lé byi tô é bang rayuq le lháng, Ngò, a lhoq hpyuq pyám." ga, Yhang taí tô é dang dik rà matú nghut ri.

¹⁰ Haû hkûn, Simun Petruq gi, shâm wun tô é nghut luî, shâm shê mù, haû hkyangjong mó é dui-nhâng zôshang é loqyo nohkyap lé zân hpyit kat byi ri. (Dui-nhâng zoshâng haû yuq é myìng gi, Malhku gâ ri.)

¹¹ Haû mù, Yesuq gi, Petruq lé, "Náng é shâm lé, shambyâng má xâng pyám aq! Haû îwa, Ngo lé byi é góm* lé, Ngò a shuq é wó nyi rà lhú?" ga taí kat ri.

Yesuq Lé, Anna Chyáng Shuí É Hkyô

Mht 26:57-58; Mrk 14:53-54; Luk 22:54

¹² Hau htâng, gyezo haû jûm eq yhangmoq é gyezau hpó, Yudaq byu pé é ming-suwún wuí gi, Yesuq lé chyup yû mù, tuí akô nghut ri. ¹³ Yhangmoq gi, haû zân má é hkyangjong mó Kayahpaq é yhâng-tsa Anna chyáng hí, Yhang lé shuí ló akô nghut ri. ¹⁴ Kayahpaq gi, byu pé é matú rayuq shí hkám byi le je gè rà nghut lhê ga, haû Yudaq byu pé lé hpaqchyî byi é sù yuq nghut ri.

Yesuq Lé, Petruq Sâng-hi Dam He-ngik Pyâm É Hkyô

Mht 26:69-70; Mrk 14:66-68; Luk 22:55-57

¹⁵ Simun Petruq eq gotû chángzo rayuq gi, Yesuq htâng châng e ló akô nghut ri. Gotû chángzo haû yuq gi, hkyangjong mó lé rago sê lhê nghut mù luî, hkyangjong mó é yhumwàng hkaû shut, Yesuq é htâng má châng wang ló ri. ¹⁶ Petruq kúm gi, hkúmdong shinggan má láng yap tô ri. Haû hkyangjong mó lé rago sê é sù, gotû chángzo haû yuq gi, taû htoq ló mù, hkum zúng é myiwe myhí lé taí luî, Petruq lé shuí hâng yu ri.

¹⁷ Haû hkûn, haû hkum zúng é myiwe myhí gi, Petruq lé, "Nàng gi, haû yuq é chángzô pé mâ é rayuq a nghut lhú?" ga myi jáng, yhang gi, "Ngò a nghut." ga tû taí ri.

* 18:11 Góm lé shuq gâ é gi, jamjau hui rà eq shí hkám rà lé, taí nau é nghut lhê.

¹⁸ Haú u lé, gyoq é yanmai, dui-nhâng zoshâng wuì eq noqkuq yhûm zúng bang gi, yhangmoq gyoq gâng râ matú myigyê eq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

Yesuq Lé, Hkyangjong Mó Myî Choq Wú É Hkyô

Mht 26:59-66; Mrk 14:55-64; Luk 22:66-71

¹⁹ Haú u lé, haú hkyangjong mó gi, Yesuq lé, Yhâng é chángzô pê hkyô eq Yhâng mhoqshit é hkyô eq séng luí myî ri.

²⁰ Haú hkûn, Yesuq gi, "Haú mingkan htoq má, Ngò, de de taí bê nghut lê. Ngò gi, haú Yudaq byu pé banshoq bang chôm zîng é, tarajong pé má le, noqkuq yhûm má le, ayang mhoqshit é nghut lê. Ngò gi, haq zaú luí taí é hkyô haí le a joq. ²¹ Nàng, haí mù Ngo lé myi lê lú? Haú, Ngò taí é lé wó gyô é bang lé myi aq; Ngò haí taí é hkyô lé, yhangmoq gè gè sê akô nghut ri." ga tû taí ri.

²² Yesuq haú su ga taí jáng, haú nàm má nyi tô é noqkuq yhûm zúng sù rayuq gi, Yhang lé pyuq kat luí, "Hkyangjong mó lé wá, Nàng, haú su nghû dang tû lê lú?" ga taí ri.

²³ Haú hkûn, Yesuq gi, "Ngò taí shut é nghut le gi, shut é hkyô lé saksé tûn shit aq. Nghut kôlhang, Ngò gi, têng é dông ru taí le nhîng, nàng, haí mù Ngo lé pyuq lê lú?" ga tû taí ri. ²⁴ Hau htâng, Anna gi, Yhang lé tuí to gù, haú hkyangjong mó Kayahpaq chyáng dé kat nhang ri.

Yesuq Lé, Petruq Xoq He-ngik Pyâm É Hkyô

Mht 26:71-75; Mrk 14:69-72; Luk 22:58-62

²⁵ Haú Simun Petruq gyoq gang yap tô é hkûn, "Nàng gi, Yhâng é chángzô pé má é rayuq a nghut lú?" ga, yhang lé myi kôjáng, yhang gi, "Ngò a nghut." ga, dum he pyâm ri.

²⁶ Haú Petruq eq nohkyap zân hpyit pyám byí é huí su é buinùm nghut é sù, haú hkyangjong mó é dui-nhâng zoshâng rayuq gi, yhang lé, "Haú hkyâm má, nàng, Yhang eq rahá nghut nyi é lé, ngò a myang é su ngam lê lú?" ga taí ri. ²⁷ Haú hkûn, Petruq gi, xoq he pyám ri; haú u yhang, woq tûn bê nghut ri.

Pilat É Myoq Hí Má, Yesuq Jé Nyi É Hkun Lê Hkyô

Mht 27:1-2, 11-14; Mrk 15:1-5; Luk 23:1-5

²⁸ Hau htâng, yhangmoq gi, Yesuq lé, Kayahpaq chyáng mai, haú mauzau hpô é yhûmwàng shut shuì e ló akô. Haú u gi, napsûn noq ashî nghut ri. Yhangmoq gi, agot a-û a dut e za, htûngli dông Lhoqlhai Poì lé wó zo râ matú, yhúmhaú má a wàng kó nghut ri. ²⁹ Haú mù luí, mauzau Pilat gi, yhangmoq chyáng htoq ê mù, "Shí yuq lé, nungmoq hai mara hûn nau akô lú?" ga myî ri.

³⁰ Haú hkûn, yhangmoq gi, "Shí yuq, a ge é muzó kut é a nghut le gi, Yhang lé, náng é loq má ngamoq lé ap byi râ a nghut." ga tû taí akô.

³¹ Pilat gi, "Yhang lé, nungmoq yhang shuì ló mù, nungmoq é tarâ dông ló jéyáng keq." ga taí jáng, haú Yudaq byu pé gi, "Nghut kôlhang, ngamoq gi, ó yuq lé sat râ ahkáng le a wó é nghut lê." ga tû taí akô nghut ri. ³² Haú su dut é hkyô gi, Yesuq, Yhang hká dông shî râ ga taí é dang lé lhoq dik râ matú nghut lê.

³³ Haú mù, Pilat gi, yhúmhaú má taú wang ló mù, Yesuq lé wut yù luí, "Nàng gi, Yudaq byu pé é hkohkâm nghut lê lú?" ga myî ri.

³⁴ Haú hkûn, Yesuq gi, "Haú gi, náng é myit dông taí é nghut lê lú? A nghut jáng, góbang mai, nang lé, Ngá é hkyô taí kyo luí nghut lê lú?" ga taú myî ri.

³⁵ Pilat gi, "Ngò gi, Yudaq byù nghut lê lú? Haú Náng é byù myû eq Náng é hkyangjong agyi pé sheq, Nang lé, ngá loq má ap byí é ru nghut lê. Nàng gi, haí kut é nghut lê lú?" ga dum myî ri.

³⁶ Haú hkûn, Yesuq gi, "Ngá é mingdán gi, mingkan shî eq a séng. Mingkan shî eq séng é ru nghut le gi, haú Yudaq byu pé, Ngo lé a wó chyup yu lo shoq, Ngá é dui-nhâng zoshâng wuì, Ngo lé chôm hung yù kó râ nghut lê. Nghut kôlhang, Ngá é mingdán gi, mingkan shî eq a séng é ru nghut lê." ga taí ri.

³⁷ Haú mù, Pilat gi, "Haú jáng, Nàng gi, hkohkâm nghut bê lú?" ga myi jáng, Yesuq gi, "Ngo lé, hkohkâm nghut lê ga, nàng taí nyi é jô ri. Gè gè ga jáng, Ngò gi, hau é yanmai hku lé lo é sù nghut lê; haú tengmán hkyô lé saksé hkám râ matú, Ngò,

mingkan htoq má jé lé é nghut lhê. Haú tengmán hkyô eq sêng é sù ó yuq le, Ngá é dang lé gyô ri." ga tù taí ri.

³⁸ Haú hkûn, Pilat gi, "Tengmán hkyô gâ é gi, haí jung lhu?" ga myí ri. Yhang gi, haú su ga myí luí, haú Yudaq byu pê chyáng dum htoq ê mù, "Shí yuq chyáng mara hûn râ hkyô, ngò a myàng nghut ri. ³⁹ Nghut kôlhang, haú Lhoqlhai Poí u lé, nungmoq é matú, ngò, htóng byû rayuq nhang htoq kat byi byi kut é htung, nungmoq wó akô. Haú mù, 'Yudaq byu pê é hkohkâm' lé, nhang htoq kat byi râ lé, nungmoq ô nau akô lhu?" ga myí ri.

⁴⁰ Haú hkûn, yhangmoq gi, "Haú yuq lé a nghut! Barabaq lé sheq nhâng byi aq." ga, garû kat akô. Barabaq gi, damyaq nghut ri.

19

Yesuq Lé, Tapzîng Má Jén Sat Râ Matú Doqdân É Hkyô

Mht 27:15-31; Mrk 15:6-20; Luk 23:13-25

¹ Haú mù luí, Yesuq lé lêng she yù mù, nhuq bat râ matú, Pilat hkunmó hkyô ri.

² Haú gyezô pé gi, zujanmaú saí yù kôluí, Yesuq é ulhum má tsung byi kômù, Yhang lé, buhîng nè hut byí akô nghut ri. ³ Hau htâng, yhangmoq gi, Yhâng chyáng dum huí ê ê kut luí, "Yudaq byu pê é hkohkâm ê! Chyung hîng xê hîng nyí sháng gaq ô!" ga taí kômù, Yhâng é myoqdong má pyuq byí akô nghut ri.

⁴ Pilat gi, haú Yudaq byu pê chyáng radàm dum htoq ê mù, "Wú keq, shí yuq chyáng mara hûn râ hkyô, ngò a myang é lé nungmoq sé sháng nghû, Yhang lé, ngò nungmoq chyáng shuí htoq lé byí lhê." ga taí ri. ⁵ Yesuq gi, haú zumuq tsung tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga taí ri.

⁶ Haú hkyangjong agyi pé eq yhangmoq é noqkuq yhûm zúng bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garû bum akô.

Nghut kôlhang, Pilat gi, "Nungmoq shuí yù mù, tapzîng má jén sat keq. Ngò gi, Yhâng chyáng mara hûn râ hkyô a myàng." ga tù taí ri.

⁷ Haú hkûn, haú Yudaq byu pé gi, "Ngamoq chyáng tarâ rahkat joq lhê; tarâ haú

dông ga jang, Yhang gi, shí gíng bê nghut ri; hkâsu mù gâ le, Yhang gi, Garai Gasâng é Yhangzo haú nghut lhê gâ ri." ga xoq taí akô.

⁸ Pilat gi, dang haú lé wó gyo jáng, je gyô gyuq luí, ⁹ yhúmhkaú shut dum wang ló mù, Yesuq lé, "Nàng, hkâmâ é sù nghut lhê lhu?" ga myí ri. Nghut kôlhang, Yesuq gi, dang rahkun lhang a tù taí byi nghut ri. ¹⁰ Haú hkûn, Pilat gi, "Nàng, ngo lé a tù taí kut lhê lhu? Ngò gi, Nàng lé, wó lhoq lhut kat é eq tapzîng má wó jén sat pyâm é ahkáng wó sù nghut é lé, Nàng a sé lhu?" ga myí ri.

¹¹ Yesuq gi, "Nàng lé, haú ahtoq mai ahkáng byí e za a nghut le gi, nàng, Ngo lé haí kut râ a-tsam le wó râ a nghut. Haú mù luí, Ngo lé, náng é loq má ap byí é sù gi, mara je bo é nghut lhê." ga tù taí ri.

¹² Haú hkûn mai, Pilat gi, Yesuq lé lhoq lhut kat byi nau nyí bê nghut ri. Nghut kôlhang, haú Yudaq byu pé gi, "Nàng, haú yuq lé nhang pyâm é nghut jáng, nàng gi, hkoséng Kehtaq é luzúm a nghut lo; yhumsing gùng lé, hkohkâm gâ é sù gi, hkoséng Kehtaq eq shai lhûm é sù nghut lhê." ga, ru jâng garû nyí bum akô nghut ri.

¹³ Haú lé wó gyo jáng, Pilat gi, Yesuq lé shuí htoq ê mù, Hebre myíng dông Gabahta gâ é Luqgok hkâng myhang to jang nghu é jowò mâ é tarâ jéyáng tanghkuq má zung tô ri. ¹⁴ Haú u gi, Lhoqlhai Poí é matú, Hên Lajâng é Buinyí nyí-káng raxe í hkyíng nghut ri.

Pilat gi, haú Yudaq byu pé lé, "Nungmoq é hkohkâm lé wú keq." ga taí ri.

¹⁵ Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akô.

Haú hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lhu?" ga myí jáng, haú hkyangjong agyi pé gi, "Haú hkoséng Kehtaq mai lai luí, gotû hkohkâm ngamoq a wó." ga, tù taí akô nghut ri.

¹⁶ Hau htâng má, Pilat gi, Yesuq lé tapzîng má jén sat pyám râ matú, yhangmoq é loq má ap byí kat bê nghut ri. Haú mù luí, yhangmoq gi, Yesuq lé shuí ló bekô nghut ri.

*Tapzîng Má Jén Pyâm É Hkyô**Mht 27:32-44; Mrk 15:21-32; Luk 23:26-43*

¹⁷ Yesuq gi, yhumsing é tapzîng lé waq mù, Hebre myíng dông Golgahta gâ é, Ugyap joq é Jowò gâ é jang má htoq jé e ri.

¹⁸ Yhangmoq gi, haú má, Yesuq lé tapzîng htoq má jén tap pyám akô; Yhang eq rahá, gotû í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.

¹⁹ Pilat le, masat laiká kâ yù luí, haú tapzîng htoq má tap tô ri. Haú má gi, "YUDAQ BYU PÊ É HKOHKÂM, NAZARET WÀ BYÛ YESUQ" gâ tô ri. ²⁰ Yesuq lé jén tô é jowò gi, myuq eq chyâng lhûm é htoq agó, haú masat laiká gi, Hebre dông le, Latin dông le, Grik dông le, kâ tô é yanmai, haú Yudaq byu pé myo myo gi, masat laiká haú lé nghap bum akô nghut ri. ²¹ Haú Yudaq byu pé é hkyangjong agyi pé gi, Pilat lé, "'Yudaq byu pé é hkohkâm' nghû hkâkâ, 'Ngò gi, Yudaq byu pé é hkohkâm nghut lhê ga, Yhang taí ri.' nghû luí sheq ká aq." ga taí akô.

²² Haú hkûn, Pilat gi, "Ngò kâ é dông, ngò kâ to bê nghut lhê." ga tû taí ri.

²³ Haú gyezô pé gi, Yesuq lé tapzîng má jén tap pyâm é htâng má, Yhâng é mebu pé lé yù mù, myí hkyam gàm luí, rayuq rahkyam yu akô; haú ahte bu lé le, gàm râ dâ akô; nghut kôlhang, haú gi, hkyupshi a bo e za, awang mai ahpyo hpyot kut woq tô é nghut ri.

²⁴ Haú mù, yhangmoq gi, "Bu shí lé gi, a lêng cheq e za, ó yuq myang yù ang râ laq, hkyîn shosé she wú sháng." ga, rayuq eq rayuq taí lhum akô.

Haú gi,

"Yhangmoq, Ngá é mebu lé chôm gam yù kó râ; Ngá é ahtê bú é matú, hkyîn shosé shê kó râ nghut lhê."✧

gâ é Chyúmdang lé lhoq dik râ matú dut é nghut lhê. Haú mù, gyezô pé gi, haú su kut bekô nghut ri.

²⁵ Haú Yesuq é tapzîng nàm má gi, Yhângnu, Yhângnú é yhanggu byizo eq, Klopa é yhangmyi Mariq eq Magadalaq wà má é Mariq pé, yap tô bum akô. ²⁶ Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng,

Yhâng nu lé, "Ânu ê* nung zo lé wú aq." ga taí mù, ²⁷ chángzo haú lé le, "Náng nu lé wú aq." ga taí ri. Haú hkûn mai, chángzo haú yuq gi, Yesuq é yhângnu lé, yhâng é yhûm shut shuí ló bê nghut ri.

*Yesuq Soqkâng Byit É Hkyô**Mht 27:45-56; Mrk 15:33-41; Luk 23:44-49*

²⁸ Hau htâng, Yesuq gi, ahkuí, muzó bàn bê nghut é lé sé luí, haú Chyúmdang lhoq dik râ matú, "Ngò, wuí shit ri." ga taí ri. ²⁹ Haú má, tsibiyiq wing chyîn rayambú joq tô ri; haú mù, yhangmoq gi, wuímaù lé tsibiyiq wing chyîn haú má jum yù luí, jàm-yang ahpyo má tuí tap mù, Yhâng é nhutwuí jé shoq yhun byí akô nghut ri. ³⁰ Yesuq gi, tsibiyiq wing chyîn haú lé shuq yù mù, "Mû bàn bê." ga taí ri. Yhang, haú su ga taí eq yhang, ulhum nghuq ló mù, kâng byit bê nghut ri.

³¹ Htang nyí gi, ahkyak é Bánno buinyì nghut luí, haú nyí gi, Hên Lajang Buinyì nghut ri. Haú mù, Yudaq byu pé gi, Bánno buinyì má, mâng pé lé tapzîng htoq má a joq to nhâng naù kô é yanmai, hkyí pé lé bat hkyuí pyám mù, mâng pé lé yù hkyô pyám nhâng râ matú, Pilat chyáng dúng tôngbán akô. ³² Haú mù luí, gyezô pé gi, lé mù, Yesuq eq jén hui su nhik mâ é, rayuq é hkyí lé hí bat hkyuí pyám mù, rayuq é hkyí lé dum bat hkyuí pyám akô nghut ri. ³³ Nghut kôlhang, yhangmoq gi, Yesuq chyáng jé é hkûn, Yhang shi to lánng bê nghut é lé myàng kômù, Yhâng é hkyí lé a bat hkyui byi kó nghut ri. ³⁴ Nghut kôlhang, gyezo rayuq gi, Yesuq é namcham má lham eq htaú kat byi jáng, radá dâm sui eq wuí yui htoq lo ri. ³⁵ Haú lé myàng é sù gi, saksé hkâm byí ri; yhâng saksé hkâm é hkyô gi, tengmán ri. Haú yhang taí kyô é hkyô gi, têng é lé, yhang sé mù, nungmoq le wó lumjínng kó sháng gaq ga, saksé hkâm byí é nghut ri. ³⁶ Haú hkyô pé dut é gi, "Yhâng é showui rahkat lháng a lhoq hkyui râ nghut lhê."✧ gâ é Chyúmdang haú lhoq dik râ matú nghut lhê. ³⁷ Chyúmdang gotû ralhumm má le, "Yhangmoq eq htau htông é sù lé, yhangmoq tu wú kó râ nghut lhê."✧ gâ é bo tô ashí nghut ri.

✧ 19:24 Hkya-on 22:18 * 19:26 Ânu ê, gâ é lé, Grik dông gi, "myiwe myhí ê" ga bo tô é nghut lhê. ✧ 19:36 Htoq Ló 12:46; Gyung So 9:12; Hkya-on 34:20 ✧ 19:37 Zhk 12:10

Yesuq Lé, Myhup Yhum É Hkyô

Mht 27:57-61; Mrk 15:42-47; Luk 23:50-56

³⁸ Hau htâng, Yesuq é chángzo dut nyi é Aramahti myuq byû Yosep gi, haû Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat èq ahkáng byî kat jáng, yhang gi, gungsôm haû lé, lé yu ló bê nghut ri. ³⁹ Yhang gi, hí hkûn, myín lé, Yesuq lé ê huí é sù, Nikodema eq rahá lé é nghut ri; Nikodema gi, mura eq achyo nyhô tô é namngón jung sum xê joí kô yu lé ri. ⁴⁰ Yhangnhik gi, Yesuq é gungsôm lé yù mù, Yudaq byu pê é mâng yhum htông eq rajung za, namngón jung eq rahá, pán yúng èq htup yup to byî akô. ⁴¹ Haû Yesuq lé tapzîng má jén sat pyâm é jowò nàm má, hkyâm ralhum joq ri; ó yuq lé le a lheq wú shî é, lup sik ralhum hkyâm hkaû má joq tô ri. ⁴² Haû nyí gi, Yudaq byu pê é Hên Lajang Buinyi nghut é yanmai le, lup haû le chyâng é yanmai le, yhangnhik gi, Yesuq lé, haû má é lheq tô akô nghut ri.

20

Lup Akôm

Mht 28:1-10; Mrk 16:1-8; Luk 24:1-12

¹ Bánno buinyi htâng, napsûn noq le mau a bó shimá, Magadalaq wà mâ é Mariq gi, haû lup má ê jé le, lup hkum mâ é luqlong huí hpyuq to lánng é lé myang ri. ² Haû mù, yhang gi, Simun Petruq eq Yesuq chyitdap é chángzo góyuq chyáng dín jé ló mù, "Haû Yhumsîng lé, lup mai yu htoq ló byuq bekô; hkâmá ê kat to kô é lé, ngamoq a sé." ga tái ri.

³ Haû mù, Petruq eq chángzo haû gi, lup shut e ló akô. ⁴ Yhangnhik í yuq é dín akô; nghut kôlhang, chángzo haû gi, Petruq htoq má wó dín luí, lup má hí dín jé e ri. ⁵ Haû mù, yhang gi, ahkaû shut ngóm wú kat é hkûn, haû pán yúng htui leq tô é lé myang ri; nghut kôlhang, yhang gi, a wang ê nghut ri. ⁶ Hau htâng, Simun Petruq gi, châng jé luí, lup hkaû shut wang e ri; haû hkûn, yhang gi, haû má pán yúng htui joq tô é lé le, ⁷ haû Yesuq é ulhum má htup é panchoq lé le, myang ri. Panchoq haû gi, pán yúng htui eq rahá a nghut e za htui jup leq tô ri. ⁸ Haû lup má hí jé é chángzo le, ahkaû má wang ê luí, myàng jáng, lumjîng bê nghut ri. ⁹ (Yesuq gi, shi é mai dum dui

toq lô râ nghut lhê ga bo tô é Chyúmdang lé, yhangnhik gi, a sê gyo shi kó nghut ri.)

¹⁰ Hau htâng, haû chángzô nhik gi, yhum taû ló bekô nghut ri.

Magadalaq Wà Mâ É Mariq Lé, Yesuq Htoq Shit É Hkyô

Mrk 16:9-11

¹¹ Nghut kôlhang, Mariq gi, lup shinggan má ngau yap tô ri. Yhang gi, ngàu uchyang lup hkaû má ngóm wú kat ri. ¹² Haû hkûn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyî htâng shut rayuq, umhtúng shut rayuq, zung to kô é lé, myang ri.

¹³ Yhangnhik gi, "Myiwe myhí ê, nàng, haû mù ngau nyi lhê lhú?" ga myi kôjáng, yhang gi, "Ngá é Yhumsîng lé yù ló hpyuq kôluí, Yhang lé hkâmá ló lheq to kô é lé, ngò a sê é yanmai nghut lhê." ga tái ri. ¹⁴ Haû su ga luí, yhang, lhing wú kat é hkûn, Yesuq yap tô é lé myàng kôlhang, Yesuq nghut é lé yhang a wú sé nghut ri.

¹⁵ Yesuq gi, "Myiwe myhí ê, nàng, haû mù ngau nyi lhê lhú? Nàng gi, ó yuq lé ho wún lhê lhú?" ga myi jáng, yhang gi, hkyâm saí zo sù su ngam pyám mù, "Sarâ ê, nàng, Yhang lé waq htot pyâm é nghut le gi, hkâmá ê lheq tô é, ngo lé tái kyo laq, ngò, Yhang lé yu ló râ." ga tái ri.

¹⁶ Haû hkûn, Yesuq gi, yhang lé, "Mariq ê" ga wut kat ri.

Mariq gi, Yhâng shut lhing mù, Hebre myíng dông, "Raboni!" ga wut kat ri. (Haû gi, "Sarâ ê" gâ é lichyúm nghut ri.)

¹⁷ Yesuq gi, "Ngo lé hkázáng shi; hkâsu mù gâ le, Ngò gi, haû Íwâ chyáng a taû doq ló shî é nghut lhê. Nàng gi, Ngá é gumang wui chyáng ló mù, yhangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lhê.' gâ ri nghû, ló tái kyo aq." ga, yhang lé tái kat ri.

¹⁸ Magadalaq wà mâ é Mariq gi, chángzô pê chyáng ló mù, "Yhumsîng lé, ngò myàng bê!" ga tái luí, yhang lé shit kat é pé lé, tái kyô ri.

Yesuq, Yhâng É Chángzô Pé Lé Htoq Shit É Hkyô

Mht 28:16-20; Mrk 16:14-18; Luk 24:36-49

¹⁹ Haû nyí, Bánno buinyi htang myín lé, haû chángzô pé gi, Yudaq byu pé lé gyuq

kô é yanmai, hkum tsing myhî pyám mù, zîng tô bum kô é u lé, Yesuq gi, lé jé mù, yhangmoq é agùng má yap to luî, "Nungmoq nguingón yuqyo nyî sháng gaq!" ga taî ri. ²⁰ Yhang gi, haû su ga taî é htâng má, yhangmoq lé, Yhâng é loq pé eq namcham lé tân shit ri. Chángzô pé gi, haû Yhumsîng lé myàng kôjáng, gyai gabú bùm bekô nghut ri.

²¹ Yesuq gi, "Nungmoq nguingón yuqyo nyî sháng gaq! Haû Íwa gi, Ngo lé nhang kat é su, Ngò gi, ahkuî, nungmoq lé nhang kat é nghut lhê." ga dum taî ri. ²² Haû su ga taî mù, Yhang gi, yhangmoq é ahtôq má soq mut luî, "Haû Chyoiyúng Woi-nyí lé hap yù keq. ²³ Ó yuq é mara pé lé nghut kôle, nungmoq hkyut byî é nghut jáng, mara haú pé gi, hkyut pyám byî é hui râ nghut lhê; nungmoq a hkyut byî é nghut jáng, mara haú pé gi, hkyut pyâm é hui râ a nghut." ga taî ri.

Htomaq Lé, Yesuq Htoq Shit É Hkyô

²⁴ Haû chángzô raxe í yuq má bo é, Zozûm le gâ é Htomaq gi, Yesuq lé jé é hkûn, haû chángzô pé eq rahá a nyi to nghut ri. ²⁵ Haû mù luî, gotû chángzô pé gi, yhang lé, "Haû Yhumsîng lé, ngamoq myàng bê." ga taî kyô akô.

Nghut kôlhang, yhang gi, yhangmoq lé, "Ngò gi, Yhâng é loq pé mâ é shamtoq zuhkô lé myàng mù, ngá é loqnyhuî èq jói wú é eq, Yhâng é namcham má, ngá é loq èq myang lap wú é za a nghut jáng, haû lé ngò lumjîng râ a nghut." ga taî ri.

²⁶ Rabat myáng jáng, chángzô pé gi, haû yhúmhkaû má dum nyi tô akô; Htomaq le, yhangmoq eq rahá nghut nyi ri. Haû hkum pé myhî to kôlhang, Yesuq gi, lé jé mù, yhangmoq é agùng má yap to luî, "Nungmoq nguingón yuqyo nyî sháng gaq!" ga taî ri. ²⁷ Hau htâng, Yhang gi, Htomaq lé, "Náng é loqnyhui, shî má lé jói mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjîng nyî aq." ga taî ri.

²⁸ Haû hkûn, Htomaq gi, "Ngá é Yhumsîng, ngá é Garai Gasang ê!" ga Yhang lé taî ri.

²⁹ Yesuq gi, yhang lé, "Nàng gi, Ngo lé myang é yanmai, lumjîng é a nghut lhú? A myàng kôlhang, lumjîng é bang gi, hkungsô wó nyi ri." ga taî ri.

³⁰ Laiká buk shî má a kê tô é limik kumlhá pé gotû myo myo lé le, Yesuq gi, Yhâng é chángzô pé hí má kut shit bê nghut ri.

³¹ Nghut kôlhang, Yesuq gi, Garai Gasâng é Yhangzo Hkrisduq nghut é lé, nungmoq wó lumjîng râ matú eq, lumjîng é yanmai, nungmoq Yhâng é myîng má asak wó kó râ matú, shí hkyô pé lé kê tô é nghut lhê.

21

Ngozo Wó Chyup Yu É Limik Kumlhá

¹ Hau htâng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô mâ é đông nghut ri. ² Simun Petruq, Zozûm le gâ é Htomaq, Galile mau Hkanaq wà mó mâ é Nahtanelaq, Zebedi é yhangzo nhik eq gotû chángzô í yuq pé gi, rahá nyi to bum akô.

³ Haû hkûn, Simun Petruq gi, yhangmoq lé, "Ngò gi, ngozo kóng ê râ." ga taî jáng, yhangmoq gi, "Ngamoq le châng lé râ." ga taî akô. Haû mù luî, yhangmoq gi, htoq ê mù, haû lhai má wàng bekô nghut ri; nghut kôlhang, haû myîn, radu lhang a wó kóng kó nghut ri.

⁴ Htang napkyó maubó lo é hkûn, Yesuq gi, wuiyàm má yap tô ri; nghut kôlhang, haû chángzô pé gi, Yesuq nghut é lé a wú sé kó nghut ri.

⁵ Yesuq gi, yhangmoq lé, "Luzúm wui ê, nungmoq, ngozo wó akô lhú?" ga, wut myi kat jáng, yhangmoq gi, "A wó." ga tâ taî akô.

⁶ Haû hkûn, Yhang gi, "Nungmoq é gùn lé, haû lhai é loqyo hkyam shut dú hkyô kat keq; haû jáng, nungmoq wó kóng yù kó râ nghut lhê." ga taî ri. Haû mù, yhangmoq gi, gùn dú hkyô kat é hkûn, ngozo lùm myô é yanmai, haû gùn lé lhang a wó lhang yù lo kó nghut ri.

⁷ Haû mù luî, haû Yesuq chyitdap é chángzô gi, Petruq lé, "Yhumsîng ru nghut ri." ga taî ri. Simun Petruq gi, "Yhumsîng ru nghut ri." gâ é lé wó gyo eq yhang, yhang gi, mebu hkyut pyâm tô é yanmai, buhîng mó lé, yhâng é gùng má baiyup yù mù, wui hkaû má byam wang lô bê nghut ri. ⁸ Haû chángzô góbang gi, wuiyàm eq ngo xê làm kê za wê é yanmai, ngozo byîng tô é gùn lé, wuiyàm shut lhai mai she jé lo akô nghut ri. ⁹ Yhangmoq gi, wuiyàm má jé dap lô kê é hkûn, myigye gyúng é myihkyóm htoq má

ngozi nyhin tô é lé le, muk ratsuí joq tô é lé le, myang akô.

¹⁰ Yesuq gi, yhangmoq lé, "Haû, ahkuî za nungmoq wó kông yu é ngozi, ra-am yù lé keq." ga taî ri.

¹¹ Haû mù, Simun Petruq gi, lhaî má doq ji luî, kô é ngozi rasho ngó xe sîm du yhang bo é gùn lé, dùng yàm má she htoq tô ri. Ngozi haû myhó myo kôlhang, gùn gi, a jeq nghut ri. ¹² Yesuq gi, yhangmoq lé, "Napzang lé zo keq." ga taî ri. Chángzô pé gi, Yhang, haû Yhumsîng nghut é lé sé kô é yanmai, ó yuq lhang, "Nàng, ó yuq nghut lhê?" ga, a wám myi kó nghut ri. ¹³ Yesuq gi, lé mù, muk lé ê yù luî, yhangmoq lé byî ri; ngozi lé le, haû su kut ri. ¹⁴ Yesuq gi, shi é mai lhoq dui toq yû huî é htâng, Yhâng é chángzô pé lé htoq shit é má, shî gi, sum dâm nghû râ dâm nghut ri.

Yesuq Eq Petruq

¹⁵ Yhangmoq bàn zô bùm kô é htâng má, Yesuq gi, Simun Petruq lé, "Yohan é yhangzo Simun ê, nàng gi, shí bang htoq má, Ngo lé teng za je chiyitdap lhê lhú?" ga myi jáng, yhang gi, "Nghut lhê; Yhumsîng ê, ngò, Nàng lé chiyitdap é hkyô lé, Nàng sê lhê." ga tû taî ri. Haû hkûn, Yesuq gi, "Ngá é sau zô pé lé, baú aq." ga, yhang lé taî ri.

¹⁶ Hau htâng, Yesuq gi, "Yohan é yhangzo Simun ê, nàng gi, Ngo lé teng za chiyitdap lhê lhú?" ga dum myi jáng, yhang gi, "Nghut lhê; Yhumsîng ê, ngò, Nàng lé chiyitdap é hkyô lé, Nàng sê lhê." ga tû taî ri. Haû hkûn, Yesuq gi, "Ngá é sau pé lé, rém aq." ga taî ri.

¹⁷ Dum radâm, Yesuq gi, yhang lé, "Yohan é yhangzo Simun ê, nàng gi, Ngo lé chiyit lhê lhú?" ga myî ri.

Haû hkûn, Petruq gi, "Nàng gi, ngo lé chiyitdap lhê lhú?" ga, yhang lé Yesuq èq sùm dam dâm taî é yanmai, yhâng myit nô luî, "Yhumsîng ê, Nàng gi, lhunglhang lé sê lhê; ngò, Nàng lé chiyitdap é hkyô lé, Nàng sê lhê." ga taî ri.

Haû hkûn, Yesuq gi, "Ngá é sau pé lé, baú aq. ¹⁸ Ngò, nàng lé teng za taî lé, nàng, zorâm nghut é hkûn gi, yhumsîng gùng yhumsîng hpyihit baíyup* yù mù, ê nau é jowò hkanmó má wó ê é nghut lhê; nghut kôlhang, nàng mang jáng gi, loq í loq lham

luî, nang lé góyuq èq hpyihit baíyup byi mù, nàng a ê nau é jowò shut shuî ê râ nghut lhê." ga taî ri. ¹⁹ (Yesuq haû su ga taî é gi, haû Petruq, hkâsu kut shi é dông mai, Garai Gasâng é hpungwup shingkan lé dan hu nhâng râ nghut é lé, taî nau é nghut ri.) Hau htâng, Yesuq gi, yhang lé, "Ngá htâng cháng aq." ga taî ri.

²⁰ Haû hkûn, Petruq gi, lhîng wú kat le, haû Yesuq chiyitdap é chángzo, yhangmoq htâng châng wún é lé myàng ri. Chángzo haû gi, hí hkûn, myinzang zô é u lé, Yesuq chyáng leq ngè mù, "Yhumsîng ê, Nang lé ap pyám râ sù gi, ó yuq lhú?" ga, myi wú é sù nghut ri. ²¹ Petruq gi, haû yuq lé myàng jáng, Yesuq lé, "Yhumsîng ê, shí yuq gi, hkâsu dut râ lhú?" ga myî ri.

²² Yesuq gi, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haî sêng lhê lhú? Nàng gi, Ngá htâng cháng aq." ga tû taî ri. ²³ Dang hau é yanmai, chángzo haû yuq a shî râ nghut lhê gâ é danglám gi, haû gumang wui chyáng byo myín to bê nghut ri. Nghut kôlhang, Yesuq gi, haû yuq a shî râ hkyô lé taî é a nghut, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haî sêng lhê lhú?" ga, taî é ru nghut lhê.

²⁴ Shí pé lé saksé hkám mù, shí pé lé kê tô é sù gi, chángzo haû yuq nghut lhê. Yhâng é saksé gi, têng é lé, ngamoq sê lhê.

²⁵ Yesuq gi, gotû muzó myo myo le kut ashî nghut ri. Muzó haû pé lhum jup lé, kê htoq yu é ru nghut le gi, kê tô é laiká buk haû pé gi, mingkan gón má lhang ngo râ a nghut nghû, ngò wó myit ri.

* 21:18 Hpyihit baíyup gâ é lichyúm gi, mebu wut luî ri ri kut tô é lé gâ lhê.

LAGYO Laiká (Acts)

Yesuq, Mauhkûng Má Shuî Yù Huî É Hkyô

¹Htohpilûq ê, Yesuq yhang hkyin yu tô é lagyô pé lé, Chyoiyúng Woi-nyí wum-o èq dang ban pying tô é htâng má, Garai Gasang yhang lé mauhkûng shut shuî yu é buinyì jé shoq, ²Yhang kut shit é hkyô pé eq, mhoqshit é hkyô pé banshoq lé, hí lhê é laiká buk má ngò kê kat bê nghut lhê. ³Yesuq gi, shí hkâm é htâng má, Yhang dui toq bê hkyô lé, lumgíng é saksé myo myô èq yhangmoq lé tân shit mù, buinyì myi xê nyí gyoro má yhangmoq chyáng lé htoq shit shit kut luí, Garai Gasâng é mingdán hkyô lé hko kyô ri. ⁴Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ ê danggidiq byî tô é chyunghuq lé láng nyí keq. ⁵Hkâsu mù gâ le, Yohan gi, wui èq wui-myhup hkám byî é nghut lhê; nghut kôlhang, nungmoq kúm gi, buinyì hkâ-myháng a myáng má, Chyoiyúng Woi-nyí mai baptisma wó hkam yù kó râ nghut lhê." gâ ri.

⁶Lagyô pé gi, Yhang eq rahá chôm zup míng tô é hkûn, Yhang lé, "Yhumsîng ê, nàng, haû Israelaq byu pé lé mingdán dum xuq byi râ gi, ahkuí yhang nghut bê lhú?" ga myí akô.

⁷Yesuq gi, "Áwa gi, Yhâng é ahkáng ayá èq kut to bê é ahkyíng yam-yoq pé lé, nungmoq sé nó a ra. ⁸Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yû mù luí, Yerusalem wà mó eq Yuda mau banshoq, Samariq mau eq maumyî htáng shoq, ngá é saksé pé dut kó râ nghut lhê." ga luí, yhangmoq lé taí ri.

⁹Dang haû ban taí é htâng má, yhangmoq wú nyi le, Yhang gi, mauhkûng shut shuî yu é hui mù, yhangmoq hí mai Yhang lé a myàng loshoq, mhut èq htup ló byuq bê nghut ri.

¹⁰Yesuq doq ló nyi é u lé, yhangmoq mauhkûng shut ru wú tsuq nyi bum ashí le, hpyu é mebu wut é byù í yuq gi, radá dâm yhangmoq nàm má htoq yap lò mù, ¹¹"Galile byu pé ê, haí mù luí mauhkûng shut wú tsuq nyi akô lhú? Nungmoq é hí mai mauhkûng shut shuî yù huî é, haû Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhê." ga taí akô.

Yudaq É Jowò Má, Mahtiaq Lé Hkyin Kat É Hkyô

¹²Hau htâng má, yhangmoq gi, Tsanlun Bùm mai, Yerusalem wà mó shut taú ló bekô.* Haú gyoro gi, Bánno buinyì má ge sô é í za wê ri. ¹³Yhangmoq jé ló kôjáng, yhangmoq nyi nyi kô é yhûm ahtoq pyâm mâ é wap shut doq ló akô; haú bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô. ¹⁴Yhangmoq lhunglhâng bang gi, myiwe wui le, Yesuq é yhângnu Mariq le, yhanggu pé le kut mù, i-myyit rahkat za kyú chôm dung dung kut nyi akô.

¹⁵Buinyì haú yoq má, Petruq gi, lumjíng é gumang gu-nhá† wui rasho í xê yuq kô zup zîng tô é gung gûng má, toq yap mù, ¹⁶"Gumang gu-nhá wui è, Yesuq lé chyup é bang lé hkyô shuî hí é sù Yudaq eq séng luí, hí hpyang Dawiq é nhut mai Chyoiyúng Woi-nyí taí tô é Chyúmdang gi, dik byuq bê nghut ri. ¹⁷Yhang gi, nga-nhúng má nghap lhôm é hui mù, hpúng sará ayá wó bê sù nghut kôlhang shí hkyô dut bê nghut ri." ga taí ri.

¹⁸(Yudaq gi, yhang kut é agè ashop é muzó mai wó é ahpau èq myigùng ratóng wui yu é htâng, haú má yhang, a-nghop dông byit gyó mù wam buq goq luí, û banshoq buq myín byuq bê nghut ri. ¹⁹Haú hkyô lé Yerusalem wà mó má nyi é lhunglhâng bang wó gyo kôjáng, myigùng haû lé yhangmoq é myíng dông, 'Akeladama' ga myhîng akô; haû gi, 'Sui myigùng', gâ é nghut ri.)

²⁰Petruq xoq taí é gi, "Hkâsu mù gâ le, Hkya-on Kungtôn Laiká má,

* 1:12 Tsanlun bùm eq Yerusalem gyoro gi, déng rawuí hkup kô we ri. † 1:15 Gumang gu-nhá gâ é lé, Grik má gi, gumang za gâ to lhê. ✧ 1:20 Hkya-on 69:25

'Yhâng é jowò chamchuyiui dut byuq sháng gaq; haú má ó le a nyi kó sháng gaq.¹✧

ga luí le, dum

'Yhang wó é ayá lé byù góyuq wó yu pyám byi sháng gaq.¹✧

ga luí le, bo tô ri. ²¹⁻²² Haú mù luí, Yohan baptisma byi hi é hkûn mai, Yesuq lé nga-nhung chyáng mai shuí yu é buinyi jé shoq, Yhumsing Yesuq nga-nhung eq rahá htoq htoq wàng wàng kut nyi é buinyi banshoq pé má, nga-nhung eq yhang zum nyi sù rayuq lé, hkyin kat râ dut ri. Haú yuq gi, Yesuq dum dui toq é hkyô lé nga-nhung eq rahá saksé dut râ sù nghut lhê." gâ ri.

²³ Haú hkûn, yhangmoq gi, Yustu ga le myhîng é, Barsabaq gâ é Yosep eq Mahtiaq nhik lé hkyin tô akô. ²⁴⁻²⁵ Haú mù, yhangmoq kyûdung kô é gi, "Byù banshoq é i-myt lé sê é Yhumsing ê, Yudaq Iskarut gi, yhang ló gíng é jowò shut ló râ ga, tô pyâm tô é yhâng é lagyo ayá é matú shí nhik mâ é nàng hkyin tô é sù lé tân shit laq ò." ga akô.

²⁶ Hau htâng, yhangmoq, byù hkyîn shosé she le, Mahtiaq chyáng ang bê. Haú mai, Mahtiaq lé gi, haú lagyo raxe rayuq má jat kat bê nghut ri.

2

Chyoiyúng Woi-nyí Jé Gyó Lo É Hkyô

¹ Penteko-ti* buinyi jé jáng, lumjîng bang banshoq gi, jowò ralhum má za, chôm zup míng nyi tô akô. ² Haú hkûn, laidun mó lo é su gâ é htê gi, byodàn ratung, mauhkûng mai mying htoq lô mù luí, yhangmoq zing tô é yhâm byíng shoq dut to bê nghut ri.

³ Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri. ⁴ Yhangmoq lhunglhâng bang gi, Chyoiyúng Woi-nyí byíng lo bùm kômù, Woi-nyí èq táí nhang é eq rajung za, laklaí dang đông nyo lo bum akô.

⁵ Haú u lé, mauhkûng ô má joq é mingdán hkanmó mâ é, tarâ hkunggâ é Yudaq byu pé gi, Yerusalem và mó má bíng nyi bum akô. ⁶ Haú mying é htê lé wó gyo kôjáng, byù rajùm rayò zîng lé lô kômù, ó le ô é myíng dông sê gyô yù kô é yanmai, maú úng-âng byuq bùm kôluí, ⁷ maú bùm uchyang táí kô é gi, "Wú keq, ahkuí dang

taí nyi é byù shí bang lhunglhâng gi, Galile byu pé chyat a nghut kó lú? ⁸ Haú nghut é wa, hkâsu mù nga-nhung ó le ô é yhumsing mau mâ é myíng dông sê gyô yu lhê lú?

⁹ Parhti, Medi, Elam mau mâ é bang eq Mesopotamiaq mau, Yuda eq Kapadokia mau, Pontuq eq Asia, ¹⁰ Hprugi eq Pamhpuli, Egutuq ming má nyi é bang eq Kuruni myuq nâm má nyi é Libya ming mâ é bang, Romaq myuq mai lé bíng nyi é Yudaq byu pé eq Yudaq noqkuq htung má lhing wang lò bang, ¹¹ Kreti zinlóng eq Arabiq mau mâ é bang, nga-nhung gi, yhangmoq hko kyô é Garai Gasâng é mauhpo muzó hkyô lé, yhumsing mau mâ é myíng dông yhang wó sê gyô yu ri-nhung." gâ ri. ¹² Yhangmoq banshoq bang gi, maú úng-âng byuq kômù, "Shí gi, haí wá nghut lhê lú?" ga le, rayuq eq rayuq myi lhum bum akô.

¹³ Nghut kôlhâng, byù ra-am gi, "Shí bang gi, í shuq wut é bang nghut akô." ga luí, táí jihpoi bum akô nghut ri.

Petruq Hko Kyô É Mungdang

¹⁴ Haú hkûn, Petruq gi, lagyo góbang raxe rayuq eq toq yap mù, htê mó èq byù haú bang lé taí é gi, "Yudaq byu pé eq Yerusalem và mó má nyi nyi é lhunglhâng bang ê, rago gyô wú keq! Ngò, nungmoq lé, shí hkyô taí kyo kôlé. ¹⁵ Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí. ¹⁶ Shí hkyô kúm gi, myiqhtoi Yoelaq taí tô é eq rajung za dut é nghut ri. ¹⁷ Yhang taí tô é gi,

'Garai Gasang ísu gâ ri: Ló htâng é buinyi pé má, Ngò Ngá é Woi-nyí lé byù lhunglhâng bâng é ahtoq má hut gyun râ nghut lhê.

Haú mù, nungmoq é yuqzo byizô pé gi, myiqhtoi htoi kó râ; nungmoq é zorâm wui gi, myoqwup shing-rán myàng kó râ; nungmoq é hpaù mâng pé gi, yhupmoq myàng kó râ nghut lhê.

¹⁸ Buinyi haú pé má, Ngá é dui-nhâng zoshâng hpô pé eq dui-nhâng zoshâng myhí pé é ahtoq má lhang, Ngò Ngá é Woi-nyí lé hut gyun mù luí, yhangmoq gi, myiqhtoi htoi kó râ nghut lhê.

✧ 1:20 Hkya-on 109:8

* 2:1 Penteko-ti gâ é gi, Lhoqlhai Poí lai é htâng ngo xê nyí jé é buinyi má, kut é poi lé gâ

lhê.

¹⁹ Ngò gi, ahtoq mauhkûng htoq má mauhpo muzó pé lé, a-ô myigùng htoq má, kumlhá pé lé, sui eq, myi eq, myihkau dùm pê èq kut mù tûn shit rã.

²⁰ Haû Yhumsing é kô hkikhkam é buinyì a jé shimá, bui gi, mauchut byuq, lhamó gi, sui dut byuq é hí dut rã nghut lhê.

²¹ Haú hkûn, Yhumsing é myìng lé lãng é bang yuq hkanmó gi, hkyi yu é hui kó rã nghut lhê. [✧]

gã ri.

²² Israelaq byu pé ê, dang shí lé gyô yù keq, nungmoq sê é eq rajung za, Nazaret wà byù Yesuq nungmoq é hí má tûn shit é, laklaí kumlhá, mauhpo muzó eq kumlhá pé gi, Yhang lé Garai Gasang nhang kat é saksé dut bê nghut ri. ²³ Shí yuq gi, Garai Gasang myit hpyit tô é hkyô eq, hí te sê é hpaqchyî dông, nungmoq chyáng ap pyâm é hui mù, nungmoq gi, agè ashop byu pê é loq èq, Yhang lé tapzîng htoq má jén sat pyám nhâng bekô nghut ri. ²⁴ Nghut kôlhang, haû shí-nò hkyô gi, Yhang lé wó hkûm zing jung a nghut é yanmai, Garai Gasang gi, Yhang lé shí-nò jamjau mó mai, lhut pyám byi luí lhoq dui toq yû bê nghut ri. ²⁵ Dawiq gi, shí yuq eq séng luí taí é má, 'Haû Yhumsîng gi, ngá é myoq hí má hkâ-nhám le nyi nyi é lé ngò myàng bê. Yhang ngá é loqyo hkyam má nyi nyi é yanmai, ngo lé wó lhoq nhún rã a nghut lo.

²⁶ Haû mù, ngá i-myt gi, ngingón nyi luí, ngá nhut shô gabú hkya-ôn nyi ri; ngá é gungdu le myit myoqbyù jowò má nyi nyi rã nghut lhê.

²⁷ Hkâsu mù gã le, nãng, ngá é woi-nyí lé mosumhkung má tô pyâm to rã a nghut.

Nãng, nãng é Chyoiyúng Sû lé bup byuq é hui nhâng rã a nghut.

²⁸ Nãng, ngo lé asak dui é hkyô sé nhâng bê. Nãng é myoq hí má, nãng, ngo lé gabú hkyô lhoq pyíng byi rã nghut lhê. [✧]

gã ri.

²⁹ Gumang wui ê, nga-nhûng é îchyí îké Dawiq kãng byit mù, myhup pyám hui bê hkyô lé le, yhang é lup gi, hkû-nyí jé

shoq nga-nhûng chyáng joq tô é lé le, ngò, nungmoq lé a gyuq a kyum wám taí lhê.

³⁰ Dawiq gi, myiqhtoi rayuq nghut é yanmai, yhang é awut ashín mã é rayuq lé, yhang é hkohkâm tanghkuq má zùng nhâng rã ga Garai Gasang byi tô é danggidiq lé sê to mù, ³¹ 'Hkrisduq† gi, mosumhkung má pyâm to a hui rã eq, Yhang é gungsho a bup byuq é za, dum dui toq ló rã nghut lhê.¹, gã é hkyô lé te sê to luí taí tô ri. ³² Garai Gasang gi, haû Yesuq lé lhoq dui toq yû bê. Ngamoq banshoq bang gi, haú hkyo é saksé pé nghut nyi ri. ³³ Haû mù, Garai Gasang gi, Yesuq lé Yhang é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shí su wó myâng, wó gyo bekô nghut ri. ³⁴⁻³⁵ Hkâsu mù gã le, Dawiq gi, mauhkûng htoq tsáng myhâng mã a doq ló wú kôlhang, yhang gi,

'Haû Yhumsîng Garai gi, ngá é Yhumsîng lé,

"Ngò, nãng é gye pé lé, nãng é hkyí nang tanghkuq kut pyám byí é hkyíng jé shoq,

Ngá é loqyo hkyam shut zung nyi shi aq." gã ri. [✧]

ga luí, taí ri.

³⁶ Hau é yanmai, Garai Gasang gi, nungmoq èq tapzîng má jén sat pyâm é haû Yesuq lé, Yhumsîng eq Hkrisduq dut nhang é hkyô, Israelaq byu pé lhunglhang bang hkyak sê nyi kó sháng gaq ô." gã ri.

Sâng-hi Lumjîng É Bang

³⁷ Yhangmoq gi, haû lé wó gyô bùm kôjáng, yhangmoq é i-myt má záng kô é nghut mù luí, "Gumang wui ê, ngamoq hkâsu kut lo rã lhú?" ga luí, Petruq eq lagyo góbang lé myî akô.

³⁸ Petruq gi, "Nungmoq yuq hkanmó myit lhîng mù, Yesuq Hkrisduq é myìng mai wui-myhup hkâm yù keq; Haû jáng, nungmoq é yubak hkyut pyám byí é hui kó rã nghut lhê. Haú hkûn, Chyoiyúng Woi-nyí gã é chyunghuq lé, nungmoq wó yû kó rã nghut lhê. ³⁹ Hkâsu mù gã le, danggidiq haû gi, nga-nhûng é Yhumsîng Garai Gasang ji yù rã bang banshoq nghut

[✧] 2:21 Yol 2:28-32 [✧] 2:28 Hkya-on 16:8-11 [†] 2:31 Grik dong Hkrisduq gã é gi, xù but hui Sû gã é lichyúm nghut mù, Hebre dong Mesaia gã é eq rajung za nghut lhê. [✧] 2:34-35 Hkya-on 110:1

é, nungmoq eq nungmoq é yhangzo yhangshû pé eq le, mau we má nyi é lhunglhâng bang eq le, sêng lhê." ga luí, yhangmoq lé taí kyô ri.

⁴⁰ Yhang gi, dang gotû myo myô èq le saksé hkâm mù, "Shî agè ashop é amyû mai wó lut htoq lo keq ô!" ga luí, yhangmoq lé lhoq pun lhoq kyîng ri. ⁴¹ Dang haû lé guq yu é bang gi, wui-myhup hkâm yu bùm kôluí, haû nyí má byù sum hkyîng kô jat wàng lo bum bekô nghut ri.

Lumjîng Bang Zùm Yap É Hkyô

⁴² Haû bang gi, lagyo pé mhooqshit é hkyô, zùm yap é hkyô, muk hpê gam é hkyô[†] eq akyû dúng é hkyô má, i-myit rahkat za chôm châng nyi akô. ⁴³ Lagyo pé kut shit é mauhpo muzó eq limik kumlhá pé myo myô é yanmai, lhunglhâng bang gi, gyuq maú nyi bum akô nghut ri. ⁴⁴ Lumjîng é lhunglhâng bang gi, rawò má za zup zîng to mù, azîng zè banshoq lé chôm chung nyi akô. ⁴⁵ Yhangmoq gi, yhumsing é sutzè pé lé, ûng pyám mù, yuq hkangmó lé, yhang râ tô é eq rajung za gàm byî akô. ⁴⁶ Yhangmoq gi, nyí wuí myit rahkat zâ èq noqkuq yhûm wàng má nyi nyi akô. Yhumsing é yhûm pé má le muk hpê gam é hkûn, ⁴⁷ Garai Gasang lé hkya-on kungtôn uchyang, gabú é eq myit huí é èq chôm zo chôm shuq nyi bum akô; byù banshoq bâng é hí má le myoqdong wó bum akô. Haû Yhumsîng gi, nyí wuí yhangmoq chyáng hkyi yù hui bang jat lò nhang ri.

3

Hkyî Hten Sû Rayuq Lé, Petruq Lhoq Gê Byî É Hkyô

¹ Ahkuí, Petruq eq Yohan gi, myinhâng zó sum hkyîng lhê é kyûdung nám má, noqkuq yhûm shut doq e ló akô. ² Haû hkûn, înú unghkaû mai hkyî hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yúnglho hkum ga myhîng é hkúmdong má nyí hkang nyí mó waq lé lô mù, lé nyhi to to kut akô. ³ Yhang gi, Petruq eq Yohan, noqkuq yhûm haû má wang e ló é lé, myàng luí, lhom dúng nyi ri. ⁴ Petruq eq Yohan kúm gi, yhang lé chôm wú tsuq to mù,

"Nga-nhik lé tu wú aq." gâ akô. ⁵ Haû mù, yhang, yhangnhik chyáng mai rajung jung wó yù râ lé myit myoqbyù luí, yhangnhik lé rago za saí wú tô ri.

⁶ Petruq kúm gi, "Ngùn, hîng gi, ngò a wó; nghut kôlhâng, ngò wó é nang lé byi lé: Nazaret wà byù Yesuq Hkrisduq é myîng mai toq sô ló aq." ga taí uchyang, ⁷ yhâng é loqyo loq má zui mù lîng toq kat ri; haû hkûn jâng, yhâng é hkyî kochang-chap pé wúm bo lò bê nghut ri. ⁸ Haû mù, yhang gi, radá dâm toq yap mù sô kat luí, so uchyang, byàm uchyang Garai Gasang lé hkya-on mù, yhangnhik eq rahá noqkuq yhûm má wang ló ri. ⁹ Yhang sô e ló nyi é eq Garai Gasang lé hkya-on kungton nyi é lé, lhunglhâng bang chôm myang akô. ¹⁰ Haû yuq gi, noqkuq yhum é Yúnglho hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luí, yhâng chyáng dut lò bê hkyo é yanmai, maú hong byuq bum akô nghut ri.

Petruq Hkô Kyô É Mungdang

¹¹ Petruq eq Yohan chyáng haû dung zo sù byî châng tô é hkûn, shiwa byu pé gi, wú maú uchyang, Sholumon jiroshut, yhangmoq chyáng dîn yán wang lé lo bum akô. ¹² Petruq haû lé myàng jâng, shiwa byu pé lé taí é gi, "Israellaq byu pé ê, shí yuq é hkyô lé haí mù luí maú nyi akô lhú? Nga-nhik é dingmán hkyô eq wum-o a-tsâm èq, shí yuq lé wó so nhang é su ngâm luí, ngá-nhik lé wú tsuq bum akô lhú? Haû dông a nghut. ¹³ Abraham, Isak eq Yakup pê é Garai Gasang, nga-nhûng é îchyí îwa pê é Garai Gasang gi, Yhâng é dui-nhâng zoshâng Yesuq lé hpungwup shingkang lhoq htoq byî é nghut ri; nungmoq kúm gi, Yhang lé sat hui shoq ga ap pyám kômù luí, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyám akô nghut ri. ¹⁴ Haû chyoiyúng dingmán é Sû lé nungmoq he-ngik pyám kômù, byù sat sù lé sheq dúng htoq yù kôluí, ¹⁵ Asak Yhumsîng lé gi, sat pyám bekô. Garai Gasang kúm gi, haû yuq lé shi é mai lhoq dui toq yù bê nghut ri; ngá-nhik gi, haû hkyo é saksé nghut nyi lhê. ¹⁶ Yesuq é myîng lé lumjîng é yanmai, haû

[†] 2:42 Muk hpê gam hkyô gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, Poído chôm zô é lé gâ lhê.

lumj́ing myit mai za, sh́i nungmoq myang é sê é sù lé wum-o lhoq pýing byi bê nghut ri; nghut bê, Yesuq lé lumj́ing é yanmai, sh́i yuq lé, nungmoq banshoq b́ang é hí má, gumjup shoq lhoq ge to byi bê nghut ri.

¹⁷ Ahkuí, gumang wuì ê, nungmoq é uphkang bang kut é su, nungmoq le haú hkyô lé a sé mù kut pyám é hkyô lé ngò sê nyi lhê. ¹⁸ Nghut kôlhang, haú hkyô gi, Garaí é Hkrisduq sh́i-nò jamjau hui râ nghut lhê ga luí, myiqhtoi banshoq bang lé hí hí mai taí nhang tô é Garai Gasang yhang, lhoq dik é nghut ri. ¹⁹ Hau é yanmai, haú Yhumsing chyáng mâ é ngu-ingón é ahkýing yàm yoq jé lô râ matú le, ²⁰ nungmoq é matú hkyin tô é Hkrisduq nghut é Yesuq lé, Yhang nhang kat byi râ matú le, nungmoq é yubak mara hkyut pyám byí é hui râ matú le, nungmoq gi, myit lhing mù Garaí Gasang chyáng lhing lò keq. ²¹ Garaí Gasang gi, a-nham pyat mai, Yhâng é chyoiyúng myiqhtoí pê é nhut mai, taí nhang to bê eq rajung za, nyi mi-nyì, joq mijoq lé asik dum saí é pyat jé shoq, Yesuq lé mauhkung htoq má nyi nhang to râ nghut lhê. ²² Hkâsu mù gâ le, Mosheq taí tô é le, 'Haú Yhumsing Garaí Gasang gi, nungmoq é yhanggu yhangmang pê chyáng mai, nungmoq é matú ngò sù é myiqhtoi rayuq pô htoq lô nhâng râ nghut lhê; haú yuq taí mitaí nungmoq gyo ra râ nghut lhê. ²³ Myiqhtoi hau é dang lé a gyo sù ó yuq nghut kôlhang, yhumsing é byù myú mai chyung hpyit pyám é hui râ nghut lhê.' ✧ gâ ri.

²⁴ Gè gè yhang, Samuelaq mai, yhâng é htang má châng pô htoq lo é myiqhtoí pé banshoq bang hko kyô lo é má le, buinyi sh́i pé eq séng mù taí to bekô nghut ri. ²⁵ Nungmoq gi, haú myiqhtoí pê é dang silí wunlí eq, Garaí Gasang mai, Abraham lé, 'Náng é awut ashin é yanmai, mingkan htoq mâ é byù myú chângjup hkungsô wó kó râ nghut lhê!' ✧ gâ é eq rajung za, nungmoq é íchyí íwâ pé eq tô tô é dang-gidiq lé wó hkam yù râ bang nghut akô. ²⁶ Garaí Gasang gi, nungmoq yuq hkangmó lé yhumsing agè ashop é hkyô mai wó lhing taú lò nhang é dông, shimân byi râ matú, Yhâng é dui-nhâng zoshâng lé pô htoq lò

nhâng luí, nungmoq chyáng hí nhang kat byi bê nghut ri." gâ ri.

4

Petruq Eq Yohan Nhik Chyup Huí É Hkyô

¹ Hkyangjông pé, noqkuq yhúm zúng é suwún hpó eq Saduke pé gi, Petruq eq Yohan shiwa byu pé lé dáng nyo nyi é hkún, htoq lé lô kômù, ² yhangnhik, shiwa byu pé lé mhoqshit é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taí nyi kô é yanmai, yhangmoq gyai yhang myit myô nyi bum akô. ³ Haú mù, yhangmoq gi, yhangnhik lé chyup yú luí, myinhtang mauchut lô bê nghut é yanmai, htang napkyó jé shoq htóng má lhung tô akô. ⁴ Nghut kôlhang, mungdang lé wó gyô yu é bang myo myo gi, lumj́ing kômù luí, yuqgè ngo hkying kô jé shoq myô jat lò bekô nghut ri.

Yudaq Byin Tú Wapdoq Má, Yhangnhik Lé Myí Jep Wú É Hkyô

⁵ Htang nyí, yhangmoq é zau wuí, suwún wuí eq tarâ sará pé gi, Yerusalem wà mó má chôm huí zup akô. ⁶ Hkyangjong mó Anna, Kayahpaq, Yohan, Alesander pé eq hkyangjong mó é amyú pé banshoq le, haú má bo tô akô. ⁷ Haú mù, yhangmoq gi, Petruq eq Yohan lé gung gung má nyhi to luí, "Nungnhik gi, haí a-tsam, ó yuq é mying mai mô sh́i lé kut akô lhú?" ga myí akô.

⁸ Haú hkún, Petruq gi, Chyoiyúng Woi-nyí bying tô é nghut mù luí, yhangmoq lé taí é gi, "Mingbyú wuì é zaugun suwún wuì ê, ⁹ hkyí hten sù sh́i yuq lé lhoq gê byí é jeju yanmai, yhang hkâsu kut lhoq ge yù huí é hkyô lé, hkú-nyí nungmoq ngá-nhik lé myí gôn wú naú kô é nghut le gi, ¹⁰ nungmoq lhunglhâng bang eq Israelaq byu pé banshoq lé sé nhâng kôlé, nungmoq eq tapzîng má jén sat pyám mù, Garaí Gasang eq shi é mai lhoq dui toq yu é, Nazaret wà byù Yesuq Hkrisduq é mying mai, sh́i yuq gi, nungmoq é hí má ísu wáng wáng zán zán yap tô é nghut ri.

¹¹ 'Yhúm saí bang nungmoq hkyin htoq pyám é luqgok gi, htungchyún mâ é ahkyak dik é luqgok dut bê.' ✧

gâ é gi, Yesuq lé taí é đông nghut ri. ¹² Hkyi yù hkyô gi, Yhang mai lai luí gotû a nyi lo, hkâsu mù gâ le, nga-nhúng hkyi yu é hui râ matú, mauhkúng a-ô má, Yhâng é myìng mai lai luí, xângzo byu pé lé byí tô é myìng gotû a joq lo é yanmai nghut ri." gâ ri.

¹³ Yhangmoq kúm gi, Petruq eq Yohan nhik a gyuq a kyum taí é lé myàng kôjáng, yhangnhik, jong a doq wú é, mayû byù za nghut é hkyô lé sé to kô é yanmai, maú nyi bum akô; nghut kôlhang, hí hpyang Yesuq eq zum wún wú sù nhik nghut é lé, yhangmoq bûn kat akô nghut ri. ¹⁴ Hau htoq agó, lhoq gê byí é hui sù le, yhangnhik eq rahá yap tô é lé, yhangmoq myàng kô é nghut mù luí, taí râ hkyô hái le a joq lo kó nghut ri. ¹⁵ Haû mù, yhangnhik lé, haû Yudaq byìn tú wapdoq* mai lhoq htoq to mù, yhangmoq rayuq eq rayuq hpyê lhum kô é gi, ¹⁶ "Shí nhik lé hkâsu kut lé gè râ lú? Yhangnhik kut shit e laklaí kumlhá gi, Yerusalem và mó má nyi é lhunglhang bâng é hí má de za dut bê nghut é yanmai, nga-nhúng haû lé a wó hê lo nghut ri. ¹⁷ Nghut kôlhang, mingbyû wui má shí hkyô je riyhang a byo myín ló sháng gaq, ahkuí mai myìng haû lé lang mù ó lé le a taí kyo lo râ matú, yhangnhik lé kyuq hkúm pyám sháng." gâ bum akô.

¹⁸ Haû mù, yhangnhik lé dum wut hâng yù luí, Yesuq é myìng lé lang mù, hái le hkâtaí, hkâ-mhoqshit kó ga chôm hkúm akô. ¹⁹ Petruq eq Yohan kúm gi, "Garai Gasâng é mungdang lé gyo râ htoq má, nungmoq é dang gyo le gi, Garai Gasâng é hí má gè râ, a gè râ lé, nungmoq yhang doqdân yù keq. ²⁰ Nga-nhik kúm gi, myàng yù, wó gyô yù bê é hkyô pé lé, a taí é, a wó nyí nghut lhê." ga luí, yhangmoq lé dum tú taí akô.

²¹ Haú hkûn, yhangmoq gi, dut laí lò bê hkyô é yanmai, shiwa byu pé Garai Gasâng lé hkya-on kungton nyi bùm kôluí, yhangnhik lé dâm byi râ hkyô a myàng kô é nghut mù luí, yhangnhik lé dum tân kyuq luí nhang pyám bekô nghut ri. ²² Hkâsu mù gâ le, haû laklaí kumlhá đông lhoq gê byi huí é sù gi, asak myi xê zàn chyân bê sù nghut é yanmai nghut ri.

* 4:15 Yudaq byìn tú wapdoq lé Grik đông gi, San-hedrin gâ lhê. ✨ 4:26 Hkya-on 2:1-2 † 4:27 Xù but é hkyô gi, Yudaq byu pé htung đông xù but byi jáng, rajung jung kut râ matú hkyin masat yu é hkyô nghut lhê. Xù but byi é sù gi, Grik đông Mesaia gâ é nghut lhê.

Lumjúng Bâng É Kyûdung Dang

²³ Yhangnhik gi, nhang kat pyâm é hui kôjáng, yhangnhik é luzúm wui chyáng taú ló kômù, hkyangjong agyi pé eq suwún wui èq yhangnhik lé hkyîm é dang banshoq lé, ló taí kyo akô nghut ri. ²⁴ Haû hkyô lé wó gyo kôjáng, yhangmoq gi, myit rahkat zâ èq yhumsing é htê lhoq ko mù, Garai Gasâng lé kyûdung kô é gi, "Mauhkúng eq myigùng, wuìshuq lung-aû eq, haú pé má, nyi mi-nyí lé hpan tô é, ahko ahkáng lhunglhang wó é Yhumsîng ê, ²⁵ Náng, náng é dui-nhâng zoshâng, ngamoq é îchyí îké Dawiq é nhut mai, Chyoiyúng Woi-nyí èq taí tô é gi,

'Haí mù luí, tûngbaù amyû pé gi, nhikjum yô akô? haí mù luí, byu pé gi, akôm dâ pyám akô lú?'

²⁶ Haû Yhumsîng eq Yhâng é Hkrisduq lé gumlau toq râ matú, mingkan hkohkâm pé gi, toq mù, zau suwún wui eq rahá zup zîng bum akô. ✨

gâ ri. ²⁷ Gè gè yhang, Herut eq Pontu Pilat nhik gi, tûngbaù pé eq Israelaq byu pé le mù, và mó shí má chôm zîng to kôluí, náng xù but byi é sù,† náng é Chyoiyúng dui-nhâng zoshâng Yesuq lé gumlau toq râ dâ nyi akô. ²⁸ Náng é wum-o a-tsam eq náng ô nau é đông dut râ matú, hí hkûn mai náng myit hpyit doqdân tô é hkyô lé, yhangmoq gi, kut pyám bekô nghut ri. ²⁹ Yhumsîng ê, ahkuí yhangmoq taí kyuq nyi é dang lé myàng byi laq ô! Náng é dui-nhâng zoshâng wui, a gyuq a kyum é myit èq náng é dang lé taí râ matú wum-o byi laq! ³⁰ Náng é wum-o bo é loq lhâm kat luí, nolì nojàng lé lhoq gê byi mù, náng é Chyoiyúng dui-nhâng zoshâng Yesuq é myìng mai, limik kumlhá eq mauhpo muzó pé lé kut shit laq ô!" gâ akô.

³¹ Haû su, kyû ban dung kôjáng, yhangmoq zîng tô é jowò gi, dui nún lô mù, yhangmoq lhunglhang bang gi, Chyoiyúng Woi-nyí byíng lô luí, Garai Gasâng é mungdang lé a gyuq a kyum é za taí bùm bekô nghut ri.

Azîng Zê Lé Chôm Gam Chûng Kô É Hkyô

³² Haú lumjínng é lhunglhâng bang gi, i-myt rahkat za nghut nyi akô; ó yuq le, yhumsínng wó é zè lé ngá é a gâ é za, banshoq eq chôm gam chung nyi akô. ³³ Lagyô pé le, haú Yhumsínng Yesuq dum dui toq é hkyô lé a-tsam mó eq saksé hkâm nyi kô é nghut mù luí, yhangmoq banshoq bâng é ahtoq má jeju myo myo joq nyi ri. ³⁴ Yhangmoq chyáng a wó a lom é byù rayuq le a nyi kó. Hkâsu mù gâ le, maumyî ratóng wó é, a nghut jáng, yhúm wó é bang ó yuq nghut kôlhâng, haú pé lé adàm dàm ùng pyám luí wó yu é ngùn le gi, ³⁵ lagyô pé é hkyî wang má lé to byî akô. Haú mù luí, a wó a lòm sù ó yuq lé le ra tô é eq rajung za gàm byî akô nghut ri.

³⁶ Haú hkûn, Barnaba ga luí lagyô pé eq myhínng byi é, Kupru ming mâ é Lewiq byù Yosep le, yhang wó é maumyî ratóng lé ung luí, wó yu é ngùn lé lagyô pé é hkyî wang má, lé to byî ri. ³⁷ Barnaba gâ é dang lichyúm gi, myit wum byí su é yhangzo gâ é lichyúm nghut lhê.

5

Anani Eq Sahrira Njik É Hkyô

¹ Nghut kôlhâng, Anani ga sù gi, yhangmyi Sahrira eq rahá, yháng nhâm wó é maumyî ratóng lé ùng pyám luí, ² yhangmyi le bo sê é dông, ngùn haú ram lé gi, haq myhit yu to mù, ra-am lé za lagyô pé é hkyî wang má lé to byî akô.

³ Haú mù luí, Petruq gi, "Anani ê, Chyoiyúng Woi-nyí lé mhaú pyám rã matú eq, maumyî hpau mâ é ra-am lé haq yu to rã matú, haí mù luí, náng é myit má Tsadán le byíng nhang tô lhê lhú? ⁴ Maumyî haú joq tô le, náng é zè nghut lhê a nghut lhú? Wó ung é ngùn le náng é zè nghut ashî, a nghut lhú? Haí mù luí, nàng haú dông dâ lhê lhú? Byù lé mhaú é a nghut, Garai Gasang lé mhaú pyám bê nghut ri." ga tái ri.

⁵ Anani gi, dang haú lé wó gyo jáng, lêng mù, shi byuq bê nghut ri. Haú hkyô lé wó gyô é bang banshoq le, gyai yhang gyuq bùm bekô nghut ri. ⁶ Haú hkûn, zorâm wui gi, toq mù, yhâng é mâng lé htup luí, ê waq myhup pyám akô. ⁷ Hau htâng, sum hkyíng kô myáng jáng, yhangmyi le, wang lé lo ri. Haú su dut é hkyô lé gi, yhang a sé nghut ri.

⁸ Haú hkûn, Petruq gi, "Ngo lé tái kyô wú aq. Nungnhik ùng é maumyî hpau gi, shí gú za nghut lhê lhú?" ga myi jáng, yhang gi, "Nghut lhê, haú gú za nghut bê." ga tái ri.

⁹ Petruq gi, "Nungnhik gi, haú Yhumsínng é Woi-nyí lé îsu kut chyam wú rã matú, hkâsu mù chôm myit huí akô lhú? Wú aq, náng é yhumsínng hpó lé ê myhup pyám bang gi, haú hkúmdong má jé bê; yhangmoq gi, nang lé le waq htoq pyám kó rã nghut lhê." ga tái ri.

¹⁰ Radá dâm, yhang le lagyo hpô é hkyî wang má lêng shi byuq bê. Zorâm wui le wang lo wú le, myiwe haú shi to lánng é lé myàng kôluí, waq ê mù, yhanglang é nàm má, ê myhup pyám bekô. ¹¹ Hau é yanmai, haú hkun lhê é hpúng byù banshoq bang eq, haú su dut é hkyô lé wó gyo má wó gyô é bang gi, gyai yhang gyuq bùm bekô nghut ri.

Byù Myo Myo Lé, Lagyô Pé Lhoq Gê Byí É Hkyô

¹² Ahkuí, lagyô pé gi, mingbyú wui é hí má limik kumhá eq mauho muzó myo myo lé, kut shit nyi akô. Haú lumjínng bang gi, i-myt rahkat zã eq, Sholumon jirop má chôm hui hui kut bum akô. ¹³ Shiwa byu pé gi, yhangmoq lé hkunggã nyi bùm kôlhâng, yhangmoq lé a wám ê zum bùm kó. ¹⁴ Nghut kôlhâng, haú Yhumsínng lé lumjínng é myiwe yuqgè wui gi, myo sheq myô jat lò kômù, yhangmoq chyáng je myô jat lò bê nghut ri. ¹⁵ Haú mù luí, byu pé gi, Petruq tái lo é hkûn, yhâng é wupzo za lháng rayuq yuq é ahtoq má zang sháng gaq ga, nõhpyo huí é bang lé, wã mã é hkyô yàm mã waq htoq ê mù, yhuphpú pé eq taphkang pé mã lhez tô akô. ¹⁶ Hau htoq agó, Yerusalem awui ayàm mã é wã pé mai le, byù ajùm ayò gi, no é bang eq agè ashop é nat wang zing-ri huí é bang lé shuí jé lé bum akô; haú bang lhunglháng gi, lhoq gê lhoq yô byí é huí bum akô nghut ri.

Lagyô Pé Zing-ri Huí É Hkyô

¹⁷ Hkyangjong mó eq yhâng é luzúm wui, Saduke hpúng mã é byu pé kúm gi, gyai yhang wú manon bùm kôluí, toq mù, ¹⁸ lagyô pé lé chyup yú luí, wã mã é htóng mã lhúng tô akô. ¹⁹ Nghut kôlhâng, haú myín lé, Yhumsínng é maumang lagyo

rayuq gi, htóng hkum pé lé hpông pyám mù, yhangmoq lé shuí htoq yû uchyang,²⁰ "Nungmoq htoq lô mù, noqkuq yhûm má ê yap to luí, dui é asak hkyô sik eq sêng é danglù banshoq, shiwa byu pé lé taí kyo keq." ga taí ri.

²¹ Napsûn myoqmyàng zó lé, yhangmoq gi, noqkuq yhûm má wàng mù yhangmoq wó gyô yu é eq rajung za, shiwa byu pé lé, mhoqshit hi lô akô.

Haú u lé, hkyangjong mó eq yhâng é luzúm wuî gi, Israelaq byu pé é suwún wuî lhunglhâng bang lé ji yù mù, Yudaq byìn tú wapdoq chôm zung yù luí, lagyô pé lé é shuí yù râ matú htóng shut byù nhang kat akô. ²² Haú bang kúm gi, htong má jé é hkûn, lagyô pé lé a myàng kôjáng, dum taù lò mù lo taí kyo kô é gi, ²³ "Htóng hkum le ging ging myhî to lánng ri, htóng zúng bang le hkum yâm má yap tô akô. Nghut kôlhâng, hpông wú le, ahkaù má ó le a nyi to lo nghut ri." gâ ri. ²⁴ Noqkuq yhûm zúng é zau hpó eq hkyangjong agyì wuî gi, dang haù lé wó gyo kôjáng, "Shí hkyô haí dut lô râ lú?" ga, gyai gyuq maú bum akô.

²⁵ Haú hkûn, byù rayuq wang lé lô mù, "Wú keq, nungmoq eq htóng má lhung tô é bang gi, noqkuq yhûm má yap to mù byu pé lé mhoqshit nyi bum akô." ga luí, yhangmoq lé taí kyô ri. ²⁶ Haù mù luí, zau hpó haù gi, yhâng é a-ô mâ é bang eq ê mù, lagyô pé lé é shuí yu akô. Nghut kôlhâng, shiwa byu pé luqgok eq dú lô kó râ lé gyuq kô é yanmai, htân htân a wám kut kó nghut ri.

²⁷ Lagyô pé lé shuí jé lô kôjáng, Yudaq byìn tú wapdoq hí má yhangmoq lé nyhi tô akô. Haú hkûn, hkyangjong mó gi, ²⁸ "Yesuq é myìng lé lang luí a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jàm shoq, nungmoq kut bekô nghut luí, Yesuq é sui lé, ngamoq é ahtoq má ke byi râ dâ nyi akô." ga luí, yhangmoq lé taí akô.

²⁹ Haú hkûn, Petruq eq gotú lagyô pé tú taí kô é gi, "Ngamoq gi, byù dang lé gyo ra htoq má Garai Gasâng é mungdang lé je luí gyo râ dut lhê. ³⁰ Nga-nhûng é îchyí îwâ pé é Garai Gasang gi, nungmoq eq tapzîng má lhâng sat pyâm é Yesuq lé, shi e mai lhoq

dui toq kat bê nghut ri. ³¹ Israelaq amyû lé, myit lhîng hkyô eq mara hkyut byi hkyô hpóng byi râ matú, up é ahkáng wó Sû eq hkyi yù Sû kut nhâng râ ga, Garai Gasang gi, Yhang lé, Yhâng é loqyo loq* má waq toq to bê nghut ri. ³² Ngamoq le shí hkyô é saksé pé nghut nyi lhê; mungdang lé gyô yù luí châng é bang lé Garai Gasang byî tô é Chyoiyúng Woi-nyí le, shí pé é saksé nghut lhê." ga akô.

Gamalelaq Hpaqchyî Byî É Hkyô

³³ Yhangmoq gi, dang haù lé wó gyo kôjáng, lûm gyo nhik-yo naù kômù, lagyô pé lé sat pyám râ lháng myit akô. ³⁴ Nghut kôlhâng, mingbyû banshoq bâng é hí má aróng wó é tarâ sará Gamalelaq gâ é Hparishe rayuq, haù Yudaq byìn tú wapdoq má toq yap mù, lagyô pé lé razup zo lhoq htoq to nhâng luí, ³⁵ yhang taí é gi, "Israelaq byu pé é, shí bang lé hkâsu kut râ hkyô, rago za hí myit wú keq. ³⁶ Hkâsu mù gâ le, hí hpyang Htudaq gâ é byù rayuq pô htoq lô mù, yhânggùng yhang byù mó rayuq yuq nghut lhê ga taí jáng, byù myi shô kô yhâng chyáng châng wú bekô. Yhang sat pyâm é hui luí, yhang htâng châng é lhunglhâng bang le byo myín byuq kômù, haí le a wó kut dut byuq akô nghut ri. ³⁷ Hau htâng, myìng jihpán guq yu é buinyì má, Yudaq gâ é Galile byù rayuq pô htoq mù, mingbyû wuî lé yhâng hkyam shut mhoq hpyoq yu ri. Yhang le sat pyâm é hui mù, yhang htâng châng é lhunglhâng bang le, byo myín byuq bekô nghut ri. ³⁸ Ahkuí le, shí bang lé haí le hkâgon ko, yhangmoq kâm é dông nghut nyi kó sháng gaq; yhangmoq kut nyi é hkyô eq dâ nyi é hkyô pé gi, byù myit dông kut é nghut jáng, htên byoq byuq râ za nghut lhê. ³⁹ Nghut kôlhâng, Garai Gasâng chyáng mâ é nghut le gi, nungmoq wó lhoq hkyîng pyám kó râ a nghut. Garai Gasâng é gyè sheq dut lò kó râ nghut lhê." gâ ri.

⁴⁰ Dang haù lé yhangmoq gyô htuk bum akô. Haù mù, lagyô pé lé wut yù mù luí, nhuq bat yù kômù, Yesuq é myìng lé lang luí mhoqshit é hkyô a ge kut râ nghut lhê ga taí kômù, nhang pyâm akô nghut ri.

⁴¹ Lagyô pé kúm gi, Yesuq é myìng é yanmai ru hpuzô é hkyô gi, gingdán nyi ri,

* 5:31 Garai é loqyo loq gâ é gi, hpautap hkungga gíng é jowò lé taí nau é nghut lhê.

ga myit yù kômù, Yudaq byìn tú wapdoq haù mai gabú myit èq htoq ló bekô. ⁴² Hau htâng, yhangmoq gi, nyí wúì làng noqkuq yhùm má le, rayhùm htâng rayhùm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

6

Garúm Râ Byù Nyhit Yuq Lé Hkyin Yu É Hkyô

¹ Ahkuí, chángzô pé myô jat lo nyi é buinyì pé má, Grik dang nyo é Yudaq byu pé gi, yhangmoq é chuimó myhî pé lé, nyí wui lhê é gàm tso gàm huq é hkyô má rago a wó kut kô é yanmai, Hebre myíng mu é Yudaq byu pé lé mara hùn dang tái bum akô. ² Haú hkûn, lagyo raxe í yuq gi, chángzô pé lhunglhâng bang lé wut yù mù, "Ngamoq, Îwa Garai Gasâng é mungdang hko kyô é muzó lé rap pyâm to mù, zangbó amû lé za lajang nyi é nghut le gi, a htuk râ nghut lhê. ³ Haù mù luí, gumang wuì ê, Chyoiyúng Woi-nyí byíng é eq hpaqchyí byéng-yá bo é nhik bo byù nyhit yuq lé nungmoq chyáng mâ é hkyin to keq. Haú bang lé muzó shí lhum hun to râ nghut lhê. ⁴ Ngamoq kúm gi, kyûdung é hkyô eq mungdang hkô é hkyô lé za, nozquq tung kut nyí râ nghut lhê." ga tái akô.

⁵ Dang haù lé shiwa byù lhunglhâng bang gyô htuk kômù luí, lumjíng myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htung má lhing wang lò bê sù Antioku và mó mâ é Nikolaq pé lé hkyin yù mù, ⁶ lagyô pè chyáng shuí ló akô; lagyô pé gi, kyûdung byi kômù, yhangmoq lé loq ke byí akô nghut ri.

⁷ Garai Gasâng é mungdang gi, je myô jam lò luí, Yerusalem và mó má chángzô pé gyai myô jat lawán lo é htoq agó, hkyangjông pé myo myo le, haù lumjíng hkyô má châng nyi bum akô.

Stehpan Chyup Yú Huí É Hkyô

⁸ Ahkuí, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pè é hí má mauhpo muzó pé eq limik kumlhá mó pé tân shit ri. ⁹ Haú hkûn, luthkyô ga bâng é tarajong eq sêng

é Kuruni, Alesander eq Kiliki, Asia mau mâ é bang ra-am gi, toq mù, Stehpan eq dang chyin chyin lhùm akô. ¹⁰ Nghut kôlhâng, Stehpân é dang gi, Chyoiyúng Woi-nyí lom é hpaqchyí dang nghut é yanmai, yhangmoq a ûng kó nghut ri.

¹¹ Haù mù, yhangmoq gi, "Shí yuq, Mosheq eq Garai Gasang lé rhoí dang tái nyi é lé, ngamoq wó gyô ri." ga luí, mhaù tái nhâng râ byù haq lung tô akô.

¹² Haù mù, yhangmoq gi, mingbyù wuì eq nhik bê suwún wuì, tarâ sará pé lé, chun htau mù, Stehpan lé chyup yù nhâng luí, Yudaq byìn tú wapdoq má shuí nyhi tô akô.

¹³ Mhaù é saksé byu pé lé le lhoq hâng kat luí, haú bang gi, "Shí yuq, shí chyoiyúng jowò* eq jep é tarâ lé shut shai é dang ru tái nyi ri. ¹⁴ Nazaret và byù Yesuq ga sù gi, jowò shí lé hpýoq pyám mù, nga-nhúng lé Mosheq èq byí tô é htunghking lé htaí pyám râ nghut lhê ga luí, yhang tái é dang lé ngamoq wó gyô é nghut lhê." ga tái akô.

¹⁵ Haù Yudaq byìn tú wapdoq má zung to bang banshoq, yhang lé chôm wú tsuq nyí kô é hkûn, yhâng é myoqdong gi, maumang lagyô é myoqdong su dut é lé, yhangmoq myang akô nghut ri.

7

Stehpan Tái É Dang

¹ Haú hkûn, hkyangjong mó gi, "Dang haù pé têng lhê lú?" ga luí, yhang lé myi jáng,

² Stehpan tui tái é gi, "Gumang wuì eq îwa wuì ê, gyô wú keq, nga-nhúng lhunglhâng bâng é îchyí Abraham gi, Haran và má a ló nyí shi lé, Mesopotamiaq mau má nyi tô ashí hkûn, hpungwup shing kang bo é Garai Gasang gi, yhâng chyáng lé htoq shit mù, ³ Náng é ming eq náng é amyû mai htoq ló luí, ngò tân shit râ ming shut e ló aq.† ga luí, yhang lé tái ri.

⁴ Haù mù, yhang gi, Hkaldea byu pè é mau mai htoq ló luí, Haran và má ló nyi nyi ri. Yhâng wa shi byuq é htâng má, Garai Gasang gi, ahkuí, nungmoq nyi nyi é ming shí má yhang lé htot lô nhâng bê nghut ri. ⁵ Garai Gasang gi, shí ming má yhang lé silí wunlí nghû râ, hkyî rahkô nang î é myigùng lháng a byí é nghut kôlhâng,

* 6:13 Shí chyoiyúng jowò gi, Yerusalem noqkuq yhùm lé gâ lhê. † 7:3 Apûn 12:1

yhang, zodù lhang a wò shi mai, yhang lé le, yhang é awut ashín pé lé le, maumyî shî byi râ ga danggidiq byî to bê nghut ri. ⁶ Hau htoq agó, shî hkyô lé Garai Gasang xoq taí é gi, 'Náng é awut ashín pé, tungbaù ming má bíng nyî mù, haù ming bâng èq myi shô zàn jùn zô é eq zing-rî é lé hui kó râ. ⁷ Nghut kôlhang, yhangmoq lé jùn zô é amyû lé le, ngò jéyáng râ nghut lhê.' gâ ri. 'Haù hkûn, yhangmoq gi, haù ming mai htoq lô mù, jowò shî má ngo lé noqkuq kó râ nghut lhê.'[☆] ga le, Garai Gasang taí ri. ⁸ Hau htâng, yhang lé ahpyo-kuq hpyit byi râ hkyô eq sêng é dangshikaq le, byî ri. Haù mù, Abraham gi, Isak lé hku é htâng shit nyí buinyî má ahpyo-kuq hpyit byî ri; Isak gi, Yakup lé hkû mù, Yakup gi, îchyí îwa achyung raxe í yuq lé hku kat bê nghut ri. ⁹ Haù îchyí îwâ pé gi, Yosep lé manôn kôluî, Egutuq ming shut jùn đông ûng kat akô. Nghut kôlhang, Garai Gasang gi, yhang eq rahá nghut nyî mù luî, ¹⁰ wuîhke jamjau banshoq mai yhang lé lhoq lhut yû mù, Egutuq hkohkâm Hpara-uq é hí má le myoqdong wó, hpaqchyî byéng-yá le bò nhang é yanmai, hkohkâm haù gi, Egutuq ming eq, yhang é hkohkâm-wâng banshoq lé up nhang ri.

¹¹ Haù u lé, Egutuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhung é îchyí îwâ pé le zoshuq a myang hô zo lo dut byuq bekô nghut ri. ¹² Ahkuî, Yakup gi, Egutuq ming má guqzo joq é hkyô lé wó gyo jáng, nga-nhung é îchyí îwâ pé lé sâng-hî dâm ê nhang ri. ¹³ Htang dâm dum ê é hkûn, Yosep gi, yhanggu yhangmâng pé lé yhang ó nghut é hkyô taí kyô ri. Hpara-uq le Yosep é yhumbyù ikun hkyô lé sê yù byi bê nghut ri. ¹⁴ Hau htâng, Yosep gi, yhang wa Yakup eq yhumbyù banshoq nyhit xe ngo yuq lé, yhang chyáng pying yù bê nghut ri. ¹⁵ Yakup le Egutuq ming má jé gyó ló luî, yhang eq nga-nhung é îchyí îwâ pé gi, banshoq haù ming má shî ló byuq bekô nghut ri. ¹⁶ Yhangmoq é mâng lé gi, Shehkem wà má yu taù ló mù, Shehkem wà mâ é Hamora é yhangzo yhangshu pé chyáng mai, Abraham èq ngùn byi mù wui hpyit tô é lupdùng má ló myhup tô akô nghut ri.

¹⁷ Abraham lé Garai Gasang byî tô é dang-gidiq dik râ ahkyíng jé lo nyi é u lé, ¹⁸ nga-nhung é amyû gi, Egutuq ming má Yosep lé a sê é hkohkâm pô htoq é pyat jé shoq, myoluq jebe lò bekô nghut ri. ¹⁹ Hkohkâm hpó haù gi, nga-nhung é amyû htoq má a ge é hpaqchyî da luî, nyheqnú pé lé shi byuq sháng gaq ga, dú pyám nhang é đông mai nga-nhung é îchyí îwâ pé lé zing-ri bê nghut lhê.

²⁰ Haù u má, Mosheq lé hkû to bê. Yhang gi, Garai Gasang é hí má gyai yunglhô é sù nghut ri; yhang gi, yhangwâ é yhûm má lhamó sum hkyap baù tô é hui mù, ²¹ htot tô tô é hui jáng, yhang lé Hpara-uq é byizô èq xe yù mù, zosíng kut yû luî, hku kô ri. ²² Mosheq gi, Egutuq ming mâ é hpaqchyî byéng-yá banshoq lé mhoq yû luî, nhut shô a-tsam eq hkyî loq a-tsam gyai bò sù nghut ri.

²³ Yhang asak myi xê zàn jé lò jáng, yhang é gumang Israelaq byu pé chyáng ê kûm wú râ matú wó myit htoq kat ri. ²⁴ Ê jé jáng, zing-ri hui nyi é sù rayuq lé ê myàng luî, haù yuq lé búng mù, zing-rî nyi é Egutuq byù lé, loqchoq hpuq é đông sat pyâm ri. ²⁵ Mosheq gi, yhang é byu pé lé yhang é loq đông Garai Gasang hkyi yù hkyô byi nyi é lé, yhang é amyû pé sê gyo byi nhò ngàm kôlhang, yhangmoq a sê gyo byi kó nghut ri. ²⁶ Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyîn naù luî, 'Ahkaù nhik ê, gumang yhangchang sheq ru nghut lhê nhîng, haì mù rayuq eq rayuq byoq lhum nyi akô lú?' ga taí ngón wú ri.

²⁷ Luzúm hpó lé zing-rî nyi sù yuq gi, 'Ngamoq é ahtoq má zau eq tarâ agyî kut râ matú, nàng lé ó yuq hkyin tô é lú? ²⁸ A-nyí nap Egutuq byù lé sat pyâm é su, ngo lé le sat pyám nau ri lú?'[☆] ga luî, tú taí uchyang yhang lé dùn chyûn pyâm ri. ²⁹ Mosheq gi, dang hau é yanmai, hpâng luí Midian ming má ê nyi byuq ri. Haù má yuqzo í yuq é wó ri.

³⁰ Haù ming má myi xê zàn lai jáng, Sinaq Bùm yàm, yoso hkaù mâ é myi gyúng tô é mhanpúng mai, maumang lagyo rayuq gi, Mosheq lé htoq shit ri. ³¹ Mosheq gi, haù lé myàng jáng, hau é yanmai maù luî, wú wú râ ga huì e ló le, Yhumsíng é

htê htoq lo é gi, ³² 'Ngò gi, náng îchýí îwâ pê é Garai Gasang, Abraham, Isak, Yakup é Garai Gasang nghut nyi lhê.'[☆] gâ ri. Mosheq kúm gi, gyuq nán luí, a wám tu wú nghut ri.

³³ Haû Yhumsîng gi, 'Náng é hkyî-tsung hkyut pyám aq, nàng yap tô é jowò gi, chyoyúng é myigùng nghut lhê. ³⁴ Egutuq ming má ngá é amyû pé zik zo huî nyi é hkyô lé, ngò gè gè yhang myàng bê; yhangmoq é ngaù nhik ngaù htê lé ngò wó gyo bê; yhangmoq lé hkyi yù râ matú ngò gyó lé é nghut lhê; ahkuí, lé aq, ngò, nang lé Egutuq ming shut nhang taû kat râ.'[☆] ga luí, yhang lé dum taí ri.

³⁵ Yhangmoq èq, 'Nang lé zau eq tarâ agyì kut râ matú, ó yuq hkyin tô é lhú?' ga luí he-ngik pyâm é Mosheq lé yhang, mhanpúng má htoq shit é maumang lagyo dông mai, Garai Gasang gi, yhangmoq é zau eq hkyi yù sù kut nhâng luí, taû nhang kat é nghut ri. ³⁶ Haû Mosheq yhang, Egutuq ming má le, Nhong Nè má le, yoso hkaû pé má le, myi xê zàn gyoro má mauhpo muzó pé eq limik kumlhá pé tûn shit uchyang, yhâng é byù myû pé lé Egutuq ming mai shuí htoq ló ri.

³⁷ Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pô htoq lô nhâng râ nghut lhê.'[☆] ga luí, taí tô é sù le Mosheq yhang nghut ri. ³⁸ Yoso hkaû má nghut nyi ashí hkún lé, shiwa byù hpúng má, Sinaq Bùm má yhang lé dang taí é maumang lagyô eq le, nga-nhông é îchýí îwâ pé eq le rahá nghut sù gi, yhang yhang nghut nyi ri; nga-nhông lé ap byi râ asak dui é mungdang lé lom yu é sù le, yhang nghut nyi ri.

³⁹ Nghut kôlhang, nga-nhông é îchýí îwâ pé kúm gi, yhâng é dang lé a kâm gyo kômù, yhang lé he pyám luí, Egutuq ming shut taú nau é myit bo bum akô. ⁴⁰ Haû mù, Arun lé, 'Egutuq ming mai nga-nhông lé shuí htoq lo é Mosheq gi, haí dut byuq bê hkyô lé, ngamoq a sé lo; haû mù, nga-nhông hí má so byi râ hparâ lhô pé saí byi aq.'[☆] ga taí akô. ⁴¹ Haû buinyi pé má, yhangmoq gi, nojûng zo lhô saí mù, alhò haû lé hkungga nhông byi uchyang, yhangmoq é loq èq saí

tô é muzó jizó má gabú nhik dik nyi akô. ⁴² Haû mù luí, myiqhtoi pé é laiká má kê tô é gi,

'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byi é nghut akô lhú?

⁴³ Nungmoq gi, nungmoq noq râ matú saí yu é alhò, Molak é zúm eq Rehpan hpara é kyî lé sheq, waq lhing wún ko é yanmai,

Babelon lai shoq ngò nungmoq lé lhoq lhâm pyám râ nghut lhê.'[☆]

ga luí, bo tô é eq rajung za, Garai Gasang gi, yhangmoq chyáng mai myoqdong lhing pyám mù, mauhkûng htoq mâ é buì, kyî, lhamó pé lé noqkuq râ matú ap pyám bê nghut ri.

⁴⁴ Mosheq lé, nàng myang é azòng eq rajung za saí aq ga, Garai Gasang taí é dông saí tô é saksé zúm lé, haû yoso má nga-nhông é îchýí îwâ pé wó yû bekô nghut ri. ⁴⁵ Haû mù, nga-nhông é îchýí îwâ pé gi, yhangmoq é myoq hí mai Garai Gasang èq hkat htoq pyám byi é byù myû pé é mau má, Yoshuq eq rahá wang nyi ló kê é hkún, saksé zúm haû lé yu wang ló akô. Haû gi, Dawiq é pyat jé shoq joq to bê nghut ri. ⁴⁶ Dawiq kúm gi, Garai Gasâng hí má myoqdong wó sù nghut mù luí, Yakup é Garai Gasâng matú nyi jowò saí râ ahkáng dung kôlhang, ⁴⁷ Sholumon èq sheq saí bê nghut ri.

⁴⁸ Nghut kôlhang, Myhang htáng htum Sù gi, byu é loq èq za saí é yhûm má nyi é a nghut, haú hkyô eq séng luí myiqhtoi wá taí tô é gi,

⁴⁹ 'Mauhkûng gi, ngá é zùng tanghkuq, myigùng gi, ngá é hkyî nang jang nghut nyi lhê;

ngá é matú hkasû é yhûm saí byi shi kó râ lhú? Ngò nô yù râ jang gi, hkâmá nghut kó râ lhú?

⁵⁰ Haû banshoq lé ngá é loq èq baú saí tô é a nghut kó lhú? ga luí, haû Yhumsîng taí ri.'[☆]

gâ ri.

[☆] 7:32 Htoq Ló 3:6 [☆] 7:34 Htoq Ló 3:5, 7-8,10 [☆] 7:37 Tarâ Pun 18:15 [☆] 7:40 Htoq Ló 32:1 [☆] 7:43 Amo 5:25-27 [☆] 7:50 Esai 66:1-2

⁵¹ I-myyit htân mù, i-myyit eq nohkyap má ahpyo-kuq a hpyit é bang* ê, nungmoq gi, nungmoq é îchyí îwâ pé su, Chyoiyúng Woi-nyí lé hkâ-nhám le lhom hengik pyâm nyi akô; ⁵² Nungmoq é îchyí îwâ pé èq a zing-rî wú é myiqhtoi, ó yuq wá nyi lhê lhú? Haû Dingmán Sû pô htoq râ hkyô lé hko kyô é bang lé, yhangmoq sat pyâm é chyat nghut akô; ahkuî, nungmoq le, haû Dingmán Sû lé ap pyâm é bang eq sat pyâm é bang nghut nyi akô. ⁵³ Maumang lagyo èq shit kyo byî é tarâ lé nungmoq wó yû kôlhang, haû lé a cháng kó nghut ri." gâ ri.

Stehpan Lé Luqgok Èq Dú Sat É Hkyô

⁵⁴ Haû hkyô lé yhangmoq wó gyo kôjáng, yhangmoq é nhiklhum má lûm htaû záng kô é yanmai, Stehpan lé, zuì wang ngat kyáng shoq wú nhik-yô nyi akô. ⁵⁵ Stehpan kúm gi, Chyoiyúng Woi-nyí byíng mù, mauhkûng shut tu wú kat le, Garai Gasâng é hpungwup shingkang lé le, Garai Gasâng é loqyo hkyam shut Yesuq yap tô é lé le, myang ri. ⁵⁶ Haû mù, yhang gi, "Wú keq, mauhkûng hpông tô é lé le, Garai Gasâng é loqyo hkyam shut haû Byu Yhangzo yap tô é lé le, ngò myàng ri." ga taî kat ri.

⁵⁷ Haû hkûn, yhangmoq gi, htê mó o mó garu uchyang, yhumsing é nohkyap xaû pyám mù, radá dâm yhang lé chôm htim kômù, ⁵⁸ yhang lé wâ mai she htoq ló kôluî, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyî wang má yhangmoq é buhîng pé lé hkyut bum tô akô.

⁵⁹ Luqgok èq dú nyi bùm kô é u lé, Stehpan gi, "Yhumsing Yesuq ê, ngá é woi-nyí lé hap yù laq." ga kyûdûng ri. ⁶⁰ Hau htâng, yhang gi, hkyihput htuq mù, "Yhumsing ê, yhangmoq kut é mara haû lé hkyut pyám byi laq." ga luî, htê mó èq wut dúng ri; haû ban taí jáng, yhang kâng byit byuq bê nghut ri.

8

Hpúng Byû Lé Sholuq Zing-rî É Hkyô

¹ Sholuq gi, haû má nyi to mù, Stehpan lé sat pyâm é muzó má myit bo huî ri.

Haû nyí mai, Yerusalem wâ mó mâ é noqkuq hpúng gi, zing-ri mó huî lo é nghut mù luî, lagyo pé mai lai luî, lumjíng

bang lhunglhang gi, Yuda mau eq Samariq mau jowò hkangmó má byo myín ló bekô.

² Nghut kôlhang, tarâ hkunggâ é bang gi, Stehpan lé yhum pyâm é htâng má, yhang é yanmai iyon mó huî nyi akô nghut ri.

³ Sholuq kúm gi, rayhum htâng rayhûm wàng mù, myiwe yuqgè lé she hkyut htoq yû luî, htóng má lhung tô é dông mai, noqkuq hpúng haû lé lhoq hpyoq ló nyi ri.

Samariq Wâ Má, Gabú Danglù Hkô Kyô É Hkyô

⁴ Byo htoq ló é bang kúm gi, jé é jowò hkangmó má mungdang lé hkô kyô ló akô.

⁵ Haû hkûn, Hpilip gi, Samariq mau mâ é myuq ra-myuq shut e ló mù, Hkrisduq é hkyô lé hkô kyô ri. ⁶ Byù ajùm ayò gi, Hpilip taî kyô é hkyô lé wó gyô é eq, yhang tûn shit é limik kumlhá lé myàng kôjáng, i-myyit rahkat za eq yhâng é dang chôm gyô nyi bum akô. ⁷ Nat wang júng é byù myo myô pé chyáng mai, agè ashop é nat pé wut garu uchyang htoq ló byuq bum akô; gungjum shi é bang eq hkyî htên é bang myo myo le, ge ló byuq bum akô. ⁸ Haû mù luî, haû myuq má gabú hkyô gyai yhang wó bekô nghut ri.

Myoqheq Sará Simun É Hkyô

⁹ Simun gâ é byù rayuq gi, hí lé haû myuq má myoqheq hpaqchyî kut shit mù, Samariq byu pé lé lhoq maú luî, yhâng gùng lé yhang, laklaí sù nghut lhê gâ ri.

¹⁰ Byù tiq ko banshoq le, "Byù shí yuq gi, 'haû a-tsam mó' gâ é, Garaî chyáng mai hpungwup a-tsam wó yû sù nghut ri." ga luî, yhâng é dang lé gyô bum akô. ¹¹ Haû yuq gi, myáng myáng yhâng é myoqheq hpaqchyî èq yhangmoq lé lhoq maú lo é yanmai, yhâng dang lé chôm lum bum akô.

¹² Nghut kôlhang, Hpilip hko kyô é Garai Gasâng é mingdán hkyô eq, Yesuq Hkrisduq é myèng eq sêng é gabú danglù hkyô lé, lumjíng kôjáng, myiwe yuqgè wui-myhup hkâm yu bum akô. ¹³ Simun yhang yhang le lumjíng mù luî, wui-myhup hkâm yù mù, Hpilip htâng châng wún ri. Hpilip é kumlhá mó eq laklaí kumlhá pé lé myàng jáng, yhang gi, gyai maú byuq ri.

¹⁴ Garaî Gasâng é mungdang lé Samariq byu pé, lhom hap yù bê hkyô lé, Yerusalem

* 7:51 I-myyit eq nohkyap má ahpyo-kuq a hpyit é bang gâ é gi, Garaî dang lé a lùm a châng é bang lé gâ lhê.

wà mó má nyi é lagyô pé wó gyô bùm kôjáng, yhangmoq gi, Petruq eq Yohan nhik lé háu má nhang kat akô. ¹⁵Yhangnhik gi, lé jé jáng, byù háu bang Chyoiyúng Woi-nyí wó yù râ matú kyûdung byí akô. ¹⁶Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyó lô shi; Yhumsîng Yesuq é myîng mai wui-myhup hkâm yu é za ru nghut bùm ashî. ¹⁷Haú mù luí, lagyô nhik yhangmoq é ahtoq má loq ke byi jáng, yhangmoq gi, háu Chyoiyúng Woi-nyí lé wó hkâm yù bekô nghut ri.

¹⁸Lagyô nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn ê byi wú mù, ¹⁹"Hká yuq é ahtoq má nghut kôlhang, ngò loq ke byi jáng, háu yuq gi, Chyoiyúng Woi-nyí wó yù râ matú, háu su é a-tsam ngo lé le byi kó laq." ga dung ri.

²⁰Petruq kúm gi, "Garai Gasâng é chyunghuq lé ngun eq wó wui yù râ nghut lhê ga luí, myit é yanmai, náng é ngùn gi, nàng eq rahá htên byoq byuq sháng gaq. ²¹Nàng gi, Garai Gasâng é hí má myit a dîng sù nghut é yanmai, shí hkyô má nàng wó bo lhom râ a nghut. ²²Haú mù luí, shí agè ashop é hkyô mai myit lhîng mù, Yhumsîng Garaí chyáng dîng tôngbán aq. Háu hkûn, náng é unghkaú má myit pyâm é hkyô lé, mara hkyut pyâm byi abe. ²³Nàng gi, ladu lai shoq nhikhko zo mù, yubak marâ eq tuí zing to huí é lé, ngò myàng ri." ga yhang lé taí ri.

²⁴Haú hkûn, Simun gi, "Nungnhik taí é hkyô hái le ngá chyáng a jé sháng gaq, ngá é matú háu Yhumsîng chyáng kyûdung byi kó laq." ga tû taí ri.

²⁵Yhangnhik kúm gi, háu Yhumsîng é mungdang lé saksé hkâm mù ban hko kyo jáng, Samariq byu pê é wà myo myo má, háu gabú danglù lé hko kyo uchyang, Yerusalem wà mó shut dum taú lò bekô nghut ri.

Hpilip Eq U-nuk Nhk É Hkyô

²⁶Ahkuí, Yhumsîng é maumang lagyo gi, Hpilip lé, "Toq aq, Yerusalem wà mó mai Gaza shut ló é hkyô jé shoq, maupyí shut nyâng za e ló aq. Hkyô háu gi, yoso hkyô nghut lhê." ga taí ri. ²⁷Haú hkûn,

yhang toq mù e ló ri. Háu u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè banshoq lé zùm é, Ehtiopi byù u-nuk rayuq gi, noqkuq râ ga Yerusalem wà mó má ê mù, ²⁸dum taú lo é hkûn, yhâng é myanglhêng má zùng luí, myiqhtoi Esai-aq laiká lé nghap nyi ri. ²⁹Woi-nyí gi, Hpilip lé, "Myanglhêng shut chyâng e ló aq." ga taí ri.

³⁰Haú mù, Hpilip gi, din ê mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lú?" ga luí, yhang lé myí ri.

³¹Haú yuq gi, "Mhoqshit sù yuq a nyi le, ngò hkâsu kut sê gyo râ lú?" ga tû taí mù, yhang eq rahá lo doq zùng aq ga Hpilip lé lung ri.

³²Yhang nghap é Chyúmdang gi, "Sat râ sau lé su, Yhang lé she e ló bê nghut ri; sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

³³Yhânggùng lé lhoq shôm pyâm to huí é hkûn, Yhang lé a tara é dông doqdân pyâm bekô;

Yhâng é asak lé myigùng htoq mai yù pyám bekô nghut mù luí, Yhâng é awut ashín lé ó yuq wó gôn kyo râ lú?"*
gâ ri.

³⁴Haú hkûn, háu u-nuk wa gi, Hpilip lé, "Haú nghut le gi, ngo lé taí kyo laq! Myiqhtoi shí yuq gi, ó lé lhoq ang luí, taí é nghut lhê lú? Yhânggùng lé taí é nghut lhê lú? Háu a nghut jáng, góyuq é hkyô lé taí é nghut lhê lú?" ga myí ri. ³⁵Haú hkûn, Hpilip gi, Chyúmdang háu lé yù mù, Yesuq eq sêng é gabú danglù lé taí kyô ri.

³⁶Haú su e ló kô le, wui joq é má jé jáng, háu u-nuk hpó gi, "Wú aq, shí má wui joq tô ri, wui-myhup hkâm yù râ matú ngo lé hkúm râ jang hái joq ashí lú?" ga taí ri. ³⁷Hpilip gi, "Náng i-myit banshoq eq, nàng lumjîng bê nghut le gi, hkâm yu le ge lhê." ga taí ri; yhang le, "Yesuq Hkrisduq gi, Garai Gasâng é Yhangzo nghut é lé, ngò lumjîng bê." ga tû taí ri.* ³⁸Haú hkûn, yhâng é myanglhêng hkyîng nhâng mù, yhangnhik wui má gyó wâng luí, Hpilip gi, u-nuk hpó lé wui-myhup hkâm byí ri.

* 8:33 Esai 53:7-8

* 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bò.

³⁹ Wui hkaû mai htoq lô kô é hkûn, haû Yhumsing é Woi-nyí gi, Hpilip lé myhik za shuí lô byuq mù, u-nuk hpó le Hpilip lé dum a myàng lo; nghut kôlhang, yhang gi, e lô é hkyô shut gabú myit èq xoq sô e lô bê nghut ri. ⁴⁰ Hpilip kúm gi, Azutu wà má lo htoq jé kat mù luí, Kesare wà mó jé shoq haú mau mâ é myuq pé wà pé hkangmó má gabú danglù hkô kyô wún ri.

9

Sholuq Lhik Wang Lo É Hkyô

¹ Haú u lé, Sholuq kúm gi, Yhumsing é chángzô pé lé hkat kyua nha râ eq sat pyám râ ga, nhikmó-yô nyi é nghut mù luí, hkyangjong mó chyáng ê mù, ² Yhumsing é Hkyô lé lumjng é myiwe yuqgè myàng mi-myàng lé chyup yû luí, Yerusalem wà mó shut wó she lô râ matú, Damaskuq myuq mâ é tarajong pé má byi râ laiká pé lé dúng chùng ri. ³ Yhang e lô le, Damaskuq myuq eq chyáng lô nyi é hkûn, yhang é lhinghkyuq má mauhkûng mai dân loq tung duqbó htoq lô ri. ⁴ Yhang myigùng má lêng ngop tô é u lé, "Sholuq, Sholuq, nàng ngo lé haí mù zing-rî nyi lhê lhú?" ga luí, yhang lé taí é htê wó gyô ri.

⁵ Haú hkûn, yhang gi, "Yhumsing ê, nàng gi, ó yuq nghut lhê lhú?" ga myi jáng, haû Yhumsing gi, "Nàng zing-rî nyi é Yesuq nghut lhê, ⁶ toq aq, myuq shut wang lô aq. Nàng zui saí râ hkyô lé lhom taí kyo râ nghut lhê." ga tû taí ri.

⁷ Yhang eq rahá e lô é luzúm wui gi, htê haú wó gyo kôlhang, ó yuq lé le a myàng kô é yanmai, maú hong yap tô bum akô. ⁸ Sholuq toq mù, myoq hpông kat wú le, haí lé le a myàng dut byuq mù luí, yhangmoq gi, yhang lé loq mai shê mù Damaskuq myuq shut shuí wang lô akô. ⁹ Sholuq gi, sum nyí tup myoqjit byuq mù luí, a zo a shuq é nyi byuq ri.

¹⁰ Damaskuq myuq má Anani gâ é chángzo rayuq nyi ri. Yhumsing gi, yhang lé, "Anani ê." ga shing-rán dông wut ri.

Yhang gi, "Yhumsing ê, shí má nyi lhê." ga tû taí ri.

¹¹ Haú Yhumsing dum taí é gi, "Toq aq, Hkyô-Nyàng gâ é wà hkyô shut ê mù, Yudaq é yhûm má, Tarshu byù Sholuq lé ê hô aq, yhang gi, kyûdùng nyi ri. ¹² Yhang gi, Anani ga sù wang lé lô mù, yhang é myoq

dum myàng sháng gaq ga, yhang é ahtoq má loq ke byí é lé, shing-rán dông myàng bê nghut ri." gâ ri.

¹³ Anani kúm gi, "Yhumsing ê, shí yuq gi, Yerusalem wà mó má, náng é sân-yúng bang lé a ge é dông hkâ-myhó kut laí lo é hkyanglù lé ngò myo myo wó gyô wú bê; ¹⁴ Shí pé má le, náng é mying lé lêng é bang banshoq lé chyup râ ga, hkyangjong agyi pê chyáng mâ é ahko ahkáng wó yu to sù nghut ri." ga tû taí ri.

¹⁵ Nghut kôlhang, Yhumsing gi, "Ru é aq, shí yuq gi, tûngbaù pé eq yhangmoq é hkohkam pê é hí má le, Israelaq byu pê é hí má le, ngá é mying lé wún waq râ matú, ngò chùng râ nghú luí hkyin to sù nghut lhê; ¹⁶ Ngá mying é yanmai hkâ-í hpuzo ra hkyô lé, Ngò, yhang lé tûn shit râ nghut lhê." ga taí ri.

¹⁷ Hau htàng, Anani gi, jé ê mù, yhûm haú má wàng luí, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Chyoiyúng Woi-nyí byíng sháng gaq ga, nàng lé lo é hkyô má, nàng lé htoq shit é Yhumsing Yesuq èq ngo lé nhang kat é nghut lhê." ga taí ri. ¹⁸ Haú hkûn jáng, Sholuq é myoq mai akyap sù é wui gyó byuq mù, yhang myoq dum wó myàng bê. Haú hkûn, yhang gi, toq mù wui-myhup hkâm yù luí, ¹⁹ zoshuq lé zo mù, wum-o dum lhoq pyíng yù bê nghut ri.

Sholuq, Damaskuq Myuq Má Mungdang Hko É Hkyô

Hau htàng, yhang gi, Damaskuq myuq mâ é chángzô pé eq rahá rayoq zo zùm yap nyi uchyang, ²⁰ Yesuq gi, Garai Gasàng é Yhangzo nghut é hkyô, haú hkûn jáng tarajong pé má hko kyô nyi bê nghut ri.

²¹ Sholuq é dang lé wó gyô é lhunglhang bang gi, maú byuq bùm kômù, "Shí yuq gi, Yerusalem wà mó má mying haú lêng é bang lé lhoq hten lhoq hpyoq sù nghut lhê, a nghut kó lhú? Ahkuí, shí má le, haú su é bang lé chyup yû mù, hkyangjong agyi pê chyáng lô ap râ da luí jé lé é sù a nghut kó lhú?" ga myi bum akô. ²² Sholuq kúm gi, a-tsam je bo lò mù, Damaskuq myuq má nyi é Yudaq byu pé lé taí hpyi kyo luí, Yesuq gi, Hkrisduq yhang nghut nyi é hkyô lé saksé tûn shit ri.

²³ Buinyí tsómra myáng é htàng má, Yudaq byu pé gi, yhang lé sat pyám râ matú

haq dâ akô. ²⁴ Nghut kôlhang, yhangmoq dâ é hkyô lé Sholuq sê pyâm ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akô. ²⁵ Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, wà kyám xewâm mai lhoq nyhum hkyô kat akô nghut ri.

Sholuq, Yerusalem Wà Mó Má Taû Jé Lo É Hkyô

²⁶ Hau htâng, yhang gi, Yerusalem wà mó má jé lo é hkûn, chángzô pé eq zùm yap râ matú shikut wú kôlhang, yhang gi, chángzo dut bê hkyô lé a jing kô é yanmai, lhunglhâng bang gi, yhang lé gyuq bum akô. ²⁷ Barnaba kúm gi, Sholuq lé lagyo pé chyáng shuí lò mù, Sholuq, hkyô má Yesuq eq hkâsu kut huí é hkyô lé le, Yesuq eq yhang lé taí é dang wó gyô é hkyô lé le, Damaskuq myuq má Yesuq é myìng mai gyuq myit a bo é za hkâsu kut hko kyô é hkyô lé le, yhangmoq lé taí kyô ri. ²⁸ Haú mù, Sholuq gi, yhangmoq eq rahá Yerusalem wà mó má htoq htoq wàng wàng kut nyí uchyang, Yhumsîng é myìng mai a gyuq a kyum é za hko kyô nyi ri. ²⁹ Grik dang nyo é Yudaq byu pé eq le, taí he lhûm nyi akô; nghut kôlhang, yhangmoq gi, yhang lé sat pyám râ dâ akô. ³⁰ Haú hkyô lé, gumang wui sé kôjáng, yhang lé Kesare wà mó má jé shoq dé mù, Tarshu myuq shut nhang kat akô nghut ri.

³¹ Yuda mau, Galile mau eq Samariq mau jowò hkanmó mâ é noqkuq hpúng gi, haú yoq pé má, lhoq ging lhoq tîng é hkyô wó yû mù, nguínón nyi akô; haú Yhumsîng lé gyuq hkunggâ é hkyô má le, Chyoiyúng Woi-nyí èq lhoq pun lhoq kyîng é hkyô pé má le châng nyi mù, myô jat lo bùm bekô nghut ri.

Ainea Ge Byuq É Hkyô

³² Haú hkûn, Petruq gi, haú mau pé má hkat kûm wún uchyang, Ludaq wà mó má nyi é sân-yúng bâng chyáng ê jé ri. ³³ Haú wà má, gùngjum shí luí shit zân tup yhupjang mai a wó toq é Ainea gâ é byù rayuq lé ê myang ri. ³⁴ Haú mù, Petruq gi, "Ainea ê, Yesuq Hkrisduq, nang lé lhoq gè byi bê nghut ri, toq mù, náng é yhuphpú

hen yù aq." ga luí, yhang lé taí ri. Haú hkûn jáng, Ainea wó toq yap bê nghut ri. ³⁵ Ludaq eq Sharon pá má nyi é lhunglhâng bang gi, haú yuq lé myàng mù luí, Yhumsîng Yesuq chyáng lhing wang lo bum akô.

Dorka Ga Sû Dum Dui Lo É Hkyô

³⁶ Ahkuí, Yopa myuq má Tabihta gâ é chángzo myiwe rayuq nyi ri; myìng haú lé Grik dang dông gi, Dorka* gâ é nghut lhê. Myiwe haú gi, ge é muzó kut nyi é sù eq, asho awuí bang lé alu byí nyi é sù nghut ri. ³⁷ Haú u lé, yhang gi, nõhpyo hui mù shi ló bê nghut ri. Yhâng mâng lé gi, chi mù luí ahtoq gok má jang tô akô. ³⁸ Ludaq wà mó gi, Yopa myuq eq chyáng é yanmai, haú myuq má Petruq nyi é lé chángzô pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

³⁹ Haú hkûn, Petruq gi, toq mù, haú nhik htâng châng e ló ri. Yhang jé jáng, ahtoq pyâm gok má shuí hâng yu akô. Chuimó myhí pé lhunglhâng bang gi, yhâng nàm má yap mù ngàu uchyang, yhangmoq eq rahá nyi tô ashí hkûn Dorka hkyup é buhîng eq gotú mebu pé lé tân shit nyi akô.

⁴⁰ Petruq kúm gi, lhunglhâng bang lé htoq ló nhâng mù, hkyihput htuq luí, kyûdung mù, mâng shut lhing wú luí, "Tabihta ê, toq aq!" ga taí ri, haú hkûn myiwe haú myoq hpóng lò mù, Petruq lé myàng jáng, toq zung lo ri. ⁴¹ Petruq gi, loq lham kat mù yhang lé llang toq yù luí, lumjîng bang eq chuimó myhí pé lé wut yù mù, duì gû ap byí ri. ⁴² Haú hkyô lé, Yopa myuq mâ é bang banshoq wó gyô ló kômù luí, byù myo myo gi, haú Yhumsîng Yesuq lé lumjîng bum akô nghut ri. ⁴³ Haú mù, Petruq gi, shokuq loqmú saí é Simun ga sù eq rahá, Yopa myuq má rayoq zo nyi nyi ri.

10

Koneli É Shing-rán

¹ Ahkuí, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap mâ é nghut lhê. ² Yhang gi, tarâ hkungga myit bò luí, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myùng bang lé alu myo myo byi uchyang, Garai Gasang

* 9:36 Dorka gâ é lichyúm gi, "chochí" gâ é nghut lhê.

lé hkâ-nhám le kyûdûng nyi ri. ³ Ra-nyí lé, myinhâng sum hkyíng kô má, Garai Gasâng é maumang lagyo rayuq gi, yhâng chyáng jé mù, "Koneli ê." ga luí, yhang lé wut é lé, shing-rán mai de de myang ri.

⁴ Haû mù, haû yuq lé wú tsuq to mù, "Yhumsîng ê, hai hkyô nghut lhê lhú?" ga gyuq myit eq myí ri.

Maumang kúm gi, "Náng é kyûdung dang eq alu byí é hkyô gi, Garai Gasâng é hí má, hkungga masat dông hkyâng bê nghut ri. ⁵ Ahkuí, Yopa myuq shut byù nhang kat mù, Petruq gâ é sù Simun lé ê shuí lò nhâng aq. ⁶ Yhang gi, wuimau yàm mâ é, shokuq hkyup zô é Simun yhûm má bíng nyi ri." ga taí ri.

⁷ Koneli gi, yhang eq dang taí é maumang lagyo ló byuq jáng, dui-nhâng zoshâng í yuq eq, yhâng chyáng hkâ-nhám le châng nyi bang mâ é, tarâ hkunggâ é gyezo rayuq lé ji yù mù, ⁸ dut lai lo é hkyô banshoq, yhangmoq lé taí kyo luí, Yopa myuq shut nhang kat ri.

Petruq É Shing-rán

⁹ Htang nyí nyí-káng u lé, yhangmoq, Yopa myuq jé ló yâm má, Petruq gi, kyûdung râ ga, yhumhkûng shut doq ló ri. ¹⁰ Haû hkûn, yhang gi, zòmut luí rajung jung zô nau nyi ri; nghut kôlhang, zoshuq ru gai nyi ashí le, yhang moq byuq ló mù myoqwup shing-rán myang é gi, ¹¹ mauhkûng bóng lô mù, hpajóng mó sù é lé, myi chyûn má zui luí myigùng shut lhoq hkyô kat é azíng lé myang ri. ¹² Haû hkaû má, myigùng htoq mâ é hkyí myi hkyí dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri. ¹³ "Petruq ê, toq mù, sat zo aq." gâ é danghtê le mying htoq lo ri.

¹⁴ Petruq kúm gi, "Yhumsîng ê, haû gi, a wó dut, achâq achyut é eq a sansêng é zè lé, ngò hkâ-nhám le a zô wú." ga tû taí ri. ✧

¹⁵ Haû hkûn, "Garai Gasang lhoq san lhoq séng bê zè lé, a sanséng hkâ-nghû." ga luí, yhang lé dum taí kat ri.

¹⁶ Haû su ga sum dâm taí é htâng má, zè haû lé radá dâm mauhkûng shut wup yu ló bê nghut ri.

¹⁷ Ahkuí, Petruq gi, yhang myang é shing-rán lé haí wá nghut lhê lhú ga luí, myit maú

nyi é hkûn, haû Koneli nhang kat é bang gi, Simun é yhûm lé myang hô kômù, hkumtot má yap to luí, ¹⁸ Petruq gâ é sù Simun, yhûm haû má nyi a nyi é lé, wut myí wú akô.

¹⁹ Petruq gi, shing-rán haû lé ru myit wú nyi ashí le, Woi-nyí gi, "Wú aq, byù sum yuq nang lé ho nyi akô, toq mù gyó ló aq; ²⁰ yhangmoq gi, ngò nhang kat é bang nghut é yanmai, myit haí a úng-âng é za, yhangmoq eq rahá bo ló aq." ga taí ri.

²¹ Haû mù, Petruq gi, haû bâng chyáng gyó ló luí, "Nungmoq hô nyi é sù gi, ngò nghut lhê, haí ra luí lé kô é lhú?" ga myí ri.

²² Yhangmoq taí é gi, "Dingmán é, Garai Gasang lé gyuq hkunggâ é, Yudaq amyû lhunglhang bâng é hí má myoqdong wó é, shô up gyezau Koneli gi, nang lé yhâng é yhûm má ji hâng yù mù, nàng taí é dang gyo yù râ matú, yhang lé chyoyúng maumang lagyô eq taí shit kyô é hkyô lé wó yù luí, ngamoq lé nhang kat é nghut lhê." ga akô. ²³ Haû mù luí, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq mâ é gumang wui ra-am le châng akô nghut ri.

Koneli Lé Petruq Huí É Hkyô

²⁴ Hau htang nyí, yhangmoq gi, Kesare wà mó shut wang ló akô. Koneli gi, yhâng é gumang wui eq buinùm ji-myi wui lé ji tsíng to mù, yhangmoq lé lánng nyi ri.

²⁵ Petruq wang ló jáng, Koneli gi, te yù mù, yhâng é hkyí wang má paí gop noqkuq ri.

²⁶ Petruq kúm gi, "Toq aq, ngò le byù ru nghut lhê." ga luí, taí uchyang yhang lé tu toq ri.

²⁷ Haû mù, Petruq gi, yhang eq dang nyô uchyang wang ló wú le, byù myo myo zup zíng tô bum é lé myang ri. ²⁸ Haû hkûn, yhang gi, yhangmoq lé, "Yudaq byù rayuq gi, noqkuq htùng dông tûngbau rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôlhang, ó yuq lé le achâq achyut dut ri, a sanséng dut ri nghû a ge taí é hkyô lé gi, Garai Gasang, ngo lé tûn shit bê. ²⁹ Hau é yanmai, nungmoq ngo lé ji kat é hkûn, ngò a he pyâm é za châng lé lo é nghut lhê. Haû mù luí, haí ra kô é yanmai, ngo lé ji akô nghû ngò myí nau ri." ga taí ri.

✧ 10:14 Nhong 11 lé wú aq.

³⁰ Haú hkûn, Koneli gi, "Laî lò bê myi nyí nyí, myinhâng sum hkyíng má, ngá é yhûm má, ngò kyûdûng nyi le, danso loq, duqbo é mebu wut é byu rayuq ngá é hí má yap htoq shit mù, ³¹ 'Koneli ê, Garai Gasang gi, náng é kyûdung danghtê lé le gyo byi bê; nàng alu byi é hkyô lé le, bun byi bê nghut ri. ³² Hau é yanmai, Yopa myuq shut byù nhang kat mù, Petruq gâ é Simun lé ji nhâng aq. Haú yuq gi, wuimau yàm mâ é shokuq hkyup zô é Simun yhûm má bíng nyi ri.' ga taí ri. ³³ Haú mù luí, haú hkûn jáng ngò náng chyáng byù nhang kat bê nghut lhê. Ahkuí, nàng jé é gi, gyai gê bê nghut ri. Yhumsîng yhang nang lé taí nhang é gû banshoq gyô yù rà matú, ahkuí ngamoq lhunglhang bang Garai Gasâng é hí má nghut nyi lhê." ga taí ri.

Petruq Hko Kyô É Mungdang

³⁴ Haú hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuí ngò gè gè yhang sé bê. ³⁵ Byù myû chângjup má, Yhang lé gyuq hkunggâ é eq tengmán é muzó jizó saí é sù gi, Yhang é hí má myoqdong wó nyi ri. ³⁶ Nyi mi-nyì, joq mijoq é Yhumsîng, Yesuq Hkrisduq é yanmai, nguingón hkyô eq sêng é gabú danglù lé hko kyo sháng gaq ga, Israelaq byu pê chyáng Garai Gasang hun kat é mungdang eq rajung za, ³⁷ baptisma hkyô lé, Yohan hko é htâng, Galile mau mai Yuda mau banshoq má taí pyo ló é hkyô lé, nungmoq sé gû nghut nyi lhê. ³⁸ Haú gi, Garai Gasâng eq Chyoiyúng Woi-nyí eq wum-o a-tsam byi to bê sù, Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat èq zing-ri huí é bang banshoq lé lhoq gê byi wún ri.

³⁹ Haú mù, Yudaq byu pê é ming má le, Yerusalem wà mó má le, yhang zui saí bê muzó banshoq é saksê pé gi, ngamoq nghut nyi lhê. Haú yuq lé yhang, yhangmoq sik zing má jén sat pyám bekô nghut ri. ⁴⁰ Garai Gasang kúm gi, sum nyí nghû rà buinyi má, haú yuq lé lhoq dui toq kat é nghut mù luí, byù banshoq é hí má a nghut e za, saksé kut rà matú Garai Gasang hkyin to gù nghut é bang ngamoq é hí má za htoq shit bê nghut ri. ⁴¹ Yhang shi é mai dum dui toq ló é htâng má, ngamoq yhang, Yhang eq rahá

razo rashuq wó kut yu é nghut lhê. ⁴² Yhang gi, asak dui é bang eq shi bê bâng é tarâ agyì kut rà matú, Garai Gasâng eq Yhang lé hkyin tô é sù nghut é hkyô lé, byu pé lé hko kyo rà eq, saksé hkám rà matú, ngamoq lé hkunmó hkyô to bê nghut ri. ⁴³ 'Yhang lé lumjíng é bang yuq hkangmó gi, Yhâng é mying é yanmai, yubak hkyut pyám byi é hui kó rà nghut lhê.' ga luí, taí é myiqhtoi banshoq gi, Yhâng é hkyô lé saksé hkam byi é bang nghut nyi akô." ga taí ri.

Chyoiyúng Woi-nyí Lé, Tungbaù Pé Wó Hap Yu É Hkyô

⁴⁴ Petruq gi, haú hkyô lé ru taí nyi ashí le, dang haú wó gyô é banshoq bâng ahtoq má Chyoiyúng Woi-nyí gyó jé lo ri. ⁴⁵ Tungbaù pé é htoq má lhang Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjíng bang Yudaq byu pé gi, maú bum akô. ⁴⁶ Hkâsu mù gâ le, yhangmoq gi, laklaí dang nyo é lé le, Garai Gasang lé hkya-on kô é lé le, wó gyô bùm kô é yanmai nghut ri.

⁴⁷ Haú mù, Petruq gi, "Ngamoq su Chyoiyúng Woi-nyí hkâm yù bê bang lé, baptisma a byi nhâng rà gi, wui lé ó yuq wó hkâm to rà lhú?" ga taí ri. ⁴⁸ Hau htâng, yhang gi, yhangmoq lé Yesuq Hkrisduq é mying lang luí wui-myhup hkâm yù rà matú pying tô ri. Haú hkûn, yhangmoq gi, Petruq lé buinyi ra-í nyí, nyi gyó shi aq ga chòm hkâm akô.

11

Petruq, Yhang Kut É Muzó Lé Shit Kyô É Hkyô

¹ Tungbaù pé le, Garai Gasâng é mungdang lhom yù bê gâ é hkyô lé, lagyo pé eq Yuda mau pé mâ é gumang wui wó gyô akô. ² Haú mù, Petruq, Yerusalem wà mó má doq ló é hkûn, ahpyo-kuq hpyit hkyô lé myit zuq é lumjíng bang gi, ³ "Nàng gi, ahpyo-kuq a hpyit é bâng é yhûm má wàng mù, yhangmoq eq razo rashuq kut ri." ga luí, yhang lé mara lhom taí hun bum akô.

⁴ Haú hkûn, Petruq gi, haú dut lò bê hkyô lé awang mai ahpyo hpyot, yhangmoq lé taí sân kyô hi kat é má, ⁵ "Ngò gi, Yopa myuq má kyûdûng nyi le, moq byuq ló mù shing-rán myang é gi, mauhkûng mai hpajóng mó sù é myi chyûn shut zui luí,

ngá shut lhoq hkyô kat é zè gyó jé lo é lé, myang ri. ⁶ Haú lé rago za saí wú le, myigùng htoq má hkyî myi hkyî dap é jung dusak, yosô zè, dô yê é jung eq, maulat nghoqzô pé bo tô é lé, ngò myàng luí, myit wú nyi é hkûn, ⁷ 'Petruq ê, toq mù, sat zo aq.' gâ é danghtê lé, ngò wó gyô ri.

⁸ Ngò kúm gi, 'Yhumsîng ê, haú gi, a wó dut, achag achyut é eq a sansêng é zè, ngá é nhut má hkâ-nhám le a wang wú.' nghû taí kat é nghut lhê.

⁹ Haú hkûn, 'Garai Gasang lhoq san lhoq yúng bê zè lé, a sansêng hkâ-nghû.' ga luí, mauhkung mai dum taí kat ri. ¹⁰ Haú su ga sum dâm taí é htâng má, haú pé banshoq lé mauhkung shut dum wup yu lô bê nghut ri.

¹¹ Haú hkûn jáng, Kesare wà mó mai, ngá chyáng nhang kat é byù sum yuq gi, ngò nyi é yhûm hkumtot má jé nyi tô akô. ¹² Chyoiyúng Woi-nyí gi, ngo lé myit a úng-âng é za, yhangmoq htâng châng ê aq ga taí ri; shí gumang hkyuq yuq le ngò eq rahá ê mù, Koneli é yhûm má ngamoq wang é. ¹³ Haú hkûn, haú yuq gi, yhâng é yhûm má maumang lagyo lé htoq shit é hkûn, yhang hkâsu myang é hkyô lé le; maumang lagyo éq yhang lé, 'Yopa myuq shut byù nhang kat mù, Petruq gâ é sù Simun lé ê jî nhâng aq; ¹⁴ nàng eq náng yhumbyù lunglhang bang hkyi yù hui râ danglù, yhang, náng chyáng wun lé lô byi râ nghut lhê.' ga taí é hkyô lé le, ngamoq lé taí kyô ri.

¹⁵ Ngò dang taí hi lô nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. ¹⁶ Haú hkûn sheq, ngò gi, 'Yohan gi, wui èq wui-myhup hkám byí ri; nungmoq kúm gi, Chyoiyúng Woi-nyí èq wui-myhup hkám byí é hui kó râ nghut lhê.' ga luí, Yhumsîng taí é dang lé bûn kat ri. ¹⁷ Haú mù luí, Yhumsîng Yesuq Hkrisduq lé lumjîng é hkûn, ngamoq lé Garai Gasâng jeju chyunghuq byí é su, Yhang, yhangmoq lé le byí é nghut le gi, ngò gi, hkasû é byù nghut luí, Garai Gasang lé wó lhom hkûm pyám râ lú?" ga taí ri.

¹⁸ Yhangmoq gi, haú hkyô lé wó gyo kôjáng, taí jang a joq lo kômù, "Ó! Nghut bê, Garai Gasang gi, tungbaù pé lé le, asak duì râ matú myit lîng hkyô byi bu-nhung!"

ga luí, Garai Gasang lé chôm hkya-ôn akô nghut ri.

Antioku Wà Mâ É Noqkuq Hpúng

¹⁹ Ahkuí, Stehpan lé sat pyám kô é htâng má, zing-ri hui kô é yanmai, byo myín lô é bang gi, Hpinisi mau, Kupru zinlóng eq Antioku wà mó jé shoq byo lô kômù, Yudaq byu pé lé baú za, mungdang haú hko kyô akô nghut ri. ²⁰ Nghut kôlhang, yhangmoq mâ é Kupru byù eq Kuruni byù ra-am gi, Antioku wà mó má châng jé lô kômù, Yhumsîng Yesuq é gabú danglù lé, Grik pé lé le taí kyô bum akô. ²¹ Haú Yhumsîng é loq gi, yhangmoq eq rahá nghut nyi mù luí, byù myo myo gi, lumjîng mù, Yhumsîng chyáng lîng wang lo bùm bekô nghut ri.

²² Haú bâng é hkyô lé, Yerusalem noqkuq hpúng é no má hkyang jé lô é nghut mù luí, yhangmoq gi, Barnaba lé Antioku wà mó jé shoq nhang kat akô. ²³ Yhang jé é hkûn, Garai Gasâng jeju bo nyi é lé myàng jáng, yhang gi, gabú luí, yhangmoq é myit nhiklhum banshoq èq haú Yhumsîng má lhumzuí nyi râ matú, lunglhang bang lé myit wum byí ri. ²⁴ Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjîng myit le byíng tô é sù nghut nyi ri. Haú mù, byù myo myo gi, haú Yhumsîng chyáng jat wang lo bùm bekô nghut ri.

²⁵ Hau htâng, Barnaba gi, Sholuq lé ê hô râ ga Tarshu myuq shut ê mù, yhang lé myàng jáng, Antioku wà mó má shuí lo ri. ²⁶ Haú mù, yhangnhik gi, razàn gón noqkuq hpúng haú eq rahá zum nyi kô é nghut mù luí, byù myo myo lé wó mhoqshit akô. Chángzô pé gi, Hkristan gâ é myìng lé, Antioku wà mó má sâng-hi wó yù bekô nghut ri.

²⁷ Haú u lé, myiqhtoí pé ra-am gi, Yerusalem wà mó mai, Antioku wà mó má lé jé bum akô. ²⁸ Haú bang mâ é Agabu gâ é sù gi, toq yap mù, Romaq mingkan tîng má mutmó gyó lô râ nghut é hkyô lé, Woi-nyí èq tûn shit é dông taí kyô ri; (Haú gi, hkohkâm Klodi é pyat má dut bê nghut lhê.) ²⁹ Haú mù luí, chángzô pé gi, Yuda mau mâ é gumang wui lé, ó le ó wó dut é myhó garum kat râ ga, myit hpyit yu bum akô. ³⁰ Haú eq rajung za kut kômù, yhangmoq gi, chyunghuq haú pé lé Barnaba eq Sholuq

nhik é loq mai suwún wui pê chyáng hun kat bekô nghut ri.

12

Petruq, Htóng Mai Wó Lut Htoq Lo É Hkyô

¹Haú u lé, Herut hkohkâm gi, hpúng byû ra-am lé chyup yû mù, zing-ri râ ga ngantsâ nyi ri. ²Haú mù, Yohan é yhangmang Yakuq lé sham èq sat pyám nhang ri. ³Haú hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haú dut é gi, mún a kat é muk zo poî u lé nghut ri. ⁴Herut gi, Lhoqlhai Poî lai jáng sheq, mingbyû wui hí má jéyáng râ ga myit tô é yanmai, yhang lé chyup yu é htâng má, htóng má lhung to mù, yhang lé zúng râ matú, gyè myi yuq yuq kut myi hpúng lé ap tô ri.

⁵Haú mù, Petruq gi, htóng má lúng tô ri; hpúng byû wui kúm gi, yhang é matú Garai Gasâng chyáng kyû gyai chôm dung byî nyi akô nghut ri.

⁶Petruq gi, Herut èq yhang lé jéyáng râ matú she htoq yû râ hí myìn lé, shamtoq-tui í hkat èq tuí é hui luí, gyezo í yuq é gyoro má yhup myhî tô ri; zúng é bang le htóng hkum má zúng nyi bum akô. ⁷Haú hkûn, Yhumsing é maumang lagyo rayuq lé htoq shit mù, gok haú má duqbó lo ri. Maumang lagyo haú gi, Petruq é namcham má ê hpuk kat mù, "Myap toq wú aq." ga nhaú ri; haú hkûn, Petruq é loq mâ é toqjâng tui pé le gyut gyó ló bê nghut ri.

⁸Maumang dum taí é gi, "Hpyihit hit mù, hkyî-tsung tsung aq." gâ ri; Petruq le taí é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum taí ri. ⁹Haú hkûn, yhang gi, htóng mai yhâng htâng châng htoq ló ri; nghut kôlhang, maumang lagyo kut é muzó haú gi, gè gè nghut é lé, yhang a sé mù, shing-rán myang é nghut ri ga myit yu ri. ¹⁰Ahkuí, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haú le yhang baú bóng lô mù, yhangnhik htoq luí, wà hkyô rahkat má sô ló le, maumang lagyo gi, haú hkûn jáng, yhâng chyáng mai gâng ló byuq bê nghut ri.

¹¹Ahkuí, Petruq gi, dum bûn gyîng lò jáng, "Yhumsing gi, Yhâng é maumang lagyo lé nhang kat mù, Herut é loq eq

Yudaq byu pé myit myoqbyû tô é hkyô banshoq mai, ngo lé hkyi yû bê nghut é lé, ahkuí ngò gè gè sé bê." ga taí ri.

¹²Haú hkyô lé myit sê kat jáng, yhang gi, byû myo myo zing mù, kyûdûng nyi é jowò, Markuq gâ é Yohan é yhângnu Mariq é yhûm má jé ló ri. ¹³Haú mù, yhang gi, yhûm wàng hkum lé ló bat é hkûn, Roda gâ é dui-nhâng zoshâng myiwe zo rayuq gi, gyô wú râ ga htoq lé lo ri. ¹⁴Yhang gi, Petruq é htê nghut é lé sê gyô kat jáng, lûm gabú luí hkum a hpóng byi shî é za, yhúmhaú shut din wang ló mù, "Petruq gi, hkum mhó lut má lo yap tô ri." ga ló taí kyô ri.

¹⁵Yhangmoq kúm gi, "Nàng na bê nghut ri." ga yhang lé taí akô. Yhang gi, gè gè nghut ri ga ru taí nyi ri. Dum, yhangmoq gi, "Yhâng é maumang lagyo nghut âng ri." ga taí akô.

¹⁶Nghut kôlhang, Petruq gi, hkum ru bat nyî mù, yhangmoq hpông kat é hkûn, yhang lé myàng kôjáng, chôm máu byuq bum akô. ¹⁷Yhang gi, yhangmoq lé zim za nyi keq ga loq lik shit mù, yhang lé Yhumsing èq htóng mai hkâsu kut shuí htoq yu é hkyô lé taí kyo luí, "Shí hkyô lé Yakuq eq gumang wui lé taí kyô kat keq." ga taí ri. Hau htâng, yhang htoq ló luí, jowò gó shut e ló bê nghut ri.

¹⁸Ahkuí, maubó jáng, gyezô pé gi, Petruq haú dut byuq é hkyô lé a sé kô é yanmai, gyai máu gabyông bum akô. ¹⁹Herut kúm gi, Petruq lé ho wú le a myàng jáng, zúng é bang lé myî gôn wú mù, yhangmoq lé sat pyám râ matú hkunmó hkyô ri.

Herut Hkohkâm Shi Byuq É Hkyô

Hau htâng, yhang gi, Yuda mau mai Kesare wà mó má gyó ló mù ló nyi nyi ri. ²⁰Haú gyoro má, Herut hkohkâm gi, Turuq eq Sidun byu pé lé gyai nhik-yô nyi ri. Haú mù luí, yhangmoq gi, myit rahkat zâ èq yhâng chyáng ê mù, Blastu gâ é, hkohkâm wa lum tô é suwún hpó lé ê lûm hkaú mù, simsaq hkyô ê dúng akô. Hkâsu mù gâ le, yhangmoq é zoshuq wó râ matú gi, Herut é ming lé lûm hkaú nyi kô é yanmai nghut ri.

²¹Haú hkûn, ding lûm tô é buinyi má, Herut gi, hkohkâm hking wut chûng mù, hkohkâm tanghkuq má zùng luí, yhangmoq lé hkohkâm mungdang byî ri. ²²Haú

jáng, mingbyû wuì gi, "Htê shî gi, waxâng byu é htê a nghut, garai wá é htê sheq nghut ri." ga garû bum akô. ²³ Radá dâm, Herut gi, Garai Gasâng é hpungwup shing kang lé a tê byî é yanmai, Yhumsing é maumang lagyo gi, yhang lé dâm byi luî, yhang gi, luq eq hkê é hui mù, shi byuq bê nghut ri.

²⁴ Haû Garai Gasâng é mung dang gi, sê é bang myô jat lò mù, je riyhang byo myín lò bê nghut ri.

²⁵ Barnaba eq Sholuq nhik gi, Yerusalem wà mó má yhangnhik saî tûm nyi é muzó ban saî jáng, Markuq gâ é Yohan lé shuí chûng mù, Antioku wà mó shut taû lô bekô nghut ri.

13

Barnaba Eq Sholuq, Hkyin Nhang Kat Huî É Hkyô

¹ Ahkuî, Antioku wà mó mâ é noqkuq hpúng má, myiqhtoî pé eq sará pé le lom nyi akô. Haû bang gi, Barnaba, Niger* gâ é Simeon, Kuruni byù Luki, (Herut zau hpó eq zum kô lò sù) Manaen eq Sholuq pé nghut akô. ² Yhangmoq gi, zoshuq gám luî Yhumsing lé noqkuq dojaú nyi é hkûn, Chyoiyúng Woi-nyí gi, "Ngá é mú wùn waq râ matú ji tô é Barnaba eq Sholuq nhik lé, hkyin to keq." ga taí ri. ³ Haû mù luî, yhangmoq gi, zoshuq gám luî kyûdung mù, yhangnhik ahtoq má loq ke byi kô é htâng, yhangnhik lé nhang htoq kat akô nghut ri.

Kupru Zinlóng Má Dut É Hkyô

⁴ Haû mù, yhangnhik gi, Chyoiyúng Woi-nyí eq nhang kat é eq rajung za, Seluki wà shut gyó lò mù, haû mâ é lhaî ji luî, Kupru zinlóng má jé lò luî, ⁵ Salami wà mó má nyi nyi é hkûn, Yudaq byu pê é tarajong pé má, Garai Gasâng é mung dang hko kyô akô. Markuq gâ é Yohan le yhangnhik lé htuqluq htuqbang kut nyi ri.

⁶ Yhangmoq gi, haû zinlóng mai láí byit e lò mù Pahpu wà mó jé lò kô é hkûn, myiqhtoî pyoq nghut sù Bara-Yesuq gâ é Yudaq byù myoqheq sará rayuq eq htung hui akô. ⁷ Haû yuq gi, Sergi Poluq gâ é, myit hpaqchyî kung é ginwáng zau hpó é byù rayuq nghut lhê. Minggyi hpó haû gi, Garai Gasâng é mung dang gyô yù naù mù,

Barnaba eq Sholuq nhik lé ji yu ri. ⁸ Haû hkûn, myoqheq sará gâ é lichyúm dông myhîng é Eluma le gâ é Bara-Yesuq kúm gi, ginwáng zau hpó lé haû lumjîng hkyô má a jau lô nhâng nau é nghut mù luî, yhangnhik lé lhom he tang pyâm ri. ⁹ Haû hkûn, Poluq le gâ é Sholuq gi, Chyoiyúng Woi-nyí byíng mù, yhang lé wú tsuq to luî, ¹⁰ "Myit goí é hkyô eq hpuq lô lhik é hkyô banshoq byíng tô é, nat é yhangzo nghut sù, tengmán hkyô hkangmó é gyè hpó ê, Yhumsing é tengmán hkyô lé a lhoq hpyoq é a wó nyi lhú? ¹¹ Ahkuî, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq râ nghut lhê." ga taí ri.

Haû hkûn jáng, yhâng é myoq gi, myhî-myhà ga luî mauchut tuq dut lò byuq ri; haû mù, yhang lé shê râ byù ho sop lhîng wún ri. ¹² Haû hkyô lé ginwáng zau hpó myàng jáng, Yhumsing eq sêng é mhoqshit é hkyô lé wú maú luî lumjîng bê nghut ri.

Antioku Wà Mó Má Dut É Hkyô

¹³ Haû htâng, Poluq eq yhâng luzúm wuì gi, Pahpu wà mó mai lhaî ji mù, Pamhpuli mau mâ é Perga wà má jé lò akô. Markuq gâ é Yohan kúm gi, yhangmoq eq gang luî, Yerusalem wà mó shut taû lú byuq bê nghut ri. ¹⁴ Dum, yhangmoq gi, Perga mai toq e lò le, Pesidi ginwáng mâ é Antioku wà mó má jé lò akô. Bánno buinyi má, yhangmoq gi, tarajong má wang zung tô akô. ¹⁵ Haû hkûn, Mosheq é tarâ laiká eq myiqhtoî laiká pé lé ban nghap jáng, tarajong má up bang gi, "Gumang wuì ê, mingbyû wuì lé myit wum byi dang joq kô é nghut le gi, ahkuî taí lo keq." ga luî, yhangmoq chyáng taí nhang kat ri.

¹⁶ Haû hkûn, Poluq gi, toq yap mù, zîm byuq kó sháng gaq ga loq tû luî, "Israellaq byu pé eq Garai Gasang lé gyuq hkunggâ é byu pé ê, chôm gyô yù keq. ¹⁷ Israellaq byu pê é Garai Gasang gi, ngamoq é îchyí îkê pé lé hkyin yù bê nghut mù luî, Egutuq ming má byùbing dut nyi to ashî hkûn, yhangmoq lé kô myhâng nhâng mù, hpungwup a-tsam bo é loq eq haû mau mai shuí htoq lò ri. ¹⁸ Dum, myi xê zàn kô, yoso pé má yhangmoq é a-kyang lé jân pyám byi mù, ¹⁹ Hkanaan ming mâ é byuhú nyhit hú lé lhoq

* 13:1 Grik dong Niger gâ é gi, byù noq gâ é nghut lhê.

htên pyám luí, haú bâng é mingdán mâ é silí wunlí yhangmoq lé gàm byî ri. Haú gi, myi shô ngo xê zàn kô myáng ri.

²⁰Hau htâng má, Garai Gasang gi, myiqh-toi Samuelaq é pyat jé shoq tarâ agyí pé lé to byî ri. ²¹Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyû mâ é, Kisha é yhangzo Sholuq lé byi luí, yhang gi, myi xê zàn up bê nghut ri. ²²Hau htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut râ nghut lhê.' gâ ri.

²³Garai Gasang gi, Yhâng é danggididj joq é eq rajung za, Israelaq byu pé é matú, haú yuq é awut ashín mai, hkyi yù Sû Yesuq lé, pô htoq nhâng bê nghut ri. ²⁴Yesuq a jé lé shimá, Yohan gi, Israelaq byu pé banshoq lé myit lêng hkyô eq sêng é baptisma hkyô lé hko kyo bê nghut ri. ²⁵Dum Yohan gi, yhang zuí é muzó ban ló é u lé, 'Ngo lé ó nghut é su ngâm tô akô lú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyî-tsung tui hpyî râ lhang ngò a gíng.' ga taí ri.

²⁶Abraham é yhangzo yhangshû pé eq Garai Gasang lé gyuq hkunggâ é tûngbaù, gumang wuè ê, shî hkyi yù hkyô mungdang lé, nga-nhông chyáng byi kat bê nghut ri. ²⁷Yerusalem wà mó mâ é bang eq, yhangmoq é zau suwún wuí gi, Yhang hkyi yù sù nghut é lé le, Bánno buinyi hkangmó nghap é myiqhtoí pé é dang lé le, a sê gyo kô é yanmai, Yesuq lé sat râ doqdân é hkûn, myiqhtoí pé é dang lé lhoq dik pyám bekô nghut ri. ²⁸Yhâng chyáng shî gíng é mara a myàng kôlhang, Yhang lé sat pyám nhâng râ matú, Pilat chyáng dúng akô. ²⁹Yhangmoq gi, yhang eq séng luí, kê to má kê to ban lhoq dik kôjáng, Yhang lé tapzîng mai yu hkyó mù, lup má kat tô akô nghut ri. ³⁰Garai Gasang kúm gi, Yhang lé shi é mai lhoq dui toq yú bê nghut lhê. ³¹Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyi tsómra myáng shoq htoq shit shit kut ri. Haú bang gi, ahkuí,

nga-nhông Israelaq byu pé é hí má, Yhâng é saksé dut bekô nghut ri.

³²Haú mù, í dam lhê é Hkya-on Kungtôn Laiká má,

'Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê.' ✧

ga luí, kê tô é eq rajung za, ³³Garai Gasang gi, îchyí îwâ pé lé byi tô é danggididj lé, Yesuq lé lhoq dui toq byî é dông, yhangmoq é yhangzo yhangshu ngamoq é matú, lhoq dik byî é gabú danglù lé, nungmoq chyáng ngamoq wun lé byi bê. ³⁴Hau htoq agó, Yhang htên byoq é hkâ-nhám a hui shoq, shi é mai lhoq dui toq yú râ hkyô eq séng luí, Garai Gasang taí é gi,

'Dawiq lé byî tô é danggididj eq rajung za, chyoiyúng é eq lungíng é jeju lé, ngò nungmoq lé byi râ nghut lhê.' ✧

gâ ri. ³⁵Hkya-on Kungtôn Laiká gó wô má le,

'Náng é Chyoiyúng Sû lé, Nàng htên byoq nhâng nau râ a nghut.' ✧

ga taí tô ri.

³⁶Ahkuí, Dawiq gi, yhâng é pyat banshoq má Garai Gasang ô nau é dông ban wùn waq jáng, shi byuq luí, îchyí îwâ pé eq rahá myhup pyám hui mù, htên byoq byuq é hui bê nghut ri. ³⁷Garai Gasang lhoq dui toq yu é sù kúm gi, htên byoq huí é a nghut.

³⁸Haú nghut é yanmai, gumang wuè ê, haú yuq mai yubak wó hkyut pyám byî é hkyô lé, nungmoq lé hko kyô nyi é nghut é le, sê nyi keq. ³⁹Hau htoq agó, Mosheq é tarâ eq mara hkyut san byî é a hui kôlhang, haú yuq lé lumjîng é bang gi, hkyô lhumjup má mara hkyut san byî é hui râ nghut lhê.

⁴⁰Hau é yanmai,

'Wú keq, jihpoí é bang ê, maú mù luí htum byuq keq;

nungmoq é buinyi pé má ngò rajung jung kut htoq râ nghut lhê;

⁴¹haú hkyô lé, rayuq yuq, nungmoq lé hkaí kyo kôlhang, jîng kó râ a nghut.' ✧

ga luí, myiqhtoí pé taí é dang, nungmoq má a ang sháng gaq, sidiq nyi keq." ga hko kyô nyi ri.

⁴²Ahkuí, Poluq eq Barnaba nhik tarajong mai htoq ló le, htâng lhê é Bánno buinyi má le, haú pé lé dum hkaí kyo râ matú yhangmoq chôm dúng akô. ⁴³Chôm byo htoq ló kô é hkûn, Yudaq byu pé eq Yudaq

✧ 13:32 Hkya-on 2:7

✧ 13:34 Esai 55:3

✧ 13:35 Hkya-on 16:10

✧ 13:41 Hbk 1:5

noqkuq htông má lhing wang lo é tarâ hkunggâ é byù myo myo gi, yhangnhik é htông má châng bùm kô é nghut mù luî, Garai Gasâng jeju má gîng nyi râ matú, yhangnhik gi, yhangmoq lé lhoq pun lhoq kyîng akô nghut ri.

Tûngbaù Pê Chyáng Lhing Lo É Hkyô

⁴⁴Hau htang lhê é Bánno buinyi má, Garai Gasâng é mungdang gyô yù râ matú, rawa bang aluq shoî banshoq, lé zup zîng to bum akô. ⁴⁵Yudaq byu pé kúm gi, byù moq mó haù lé myàng jáng, manon myit baù byíng bùm kômù luî, Poluq taí é dang lé taí htîng é eq nhîng pyâm akô.

⁴⁶Poluq eq Barnaba le gyuq myit a bo é đông taí é gi, "Garai Gasâng é mungdang lé, nungmoq lé hí taí kyo râ dut é yanmai, ngá-nhik taí bê nghut lhê. Nghut kôlhâng, nungmoq gi, haù lé lhom he-ngik pyâm kômù, ahtum abyuq é asak eq gingdán é đông yhumsing gùng lé a myit yù kô é yanmai, wú keq, ahkuî, ngá-nhik gi, tûngbaù pê shut lhing ló berâ nghut lhê. ⁴⁷Hkâsu mù gâ le, haù Yhumsîng gi,

'Hkyi yù hkyô lé maumyî htum shoq wó chûng jé râ matú, Ngò, nàng lé tûngbaù pê é maubó dut nhâng bê.'[☆]
ga luî, ngamoq lé hkunmó hkyó kat bê." gâ ri.

⁴⁸Tûngbaù pé gi, dang haù lé wó gyo kôjáng, gabú é eq Yhumsing é mungdang lé hkya-on kungtôn nyi bum akô. Ahtum abyuq é asak lé wó râ matú hkyin to huí é lhunglhang bang le, lumjîng bum akô nghut ri.

⁴⁹Yhumsîng é mungdang gi, haù ming gón jam lò bê nghut ri. ⁵⁰Yudaq byu pé kúm gi, Poluq eq Barnaba nhik lé zing-ri râ matú, aróng wó é myiwe wuî mâ é tarâ hkungga bang eq, haù wà mâ é suwún wuî lé, nhik lhoq yo kôluî, yhangnhik lé maukyo mai chôm hkat htoq pyâm akô. ⁵¹Yhangnhik gi, yhangmoq lé a nau é hkyô tân shit é đông, yhumsing é hkyî mâ é hpuilhaù lé yhangmoq chyáng ko hkyô pyâm to kômù, Ikoni wà mó shut ló byuq bekô nghut ri. ⁵²Chángzô pé kúm gi, gabú é htoq agó, Chyoiyúng Woi-nyí byíng nyi bum akô nghut ri.

14

Poluq Eq Barnaba Nhik, Ikoni Wà Mó Má Ló Jé É Hkûn Lhê Hkyô

¹Ahkuî, Ikoni wà mó má nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byù eq tûngbaù pé ajùm ayò lumjîng bùm kó shoq, wum kat hko kyô akô. ²Nghut kôlhâng, a lumjîng é Yudaq byu pé gi, lumjîng é gumang wuî lé a ngui râ đông tûngbaù pé lé mhoq hpyoq yù mù, shuî gumlaù akô. ³Haù mù luî, yhangnhik gi, tsómra myang shoq haù má nyi mù, haù Yhumsing é matú gyuq myit a bo é za hko kyô akô; Yhang Yhumsîng le yhangnhik é loq mai limik kumlhá eq mauhpo muzó dut nhang é đông, Yhâng é jeju mungdang lé saksé hkám byî nyi ri. ⁴Haù wà mâ é bang kúm gi, myit byo ló bùm kô é nghut mù luî, Yudaq byu pé chyáng ra-am, lagyo pê chyáng ra-am, lom byuq ló akô. ⁵Ahkuî, tûngbaù pé le, Yudaq byù eq yhangmoq é uphkâng bang le, yhangnhik lé rhoî mù luqgok èq dú sat râ ga htîm lo bum akô. ⁶Nghut kôlhâng, yhangnhik gi, haù hkyô lé bûn sê kat kôjáng, Lukaoni ginwáng mâ é Lustra eq Derbe wà mó eq, hau é awui ayàm wà tiq wà zo pé shut hpanq e ló akô. ⁷Haù pé má le, gabú danglù xoq hko kyô wún akô nghut ri.

Lustra Wà Mó Má Ló Jé É Hkûn Lhê Hkyô

⁸Ahkuî, Lustra wà mó má, înu unghkaù mai hkyî hten mù luî, hkâ-nhâm le hkyô a wó sô wú é sù rayuq zung tô ri. ⁹Yhang le Poluq taí é dang lé gyô nyi ri. Poluq gi, haù yuq lé wú tsuq kat é hkûn, wó lhoq gê byi hui râ nghut lhê gâ é lumjîng myit yhâng chyáng bo tô é lé, myàng byî ri. ¹⁰Haù mù, Poluq gi, "Toq yap aq!" ga luî, htê mó èq yhang lé taí kat jáng, yhang gi, byam toq kat mù, wó so bê nghut ri.

¹¹Haù mù, Poluq kut é muzó lé shiwa byu pé myàng kôjáng, yhangmoq gi, Lukaoni dang đông, "Nat hparà pé gi, byù gùng đông kut luî ngamoq chyáng gyó lô bekô nghut ri." ga luî, wut garu bum akô. ¹²Hau htông, Poluq gi, dang myô taí sù nghut é yanmai, yhang lé Herme ga, Barnaba lé gi, Zeu ga myhíng byî akô. ¹³Haù wà yàm mâ é Zeu hparà noqkuq yhûm hkyangjong hpó

[☆] 13:47 Esai 49:6

gi, và hkum má nohtó pé eq ban hkóng pé yu lé mù, shiwa byu pé eq rahá yhangnhik lé hkungga nhông byi rã hen akô.

¹⁴ Nghut kôlhang, lagyo nhik Barnaba eq Poluq gi, haû lé wó gyo kôjáng, yhumsing é mebu láng cheq pyám kôluí, shiwa hpong gung gung shut đin wang é kômù, garú táí kô é gi, ¹⁵ "Hkaû pé ê, haû mù haû su kut lo akô lhu? Nga-nhik le nungmoq eq rajung za, xângzo byù za nghut lhê, akyû a bo é hkyô shí pé lé tô pyâm to mù, mauhkung eq myigùng, wuìshuq lung-aû eq haû pé má nyi mi-nyì, joq mijoq lé hpan to sũ, rũ dui nyi é Garai Gasâng chyáng lhing wang lò kó sháng gaq nghũ luí sheq, nungmoq lé gabú danglũ hko kyô é nghut lhê. ¹⁶ Garai Gasang gi, byù myũ chângjup lé hí hpyang lhê é pyat bán má ó le ó kãm é đong kut nhâng bê nghut ri. ¹⁷ Nghut kôlhang, Yhang gi, mauhkung mai mau wô nhâng luí, kyôshi zúí nhang é ahkyíng yam-yoq byi mù, nungmoq lé zoshuq agùn agó byi é eq, nungmoq lé i-myit ngón nhang nyi é đong, Yhang ge é hkyô lé tũn shit mù, Yhang nyi é hkyô lé saksé hkãm nyi ri." ga akô. ¹⁸ Haû su ga táí kô le lhang, yhangnhik lé shiwa byu pé mai hkungga nhông byi rã hkyô lé, yhangnhik gi, gyai wuihke luí sheq wó hkũm pyâm akô nghut ri.

¹⁹ Hau htâng, Antioku và mó eq Ikoni và mó pé mã é Yudaq byu pé ra-am lé jé kômù, shiwa byu pé lé shuì-u luí, Poluq lé luqgok èq chôm dú kômù, yhang lé shi byuq bê su ngàm kô é yanmai, và shinggan shut shê hkyut htoq pyâm akô. ²⁰ Nghut kôlhang, Poluq gi, yhâng é lhinghkyuq má chángzô pé yap tô kô é hkũn, toq mù và shut tau wang ló ri. Hau htang nyí, yhang gi, Barnaba eq rahá Derbe và mó shut e ló bekô nghut ri.

Antioku Và Mó Mã Taû Jé Ló É Hkyô

²¹ Haû wã mã yhangnhik èq gabú danglũ hkô kyo kô é yanmai, byù myo myo gi, chángzô pé dut lo akô. Hau htâng, yhangnhik gi, Lustra, Ikoni, Antioku và mó hkyô dum taû ló kômù, ²² chángzô pé lé myit lhoq ging byi uchyang, haû lumjíng hkyô má ru gíng nyi rã matú myit wum byi akô. "Nga-nhúng gi, Garai Gasâng é mingdán mã wàng rã matú, wuìhke jamjau

myo myo hui ra rã nghut lhê." ga le, mhoqshit akô. ²³ Yhangnhik gi, noqkuq hpúng hkangmó mã, hpúng suwún kut rã bang lé hkyin yù mù, zoshuq gám luí kyúdung mù, yhangmoq lumjíng nyi é Yhumsing Garaí chyáng ap byi tô akô. ²⁴ Hau htâng, yhangnhik gi, Pesidi ginwáng mai laí byit ló mù, Pamhpuli ginwáng mã jé ló akô nghut ri. ²⁵ Haû ginwáng mã é Perga và mó mã mungdang hko kyo luí, Atali và mó shut laí gyó ló akô nghut ri.

²⁶ Haû mai, lhaí ji mù, ahkuí yhangnhik wùn waq laí ló bê muzó é matú, Garaí Gasâng jeju mã ap luí yhangnhik lé nhang kat é Antioku và mó mã dum jé lò bekô nghut ri. ²⁷ Jé lo é hkũn, yhangnhik gi, hpúng byu wuì lé wut tsing yù mù, yhangnhik đong mai Garaí Gasang kut é hkyô banshoq lé le, tũngbaù pé lé haû lumjíng hkyô hkum hpóng byi é hkyô lé le, shit kyô akô. ²⁸ Haû mù, yhangnhik gi, haû wã mã chángzô pé eq tsómra myang shoq nyi nyi akô nghut ri.

15

Ahpyo-kuq Hpyit Hkyô Eq Sêng É Manghkáng

¹ Ahkuí, Yuda mau mã é byù ra-am gi, Antioku và mó mã lé jé mù, gumang wuì lé, "Nungmoq gi, Mosheq é htũngtarã eq rajung za, ahpyo-kuq a hpyit é nghut jáng, hkyi yu é hui rã a nghut." ga luí, mhoqshit bum akô. ² Hau é yanmai, myit a huí lhũm é hkyô htoq lô mù, Poluq eq Barnaba nhik gi, haû bang eq gyai yhang myíng myô lhũm akô; haû mù luí, gumang wuì gi, Yerusalem và mó mã nyi é lagyô pé eq suwún wuì chyáng, haû hkyô lé ló hpyê lhum rã matú, Poluq, Barnaba nhik eq rahá, yhangmoq chyáng mã é ra-am lé, nhang kat rã ga hkyin tô akô. ³ Haû mù, hpúng byu wuì yhangmoq lé dé kat kôjáng, yhangmoq gi, Hpinisi mau eq Samariq mau gyoro mãi sô laí ló uchyang, tũngbaù pé lhing wang lò bê hkyô lé táí kyô akô. Haû mã é gumang wuì lé gyai yhang gabú nhang akô nghut ri. ⁴ Yhangmoq, Yerusalem và mó mã jé kô é hkũn, hpúng byu wuì, lagyô pé eq suwún wuì gi, yhangmoq lé lhom hkũlum yù kô é nghut mù luí, yhangmoq gi, yhangmoq đong mai Garaí Gasang kut

é hkyô lhungháng lé, haú bang lé shit kyô akô.

⁵ Haú hkûn, Hparishe hpúng mâ é lumjúng bang ra-am gi, toq mù luí, "Tungbaù pé lé, ahpyo-kuq hpyit nhâng râ eq, Mosheq é tarâ dông cháng nhâng râ gi, ra yhang râ lhê." ga taí bum akô nghut ri.

Yerusalem Wà Mó Má Kut É Byìn Tú Wap Hpong

⁶ Ahkuí, lagyô pé eq hpúng suwún wuí gi, shí hkyô lé chôm myit wú râ ga, zup tô bum akô. ⁷ Shí hkyô lé gyai yhang dang rhâng lhûm bùm kô é htâng má, Petruq gi, toq mù luí, "Gumang wuí ê, Garai Gasang gi, ngá nhut mai taí é, haú gabú danglù lé, tungbaù pé gyô yù mù lumjúng kó sháng gaq ga, hí hkûn nungmoq chyáng mai ngo lé hkyin yù bê hkyô lé, nungmoq sé lugù nghut bê. ⁸ Haú mù, myit nhiklhûm lé sé byi sù Garai Gasang gi, nga-nhúng lé byí é eq rajung za, yhangmoq lé le Chyoiyúng Woi-nyí byí é dông, yhangmoq lé hap yù bê hkyô lé saksé tân shit bê nghut ri. ⁹ Garai Gasang gi, yhangmoq lumjúng luí, yhangmoq é myit nhiklhûm lé lhoq san lhoq yúng byi bê nghut é yanmai, nga-nhúng eq yhangmoq é gyoro má gamhkuí é hkyô a joq nhâng lo nghut ri. ¹⁰ Haú nghut le gi, íchýí íwâ pê èq le, nga-nhúng èq le a ung é wòlai lé, haú chángzô pê é lingzing má ke byí é dông mai, haí mù, ahkuí Garai Gasang lé chýam wú nyi akô lhú? ¹¹ Nghut kôlhang, ngamoq gi, yhangmoq eq rajung za, Yhumsîng Yesuq é jeju mai za hkyi yu é huí é hkyô lé lumjúng é bang nghut lhê." ga luí, yhangmoq lé taí ri.

¹² Haú hkûn, zup míng tô é bang lhungháng gi, zim za kut luí, Barnaba eq Poluq nhik mai, tungbaù pê chyáng, Garai Gasâng èq yhangnhik é loq dông limik kumlhá pé eq mauhpo muzó pé kut shit é hkyô, taí kyô nyi é lé chôm gyô nyi akô. ¹³ Yhangnhik dang ban taí kôjáng, Yakuq gi, "Gumang wuí ê, ngá dang lé gyô wú keq. ¹⁴ Garai Gasang gi, tungbaù pê chyáng mai Yhâng mying é matú byù ra-myú hkyin yù râ ga, yhangmoq lé sâng-hi mai hkâsu kut lé kûm nyi é hkyô lé, Simun taí kyo bê nghut ri.

¹⁵⁻¹⁶ Shí hkyô gi,

'Hau é htâng má gi, ngò dum taú lò mù luí, lêng gyop byuq bê Dawiq é yhûm* lé dum saí râ nghut lhê.

Haú byoq htên tô é pé lé saí saí mù, haú lé dum lhoq toq râ nghut lhê.

¹⁷ Haú hkûn sheq, ngá myîng mai ji yu é tungbaù pé eq, myit gyo tô é byù lhunghâng bang gi, Yhumsîng Garai lé hô kó râ nghut lhê ga,

¹⁸ a-nham mau htoq xâng hkun mai, shí hkyô pé lé sé nhang é Yhumsîng Garai taí ri. [☆]

ga myiqhtoí pé kâ tô é dang eq rajung za nghut ri.

¹⁹ Haú mù luí, ngò taí nau é gi, tungbaù pê chyáng mai Garai Gasâng shut lhing lo é bang lé, gotú haí le a lhoq wuí é za, ²⁰ hparà lhô pé lé kyáng byí é a sansêng é zoshuq pé lé le, ashop é dông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám râ matú za, yhangmoq lé, nga-nhúng laiká mai wó shit kat lhê. ²¹ Hkâsu mù gà le, gó hkûn mai yhang, Mosheq é tarâ lé wà hkangmó má hko kyô ló kômù, Bánno buinyi hkangmó tarajong pé má nghap kyo kyo kut bùm kô é nghut lhê." ga taí ri.

Lumjúng É Tungbaù Pê Chyáng Hun Kat É Laiká

²² Haú hkûn, lagyô pé, suwún wuí eq, hpúng byù wuí lhunghâng bang gi, Poluq, Barnaba nhik eq rahá Antioku wà mó shut nhang kat râ byù lé, yhangmoq chyáng mai hkyin yù râ matú chôm myit hpyit akô. Haú eq rajung za, yhangmoq gi, gumang wuí chyáng mâ é nhik bô suwún nhik Barsabaq gà é Yudaq eq Sila lé hkyin yu akô nghut ri. ²³ Yhangnhik é loq má, hun kat kô é laiká gi,

"Antioku wà mó, Suriq mau eq Kili mau pé má nyi é, tungbaù gumang wuí ê, nungmoq é gumang wuí nghut é, ngamoq lagyô pé eq suwún wuí gi, nguínón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dang èq lhoq byok pyám luí, nungmoq é myit lé lhoq nhúng byí nyi é hkyô lé, ngamoq wó gyo bê.

²⁵ Haú mù, ngamoq lhunghâng bang gi,

* 15:15-16 Dawiq é yhûm gà é gi, Dawiq eq yhâng é awut ashîn pé up é hkyô lé gà é nghut lhê. ☆ 15:18 Amo 9:11-12

byù ra-am lé hkyin yù mù, ²⁶ nga-nhông é Yhumsîng Yesuq Hkrisduq é matú, yhumsing asak lé lhang a hâ é nga-nhông chytidap é Barnaba, Poluq nhik eq rahá, nungmoq chyáng nhang kat râ matú chôm myit hui bê. ²⁷ Haù mù luí, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang taí kyo kó râ nghut lhê. ²⁸ Nungmoq é matú gi, hparà ló pé lé tîng byî é zoshuq eq sui, lingzing mai myhik sat é dusak sho eq ashop é đông gungsho zùm yap é hkyô pé lé, koi pyám râ hkyô mai lai luí, gotú wòwùn hûn râ hkyô a joq nghu luí, Chyoiyúng Woi-nyí le, ngamoq le, myit huí to bê. ²⁹ Nungmoq haù pé lé koi pyâm nyí kôjáng gi, gè râ nghut lhê.

Nguingón wángzán nyí kó sháng gaq ô!" ga kê tô ri.

³⁰ Yhangmoq lé nhang kat kôjáng, yhangmoq gi, Antioku và mó má gyó jé lô kômù, hpúng byû wuì lé ji tsîng to kôluí, haù hûn kat é laiká lé ap byî akô nghut ri. ³¹ Hpúng byû wuì gi, laiká haù lé ban nghap kôjáng, wum-o byî é danglù hau é yanmai, gabú nyi bum akô. ³² Yudaq eq Sila gi, myiqhtoí nhik le nghut kômù luí, gumang wuì lé mungdang myo myô èq lhoq pun lhoq kyíng kômù, wum-o lhoq gîng to byî akô. ³³ Rayoq zo haù má nyi nyí kô é htâng má, gumang wuì gi, yhangmoq lé nhang kat é bâng chyáng, ngui ngui ngón ngón dum tau ló nhâng bekô nghut ri. ³⁴ (Sila kúm gi, yhang ô nau é đông nyi gyó tô ri.)† ³⁵ Poluq eq Barnaba kúm gi, Antioku và mó má nyi gyó to kômù, Yhumsîng Yesuq é mungdang lé, góbang myo myo eq, mhoq kyo hko kyô akô nghut ri.

Poluq Eq Barnaba Nhik Gâng Lhum É Hkyô

³⁶ Hau htâng, buinyí tsómra myáng jáng, Poluq gi, Barnaba lé, "Yhumsing é mungdang hko kyô lai lo wú bê, và hkyap hkangmó má é gumang wui chyáng taù lò luí, yhangmoq hkâsu dut nyi é hkyô lé, ló dum kûm wú lo goq." ga taí ri. ³⁷ Barnaba gi, Markuq gâ é Yohan lé le shuí chûng nau ri. ³⁸ Nghut kôlhang, Poluq gi, haù yuq lé a kâm shuí chûng nau nghut ri; hkâsu mù gâ le, yhang gi, Pamhpulí mau má yhangnhik

lé tô pyâm to mù, yhangnhik eq rahá muzó a kâm xoq zui nau é sù nghut é yanmai nghut ri. ³⁹ Hau é yanmai, yhangnhik gi, gyai yhang taí shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuí chûng luí, lhaí ji mù Kupru zinlóng shut e ló byuq bê nghut ri. ⁴⁰ Poluq kúm gi, Sila lé hkyin yù mù, gumang wui èq yhang lé Yhumsîng Garaí é jeju má ap kat kô é htâng má, yhangnhik gi, htoq e ló byuq bekô. ⁴¹ Haù mù, Poluq gi, Suriq mau eq Kiliki mau mai sô lai ló uchyang, haù mâ é noqkuq hpûng pé lé wum-o lhoq ging byî wún bê nghut ri.

16

Poluq Eq Sila Nhik Chyáng Timohti Châng É Hkyô

¹ Poluq gi, Derbe và mó má jé é htâng, Lustra và mó má dum jé ri. Haù và má, Timohti gâ é chángzo rayuq nyi ri. Yhâng nu gi, Yesuq lé lumjîng é Yudaq myiwe myhí nghut ri; yhâng wa kúm gi, Grik amyû nghut ri. ² Timohti gi, Lustra và mó eq lkoni và mó má nyi é gumang wui èq hkya-ôn é hui sù nghut ri. ³ Poluq gi, hkyowuì má yhang lé shuí chûng nau mù luí, ahpyo-kuq hpyit byî ri. Hkâsu mù gâ le, yhâng wa gi, Grik nghut é hkyô lé haù mâ é Yudaq byu pé lhunglhang bang sé kômù, haù bang lé myit tê byî é yanmai nghut ri. ⁴ Haù mù, yhangmoq gi, rawa htâng rawa mai lai ló uchyang, Yerusalem và mó mâ é lagyo pé eq hpúng suwún wuì, chôm myit hpyit tô é hkyô lé, cháng kó sháng gaq ga, yhangmoq lé taí kyô akô. ⁵ Haù mù luí, hpúng byû wuì gi, lumjîng hkyô má wum-o bo lò kômù, ran-nyí èq ra-nyí byù du myô jat lo nyi ri.

Makedoni Byù Rayuq Lé, Poluq Shing-rán Myang É Hkyô

⁶ Ahkuí, yhangmoq gi, Asia mau má mungdang é hko kyo râ hkyô lé Chyoiyúng Woi-nyí èq yhangmoq lé hkûm pyâm é yanmai, Hprugi mau eq Galatiq mau đông sô lai ló mù, ⁷ Musi mau kyo má jé lô kôjáng, Bihtuni mau shut wang ló râ dâ akô; nghut kôlhang, Yesuq é Woi-nyí gi, yhangmoq lé ahkáng a byi nghut ri. ⁸ Haù mù, yhangmoq gi, Musi mau mai sô lai ló luí, Troa myuq má gyó jé lô akô. ⁹ Haù má, myín lé,

† 15:34 Bun zo shí lhum gi, Grik Chyúmlaiká myo myo má a bò nghut lhê.

Poluq gi, Makedoni byù rayuq lé yap to mù, "Makedoni mau shut dap lé luí, ngamoq lé le garúm yú laq." ga luí, yhang lé dung wut nyi é shing-rán myang ri. ¹⁰ Shing-rán haú lé Poluq myang é eq, Makedoni byu pé lé gabú danglù hko kyo râ matú, ngamoq lé Garai Gasang wut yù bê nghut ri nghú myit yù luí, haú hkùn yhang, ngamoq gi, Makedoni mau shut dap ê râ matú rì rì kut ló bê nghut lhê.

Ludia Gâ É Myiwe Myhí Hpúng Byû Dut Lo É Hkyô

¹¹ Haú mù luí, ngamoq gi, Troa myuq mai Samohtake zinlóng ang ang shut lhaí ji é mù luí, htang nyí gi, Neapoli wà má jé bê nghut lhê. ¹² Haú mai lai jáng, Makedoni mau má, Romaq byu pé xuq tô é, haú gin-wáng mâ é ahkyak wà mó nghut é, Hpilipi myuq má ngamoq jé mù, haú má rayoq zo nyi nyi é nghut lhê.

¹³ Bánno buinyi jé jáng, ngamoq gi, kyû-dung jowò joq nhô ngam mù, wà hkum shinggan mâ é, wuìlàng yàm shut htoq ê luí, haú má zîng to lánng é myiwe wuì lé, zung gyó mù nyo hi é nghut lhê. ¹⁴ Haú dang gyo nyi é bang má, Garai Gasang lé noqkuq é, Htuatira myuq byû, pán nê ung zo sù Ludia gâ é myiwe myhí rayuq bo ri; Yhumsîng Garai gi, Poluq taí kyô é hkyô lé rago gyô yù sháng gaq ga, yhang lé myit hkum hpóng byi ri. ¹⁵ Yhang gi, yhang eq yhang yhumbyù wuì wui-myhup ban hkâm yù kôjáng, "Nungmoq gi, ngo lé haú Yhumsîng Yesuq má lumjîng bê sù nghut é dông, myit yù byi kô é nghut jáng, ngá yhûm má lé bíng keq." ga luí, ngamoq lé zuq zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyí lé, ngamoq gi, haú kyûdûng é jowò shut e ló nyi le, nat wang júng luí gumhpân hpan é jùnmyhí rayuq ngamoq lé lhom huí ri. Haú yuq gi, gumhpân hpan é dông yhang yhumsîng wuì lé ngunzè gyai yhang hô byi é sù nghut lhê. ¹⁷ Myiwe haú gi, Poluq eq ngamoq htáng má châng to mù, "Shí bang gi, nungmoq lé hkyi yù hkyô taí kyô wún é, Myhang Htáng é Garai Gasang é dui-nhâng zoshâng wuì nghut bum akô ô!" ga wut garú ri. ¹⁸ Buinyi myo myo haú su chyat châng garú wún é yanmai, Poluq gi, gyai yhang myit hpêbu

byuq mù, lhing wú kat luí, nat haú lé, "Yesuq Hkrisduq é myìng lang luí ngò nang lé hkunmó hkyô kat lhê, yhang chyáng mai htoq ló byuq aq." ga luí, nat haú lé, nhik-yô kat ri. Haú hkùn jáng, nat haú gi, yhang chyáng mai htoq ló byuq bê nghut ri.

¹⁹ Ahkuí, myiwe hau é yhumsîng wuì gi, ngunzè myàng zo râ myoqbyù jowò a joq lo é hkyô lé sé kôjáng, Poluq eq Sila nhik lé chyup yù mù, gai mâ é suwún wuì chyáng she hkyut e akô. ²⁰ Dum, yhangmoq gi, yhangnhik lé tarâ agyi pé chyáng shuí é mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhoqshit byi nyi é dông, ²¹ nga-nhûng é myuq lé gunjáng nyi akô nghut ri." ga taí akô.

²² Haú mù luí, shiwa byu pé gi, yhangnhik lé chôm htîm akô. Tarâ agyi pé gi, yhangnhik é mebu lé lánng hkyut pyám luí, wumchûm hkat èq bat râ matú, hkunmó hkyô kat akô. ²³ Yhangmoq gi, yhangnhik lé gyai yhang nhuq bat yu é htâng, htong má lhûng kat mù, rago za wú zúng râ matú htóng suwún lé hkunmó hkyô tô akô. ²⁴ Htóng suwún hpó gi, haú sù é hkunmó lé wó jáng, yhangnhik lé hkyi kyum hut luí, htóng mâ é, je ahtê gok má lhûng tô ri.

Htóng Suwún Hpó Hkyi Yù Huí É Hkyô

²⁵ Nghut kôlhang, gunggàm yoq lé, Poluq eq Sila nhik gi, kyûdung luí, Garai Gasang lé mahkôn hkya-ôn nyi kô é hkùn, htóng byù góbang gi, yhangnhik é htê lé chôm gyô nyi bum akô. ²⁶ Haú hkùn, byodàn ratung layàng mó nún lô mù htóng yhûm gón le nún lô luí, hkum pé banshoq le radá dâm bóng hâ lo bum ri; dum nghut jáng, yuq hkanmó mâ é toqjâng tui pé le gyut gyó byuq bê nghut ri. ²⁷ Htóng suwún hpó gi, yhup bûn lò mù, htóng hkum pé bóng hâ tô bum é lé myang kat jáng, htóng byu pé ban hpang byuq bùm bekô râ nghut lhê ga myit yù luí, shâm shê mù, yhanggùng yhang sat shi râ dâ ri. ²⁸ Nghut kôlhang, Poluq gi, "Ê, náng gûng yhang nàng haú su hkâkut, ngamoq banshoq shi má nyi tô lhê." ga luí, htê mó èq wut garu taí kat ri.

²⁹ Haú hkùn, yhang gi, duq é myibung lé dûng yù mù, ahkaú shut din wang ló luí, Poluq eq Sila nhik é hí má gyuq nán é eq ngóm gop tô ri. ³⁰ Hau htâng, yhang gi,

yhangnhik lé shuí htoq yû luí, "Sarâ nhik ê, ngò hkyi yu é hui râ matú, haí kut ra râ lhú?" ga myi kat ri.

³¹ Haú hkûn, yhangnhik gi, "Yhumsîng Yesuq lé lumjîng jâng, nàng eq nâng yhumbyù lhunglhang bang hkyi yu é hui râ nghut lhê." ga taí akô. ³² Hau htâng, yhangnhik gi, haú htóng suwún hpó eq yhâng yhumbyù lhunglhang lé, Yhumsîng é mungdang hko kyô akô. ³³ Haú myîn haú u lé yhang, htóng suwún hpó gi, yhangnhik lé shuí ê mù, yhangnhik é dâm pé lé tsing chî pyám byi luí, haú htâng, yhang eq yhâng yhumbyù banshoq bang wui-myhup hkâm yù bekô nghut ri. ³⁴ Hau htâng, yhang gi, yhangnhik lé, yhâng é yhúmhaú má shuí wang lô mù, zoshuq hkang byi ri. Yhang eq yhâng yhumbyù banshoq bang gi, Garai Gasang lé wó lumjîng bekô nghut é yanmai, gyai gabú nyi bum akô nghut ri.

Haq Nhang Pyám Râ Lé A Đông É Hkyô

³⁵ Ahkuí, maubó jâng, tarâ agyì wuì gi, "Haú nhik lé nhang pyám aq." ga, htóng suwún hpô chyáng pyata pé lé taí nhang kat akô. ³⁶ Haú hkûn, htóng suwún hpó gi, "Nungnhik lé nhang pyám aq ga, tarâ agyì wuì mai byù nhang kat ri; haú mù, ahkuí, nungnhik gi, ngón za htoq lô lo keq." ga luí, Poluq lé taí ri.

³⁷ Poluq kúm gi, "Nga-nhik gi, Romaq mingdán byû sheq ru nghut le wa, myî gôn wú é hkyô le a bo é, byu pê hí má ngá-nhik lé nhuq bat mù, htóng má hkyô kat kôluí nhîng, ahkuí tsik za haq nhang pyám râ dâ akô nhung lhi? A wó dut, yhangmoq yhang sheq lé shuí htoq yû kó sháng gaq." ga luí, yhangmoq lé tû taí kat ri.

³⁸ Pyata pé gi, tarâ agyì wuì lé dang haú pé lô taí kyo kôjâng, tarâ agyì wuì gi, Poluq eq Sila nhik Romaq mingdán byù nghut é hkyô lé wó gyo kôjâng, gyô gyuq kôluí, ³⁹ yhangmoq yhang, yhangnhik chyáng lé mù, tôngbán luí, shuí htoq yû mù, và haú mai htoq lô byuq râ matú chôm dúng akô.

⁴⁰ Haú mù, Poluq eq Sila nhik gi, htóng mai htoq lô é htâng, Ludia é yhúm má wang lô akô; haú má, gumang wuì eq le hui kômù, yhangmoq lé wum-o byi luí, htoq lô bekô nghut ri.

17

Htesaloni Wà Mó Má Mungdang Hko Kyô É Hkyô

¹ Hau htâng, yhangmoq gi, Amhpipoli và mó eq Apolon và mó mai sô laí lô mù, Htesaloni và mó má jé akô. Haú và má gi, Yudaq byu pê é tarajong rallum joq ri. ² Poluq gi, yhang lhaq kut nyi é eq rajung za, tarajong má wàng luí, Bánno buinyì sum nyí yhang, Chyúmdang má bo é eq séng mù, yhangmoq eq chôm mîng lhum uchyang, ³ Hkrisduq wuîhke jamjau hui mù, shî bê mai dum dui toq lô râ hkyô lé taí hkoq san kyo luí, "Nungmoq lé, ngò hko kyô nyi é haú Yesuq gi, Hkrisduq nghut lhê." ga taí ri. ⁴ Yudaq byu pé mâ é ra-am gi, gyô jîng kômù, Poluq eq Sila nhik chyáng lé xoq yu akô; haú eq rajung za, Garai Gasang lé hkunggâ é Grik pé myo myo eq, ahkyak é myiwe wuì tsómra myo shoq le, gyô jîng kômù, lé xoq yu akô.

⁵ Nghut kôlhang, a gyô jîng é Yudaq byu pé gi, manôn kôluí, gài mâ é byùgang jùm ra-am lé lung yù mù, byù moq mó tsîng yù luí, rawa é shuí gabyong kômù, shiwa byu pê é hí má Poluq eq Sila nhik lé wó shuí htoq shit shoq ga, Yason é yhúm má htîm e lô akô. ⁶ Nghut kôlhang, yhangnhik lé a myàng kôjâng, yhangmoq gi, Yason eq gumang wuì ra-am lé, yhangmoq é và suwún wui chyáng lîng she ê kômù, "Mingkan gón lé atau ahú kut é byù shí nhik, ahkuí shî má jé jâng, Yason gi, yhâng é yhúm má lhom hkúlum yu ri. ⁷ Yhangmoq lhunglhang bang gi, Yesuq gâ é hkohkâm góyuq nyi lhê ga kôluí, hkoséng Kehtaq é tarâ lé lhoq shai é đông kut é bang nghut akô." ga taí garú bum akô. ⁸ Shiwa byu pé eq và suwún wuì gi, dang haú lé wó gyo kôjâng, myit wui myit hke dut nyi bum akô. ⁹ Hau htâng, yhangmoq gi, manghkáng a lhoq htoq râ matú Yason eq góbang lé danggidîq zè byi nhâng mù, nhang pyám bekô nghut ri.

Beria Wà Mó Bang, Mungdang Lé Lhom Yu É Hkyô

¹⁰ Haú myîn jâng yhang, gumang wuì gi, Poluq eq Sila nhik lé Beria và mó shut nhang kat akô; yhangnhik gi, haú và má jé jâng, Yudaq byu pê é tarajong má wang lô akô nghut ri. ¹¹ Haú Beria và mó byu pé gi, Htesaloni và mó byu pê htoq má je riyhang

nhik bo bum akô; haû mù, danglù haû lé gyai ô nau é myit èq hap yù mù, danglù shî teng a têng é hkyô lé wó sé shoq ga, nyí wuí Chyúmdang lé chôm nghap wú nyi akô nghut ri. ¹² Haû mù luí, Yudaq byu pé myo myo gi, lumjúng bum akô, haû eq rajung za, aróng wó é Grik myiwe wuí eq yuqgè wuí myo myo le, lumjúng bùm bekô nghut ri.

¹³ Poluq gi, Beria wà mó má le, Garai Gasâng é mungdang hko kyô nyi é hkyô lé, Htesaloni wà mó mâ é Yudaq byu pé sé kôjáng, yhangmoq gi, haú má lé kômù, wà byù wuí lé mhoq hpyoq luí, gabyông lò nhang akô. ¹⁴ Haú hkûn, gumang wuí gi, Poluq lé wuimau yàm jé shoq, radá dâm dé kat akô; nghut kôlhang, Sila eq Timohti nhik gi, Beria wà mó má nyi gyó tô akô nghut ri. ¹⁵ Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng ló râ matú pying kat é dang lé wun chûng mù, dum taù lò bekô nghut ri.

Poluq, Ahten Myuq Má Nyi É U Lhê Hkyô

¹⁶ Ahkuí, Poluq gi, Ahten myuq má haú nhik lé lánq nyi tô é u lé, haú wà má rawa é hparà lhô baú dut tô é lé myàng mù luí, yhâng i-myt gyai yhang a ngón dut byuq ri. ¹⁷ Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gài pé má hui mihui bang eq le, nyí wuí taí sên kyô lhùm nyi akô nghut ri. ¹⁸ Haû mù luí, Epikuri hpaqchyí eq Sto-i hpaqchyí* lé sê é, myit wú hpaqchyí bo é bang ra-am gi, yhang eq dang chyin chyin lhùm akô; haú hkûn, yhang gi, Yesuq é hkyô eq dum dui toq hkyo é gabú danglù lé hko kyô é yanmai, ra-am gi, "Byù pyok shí yuq gi, haí wá taí nyi lhê lhú?" ga; ra-am gi, "Góming hparà pé é hkyô lé taí kyo sù nghut sam ri." ga, taí bum akô nghut ri. ¹⁹ Hau htâng, yhangmoq gi, Aripagu gâ é byìn tú wap shut Poluq lé shuí doq ló mù, "Nang mhoqshit é hkyô asik, ngamoq lé sé nhang le a gè lhú?" ²⁰ Nang èq taí é maú nhô za gâ é hkyô lé ngamoq wó gyô ri; haû é dang kyíng lé ngamoq sé nau ri." ga taí bum akô. ²¹ (Ahten byu pé eq haú má nyi é góming byu pé lhunglhâng bang gi, dang sik lù sik haú lé

taí kún gyô kún mù, yhangmoq é ahkyíng lé lhoq pán nyi bum akô nghut ri.)

Poluq, Aripagu Zuphpong Má Mungdang Hko É Hkyô

²² Haú u lé, Poluq gi, Aripagu zuphpong má toq yap mù, "Ahten byu pé ê, nungmoq gi, hkyô hkat hkangmó má hparà lhô pé lé gyai yhang dat gyuq hkungga kô é lé, ngò myang ri. ²³ Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sê é Garaí matú.', ga luí, kê tô é hkungga gyap ralhum lé myang záng ri; haú nungmoq a sê é za jaú nyi é Garaí hkyô lé, ngò, nungmoq lé hkaí kyo kôlé.

²⁴ Myidàm htoq eq haú má joq mijoq lé hpan tô é Garai Gasang gi, mauhkûng eq myigùng é Yhumsîng le nghut lhê mù luí, byu loq èq saí é noqkuq yhùm má nyi râ a nghut. ²⁵ Yhang gi, byù lhunglhâng bang lé asak, soq, ra mira gumjup shoq byi to sù nghut nyi é yanmai, rajung jung râ é sù lé su, byu loq èq dojaú râ sù a nghut.

²⁶ Yhang gi, gunchyung rayuq mai za byuhú chângjup myô lò nhâng mù, myidàm htoq jàm shoq má nyi nhâng luí, yhangmoq é matú hí hí mai ahkyíng yam-yoq eq nyi râ jowò masat to byi bê nghut ri. ²⁷ Yhang gi, nga-nhúng yuq hkangmó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri. ²⁸ Hkâsu mù gâ le, nungmoq é jihkyang kat bang, 'Nga-nhúng le yhâng é awut ashín pé nghut nyi lhê.' ga taí tô bum é eq rajung za, nga-nhúng gi, Yhang é yanmai wó nyí, wó dui é eq îsu wó dut é nghut lhê.

²⁹ Haú mù, nga-nhúng gi, Garai Gasâng é yhangzô pé nghut nyi é yanmai, Garaí gùng gi, byu é hpaqchyí loq èq kyûng kê tô é hîng, ngùn, luqgok pé eq pûng lhê nghû luí hkâ-myt yù kó. ³⁰ Laí lò bê haú myoq a bóng shi é pyat lé, Garai Gasang gi, haí le a ga lhaí pyâm to kôlhang, ahkuí gi, jowò hkangmó mâ é byù lhunglhâng bang lé, myit lhíng keq ga hkunmó hkyô to bê nghut ri. ³¹ Hkâsu mù gâ le, Yhang hkyin to sù mai mingkan gón lé tara é dông jéyáng râ buinyi ra-nyí masat to bê nghut ri. Shí hkyô lé, byù lhunglhâng bâng é hí má wó lum é saksé dut sháng gaq ga, Yhang haú

* 17:18 Epikuri hpaqchyí gi, htang pyat a joq, ahkuí ngón yù râ za ahkyak gâ é nghut lhê. Sto-i hpaqchyí gi, haí wá dut kôlhang i-myt zim za kut mù, htang pyat matú chiq a ra gâ é nghut lhê.

yuq lé shi é mai lhoq dui toq yû bê nghut ri." ga taí ri.

³² Shí é mai dum dui toq lo é hkyô lé wó gyô bùm kôjáng, ra-am gi, taí hpoí pyám byí akô; ra-am kúm gi, "Nàng shí hkyô taí é lé ngamoq dum gyô wú nau ashî." ga taí akô. ³³ Hau htâng, Poluq gi, haú zuphpong mai htoq ló byuq bê nghut ri. ³⁴ Nghut kôlhang, byù ra-am gi, Poluq é htâng cháng kômù, lumjínq bang dut bekô nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gâ é myiwe rayuq eq gotû byu pé le, bo bum akô nghut ri.

18

Poluq, Korinhtuq Myuq Má Nyi É U Lhê Hkyô

¹ Hau htâng má, Poluq gi, Ahten myuq mai htoq luí, Korinhtuq myuq má jé lo ri. ² Haú má, yhang gi, Romaq myuq mai Yudaq byù lhunglhâng bang htoq ló byuq râ dut lhê ga, hkohkâm Klodi èq hkunmó hkyô é yanmai, a myáng shi lé Itali ming mai yhangmyi Priskila eq htoq jé lo é, Pontuq mau byù nghut é, Akula gâ é Yudaq byù rayuq lé hui luí, yhangnhik chyáng ê ri. ³ Yhangmoq gi, jonghpang saí zo bang chyat nghut kô é yanmai, muzó pûng kôluí, Poluq gi, yhangnhik eq rahá nyi nyi mù, muzó chôm saí akô. ⁴ Bánno buinyi hkangmó, Poluq gi, tarajong má Yudaq byù eq, Grik pé lé, taí sân kyo luí, lhoq pun lhoq kyínq yu ri.

⁵ Ahkuí, Sila eq Timohti nhik Makedoni mau mai châng jé jáng, Poluq gi, mungdang hkô hkyô má za wum kat luí, haú Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri. ⁶ Nghut kôlhang, Yudaq byu pé gi, lhom he-ngik pyám kômù, yhang lé rhoí dang taí pyám akô; haú mù, Poluq gi, yhâng mebu ko shit é đông yhangmoq lé a nau é hkyô tân shit uchyang, "Nungmoq é sui mara gi, nungmoq é ulhum má jé sháng gaq, ngò eq haí a séng lo; ahkuí mai, ngò gi, tûngbaù pé chyáng e ló berâ nghut lhê." ga luí, yhangmoq lé taí ri.

⁷ Hau htâng, yhang gi, tarajong mai htoq luí, jong haú eq yhep nghut é, Garai Gasang

lé noqkuq é Titu Yustu ga su é yhâm má wang ló ri. ⁸ Krispu gâ é tarajong má up sù gi, yhâng yhumbyù lhunglhâng bang eq rahá, Yhumsing lé lumjínq akô. Korinhtuq myuq byu pé myo myo le, Poluq é dang lé gyô yù mù, lumjínq luí, wui-myhup hkâm yu bum akô nghut ri.

⁹ Ra-myìn lé, shing-rán ralhumm má Yhumsing mai Poluq lé taí é gi, "Hkâgyuq, taí aq, zim za hkâ-nyî. ¹⁰ Ngò nàng eq rahá nghut nyi lhê, nàng lé ó yuq èq le haí wó kut râ a nghut, hkâsu mù gâ le, myuq shî má, ngá é byù myo myo nyi bum lhê." gâ ri. ¹¹ Haú mù luí, Poluq gi, Garai Gasâng é mungdang mhoqshit uchyang, razàn eq lhamó hkyuq hkyap yhang, haú myuq má nyi nyi ri.

¹² Galio ga sù, Ahkaia mau mâ é ginwáng zau kut nyi é u lé, Yudaq byu pé gi, myit rahkat zâ èq Poluq lé chôm chyup yû kôluí, tarâ hpyit wap má she háng kômù, ¹³ "Byù shî yuq gi, jep é tarâ eq shai lhâm é đông, Garai Gasang lé noqkuq râ matú, byu pé lé mhoq hpyoq wún ri." ga mara hân akô.

¹⁴ Haú hkûn, Poluq tû taí râ dâ lò jáng, Galio gi, Yudaq byu pé lé, "Yudaq byu pé ê, muzó shî gi, tarâ lu laí é muzó, haú a nghut jáng, agè ashop é muzó mai, dut lo é nghut le gi, nungmoq lé ngò gyo byi râ hkyô joq lhê. ¹⁵ Nghut kôlhang, muzó shî gi, nungmoq é tarâ eq séng luí, dang eq séng luí, myìng eq séng luí, taí lhum kô é hkyô nghut é yanmai, nungmoq yhang ru ló hpyit lhum keq. Haú sù é muzó má, ngò gi, tarâ agyì kut byi râ a nghut." ga taí mù, ¹⁶ tarâ hpyit wap mai yhangmoq lé hkat htoq pyám nhang ri. ¹⁷ Haú hkûn, yhangmoq lhunglhâng bang gi, tarajong má up sù Sositeni lé chyup yû mù, tarâ hpyit wap hí má chôm bat akô. Galio kúm gi, haú hkyô lé hai gùn a kut byi nghut ri.

Poluq, Antioku Wà Mó Má Dum Taù Jé É hkyô

¹⁸ Poluq gi, Korinhtuq myuq má buinyi tsómra myáng shoq lumjínq bang eq nyi nyi ri. Hau htâng, yhang gi, haú bang lé shi-kyâm to luí, Priskila eq Akula nhik lé byinzùm kut mù, lhaí ji luí Suriq mau shut e ló akô. Hau hí má, yhang gi, danggidiq tô

* 18:18 Xâm nyhâm pyám é gi, Yudaq htûng đông rajung jung kut râ matú danggidiq to luí, haú lé ban kut jáng, yhumsing xâm lé nyhâm pyám é nghut lhê.

tô é yanmai, Kenhkrea wà má xâm nyhâm pyâm ri.*¹⁹ Yhangmoq Ehpesu myuq má jé kô é hkûn, Poluq gi, Priskila eq Akula nhik lé nyhi pyâm to luí, yhang baú tarajong má wàng mù, Yudaq byu pé lé taí sâk kyo byí ri.²⁰ Haú mâ é bang gi, yhangmoq eq rahá rayoq zo nyí shi râ dông yhang lé dung kô é nghut kôlhang, yhang gi, a nhô lo nghut ri.²¹ Haú mù, yhang gi, Ehpesu myuq mai lhaí ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé râ nghut lhê." ga, yhangmoq lé danggidiq byí tô ri.²² Ahkuí, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huí tô é htâng, Antioku wà mó má dum gyô ló ri.

²³ Yhang gi, haú wà má rayoq zo nyi é htâng, htoq ló mù, Galatiq mau eq Hprugi mau mai sô lai ló uchyang, rawa htâng rawà mâ é chángzô pé lé wum-o lhoq ging byí ri.

Apolo Zui Sâi É Muzó

²⁴ Ahkuí, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyí bò sù nghut é htoq agó, Chyúmdang le gyai kûng é sù nghut ri.²⁵ Yhang gi, Yohan é baptisma hkyô lé za sé sù nghut kôlhang, Yhumsing é hkyô lé mhoq yú bê nghut luí, Yesuq é hkyô pé lé mhoq yu to bê eq rajung za wum zuq tung ga luí, hkyak hkyak mhoqshit byí ri.²⁶ Ahkuí, yhang gi, gyuq kyûm myit a bo é za tarajong má taí hi ló ri. Haú hkûn, Priskila eq Akula nhik gi, haú lé wó gyo kôjáng, yhang lé ji yù mù, Garai Gasâng é mungdang hkyô lé azó tung taí sâk kyo byí akô nghut ri.

²⁷ Apolo gi, Ahkaia mau shut dap e ló nau é hkûn, gumang wuè gi, yhang lé wum sâi byi mù, yhang lé lhom hkûlum yù râ matú, chángzô pé chyáng laiká ká byí kat akô; yhang gi, jé jáng, Garai Gasâng jeju mai lumjínng bê bang lé, gyai yhang wó garúm sù dut bê nghut ri.²⁸ Hkâsu mù gâ le, yhang mai, Yesuq gi, Hkrisduq yhang nghut nyi ri ga luí Chyúmdang má tân shit uchyang, byu pé hí má Yudaq byu pé lé, wum kat wó taí ung pyâm é yanmai nghut ri.

19

Poluq, Ehpesu Myuq Má Nyi U Lhê Hkyô

¹ Ahkuí, Apolo gi, Korinhtuq myuq má nyi tô é hkûn, Poluq gi, mau káng mai sô lai ló mù, Ehpesu myuq má jé ri. Haú má, yhang gi, chángzô pé ra-am eq hui luí,² yhangmoq lé, "Nungmoq gi, lumjínng é hkûn, Chyoiyúng Woi-nyí lé, wó yú bekô lhú?" ga myí ri.

Haú hkûn, yhangmoq gi, "Chyoiyúng Woi-nyí nyi lhê gâ é lháng, ngamoq a wó gyô wú." ga tú taí akô.

³ Haú mù, Poluq gi, "Haú nghut jáng, nungmoq gi, hai jung baptisma hkam yú kô é lhú?" ga luí, yhangmoq lé myi jáng, yhangmoq gi, "Yohan é baptisma hkam yu é nghut lhê." ga tú taí akô.

⁴ Haú hkûn, Poluq gi, "Yohan é baptisma nghu é gi, myit lhîng mù wui-myhup hkâm yu é hkyô lé gâ lhê. Yohan gi, yhang é htâng má jé lé râ sù, haú Yesuq lé sheq lumjínng râ lhê ga shiwa byu pé lé taí ri." ga taí ri.⁵ Yhangmoq gi, dang haú lé wó gyo kôjáng, Yesuq é myîng lang luí baptisma byí é lé, hkam yu bum akô.⁶ Poluq gi, yhangmoq é htoq má loq ke byi jáng, haú Chyoiyúng Woi-nyí gi, yhangmoq htoq má jé lé mù, yhangmoq gi, laklai dang nyo lo é htoq agó myiqhtoi le htoí lo bum akô.⁷ Haú bang lhunglháng gi, yuqgè raxe í yuq kó nghut ri.

⁸ Hau htâng, Poluq gi, tarajong má wàng luí, gyuq kyûm myit a bo é za lhamó sum hkyap Garai Gasâng é mingdán hkyô lé taí sâk kyo mù, lhoq pun lhoq kyîng yu ri.⁹ Nghut kôlhang, ra-am gi, myit htan lo bùm kôluí a kâm lumjínng kô é htoq agó, haú Yhumsing é Hkyô lé byu pé hí má lhoq hpoí pyâm byi kôjáng, Poluq gi, yhangmoq chyáng mai htoq luí, chángzô pé lé shuí chûng mù, Turanu gá su é hpaqchyí mhoq jong má, nyí wuí taí sâk kyô lhûm nyi akô.

¹⁰ Haú su kut í zân yhang mhoqshit nyi é yanmai, Asia mau gón mâ é Yudaq byu pé eq Grik pé lhunglháng bang gi, Yhumsing é mungdang lé wó gyô yu bum akô nghut ri.

Skewa É Yhangzo Nyhit Yuq É Hkyô

¹¹ Garai Gasang gi, Poluq é loq dông laklai kumlhá kut ri.¹² Haú mù, Poluq chyáng mâ é hpajet eq hpyihit rajung jung lé, nò bâng chyáng yu ló mù, ló záng byi jáng lháng,

yangmoq é nòhpyo ge ló byuq é eq, agè ashop é nat pé lé yangmoq chyáng mai htoq ló byuq bum akô.

¹³ Haú u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko taí é Yesuq é myìng mai, ngò, nungmoq lé hkat htoq lhê." ga, agè ashop é nat wang júng to bâng é ahtoq má, Yhum-sìng Yesuq é myìng lé lang luí, hkat chyam wú akô. ¹⁴ Skewa gâ é, Yudaq hkyangjong agyì rayuq é yuqzo nyhit yuq le haú su kut wun akô. ¹⁵ Ra-nyí lé, agè ashop é nat gi, yangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôlhang, nungmoq gi, ó pé nghut akô?" ga tû taí mù, ¹⁶ agè ashop é nat haú wang júng é byù gi, yangmoq htoq má byam doq jî to luí, nhuq bat yû mù yangmoq lé ung pyâm ri. Yangmoq gi, yhûm haú mai gùngchîn sui nê yang yang h pang htoq ló bekô nghut ri.

¹⁷ Haú hkyô lé, Ehpesu myuq má nyi é Yudaq byu pé eq Grik pé sé kôjáng, yangmoq lunglhang bang gi, chòm gyô gyuq bum akô. Yhumsìng Yesuq é myìng gi, hkyon lhoq toq é hui bê nghut ri. ¹⁸ Lumjìng bê bang myo myo gi, lé mù, yhumsìng kut shut é agè ashop hkyô lé, myo myô hí má yín yu akô. ¹⁹ Myoqheq hpaqchyí kut zô é bang le, yangmoq é laiká lé yu lé kôluí, shiwa byu pé hí má nyhê hkyô pyâm akô. Mausau haú pé é ahpaú lé sôn wú le, ngùn chap ngo mun záng ri. ²⁰ Haú đông mai, haú Yhumsìng é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut lai htàng má, Poluq gi, Makedoni mau eq Ahkaia mau đông sô lai ló mù, Yerusalem wà mó má ló jé râ ga myit hpyit yû luí, "Haú má ló jé tô é htàng má, ngò, Romaq myuq má le, jé wú râ dut ashî." ga taí ri. ²² Haú mù, yang lé htuqbang garúm é Timohti eq Erastu nhik lé hí Makedoni mau shut nhang kat luí, yang gi, Asia mau má rayoq rabun zo nyi gyó tô ri.

²³ Haú yoq lé, haú Yhumsìng é Hkyô yanmai gyai yang gabyông lo bum akô.

²⁴ Demetri gâ é ngùn bat zo sù rayuq gi, Artemi hpara é ngùn yhûm zòng zo saí luí, mù saí luzúm wú lé wó sùt nhang nyi ri.

²⁵ Yang gi, yhang é ngùn bat zo luzúm wú

eq haú jung amû kut é góbang lé le ji tsìng to mù, taí é gi, "Luzúm wú ê, muzó shí lhûm é yanmai, nga-nhúng nyi ngón yuqyo nyi é hkyô lé, nungmoq sê lhê. ²⁶ Nghut kôle, ahkuí gi, Ehpesu myuq má za le a nghut lo, Asia mau lhang aluq jàm shoq, byu loq èq saí é zè lé, garaí pé a nghut ga, shí Poluq ga sù mai byù myo myo lé mhoq hpyoq yû mù, hkyô shuí lhoq nghoq nyi é hkyô lé, nungmoq wó myâng, wó gyô nyi akô. ²⁷ Haú mù luí, nga-nhúng é muzó shí gi, hpoí byuq râ lé chiq râ é za a nghut, hpara myhí mó Artemi é noqkuq yhûm gi, haí a dut byuq luí, Asia mau gón eq mingkan gón mai noq é hpara myhí é shingkan hpoí byuq râ lé le myit chiq râ dut bê." gâ ri.

²⁸ Yangmoq gi, dang haú lé wó gyô bùm kôjáng, nhik mó gyô yo kôluí, "Ehpesu myuq byu pé é Artemi gi, kô nyi sháng gaq ô!" ga chòm garû bum akô. ²⁹ Hkâm yhang a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yù mù, yangmoq é poí wàng mó shut radá dâm chyín chyap wang ló bum akô. ³⁰ Poluq gi, moq hpúng hau hí má htoq shit naú kôlhang, chángzô pé gi, yang lé a wàng nhâng kó nghut ri. ³¹ Poluq é luzúm wú nghut é, haú mau mà é suwún wú ra-am lhang, yang lé poí wàng hkaú má a ê râ matú, hkùm pyám nhang akô nghut ri.

³² Zìng tô é bang gi, hai hû háng le a sé lo dut byuq kômù luí, ra-am rajung ga garû bum akô. Myo mi-myo gi, haí mù luí yangmoq haú má nyi tô é lé lhang a sê bùm kó nghut ri. ³³ Yudaq byu pé gi, Alesander lé hí má chòm chyùn htoq kat kôluí, shiwa hpong mai ra-am gi, yang hká đông taí râ hkyô lé mhoq byi kat akô. Alesander le shiwa hpong lé taí san kyo naú luí, zim byuq râ matú loq tu ri. ³⁴ Nghut kôlhang, Alesander, Yudaq byù nghut é lé sé kôjáng, yangmoq lunglhang bang gi, rahtê za kut kôluí, "Ehpesu myuq byu pé é Artemi gi, kô nyi sháng gaq ô!" ga hkyíng hkum í hkum kô garû bum akô.

³⁵ Haú, myuq chyare hpó gi, shiwa moq mó lé lhoq zim luí taí é gi, "Ehpesu myuq byu pé ê, Ehpesu myuq shí gi, Artemi myhí mó é noqkuq yhûm eq mauhkung mai byit gyó lo é yhang é alhò lé, wú zúng nyi é wà

nghut é hkyô lé, mingkan má a sê é ó yuq wa nyi lê lhu? ³⁶Haû mù luî, shí hkyô pé gi, wó he pyâm jung a nghut é yanmai, zim za nyi le ge lê, hân so hân dùn hkâkut ko. ³⁷Shí nhik gi, noqkuq yhûm lé hpyoq zo su nhik le a nghut, nga-nhûng é hparà myhí lé lhoq hpoi su nhik le a nghut kô é le nhîng, nungmoq shuí lé bekô nghut ri. ³⁸Demetri eq yhâng é ngùn bat zo luzúm wuî gi, rayuq yuq é ahtoq má mara hûn râ hkyô joq kô é nghut jáng, tarâ rûng pé hpông tô lê. Tarâ agyì pé nyi lê. Haú má yhangmoq é kó sháng gaq. ³⁹Nungmoq taí nau é gó hkyô rajung jung joq é nghut le kúm gi, tarâ wang zuphpong mó má chôm taí pyâm râ nghut lê. ⁴⁰Hkû-nyí gabyông é mù shí má, mô htoq wang a bo é yanmai, nga-nhûng lé mara hûn râ chiq râ ri. Shí su kut chôm míng é hkyô lé, hai é yanmai nghut lê nghû, nga-nhûng a wó taí kyo nghut ri." gâ ri. ⁴¹Shí pé ban taí é htâng má, yhang gi, shiwa moq mó lé lhoq pyo kat bê nghut ri.

20

Makedoni Mau Éq Grik Mau Đông Lai Lô É U Lê Hkyô

¹Haû gabyông é hkyô zím byuq é htâng má, Poluq gi, chángzô pé lé ji yù luî, yhangmoq lé wum byi dang taí to mù, shi-kyâm to luî, Makedoni mau shut htoq e ló bê nghut ri. ²Yhang gi, haú mau mai sô lai ló uchyang, byu pé lé wum byi é dang myo myo taí luî, Grik mau má ló jé bê. ³Yhang haû má lhamó sum hkyap nyi yù mù, lhai ji luî Suriq mau shut é râ hen nyi é hkûn, Yudaq byu pé gi, yhang lé gyám nyi kô é yanmai, yhang gi, Makedoni mau đông tau lò râ lé myit hpyit bê nghut ri. ⁴Yhang eq rabyìn za châng é bang gi, Beria và mó mâ é Purû yhangzo Sopata, Htesaloni và mó mâ é Aristakuq eq Sekundu nhik, Derbe và mó mâ é Ge-u, Timohti, Asia mau mâ é Tuhkiku eq Trohpiimu nhik pé nghut akô. ⁵Yhangmoq gi, hí so lánng luî, ngá-nhik lé Troa myuq má ló lánng nyi akô. ⁶Nghut kôlhang, ngá-nhik gi, Azuma Poí* lai é htâng má, Hpilipi và mó mai lhai ji ló le, ngo nyí nghû jáng, Troa myuq má yhangmoq lé hui luî, haú má nyhit nyí chôm nyi é nghut lê.

* 20:6 Múnchi a bo é Muk zo Poí lé, Azuma Poí le gâ lhê.

Troa Và Má, Utuhku Ga Sû Lhoq Tui Toq Huí É Hkyô

⁷Rabat é sâng-hi nyí lé, ngamoq gi, muk hpê gâm râ matú lé chôm zup zîng tô é hkûn, Poluq gi, htang nyí ló byuq râ ga hen tô é yanmai, chángzô pé lé gunggâm jé shoq hko kyô nyi ri. ⁸Ngamoq zup zîng nyi é haû ahtoq pyâm wap má, myibung myo myo le duq tô ri. ⁹Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmó myi byuq luî, yhûm sum tsáng mai byit gyó mù, yhang lé bún toq wú le shi byuq bê nghut ri. ¹⁰Haú hkûn, Poluq gi, gyó ló mù, po ngop to luî, "Hkâdân ko, yhang soq bo ashî." ga taí ri. ¹¹Haû mù, yhang gi, dum tau doq ló luî, muk lé hpé mù, zo luî, maubó shoq yhangmoq eq dang nyo kún mù htoq ló bê nghut ri. ¹²Zorâm zo haû lé duì gù shuí ló kômù, nhik tîng é gyai yhang hui bekô nghut ri.

Troa Và Eq Melitu Và Gyoro Mâ É Hkyowuì

¹³Poluq gi, myí hkyô ló râ matú hen tô é yanmai, yhang lajang byi é eq rajung za, yhang lé Asu và má lhai lhom shuí ji râ matú, ngamoq gi, lhai ji mù hí ló lánng bê nghut lê. ¹⁴Haû mù, yhang gi, Asu và má ngamoq eq hui luî, ngamoq gi, yhang lé lhai má shuí jî chûng mù, Mitulene myuq shut e ló bê. ¹⁵Htang nyi, ngamoq gi, haû mai lhai ji mù, Kiu zinlóng yâm mai lai ló luî, hau htang nyí gi, Samu zinlóng má lai dap ló luî, htang nyí gi, Melitu và mó má jé ló bê nghut lê. ¹⁶Poluq gi, wó dut é nghut jáng, Penteko-ti buinyì lé Yerusalem và mó má wó jé shoq gâ é yanmai, Asia mau má buinyì a kâm lhoq htum naù mù luî, Ehpesu myuq lé lhai pyâm to râ matú, myit hpyit to bê nghut ri.

Ehpesu Hpúng Suwún Wuí Lé, Poluq Shikyâm Tô É Dang

¹⁷Poluq gi, Melitu và mó mai Ehpesu shut byù nhang kat luî, hpúng suwún wuì lé ê jî nhang ri. ¹⁸Haú bang jé lé kôjáng, yhang yhangmoq lé taí é gi, "Ngò, Asia mau má sâng-hi jé é buinyì mai, nungmoq eq hkâsu kut nyi nyi é ahkyíng banshoq lé le; ¹⁹Yudaq byu pé jeq hô luî, ngò wuîhke jamjau hui zo kôlhang, haû Yhumsing é

muzó lé, ngò myit gyai lhoq nyhûm é eq ngaubyi ngaù nhap é èq wùn waq é hkyô lé le; ²⁰ nungmoq é matú akyû bo é hkyô banshoq lé, a myhit to loshoq taí é hkyô lé le; shiwa byu pê hí eq rayhûm htâng rayhûm má ngò nungmoq lé mhoqshit é hkyô lé le; ²¹ ngò gi, Yudaq byu pé eq Grik pé lé, myit lhîng mù Garai Gasâng chyáng lhing lò ra eq, nga-nhûng é Yhumsîng Yesuq lé lumjîng ra hkyô lé, saksé hkâm kyo lugù nghut bê lé le, nungmoq sê nyi akô.

²² Ahkuî, ngò gi, Woi-nyí má tuí tô é hui bê yanmai, Yerusalem wà mó má e ló lhê; haú má, ngò haí ló dut râ lé kúm gi, a sé nghut ri. ²³ Ngò gi, htóng eq wuîhke jamjau hkyô ngo lé láng tô ri ga, wà hkangmó má Chyoiyúng Woi-nyí èq lhoq pûn é hkyô lé za sê nyi lhê. ²⁴ Nghut kôlhâng, ngò gi, ðìn râ hkyô ban ðìn râ eq, Garai Gasâng jeju eq sêng é gabú danglù lé saksé hkâm râ matú, Yhumsîng Yesuq ngo lé byi tô é muzó lé ban wùn waq râ za nghut jáng, ngá asak lé ratsuí le a myit ha lô é nghut lhê.

²⁵ Garai Gasâng é mingdán hkyô lé hko kyô wún é hkûn, ngò eq huí é nungmoq lhunglhâng bang gi, htâng nùng má ngo lé a myàng lo kó râ nghut é lé, ahkuî ngò sê to bê. ²⁶ Haú mù luí, ó yuq nghut kôlhâng, yubak mara má shi byuq ló é nghut le, haú yuq é sui chyîn gi, ngò má a dap lô é hkyô lé, hkû-nyí, ngò saksé hkâm tô lhê. ²⁷ Hkâsu mù gâ le, Garai Gasâng ô nau é hkyô banshoq nungmoq lé hko kyo râ matú, ngò zaú tô é hkyô a joq wú é yanmai nghut lhê. ²⁸ Nungmoq gi, yhumsing gùng lé le, nungmoq lé Chyoiyúng Woi-nyí èq up zúng nhang é sau hpúng† lhunglhâng lé le, zúng nyí keq. Garai Gasâng Yhâng suí èq wui tô é noqkuq hpúng lé le, rém zúng nyí keq. ²⁹ Ngò ló byuq é htâng má, sau hpúng lé a shogyô é, ashop é wamhkui gi, nungmoq chyáng jé râ nghut é hkyô lé, ngò sê lhê. ³⁰ Hau htoq agó, chángzô pé lé wó mhoq hpyoq yû shoq ga, shut é ðông taí é byu pé lhâng nungmoq chyáng mai htoq lô râ nghut lhê. ³¹ Haú mù luí, nungmoq yuq hkangmó lé, ngò sum zân tup ngaubyi ngaù-nhap eq nyí myín a hkying loshoq, lhoq pun lhoq kyîng tô é dang pé lé, nungmoq gi, myit bun mù machya nyí keq.

† 20:28 Sau hpúng gâ é gi, lumjîng é bang lé gâ lhê.

³² Ahkuî, ngò gi, nungmoq lé, Garai Gasâng chyáng le, nungmoq lé wó lhoq ging lhoq tîng mù, lhoq chyoyúng é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê. ³³ Ngò gi, ó yuq é hîng, ngùn, mebu pé lé le a myoqnoq wú. ³⁴ Ngá é loq shí í loq gi, ngò eq ngá htâng châng é bang ra châ é lé kut byi bê hkyô lé, nungmoq yhang sé gû nghut lhê. ³⁵ Ngò kut é muzó banshoq gi, nungmoq é alik dut bê nghut luí, shí su kut shikut é ðông mai, nga-nhúng gi, wum-o nyhóm bang lé htuq bang luí, 'Lhom yu é htoq má byí é gi, je riyhang hkungsô wó nyi ri.' ga luí, Yhumsîng Yesuq taí é dang lé bûn nyí sháng." gâ ri.

³⁶ Poluq gi, haú su ga ban taí jáng, hkyihput htuq mù, yhangmoq lhunglhâng bang eq rahá za kyûðung ri. ³⁷ Yhangmoq lhunglhâng bang gi, yhang lé po to luí, bopuq puq mù, chôm ngaù akô. ³⁸ Htâng nùng má, yhang lé dum myàng râ a nghut lo gâ é dang yanmai, yhangmoq gi, je riyhang yón kuq bum akô. Yhang lé, lhaí má jé shoq lé châng dé kat akô nghut ri.

21

Yerusalem Wà Mó Shut Doq Ló Nyi É U Lhê Hkyô

¹ Ngamoq gi, yhangmoq lé kang pyâm to luí, lhaí jî chûng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara wà má dum jé bê. ² Haú wâ má Hpinisi mau shut dap ló é lhaí lé, ngamoq myàng luí, haú mai chôm jî chûng bê. ³ Haú hkûn, ngamoq gi, Kupru zinlóng lé myàng jáng, hau é loqyo hkyam ðông lai ló luí, Suriq mau shut e ló le, hpugá zê lé hkyó râ matú, Turuq myuq má nô é nghut lhê. ⁴ Haú wâ má, chángzô pé lé myang hô luí, yhangmoq chyáng nyhit nyí bíng yu é. Chángzô haú bang gi, Chyoiyúng Woi-nyí èq lhoq pûn é ðông Poluq lé Yerusalem wà mó shut a ló râ matú, chôm hkûm akô. ⁵ Nghut kôlhâng, nyhit nyí haú lai jáng, ngamoq gi, ngamoq é hkyowui shut dum xoq sô htoq ló bê. Chángzô pé lhunglhâng bang gi, yhangmoq é myi zo wui eq rahá, ngamoq lé wà shinggan jé shoq châng dé kôluí, ngamoq gi, yhangmoq eq rahá wuiyâm má hkyihput htuq mù,

kyû chôm dung bê nghut lhê. ⁶Hau htâng, rayuq eq rayuq ban shi-kyâm lhum jáng, ngamoq gi, lhaî má wàng bê; yhangmoq gi, yhûm shut dum tau ló byuq bekô nghut ri.

⁷Ngamoq gi, Turuq myuq mai lhaî jî chûng mù, Toleme wà má jé ló bê. Ngamoq gi, haú wâ mâ é gumang wuì lé shichyên yù mù, yhangmoq eq rahá ra-nyí chôm nyi kûn é nghut lhê. ⁸Htang nyí gi, ngamoq haú wâ mai htoq ló mù, Kesare wà mó má dum jé bê. Haú wâ má, haú htuqluq htuqbang nyhit yuq* má bò sù, gabú danglù hko taî é Hpilip gá su é yhûm má, ngamoq wang bíng bê nghut lhê. ⁹Yhang gi, yhang hku tô é byizo zomyi myiqhtoi myi yuq wó ri.

¹⁰Ngamoq gi, haú yhûm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri. ¹¹Yhang gi, ngamoq chyáng jé lé luí, Poluq é hpyihit lé yù mù, yhânggùng yhang loq eq hkyî pé má tui mù luí, taî é gi, "'Shî hpyihit yhumsîng lé, Yerusalem wà mó mâ é Yudaq byu pé mai shî su kut lhom tui luí, tûngbaù pé é loq má ap pyám kó râ nghut lhê;' ga luí, Chyoiyúng Woi-nyí taî ri." gâ ri.

¹²Dang haú lé wó gyo jáng, haú má é bang eq ngamoq gi, Poluq lé Yerusalem wà mó má a doq ló râ matú, gyai yhang chôm hkúm bê nghut lhê. ¹³Nghut kôlháng, Poluq gi, "Nungmoq gi, haî mù luí ngaubyi ngau-nhap kut é eq, ngo lé myit wum gyui râ dông kut nyi akô lúhú? Ngò gi, Yhumsîng Yesuq é yanmai, Yerusalem wà mó má, tuí é hui râ za a nghut, shí hkâm râ matú le rì rì nghut lhê." ga tû taî pyâm ri. ¹⁴Yhang lé wó taî hkúm râ su a dut lo jáng, ngamoq gi, "Garai Gasang ô nau é dông nghut sháng gaq." nghu luí, zim za chôm nyi bùm bê.

¹⁵Hau htâng má, ngamoq gi, zè món chûng mù Yerusalem wà mó shut doq ló bê nghut lhê. ¹⁶Kesare wà mó mâ é chángzô pé ra-am le, ngamoq eq rabyìn za nghut kôluí, yhangmoq gi, ngamoq lé Kupru byù Manason ga sù, hí hí lhê é chángzo rayuq é yhûm má shuít ló mù, yhâng chyáng bíng nhang akô.

Yerusalem Wà Mó Má, Yakuq Lé Ê Huí É Hkyô

¹⁷Yerusalem wà mó má ngamoq jé é hkûn, gumang wuì gi, ngamoq lé gabú tung

lhom hkûlum yu akô. ¹⁸Htang nyí, Poluq eq ngamoq gi, Yakuq lé ê huí le, hpúng suwún wuít le zîng nyi to lánng akô. ¹⁹Poluq gi, yhangmoq eq ban shichyên jáng, yhang wùn waq laî lo é hpúng mù dông mai, Garai Gasâng eq tûngbaù pé chyáng kut byi bê hkyô pé lé, jihkúm nuqguq shit kyô ri.

²⁰Yhangmoq gi, haú lé wó gyo kôjáng, Garai Gasang lé hkya-ôn akô. Hau htâng, Poluq lé taí kô é gi, "Âmang ê, Yudaq byu pé má lumjîng é bang hkâ-myhó hkyîng mun nghut bê lé, nàng sê lhê. Haú bang lhungl-háng gi, jep é tarâ má myit zuq to bê bang chyat nghut bum akô. ²¹Nghut kôlháng, yhangmoq lhungl-háng bang gi, tûngbaù pé chyáng nyó lúng tô é Yudaq byù banshoq bang lé, nàng, yhumsîng yhangzo yhangshû pé é matú ahpyo-kuq hpyit a ra nghu é eq nga-nhûng é htûng tarâ lé châng nyi a ra nghu luí, Mosheq é tarâ lé tô pyám râ dông mhoqshit ri gâ é dang lé, wó gyô yu bùm bekô nghut ri. ²²Nàng jé bê hkyô lé, yhangmoq wó gyo berâ za nghut lhê. Ahkuí, ngamoq hkâsu kut lo râ lúhú? ²³Haú mù, ngamoq taî é dông kut aq, ngamoq chyáng danggidiq mó byi bê byù myi yuq nyi lhê. ²⁴Nàng gi, haú bang lé ji yù mù, yhangmoq eq rahá lhoq san lhoq yúng yù aq, yhangmoq lé u wó wuq yù râ matú, ahpau le htoq byi aq. Haú hkûn sheq, byù lhungl-háng bang gi, yhangmoq wó gyô tô é hkyô a têng byuq é eq, nàng yhang lhang, jep é tarâ lé, châng kut nyi sù nghut é hkyô lé, sé kó râ nghut lhê. ²⁵Lumjîng é tûngbaù pé é matú kúm gi, hparà lhô pé lé tîng byi é zoshuq, sui, lingzing mai myhik sat é dusak sho eq ashop é dông gungsho zùm yap é hkyô pé lé, yhangmoq koi pyám râ matú, ngamoq chôm doqdan luí, kâ hûn kat bê nghut lhê." ga akô.

²⁶Haú mù luí, Poluq gi, hau htang nyí haú bang lé ji yù luí, yhangmoq eq rahá, lhoq san lhoq yúng yù mù, noqkuq yhûm má wàng luí, yhangmoq yuq hkangmó é matú hkungga wó byi shoq ga, yhangmoq é lhoq san lhoq yúng buinyi ngap bê hkyô lé, taí kyô ri.

Poluq Chyup Yû Huí É Hkyô

²⁷Buinyi nyhit nyí haú ngap râ yàm má, Asia mau mâ é Yudaq byu pé ra-am gi,

* 21:8 Lagyo 6:1-6

noqkuq yhûm má Poluq lé myàng kômù, shiwa byu pé lé shuí gabyong luí, yhang lé chyup yû mù, garú taí kô é dang gi, ²⁸ "Israellaq byu pé ê, garúm yû keq, shí yuq gi, nga-nhûng byuhú lé le, jep é tarâ lé le, jowò shí lé le, shut shai é đông jowò hkangmó mâ é byù banshoq lé mhoqshit sù nghut ri. Hau htoq agó, noqkuq yhûm má Grik pé lé shuí háng é eq, chyoyúng jowò shí lé achraq achyut kut é sù nghut ri." gâ akô. ²⁹ (Hkâsu mù gâ le, yhangmoq gi, Ehpesu myuq byû Trohpimu ga sù eq Poluq wà hkaû má rahá nghut kô é lé, myàng kômù, haú yuq lé noqkuq yhûm shut shuí háng nhô ngam pyám kô é yanmai nghut ri.)

³⁰ Rawà gón gabyông lo mù, shiwa byu pé lêngghyuyq mai din lé lô kôluí, Poluq lé chyup zing to uchyang, noqkuq yhûm shinggan shut she hkyut htoq ló akô. Haú hkûn jáng, hkum pé lé myhî pyâm akô nghut ri. ³¹ Poluq lé yhangmoq sat râ dâ nyi kô é hkûn, Yerusalem wà gón gabyông nyi akô gâ é hkyô lé, Romaq dap up zaú é no má, lò jé ri. ³² Haú mù, yhang gi, radá dâm shô up gyezau ra-am eq gyezô pé lé shuí chûng mù, byù hpúng shut, din yán gyó ló akô. Yhangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyîng byuq akô nghut ri.

³³ Haú hkûn, dap up zau hpó gi, Poluq chyáng ê jé mù, yhang lé chyup yû luí, toqjâng tui í hkat eq tuí to nhang ri; hau htâng, yhang ó yuq nghut é hkyô lé le, haí kut shut é hkyô lé le myí wú ri. ³⁴ Shiwa byu pé kúm gi, rayuq rajung ga garú bum akô. Haú mù, gyezau hpó gi, lûm garu kô é yanmai, têng é hkyô lé rago a wó sê yù jáng, Poluq lé gyewap má shuí ló nhang ri. ³⁵ Poluq gi, zumhtâng wang má jé lo é hkûn, byù moq mó lûm htim chyîn chyap lô kô é yanmai, gyezô pé gi, yhang lé waq doq ló akô. ³⁶ Shiwa byu pé gi, "Yhang lé sat pyám keq." ga châng garú nyi akô nghut ri.

Poluq, Yhumsing Gùng Mara A Bo É Lé Táí Sâk Kyô É Hkyô

³⁷ Gyezô pé gi, Poluq lé gyewap má shuí wàng râ za nghut é hkûn, Poluq gi, dap up zau hpó lé, "Ngò nàng lé dang wó nyô râ lú?" ga myi jáng, dap up zau hpó gi, "Nàng, Grik myíng dat mu lûn?" ³⁸ Nàng

gi, hí hkûn gumlau kut mù, byù sat wún bang myi hkyîng lé, yoso shut shuí htoq ló é sù, Egutuq byù a nghut lú?" ga tau myí ri.

³⁹ Haú hkûn, Poluq gi, "Ngò gi, Kiliki mau Tarshu myuq mâ é Yudaq byù nghut lûn; ngò nyi é wà gi, wà chyap wà zo za a nghut, jeju mai, byù shí bang lé ngò dang taí râ ahkáng byi laq." ga dúng ri.

⁴⁰ Gyedap up zau hpó ahkáng byi jáng, Poluq gi, zumhtâng má yap to mù, shiwa byu pé shut loq he ri. Haú hkûn, yhangmoq lhunglhang bang zim byuq kômù, Poluq, yhangmoq lé Hebre myíng đông taí é gi,

22

¹ "Gumang wù eq îwa pé ê, ahkuí, ngò mara a bò nghu taí é dang lé gyô wú shi keq." gâ ri.

² Yhangmoq gi, yhang Hebre myíng đông taí é dang lé wó gyô bùm kôjáng, gyai yhang zím byuq bekô. Haú mù, Poluq xoq taí é gi, ³ "Ngò gi, Yudaq byù rayuq nghut lûn. Kiliki mau Tarshu myuq má choq hpyit kôlhang, wà mó shí má nyi kô lò sù nghut lûn. Ngò gi, nga-nhûng îchyí îwa pé é jep é tarâ lé, Gamalelaq é loq má jihkúm nuqguq mhoq yû luí, hkûnyí lûn é nungmoq lhunglhang bang su, Garai Gasang lé gyai myit zing zuq é sù nghut lûn. ⁴ Ngò gi, shí Hkyô cháng bang lé shi é jé shoq, zing-rî wú é sù eq, myiwe yuqgè ó yuq lé nghut kôlhang, chyup yû mù htóng má lûng pyâm wú bê sù nghut lûn. ⁵ Hkyangjong mó eq byìn tú wap suwún wú lhunglhang bang gi, ngá é saksê pé nghut akô. Ngò gi, Damaskuq myuq má nyi é yhangmoq é Yudaq gumang wù lé byi râ laiká yhangmoq chyáng mai wó yu chûng luí, haú mâ é bang lé le Yerusalem wà mó má dam byi râ matú, chyup tuí ló râ nghu, Damaskuq myuq shut e é nghut lûn.

⁶ Nyigùng tû zó lé, ngò Damaskuq myuq shut sô chyâng ló nyi é hkûn, maubó gi, ngá é lêngghyuyq má mauhkung mai byodàn tung duqbó to bê nghut ri. ⁷ Haú mù, ngò myigùng má lêng gop tô le, wó gyô kat é danghtê gi, 'Sholuq, Sholuq, nàng ngo lé haí mù zing-rî nyi lûn lú?' gâ ri.

⁸ Ngò le, 'Yhumsing ê, nàng ó nghut lûn lú?' nghu myí kat jáng, 'Ngò gi, nàng zing-rî wún é sù, Nazaret wà byù Yesuq

nghut lhê.' ga luí, Yhang tú tái kat ri. ⁹Ngò eq rahá e ló é bang kúm gi, maubó lé myàng kôlhang, ngo lé tái é danghtê lé a sê gyo kó nghut ri.

¹⁰Dum, ngò gi, 'Yhumsîng ê, ngò haí kut ra râ lhú?' nghu myi jáng, haú Yhumsîng gi, 'Toq mù, Damaskuq myuq má wang ló aq, nàng kut râ matú wò byí tô é hkyô pé lhunglhang, nang lé haú má lhom tái kyo berâ nghut lhê.' ga ngo lé dum tái ri. ¹¹Haú maubó é shingkâng é yanmai, ngò myoqjit byuq mù, ngá é byinzùm wuì gi, Damaskuq myuq shut ngo lé loq mai she wang ló akô.

¹²Haú hkûn, Anani gâ é yuqgè rayuq ngá chyáng lé huí ri. Yhang gi, jep é tarâ lé gyuq hkunggâ é eq, haú má nyi é Yudaq byú lhunglhang bâng é hí má myoqdong gyai wó é sù nghut ri. ¹³Yhang gi, ngá nâm má yap to luí, 'Gumang Sholuq ê, náng myoq myàng aq hkoi!' ga tái ri. Haú hkûn jáng yhang, yhang lé ngò wó myang kat bê nghut lhê.

¹⁴Yhang dum xoq tái é gi, 'Nga-nhông îchý íwa pê é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sù lé wó myâng luí, Yhâng é nhut mâ é mungdang lé wó gyo sháng gaq ga luí le, hkyin to bê nghut ri. ¹⁵Haú mù, nàng gi, nàng myang é eq wó gyô yu é hkyô pé lé, byú lhunglhang bâng é hí má, Yhâng é matú saksé hkám byi râ su dut râ nghut lhê. ¹⁶Ahkuí, nàng haí lé lánng nyi ashí lhú? Toq aq, Yhâng é myìng lé lang luí wui-myhup hkám yu é eq, náng é yubak mara pé lé chí sân pyám aq.' gâ ri.

¹⁷Hau htâng, ngò gi, Yerusalem wà mó má dum tái jé ló mù, noqkuq yhùm má kyû ê dúng nyi le, moq byuq ló mù, ¹⁸'Nàng, ngá é hkyô lé saksé hkám râ dang lé, yhangmoq a lhom hap yù kó râ nghut é yanmai, Yerusalem wà mó mai hân htoq ló aq.' ga Yhumsîng ngo lé tái nyi é lé, myoqwup shing-rán đông myang ri.

¹⁹Haú mù, ngò gi, 'Yhumsîng ê, tarajong ralhùm htâng ralhùm má nang lé lumjìng bang lé, htóng má chyup lhung pyâm é eq, hkat bat lhing wún é hkyô lé, yhangmoq sê bum akô. ²⁰Náng é saksé Stehpan sat hui luí suí shun u lé, ngò nâm má yhang yap to mù, haú hkyô lé myit bo hui luí, yhang lé sat pyám bâng é mebu lé zúng byí é nghut lhê.' nghu tái tái bê.

²¹Haú hkûn, Yhumsîng gi, 'Ê aq, ngò, nang lé, wê gâng é tûngbaù pê chyáng nhang kat râ.' ga, ngo lé tái ri." gâ ri.

Poluq, Romaq Mingdán Byú Nghut É Hkyô

²²Shiwa byu pé gi, dang haú hkun jé za gyô yù kômù, "Shí sù é byù gi, myigùng htoq má nyi a gíng, sat pyám keq." ga, htê mó eq garú bum akô.

²³Yhangmoq gi, haú su garu uchyang, yhumsing buhîng lé hkyut dú pyâm lhê, hpuihup lé mauhkung shut kyaq tâng lhê, kut nyí kôjáng, ²⁴dap up zau hpó gi, Poluq lé gyewap má shuí hâng yù nhâng mù, yhang lé shiwa byu pé haí mù shí su ga garú bum kô é hkyô lé wó sé shoq ga, nhuq bat nhâng luí, myí choq nhang ri. ²⁵Nhuq bat râ matú shokuq tuí eq tui kôjáng, Poluq gi, nâm má yap tô é shô up gyezau lé, "Romaq mingdán byú ru nghut sù lé nhîng, lhang a jéyáng shimá, nungmoq nhuq bat le gi, tarâ wang akô lhú?" ga tái ri.

²⁶Rashô up gyezau gi, dang haú lé wó gyo jáng, dap up zaù chyáng ló mù, "Nàng haí kut râ dâ nyi lhê lhú? Shí yuq gi, Romaq mingdán byú sheq ru nghut ri." ga luí, yhang lé ló tái kyô ri.

²⁷Haú mù, dap up zau gi, Poluq chyáng é mù, "Nàng gi, Romaq mingdán byú nghut lhê lhú? Tái kyô wú laq." ga myí ri.

Poluq gi, "Ngò, Romaq mingdán byú nghut lhê." ga tái ri.

²⁸Haú hkûn, dap up zau hpó gi, "Ngò lhang ahpau myo myo byí pyám luí sheq, Romaq mingdán byú ru wó dut é nghut lhê." ga tái tái jáng, Poluq gi, "Ngò kúm gi, Romaq mingdán byú dut gû hku lé lo é sù nghut lhê." ga tái ri.

²⁹Yhang lé myí choq wú râ gâ é bang gi, haú hkûn jáng, yhâng chyáng mai huí zut ló bùm bekô. Gyedap up zau hpó le, Poluq gi, Romaq mingdán byú nghut é lé sé jáng, yhang lé tái pyám bê nghut é yanmai, gyuq byuq bê nghut ri.

Yudaq Byìn Tú Wapdoq Suwún Wuí Gam Hkoq Byuq É Hkyô

³⁰Htang nyí, dap up zau hpó gi, Yudaq byu pé mai Poluq lé hun é mara haí nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byìn tú wapdoq suwún wuì lhunglhang lé ji tsîng to luí, yhangmoq é

gung gung má Poluq lé shuí wàng mù, shap to bê nghut ri.

23

¹ Haú hkûn, Poluq gi, Yudaq byìn tú wapdoq suwún wuî lé wú tsuq to mù, "Ngá gumang wuî ê, ngò gi, hkû-nyí jé shoq Garai Gasâng é hí má sansêng é i-myt èq asak dui nyi bê nghut lhê." ga taî ri. ² Haú mù luî, hkyangjong mó Anani gi, Poluq nâm má yap to bang lé, yhâng nhut má bat byi keq gâ ri. ³ Haú hkûn, Poluq gi, yhang lé, "But hpyu tô é xewâm* nàng ê, nàng lé sheq Garai Gasâng èq bat râ nghut lhê. Nàng gi, tarâ eq rajung za ngo lé jéyáng râ matú shî má zung to luî nhîng, haî mù tarâ eq shut shai é đông ngo lé bat nhang lhê lú?" ga taî ri.

⁴ Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhê lú?" ga luî, chôm taî akô.

⁵ Poluq gi, "Gumang wuî ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, 'Náng amyû lé up é sù lé wó rhoi râ a nghut.' ☆ ga le kê tô é nghut lhê." ga tû taî ri.

⁶ Hau htâng, haú zîng tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byìn tú wapdoq suwún wuî lé, "Gumang wuî ê, ngò gi, Hparishe awut ashín mâ é, Hparishe rayuq nghut lhê. Shî bê bang dum dui toq lô râ hkyô lé myit myoqbyù é yanmai, ngò jéyáng é huî nyi ri." ga luî, garû taî kat ri.

⁷ Yhang haú su ga taî kat jáng, Hparishe pé eq Saduke pé gi, dang jet jet lhûm lò kômù, Yudaq byìn tú wapdoq hpong gi, gam hkoq lô byuq bekô nghut ri. ⁸ (Hkâsu mù gâ le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga taî bum akô. Hparishe pé kúm gi, haú pé joq lhê ga, lumjîng bang nghut akô.)

⁹ Haú mù luî, gyai yhang taî garû bum akô. Haú hkûn, Hparishe hpúng mâ é tarâ sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taí bê nghut jáng gi, hkâsu nghû kó râ lú?" ga luî, zuq zuq taî htîng lhûm akô nghut ri. ¹⁰ Haú su kut gyai

yhang taî htîng lhûm lò kôjáng, dap up zau hpó gi, Poluq lé lêng myha pyám kó râ lé chiq é yanmai, yhangmoq chyáng gyó ê mù, Poluq lé haú bâng é gung gung mai ê lú shuí lò luî, gyewap má shuí wang lô râ matú, gyezô pé lé nhang kat ri.

¹¹ Haú myîn, Yhumsîng gi, Poluq é nâm má yap to luî, "Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê." ga, yhang lé taî ri.

Poluq Lé Sat Râ Haq Dâ É Hkyô

¹² Htâng napkyó, Yudaq byu pé gi, Poluq lé sat râ hpaqchyî chôm da kômù, yhang lé a wó sat sat gi, a zo a shuq râ nghut lhê ga, ó le ó dakam yu akô nghut ri.

¹³ Hpaqchyî shî lé chôm dâ é bang gi, myi xê yuq chyân nghut bum akô. ¹⁴ Yhangmoq gi, hkyangjong agyi pé eq suwún wuî chyáng ê kômù, "Poluq lé a wó sat sat gi, ngamoq haî le a zo nghû, chôm dakam yu to bê nghut lhê. ¹⁵ Hau é yanmai, ahkuî nungmoq gi, Yudaq byìn tú wapdoq suwún wuî eq rahá kut luî, Poluq é hkyô lé rago za myî gon wú râ nghu mhaú é đông, yhang lé nungmoq chyáng wut yù râ matú, dap up zaû chyáng dúng kat keq. Haú hkûn, ngamoq gi, hkyolat má yhang lé lhom sat pyám râ rì rì kut to râ nghut lhê." ga taî akô.

¹⁶ Nghut kôlhang, haú lhom haq sat kó râ gâ é hkyô lé, Poluq é yhâng nhammó é yhangzo yuqgè zo wó gyô yù luî, yhang gi, gyewap má wang ê mù, Poluq lé ê taî kyô ri.

¹⁷ Haú hkûn, Poluq gi, shô up gyezau rayuq lé ji yù mù, "Zorâm shî lé dap up zaû chyáng shuí ê aq, yhang, yhang lé shit kyo râ hkyô rajung joq lhê ga." ga taî ri. ¹⁸ Haú mù luî, shô up gyezau hpó gi, zorâm haú lé dap up zaû chyáng shuí ê mù, "Zorâm shî nang lé shit kyo râ hkyô rajung joq lhê gâ ri ga, yhang lé náng chyáng shuí lé râ matú, htóng byû Poluq gi, ngo lé ji yù mù taî ri." ga, yhang lé taî ri.

¹⁹ Haú jáng, dap up zau hpó gi, jauwò má zorâm haú lé yhâng loq mai she ê mù, "Nàng ngo lé haî jung shit kyó nau ri lú?" ga, yhang lé baú tsik za myî ri.

²⁰ Haú hkûn, zorâm haú gi, "Yudaq byu pé gi, Poluq lé rago za saî myî wú râ su kut

* 23:3 But hpyu tô é xewâm gâ é gi, gegùn labyoq kut bang lé gâ lhê. ☆ 23:5 Htoq Lô 22:28

mhaú mù, napmá, Yudaq byìn tú wapdoq má shuí yù rã matú, náng chyáng dung kó rã ga, myit chòm huít to bekô nghut ri. ²¹ Haú mù luít, yhangmoq ô nau é dông hkâgyo byi, hkâsu mù gã le, Poluq lé a wó sat sat gi, haít le a zo a shuq rã nghut lhê ga, byù myi xê yuq chyân yhang, ó le ó dakam yù bekô nghut ri. Haú bang gi, yhang lé lhom chyup yù rã matú haq lhom to lãng kó rã nghut lhê. Ahkuít lãng, yhangmoq gi, mù haú kut rã matú rì rì nghut bùm bekô; náng é ahkáng lé za lãng nyi bum akô nghut ri." ga shit kyô ri.

²² Haú hkûn, dap up zau hpó gi, zorâm haú lé, "Nàng, ngo lé shí hkyô shit kyo bê hkyô lé, ó yuq lé le hkâtaít kyo." ga, sidiq byi mù, taú nhang kat bê nghut ri.

Mingzau Hpilik Chyáng Poluq Lé Dé Kat É Hkyô

²³ Hau htâng, yhang gi, shô up gyezau í yuq lé ji yù mù, "Hkû-myîn sum hkyíng† má Kesare wà mó shut ê rã matú, gyezô pé í shô, myang ji bang nyhit xê, lhâm chùng bang í shô kut mù, rì rì hen to keq. ²⁴ Hau htoq agó, Poluq lé mingzau Hpilik chyáng ngón za wó dé kat rã matú, yhang ji rã myang pé le lajang byi keq." ga, yhangnhik lé pying kat ri.

²⁵ Laiká hun kat é le:

²⁶ "Aróng wó dik é mauzau Hpilik ê, ngò Klodi Lusi gi, nguingón danglù shit kyô kat lhê.

²⁷ Shí yuq lé gi, Yudaq byu pê èq chyup yù mù sat pyám rã dâ nyi bekô za nghut lhê. Nghut kôlhang, ngò gi, gyezô pé eq rahá ê wú le, yhang Romaq mingdán byù nghut é lé wó sê yu é yanmai, yhangmoq chyáng mai yhang lé hkyi lo é nghut lhê.

²⁸ Haú su mù, haít mù yhang lé mara hùn kô é hkyô lé sé nau é yanmai, yhangmoq é Yudaq byìn tú wapdoq má yhang lé shuí jé byi wú bê nghut lhê. ²⁹ Haú hkûn, yhangmoq é tarã hkyô eq séng luít za mara hun bùm kô é lé ngò myang ri. Nghut kôlhang, shí gíng é eq htóng lhúng gíng é mara haít le a bò nghut ri.

³⁰ Shí yuq lé sat pyám rã hpaqchyít da kô é hkyô, ngo lé shit kyo kô é hkûn, radá dâm, yhang lé ngò náng chyáng dé nhang kat bê. Yhang lé mara hùn nau é

bang lé gi, nang hí má yhang hun lhum keq nghú pying kat bê nghut lhê." gã ri.

³¹ Haú mù luít, gyezô pé gi, haú pying kat é dang eq rajung za, myín lé yhang, Antipatri wà mó jé shoq Poluq lé dé kat bekô nghut ri. ³² Htang nyít, myang ji bang lé ê châng dé nhâng kômù, yhangmoq gi, gyewap shut dum taú lò bekô nghut ri. ³³ Myang jít é gyezô pé gi, Kesare wà mó má jé kô é hkûn, mauzau hpó lé laiká byi mù, Poluq lé le jâng ap byi akô nghut ri. ³⁴ Haú hkûn, mauzau hpó gi, laiká haú lé ban nghap jáng, Poluq hká mau mâ é byù nghut é hkyô lé myi wú luít, Kiliki mau mâ é byù nghut é lé sé jáng, ³⁵ "Nang lé mara hùn bang jé jáng sheq, náng mù lé ngò gôn wú rã." ga taít ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

24

Poluq, Mara Hùn Huít É Hkyô

¹ Hau htâng, ngo nyít lai jáng, hkyangjong mó Anani gi, suwún wú ra-am eq tarã sé sù Tertulu lé shuí gyó ló mù, mauzau hpó hí má Poluq lé mara lé taít hun bum akô. ² Haú hkûn, Poluq lé hí má ji hâng tô é nghut mù, Tertulu, yhang lé mara hùn dang taít hi é gi, "Aróng wó dik é Hpilik ê, ngamoq gi, nyìngón yuqyo é hkyô lé nang é yanmai gyai myáng shoq wó hkam yu bum é nghut lhê. Nàng sê up sê hkang é jeju lé, byù myi shí wó hkâm zô nyi é yanmai, ³ ngamoq gi, haú lé hkyô hkat hkangmó eq jowò hkangmó má jeju bùm é myit eq hkam yu nyi bê nghut lhê. ⁴ Nghut kôlhang, ngò nang lé lhoq hkyik é dông a dut sháng gaq, taít rã dang ratot zo lé, myit hìng hìng to mù gyo byi laq nghú dúng tôngbán lhê ô!

⁵ Shí yuq gi, byù lé gunjang sù, mingkan gón mâ é Yudaq byu pé lhunglhang lé shuí gabyong sù eq, haú Nazaret hpúng mâ é hkyô-u shê sù nghut é lé, ngamoq myang ri. ⁶ Hau htoq agó, yhang gi, noqkuq yhùm lé achayut kut rã dâ nyi luít, yhang lé ngamoq chyup yù mù, (ngamoq é tarã dông jéyáng rã hen nyi é hkûn, ⁷ dap up zau Lusi gi, lé lô mù, ngamoq é loq mai yhang lé lé lú shuí yù luít, yhang lé mara hùn bang lé, náng chyáng jé keq ga hkunmó hkyô

† 23:23 Myín sum hkyíng gi, nga-nhùng é myín gau hkyíng nghut lhê.

tô é nghut lhê.) ⁸ Haû mù, nàng, yhang lé myí wú jáng, ngamoq yhang lé hun é mara banshoq têng é hkyô lé, nàng wó sé râ nghut lhê." gâ ri.

⁹ Yudaq byu pé le, haú pé gi, têng lhê ga bo chôm taí akô nghut ri.

Poluq, Mara A Bò É Lé Taí Hung É Hkyô

¹⁰ Mingzau hpó gi, Poluq lé dang taí râ đông loq lik kat jáng, Poluq taí é gi, "Zau ê, shí mau bâng é ahtoq má, nàng zanwut myo myo jéyáng byí nyi é hkyô lé, ngò sê é yanmai, ngò gabú myit èq yhumsing matú, mara a bo é hkyô taí bá. ¹¹ Ngò, Yerusalem wà mó má noqkuq râ matú doq e é buinyì raxe í nyí lhang a chyân shi é gi, nàng lui za wó sé râ nghut lhê. ¹² Noqkuq yhûm má ngò ó yuq eq taí htîng lhûm é lé lhang, tarajong, a nghut jáng, wà hkaû hká jowò má le byu pé lé shuí gabyông é lé lhang, ngo lé mara hun é bang gi, a myàng kó. ¹³ Ahkuí, ngo lé yhangmoq hun é mara pé lé, náng hí má yhangmoq saksé lhang a wó tûn shit kó nghut ri. ¹⁴ Nghut kôlhang, náng hí má ngò yín yû râ hkyô rahkat gi, yhangmoq èq shut shaí hkyô ga myhîng tô é Hkyô lé cháng lui, ngamoq é îchyí îwâ pê é Garai Gasang lé noqkuq nyi lhê. Jep é tarâ eq myiqhtoi laiká pé má kê tô é lhunglhang lé le lumjîng lhê. ¹⁵ Ngò gi, dingmán é bang eq a dingmán bâng é dum dui toq lô râ hkyô joq é lé, yhangmoq eq rajung za Garai Gasang má myit myoqbyu nyi é sù nghut lhê. ¹⁶ Haû mù lui, Garai Gasang eq byu é hí má, ngò gi, râ é hkyô a bo é za, myit é hkyô san za wó dut nyi shoq, shikut nyi lhê.

¹⁷ Zanwut tsómra lai é htâng má, ngò gi, ngá é byù myû mâ é myùng bang lé chyunghuq byi râ eq alu kat râ matú, Yerusalem wà mó shut ló jé bê nghut lhê.

¹⁸ Haû su kut nyi é hkûn, ngò eq rahá hai byù moq mó le a nyi, haí jung gabyông é hkyô le a htoq, ngò noqkuq yhûm má lhoq san lhoq yúng yû bê hkyô lé za, yhangmoq myang akô. ¹⁹ Nghut kôlhang, Asia mau mâ é Yudaq byù ra-am gi, haú má nyi tô é nghut lhê; yhangmoq mai ngo lé mara hûn râ hkyô joq kô é nghut le gi, shî náng é hí má yhangmoq lé jé kó ra nghut lhê.

²⁰⁻²¹ Haû a nghut jáng, shî má nyi tô é bang gi, ngò Yudaq byin tú wapdoq hí má yap to mù, 'Shi byuq bâng é dum dui toq râ hkyo

é yanmai, hkû-nyí nungmoq ngo lé jéyáng nyi akô.' nghû lui, garû é dang hkûn mai lai lui, ngò má gotû mara myàng shi kô é nghut le gi, yhangmoq yhang taí kyo kó sháng gaq." gâ ri.

²² Hpilik gi, Hkyô haû lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi râ nghut lhê." ga lui, yhangmoq lé ahkyíng htot kat byí ri.

²³ Poluq lé le, zúng za zúng to mù, yhâng é buinùm ji-myi wuì mai yhang ra châ é hkyô lajang byi naû kô é bang nyi le gi, ahkáng byi keq ga lui, shô up gyezau lé hkunmó hkyô kat ri.

²⁴ Buinyì rayoq zo lai é htâng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng lui, yhang, Hkrisduq Yesuq lé lumjîng hkyô taí kyô é le gyô yu ri.

²⁵ Poluq gi, dingmán hkyô, yhumsing gùng lé hking é hkyô eq, jé lô râ tarâ dara hkyô lé mhogshit jáng, Hpilik gi, gyô gyuq mù, "Nàng ahkuí wó ló bê, ngò jìn jáng sheq nang lé dum ji yù râ nghut lhê." ga taí ri.

²⁶ Hpilik kúm gi, Poluq èq ngùn haq byi râ lé myit myoqbyù mù, yhang lé anum num ji yù lui, yhang eq nyo lhum lhum kut ri.

²⁷ Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôlhang, Hpilik gi, Yudaq byu pê é hí má myoqdong wó nau é yanmai, Poluq lé htóng má jâng lhung pyâm to bê nghut ri.

25

Poluq, Kehtaq Chyáng Jé Râ Matú Dûng È Hkyô

¹ Hpestu gi, haú mau má jé é sum nyi lai jáng, Kesare wà mó mai Yerusalem wà mó shut doq ló ri. ² Haú hkûn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù, ³ yhangmoq gi, Poluq lé hkyolat má lhom haq sat pyám râ dâ to kômù lui, jeju ralhûm kut byí é đông Poluq lé Yerusalem wà mó shut dé kat byi râ matú, Hpestu lé lhom dûng akô. ⁴ Nghut kôlhang, Hpestu gi, "Poluq lé Kesare wà mó má sheq ru lhung tô lhê, hkâ-myháng a myáng má, ngò yhang le haú má dum taú ló râ nghut lhê.

⁵ Haû mù, nungmoq mâ é hkyô-u shê bang ra-am, ngò eq rahá gyó ló mù, haú yuq kut

shut é hkyô bo é nghut jáng gi, yhang lé mara lé hùn kó sháng gaq." ga tũ taĩ ri.

⁶Hau htâng, yhang gi, shit nyi, raxê nyi kô yhangmoq chyáng nyi yù luĩ, Kesare wà mó má taũ ló mù, htang nyĩ gi, tarâ tanghkuq má zùng luĩ, Poluq lé yhâng hí má shuí wang lò rã matú hkunmó hkyô kat ri. ⁷Poluq jé jáng, Yerusalem wà mó mai gyó lo é Yudaq byu pé gi, yhâng é lnhnghkyuq má yap to kôluĩ, saksé a wó tũn shit é mara mó myo myo lé, yhâng é ahtoq má chôm taĩ hun akô nghut ri.

⁸Haũ hkũn, Poluq gi, "Yudaq byu pé é jep é tarâ eq shai é dông le, noqkuq yhũm lé shut é dông le, Kehtaq* lé shut é dông le, ngò a kut wú." ga luĩ, mara a bo é hkyô taĩ ri.

⁹Nghut kôlhang, Hpestu gi, Yudaq byu pé é hí má myoqdong wó naũ mù, Poluq lé, "Nàng, Yerusalem wà mó má doq ló luĩ, shĩ hkyô pé lé ngò haũ má doqdan byi rã matú, nàng dóng lhê lhu?" ga myĩ ri.

¹⁰Poluq kúm gi, "Ngò gi, doqdan hui rã nghut jáng, shĩ doqdan é jowò, Kehtaq é tarâ hpyit wap má ahkuĩ yap to bê nghut lhê. Nàng sê é eq rajung za, ngò gi, Yudaq byu pé lé haĩ lhang a shut wú sũ nghut lhê. ¹¹Laq má mù, shĩ gĩng é mara lé, ngò kut shut pyãm é nghut le gi, shĩ hkám rã hkyô lé ngò a he pyãm; nghut kôlhang, shĩ Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi rã ahkáng wó rã a nghut, ngò gi, Kehtaq chyáng wang taĩ rã nghut lhê." ga tũ taĩ ri.

¹²Haũ hkũn, Hpestu gi, yhâng é byĩn tú wap bang eq ban hpyê lhum jáng, "Nàng Kehtaq chyáng wang taĩ rã ga bê nghut lhê, Kehtaq chyáng wang ló aq hkoil!" ga taĩ kat ri.

Poluq Lé, Hkohlkâm Agripa Hĩ Má Shuí Hâng Yu É Hkyô

¹³Hau htâng, buinyĩ hkã-myháng a myáng má, Hkohlkâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huĩ nyo akô nghut ri. ¹⁴Haũ mù, yhangnhik tâng gi, buinyĩ tsómra myáng nyi nyi é htâng má sheq, Hpestu gi, haũ Poluq é hkyô lé hkohlkâm wa eq taĩ kyô lhum é gi, "Hpilík, lhung to lánng é htóng byũ rayuq nyi ri. ¹⁵Ngò Yerusalem

wà mó má nyi tũ é hkũn, hkyangjong agyi pé eq Yudaq byu pé é suwũn wuĩ gi, haũ yuq é hkyô lé taĩ kyo kôluĩ, haũ yuq lé mara byi rã matú ngo lé chôm dũng akô.

¹⁶Haũ hkũn, ngò gi, mara hun é hui sũ, mara hun é bang eq chyung chyoyq yoq kut luĩ, yhangmoq hun é mara lé yhumsing matú mara a bo é hkyô a wó taĩ shi lé, ó yuq lé ap byi pyãm rã le, Romaq htũng a joq nghũ luĩ yhangmoq lé taĩ kyo bê nghut lhê. ¹⁷Yhangmoq ngá htâng châng gyó lô kô é hkũn, ngò gi, a nô yu é za, htang nyĩ jáng tarâ tanghkuq má zùng luĩ, haũ yuq lé shuí wang lò rã matú hkunmó hkyô kat é. ¹⁸Haũ hkũn, haũ yuq lé yhangmoq mara chôm hun bũm kôle, ngò myit ngãm tũ é su mara ralhũm le a hun htoq lô kô nghut ri. ¹⁹Yhangmoq é noqkuq htũng hkyô eq, haũ dui nyi ri ga Poluq eq taĩ é, shi byuq bê Yesuq é hkyô lé za dang jet jet lhum bum akô. ²⁰Haũ mù, ngò gi, haũ hkyô lé hkã dông gon yũ rã le a sé lô é yanmai, haũ hkyô lé Yerusalem wà mó má doqdan é ló hkam yũ rã matú, yhang dóng a dóng é hkyô lé myĩ wú le, ²¹Poluq yhang sheq, Hkoséng mó chyáng jé rã ga taĩ é yanmai, Kehtaq chyáng a dé kat shi é u lé, yhang lé zũng nyĩ shirã matú, ngò hkunmó hkyô kat é nghut lhê." gã ri.

²²Haũ hkũn, Agripa gi, "Ngò le haũ yuq é dang gyô wú nau ri." ga, Hpestu lé taĩ jáng, yhang gi, "Napmã, nàng wó myang gyo rã nghut lhê." ga tũ taĩ ri.

²³Htâng nyĩ, Agripa eq Bernike nhiktâng gi, shinggang bò bò za lé lô mù, dap up zau wuĩ eq wã mã é agyĩ suwũn wuĩ eq rahã, rũng gok mó má wang zung tũ bũm kô é hkũn, Hpestu hkunmó hkyô kat jáng, Poluq lé shuí hâng tũ akô. ²⁴Haũ hkũn, Hpestu taĩ é gi, "Hkohlkâm Agripa eq ahkuĩ shĩ má zup zĩng tũ é lhunglhang bang ê, Yerusalem wà mó eq shĩ wã mã é Yudaq byu pé banshoq bang, ngá chyáng lé taĩ kôluĩ, shĩ yuq lé asak a wó duĩ nhang to lo ga garũ bũm é gi, ahkuĩ nungmoq myang é shĩ yuq yhang nghut bê. ²⁵Nghut kôlhang, shĩ yuq zui saĩ é má shĩ gĩng é mara haĩ lé lhang ngò a myàng nghut ri. Yhang gi, Hkoséng chyáng wãng rã ga taĩ é yanmai, yhang lé Romaq myuq shut dé kat rã matú ngò myit hpyit to bê. ²⁶Dé kat bá nghũ jáng

* 25:8 Kehtaq gã é gi, "hkoséng" gã é nghut lhê.

le, ngá é yhumsîng Hkosêng chyáng yhang é hkyô jihkúm nuqguq kê hun kat râ haî le a bò nghut ri. Haû mù luî, yhang lé ban myî gôn wú jáng sheq, ká râ hkyô rajung jung hkâlháng ngò myàng abe nghû, nungmoq banshoq bâng é hí má le, je riyhang nàng Hkohkâm Agripa é hí má le, yhang lé ngò lhoq htoq shit é nghut lhê. ²⁷ Hkâsu mù gâ le, htóng byû rayuq yuq lé dé kat é hkûn, yhang lé hun é mara a wó tân shit lé gi, a htuk nghû luî, ngò myit lhê." gâ ri.

26

Poluq É Hí Hpyang Lhê É Nyî Yap Hkyô

¹ Haû hkûn, Agripa gi, Poluq lé, "Nàng, náng matú dang tai râ ahkáng wó bê." ga taî ri.

Haû mù luî, Poluq loq tû kat mù mara a bo é hkyô taî é gi, ²⁻³ "Hkohkâm Agripa ê, nàng gi, Yudaq byu pê é htungking banshoq eq taî htîng lhûm é hkyô hkat hkangmó lé, gyai sê to sù nghut é yanmai, Yudaq byu pé ngo lé hun é mara hkat hkangmó lé, ngò hkû-nyî náng é hí má mara a bò é hkyô myang taî é gi, ngá matú gabú hpo yhang nghut ri nghû myit yu nyi lhê; haû mù luî, ngá dang lé myit hing é eq gyô yù byi laq nghû, dúng tôngbán kat lhê.

⁴ Ngò gi, zoshâng hkûn mai, ngá amyû má le, Yerusalem wà mó má le, hkâsu kut nyi kô lo é hkyô lé, Yudaq byu pé lhunglhâng bang gi, sé gû nghut akô. ⁵ Yhangmoq gi, ngo lé hí hkûn mai sé kô é yanmai, ngò, ngamoq é noqkuq htông mâ é tarâ htan dik é hpúng má bo é Hparishe rayuq nghut é hkyô lé, saksé hkám naû kô é nghut jáng, yhangmoq wó hkâm lhê. ⁶ Nghut kôlhâng, doqdân é hui zo râ matú, ahkuî ngò shî má yap tô é gi, Garai Gasang eq ngamoq é îchyí îwa pé lé byî tô é danggidiq lé myit myoqbyû nyi é yanmai nghut lhê. ⁷ Ngamoq é byû myû raxe í hú gi, danggidiq jeju haû lé wó hkam yù shoq ga, Garai Gasang lé nyî myín noqkuq dojaú shikut nyi bum akô; Hkohkâm wa ê, myit myoqbyû hkyô hau é yanmai, ngo lé Yudaq byu pé mara hun bum akô nghut ri. ⁸ Garai Gasang gi, shî bê bang lé dum lhoq tui lhê gâ é hkyô lé, a wó lûm nghû, haî mù myit yu akô lhú?

⁹ Ngò le, Nazaret wà byû Yesuq é myîng eq shai lhûm é dông myo myo wó kut râ nghut lhê nghû, gè gè yhang myit yu

wú bê nghut lhê. ¹⁰ Gè gè haû dông le Yerusalem wà mó má kut wú bê nghut lhê; hkyangjong agyi pê chyáng mâ é ahkáng wó yû luî, ngò gi, sân-yúng bang myo myo lé htóng má kat pyâm é eq, yhangmoq sat hui kôjáng le, ngò myit bo huî wú bê nghut lhê. ¹¹ Ngò gi, tarajong banshoq má a lhîng lhîng yhangmoq lé dam byi luî, Yesuq lé rhoî dang taí kó shoq shikut wú bê nghut lhê; nhik mó góng yo luî, gó mau mâ é wà pé lhang jé shoq, yhangmoq lé châng zing-rî wú bê nghut lhê.

Poluq Hpúng Byû Dut Lo É Hkyô

¹² Haû hkûn, radâm lé, ngò gi, hkyangjong agyi pê chyáng mai ahko ahkáng eq hkunmó lé yu chûng mù, Damaskuq myuq shut e ló nyi le, ¹³ Hkohkâm wa ê, nyigûng tu ló zó lé, bui htoq má je duq é maubó gi, haû hkyô má, ngò eq ngá é luzúm wui é lhîngkyuq má, mauhkûng mai duq bó htoq lo é lé myang ri. ¹⁴ Haû hkûn, ngamoq banshoq bang myigûng má lêng gop tô bum le, Hebre myîng dông, 'Sholuq, Sholuq, nàng, ngo lé haî mù zing-rî nyi lhê lhú? Zuchûn lé pik le gi, náng é matú gyai yhang wuî lhê.' ga luî, ngo lé taî é danghtê lé ngò wó gyô kat ri.

¹⁵ Haû mù, ngò gi, 'Yhumsîng ê, nàng gi, ó yuq nghut lhê lhú?' nghû luî, myi jáng, haû Yhumsîng tû taî é gi, 'Nàng zing-rî nyi é Yesuq nghut lhê. ¹⁶ Ahkuî toq yap aq, hkâsu mù gâ le, ahkuî, nàng, ngo lé myàng bê hkyô eq, ngò, nang lé tân shit shirâ nghut é hkyô pê é matú, ngá é mù wùn râ byû eq saksé dut nhâng râ dông nang lé hkyin to râ nghû, ngò náng chyáng lé htoq shit é nghut lhê. ¹⁷ Náng é amyû pê é loq mai le, tûngbaù pê é loq mai le, ngò, nang lé hkyi yù nyi râ nghut lhê. ¹⁸ Yhangmoq, yubak hkyut pyâm byî é jeju wó yû râ eq, ngo lé lumjîng é yanmai, lhoq sân-yúng huî é bang eq rahá silí wunlí wó hkam yù kó sháng gaq nghû, yhangmoq é myoq lhoq hpóng byi mù, mauchut hkaû mai maubó shut, Tsadán é a-tsam hkaû mai Garai Gasâng shut yhangmoq lhîng ló râ matú, ngò, nàng lé yhangmoq chyáng nhang kat râ nghut lhê.' gâ ri.

Poluq Kut É Muzó Hkyô

¹⁹ Haù mù luí, hkohkâm Agripa ê, ngò gi, mauhkûng mâ é myoqwup shing-rán haù lé a gyô é a wó é nyí nghut lhê. ²⁰ Ngò gi, yhangmoq myit lhîng luí, Garai Gasang shut lhîng taù lò mù, myit lhîng bê hkyô lé, hkyô zó loq zó đông mai tân shit kó sháng gaq nghû, sâng-hi má Damaskuq myuq má nyi é bâng chyáng mai hí luí, Yerusalem wà mó mâ é bâng chyáng má le, Yuda mau gón mâ é bâng chyáng má le, tûngbaù pè chyáng má le, hkô kyo bê nghut lhê. ²¹ Hau é yanmai, Yudaq byu pé gi, ngo lé noqkuq yhûm má chyup yû luí, sat pyám râ da kô é nghut lhê. ²² Nghut kôlhang, ngò gi, hkû-nyí jé shoq Garai Gasâng eq garúm é lé wó yû luí, ahkû shí má yap to mù, tiq ko banshoq bang lé saksé wó hkâm kyô é nghut lhê. ²³ Ngò taí é má, Hkrisduq gi, hpuzo luí, shí bê bang mai sâng-hi dui toq lô mù, Yhâng é amyû eq tûngbaù amyû pé lé maubó é hkyô lé wó taí kyo râ nghut lhê ga luí, dut lò râ hkyô lé, myiqhtoí pé eq Mosheq taí tô é hkyô mai lai luí, ngò gotú haí le a taí é nghut lhê." gâ ri.

²⁴ Yhang haù su ga mara a bo é hkyô taí é lé, Hpestu gi, "Poluq ê, nàng na bê! Lûm mhoq myô yu é yanmai na bê nghut ri." ga luí, htê mó eq dang lat taí hpyit kat ri.

²⁵ Poluq kúm gi, "Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang gyíng nghut lhê. ²⁶ Shí hkyô lé hkohkâm wa yhang le sê to gù nghut lhê mù, yhâng é hí má ngò a gyuq a kyum taí é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haí le a joq ra nghut lhê nghû, ngò myit lum nyi lhê. ²⁷ Hkohkâm Agripa ê, nàng gi, myiqhtoí pè é dang lé lumjîng lhê lhu? Nàng lumjîng é hkyô lé ngò sê lhê." ga tû taí ri.

²⁸ Haù hkûn, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhô ngam ri lhu?" ga taí ri.

²⁹ Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nàng za a nghut, hkû-nyí ngò taí é dang lé gyô nyi é lhunglhang bang, ngò su dut râ matú, ngò gi, Garai Gasang lé kyûdûng nyi lhê." ga tû taí ri.

³⁰ Haù hkûn, hkohkâm wa gi, ginwáng zau hpó eq Bernike le mù, haù má zùng tô é

bang eq rahá toq yap ri. ³¹ Yhangmoq htoq lô kô é hkûn, "Shí yuq gi, sat gíng é mara eq htóng lhúng gíng é mara haí le a kut shut nghut ri." ga, rayuq eq rayuq taí lhum bum akô nghut ri.

³² Agripa gi, Hpestu lé, "Shí yuq gi, yhang mai Kehtaq chyáng jé râ ga a taí tô é nghut le gi, yhang lé wó nhang pyám berâ nghut lhê." ga taí ri.

27

Poluq, Romaq Myuq Shut Wuì-sanghpo Mai E Lô É Hkyô

¹ Ahkû, ngamoq lé Itali ming shut wuì-sanghpo mai gû dap lô nhâng râ matú myit hpyit to kôluí, yhangmoq gi, Poluq eq htongbyû góbang ra-am lé, Augustuq Hkosêng é gyewap mó mâ é, Yuliu gâ é shô up gyezaù é loq má ap byí kat akô. ² Haù hkûn, Asia mau mâ é wuimau gin-gau cháng luí wà pé má wang jón ló é, Adramuti myuq mai toq é wuì-sanghpo má ngamoq wang ji bê nghut lhê. Htesaloni wà mó mâ é Aristakuq gâ é Makedoni byù rayuq le ngamoq eq rahá nghut lhê.

³ Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhâng chyáng râ é hkyô lé yhâng é buinùm wuì mai lhom lajang byi kó sháng gaq ga, yhangmoq eq ê hui râ matú ahkáng byí kat ri. ⁴ Haù mai dum toq ló é hkûn, lài tau mut é yanmai, Kupru zinlóng lé lai hkaù uchyang jî laí ló mù, ⁵ Kiliki eq Pamhpuli mau mâ é wuimau đông laí byit ló le, Laiki mau mâ é Mura myuq má jé bê nghut lhê. ⁶ Haù má, shô up gyezau hpó gi, Itali ming shut dap e ló é, Alesandru myuq mâ é wuì-sanghpo lé myang hkyup luí, ngamoq lé haù má ji nhâng bê nghut ri. ⁷ Haù mai buinyì myo myo yhó yhó lé za jî e ló luí, awui ahke yhang Kidu wà mó eq ang má wó jé ló jáng, lài tau mut é yanmai, hí shut a wó laí ló lo mù, ngamoq gi, lài lé cháng luí, Kreti zinlóng lé lai hkaù mù, Salamone kongzô é tû tap âng é mai laí ló é nghut lhê. ⁸ Haù mâ é wuiyâm mai awui ahke ji ló lé, Lasea wà eq a wê lhum é Yuqyo é Guhkan gâ é jowò má jé ri.

⁹ Ahkû, buinyì tsómra lhoq lhaí pyám luí, haù Zoshuq gám poí lai bê nghut é yanmai, wuì-sanghpo mai sô wún le gi, gyuq chiq râ nám jé bê nghut ri. Haù mù,

yangmoq lé Poluq taí pun taí kyîng é gi,
¹⁰ "Âhkaú pé ê, shí dàm lhê é wuì hkyô gi, wuìhke mó hui luí, wuì-sanghpo eq zè pé sùm pyám râ htoq agó, nga-nhúng é asak lháng sum râ dut é hkyô lé, ngò byu myang ri." gâ ri. ¹¹ Nghut kôlhang, shô up gyezau hpó gi, Poluq é dang lé gyo râ malaí, wuì-sanghpo hkàng sù eq wuì-sanghpo yhum-sing é dang lé, je lum ri. ¹² Guhkan haú gi, gyoqmyò* wó lhoq hai râ su a dut é yanmai, myo hpyang gi, Hponik guhkan má wó jé le jé mù, haú má gyoqmyò ló nyi hai râ matú chôm myit huí akô. Guhkan haú gi, Kreti zinlóng má maupyî buiwàng hkyam eq mautsûng buiwàng hkyam shut hu tô é jowò nghut ri.

Wuimau Má, Laidun Mó Htûng Huí É Hkyô

¹³ Maupyî shut mâ é lai yhó le hik lô jáng, yangmoq myit tô é má hkyak nghut bê su ngam pyám kôluí, shamtoq goknghe lé lhoq toq yû kômù, Kreti zinlóng yâm dông jî e ló bê nghut lhê. ¹⁴ Nghut kôlhang, hkâm-yháng a myáng má, Buihtoq mautsûng lai gâ é laidun mó gi, haú zinlóng mai mut lò luí, ¹⁵ wuì-sanghpo lé lo mut htûng é yanmai, hí shut a wó ló lo jáng, ngamoq gi, lai mut ló é shut châng yông ló bê nghut lhê. ¹⁶ Ngamoq gi, Koda gâ é zinlóng zo lé lai hkaú uchyang yông ló nyi é hkûn, haú sakhkyîlhaí lé gyai shikut é èq wó lãng yù luí, ¹⁷ wuì-sanghpo ahtoq má lãng toq to bê. Wuì-sanghpo lé gi, a byoq lo shoq tuí èq tuí kîng to bê nghut lhê. Dum, yangmoq gi, Surti gâ é semuì bùm má ló kê gyâm to râ lé chiq kô é yanmai, wuì-sanghpo mâ é panlong pé lé lhoq nyhum hkyô yù mù, châng yông ló bekô nghut ri. ¹⁸ Laidun mó lúm htan é yanmai, htang nyí yangmoq gi, hpugá zè pé lé hkyom dú hkyó pyám bekô nghut ri. ¹⁹ Sum nyí nghu é nyí má, yangmoq gi, wuì-sanghpo zè pé lé yhum-sing é loq èq yhang hkyô pyám bekô. ²⁰ Buinyì myáng myáng, buí lé le, kyî pé lé le a myàng é eq, laidun mó za ru mut nyi é yanmai, wó lut râ nghu myit myoqbyu tô é hkyô lé, ngamoq tô pyám bê nghut lhê.

²¹ Yangmoq zoshuq a zô é, buinyì tsómra myáng lô bê nghut mù luí, Poluq gi, yangmoq é gung gûng má yap to mù,

"Âhkaú pé ê, nungmoq ngá é dang gyo luí, Kreti zinlóng mai a htoq ló é nghut le gi, shí su htên byoq é marop hui zo râ a nghut. ²² Ahkuí nghut kôlhang, ngò taí é dang lé gyô yù mù myit wum yù keq; nungmoq mâ é hká yuq lé asak sum râ a nghut, wuì-sanghpo za sheq htên byoq byuq râ nghut lhê. ²³ Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé taí é gi, ²⁴ 'Poluq ê, hkâgyuq, Kehtaq é hí má nàng wó yap râ nghut lhê. Wuì-sanghpo shí má nàng eq rahá ji tô é lhunglhang bâng é asak lé, Garai Gasang gi, náng é yanmai, láí láí byi râ nghut lhê.' gâ ri. ²⁵ Hau é yanmai, âhkaú pé ê, myit wum yù keq, ngo lé taí kyô é eq rajung za dut lò râ nghut lhê nghu luí, Garai Gasang lé ngò lumjîng nyi lhê. ²⁶ Nghut kôlhang, nga-nhúng gi, zinlóng ralhumm lum má ló htûng chyap to râ nghut lhê." ga luí, yangmoq lé i-myt taí tîng ri.

²⁷ Buinyì raxe myi nyí myín má, gunggàm yoq lé, ngamoq gi, Adria wuimau má yông lling wún é hkûn, sanghpo hkàng bang gi, dùng yàm eq chyàng lo nyi é su gâ é lé sê gyo kat akô. ²⁸ Haú su mù, wuì nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri. ²⁹ Haú mù luí, luqmó má ló záng htung râ lé chiq kômù, yangmoq gi, wuì-sanghpo htàng shut mâ é shamtoq goknghe myí lhum lé lhoq hkyô kat luí, mau hân bó sháng gaq ga kyûdûng nyi bum akô nghut ri. ³⁰ Wuì-sanghpo hkàng bang gi, wuì-sanghpo lé tô pyâm to luí hpâng râ dâ é myit eq, wuì sanghpo-u shut mâ é shamtoq goknghe pé lé lhoq hkyó râ su kut mhaú luí, sakhkyîlhaí lé wuì má lhoq hkyô nyi bum akô. ³¹ Haú mù, Poluq gi, shô up gyezau eq gyezô pé lé, "Shí bang wuì-sanghpo má a nyi le gi, nungmoq wó lut râ a nghut." ga taí ri. ³² Haú hkûn, gyezô pé gi, sakhkyîlhaí lé tuí tô é tui lé zân hpyit kat kôluí, sakhkyîlhaí gi, byit gyó byuq bê nghut ri.

³³ Maubó lô jáng, Poluq gi, yangmoq banshoq bang lé zang zo râ matú myit wum byî é gi, "Nungmoq gi, myit chiq luí, zoshuq haí le a zô é, hkû-nyí raxe myi nyí myáng

* 27:12 Gyoqmyò lé, haú mau má laidun mó lò lò dut mù, yông wún le gyuq chiq nám nghut lhê.

lô bê. ³⁴ Haû mù luî, zoshuq rajung jung zo keq! Haû gi, nungmoq wó lut râ matú nghut lhê. Nungmoq chyâng mâ é ó yuq é xâm rahkat lhang byuq râ a nghut." gâ ri. ³⁵ Haû su ga ban taí é eq, yhang gi, muk lé yù luî, yhangmoq banshoq bang é hí má Garai Gasâng jeju lé hkya-on mù, muk lé hpé luî, zô hí bê nghut ri. ³⁶ Haû hkûn sheq, banshoq bang gi, myit wum wó yû kômù, zoshuq zô bùm bekô nghut ri. ³⁷ Wuì-sanghpo haû mâ é byù lunglhang gi, í sho nyhit xe hkyuq yuq nghut lhê. ³⁸ Yuq hkangmó bàn zô gyí é htâng má, wuì-sanghpo sóm râ matú, sungso pé lé wuì má dú kat pyâm akô nghut ri.

Wuì-Sanghpo Htên Gyop Byuq É Hkyô

³⁹ Myoq san za myàng jáng, yhangmoq gi, jowò haû lé a sé kôlhang, semuì-jàng chyûn ralhûm lé byu myàng kôluî, wó dut é nghut jáng, haû má sanghpo lé kôn gyam râ matú chôm doqdân yu akô nghut ri. ⁴⁰ Haû mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yû luî, wuì-sanghpo ulhûm mâ é panlong lé lhoq toq yû mù, lai hkyô cháng luî wuiyâm shut mut lô bê nghut ri. ⁴¹ Nghut kôlhang, semuì lo bum tô é jowò ralhûm má, wuì-sanghpo lô htung chyap byuq luî, sanghpo u gi, a wó duí lo mù, sanghpo htâng lé gi, wuìlheng èq lò bat hkyop myha pyâm bê nghut ri.

⁴² Haû hkûn, gyezô pé gi, htongbyû pé wuili lí hpang byuq kó râ lé gyuq kô é yanmai, yhangmoq lé sat pyâm râ chôm dâ akô. ⁴³ Nghut kôlhang, shô up gyezau hpó gi, Poluq lé hkyi yù nàu luî, yhangmoq dâ é hkyô lé hkûm pyâm mù, wuili dat li bang gi, wuì má byam gyó luî wuiyâm shut hí li dap lô kó sháng ga luí le, ⁴⁴ góbang gi, siklong eq wuì-sanghpo mâ é gotû zè pé má zui mù, gu dap lô sháng ga le, hkunmó hkyô kat ri. Haû dông mai lunglhang bang gi, wuiyâm shut rago wó jé dap lô bekô nghut ri.

28

Malata Zinlóng Má Jé Nyi Tô É U Lhê Hkyô

¹ Ngamoq wó lut dap lô jáng sheq, zinlóng haû gi, Malata gâ é lé sê ri. ² Zinlóng byu pé gi, ngamoq lé shogyo myit gyai lhom tân shit akô. Mau ru jâng wo nyi luí gyoq é yanmai, yhangmoq gi, myi mut

byi mù, ngamoq banshoq bang lé hkûlum yu akô. ³ Haû hkûn, Poluq gi, htang rawaq guq tsîng yù mù, myihkyóm má kat kat é hkûn, myi soq htan lò jáng, duq htân lhangmuì radu gi, htoq lô mù, yhâng é loq má htê zing tô ri. ⁴ Zinlóng byu pé gi, Poluq é loq má lhangmuì haû htê lhâng tô é lé myàng kôjáng, "Shí yuq gi, gè gè yhang byù sat é sù teng râ dut ri; wuì mai wó lut lô kôlhang, yhang asak dui nyi râ matú, Tengmán tarâ gi, a dóng lo nhung!" ga luí, rayuq eq rayuq taí lhum bum akô nghut ri. ⁵ Poluq kúm gi, lhangmuì haû lé myihkyóm má ko hkyô kat luí, haû le a dut é za nyi tô ri. ⁶ Yhangmoq gi, yhanggùng wâm lò berâ, haû a nghut jáng, byodân ratung shi hkyaq lêng lô berâ, ga myit lán nyi bum akô. Nghut kôlhang, myáng myáng lán wú nyi bum le, yhang má haû le a dut lo é lé myàng kôjáng, yhangmoq é i-myt dum htaí pyâm kôluî, shí yuq gi, hparà rayuq sheq nghut ri ga dum taí bum akô nghut ri.

⁷ Hau é nàm má, zinlóng agyì hpó Popli sing é maumyî pé joq tô ri. Haû yuq gi, ngamoq lé lhom te yù mù, yhâng yhûm má sum nyí yhang lalúm la-nye lhom hkûlum yu ri. ⁸ Haû u lé, Popli é yhangwa gi, alí nyé no nyi é eq wuiwam shun leq tô ri. Poluq gi, haû yuq chyáng wàng mù, kyûdung byi luí, yhâng é ahtoq má loq ke byi mù, yhang lé lhoq gè byi ri. ⁹ Haû su dut é yanmai, zinlóng mâ é nò byù góbang banshoq le, lé luí lhoq gè byi é hui bekô nghut ri. ¹⁰ Yhangmoq gi, ngamoq lé a hkyô hkyô dông hkungga kôluí, ngamoq wuì-sanghpo ji mù, dum toq lô râ hkûn, ngamoq râ é gú lé châng byi kat akô nghut ri.

Romaq Myuq Má, Poluq Jé É Hkyô

¹¹ Lhamó sum hkyap lai jáng, Alesandru myuq mâ é, "Hparà zozûm nhiktâng" gâ é alhô dap é wuì-sanghpo má, ngamoq wang jî htoq lô bê nghut lhê. Wuì-sanghpo haû gi, gyoqmyò lé zinlóng haû má joq lai é nghut ri. ¹² Surakusa wà mó má jé jáng, haû má ngamoq sum nyí nô yu é nghut lhê. ¹³ Haû mai jî xoq lhing lô le, ngamoq gi, Regi wà mó má jé ri. Htang nyí gi, maupyí lai hik lô mù luí, í nyí nyí má nghut jáng, Potioli wà mó má jé lô bê nghut lhê. ¹⁴ Haû mâ é gumang wuì ra-am eq hui luí, ngamoq lé nyhit nyí no râ matú lûng kômù, ngamoq

gi, nô yù bê; hau htâng, Romaq myuq má jé ló bê nghut lhê. ¹⁵ Haû mã é gumang wuì gi, ngamoq jé lo nyi é hkyô lé wó gyo kôjáng, te yù rà ga, Api Gai gã é wà eq Búng Yhûm Sûm Lhum gã é wà jé shoq lé akô. Poluq gi, haû bang lé lhom myàng jáng, Garai Gasang lé hkya-on kungtôn mù, myit wum wó yù bê nghut ri. ¹⁶ Ngamoq, Romaq myuq má jé wang ló é hkûn, Poluq gi, yhang lé zúng rà gyezo rayuq eq gotû san nyi rà matú, ahkáng wó ri.

Poluq, Romaq Myuq Má, Mungdang Hko Kyô É Hkyô

¹⁷ Buinyi sum nyi lai é htâng má, Poluq gi, haû mã é Yudaq suwún wuì lé ji yu ri. Yhangmoq jé lé bûm kôjáng, yhang gi, "Gumang wuì ê, ngò gi, nga-nhûng é amyû lé le, íchýi îwa pê é htunghking lé le, shut shai é dông haì le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pê é loq má ap byi kat é hui bê nghut lhê. ¹⁸ Romaq zau wuì kúm gi, ngo lé ban jep gôn wú jáng, ngá chyáng shi gíng é mara lé a myàng kô é yanmai, ngo lé nhang kat nau akô nghut ri. ¹⁹ Nghut kôlhang, haû lé Yudaq byu pé a dóng kô é yanmai, ngò hkâsu a dat kut lo mù, Kehtaq chyáng jé rà matú dông é nghut lhê. Haû nghut kôle, ngá amyû lé mara hûn rà jowò joq é yanmai gi, a nghut. ²⁰ Haû mù luí, Israelaq amyû é myit myoqbyù hkyô* é yanmai, shi shamtoq-tuì èq tuì é ngò hui zô é hkyô eq séng luí, nungmoq eq nyo kún rà matú, ngò, nungmoq lé ji kat é nghut lhê." ga luí, yhangmoq lé tai ri.

²¹ Haû hkûn, yhangmoq gi, "Náng é hkyô eq séng luí Yuda mau mã é laiká ngamoq a wó yù nghut ri. Haû mai lé é gumang wuì ó yuq le, nàng eq sêng é a ge é luhkyang lé shit kyô é a bò kó nghut ri. ²² Nghut kôlhang, shi nàng lom é hpúng gi, jowò hkanmó mã tai he pyâm é huì é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tú tai akô.

²³ Yhangmoq gi, yhang eq huì kún rà buinyi ding to kôluí, yhang bíng é yhûm mã byù myo myo lé zîng bum akô. Haû hkûn, yhang gi, napkyó mai myín htâng jé shoq, Garai Gasâng é mingdán hkyô lé

saksé hkâm kyô é eq, Mosheq é tarâ eq myiqhtoí pê é dang má cháng mù, yhangmoq lé shikut luí, Yesuq é hkyô tai pun tai kyíng ri. ²⁴ Yhang tai é hkyô lé, ra-am gi, lumjín bum akô; ra-am kúm gi, a lumjín kó nghut ri. ²⁵ Yhangmoq rayuq eq rayuq haû su myit a huì lhum bùm kô é yanmai, Poluq gi, yhangmoq lé, "Chyoiyúng Woinyí, Myiqhtoí Esai-aq é nhut mai nungmoq é íchýi îwâ pé lé tai é dang gi, gyai yhang têng ri. Dang haû gi,

²⁶ 'Byù haû hú chyáng ê mù,

"Nungmoq gyô tsuq to kôlhang, sê gyo kó rà a nghut;

wú tsuq to kôlhang, wú sé kó rà a nghut.", nghú é tai aq.

²⁷ Hkâsu mù gã le, amyû shi é i-myt gi, htan byuq luí,

yhangmoq é nohkyap gi, htu byuq bê nghut ri;

yhangmoq é myoq gi, chûm byuq bê nghut ri;

haû a nghut le gi, yhangmoq é myoq èq myàng mù,

yhangmoq é nohkyap èq wó gyo luí, yhangmoq é i-myt mã sê hkyâng kômù,

ngá chyáng lhing lò kôluí, ngò yhangmoq lé lhoq gê byi berâ nghut lhê.*

gâ ri.

²⁸ Haû mù luí, shi Garai Gasâng é hkyi yù hkyô lé, tûngbaù pê chyáng byi kat bê nghut luí, yhangmoq lhom gyô yù berâ hkyô lé, nungmoq yhang sê nyi keq ô!" ga luí, danghkun haû tai kat é htâng mã, yhangmoq gi, htoq ló byuq bùm bekô nghut ri. ²⁹ (Poluq haû su ga tai é htâng mã, Yudaq byu pé gi, yhangmoq yhangchang dang jet jet lhum uchyang ló byuq bekô nghut ri.)

³⁰ Poluq gi, yhang nghô lúng é yhûm mã í zân tup nyi é u lé, yhang chyáng lé mã lé é bang lé lhom hkûlum yu ri. ³¹ Haû mù, a gyuq a kyum é za, Garai Gasâng é mingdán hkyô lé hko tai kyô é eq, Yhumsíng Yesuq Hkrisduq eq sêng é hkyô lé mhoqshit byi ri; yhang lé, ó le a hkûm zing to kó nghut ri.

* 28:20 Israelaq amyû é myit myoqbyù hkyô gi, Mesaia gã é hkyi yù sù lé myoqbyù nyi é nghut lhê. ☆ 28:27 Esai 6:9,10

ROMAQ

Pê Chyáng Hun Kat é Laiká (Romans)

¹Hkrisduq Yesuq é dui-nhâng zoshâng eq lagyo dut râ matú, Garai Gasâng èq ji yu é hui luí, chyoiyúng Chyúmdang pé má, ²Garai Gasang gi, hí hí mai Yhâng é my-iqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sù, ngò Poluq gi, Romaq myuq má nyí é, Garai Gasâng èq chyitdap é hui luí, sân-yúng bang dut râ matú jí yu é bang banshoq lé, dang kyô kat lhê. ³Yhâng é Yuqzo haú gi, byù hkyam dông ga jáng, Dawiq é awut ashín nghut ri; ⁴Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoiyúng hkyo é Woi-nyí dông mai, hpungwup a-tsâm èq sé nhâng bê nghut ri. Yhang gi, nga-nhúng é Yhumsíng Yesuq Hkrisduq nghut ri. ⁵Yhang dông mai le, Yhâng myíng é matú le, ngamoq gi, byù myù chângjup mai byù ji yù mù, lumjínng hkyô lé châng nyí nhâng râ matú, jeju eq lagyo ayá lé wó hkam yù bê nghut lhê. ⁶Nungmoq le, Yesuq Hkrisduq eq séng râ matú jí yù huí é bang má lòm bekô nghut ri.

⁷Nga-nhúng é Íwa Garai Gasang eq Yhumsíng Yesuq Hkrisduq chyáng mâ é jeju eq nguínngón hkyô gi, nungmoq chyáng ru joq nyí sháng gaq ô!

Poluq, Romaq Myuq Má Ló Kum Nau É Hkyô

⁸Nungmoq é lumjínng hkyô lé, mingkan gón má taí pyo ló bê nghut é yanmai, sânghi má, ngò gi, Yesuq Hkrisduq é myíng mai, nungmoq banshoq bâng é matú, ngá é Garai Gasang lé, jeju hkya-on lhê. ⁹Ngá é kyúdung dang pé má, ngò, nungmoq lé hkâ-nhám le bún nyí é hkyô lé, Yhâng é Yuqzô é hkyô gabú danglù lé hko kyô nyí é má, ngá é myit nhiklhum banshoq èq dojaú é Garai Gasang gi, ngá é saksé nghut lhê; ¹⁰Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé râ hkyô htong byi râ matú, ahkuí, ngò kyúdung lhê.

¹¹Ngò gi, nungmoq lé, woi-nyí hkyô eq sêng é chyunghuq wó gâm byi mù, nungmoq lé wum-o wó lhoq kínng byi râ matú, nungmoq lé gyai yhang myàng nau nyi ri.

¹²Haú su nghu é gi, nga-nhúng rayuq eq rayuq é lumjínng hkyô dông mai, nungmoq eq ngò, myit wum byí é hui râ matú nghut lhê. ¹³Gumang wui ê, ngò gi, haú tungbaù pê chyáng mai ashi wó yu é eq rajung za, nungmoq chyáng mai le ashi wó yú râ matú, nungmoq chyáng lé jé râ nghu adàm dàm dâ wú é nghut kôlhâng, ahkuí jé shoq hkûm tang pyám huí é hkyô lé, nungmoq lé sé nhâng nau ri.

¹⁴Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sù nghut lhê. ¹⁵Haú nghut é yanmai, ngò gi, Romaq myuq mâ é bang nungmoq lé le, haú gabú danglù gyai yhang hko kyo nau nyi é nghut lhê.

¹⁶Haú gabú danglù hkyô má, ngò gi, a hoq é nghut lhê; hkâsu mù gâ le, haú gi, sânghi má Yudaq byu pé, hau htâng tungbaù pé má, lumjínng é sù yuq hkangmó lé hkyi yu é wó hui nhâng râ nghut é, Garai Gasâng é hpungwup a-tsâm nghut lhê. ¹⁷Hkâsu mù gâ le, lumjínng myit mai wó yú luí, lumjínng myit má gíng nyi é, Garai Gasâng chyáng mâ é dingmán hkyô lé gi, gabú danglù háu má hpông shit bê nghut ri. Haú gi, "Haú dingmán sù gi, lumjínng myit mai asak duí râ nghut lhê."✧ ga kâ tô é eq rajung za nghut ri.

Xângzo Byu Pê Htoq Má Garai Nhkmo-yô É Hkyô

¹⁸Haú tengmán hkyô lé, yhumsíng é agè ashop hkyo èq zik hkûm pyâm é byu pé é agè ashop hkyô eq garai a bo é hkyô pé banshoq htoq má, mauhkúng mai Garai Gasâng é nhikmo-yo hkyô lé hpông shit bê nghut ri. ¹⁹Haú mù gâ le, Garai Gasang gi, Yhang eq sêng é hkyô, yhangmoq lé san za tûn shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri. ²⁰Hkâsu mù gâ le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsâm eq Garaí é myit sâmlai lé gi, san za wó myâng, wó sê gyô é nghut lhê. Haú mù luí, byu pé gi,

mara mai wó he lut râ hkyô a joq lo nghut ri.

²¹ Haî mù gâ le, yhangmoq gi, Garai Gasang lé sê to kôlhang, Yhang lé Garai dông a shigyaú kô é eq, jeju a hkya-on kó nghut ri; yhangmoq myit é hkyô pé gi, akôm dut byuq é eq, nhik a gyîng é yhangmoq é myit nhiklhum gi, chut byuq bê nghut ri. ²² Yhangmoq gi, hpaqchyî bò bang nghut lhê ga kôlhang, a-ngok é bang dut byuq bekô nghut ri. ²³ Haû mù, htên byoq a sê é Garai Gasâng é hpungwup shingkang lé, htên byoq sê é byù zông, nghoq lhô, dusak lhô eq yê jung dusak lhô pé eq, htaî lhik pyám bekô nghut ri.

²⁴ Hau é yanmai, Garai Gasang gi, yhangmoq é gungdu lé rayuq eq hpau a tap lhum kó râ matú, a sansêng é gungsho zùm-yap hkyô kut râ nghut é, yhangmoq é yut yut ô nau é i-myt má, yhangmoq lé ap pyám bê nghut ri. ²⁵ Yhangmoq gi, haû Garai Gasâng é tengmán hkyô lé, mhaû é hkyo eq htaî lhik pyám kômù, hpân Sû lé noqkuq dojaú râ malaî, mhaû hkyô nghut é hpan tô é zè pé lé noqkuq mù, dojaú akô nghut ri. Hpân Sû haû gi, ahtum abyuq hkya-on hui sù nghut ri. Amen.

²⁶ Haû nghut é yanmai, Garai Gasang gi, yhangmoq lé, ahoq ahî é yut yut ô nau hkyô má ap pyám bê nghut ri. Yhangmoq é myiwe wuî lháng gi, htûng akying lé tô pyám kômù, haû eq shai é dông htaî lhik pyám nyi akô nghut ri. ²⁷ Haû eq rajung za, yuqgè wuî le, myiwe wuî eq zum é htûng akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluî, yhangmoq kut shut é eq gingdán é yubak dam lé, yhumsing gùng yhumsîng hkam yù nyi bekô nghut ri.

²⁸ Hau htoq agó, haû Garai Gasang lé sê é hkyô gi, akyû bo é a nghut ga yhangmoq myit yù kô é yanmai, a kut âng é hkyô kut nhâng râ matú, Garai Gasang gi, yhangmoq lé, htên byoq sê é myit má ap pyám é nghut lhê. ²⁹ Yhangmoq gi, agè agaú hkyô ajung jung, agè ashop hkyô, myoqnoq hkyô eq a jú lhûm é hkyô pé byíng jup tô é bang dut bekô nghut ri; manon é, byù sat é, mabyoq jishûm htoq é, mhaú zô é eq myit goí bo é pé le byíng bum ri. ³⁰ Yhangmoq gi, lumu

é bang, gansang é bang, Garai lé a jú é bang, byù rhoi é bang, nghutbûn é bang, gyáng é bang, agè ashop kut râ hkyô lhoq htoq é bang, mó wui é jino a gyô é bang nghut akô. ³¹ Yhangmoq gi, a gyîng a hâng é bang, gidiq a zung é bang, chyit myit a bo é bang, shogyo nhikmyin a sê é bang nghut akô. ³² Haû pé lé kut é bang gi, shî gíng lhê gâ é, Garai Gasâng é dingmán tarâ joq é lé, yhangmoq sê to kôlhang, haû pé lé, yhangmoq xoq kut nyi kô é htoq agó, haû hkyô lé kut é bang lé le, hkya-on waq toq akô nghut ri.

2

Garai Gasang Tarâ Jéyáng É Hkyô

¹ Haû mù luî, góyuq lé tarâ jéyáng é sù nàng ê, nàng gi, mara mai wó he lut râ hkyô a joq lo; hkâsu mù gâ le, nàng yhang jéyáng nyi luî, mù haû pé lé, nàng kut nyi é yanmai, byù góbang lé jéyáng é hkûn, náng gûng nàng mara byi nyi bê nghut ri.

² Haû dông kut nyi é bang lé, Garai Gasang gi, tengmán é dông tarâ jéyáng é lé, nganhúng sê nyi lhê. ³ Haû mù, byù za nghut to luî, góbang lé gi, jéyáng mù, yhumsîng gi, haû dông roq châng kut nyi é sù nàng ê, nàng gi, Garai Gasâng é tarâ jéyáng hkyô mai wó hpang lut râ su ngam nyi lhê lhu?

⁴ Haû a nghut jáng, nàng gi, Garai Gasâng é ge é hkyo eq nang lé myit wó shuí lhîng nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyám nyi lhê lhu?

⁵ Nghut kôlhang, náng é myit htên hkyô eq myit a lhîng é nhiklhûm é yanmai, haû Garai Gasang dingmán é dông tarâ jéyáng shit râ nghut é, Yhâng é nhikmo-yô é buinyi má hkâm zo râ nhikmo-yo hkyô lé, yhumsing gùng yhang hkong tô nyi bê nghut ri. ⁶ Garai Gasang gi, yuq hkanmó lé, ó le ó kut é má cháng luî, hkâm zo nhâng râ nghut lhê. ⁷ Jân shirâng mù, ge é hkyô kut nyi é dông, hpungwup shingkang lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi râ nghut lhê. ⁸ Nghut kôlhang, haû yhumsing wuízat hkyô za hô luî, tengmán hkyô lé he-ngik pyám mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé râ nghut lhê. ⁹ Wuîhke hkyô eq iyon yon

hkyô gi, agè ashop kut é xângzo byù yuq hkgangmó chyáng jé râ nghut lhê; sâng-hi má Yudaq byu pê chyáng jé mù, tûngbau pê chyáng le jé râ nghut lhê.¹⁰ Nghut kôlhang, hpungwup shinggang, aróng eq nguingón hkyô gi, haû ge é hkyô kut é bang yuq hkgangmó chyáng jé râ nghut lhê: sâng-hi má Yudaq byu pê chyáng jé mù, tûngbau pê chyáng le jé râ nghut lhê.¹¹ Hkâsu mù gâ le, Garai Gasang gi, myoqdong a hkyin é Sû nghut lhê.

¹² Haû jep é tarâ lé a sê é mara kut shut é bang lhunglhang gi, jep é tarâ dông a nghut é za htên byoq kó râ nghut lhê. Haû jep é tarâ hkaû má mara kut shut é bang lhunglhang gi, jep é tarâ dông jéyáng é hui zo kó râ nghut lhê.*¹³ Hkâsu mù gâ le, haû jep é tarâ lé wó gyô é bang lé, Garai Gasang é hí má dingmán bang gâ é a nghut é za, jep é tarâ lé châng kut é bang za sheq, dingmán bang gâ é hui râ nghut lhê.¹⁴ Haû jep é tarâ lé a wó é tûngbau pé gi, jep é tarâ hkyô lé, yhang baú yhang châng nyi kô é hkûn, jep é tarâ lé a wó kôlhang, yhumsing gùng yhumsing é matú tarâ dut bekô nghut ri.¹⁵ Yhangmoq gi, haû jep é tarâ hkyô pé lé, yhangmoq é i-myt unghkaû má kê to bê nghut é lé, tûn shit bekô nghut mù, yhangmoq é myit má hkâm zô é hkyô le, haû lé saksé hkâm byi nyi é eq, yhangmoq myit é hkyô gi, ahkuî mara hun kat, ahkuî mara hkyut kat kut nyi ri.¹⁶ Haû hkyô gi, ngò tái pyo é gabú danglù eq rajung za, byu pê é zaú nghop tô é hkyô pé lé, Hkrisduq Yesuq dông mai Garai Gasang èq tarâ jéyáng é buinyi má dut râ nghut lhê.

Yudaq Byu Pé Eq Jep É Tarâ

¹⁷ Nghut kôlhang, nàng gi, náng gûng nàng Yudaq byù rayuq nghut lhê ga mù, haû jep é tarâ lé lumhkaû nyi é eq Garai Gasang lé xoq é hkyô má nghutbûn nyi é sù;¹⁸ Yhâng ô nau é hkyô lé sê é eq haû jep é tarâ mhoqshit é hkyô wó yû bê nghut é yanmai, je ahkyak é hkyô lé sê gàm hkoq é sù;¹⁹ haû jep é tarâ má, hpaqchyî eq tengmán hkyo é alik wó sù nghut é yanmai, haû myoqjit bâng é matú hkyô-u shê sù eq mauchut hkaû mâ é bâng é matú maubó nghut sù;²⁰ byù ngok pé lé mhoqshit sù eq

zoshâng wui é sará nghut sù nghut é lé, sê gyô to sù nghut é nghut le gi,²¹ nàng, góbang lé mhoq byi sù nhîng, yhumsing gùng yhumsing a mhoq yû lú? A wó hkau ga hko tái lú nhîng, nàng gi, hkaû lhê a nghut lú? ²² Su-myi sulàng lú hkyô a wó kut ga byu pé lé tái lú nhîng, nàng gi, su-myi sulàng lú hkyô kut lhê a nghut lú? Hparâ lhô lé a jú dik sù nàng gi, noqkuq yhûm lé hpýoq zo hpýoq shuq nyi lhê a nghut lú? ²³ Jep é tarâ eq séng lú nghutbun sù nàng gi, haû jep é tarâ lé lu lai é dông, Garai Gasang lé a hkungga kut lhê a nghut lú? ²⁴ Haû gi, "Garai Gasang é myîng gi, nungmoq é yanmai, tûngbau pê chyáng lhoq hpoî pyâm é huî ri." ☆ ga kê tô é eq rajung za nghut ri.

²⁵ Haû jep é tarâ lé nàng châng é nghut jáng, ahpyo-kuq hpýit hkyô gi, akyû bò bê nghut ri. Nghut kôlhang, nàng, jep é tarâ lé lu lai é nghut jáng, a hpýit é eq rajung za dut bê nghut ri.²⁶ Ahpyo-kuq a hpýit kôlhang, jep é tarâ hkyô pé lé châng é bang lé gi, ahpyo-kuq hpýit bê bang dông ge són byi lhê a nghut kó lú? ²⁷ Kê tô é tarâ lé wó mù, ahpyo-kuq hpýit hkam to gù nghut é, tarâ lu lai é sù nàng lé, gungsho má ahpyo-kuq a hpýit kôlhang, jep é tarâ lé châng é sù gi, mara hûn râ nghut lhê.

²⁸ Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpýit é gi, ahpyo-kuq hpýit kyîng a nghut.²⁹ Ahte myit hkaû má Yudaq byù nghut sù za, Yudaq byù kyîng nghut lhê. Kê tô é tarâ dông a nghut é za, Woi-nyî èq myit má ahpyo-kuq hpýit é gi, ahpyo-kuq hpýit kyîng nghut bê. Haû yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

3

Garai É Lhumzui Hkyô

¹ Haû dông ga jang, Yudaq byù rayuq dut nyi é gi, hai akyû hkâm zo râ lú? Ahpyo-kuq hpýit hkyô gi, hai akyû bò râ lú? ² Hkyô hkgangmó má gyai akyû bò lhê! Je hí má gi, haû Garai Gasang é mungdang lé yhang, yhangmoq lé ap byi bê nghut ri.

* 2:12 Haû jep é tarâ lé a sê bang gâ é gi, tûngbau pé lé gâ é nghut lú, haû jep é tarâ hkaû má é bang gâ é gi, Yudaq byu pé lé gâ é nghut lhê. ☆ 2:24 Esai 52:5

³Yhangmoq mâ é ra-am lumj́ng myit a bo é nghut le gi, hkâsu kó lhu? Yhangmoq lumj́ng myit a bo é yanmai, Garai Gasâng é lhumzui hkyô lé akyû a bò nhâng wó dut râ lhu? ⁴Hká dông le a wó dut!

"Haû mù, nàng dang taí é hkûn, dingmán é hkyô wó lhoq htoq râ eq, nàng jéyáng huí é hkûn, ûng râ nghut lhê." ✧

ga kê tô é eq rajung za, byù yuq hkangmó gi, byù-mhaú dut kôlhang, Garai Gasang gi, tengmán nyí sháng gaq.

⁵Nghut kôlhang, nga-nhúng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lhê; haû nghut jáng, nga-nhúng hkâsu nghû taí râ lhu? Nga-nhúng lé Garai Gasang nhikmo-yô é hkyô gi, Yhang a tarâ mù nghut lhê lhu? (Ngò gi, byù hkyam dông taí ht́ng é nghut lhê.) ⁶Ratsuí lhang a nghut! Haû su ru nghut le gi, haû mingkan lé, Garai Gasang hkâsu wó jéyáng râ lhu? ⁷Rayuq yuq, "Ngò mhaú é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkan lé je wó lhoq hu nhang é nghut le nhing, haí mù luí, ngò, yubak byù rayuq dông mara byí é hui zô nyí ra shirâ lhu?" ga taí dang-rháng râ nghut lhê. ⁸"Ge é hkyô htoq sháng gaq, nga-nhúng, agè ashop hkyô kut sháng." nghû haí mù a taí kê é lhu? Dang haû lé ngamoq taí é nghut lhê ga luí, ngamoq lé lumù gansang é dông byù ra-am taí akô. Haú bang gi, mara dam byí é hui zo gíng bang nghut akô.

Dingmán Byù A Nyí

⁹Haû jáng, hkâsu nghû lo râ lhu? Nga-nhúng gi, je gè bang nghut lhê lhu? Ratsuí lhang a nghut. Yudaq byù nghut nghut, tungbaù pé nghut nghut, yubak mara hkaú mâ é bang chyat nghut lhê nghû, ngamoq taí san kyô wú bê nghut lhê. ¹⁰Chyúmdang má kê tô é le,

"Dingmán é byù a nyí, rayuq lhang a nyí nghut ri;

¹¹Sê gyô é byù rayuq le a nyí, Garai Gasang lé ho é byù le a nyí nghut ri;

¹²Lhunglhang bang gi, lhing ló byuq bekô; yhangmoq gi, hpau a dap bang chyat dut byuq bekô nghut ri.

Ge é kut sù ó a nyí, rayuq lhang a nyí nghut ri." ✧

gâ ri.

¹³"Yhangmoq é hkyung gi, hpông tô é lup pé nghut akô; yhangmoq é shô gi, mhaú akô." ✧

"Yhangmoq é nhutwuí pé má gi, shíduq bò lhangmuí é duq dap bum ri." ✧

gâ tô ri.

¹⁴"Yhangmoq é nhut pé gi, nhing myíng nhing htê eq myit nõ danghko baú byíng zan tô ri." ✧

gâ tô ri.

¹⁵"Yhangmoq é hkyí pé gi, byù sat sui lhoq htoq râ matú, lawán nau akô;

¹⁶Yhangmoq sô nyí é hkyô pé gi, htên byoq é eq wuîhkê é ahkô tông tô é nghut mù,

¹⁷nguingón é hkyô lé gi, yhangmoq a sé kó nghut ri." ✧

gâ tô ri.

¹⁸"Yhangmoq é myoq hí má Garai Gasang lé gyuq hkunggâ é hkyô, a bò kó nghut ri." ✧

gâ tô ri.

¹⁹Byù yuq hkangmó é nhut gi, tô taí jang a joq dut byuq mù, mingkan gón gi, Garai Gasâng é hí má mara bo é bang dut nyí sháng gaq ga, haû jep é tarâ má taí é lunglhang gi, jep é tarâ ô má nyí é bang lé taí é nghut é hkyô lé, nga-nhúng sê lhê.

²⁰Haû mù luí, jep é tarâ lé châng é dông mai, ó yuq le, Yhâng é hí má dingmán sù gâ é wó hui râ a nghut; jep é tarâ dông gi, yubak mara bo é hkyô lé wó sê yu é za nghut lhê.

Lumj́ng Jáng, Dingmán Sù Wó Dut É Hkyô

²¹Ahkuí kúm gi, jep é tarâ dông a nghut é za, haû jep é tarâ eq myiqhtoi laiká pé mai saksé hkâm tô é Garai Gasâng chyáng mâ é dingmán hkyô lé, sé nhâng bê nghut ri. ²²Garai Gasâng chyáng mâ é dingmán hkyô haû gi, Yesuq Hkrisduq lé lumj́ng é dông mai nghut mù, lumj́ng bang banshoq htoq má jé é nghut lhê. Gamhkuí é hkyô a joq. ²³Hkásu mù gâ le, lunglhang bang gi, yubak mara kut shut bê bang chyat nghut mù, Garai Gasâng é hpungwup shingkan

✧ 3:4 Hkya-on 51:4 ✧ 3:12 Hkya-on 14:1-3 ✧ 3:13 Hkya-on 5:9 ✧ 3:13 Hkya-on 140:3 ✧ 3:14 Hkya-on 10:7 ✧ 3:17 Esai 59:7-8 ✧ 3:18 Hkya-on 36:1

lé a hkyit hkap byuq lo kó nghut ri. ²⁴ Ahkuí kúm gi, Hkrisduq Yesuq mai lo é hkyi yù hkyô dông, Garai Gasâng é jejû eq, mara hkyut san byî é laí laí wó hui bê nghut ri. ²⁵ Garai Gasang gi, Yesuq é sui lé lumjínng bâng matú, shíhtaí gunglik hkungga ralhum dông, Yesuq lé byî pyám bê nghut ri. Haú gi, laí lò bê yubak mara lé lhut pyám byi shoq, Garai Gasang myit hîng byi bê nghut é yanmai, Yhâng é tengmán hkyô lé tún shit é nghut ri. ²⁶ Garai Gasang haú su kut é gi, Yhânggùng yhang dingmán Sû nghut é eq, Yesuq lé lumjínng é sù lé mara hkyut san byî é Sû nghut râ matú, ahkuí lhê ipyat má, Yhâng é tengmán hkyô lé shit byî é nghut lhê.

²⁷ Haú su nghut jáng, nghutbun jowò joq ri lhú? A joq. Hai tarâ mai a joq dut byuq é lhú? Haú jep é tarâ châng é yanmai nghut lhê lhú? A nghut, lumjínng hkyo é yanmai sheq a joq dut byuq é nghut lhê. ²⁸ Hkâsu mù gâ le, byù gi, haú jep é tarâ châng é dông a nghut é za, lumjínng luí, mara hkyut san byi huí é hkyô lé, ngamoq lum nyi lhê. ²⁹ Garai Gasang gi, Yudaq byu pê é Garai Gasang za nghut lhê lhú? Tungbaù pê é Garai Gasang le a nghut lhú? Nghut lhê, tungbaù pê é Garai Gasang le nghut lhê. ³⁰ Hkâsu mù gâ le, Garai Gasang gi, rayuq za nghut é yanmai, rajung za lumjínng luí, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê. ³¹ Haú nghut jáng, nganhúng gi, lumjínng myit hau eq, jep é tarâ lé lhoq hpoí pyám râ lhú? Ratsuí lháng a nghut! Nga-nhúng gi, jep é tarâ haú lé lhoq ging tîng é bang ru nghut lhê.

4

Abraham, Mara Hkyut San Huí É Hkyô

¹ Haú su nghut jáng, nga-nhúng é îchýí îwa Abraham gi, haú hkyô mai haí wó sê yu ri nghû, taí râ lhú? ² Abraham gi, zui saí é dông mai, mara hkyut san byi huí é ru nghut le gi, yhang nghutbun jang joq râ nghut lhê; nghut kôlhang, Garai Gasâng é hí má gi, yhang haú dông a nghut. ³ Chyúmdang má hkâsu gâ tô ri lhú gâ le, "Abraham gi, Garai Gasang lé lumjínng bê nghut mù, yhang lé, dingmán sù ga sôn byi bê nghut ri." ✨ gâ ri.

⁴ Zui saí é sù gi, yhâng é zuihpau lé, chyunghuq dông wó yu é a nghut é za, wó yù gíng luí, wó yu é ru nghut lhê. ⁵ Nghut kôlhang, zui saí é hkyô dông a nghut é za, haú agè ashop hkyô lé mara hkyut san byî é Garai Gasang lé lumhkau é sù gi, yhâng é lumjínng myit é yanmai, dingmán sù ga sôn byi huí é nghut lhê. ⁶ Haú eq rajung za, yhang zui saí é hkyô dông a nghut é za, Garai Gasâng eq dingmán sù ga sôn byi huí é, Garai Gasâng chyáng mâ é shimân jeju wó é sù eq séng luí, Dawiq taí é gi,

⁷ "Tarâ lu laí é lé mara hkyut pyám byi huí é eq yubak mara lé nghop pyám byi huí é bang gi, hkungsô wó nyi ri.

⁸ Bo tô é mara lé, Yhumsing eq mara a sôn byî é hui sù gi, hkungsô wó nyi ri." ✨ gâ ri.

⁹ Haú sù é jeju gi, ahpyo-kuq hpyit hkâm bâng é matú za nghut lhê lhú? Ahpyo-kuq a hpyit bâng é matú le nghut lhê lhú? Hkâsu mù gâ le, Abraham é lumjínng myit lé, dingmán sù ga sôn byi bê nghut lhê nghû, ngamoq taí nyi bê nghut lhê. ¹⁰ Haú su sôn byî é gi, hkâ-nhám nghut lhê lhú? Ahpyo-kuq hpyit hkâm é htâng má lhú? A nghut jáng, hí má lhú? Haú gi, ahpyo-kuq hpyit hkâm é htâng má a nghut é za, hí má ru nghut lhê. ¹¹ Hau htoq agó, Abraham gi, yhang, ahpyo-kuq hpyit a hkam yù shí é hkûn mai, lumjínng luí wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haú mù, yhang gi, haú ahpyo-kuq hpyit a hkam yù kôlhang, lumjínng é lhunglhâng bang lé dingmán bang ga sôn byî é wó hui râ matú, haú bâng é îwa dut bê nghut ri. ¹² Haú ahpyo-kuq hpyit hkâm é za a nghut, nganhúng é îwa Abraham, ahpyo-kuq hpyit a hkam yù shi má wó é lumjínng hkyo é hkyî-kám lé cháng luí ahpyo-kuq hpyit bâng é îwa le, yhang nghut ri.

¹³ Míngkân é amyû hkûng xoq pé dut râ ga, Abraham eq yhâng é awut ashín pé lé byi tô é danggidiq gi, jep é tara é yanmai a nghut é za, lumjínng hkyô mai lo é dingmán hkyô dông ru nghut lhê. ¹⁴ Hkâsu mù gâ le, jep é tarâ dông nyi yap é bang gi, amyû hkûng xoq pé nghut é nghut jáng, lumjínng hkyô gi, akyû a bo é eq, danggidiq gi, hpau a dap é dut byuq lhê. ¹⁵ Haú jep é tarâ

gi, nhikmo-yo hkyô lhoq htoq é nghut lhê; nghut kôlhang, jep é tarâ a joq jáng gi, tarâ lu lai hkyô le joq râ a nghut.

¹⁶ Haû mù luí, danggidiq gi, Abraham é awut ashín lhunglhang bâng chyáng, jeju mai za lo é eq gingtîng nyi é dut sháng gaq ga, lumjîng hkyô mai lo é nghut lhê. Haû gi, jep é tarâ má lòm bâng é matú baú za a nghut, Abraham é lumjîng hkyô má lòm bâng é matú le nghut lhê. Abraham gi, nga-nhúng lhunglhang bâng é îwa nghut ri. ¹⁷ "Ngò gi, nang lé, byù myû myo myô é îwa dut nhâng bê." ✨ ga kê tô é eq rajung za, haû shi byuq bê bang lé wó lhoq dui é eq a joq wú é zè lé joq shoq wó kut é, yhang lumjîng é sù Garai Gasâng hí má, Abraham gi, nga-nhúng é îwa nghut lhê.

¹⁸ "Náng é awut ashín pé le, haû eq rajung za myô lò râ nghut lhê." ✨ ga yhang lé tái kyô to bê eq rajung za, yhang gi, myit myoqbyù jowò haî a joq kôlhang, lumjîng luí myoqbyu nyi é nghut mù, byù myû myo myô é îwa dut bê nghut ri. ¹⁹ Yhang gi, rashô zàn kê jé byuq bê nghut mù, yhanggùng gi, shi é gyá dut é hui zô é eq Sarah é zoyhûm shibó le shum byuq kôlhang, yhang gi, lumjîng myit a yom byuq nghut ri. ²⁰ Hau htoq agó, Garai Gasâng é danggidiq eq séng luí, a lumjîng a dut é eq hê myit mhô myit a dut é za, yhang é lumjîng myit lé saî lhoq ging tîng mù, Garai Gasang lé hkya-on kungtôn luí, ²¹ Garai Gasang gi, Yhang byî tô é danggidiq eq rajung za wó kut râ a-tsam bò sù nghut é lé, yhang myit zing nyi ri. ²² Hau é yanmai, "Yhang lé, dingmán sù ga són byi bê nghut ri." ✨ gâ tô é nghut lhê. ²³ "Yhang lé, són byi bê." ga, kê tô é dang gi, yhang é matú za a nghut, ²⁴ nga-nhúng é Yhumsîng Yesuq lé, shi é mai lhoq dui toq yû sù Garai Gasang lé lumjîng luí, Yhang eq dingmán bang ga són byi râ nghut é, nga-nhúng é matú le nghut lhê. ²⁵ Yhumsîng Yesuq gi, nga-nhúng é yubak marâ é matú, shî hkám byi râ đông ap pyâm é hui luí, nga-nhúng, mara hkyut san byî é hui râ matú, lhoq dui toq é hui bê nghut ri.

5

Ngingón Hkyô Eq Gabú Hkyô

✨ 4:17 Apûn 17:5 ✨ 4:18 Apûn 15:5 ✨ 4:22 Apûn 15:6

¹ Haû mù luí, nga-nhúng gi, lumjîng é đông mai mara hkyut san byî é hui bê nghut é yanmai, nga-nhúng é Yhumsîng Yesuq Hkrisduq đông, Garai Gasang eq buinùm wó xoq yû bê nghut lhê. ² Yesuq é yanmai, nga-nhúng gi, ahkuí wó yu to bê jeju shî má, lumjîng luí wó wâng bê nghut mù, Garai Gasâng é hpungwup shingkan lé myoqbyù luí gabú gumrong nyi lhê. ³ Haû za a nghut, nga-nhúng gi, wuîhke jamjau hkyô pé má le gabú gumrong nyi lhê. Hkâsu mù gâ le, wuîhke jamjau hkyô gi, hkam jan hkyô lhoq htoq ri; ⁴ hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhúng sê lhê. ⁵ Myoqbyu to hkyô haû gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhúng lé byî tô é Chyoiyúng Woi-nyí đông, nga-nhúng é i-myt unghkaû má hut kat byi bê nghut ri.

⁶ Hkâsu mù gâ le, nga-nhúng gi, a-tsam a bò dut tô ashî u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shî hkám byi bê nghut ri. ⁷ Gè gè ga jáng, dingmán su é matú shî hkám byi râ byù gi, shau râ nghut lhê; nghut kôlhang, byù gè rayuq é matú kúm gi, wám shî hkám é byù nyi sê lhê. ⁸ Nghut kôlhang, nga-nhúng gi, yubak dap bang nghut nyi ashî hkûn, nga-nhúng é matú Hkrisduq shî hkám byî é má, Garai Gasang gi, Yhâng é chyitdap myit, nga-nhúng lé shit byi bê nghut ri.

⁹ Nga-nhúng gi, ahkuí, Yhâng é sui mai mara hkyut san byî é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lhê. ¹⁰ Hkâsu mù gâ le, nga-nhúng gi, Garai Gasâng é gye pé nghut nyi ashî u le, Yhâng Zo shî hkám byî é đông, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhâng é asak đông mai, gè gè yhang hkyi yu é hui râ nghut lhê. ¹¹ Haû su za a nghut, nga-nhúng gi, nga-nhúng é Yhumsîng Yesuq Hkrisduq đông mai, buinùm wó xoq yu é jeju lé, ahkuí wó yu to bê nghut mù, Yhâng é yanmai, Garai

Gasang má le, gabú gumrong nyi lhê.

Shi É Gi, Adam É Yanmai, Dui É Asak Gi, Hkrisduq É Yanmai

¹² Byù rayuq dông mai, yubak mara gi, mingkan má jé wâng bê nghut luí, shî-nò hkyô gi, yubak marâ é yanmai châng jé bê nghut ri; haú dông mai, byù lhunglhâng bang gi, yubak dap bang chyat nghut byuq mù, shî-nò hkyô gi, byù lhunglhâng bâng chyáng jé bê nghut ri. ¹³ Hkâsu mù gâ le, haú jep é tarâ lé a byi shimá, yubak mara gi, mingkan má joq to bê nghut lhê. Nghut kôlhâng, jep é tarâ a joq shî é hkûn gi, yubak mara lé mara su a ngàm shî é nghut lhê. ¹⁴ Haú su ga kôlhâng, Adam su hkunmó lé lu laí é dông mara a kut shut bâng é ahtoq má lhâng, shî-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azông nghut ri.

¹⁵ Nghut kôlhâng, jeju chyunghuq gi, haú mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng muí nyi ri-nhung! ¹⁶ Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ jéyáng é hkyô gi, byù rayuq é mara má cháng mù, mara dam byí é hkyô lhoq htoq é nghut lhê; nghut kôlhâng, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lhê. ¹⁷ Hau htoq agó, byù rayuq tarâ lu lai luí, haú rayuq é yanmai, shî-nò hkyô up nyi bê nghut lhê, ahkuí kúm, haú Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak duí hkyô má uphkang nyi kó râ nghut lhê.

¹⁸ Haú mù luí, tarâ lu lai é hkyô ralhûm é yanmai, byù lhunglhâng bang gi, mara dam byí é hui zo kô é su, dingmán hkyo é muzó ralhûm é yanmai, byù lhunglhâng bang gi, asak duí hkyô eq sêng é mara hkyut san byi hkyô lé wó bê nghut ri. ¹⁹ Hkâsu mù gâ le, byù rayuq jìno a gyô é yanmai, myo myo gi, yubak dap bang dut byuq é su, byù rayuq

jìno gyô é yanmai, myo myo gi, dingmán bang gâ é hui kó râ nghut lhê.

²⁰ Haú jep é tarâ jat é gi, tarâ lu lai hkyô je myo râ matú nghut lhê. Nghut kôlhâng, yubak mara myô jat é hkûn, jeju gi, je riyhang myô jat lo é nghut lhê. ²¹ Haú mù, yubak mara gi, shî-nò hkyô dông uphkâng bê su, jeju gi, nga-nhúng é Yhumsîng Yesuq Hkrisduq é yanmai, ahtum abyuq é asak wó byí é dingmán hkyô dông up râ nghut lhê.

6

Hkrisduq Eq Rading Ralhûm

¹ Haú nghut jáng, nga-nhúng gi, hkâsu nghû táí râ lhú? Jeju myô jat lò sháng gaq nghû, nga-nhúng, yubak mara kut xoq nyi râ lhú? ² Haú su a nghut sháng gaq! Nga-nhúng gi, yubak mara eq shi gang bê bang nghut lhê; hkâsu mù haú má wó dui nyi lo râ lhú? ³ Hkrisduq Yesuq eq rading ralhûm za dut râ matú, wui-myhup hkâm yù bê bang nga-nhúng banshoq gi, Yhâng é shî hkám hkyô má le rading ralhûm za dut râ matú, wui-myhup hkâm yù bê nghut é lé, nungmoq a sé kó lhú? ⁴ Haú mù luí, Hkrisduq gi, Íwâ é hpungwup shingkâng èq, shî bê mai lhoq dui toq huí é su, nga-nhúng le, asak asik dông wó dui nyi sháng gaq nghû, nga-nhúng gi, wui-myhup hkâm é dông, Yhang eq rahá, shî hkâm é eq myhup yhum é hui bê nghut lhê.

⁵ Nga-nhúng gi, Yhang shî hkám é hkyô má, Yhang eq rading ralhûm za dut bê nghut jáng, Yhâng é dum dui toq hkyô má le, Yhang eq rading ralhûm za hkyak dut râ nghut lhê. ⁶⁻⁷ Hkâsu mù gâ le, shî bê sù gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luí, yubak mara gùng gi, lhoq htên pyâm é hui râ matú, nga-nhúng é byù xau gi, Yhang eq rahá jén sat pyâm é hui bê nghut é hkyô lé, nga-nhúng sê lhê.

⁸ Haú mù, nga-nhúng gi, Yhang eq rahá shî hkám bê nghut jáng, Yhang eq rahá dui nyi râ nghut lhê nghû, lumjîng lhê. ⁹ Hkâsu mù gâ le, Hkrisduq gi, shî bê mai lhoq dui toq é hui bê nghut mù, Yhang gi, dum wó shi lo râ a nghut é lé, nga-nhúng sê lhê; shî-nò hkyô gi, Yhang lé hkâ-nhám le wó sing to râ a nghut lo. ¹⁰ Yhang shî hkâm é shî-nò hkyô gi, banshoq bâng é matú, yubak mara eq séng luí radàm za shî hkám byi bê nghut

ri; nghut kôlhang, Yhang dui nyi é asak gi, Garai Gasâng hí má dui nyi é nghut lhê.

¹¹ Haû eq rajung za, nungmoq gi, yubak mara eq shi gang luî, Hkrisduq Yesuq dông Garai Gasâng é matú asak dui nyi lhê nghû, sôn yù keq. ¹² Haû mù luî, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê. ¹³ Nungmoq é gungdu showui showang pé lé, agè ashop hkyô é chûng zè pé dông yubak mara má hkâ-ap byî pyám kó, shî bê mai lhoq dui toq yû huî é bang su, yhum-sing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkyô é chûng zè pé dông, Garai Gasâng chyáng ap byi keq. ¹⁴ Hkâsu mù gà le, nungmoq gi, jep é tarâ hkaû má a nghut lô é za, jeju hkaû má nghut nyî bekô yanmai, yubak mara gi, nungmoq lé sîng sù wó dut râ a nghut lo.

Dingmán Hkyô É Jùn Pé

¹⁵ Haû jáng gi, hkâsu kó lhú? Nga-nhúng gi, jep é tarâ hkaû má a nghut lo é za, jeju hkaû má nghut nyî bekô yanmai, mara wó kut shut kó râ lhú? Haû su a wó kut! ¹⁶ Nungmoq gi, rayuq yuq é jîno gyo râ matú, yhumsing gùng lé jùn pé dông ap pyâm é hkûn, shî-nò hui râ nghut é yubak marâ é jùn dông nghut kôlhang, dingmán hkyô wó râ nghut é jîno gyo hkyô nghut kôlhang, nungmoq châng nyi é nghut le gi, nungmoq, haû é jùn dut bê lé, a sé kó lhú? ¹⁷ Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhiklhum banshoq èq cháng bekô nghut é yanmai, Garai Gasang lé jeju hkyon sháng. ¹⁸ Nungmoq gi, yubak mara mai lhoq lhut é hui bang nghut kômù, dingmán hkyô é jùn dut bekô nghut ri.

¹⁹ Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ dông ngò tái râ ga jáng: nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn dông lhang ap byî wú bekô nghut é su, ahkuî gi, chyoiyúng hkyô wó yû râ matú, haû pé lé, dingmán hkyô má jùn dông ap byi keq. ²⁰ Nungmoq

gi, yubak marâ é jùn dut nyî kô é hkûn, dingmán hkyô eq uphkang é mai lut nyî kô é nghut lhê. ²¹ Ahkuî, nungmoq hoqjung nghû wú htoq é pé gi, haû u lé, hai akyû wó yû kô é lhú? Hau pé gi, shi byuq é má htâm é chyat nghut ri. ²² Nghut kôlhang, ahkuî gi, nungmoq, yubak mara mai lhoq lhut é hui bekô nghut mù, Garai Gasâng é jùn dut bekô nghut ri; hau é akyû gi, chyoiyúng hkyô wó yu é nghut mù, ahtum abyuq é asak wó râ nghut lhê. ²³ Hkâsu mù gà le, yubak marâ é ahpau gi, shi é hkyô nghut ri; nghut kôlhang, Garai Gasâng é chyunghuq gi, nga-nhúng é Yhumsing Hkrisduq Yesuq é yanmai, ahtum abyuq é asak nghut ri.

7

Tarâ Mai Lut É Hkyô

¹ Gumang wuî ê, ngò gi, tarâ lé sê é bang nungmoq lé taî nyi lhê: haû tarâ gi, byû rayuq lé, yhang, asak dui nyi é u lé za wó uphkang é lé, nungmoq a sé kó lhú? ² Dangké, ikun wàng bê myiwe myhí rayuq gi, yhang é yhumsing hpó asak dui nyi é ahkýing má, tarâ èq up zing tô é hui ri; nghut kôlhang, yhang é yhumsing hpó shi byuq é nghut jáng gi, haû ikun wàng tarâ mai, yhang wó lut bê nghut ri. ³ Haû nghut é yanmai, yhang é yhumsing hpó asak dui nyi ashî u lé, yuqgè góyuq eq hâng lhûm é nghut jáng gi, yhang lé, sulàng lú sù ga kó râ nghut lhê. Nghut kôlhang, yhang é yhumsing hpó shi byuq é nghut jáng gi, yhang, tarâ haû mai lut bê nghut luî, yuqgè góyuq eq hâng lhum kôlhang, sulàng lú sù a nghut lo.

⁴ Haû mù luî, ngá é gumang wuî ê, nungmoq le, haû shi byuq é mai lhoq dui toq yû hui bê sù Yuqgè chyáng wó xoq mù, nga-nhúng gi, Garai Gasang lé ashî wó zui byi sháng gaq ga, Hkrisduq é gungdu dông mai, jep é tarâ eq shi gang bê nghut lhê. ⁵ Hkâsu mù gà le, nga-nhúng, yubak gungsho má nghut nyi é hkûn, nga-nhúng gi, shî-nò hkyô é ashî zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhúng é gungdu pé má mù zui nyi é nghut lhê. ⁶ Nghut kôlhang, ahkuî gi, nga-nhúng lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kâ tô é hkyô xau dông a

nghut é za, Woi-nyí é hkyô sik đông nga-nhúng dojaú nyi é nghut lhê.

Jep É Tarâ Eq Yubak Mara

⁷Haû jáng, nga-nhúng hkâsu taí râ l hú? Jep é tarâ gi, yubak mara nghut lhê l hú? Ratsuí l háng a nghut! Gè gè ga jáng, haû jep é tarâ đông mai za a nghut le, yubak mara lé, ngò wó sê é a nghut. Hkâsu mù gà le, "myoqnoq myit hkâbô" ✧ ga jep é tarâ má a taí tô é nghut jáng, myoqnoq é hkyô lé, ngò sé râ a nghut. ⁸Nghut kôlhang, yubak mara gi, hkunmó é ahkáng lé chùng mù, ngò má myoqnoq hkyô jung hkangmó lhoq htoq byí ri; hkâsu mù gà le, jep é tarâ hkaû má a nghut jáng, yubak mara gi, shi é za nghut lhê. ⁹Ngò gi, tarâ hkaû má a nghut é za asak dui wú bê nghut lhê; nghut kôlhang, haû hkunmó htoq lô jáng, yubak mara gi, dui lò mù, ngò gi, shí bê nghut lhê. ¹⁰Haû mù luí, asak dui nhâng râ matú nghut é hkunmó haû gi, shí-nò hkyô dut byuq é lé, ngò wó sê é nghut lhê. ¹¹Hkâsu mù gà le, yubak mara gi, hkunmó é ahkáng lé chùng mù, ngo lé mhaû yù luí, hau eq ngo lé shí nhang ri. ¹²Hau pé lé wú jáng, jep é tarâ gi, choyiyúng ri; haû hkunmó gi, choyiyúng, dingmán é eq ge é nghut ri.

¹³Haû nghut jáng, ge é hkyô haû gi, ngá é matú shí-nò hkyô dut byuq bê l hú? Haú đông a nghut! Nghut kôlhang, yubak mara lé gi, yubak mara đông hkyak wó lhoq htoq shit râ matú, haû ge é hkyô đông mai, yubak mara gi, ngò má shí-nò hkyô lhoq htoq bê nghut luí, yubak mara gi, gè gè yhang agè ashop dut é lé, hkunmó đông mai tân shit é nghut lhê.

¹⁴Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn đông ung zô é hui bê nghut lhê. ¹⁵Ngò haí kut nyi é hkyô lé, ngò a sé. Hkâsu mù gà le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê. ¹⁶Ngò a kut nau é lé kut é nghut jáng gi, haû jep é tarâ ge é lé, ngò myit huí é nghut lhê. ¹⁷Ahkuí gi, haû lé ngò yhang kut nyi é a nghut lo, ngò má lúng tô é haû yubak sheq kut é ru nghut lhê. ¹⁸Ngò má, nghut bê, ngá é yubak gungsho má ge é hkyô haí le a bo é

lé, ngò sê lhê. Hkâsu mù gà le, ge é hkyô lé kut nau é myit ngò má bò kôlhang, haû lé a wó kut htoq nghut ri. ¹⁹Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri. ²⁰Ahkuí, a kut nau é hkyô lé ngò kut nyi é nghut jáng, haû lé ngò yhang kut nyi é a nghut lo é za, ngò má lúng tô é haû yubak sheq haû lé kut nyi é ru nghut lhê.

²¹Haû mù, ge é hkyô lé ngò kut nau é hkun, ngò má agè ashop hkyô htoq lô lô mù é tarâ lé, ngò myang ri. ²²Hkâsu mù gà le, ngò gi, Garai Gasâng é tarâ lé, ngá é i-myt unghkaû má myit nguì gabú nyi lhê. ²³Nghut kôlhang, ngá é gungdu showui showang pé má bo é gotú tarâ gi, ngá é i-myt tarâ eq majan zân lhùm é nghut luí, ngá é gungdu showui showang hkaû má mù zui nyi é yubak é tarâ má, ngo lé shúmbyû dut nhang é lé, ngò myang ri. ²⁴Ngò gi, shogyo rayhup dut sù nghut rinhung! Shí nhang é gungdu shí mai, ó yuq wá, ngo lé wó hkyi yù râ l hú? ²⁵Nga-nhúng é Yhumsing Yesuq Hkrisduq đông mai wó lut bê nghut mù, Garai Gasang lé jeju hkya-ôn nyi lhê!

Haû mù luí, ngò yhang, myit é đông gi, Garai Gasâng é tarâ lé châng lhê, nghut kôlhang, yubak gungsho đông gi, yubak é tarâ lé châng lhê.

8

Haû Woi-nyí Mai Asak Dui É Hkyô

¹Haû mù luí, ahkuí, Hkrisduq Yesuq má nghut nyí bâng é matú gi, mara byí é hkyô a joq lô é nghut lhê. ²Hkâsu mù gà le, asak dui hkyô eq sêng é Woi-nyí é tarâ gi, Hkrisduq Yesuq đông, yubak mara eq shí-nò hkyô é tarâ mai, ngo lé lhoq lhut yù bê nghut lhê. ³Haû jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhâng râ matú, yubak byu é gunghkyâng đông, Yhang Zo sîng lé nhang kat é đông kut pyám bê nghut ri. ⁴Haû mù, Garai Gasang gi, yubak gungsho đông asak a dui é za Woi-nyí đông asak dui bang nghut é nga-nhúng má, haû jep é tarâ má bo é hkyô pé lé, wó lhoq dik râ matú, gungsho ralhum má, mara lé doqdân pyám bê nghut ri.

✧ 7:7 Htoq Lô 20:17

⁵ Haû yubak gungsho dông asak dui é bang gi, gungsho yut yut ô nau é hkyô pé lé myit zuq nyi akô; haû Woi-nyí dông asak dui é bang kúm gi, Woi-nyí ô nau é hkyô pé lé myit zuq nyi akô nghut ri. ⁶ Haû yubak byu é myit gi, shi é hkyô nghut ri; haû Woi-nyí eq hking to huí su é myit kúm gi, asak eq nguingón hkyô nghut ri. ⁷ Haû yubak myit gi, Garaí é tarâ ô má a nyi é htoq agó, haú lé a wó cháng kut é yanmai, Garaí é gyè nghut ri. ⁸ Haû yubak gungshô eq hking tô é hui bang gi, Garai Gasang lé a wó gabú nhâng kó nghut ri.

⁹ Nghut kôle, Garai Gasâng é Woi-nyí gi, nungmoq chyáng lúng nyí bê nghut jáng, nungmoq gi, haû yubak gungshô eq hking to huí é bang a nghut lô é za, Woi-nyí eq hking to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê. ¹⁰ Nghut kôlhang, nàng má Hkrisduq nyi nyi é nghut jáng, náng é gungdu gi, yubak marâ é yanmai shí kôlhang, náng é woi-nyí gi, dǐngmán hkyo é yanmai dui nyi ri. ¹¹ Hau htoq agó, Yesuq lé shi é mai lhoq dui toq yú Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yú Sù gi, nungmoq má nyi nyi é, Yhâng é Woi-nyí dông mai, nungmoq é, shí sê é gungdu pé lé le, asak dui nhâng râ nghut lhê.

¹² Haû mù luí, Gumang wuì ê, nga-nhúng gi, yubak gungsho dông asak dui râ matú, wò wó é bang a nghut. ¹³ Hkâsu mù gâ le, haû yubak gungsho dông asak dui kô é nghut jáng, nungmoq gi, shí râ nghut lhê; nghut kôlhang, haû gungshô é shut shaí hkyô lé, Woi-nyí eq sat pyám kô é nghut jáng, nungmoq gi, asak dui râ nghut lhê. ¹⁴ Garai Gasâng é Woi-nyí eq shuí u é hui bang gi, Garai Gasâng é yhangzô pé nghut lhê. ¹⁵ Hkâsu mù gâ le, nungmoq gi, gyuq râ matú, nungmoq lé jùn dum taú dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haû mù, nga-nhúng gi, Yhang é yanmai, "Aba,* Âwa ê" nghu wut é nghut lhê. ¹⁶ Nga-nhúng gi, Garai Gasâng é yhangzô pé nghut é lé, Woi-nyí haû gi,

nga-nhúng é woi-nyí eq rahá saksé hkâm nyi ri. ¹⁷ Ahkuí, nga-nhúng gi, zo wuí nghut bê yanmai, Hkrisduq eq rahá, Garai Gasâng é amyú hkûngxoq pé wó dut é nghut lhê. Nga-nhúng gi, Hkrisduq é wuíhke jamjau pé lé, gè gè yhang bo hui zô é nghut jáng, Yhâng é hpungwup shingking lé le, bo myang hkam yù râ nghut lhê.

Htàngnùng Lhê É Hpungwup Shingking

¹⁸ Nga-nhúng é ahkuí lhê é wuíhke jamjau hkyô pé gi, nga-nhúng lé shit râ nghut é hpungwup shingking eq whuí râ a gingdán nghú, ngò wó myit ri. ¹⁹ Haû hpan to huí é lhunglhang gi, Garai Gasâng é yhangzô pé lé lhoq htoq shit byi râ lé, gyai yhang myit lánq nyi akô nghut ri. ²⁰ Hkâsu mù gâ le, haû hpan to huí é lhunglhang gi, akyú a bo é chyat dut byuq bê nghut ri. Haû gi, yhumsíng hkyin yu é dông a nghut é za, haû su dut nhâng Sù ô nau é dông kut é nghut ri. ²¹ Haû hpan to huí é lhunglhang gi, htên byoq byuq râ matú shúm dut é mai lhoq lhut é hui luí, Garai Gasâng é yhangzo pé é hpungwup bo é luthkyô má wó wàng râ matú, myoqbyu tô é nghut lhê.

²² Haû hpan to huí é lhunglhang gi, ahkuí hkyíng jé shoq, zohkû-nò no é su nò-kying kyíng nyi kô é lé, nga-nhúng sê lhê. ²³ Haû pé za a nghut, Woi-nyí é sâng-hi ashí† lé wó yú bê bang nga-nhúng le, zo pé dông yín yu é jeju lé lánq uchyang, i-myit unghkaú má nò-kying kyíng é nghut lhê. Zo pé dông yín yu é jeju haû gi, nga-nhúng é gungdu hkyi xe yù hkyô nghut lhê. ²⁴ Hkâsu mù gâ le, nga-nhúng gi, myit myoqbyù hkyô haû mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsíng myang to bê é lé, ó yuq wá myit myoqbyù shirâ lú? ²⁵ Nghut kôlhang, nga-nhúng gi, a wó shí é lé myit myoqbyu é nghut jáng, myit hîng hîng kut lánq é nghut lhê.

²⁶ Haû eq rajung za, Woi-nyí gi, nga-nhúng wum nyhôm é hkyô má garúm byí ri. Nga-nhúng gi, haí dung râ é lé a sé kôlhang, haû Woi-nyí yhang gi, dang mai

* 8:15 Aba gâ é gi, Aramaik dang dông "âwa" gâ é lichyúm nghut lhê. † 8:23 Woi-nyí é sâng-hi ashí gâ é gi, Woi-nyí gi, Garai Gasang byí é chyunghuq pé mâ é sâng-hi lhum nghut lhê.

a wó taí htoq é nò-kying htê dông, nga-nhúng é matú bo dúng xoq byí ri. ²⁷ Nga-nhúng é i-myt unghkaú lé gôn wú é Sû gi, haú Woi-nyí myit é hkyô lé sê lhê, hkâsu mù gâ le, haú Woi-nyí gi, Garai Gasang ô nau é dông, sân-yúng bâng é matú bo dúng xoq byí ri.

Banshoq Lé Je Wó Ung Pyám Râ Hkyô

²⁸ Garai Gasang gi, Yhang myit sôn tô é eq rajung za, ji yù luí, Yhang lé chyitdap bâng é matú, lhunglháng lé ge é dông chyat kut é hkyô lé, nga-nhúng sê lhê. ²⁹ Hkâsu mù gâ le, Yhang Zo gi, gumang wuì myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó pûng nhâng râ matú, hí mai masat to bê nghut ri. ³⁰ Hau htoq agó, Yhang, hí mai masat to bê bang lé gi, ji yu ri; ji yù bê bang lé gi, mara hkyut san byí ri; mara hkyut san byí é hui bang lé gi, hpungwup shingkang bò nhang ri.

³¹ Haú jáng gi, shí hkyô eq séng luí, nga-nhúng haí taí shirâ lhú? Garai Gasang gi, nga-nhúng hkyam shut nghut jáng, nga-nhúng lé, ó yuq wá gyè wám kut râ lhú? ³² Yhumsing é Yhangzo lé lháng a ha bûn é za, nga-nhúng banshoq bâng é matú ap byí pyâm é Sû gi, Yhang lé le, lhunglháng lé le, rahá láí láí byi râ a nghut lhú? ³³ Garai Gasâng èq hkyin yu to bê bang lé, ó yuq wá mara wó hûn râ lhú? Garai Gasang gi, mara hkyut san byi Sû nghut ri. ³⁴ Hkrisduq Yesuq gi, shí hkám luí, shí hkâm é htoq agó, shi é mai lhoq dui toq yu é hui mù, Garai Gasâng é loqyo hkyam má nghut nyí luí, nga-nhúng é matú bo dúng xoq byí nyi bê nghut é yanmai, ó yuq wá mara wó byi râ lhú? ³⁵ Hkrisduq é chyitdap myit mai, nga-nhúng lé, hai eq wá wó lhoq kang râ lhú? Gunjang huí é hkyo èq luq? Wuíhke huí é hkyo èq luq? Zing-ri huí é hkyo èq luq? Mutmó huí é hkyo èq luq? Gùng chin dut huí é hkyo èq luq? Gyuq jung èq luq? Sham èq luq? ³⁶ Haú gi,

"Náng é yanmai, ngamoq, nyí wuì sat pyâm é huí nyi ri;

sat râ matú nyhi tô é sau pé lé su, ngamoq lé myit pyâm akô."[☆]

ga kâ tô é eq rajung za nghut ri. ³⁷ A wó lhoq kang; nga-nhúng lé chyitdap Su é yanmai,

nga-nhúng gi, haú pé banshoq lé je wó ung pyâm é nghut lhê. ³⁸ Hkâsu mù gâ le, shí kôlháng, byùn kôlháng, maumang lagyô pé nghut kôlháng, agè ashop é nat pé nghut kôlháng, shí ipyat nghut kôlháng, htang pyat nghut kôlháng, haí jung a-tsam pé nghut kôlháng, ³⁹ htoq tsáng mâ é nghut kôlháng, a-ô tsáng mâ é nghut kôlháng, hpan tô é gotû haí nghut kôlháng, nga-nhúng é Yhumsing Hkrisduq Yesuq má bo é Garai Gasâng é chyitdap myit mai, nga-nhúng lé wó lhoq kang pyám râ a nghut nghû, ngò gi, hkyak wó sê yu ri.

9

Garai Gasang Hkyin Yu É Israelaq Byu Pé

¹ Ahkuí, ngò gi, Hkrisduq má tengmán é dang taí râ; ngò a mhaú é lé, haú Chyoiyúng Woi-nyí gi, ngá é unghkaú myit má hkyak saksé hkâm nyi ri. ² Ngò gi, ngá é myit nhikhum má, gyai yhang yón kuq nyi é eq ayang hpuzô nyi lhê. ³ Hkâsu mù gâ le, ngò gi, ngá é byuhú, ngá é gumang wui é matú, nhíng é hui luí Hkrisduq eq gang le lháng gè râ su gâ ri. ⁴ Haú bang gi, Israelaq byu pé nghut lhê. Zo yín yû huí é hkyô le, hpungwup shingkang le, dangshikaq pé le, tarâ lé myang hap yu é hkyô le, noqkuq yhûm má noqkuq é hkyô le, danggidiq pé lé le, yhangmoq wó yu akô nghut ri. ⁵ Haú myìng hû é îchyí îwâ pé gi, yhangmoq é îchyí îwâ pé nghut luí, byu é hkyam dông gon jáng, Hkrisduq gi, yhangmoq amyû mâ é nghut ri. Yhang gi, lhunglháng lé up é, ahtum abyuq hky-a-on huí é Garai Gasang nghut ri! Amen.

⁶ Haú gi, Garai Gasâng é danggidiq akôm dut byuq bê nghû nau é a nghut. Hkâsu mù gâ le, Israelaq byu pé banshoq bang gi, Israelaq byu akying chyat a nghut kó nghut ri. ⁷ Abraham é awut ashín banshoq bang gi, yhâng é zo wuì akying chyat nghû a wó taí é nghut lhê. Hau é malaí, "Isak dông mai lo é lé, náng é awut ashín nghû sôn byi râ nghut lhê."[☆] gâ tô ri. ⁸ Radông taí sháng ga jáng, gungsho mai hku é zo wuì gi, Garai Gasâng é zo wuì akying a nghut kó, danggidiq eq sêng é zo wuì za sheq, Abraham é awut ashín pé dông sôn byí é nghut lhê. ⁹ Hkâsu mù gâ le, "Masat tô é ahkyíng má, ngò dum taú lé mù, Sarah gi, yuqzo hkû râ nghut

lhê." ✠ ga taí tô é danggidiq é yanmai nghut lhê.

¹⁰ Haû za a nghut, Rebeka é yhangzô nhiktang é îwa gi, nga-nhúng é îwa nghut su Isak rayuq za nghut lhê. ¹¹⁻¹² Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yanmai nghut é lé, wó gîng nyi sháng gaq ga, haû zozûm nhik a hku lé shî é htoq agó, ge é eq a ge é muzó haî lhang a kut shimá, "Haû ko sù yuq gi, tiq sù yuq lé dojaú râ nghut lhê." ✠ ga, Rebeka lé taí kyô tô é nghut lhê. ¹³ Haû gi, "Yakup lé, ngò chyitdap lhê, nghut kôlhang, Eso lé gi, a ngui é nghut lhê." ✠ ga kâ tô é eq rajung za nghut ri.

¹⁴ Haû nghut é yanmai, nga-nhúng hkâsu nghû taí râ? Garai Gasang gi, a tarâ é sù nghut lhê lhú? Ratsuí lhang a nghut! ¹⁵ Hkâsu mù gâ le,

"Ngò, shogyo nhikmyin naù sù lé, shogyo nhikmyin râ nghut lhê;

Ngò, jeju byi naù sù lé, jeju byi râ nghut lhê." ✠

ga, Mosheq lé Yhang taí ri. ¹⁶ Haû mù luí, haû hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasang é shogyo nhikmyin é yanmai za nghut lhê. ¹⁷ Hkâsu mù gâ le, Chyúmdang má, "Náng chyáng Ngá é a-tsam wó tûn shit râ eq mingkan gón má Ngá é mying lhoq pyo é hui râ matú sheq, Ngò, nang lé lhoq toq kat é nghut lhê." ✠ ga, Hpara-uq lé taí ri. ¹⁸ Haû mù luí, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byi ri.

¹⁹ Nungmoq mâ é rayuq yuq, "Haû jáng, Garai Gasang gi, ngamoq lé haî mù mara hun nyi ashî lhú? Yhang ô nau é hkyô lé, ó yuq wá wó hkûm pyâm lhê lhú?" ga, ngo lé taí kó râ nghut lhê. ²⁰ Nghut kôlhang, Garai Gasang lé dang tu sù byù nang gi, ó yuq wá nghut lhê lhú? Saî to hui bê é zè pé gi, "Nàng, haî mù ngo lé shî su kut saî tô lhê lhú?" nghû saî é Sù lé wó taí râ lhú? ²¹ Tso-au saí sù gi, tsohtung ralhum mai za, hkik é tso-au pé eq a hkik é tso-au pé saí râ ahkáng wó lhê a nghut kô lhú?

²² Garai Gasang gi, Yhâng é nhikmo-yo hkyô tûn shit luí, Yhang é a-tsam lé sé nhâng naù kôlhang, htên byoq râ matú hen tô é, nhikmo-yo gíng é tso-au pé lé, myit hîng hîng shirang pyâm nyi é hkyô lé, taí râ jang haî joq ashî lhú? ²³ Hpungwup shingkâng é matú noq mai hen to bang nghut é, Yhang shogyo nhikmyin huí é bang lé, Yhâng é agùn agó é hpungwup shingkang lé sé nhâng naù mù, Yhang haû su kut é nghut jáng, taí râ haî joq ashî lhú? ²⁴ Haû bang gi, Yudaq byu pé mai za a nghut, tûngbaù pé mai le ji yù huí é bang nga-nhúng nghut lhê. ²⁵ Haû eq rajung za, Hosea laiká má Yhang taí tô é gi,

"Ngá é byù myû a nghut é bang lé, 'Ngá é byù myû' nghû;

Ngò a chyit é byizo lé 'Ngò chyit sù' nghû wut râ nghut lhê." ✠

gâ ri. ²⁶ Haû mù,

"Nungmoq gi, ngá é byù myû pé a nghut.' nghû yhangmoq lé taí é jowò má yhang,

yhangmoq gi, 'Rû dui nyi é Garai Gasang yhangzô pé' ga wut é hui kó râ nghut lhê." ✠

gâ ri.

²⁷ Esai-aq le, Israelaq byu pé eq séng luí garu taí é gi,

"Israelaq yhangzo yhangshû pé gi, wuîshuq lung-aû yàm mâ é semuî su myo kôlhang, myit gyó tô é bang za sheq hkyi yu é hui kó râ nghut lhê.

²⁸ Hkâsu mù gâ le, haû Yhumsîng gi, myidàm htoq má Yhâng é tarâ jéyáng hkyô lé hân hân lhoq dik lhoq htûm pyám râ nghut lhê." ✠

gâ ri.

²⁹ Haû eq rajung za, hí lé Esai-aq taí tô é gi,

"A-tsam dik shoq bò sù haû Yhumsîng za, nga-nhúng lé, awut ashín a myhit to byi é nghut jáng, nga-nhúng gi, Sodom wà su dut byuq luí, Gomoraq myuq eq pung byuq râ nghut lhê." ✠

gâ ri.

Israelaq Byu Pé A Lumjîng Kô É Hkyô

³⁰ Haû mù, nga-nhúng hkâsu nghû tái râ lú? Dingmán hkyô lé a châng hkat é tûngbaù pé gi, haù lé wó yù bekô; haù gi, lumjúng hkyô é yanmai wó yu é dingmán hkyô nghut ri. ³¹ Nghut kôlhang, tarâ eq sêng é dingmán hkyô lé châng hkat é Israelaq byu pé gi, haù lé a wó yù kó nghut ri. ³² Haû mù a wó yù kô é lú? Yhangmoq gi, lumjúng myit eq châng hkat kô é a nghut é za, muzó pé eq châng hkat kô é yanmai, a wó yù kô é nghut ri. Yhangmoq gi, "htung htê râ luqgok" má htung leng bekô nghut ri. ³³ Haû, "Wú keq, htung leng râ luqgok eq myit leqbat nhâng râ luqmó cham lé, Ngò, Zi-un bùm má lheq to luí, Yhang lé lumhkaù sù gi, hkâ-nhám le hoq hpu é hui râ a nghut." ✧ ga kê tô é eq rajung za nghut ri.

10

¹ Gumang wuì ê, ngò gi, haù Israelaq byu pé hkyi yu é hui kó sháng gaq nghû, gyai yhang myit shirông luí, Garai Gasâng chyáng yhangmoq é matú kyûdung byí nyi lhê. ² Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyí bo é dông a nghut kó. ³ Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsing dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaù má a nyi kó nghut ri. ⁴ Hkrisduq gi, lumjúng bang yuq hkangmó, dingmán é má wó jé kó sháng gaq ga, jep é tarâ ló htûm jang dut bê nghut ri.

⁵ Mosheq gi, "Haù pé dông châng é sù gi, haù pé mai asak duì râ nghut lhê." ✧ ga, jep é tarâ eq sêng é dingmán hkyô lé kê sân kyô tô é nghut lhê. ⁶ Nghut kôlhang, lumjúng hkyô eq sêng é dingmán hkyô gi, "Náng é myit nhiklhùm má, 'Mauhkúng má, ó yuq doq ló râ lú?' ✧ (Haù gi, Hkrisduq lé shuí gyó ló râ gá nau é nghut lhê), ⁷ haù a nghut jáng, 'Nik é jang má, ó yuq gyó wâng râ lú?' ✧ (Haù gi, Hkrisduq lé, shi é mai dui toq nhâng râ gá nau é nghut lhê.), nghû hkâtaí kó." gâ tô ri. ⁸ Haù jáng, hkâsu gâ

tô ri lú? "Haù mungdang gi, nàng eq chyâng nyi ri; náng é nhut má le, náng é myit nhiklhùm má lé nghut nyi ri." ✧ gâ tô ri. Haù gi, ngamoq hko tái é lumjúng hkyô eq sêng é mungdang nghut lhê. ⁹ Haù mù, "Yesuq gi, Yhumsing nghut ri." nghû náng é nhut eq yín yù mù, Garai Gasang gi, Yhang lé, shi é mai dui toq nhâng bê nghut lhê nghû, náng é myit nhiklhùm má lumjúng é nghut jáng, nàng gi, hkyi yu é hui râ nghut lhê. ¹⁰ Hkâsu mù gâ le, byù gi, myit nhiklhùm má lumjúng jáng, mara hkyut san byí é hui mù, nhut mai yín yù jáng, hkyi yù huí é nghut lhê. ¹¹ Haù Chyúmdang tái é gi, "Yhang lé lumhkaù é sù ó yuq le, hkâ-nhám lhang hoq hpû é hui râ a nghut." ✧ gâ ri. ¹² Hkâsu mù gâ le, Yudaq byù eq tûngbaù pé é gyoro má gam hkoq é hkyô haí le a joq é za, haù Yhumsing gi, banshoq bâng é Yhumsing nghut lhê mù, Yhang lé wut dung bang lhunglhang lé, agùn agó shimân byí ri. ¹³ Hkâsu mù gâ le, "Haù Yhumsing é mying lé lhang é bang yuq hkangmó gi, hkyi yu é hui râ nghut lhê." ✧ gâ tô ri.

¹⁴ Haù nghut lé gi, yhangmoq a lumjúng é sù lé nhing, hkâsu wó wut dung kó râ lú? Yhangmoq a wó gyô wú é sù lé nhing, hkâsu wó lumjúng kó râ lú? Hko kyô é sù a nyi le nhing, hkâsu wó gyo kó râ lú? ¹⁵ Nhang kat é a hui le gi, yhangmoq hkâsu kut wó hko kyo kó râ lú? Haù eq rajung za, "Gabú danglù pé hko kyo bâng é hkyi-kám pé gi, hkâ-i yhang yúng ri myhi-nhung!" ✧ ga kê tô ri.

¹⁶ Nghut kôlhang, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsing ê, ngamoq é danglù lé ó yuq wá lumjúng é lú?" ✧ ga tái ri. ¹⁷ Haù nghut mù luí, lumjúng myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê. ¹⁸ Nghut kôlhang, ngò myi kó lé: yhangmoq gi, a wó gyô wú kô é nghut lhê lú? Yhangmoq gi, wó gyo gù za nghut lhê, haù eq rajung za, "Yhangmoq é htê gi, myidàm htoq banshoq má jàm bê nghut ri; yhangmoq é mungdang pé gi, mingkan htungchyûn hkangmó má

✧ 9:33 Esai 8:14; 28:16 ✧ 10:5 Nhong 18:5 ✧ 10:6 Tarâ Pun 30:12 ✧ 10:7 Tarâ Pun 30:13 ✧ 10:8 Tarâ Pun 30:14 ✧ 10:11 Esai 28:16 ✧ 10:13 Yol 2:32 ✧ 10:15 Esai 52:7 ✧ 10:16 Esai 53:1 ✧ 10:18 Hkya-on 19:4

jé bê nghut ri."✠
 gâ tô ri. ¹⁹Ngò dum myi kó lé: Israelaq byu pé gi, a sê gyo kô é nghut lhê lú? Mosheq sâng-hi má taí é gi,
 "Byù rahú lháng a nghut bang èq, Ngò, nungmoq lé manôn nhâng râ;
 sê gyo nyan a bo é amyù èq, Ngò, nungmoq lé wú nhik-yo nhâng râ nghut lhê."✠
 gâ ri. ²⁰Hau htoq agó, Esai-aq a gyuq a wàm taí é gi,
 "Ngo lé a ho é bang gi, Ngo lé myang hô bekô nghut ri;
 Ngá hkyô lé a myí é bang lé, Ngò htoq shit bê nghut lhê."✠
 gâ ri. ²¹Nghut kôlháng, Israelaq byu pé eq séng luí, Yhang taí é gi,
 "Ngò gi, jìno a gyô é eq ngegáng-htu é byù myú lé, nyí wuí Ngá loq lham mù ji nyi lhê."✠
 gâ ri.

11

Israelaq Byu Pé Lé A He-ngik Pyám

¹Haù mù luí, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lú? Ratsuí lháng a nghut! Ngò yhang le, Israelaq byù myú nghut luí, Abraham é awut ashín eq Ben-yamyin hú mâ é sù nghut lhê. ²Garai Gasang gi, Yhang te sê to gú nghut é, Yhâng é byu pé lé a he-ngik pyám é nghut lhê. Eliyaq eq sêng é hkyô Chyúmdang má bo tô é lé, nungmoq a sé kó lú? Garai Gasang é hí má, yhang, Israelaq byu pé lé mara hún é gi, ³"Yhumsîng è, yhangmoq gi, Náng é myiqhtoí pé lé sat pyám kô é eq Náng é hkungga gyap pé lé tu lhêng pyám akô nghut ri; ngò rayuq za myit gyó tô é nghut luí, ngo lé sat râ matú le yhangmoq ho nyi akô nghut ri."✠ gâ ri. ⁴Garai Gasang gi, yhang lé, hkâsu ga tû taí é nghut lhê lú? Haù gi, "Balaq hpara é hí má hkyihput a htuq shí é byù nyhit hkyíng lé, Ngá é matú myhit to lhê."✠ gâ é nghut lhê. ⁵Haù eq rajung za, ahkuí gi, jeju yanmai hkyin yù huí é bang za myit gyó tô é nghut lhê. ⁶Jeju yanmai nghut é nghut le gi, muzó é yanmai a nghut lo; muzó dông ru nghut le gi, jeju gi, jeju a nghut lo.

⁷Haù nghut jáng, hkâsu lú? Israelaq byu pé gyai ho shikut kôlháng, a wó kô é lé, hkyin htoq yù huí é bang kúm gi, wó bekô nghut ri. Góbang gi, myit lhoq htân byí é hui akô nghut ri; ⁸haù gi,
 "Garai Gasang gi, hkû-nyí jé shoq, yhangmoq lé nhikshi jit é woi-nyí lé le, a wó myang é myoqjí lé le, a wó gyô é nohkyap lé le, byí to bê nghut ri."✠
 ga kâ tô é eq rajung za nghut ri. ⁹Dawiq taí é le,
 "Yhangmoq é zangbó gi, yhangmoq é matú, dumzo eq lhai, myit leqbat jowò eq lató hpuq hkyô dut sháng gaq;
¹⁰Yhangmoq myoq a wó myâng shoq, myoqjí lhoq chut pyám byí é hui sháng gaq;
 yhangmoq é nunghkûng gi, ayang wòlai wun goí nhang é hui sháng gaq."✠
 gâ ri.

Tûngbaù Pé Lé Hkyi Yu É Hkyô

¹¹Ngò dum myi kó lé: Israelaq byu pé gi, a wó dum gè râ í leqbat byuq bekô lú? Ratsuí lháng a nghut! Yhangmoq é tarâ lu lai hkyo é yanmai, yhangmoq lé manôn nhâng râ matú, hkyi yù hkyô gi, tûngbaù pè chyáng jé byuq é nghut lhê. ¹²Nghut kôlháng, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyám é hkyô gi, tûngbaù pè é matú wó sùt hkyô dut é nghut jáng, yhangmoq é byíng jup hkyô gi, je riyhang kô é wó sùt hkyô dut râ nghut ri-nhung!
¹³Nungmoq tûngbaù pé lé ngò taí nyi lhê: ngò gi, tûngbaù pè é lagyo nghut nyi é u má, ngá é hpungmú lé hpautap nyi lhê. ¹⁴Haù gi, ngá é amyú pé lé manôn myit wó bô nhâng mù, yhangmoq ra-am lé wó hkyi yù râ lé myit myoqbyu é hkyô nghut lhê. ¹⁵Hkâsu mù gâ le, yhangmoq lé he-ngik pyám é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é dông dut bê a nghut lhi? ¹⁶Hau htoq agó, sâng-hí ashi dông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut

✠ 10:19 Tarâ Pun 32:21 ✠ 10:20 Esai 65:1 ✠ 10:21 Esai 65:2 ✠ 11:3 1 Hko 19:10,14 ✠ 11:4 1 Hko 19:18
 ✠ 11:8 Tarâ Pun 29:4 ✠ 11:10 Hkya-on 69:22-23

lhê; haû amyit gi, chyoiyúng é nghut jáng, akoq pé le chyoiyúng é nghut lhê.

¹⁷ Haû tsanlun akoq pé* ra-am gi, lhoq hkyui pyâm é hui luí, yosô tsanlun a-nyuq† nghut sù nàng gi, haú pé má xoq é hui mù, haû tsanlun amyit é xù lé bo shuq lom é nghut jáng, ¹⁸ akoq haú pé lé hkâwú tiq pyám kó. Nungmoq haû su kut é nghut jáng, nungmoq gi, haû amyit lé htuq é a nghut é za, amyit haû sheq nungmoq lé htuq é hkyô lé, nungmoq myit sé keq. ¹⁹ Nungmoq kúm gi, "Ngò, haú má xoq é hui râ matú sheq, akoq haú pé gi, lhoq hkyui pyâm é huí é ru nghut lhê." ga taí râ nghut lhê. ²⁰ Haû su gi, nghut lhê. Nghut kôlhang, yhangmoq gi, a lumjínng é yanmai, lhoq hkyui pyâm é hui kômù, nungmoq kúm gi, lumjínng é yanmai, wó ging tîng nyi é nghut lhê. Hká gumrong nyi, gyuq kyum nyi keq. ²¹ Hkâsu mù gà le, Garai Gasang gi, akoq akying pé lé a ha bûn é nghut le gi, nungmoq lé le ha bun râ a nghut.

²² Haû mù luí, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng é shogyo nhikmyin hkyô má xoq nyi nyi é myháng, nungmoq lé gi, shogyo nhikmyin nyi râ nghut lhê. Haû a nghut jáng, nungmoq le, zân hpyit pyâm é hui râ nghut lhê. ²³ Yhangmoq gi, a lumjínng hkyô lé tô pyám kô é nghut jáng, dum xoq yu é hui kó râ nghut lhê; hkâsu mù gà le, Garai Gasang gi, yhangmoq lé dum wó xoq yu é Sû nghut lhê. ²⁴ Haí mù gà le, yosô tsanlun gàm akoq nghut gù nungmoq lé hpyit yú mù, htûng a nghut é dông, hô é tsanlun agàm má xoq é nghut le gi, haû akoq akying pé nghut é yhangmoq gi, ó le ó é tsanlun- ngut akying má xoq yu é lé je riyhang hui râ nghut lhê ô!

Israelaq Byu Pé Hkyi Yu É Hui Râ Hkyô

²⁵ Haû mù, gumang wuê ê, nungmoq a nghutbun kó sháng gaq nghû, zau tô é hkyô shí lé, nungmoq a sé dut râ lé, ngò a ô nau é nghut lhê: haû gi, tûngbaù pé wang lo é laké byíng é hkûn jé shoq, Israelaq byu pé ra-am gi, myit lhoq htan é huí é hkyô nghut lhê. ²⁶ Hau htâng sheq, Israelaq amyú

banshoq bang hkyi yu é hui râ nghut lhê. Haû gi,

"Hkyi yù Sû gi, Zi-un bùm mai htoq lô râ nghut lhê;

Yhang gi, Garai lé nunghtáng tô pyâm é hkyô lé, Yakup é awut ashín mai huí sêng pyám byi râ nghut lhê.

²⁷ Ngò, yhangmoq é yubak mara lé huí sêng pyám byi jáng,

haû gi, yhangmoq lé Ngò byi tô é Ngá é dangshikaq nghut lhê."☆

ga kê tô é eq rajung za nghut ri.

²⁸ Haû gabú danglù eq séng luí ga jang, yhangmoq gi, nungmoq é matú gyè nghut akô; nghut kôlhang, hkyin htoq yú hkyô eq séng luí ga jang, yhangmoq gi, myìng hû é îchyí îwa pé é yanmai, chyitdap é huí akô nghut ri; ²⁹ hkâsu mù gà le, Garai Gasâng é chyunghuq pé eq Yhang ji yu é hkyô lé gi, wó htaí lhik pyâm é a nghut. ³⁰ Nungmoq gi, Garai Gasâng é jìno a gyô é bang radàm dut wú kô é nghut kôlhang, yhangmoq jìno a gyô é yanmai, ahkuí kúm, shogyo nhikmyin hkyô wó hkam yù bekô nghut é su, ³¹ ahkuí, yhangmoq gi, nungmoq wó hkam yu é Garai Gasâng é shogyo nhikmyin hkyô é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuí, jìno a gyo bang dut bekô nghut ri. ³² Hkâsu mù gà le, Garai Gasang gi, byù lhunglhang bang lé, shogyo nhikmyin hkyô wó tûn shit shoq ga, lhunglhang bang lé, jìno a gyo hkyo é shúm dut nhang to bê nghut ri.

Hkya-on Kungtôn Dang

³³ Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-í yhang nik ri-nhung!

Yhâng é tarâ jéyáng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wuê jung nghut ri-nhung!

³⁴ "Haû Yhumsing é myit lé, ó yuq wá ung sê lhê lhú? Yhâng é hpaqchyí byi sù gi, ó yuq wá dut wú é lhú?"☆
gâ ri.

* 11:17 Tsanlun akoq pé gi, Israelaq byu pé lé taí nau é nghut lhê. † 11:17 Yosô tsanlun a-nyuq gi, tûngbaù pé lé taí nau é nghut lhê. ☆ 11:27 Esai 59:20-21; 27:9 ☆ 11:34 Esai 40:13 ☆ 11:35 Yob 41:11

³⁵ "Garai Gasâng eq jeju dum tau byi râ dut shoq, ó yuq wá, Garai Gasang lé byi wú é lhu?"[☆]
gâ ri.

³⁶ Hkâsu mù gâ le, joq mijoq gi, Yhâng chyáng mai nghut mù, Yhang đông mai nghut luí,
Yhâng é matú chyat nghut ri. Haû hpungwup shingkang gi,
Yhâng chyáng ahtum abyuq ru joq nyí sháng gaq ô! Amen.

12

Dui É Hkungga Pé Dut Râ Hkyô

¹ Haû mù luí, gumang wuì ê, nungmoq é gungdu pé lé, Garai Gasang myit nguì ô nau é eq chyoyíung é, dui é hkungga đông nhông byi keq nghû, Garai Gasâng é shogyo nhikmyin hkyô mai, ngò, nungmoq lé wum byi kat lhê. Haû gi, woi-nyí hkyô đông nungmoq noqkuq dojaú é hkyô nghut lhê.
² Míngkan shí lhùm é sâmlai đông a cháng lo é za, myit sik wó yú râ đông nungmoq é a-kyang lé htaí pyám byi nhâng keq. Haú hkûn sheq, Garai Gasâng é ge é, myit nguì é eq gumjup é ô nau hkyô lé, nungmoq wó chyâm, wó sê gàm hkoq yú kó râ nghut lhê.

³ Hkâsu mù gâ le, ngo lé byi tô é jeju yanmai, nungmoq yuq hkgangmó lé ngò tái kôlé: nungmoq gi, yhumsing gùng lé lai shoq a nghutbùn é za, ó le ó lé, Garai Gasâng eq lumjíng myit tsing gàm byi to bê eq rajung za, myit yù gíng é í za myit yù keq. ⁴ Nga-nhúng yuq hkgangmó é gungdu ralhúm má gi, gungdu showui showang pé myo myo bo é nghut luí, gungdu showui showang haú pé banshoq gi, jai chûng jang a pung é nghut lhê. ⁵ Haû eq rajung za, myo myo nghut é nga-nhúng le, Hkrisduq má gungdu ralhúm za dut luí, yuq hkgangmó gi, rayuq eq rayuq gungsho sêng lhùm é bang chyat nghut lhê. ⁶ Nga-nhúng lé byi tô é jeju yanmai, nga-nhúng wó é chyunghuq gi, gotú tú nghut lhê. Byù rayuq é chyunghuq gi, myiqhtoi htoí é nghut jáng, yhâng é lumjíng hkyô eq rajung za htoi sháng gaq; ⁷ dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq; ⁸ myit wum byi é nghut jáng, myit wum byi sháng gaq; ra châ é bang lé garúm byi é nghut jáng, a ha bûn é za byi sháng gaq;

shuî u é nghut jáng, lumluq tung shuî u sháng gaq; shogyo nhikmyin hkyô shit é nghut jáng, gabú myit eq kut sháng gaq.

Chyitdap Myit

⁹ Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuí nyi keq. ¹⁰ Rayuq eq rayuq, gumang chyitdap myit mai lhumzui lhum keq. Rayuq eq rayuq, yhumsing gùng htoq je hpautap lhum keq. ¹¹ Myit zuq hkyô má, hkâ-nhám le wum a lhoq shôm é za, nungmoq é woi-nyí hkyô má myit toq nyi mù, haû Yhumsing lé dojaú nyi keq. ¹² Myit myoqbyù hkyô má gabú keq; wuîhke hkyô má hkam jan keq; kyûdung hkyô má lhumzui keq. ¹³ Ra châ tô é Garai Gasâng é byu pé lé gàm byi keq. Bíng hkulum é lé rago kut keq.

¹⁴ Nungmoq lé zing-rî é bang lé shimân byi keq; shimân byi keq, hkâ-nhing kó. ¹⁵ Gabú é bang eq rahá bo gabú keq; yón é bang eq rahá bo yón keq. ¹⁶ Rayuq eq rayuq byin hpyé gohut huí nyi keq. A nghutbùn é za, nyi yap hkyô nyhùm bang eq zùm yap keq. Hpaqchyí bo é sù su hkâ-myit ngàm kó.

¹⁷ Ó yuq lé le, agè ashop é yanmai, agè ashop é đông lató hkâhpuq kó. Yuq hkgangmó é myoq hí má ge é lé kut râ rago myit keq. ¹⁸ Wó dut é nghut jáng, nungmoq wó dut é í, yuq hkgangmó eq nguingón shoq nyi keq. ¹⁹ Ngá é buinùm wuì ê, lató a hpuq é za, Garai Gasâng é nhikmo-yo hkyô lé sheq lánng nyi keq. Hkâsu mù gâ le, "Ngò sheq lató hpuq râ sù nghut lhê; ngò lató hpuq râ."[☆] ga, haû Yhumsing taí ri ga kê tô ri.

²⁰ Haû mù,

"Nungmoq lé gyè kut sù zòmut é nghut le gi, byi tso keq; yhang wuìshit é nghut le gi, rajung jung byi huq keq. Haú đông kut jáng, nàng, yhâng é ulhum htoq má gyúng é myigye bum to byi é nghut lhê."[☆]

ga le kê tô ri. ²¹ Agè ashop é gi, nungmoq lé a ung pyám sháng gaq, ge é hkyo eq agè ashop é lé ung pyám keq.

13

Ahkáng Ayá Wó Bàng Ô Má Nyi Râ É Hkyô

¹ Yuq hkangmó gi, up é ahkáng ayá wó bâng é a-ô má nyi ra râ nghut lhê; hkâsu mù gâ le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byî tô é chyat nghut lhê. ² Hau é yanmai, up é ahkáng ayá lé gumlau toq é sù gi, Garai Gasang byî tô é up é ahkáng ayá lé gumlau toq é sù nghut ri; haû su kut é bang gi, tarâ jéyáng é hui zo râ hkyô lé ho yù nyi é bang nghut akô. ³ Hkâsu mù gâ le, uphkan é bang gi, ge é hkyô kut bâng é matú gyuq nán hpo a dut é za, shut shaî hkyô kut bâng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut lí? Haû jáng, ge é hkyô kut aq, haû hkûn, yhang, nang lé hkya-on râ nghut lhê. ⁴ Hkâsu mù gâ le, yhang gi, náng é matú ge é akyû kut byi râ nghut é, Garai Gasâng é dui-nhâng zoshâng nghut lhê. Nghut kôlhang, nàng, shut shaî hkyô kut é nghut le gi, gyuq nán nyî aq; haî mù gâ le, yhang gi, shâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaî hkyô kut sù lé dam byi râ matú nhikmo-yo Su é gunglik nghut lhê. ⁵ Haû mù luî, dam byi râ lé chiq é yanmai za a nghut, yhumsîng nhik bô râ é yanmai le, haû up é ahkáng ayá wó bâng é a-ô má nyi rà dut lhê.

⁶ Nungmoq hkansê kat râ é gi, hau é yanmai le nghut lhê; hkâsu mù gâ le, haû up é ahkáng ayá wó bang gi, Garai Gasâng é dui-nhâng zoshâng wui nghut lhê mù, uphkan é mù lé, ahkyíng byíng shoq wùn waq nyi akô nghut ri. ⁷ Yuq hkangmó lé byi âng é eq rajung za byi keq: hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhûm é chyîn mai lai luî, hai chyîn le hkâdap lhum kó; hkâsu mù gâ le, góyuq lé chyitdap é sù gi, haû jep é tarâ lé lhoq dik bê sù nghut ri. ⁹ "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq," ¹⁰ gâ tô é hkunmó pé eq gotû hkunmó haî nghut nghut, "Náng gûng lé nàng chyitdap é su,

náng é chyangnâm mâ é bang lé le chyitdap aq." ¹¹ gâ é tarâ má lo jup to bê nghut lhê.

¹⁰ Chyitdap myit gi, chyangnâm mâ é byù lé a ge é haî le a kut é nghut lhê. Haû mù luî, chyitdap myit gi, haû jep é tarâ lé lhoq dik é hkyô nghut ri.

¹¹ Haû mù, ahkuî lhê é ahkyíng yàm-yoq lé sê gyo luî, haû hkyô lé kut keq. Nungmoq yhup mui é mai bún gyíng râ ahkyíng jé bê; haî mù gâ le, nga-nhûng é hkyi yù hkyô gi, lumjíng hi é hkun lhê htoq má ahkuî je chyáng bê nghut ri. ¹² Haû myín ahkyíng gi, lai byuq ló râ za nghut bê; nyí ahkyíng gi, jé lô berâ nghut lhê. Haû mù luî, mauchut é muzó lé tô pyám mù, maubó é gyehking lé wut to sháng. ¹³ Ye lhaî é eq shuq wut é, ashop é đông gungsho zùm yap é eq shut é đông nyi zô lhúm nau é myit bo é, mabyoq jishûm htoq é eq manon é pé a kut é za, nyí-káng lhê su, ge é a-kyang đông nyi yap sháng. ¹⁴ Hau htoq agó, Yhumsîng Yesuq Hkrisduq lé, mebu su wut to keq; yubak gungsho ô nau é đông lhoq dik râ matú hkâ-myt kó.

14

Gumang Wuî Lé A Jéyáng Râ Hkyô

¹ Lumjíng myit má wum nyhóm sù lé, myíng myo nhô zâ é hkyô pé lé a jéyáng byî é za hap yù keq. ² Byù rayuq é lumjíng myit gi, jung hkangmó zô ri; nghut kôlhang, lumjíng myit nyhóm sù gotû rayuq gi, mhan-haq hpoqnoq za zô ri. ³ Jung hkangmó zo sù gi, a zo sù lé a ge wú tiq pyám; jung hkang jung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap yu to bê nghut ri. ⁴ Nàng gi, ó yuq wá nghut mù, góyuq é dui-nhâng zoshâng lé jéyáng lhê lhú? Yhang, yap gíng kôlhang, leqbat kôlhang, yhâng é yhumsing myit za nghut lhê. Yhang gi, wó yap gíng râ nghut lhê; hkâsu mù gâ le, haû Yhumsîng gi, yhang lé wó yap gíng nhâng Sù nghut lhê.

⁵ Rayuq myit é gi, buinyi ra-nyí gi, gó nyí htoq je ge lhê gâ ri; dum rayuq myit é gi, nyí wuí rajung za nghut lhê gâ ri. Yuq hkangmó gi, yhumsîng myit yu é lé a úng-âng nyi sháng gaq. ⁶ Buinyi ra-nyí lé, ahkyak lhê ga myit yù sù gi, haû

Yhumsing é matú kut é nghut ri. Zô é sù gi, Garai Gasang lé jeju hkyá-ôn é yanmai, haû Yhumsing lé bun luî zô nyi ri; a zo sù le, haû Yhumsing lé bun luî Garai Gasang lé jeju hkyá-ôn nyi ri. ⁷Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut. ⁸Nga-nhúng asak dui nyi le gi, haû Yhumsing é matú dui é ru nghut lhê; nga-nhúng shi byuq le gi, haû Yhumsing é matú shi é ru nghut lhê. Haû mù, asak dui nyi kôlhang, shi byuq kôlhang, nga-nhúng gi, haû Yhumsing eq sêng é bang nghut lhê.

⁹Haû su mù, Hkrisduq gi, shi byuq bang eq asak dui bâng é Yhumsing dut sháng gaq ga, shî hkám mù dum dui toq é nghut lhê. ¹⁰Haû mù, nàng gi, haî mù náng é gumang hpó lé jéyáng nyi lhê lhú? Haî mù náng é gumang hpó lé wú tiq nyi lhê lhú? Nga-nhúng lhunglhang bang gi, Garai Gasang é tarâ jéyáng tanghkuq hí má yap râ bang chyat nghut lhê. ¹¹Hkâsu mù gâ le,

"Haû Yhumsing gi, 'Ngò rû dui nyi é eq rajung za, Ngá é hí má hkyihput hkanmó htuq râ nghut lhê;

Garai Gasang lé, shô hkanmó èq yín yû kó râ nghut lhê.' ga tâi ri."[☆]

ga kâ tô ri. ¹²Haû mù luî, nga-nhúng yuq hkanmó gi, yhumsing kut laî lo é hkyô lé, Garai Gasang chyáng shit ra râ nghut lhê.

¹³Haû nghut mù, nga-nhúng gi, rayuq eq rayuq tarâ jéyáng lhùm é hkyô lé tô pyám sháng. Ó yuq nghut kôlhang, yhumsing é gumang é hkyowuî má, myit leqbat jowò eq htung htê jowò a to byi râ matú, myit sidiq keq. ¹⁴Haû Yhumsing Yesuq má nghut nyi é sù ngò gi, haî jung zoshuq nghut kôlhang, yhang baú yhang a sansêng a dut é hkyô lé, hkyak wó sé luî, jing nyi lhê. Nghut kôlhang, ó yuq le, rajung jung lé a sanséng ga myit yu é nghut jáng, yhang é matú, zè haû gi, a sansêng é nghut lhê. ¹⁵Nàng zô é zoshuq yanmai, náng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shî hkám byi bê sù nghut é, náng é gumang hpó lé, nàng zoshuq é đông mai hkâlhoq hten pyám. ¹⁶Nàng, ge ri nghû myit yu é hkyô lé, agè ashop é đông hkâtaî pyám

nhâng. ¹⁷Hkâsu mù gâ le, Garai Gasang é mingdán gi, zo zo shuq shuq hkyô a nghut é za, dingmán hkyô, nguingón hkyô eq Chyoiyúng Woi-nyí má gabú é hkyô ru nghut lhê. ¹⁸Haî mù gâ le, shí hkyô đông mai Hkrisduq lé dojaú é sù gi, Garai Gasang ô nau é sù eq byu pè èq hkyá-ôn é hui sù nghut ri.

¹⁹Haû mù luî, nguingón hkyô má nyi râ eq, rayuq eq rayuq wum byí lhum râ hkyô lé, shikut nyi keq. ²⁰Zoshuq é yanmai, Garai Gasang é muzó lé hkâlhoq hten pyám. Zoshuq lhunglhang gi, sansêng é chyat nghut lhê; nghut kôlhang, góyuq lé myit leqbat nhang é jung lé zô é sù gi, shut é nghut lhê. ²¹Tsibiyiq wing shuq é eq sho zô é hkyô má nghut kôlhang, gotû haî jung kut é nghut kôlhang, náng é gumang hpó lé myit leqbat nhang é nghut le gi, a kut le je ge lhê.

²²Haû mù, haú pé eq séng luî, nàng lumjínng é haî nghut kôle, nàng eq Garai Gasang gyoro má za joq nyi sháng gaq. Yhumsing ge lhê gâ é èq, yhumsing gùng yhumsing mara byi jang a joq é sù gi, hkungsô wó nyi ri. ²³Nghut kôlhang, úng-âng é myit èq zô é nghut le gi, mara byí é hui ri, haî mù gâ le, yhang zô é gi, lumjínng myit mai a nghut; lumjínng myit mai a kut é haî nghut kôlhang, mara nghut ri.

15

Góyuq Lé Myit Ngón Nhâng Râ Hkyô

¹Lumjínng hkyô má wum-o bo é nga-nhúng gi, yhumsing myit ngón râ hkyô lé a ho é za, wum-o a bò bâng é wum nyhóm hkyô lé, hkam jan byí nyi râ dut lhê.

²Nga-nhúng yuq hkanmó gi, yhumsing é chyangnâm mâ é su é ge é hkyô dut râ matú, yhang wó kô myhang lò shoq, yhang lé lhoq ngón byí nyi sháng. ³Hkâsu mù gâ le, Hkrisduq lhang gi, Yhânggùng yhang lhoq ngón é a nghut; haû gi, "Nang lé rhoi bâng é dang gi, Ngá chyáng gyó ke bê nghut ri."[☆] ga, kâ tô é eq rajung za nghut ri. ⁴Hkâsu mù gâ le, laî lò bê hkûn kâ tô é lhunglhang gi, nga-nhúng lé mhoq byi râ matú chyat kâ tô é nghut lhê; haû gi, Chyúmdang mâ é hkam jan hkyô eq myit wum byi hkyô đông mai, nga-nhúng myit myoqbyù hkyô wó râ matú nghut lhê.

[☆] 14:11 Esai 45:23 [☆] 15:3 Hkya-on 69:9

⁵ Haû hkam jan hkyô eq myit wum byi hkyô lé byî é Garai Gasang gi, nungmoq, Hkrisduq Yesuq é htâng châng nyi é u lé, nungmoq yhangchang rading ralhum za dut é woi-nyí byi sháng gaq; ⁶ haû jáng sheq, nungmoq gi, i-myt rahkat eq nhut htê ralhum èq za, nga-nhông é Yhum-sing Yesuq Hkrisduq é Yhângwa nghut Sû, Garai Gasang lé, wó hkyá-on kungtôn kó rá nghut lhê.

⁷ Haû mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shing kang lé lhoq htoq shit rá matú, nungmoq le, rayuq eq rayuq hap yu lhum keq. ⁸ Hkâsu mù gâ le, ngò, nungmoq lé taí kôlé, haû mying hú é íchýí îwâ pé lé byî tô é danggidíq pé lé lhoq ging rá matú, Hkrisduq gi, Garai Gasâng é tengmán hkyo é malaí, Yudaq byu pé é dui-nhâng zoshâng dut bê nghut ri. ⁹ Haû mù, Garai Gasâng é shogyo nhikmyin hkyo é yanmai, haû tûngbaù pé, Garai Gasang lé wó hkyá-on kungtôn kó rá nghut lhê. Haú hkyô gi, "Haû mù luí, tûngbaù pè chyáng má, Nang

lé, ngò hkyá-on rá nghut lhê;

Náng é mying lé, ngò hkyá-on mahkôn rá nghut lhê."✠

ga kâ tô é eq rajung za nghut ri. ¹⁰ Dum, "Tûngbaù pé ê, Yhâng é byu pé eq rahá gabú nyi keq."✠
gâ tô ri. ¹¹ Dum,

"Nungmoq tûngbaù pé lhunglhâng bang ê, haû Yhumsing lé hkyá-on keq, byù myû lhunglhâng bang ê, Yhang lé hkyá-on mahkôn hkôn keq."✠

gâ tô ashí nghut ri. ¹² Hau htoq agó, Esai-aq taí é gi,

"Yese é Amyit gi, yuq htoq lô luí, Yhang gi, byù myû chângjup é ahtoq má up rá sú nghut lhê;

tûngbaù pé gi, Yhang má myit myoqbyù kó rá nghut lhê."✠

gâ ri.

¹³ Haû myit myoqbyù hkyô byî é Garai Gasang gi, Yhang lé lumhkau nyi é bang nungmoq lé, gabú hkyô banshoq eq ngu-ingón hkyô lhoq pyíng byi sháng gaq; haû jáng sheq, nungmoq gi, Chyoiyúng Woi-nyí é wum-o a-tsâm èq, myit myoqbyù hkyô wó byíng mui nyi kó rá nghut lhê.

A Gyuq A Wam É Za, Poluq Laiká Kâ É Hkyô

¹⁴ Ngá é gumang wui ê, nungmoq gi, ge é hkyô byíng jup é bang, hpaqchyí má gumjup é bang, rayuq eq rayuq mhoqshit lhûm é má kûng é bang nghut é lé, ngá gûng ngò yhang hkyak lumjúng lhê. ¹⁵ Ngò gi, nungmoq lé dum lhoq pûn é dông, ahkyak é pé ra-am lé a gyuq a wàm kâ kat bê nghut lhê. ¹⁶ Hkâsu mù gâ le, tûngbaù pé gi, Chyoiyúng Woi-nyí dông mai lhoq sân-yúng é hui luí, Garai Gasâng èq hap yù gíng é hkungga wó dut kó sháng gaq ga, Garai Gasâng é gabú danglù lé hkô rá hkyangjong é wò dông, tûngbaù pè chyáng, Hkrisduq Yesuq é hpungmû wùn sú dut rá matú, Garai Gasang, ngo lé jeju byî é yanmai nghut lhê.

¹⁷ Haû mù luí, ngò gi, Garai Gasang lé dojaú é hkyô eq séng luí, Hkrisduq Yesuq má nghutbûn nyi lhê. ¹⁸ Ngò gi, ngò taí é eq zui saí é muzó dông le, haû Woi-nyí é a-tsam chûng mù, kumlhá pé eq laklaí kumlhá pé dông le, tûngbaù pé lé, Garai Gasâng é jino gyo shoq shuí ú é má, ngo lé Hkrisduq nhang é muzó hkyô lé taí é mai lai luí, gotû hái lé le wám taí é a nghut.

¹⁹ Haû mù luí, ngò gi, Yerusalem wà mó mai Ilurikhkam mau jé shoq é hkyô awui ayàm jàm shoq, Hkrisduq é gabú danglù lé hko kyo bê nghut lhê. ²⁰ Ngò hkâ-nhám le myit tuí nyi é hkyô gi, góyuq hi tô é apûn awang má dum a puq saí pyâm é za, Hkrisduq lé a sé shi é jowò má gabú danglù hko kyo rá hkyô nghut lhê. ²¹ Haû gi,

"Yhâng é hkyô lé, taí kyô é a hui shí é bang, myàng kó rá nghut luí, a wó gyô wú é bang, sê gyo kó rá nghut lhê."✠

ga kâ tô é eq rajung za nghut ri. ²² Haû mù luí, ngò, nungmoq chyáng lé jé rá lé, anum num hkyikyo luqlhum dut nyi é gi, muzó hau é yanmai nghut lhê.

Romaq Myuq Lé Ló Kum Râ Sôn É Hkyô

²³ Nghut kôlhang, ahkuí gi, shí mau pé má ngò zui saí rá jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za, ²⁴ ngò, Sipin ming shut ló é hkûn, nungmoq chyáng wàng rá sôn tô lhê. Ngò gi, lai ló é hkûn, nungmoq lé lò sô kum mù, nungmoq eq

rayoq zo zùm yap ngón é htâng má sheq, ngá é hkyowui matú, nungmoq haú mai htuqbang kat râ lé, ngò myoqbyu tô lhê.²⁵ Ahkuí, ngò kúm gi, Yerusalem wà mó mâ é sân-yúng bang lé dojaú râ matú, haú wâ shut e ló é hkyolat má nghut nyi lhê.²⁶ Hkâsu mù gâ le, Makedoni eq Ahkaia mau mâ é bang gi, Yerusalem wà mó mâ é sân-yúng bâng chyáng mâ é myùng bâng é matú, garúm chyunghuq hkyui tsing nau bùm bekô nghut ri.²⁷ Yhangmoq gi, haú su kut nau bùm bekô nghut ri, gè gè ga jáng, haú gi, yhangmoq chyîn dap tô é đông ru nghut lhê. Hkâsu mù gâ le, haú Yudaq byu pê é woi-nyí eq sêng é shimân jeju lé, tûngbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chùng râ chyîn dap tô é đông nghut lhê.²⁸ Haú mù luí, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htâng má, Sipin ming shut ló râ nghut mù, láí ló uchyang, nungmoq chyáng lé sô kum râ nghut lhê.²⁹ Ngò gi, nungmoq chyáng lé jé é hkûn, nungmoq é matú Hkrisduq é shimân jeju byíng jup é èq jé lé râ nghut é lé, ngò sê lhê.

³⁰ Gumang wuì ê, ngá é matú Garai Gasâng chyáng kyûdung byí é đông, ngò wum kat yhang shikut é hkyô má nungmoq bo wàng lòm râ matú, nga-nhùng é Yhumsîng Yesuq Hkrisduq eq Woi-nyí é chyitdap myit é yanmai, ngò, nungmoq lé wum tât tsuq kat lhê.³¹ Yuda mau mâ é a lumjîng bâng chyáng mai, ngò hkyi yu é wó hui luí, Yerusalem wà mó má ngò wùn waq é muzó lé, haú mâ é sân-yúng bang hap yù gíng é wó dut râ matú kyû bo dung byi keq.³² Haú jáng sheq, ngò gi, Garai Gasang ô nau é đông mai, gabú myit èq nungmoq chyáng wó jé lé mù, nungmoq eq rahá wum-o wó yú râ nghut lhê.³³ Haú ngingón hkyo é Garai Gasang gi, nungmoq banshoq bang eq rahá rû nyi nyi sháng gaq ô. Amen.

16

Shi-kyám Dang

¹ Ngò gi, Kenhkrea noqkuq hpúng mâ é hpungtê, nga-nhùng é gu-nhá Hpobe lé, nungmoq chyáng shichyen byí kat lhê.² Nungmoq gi, sân-yúng bang kut gíng é eq rajung za, haú Yhumsîng má yhang lé hap

yù luí, yhang râ tô é hkyô haí nghut kôle, yhang lé htuqbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.

³ Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq.⁴ Yhangnhik gi, ngá é asak é matú, yhangnhik é asak sum râ í yhang dut wú kô é nghut mù, ngò za a nghut, tûngbaù pê é noqkuq hpúng pé banshoq le, yhangnhik lé jeju bûn lhê.

⁵ Yhangnhik é yhùm má chôm hui zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjîng wang lo é, ngò chyitdap é Epanetu lé bo shi-kyám byi keq.

⁶ Nungmoq é matú gyai yhang shikut wú bê sù nghut é Mariq lé bo shi-kyám byi keq.

⁷ Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shí le nyi bê sù nhik nghut akô.

⁸ Haú Yhumsîng má, ngò chyitdap é sù, Ampliatu lé bo shi-kyám byi keq.

⁹ Hkrisduq má, ngamoq é mù zui luzúm nghut é Orban eq ngá é chyitdap luzúm Staku lé, bo shi-kyám byi keq.

¹⁰ Hkrisduq má chyam é hui mù, wó lûm bê sù, Apele lé bo shi-kyám byi keq.

Aristobulu eq sêng é yhumbyù wuì lé bo shi-kyám byi keq.

¹¹ Ngá é buinùm Herudion lé bo shi-kyám byi keq.

Haú Yhumsîng má nghut nyi bê bang, Narkiso é yhumbyù wuì lé bo shi-kyám byi keq.

¹² Haú Yhumsîng má mù zui shikut é myiwê nhik, Truhpena eq Truhposa lé bo shi-kyám byi keq.

Haú Yhumsîng má mù zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

¹³ Haú Yhumsîng má hkyin yu é hui bê sù, Ruhpu lé le, ngá nu đông nghut wú bê nghut é Ruhpû é yhângnu lé le, bo shi-kyám byi keq.

¹⁴ Asunkritu, Hpelegon, Herme, Patroba, Herma eq yhangmoq eq rahá nyi é gumang wuì lé, bo shi-kyám byi keq.

¹⁵ Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

¹⁶ Rayuq eq rayuq, chyoiyúng bopuq é eq shi-kyâm lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

¹⁷ Gumang wui ê, nungmoq é lumjúng hkyô má, nungmoq mhoq hkam yù bê nghut é mhoqshit hkyô eq shai lhúm é, gam hkoq hkyô pé eq myit leqbat hkyô pé lhoq htoq é bang lé sidiq keq nghû, wum taî tsuq kat lhê. Yhangmoq lé koi pyám keq. ¹⁸ Hkâsu mù gâ le, haû sù é bang gi, nga-nhông é Yhumsîng Hkrisduq lé dojaú é bang a nghut é za, yhumsing é wamdaû matú dojaú é bang nghut akô. Yhangmoq gi, myit nú-nhâm é bang lé, dang ngón dang nguî dông mhaú zô akô nghut ri.

¹⁹ Nungmoq, jìno gyo kô é hkyô lé, yuq hkmómó wó gyo bê nghut ri; haû mù, ngò gi, nungmoq é matú gyai yhang gabú nyi lhê; nghut kôlhang, ge é hkyô eq séng luî gi, nungmoq hpaqchyî bò mù, agè ashop hkyô eq séng luî gi, nungmoq a bo lòm râ lé, ngò ô nau ri.

²⁰ Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhông é Yhumsîng Yesuq é jeju gi, nungmoq eq rahá nghut nyî sháng gaq ô.

²¹ Ngá é mù zui luzúm Timohti gi, nungmoq lé shi-kyám dang sang kat ri; haû eq rajung za, ngá é buinùm wui Luki, Yason eq Sosipata pé le, shi-kyám dang sang kat akô nghut ri.

²² Laiká shî lé bo ká sù ngò Tertiu gi, haû Yhumsîng má nungmoq lé shi-kyám kat lhê.

²³ Ngo lé le, noqkuq hpúng gón lé le, bíng hkulum é sù Ge-u gi, nungmoq lé shi-kyám dang sang kat ri.

Haû wa mâ é ngùnzui sù Erastu eq nga-nhông é gumang hpó Kuartu gi, nungmoq lé shi-kyám dang sang kat akô. ²⁴ Nga-nhông é Yhumsîng Yesuq Hkrisduq é jeju gi, nungmoq lhunglhâng bang eq rahá nghut nyî sháng gaq. Amen.*

²⁵ Byù myû chângjup bang lumjúng luî, Yhang é jìno gyo sháng gaq ga, a-nham pyat mai haq tô é hui kôlhang, ²⁶ ahkuî, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wui é hkyo é shing-rán má cháng luî, ngá é gabú danglù eq Yesuq Hkrisduq é hkyô taî pyo é dông, nungmoq lé wó lhoq ging tíng byî é, ²⁷ rayuq za é hpaqchyî bo sù Garai Gasâng chyáng, Yesuq Hkrisduq dông mai, hpungwup shingkang gi, ahtum abyuq ru joq nyî sháng gaq ô! Amen.

* 16:24 Chyúmding ra-am má chyúbun 24 shî a bo é nghut lhê.

KORINHTUQ
Pê Chyáng Hî Dàm Hun Kat é
Laiká
(1 Corinthians)

¹ Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi, ² jowò hkangmó má nga-nhông é Yhumsing Yesuq Hkrisduq é mying lé lãng é bang eq rahá, chyoiyung bang dut râ matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq má é, Garai Gasang é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsing nghut lhê.

³ Nga-nhông é Îwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyí sháng gaq ô.

Hkrisduq É Yanmai Wó É Jeju

⁴ Garai Gasang jeju lé Hkrisduq Yesuq đông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê. ⁵ Hkâsu mù gâ le, nungmoq gi, Hkrisduq đông mai, nungmoq dang taí é hkyô banshoq eq nungmoq é sumsé hpaqchyí banshoq má je lhoq gumjup é hui bekô nghut ri. ⁶ Haú gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê. ⁷ Haú mù, nga-nhông é Yhumsing Yesuq Hkrisduq dum htoq shit râ lé, nungmoq gyai myoqbyu lãng nyi é u má, nungmoq gi, woi-nyí hkyô eq séng é chyunghuq haí lé le langhpyut kó râ a nghut. ⁸ Nga-nhông é Yhumsing Yesuq Hkrisduq é buinyí má, nungmoq lé mara hún râ hkyô a bò shoq, Hkrisduq gi, nungmoq lé, htáng shoq gíngtíng nhang nyi râ nghut lhê. ⁹ Nga-nhông é Yhumsing nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

Noqkuq Hpúng Má Gam Hkoq Lhùm É Hkyô

¹⁰ Gumang wui ê, nungmoq hkaú má gam hkoq lhùm é hkyô pé a joq é za, nungmoq

é myit eq myit sôn wú é hkyô má gumjup shoq rading ralhùm za dut nyi sháng gaq, nungmoq lhunglhang bang rayuq eq rayuq byin hpyé gohut huí nyi keq nghú, ngò, nungmoq lé, nga-nhông é Yhumsing Yesuq Hkrisduq é mying mai dũng tôngbán kat lhê. ¹¹ Ngá é gumang wui ê, Hkloe é yhùm byù wui gi, nungmoq hkaú má mabyoq htoq hkyô joq é lé, ngo lé hkyáng lo shit akô. ¹² Ngò haú su nghú taí é gi, nungmoq má é rayuq yuq gi, "Ngò gi, Poluq htàng châng lhê." ga, góyuq gi, "Ngò gi, Apolo htàng châng lhê." ga, dum rayuq gi, "Ngò gi, Kehpa htàng châng lhê." ga, dum góyuq gi, "Ngò gi, Hkrisduq htàng châng lhê." ga, taí bùm kô é yanmai nghut lhê.

¹³ Hkrisduq gi, gam hkoq é hui bê lhú? Ngò Poluq gi, nungmoq é matú tapzĩng má jén sat é hui bê lhú? Nungmoq gi, ngá é mying mai wui-myhup hkâm yù kô é lhú?

¹⁴ Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkám byí wú é yanmai, ¹⁵ nungmoq ó yuq le, ngá é mying mai wui-myhup hkâm yù bê nghú a wó taí é nghut mù, ngò, Garai lé jeju hkya-ôn lhê. ¹⁶ (Stehpana é yhumbyù wui lé le, ngò wui-myhup hkám byí é nghut lhê, haú mai lai luí gotú ó lé hkám byí záng ashí laq, ngò a myit bun lo nghut ri.) ¹⁷ Hkâsu mù gâ le, Hkrisduq, ngo lé nhang kat é gi, wui-myhup hkám byi râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxang zô wui é hpaqchyí byéng-yá dang đông hko kyô é a nghut mù, Hkrisduq é tapzĩng é a-tsam gi, akôm a dut byuq é nghut lhê.

Garai É A-tsam Eq Hpaqchyí Byéng-yá Gi, Hkrisduq

¹⁸ Hkâsu mù gâ le, tapzĩng má Yesuq shí hkâm é hkyô eq séng é danglù gi, htên byoq hui râ bãng é matú, danggang dut byuq ri; nghut kôlhang, hkyi yu é huí nyi bang nga-nhông é matú gi, Garai Gasang é a-tsam nghut ri. ¹⁹ Hkâsu mù gâ le, Chyúmdang má kâ tô é gi,

"Hpaqchyí bò bãng é hpaqchyí byéng-yá lé, Ngò lhoq htên pyám râ nghut lhê; nyan bò bãng é nyan lé, Ngò, ajè dut pyám nhâng râ nghut lhê." ✧

ga ri.

²⁰ Hpaqchyî byéng-yá bò bang gi, hkâmá lhú? Hpaqchyî laiká kung bang gi, hkâmá lhú? Ipyat shi é dang taí kung bang gi, hkâmá lhú? Garai Gasang gi, mingkân é hpaqchyî byéng-yá lé lhoq ngok pyám bê a nghut lhú? ²¹ Hkâsu mù gâ le, Garai Gasâng é hpaqchyî byéng-yá mai ga jang, mingkan zo wui gi, yhumsing é hpaqchyî byéng-yá dông mai Garai Gasang lé a wó sé kô é yanmai, danggang gâ pyám byi kô é mungdang lé hko kyô é dông lumjîng bang lé hkyi yù râ matú, Garai Gasang myit hpyit é nghut lhê. ²² Yudaq byu pé gi, limik kumlhá pé lé dúng akô; Grik byu pé gi, hpaqchyî byéng-yá lé ho akô nghut ri. ²³ Nghut kôlhang, ngamoq gi, tapzîng má jén sat huí é Hkrisduq é hkyô lé hko kyô lhê. Haú gi, Yudaq byu pè é matú myit leqbat jowò eq tûngbaù pè é matú danggang dut byuq ri. ²⁴ Nghut kôlhang, Garai Gasâng èq ji yù huí é Yudaq byu pé eq Grik byu pè é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá nghut ri. ²⁵ Hkâsu mù gâ le, Garai Gasâng é ngok hkyô gâ é lháng gi, byu é hpaqchyî byéng-yá htoq má je gyaú ri; Garai Gasâng é wum nyhóm hkyô gâ é lháng gi, byu é wum-o htoq má je gyaú ri.

²⁶ Gumang wui ê, Garai Gasang, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng dông hpaqchyî byéng-yá bo é bang, ahkáng ayá wó é bang, zaugun suwún amyû má é bang a myô é nghut lhê. ²⁷ Nghut kôlhang, Garai Gasang gi, hpaqchyî byéng-yá bò bang lé hoq lhoq hpu râ matú, mingkan má é ngok bang gâ é lé hkyin yu é nghut lhê; Garai Gasang gi, wum bò bang lé hoq lhoq hpu râ matú, mingkan má é wum nyhóm bang gâ é lé hkyin yu é nghut lhê. ²⁸ Yhang gi, mingkân èq ahkyak tô é lé lhoq htên pyám râ matú, haí a nghut é lé le, mingkan má é aróng a bo é eq wú tiq pyám huí é lé le, hkyin yu é nghut lhê. ²⁹ Haú gi, ó yuq le, Yhâng é hí má a ge nghutbun râ matú nghut ri. ³⁰ Garai Gasâng é yanmai, nungmoq gi, Hkrisduq Yesuq má nghut nyi bekô nghut ri; Hkrisduq gi, nga-nhông é matú, Garai Gasâng chyáng má é hpaqchyî byéng-yá dut bê nghut ri. Haú gi, nga-nhông é dîngmán hkyô, chyoiyúng

hkyô eq hkyi yù hkyô nghut ri. ³¹ Haú mù luí, "Gumrong é sù gi, haú Yhumsîng má gumrông sháng gaq." ✨ ga kâ tô é eq rajung za nghut ri.

2

Woi-nyí Mai Lo É Garai Gasâng É Hpaqchyî Byéng-yá

¹ Gumang wui ê, ngò gi, Garai Gasang eq sêng é saksé hkyô lé nungmoq chyáng taí pyô râ matú jé lé é hkûn, dang taí kung é eq hpaqchyî byéng-yá mó bo é dông lé é a nghut. ² Hkâsu mù gâ le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkangmó lé tô-myhí pyám râ nghú myit hpyit yù bê nghut lhê. ³ Ngò gi, nungmoq chyáng jé lé é hkûn, wum nyhôm é eq gyai yhang gyuq nán é nghut lhê. ⁴ Ngá é danglù eq ngò hko kyô é hkyô gi, hpaqchyî bo é eq mhuí yu é dang pé dông a nghut é za, Woi-nyí é a-tsâm èq nungmoq lé shit é dông ru nghut mù, ⁵ nungmoq é lumjîng myit gi, byu é hpaqchyî byéng-yá má a nghut é za, Garai Gasâng é hpungwup a-tsam má nghut nyi lhê.

⁶ Nghut kôlhang, ngamoq gi, myit dîng bê bang lé hpaqchyî byéng-yá dông nyo lhê; shí pyat lhê é hpaqchyî byéng-yá eq htên byoq nyi huí é shí pyat má é zaú wui é hpaqchyî byéng-yá dông kúm a nghut. ⁷ Ngamoq taí é gi, haq tô é eq, ahkyíng nghu é lháng a joq shi mai nga-nhông é hpungwup shingkâng é matú Garai Gasang tô to byi é hpaqchyî byéng-yá nghut é, Garai Gasâng é zaú tô é hpaqchyî byéng-yá lé taí é ru nghut lhê. ⁸ Shí pyat lhê é zau wui gi, hpaqchyî byéng-yá haú lé rayuq lháng a sê gyo kó nghut ri; yhangmoq sê gyo kô é ru nghut le gi, hpungwup shingkang bo é Yhumsîng lé tapzîng má jén sat pyám kó râ a nghut. ⁹ Nghut kôlhang, Chyúmdang má, "Ó yuq èq le a myang wú, ó yuq èq le a wó gyô wú, ó yuq èq le a bûn myit wú é hkyô lé, Garai Gasang gi, Yhang lé chyitdap bâng é matú lajang to byi bê nghut ri." ✨

ga kâ tô é eq rajung za nghut ri. ¹⁰ Nghut kôlhang, Garai Gasang gi, haú hkyô lé, Yhâng é Woi-nyí dông nga-nhông lé hpông shit bê nghut ri.

Woi-nyí haù gi, jung hkanmó lé ho gôn wú é nghut luí, Garai Gasâng é zaú tô é hkyô lé lhang ho gôn wú é sù nghut ri. ¹¹ Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lhú? Haù eq rajung za, Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut. ¹² Nga-nhung gi, mingkân é woi-nyí lé hap yu tô é a nghut é za, Garai Gasâng eq nga-nhung lé byí to bê jeju lé, ngamoq wó sê gyo râ matú, Garai Gasâng chyáng mâ é Woi-nyí lé sheq hap yu tô é ru nghut lhê. ¹³ Haù mù luí, ngamoq gi, waxâng zô wui é hpaqchyí byéng-yá eq mhoq byí é dang đông taí é a nghut, Garaí é Woi-nyí eq mhoq byí é dang đông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang đông taí sân kyô é nghut lhê. ¹⁴ Haù Woi-nyí lé a wó é sù gi, Garai Gasâng é Woi-nyí mai lo é hkyô pé lé a hap yu é nghut lhê; haù mù gâ le, haù pé gi, yhang é matú ngok é hkyô nghut luí, woi-nyí hkyô đông mai haù hkyô lé a wú é yanmai, yhang gi, haù pé lé a wó sê gyo nghut ri. ¹⁵ Woi-nyí eq sêng é byù gi, lhunglhang lé wó jéyáng lhê, nghut kôlhang, yhang lé kúm gi, ó yuq eq le wó jéyáng é a nghut. ¹⁶ Chyúmdang má,

"Hkâsu mù gâ le, ó yuq wá, haù Yhumsing é myit lé sé mù, Yhang lé wó mho-qshit wú é lhú?" ✧

ga kê tô ri. Nghut kôlhang, nga-nhung gi, Hkrisduq é myit lé wó é bang nghut lhê.

3

Noqkuq Hpúng Má Gam Hkoq Lhâm É Hkyô

¹ Gumang wui ê, hí hkûn, ngò gi, nungmoq lé, Woi-nyí eq sêng é bang lé đông wó taí é a nghut; mingkan eq sêng é bang đông nghut kômù, Hkrisduq má zonú su dut bang lé đông sheq taí wú é nghut lhê.

² Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naú byi huq é nghut lhê.* Ahkuí lhang, nungmoq gi, zoshuq apat lé a wó zo shi kó nghut ri. ³ Nungmoq gi, mingkan eq sêng é bang ru nghut nyi ashí kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é

yanmai, nungmoq gi, mingkan eq sêng é bang nghut lhê a nghut kó luq? Mingkan zo wui su nyi yap bum lhê a nghut kó luq? ⁴ Rayuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga taí nyi bum kô é nghut jáng, nungmoq gi, mingkan zo wui nghut nyi bum lhê a nghut kó luq?

⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garaí é dui-nhâng zoshâng za nghut luí, ó le ó lé, haù Yhumsing eq hun tô é muzó eq rajung za wùn waq é nghut luí, nungmoq gi, ngá-nhik đông mai wó lumjáng kô é ru nghut lhê. ⁶ Ngò gi, gabú danglù amyui lé hô kat, Apolo gi, wui hpyun byi, nghut kôlhang, yuq kô lò nhang é gi, Garai Gasang za ru nghut lhê. ⁷ Haù mù, amyui hô kat sù eq wui hpyun byi sù gi, ahkyak mó a nghut, yuq kô lò nhang é Garai Gasang za sheq ahkyak ru nghut lhê. ⁸ Amyui hô kat sù eq wui hpyun byi su nhik myoqbyu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ô é shigyaú chyunghuq wó yú kó râ nghut lhê. ⁹ Hkâsu mù gâ le, ngamoq gi, Garai Gasâng é mù zui luzúm wui nghut lhê; nungmoq gi, Garai Gasâng é yò, Garai Gasâng é yhâm nghut nyi akò.

¹⁰ Garaí Gasang, ngo lé byí to bê jeju eq rajung za, yhâm saí kung sù rayuq đông, ngò gi, yhâm apùn awang hi to bê nghut lhê; gotú byù gi, hau é ahtoq má saí toq jat nyi é nghut lhê. Nghut kôlhang, yuq hkanmó gi, yhumsing saí é má rago sidiq râ lhê. ¹¹ Hkâsu mù gâ le, hi to gù nghut é, Yesuq Hkrisduq ngu é yhâm apùn awang mai lai luí, ó yuq le, gotú yhâm apùn awang lé wó saí é a nghut. ¹² Yhâm apùn awang hau é ahtoq má, hîng, ngùn, hpaudap luq-gok pé, sik, mhan, hkowá pé lé chùng mù saí jat kô é nghut jáng, ¹³ yuq hkanmó é muzó hkâsu nghut é hkyô lé lhoq htoq shit é hui râ nghut lhê. Haù mù luí gâ le, haù Yesuq é Buinyí gi, haù lé byu-myàng nhâng mù, haù buinyí lé gi, myí eq lhoq htoq shit râ nghut lhê. Haù myi gi, yuq hkanmó saí é muzó hkasú é nghut é lé chýâm râ nghut lhê. ¹⁴ Rayuq yuq saí é yhâm gi, ru gîng nyi é nghut jáng, haù yuq gi, yhang é shigyaú chyunghuq wó yú râ nghut lhê. ¹⁵ Nghut

✧ 2:16 Esai 40:13

* 3:2 Nungmoq lé naú byi huq é, gâ é gi, lui é hkyô pé lé hí mhoq byí é lé gâ lhê.

kôlhang, yhûm haû nyé gyó byuq é nghut jáng, yhang gi, yhûm sûm byuq é hui zo râ nghut lhê; yhang gi, asak lut kôlhang, myishâm mai wó lut é byù su dut râ nghut lhê.

¹⁶ Nungmoq gi, Garai Gasâng é noqkuq yhûm nghut luî, Garai Gasâng é Woi-nyí gi, nungmoq má lúng nyî bê hkyô lé a sé kó lú? ¹⁷ Rayuq yuq, Garai Gasâng é noqkuq yhûm lé lhoq htên é nghut jáng, Garai Gasang gi, haû yuq lé lhoq htên pyám râ nghut lhê. Hkâsu mù gà le, Garai Gasâng é noqkuq yhûm gi, chyoiyúng lhê; nungmoq gi, noqkuq yhûm haû nghut akô.

¹⁸ Nungmoq gi, yhumsing gùng yhum-sing hkâlhoq nghoq kó. Nungmoq mâ é rayuq yuq, shí ipyat mâ é byù nyi a-tsáng dông hpaqchyî byéng-yá bò sù ga myit é nghut jáng, hpaqchyî byéng-yá akying bò sù wó dut sháng gaq, yhang gi, a-ngok sù dut râ lhê. ¹⁹ Hkâsu mù gà le, mingkan shí mâ é hpaqchyî byéng-yá gi, Garai Gasâng é hí má ngok é hkyô nghut ri. Haû gi, "Garai Gasang gi, hpaqchyî byéng-yá bò bang lé, yhangmoq é hpaqchyî má yhang myí to nhang ri." ✧ ga kâ tô é eq rajung za nghut ri. ²⁰ Hau htoq agó, "Haû Yhumsing gi, hpaqchyî byéng-yá bò bang myit é hkyô pé akôm nghut é lé sê lhê." ✧ ga le kâ tô ri. ²¹ Haû mù luî, ó yuq le, byù eq sêng é hkyô má gyáng é dang a táí kó sháng gaq! Lhunglhang gi, nungmoq é chyat nghut lhê. ²² Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htângnùng mâ é hkyô le, banshoq gi, nungmoq é chyat nghut ri. ²³ Nungmoq gi, Hkrisduq é nghut akô; Hkrisduq gi, Garai Gasâng é nghut ri.

4

Hkrisduq É Lagyô Pé

¹ Haû mù luî, byu pé gi, ngamoq lé, Hkrisduq é dui-nhâng zoshâng wui dông eq Garai Gasâng é zaú tô é hkyô pé lé táí pyô râ matú ap byî tô é hui bang dông sôn yù râ lhê. ² Haú dông nghut jáng, ap byî tô é hui bang gi, yhumsing lhumzui hkyô lé saksé shit râ dut lhê. ³ Nungmoq eq nghut nghut, waxâng zô wui é tarâ rùng mai nghut nghut, ngo lé jéyáng kô le, ngá é matú atiq azo za nghut lhê; gè gè ga jáng,

ngá gùng ngò lhang a jéyáng é nghut lhê. ⁴ Haû mù gà le, ngá gùng ngò mara a bò bûn é nghut kôlhang, haû gi, ngo lé wó lhoq sôn-yúng byî é a nghut. Ngo lé jéyáng é sù gi, haû Yhumsing nghut lhê. ⁵ Haû mù, masat tô é ahkying a jé shimá haû lé le a jéyáng é za, haû Yhumsing jé lé shoq, láng nyî keq. Yhang gi, mauchut hkaû má haq tô é pé lé byu-myàng nhâng mù, byu pé é myit nhikhum má lúng é hkyô lé lhoq htoq shit râ nghut lhê. Haú hkûn, yuq hkangmó gi, ó le ó wó gíng é hkya-ôn hkyô lé, Garai Gasâng chyáng mai wó yù râ nghut lhê.

⁶ Gumang wui ê, ngò gi, "Kâ tô é gû mai hkâlai." gà é sanghkyâng é lichyúm lé, ngamoq chyáng mai nungmoq wó mhoq yù sháng gaq nghû, nungmoq é akyu é matú, ngò eq Apolo má haú pé lé yù mù dangtú kut é nghut lhê. Haú hkûn, nungmoq gi, nghutbûn é dông, rayuq lé gi, wú ko, góyuq lé gi, wú shóm, a kut kó râ nghut lhê. ⁷ Ó yuq wá, nang lé, góyuq eq shaí shoq kut lhê lú? Nang hap yu é a nghut le gi, wó râ lú? Nang, hap yu é nghut le gi, a hap yu é dông haû mù nghutbûn nyi lhê lú?

⁸ Nungmoq gi, râ é lhunglhang gumjup bang nghut bekô nhung! Nungmoq gi, wó bang dut gù nghut bekô nhung! Ngamoq a lom é za, nungmoq gi, hkohkam pé dut bekô nhung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, ngò hkâ-í yhang ô nau nyi lhê ô! ⁹ Nghut kôlhang, sat râ matú doqdan huí é shúm byû pé lé su, Garai Gasang gi, lagyô pé nghut é ngamoq lé de de kut htoq shit bê nghû, ngò wó myit ri. Ngamoq gi, nyi mi-nyì, joq mijoq, maumang lagyô pé eq waxâng zô wui é hí má, wú kûn jung dông dut nhang é huí nyi gù bê nghut lhê. ¹⁰ Ngamoq gi, Hkrisduq é yanmai ngok é bang dông sôn yu é hui kôlhang, nungmoq kúm gi, Hkrisduq má hpaqchyî gyaí bo é bang dông dut bekô nhung! Ngamoq gi, wum nyhôm é bang dông sôn yu é hui kôlhang, nungmoq kúm gi, wúm bo é bang dông dut bekô nhung! Nungmoq gi, hkunggâ é huí akô; ngamoq kúm gi, hkunggâ é a hui nhung! ¹¹ Shí hkying shí u jé shoq, ngamoq gi, zòmut wuìshit huí

é, mebu ajeq amyhâ dut huí é, nhuq bat huí é, yhumsing é nyí jowò a wó é bang nghut nyi lhê. ¹²Ngamoq gi, yhumsing loq èq yhang mù zui wum kat nyi lhê. Ngamoq gi, nhing pyâm é hui jáng, shimân byi, zing-rî é hui jáng, jân pyâm kut lhê. ¹³Ngamoq gi, lumù gansang é hui jáng, dang ngón dang nguí tû nyo lhê. Ngamoq gi, ahkuí jé shoq, myidàm htoq mâ é hpoqkyuq hpoqpyâng eq mingkân é buzaq pé dông sôn yu é huí nyi lhê.

¹⁴Ngò gi, nungmoq lé hoq lhoq hpu râ matú haú pé lé kê é a nghut, ngá é chyitdap zo wuí lé dông lhoq pûn kying râ matú ru nghut lhê. ¹⁵Nungmoq gi, Hkrisduq má mhoqshit bang ra mun wó kê é nghut kôlhang, îwâ pé myo shoq wó kê é a nghut; hkâsu mù gâ lé, ngò gi, haú gabú danglù dông mai, Hkrisduq Yesuq má nungmoq é îwa dut é nghut lhê. ¹⁶Haú mù luí, ngò kut é su cháng keq nghû, ngò, nungmoq lé lung kat lhê. ¹⁷Hau é yanmai, ngò gi, haú Yhumsing má lhumzui sù nghut é, ngò chyitdap é ngá zo dông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq mâ é ngá é asak duí hkyô lé, jowò hkangmó mâ é noqkuq hpúng hkangmó lé ngò mhoq byí é eq rajung za, nungmoq lé lhoq pun byi râ nghut lhê.

¹⁸Nungmoq mâ é ra-am gi, nungmoq chyáng ngò a dum jé lé râ su ngam pyâm kômù, nghutbûn byuq bekô nghut ri. ¹⁹Nghut kôlhang, haú Yhumsing gyô é nghut jáng, ngò gi, nungmoq chyáng hân za jé lé râ nghut lhê; haú hkûn, ngò gi, nghutbûn é byù haú bang haí taí é hkyô lé za a nghut, yhangmoq hai a-tsam wó é hkyô lé le gôn htoq râ nghut lhê. ²⁰Hkâsu mù gâ le, Garai Gasâng é mingdán gi, taí é dang má bo é a nghut, a-tsam má sheq ru nghut lhê. ²¹Nungmoq hká dông ô nau akô lhú? Ngò gi, nungmoq chyáng, nuichûm hkat èq, a nghut jáng, chyitdap é eq nú-nhâm é myit mai lé lô ra râ lhú?

5

Ashop É Dông Gungsho Zùm Yap É Hkyô Kut É Sù Lé Lhoq Htoq Pyâm Râ Hkyô

* 5:5 Tsadán é loq má ap byí pyâm keq gâ é gi, hpúng byú wuè eq a zùm yap nhang lo râ lé taí é nghut lhê. † 5:6 Mún gâ é gi, yubak mara lé taí nau é nghut lhê. Lhoqlhai Poí jé jáng, Israelaq byu pé gi, yhangmoq wó é múnchi banshoq lé lhuí pyâm mù, múnchi a bo é muk saí kê é nghut lhê.

¹Nungmoq chyáng, ashop é dông gungsho zùm yap é hkyô joq é lé, hkyak taí hù lò bekô; haú gi, a lumjáng bâng chyáng lhang a dut wú é hkyô nghut é, yuqgè rayuq gi, yhangwâ é myiwe eq nyí zô lhum nyi é hkyô nghut ri. ²Nghut kôle, nungmoq gi, nghutbûn nyi bum akô nhang! Haú dông a nghut é za, nungmoq gi, yón é myit tûn shit mù, haú su kut é byù lé, nungmoq é hpúng mai lhoq htoq pyâm le, a gè kó lhú? ³Ngò gi, ngá gungdu, nungmoq eq rahá a nyi to kôlhang, ngá é i-myit gi, nungmoq eq rahá nghut nyí luí, gungdu jé nyi tô é dông mai, haú hkyô kut é sù lé jéyáng doqdan gù nghut lhê. ⁴Nungmoq gi, nga-nhông é Yhumsing Yesuq é mying mai zup zing mù, ngá é i-myit gi, nungmoq eq rahá nghut nyí luí, nga-nhông é Yhumsing Yesuq é a-tsam le, nungmoq eq rahá nghut nyi é hkûn, ⁵byù haú yuq lé, Tsadán é loq má ap byí pyâm keq.* Haú jáng, Yhumsing é buinyi má, yhang é woi-nyí gi, hkyi yu é hui râ matú, yhang é yubak gungsho gi, lhoq htên pyâm é hui râ nghut lhê.

⁶Nungmoq é nghutbun hkyô gi, ge é a nghut. Mún† ra tsuí zo gi, muk long gón lé wó lhoq daú nhang é lé, nungmoq a sé kó lhú? ⁷Nungmoq gi, múnchi a bo é bang nghut nyí kê é eq rajung za, múnchi a bo é muk htung asik su wó dut kê sháng gaq, múnchi axau lé lhuí pyâm keq. Hkâsu mù gâ le, nga-nhông é Lhoqlhai Poí sauzo, Hkrisduq gi, hkungga nhang é hui bê nghut lhê. ⁸Haú mù luí, nga-nhông gi, agè agaú hkyô eq hpuzo nhang hkyô nghut é múnchi axau bo é dông a nghut é za, lhumzui hkyô eq tengmán hkyo é muk nghut é, múnchi a bo é muk èq, Poí haú lé kut nyí sháng.

⁹Ashop é dông gungsho zùm yap é bang eq hkâzùm kó nghû, ngò, nungmoq lé, ngá é laiká má kê kat byi bê nghut lhê. ¹⁰Nghut kôlhang, mingkan shí eq sêng é, ashop é dông gungsho zùm yap é bang, myoqnoq é bang, mhaú zô é bang eq hparà noq é bang lé hkâzùm yap kó nghû é gi, a nghut. Haú su ru nghut le gi, mingkan htoq shí mai nungmoq htoq ló byuq ra kê râ nghut lhê. ¹¹Nghut kôlhang, yhanggùng yhang

gi, gumang ga kôle, ashop é dông gungsho zùm yap é, myoqnoq é, hparà noq é, lumù gansang é, î shuq wut é, mhaú zô é sù ó yuq eq le a ge zùm yap kô râ nghut lhê nghû, ahkuî, ngò, nungmoq lé kê kat nau é nghut lhê. Haú sù é byù eq gi, rahá lháng hkâzo kó.

¹²Haú noqkuq hpúng shinggan mâ é bang lé jéyáng râ gi, ngò eq haí sêng lhê lhú? Nghut kôlhang, hpúng ahkaú mâ é bang lé nungmoq jéyáng râ dut lhê. ¹³Hpúng shinggan mâ é bang lé gi, Garai Gasang jéyáng râ nghut lhê. Nghut kôlhang, "Haú agè agaú é sù lé, nungmoq chyáng mai lhoq htoq pyám keq." ✧ gâ tô ri.

6

Lumjínġ Bânġ Hkaú Má Jéyáng Lhûm É Hkyô

¹Nungmoq mâ é rayuq yuq gi, gumang góyuq eq dang-rhâng lhûm tô é nghut jáng, haú hkyô lé jéyáng nhâng râ matú, haú sân-yúng bânġ é hí má taí râ malaî, Garai a wó bânġ é hí má wám taí râ lhú? ²Haú sân-yúng bang gi, mingkan lé jéyáng râ nghut é hkyô lé, nungmoq a sé kó lhú? Nungmoq gi, mingkan lé jéyáng râ bang nghut kôle nhîng, tiq é mù pé lé wó jéyáng é bang a nghut kó lhú? ³Nga-nhúng gi, maumânġ pé lé jéyáng râ nghut é hkyô lé, nungmoq a sé kó lhú? Haú mù, shí pyat mâ é hkyô pé lé, gè gè yhang wó jéyáng kô râ nghut lhê ô! ⁴Haú mù luí, nungmoq gi, dang-rhâng lhûm é mù pé joq é nghut jáng, noqkuq hpúng má ahkyak a nghut é bang lé tará agyì kut nhâng kô râ lhú? ⁵Ngò, haú su nghû taí é gi, nungmoq lé hoq hpu nhâng râ matú nghut lhê. Lumjínġ bânġ chyáng dang-rhâng lhûm é hkyô lé wó jéyáng râ hpaqchyî luq shoq bo é byù, nungmoq chyáng rayuq lháng a nyì dut kô râ lhú? ⁶Nghut kôlhang, nungmoq gi, gumang yhangchang rayuq eq rayuq, a lumjínġ bânġ é hí má lháng rûng shok lhum akó nhung!

⁷Nungmoq hkaú má mù jéyáng lhûm é hkyô joq é nghut jáng, nungmoq gi, sum lugù nghut bê. Góyuq eq shut le lháng rû ge lhê a nghut kô lhú? Mhaú zô é huí le lháng rû gè lhê a nghut kô lhú? ⁸Nghut kôle, nungmoq yhang gi, mhaú zo kô é eq shut

kô é nghut luí, haú gi, nungmoq é gumang wuì lé kut é nghut lhê.

⁹Agè agaú é bang gi, Garai Gasâng é mingdán mâ é shimân jeju a myang hkam yù kó râ nghut é hkyô lé, nungmoq a sé kó lhú? Hkâ-nâ nyì kó. Ashop é dông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgè yhangchang nyì zô lhûm é mara kut shut é bang le, ¹⁰hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasâng é mingdán mâ é shimân jeju lé myang hkam yù kô râ a nghut. ¹¹Nungmoq mâ é ra-am gi, haú su kut kô é bang nghut akô. Nghut kôlhang, nungmoq gi, nga-nhûng é Garai Gasâng é Woi-nyí eq Yhumsîng Yesuq Hkrisduq é myîng mai, mara hkyut san byî é, lhoq sân-yúng é eq chî sân pyám byî é hui bekô nghut ri.

Ashop É Dông Gungsho Zùm Yap É Hkyô

¹²"Jung hkanġmó kut râ ahkáng ngò wó lhê." Nghut kôlhang, jung hkanġmó gi, akyû byî é a nghut. "Jung hkanġmó kut râ ahkáng ngò wó lhê." Nghut kôlhang, haí jûng eq le ngo lé wó sing pyám râ a nghut. ¹³"Zoshuq gi, wamdaú é matú nghut mù, wamdau gi, zoshuq é matú nghut ri." ga nungmoq ra-am taí kó râ nghut lhê. Nghut kôlhang, Garai Gasang gi, haú í jûng é lé lhoq htên pyám râ nghut lhê. Gungdu gi, ashop é dông gungsho zùm yap hkyo é matú a nghut é za, haú Yhumsîng é matú nghut mù, haú Yhumsîng gi, gungdû é matú nghut ri. ¹⁴Garai Gasang gi, Yhâng é a-tsâm eq, haú Yhumsîng lé, shi é mai lhoq dui toq yû bê nghut mù, nga-nhúng lé le lhoq dui toq yû râ nghut lhê. ¹⁵Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kó lhú? Haú nghut le nhîng, Hkrisduq é gungsho showui showang pé lé yù mù, shiwa myhî pé eq rading ralhum za kut pyám nhâng kô râ lhú? Hkâ-nhám le a ge dut nhâng! ¹⁶Shiwa myhí eq gungsho zum é sù gi, yhang eq gungsho ralhum za dut bê hkyô lé, nungmoq a sé kó lhú? Hkâsu mù gâ le, "Yhangnhik gi, gungsho ralhum za dut kô râ nghut lhê." ✧ ga taí tô ri. ¹⁷Nghut kôlhang, haú Yhumsîng eq rading ralhum

za dut é sù gi, woi-nyí má Yhang eq ralhum za dut bekô nghut ri.

¹⁸ Ashop é đông gungsho zùm yap é hkyô lé koi pyám keq. Byù rayuq kut shut é gotû mara pé banshoq gi, yhang é gungdu shing-gan má nghut lhê; nghut kôlhang, ashop é đông gungsho zùm yap é hkyô kut shut é sù gi, yhumsing gùng lé mara shut é sù nghut ri. ¹⁹ Nungmoq é gungdu gi, Garai Gasâng chyáng mai nungmoq wó yû bê nghut é, nungmoq má lúng nyi é Chyoiyúng Woi-nyí é noqkuq yhùm nghut é lé, nungmoq a sé kô lúhú? Nungmoq gi, yhumsing gùng lé sing é bang a nghut. ²⁰ Hkâsu mù gà le, nungmoq gi, ahpau ralhum byi mù wui hpyit tô é hui bê bang nghut akô. Haû mù luí, nungmoq é gungdû eq, Garai Gasang lé, hkunggâ é hkyô shit nyí keq.

7

Myí Yu É Eq Sêng É Hkyô

¹ Ahkuí, nungmoq kâ kat é hkyô pé eq séng luí ga jang, yuqgè rayuq gi, myi a yu le gè ri. ² Nghut kôlhang, ashop é đông gungsho zùm yap é hkyô gyai myô é yan-mai, yuqgè hkangmó gi, yhumsing é myiwe wó râ lhê; myiwe hkangmó gi, yhumsing é yuqgè wó râ lhê. ³ Haû yhumsing hpó gi, wò joq é eq rajung za, yhang yhumsing myhí eq zùm sháng gaq; haû đông za, yhumsing myhí le, yhang yhumsing hpó eq zùm sháng gaq. ⁴ Haû yhumsing myhí é gungdu gi, yhanggùng yhang za sêng é a nghut, yhang é yhumsing hpó eq le sêng lhê. Haû eq rajung za, yhumsing hpô é gungdu gi, yhanggùng yhang za sêng é a nghut, yhang é yhumsing myhí eq le sêng lhê. ⁵ Nungmoq myit huí lhum luí, kyûdùng é má rago ap nong râ ahkyíng ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng lé a wó hkang é yanmai, Tsadán eq gunglau é a hui kô sháng gaq, ahkyíng ayoq haû lai jáng, rahá dum zùm keq. ⁶ Ngò, haû su nghû taí é gi, hkunmó hkyô é đông a nghut, ahkáng byí kat é đông ru nghut lhê. ⁷ Byù banshoq bang gi, ngò su nyi râ lé ô nau ri. Nghut kôlhang, yuq hkangmó gi, ó le ô é chyunghuq lé Garai Gasâng chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

⁸ Ahkuí, myiwe a yù lô é bang eq chuimó pé lé ngò taí kôlé, ngò su, haû đông jâng nyi pyám kô é nghut le, yhangmoq é matú ge é hkyô nghut ri. ⁹ Nghut kôlhang, yhumsing gùng lé a wó hkang kô é nghut le gi, yhangmoq, myi yû myi lô râ lhê; hkâsu mù gà le, myi su nyé luí ô nau nyi râ malaí, myi yu myi lô le je ge lhê.

¹⁰ Myi yû bê bang lé, ngò, hkunmó hkyô kôlé, shí gi, ngò đông hkyô é a nghut, Yhumsing chyáng mâ é ru nghut lhê: Yhumsing myhí gi, yhang é yhumsing hpô chyáng mai a ge gang râ nghut lhê. ¹¹ Nghut kôlhang, yhang gâng é nghut jáng, myi a dum lô é za nyi râ lhê, haû a nghut jáng, yhang é yhumsing hpó eq dum xoq yû râ lhê. Yhumsing hpó le, yhang é yhumsing myhí lé a ge kâng pyám râ nghut lhê.

¹² Góbang lé ngò shí su nghû taí kôlé, shí gi, Yhumsing chyáng mâ é a nghut, ngò đông mai taí é ru nghut lhê. Gumang rayuq yuq gi, lumjíng sù a nghut é yhumsing myhí wó é nghut le, myiwe haû, yhang eq rahá nyi nau é nghut jáng, yhang lé a ge kâng pyám râ nghut lhê. ¹³ Myiwe rayuq gi, lumjíng sù a nghut é yhumsing hpó wó é nghut le, yuqgè haû, yhang eq rahá nyi nau é nghut jáng, yhang eq a ge gang râ nghut lhê. ¹⁴ Hkâsu mù gà le, haû a lumjíng sù yhumsing hpó gi, yhang yhumsing myhí đông mai lhoq sân-yúng é hui bê nghut mù, a lumjíng sù yhumsing myhí le, lumjíng sù nghut é yhang é yhumsing hpó đông mai lhoq san lhoq yúng é hui bê nghut ri. Haû a nghut jáng, nungmoq é zo wui gi, a san-séng dut kô râ nghut lhê; nghut kôlhang, yhangmoq gi, haû đông mai, chyoiyúng bekô nghut ri.

¹⁵ Nghut kôlhang, haû a lumjíng sù gâng lô nau jáng gi, gâng lô sháng gaq. Lumjíng é yuqgè nghut nghut, myiwe nghut nghut, haû sù é hkyô pé má gi, hkûm zing tô é hkyô a joq é nghut lhê. Garai Gasang gi, nga-nhúng lé, nguingón shoq nyi sháng gaq ga ji yù bê nghut lhê. ¹⁶ Yhumsing myhí ê, náng é yhumsing hpó lé wó hkyi yù râ nghû, hkâsu wó sé râ lúhú? Yhumsing hpó ê, náng é yhumsing myhí lé wó hkyi yù râ nghû, hkâsu wó sé râ lúhú?

¹⁷ Hká đông nghut kôlhang, yuq hkangmó gi, Garai Gasang, yhang lé ji yu tô é hkûn, haû Yhumsing mai yhang lé nyi

nhang tô é đông asak dui nyi râ lê. Haú gi, noqkuq hpúng pé banshoq má ngò tô to byí é tarâ nghut lê. ¹⁸Byù rayuq gi, ji yu é huí é hkûn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù đông a dut byuq sháng gaq. Byù rayuq gi, ji yu é huí é hkûn, ahpyo-kuq hpyit a hkam yu to shí é nghut jáng, ahpyo-kuq hpyit a hkam yù sháng gaq. ¹⁹Ahpyo-kuq hpyit hkâm hkyô gi, haí ahkyak a nghut; ahpyo-kuq hpyit a hkâm hkyô gi, haí ahkyak a nghut. Garai Gasâng é hkunmó pé lé châng nyi é za sheq ahkyak nghut lê. ²⁰Yuq hkgangmó gi, yhang lé Garai Gasâng èq ji yu é hkûn lê su xoq nyi nyi râ lê. ²¹Nàng gi, ji yù huí é hkûn jùn dut nyi é lúhú? Haú hkyô lé hkâ-myt chiq. Nghut kôlhang, nàng gi, luthkyô wó yu é nghut jáng, haú đông nyi aq. ²²Hkâsu mù gâ le, haú Yhumsing èq ji yu é huí é hkûn, jùn dut nyi é sù gi, haú Yhumsing èq lhoq lhut yu é byù nghut bê. Haú eq rajung za, ji yu é huí é hkûn, luthkyô wó é sù gi, Hkrisduq é jùn nghut ri. ²³Nungmoq gi, Garai Gasâng èq ahpau byi mù wui hpyit yu é hui bê bang nghut akô. Haú mù, byu pé é jùn hkâdut kó. ²⁴Gumang wui ê, yuq hkgangmó gi, yhumsing lé Garai Gasâng èq ji yu é huí to bê đông, Yhâng é hí má xoq nyi nyi râ lê.

²⁵Ahkuí, zomyi zorâm wui é hkyô táí kôlé. Haú Yhumsing chyáng mâ é hkunmó gi, ngò a wó; nghut kôlhang, Yhumsing é shogyo nhikmyín é yanmai, lumgíng sù rayuq nghut nyi é đông, ngò, nungmoq lé hkyô shit râ nghut lê. ²⁶Ahkuí hui zô é wúhke hkyo é yanmai, nungmoq gi, yhumsing nyi to é su xoq nyi nyi le je ge ri nghú, ngò wó myit ri. ²⁷Nàng, myiháng bê a nghut lhi? Lhoq kang râ hkâda lo. Nàng, myi a háng shi a nghut lhi? Myi hkâhò lo. ²⁸Nghut kôlhang, nàng, myihâng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlhang, myihâng é bang gi, shí pyat má wúhke hkyô pé myo myo hui kó rá nghut mù, ngò, nungmoq lé haú mai hkyi yù nau ri.

²⁹Gumang wui ê, ngò táí nau é lichyúm gi, ahkyíng tot byuq bê nghut mù, ahkuí mai, myi wó é bang gi, a wó é bang đông nyi kó sháng gaq.* ³⁰Yón ngaú huí é bang gi, a huí

é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su; ³¹haú mingkan zè pé lé chung é bang gi, haú pé lé a myit tuí é bang su, nghut kó sháng gaq. Hkâsu mù gâ le, shí mingkân é ahkui lê é azòng isâm gi, láí ló nyi é nghut lê.

³²Ngò gi, nungmoq lé a myit myo nhâng naù. Myi a yù shí é sù gi, haú Yhumsing lé hkâsu wó gabú nhâng râ matú, haú Yhumsing é muzó lé myit chiq nyi ri. ³³Nghut kôlhang, myi yù bê sù gi, yhâng é yhumsing myhí lé hkâsu wó gabú nhâng râ matú, mingkan shi é muzó eq séng luí myit chiq nyi ri. ³⁴Haú mù, yhâng shirong é myit gi, byo myín nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyí má haú Yhumsing lé rago wó ap nóng râ matú, Yhumsing é muzó pé eq séng luí myit chiq nyi ri. Nghut kôlhang, myi ló bê myiwe gi, yhâng é yhumsing hpó lé hkâsu wó gabú nhâng râ matú, mingkan shi é muzó eq séng luí myit chiq nyi ri. ³⁵Ngò, haú su nghú táí é gi, nungmoq é matú ge é hkyô nghut lê; nungmoq lé tara èq zuí zing é a nghut é za, myit a byò lo shoq Yhumsing lé wó ap nóng râ matú, jô é đông asak wó duí kô sháng gaq nghu é hkyô ru nghut lê.

³⁶Nghut kôlhang, rayuq yuq gi, yhang dúng tô é zomyi gyíng lé a htuk é đông kut nyi é su wó myit ngàm jáng, myiwe haú asak kô lo nyi mù, hâng yù râ dut bê nghú myit é nghut le gi, yhang ô nau é đông kut sháng gaq. Yhang mara kut é a nghut. Yhangnhik gi, hâng lhum râ lê. ³⁷Nghut kôlhang, yhang gi, haú hkyô lé yhâng é myit mai wó lhoq zím pyâm é nghut mù, yut yut ô naù hkyo é ahkaú má a nghut é za, yhumsing ô naù é hkyô lé wó hkûm zing pyâm é sù nghut luí, haú zomyi gyíng lé a hâng yù râ matú wó myit hpyit bê sù nghut é nghut jáng, yhang gi, ge é hkyô kut bê nghut ri. ³⁸Haú mù luí, zomyi gyíng haú lé hâng yu é sù gi, jô é hkyô kut bê nghut ri; nghut kôlhang, zomyi gyíng haú lé a hâng yu é sù gi, je ge é hkyô kut bê nghut ri.

³⁹Myiwe rayuq gi, yhâng é yhumsing hpó rû dui nyi nyi, yhang eq xoq tô ashí nghut lê. Nghut kôlhang, yhâng é yhumsing hpó

* 7:29 A wó é bang đông nyi kó sháng gaq gâ é gi, Garaí mù lé je myit zuq nyi sháng gá naù é nghut lê.

shi byuq é nghut jáng, yhang gi, myi ló rá ahkáng dum wó bê nghut lhê, nghut kôle, haú yuq gi, Yhumsîng eq sêng é sù dut rá lhê. ⁴⁰Ngò jéyáng é đông ga jáng, myi a dum ló é wó nyi le gi, yhang é matú je gabú hkyô dut rá nghut lhê. Ngò le, Garai Gasâng é Woi-nyí wó sù nghu wó myit ri.

8

Hparà Lhô Lé Tîng Byî É Zoshuq

¹Ahkuî, hparà lhô pé lé tîng byî é zoshuq hkyô: nga-nhúng banshoq bang gi, haú hkyô eq séng luî sê lhê. Sê é hkyô gi, nghutbun sê lhê; nghut kôlhang, chyitdap myit gi, lhoq kô myhang lhê. ²Byù rayuq yuq gi, rajung jung lé sé bûn é nghut le, yhang sé âng é lé lhang a sé shi nghut ri. ³Nghut kôlhang, Garai Gasâng lé chyitdap é sù gi, Garai Gasâng eq sê é sù nghut ri.

⁴Haú mù luî, hparà lhô pé lé tîng byî é zoshuq lé zô é eq séng luî gi: hparà lhô gi, mingkan má haí lhang a nghut é hkyô lé le, Garai Gasâng gi, Yhang rayuq mai lai luî gotû a nyi é lé le, nga-nhúng sê lhê. ⁵Hkâsu mù gâ le, mauhkûng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsîng pé" myo myo nyi kôlhang ⁶nga-nhúng é matú gi, îwa nghut é Garai Gasâng rayuq za nyi é nghut mù, lhunglhang gi, Yhang mai hpan é nghut luî, nga-nhúng gi, Yhang é matú asak dui nyi é nghut lhê. Yesuq Hkrisduq nghu é Yhumsîng rayuq za nyi é nghut mù, lhunglhang gi, Yhang đông mai hpan é nghut luî, nga-nhúng gi, Yhang đông mai asak dui nyi é nghut lhê.

⁷Nghut kôlhang, yuq hkanmó gi, haú hkyô lé sê gam hkoq yu é a nghut. Ra-am gi, ahkuî jé shoq hparà lhô pé má mán byuq kô é yanmai, haú sù é zoshuq lé yhangmoq zô é hkûn, hparà lhô lé tîng byî é zoshuq đông myit sôn yu akô. Yhangmoq myit sôn sê é hkyô wum nyhôm é yanmai, mara wó bûn akô nghut ri. ⁸Nghut kôlhang, zoshuq gi, nga-nhúng lé, Garai Gasâng shut shuí chyâng e é a nghut. Nga-nhúng a zô é nghut le gi, je sùm byuq ló é a nghut, zô é nghut le gi, je ge lo é a nghut.

⁹Haú su ga kôlhang, nungmoq a htung a htê zô é hkyô gi, lumjîng myit wum

nyhôm bang é matú myit leqbat jowò a dut shoq sidiq keq. ¹⁰Hkâsu mù gâ le, sumsé hpaqchyî wó é bang nungmoq gi, hparà lho é noqkuq yhôm má zô nyi kô é lé, haú myit sôn sê é hkyô má wum nyhôm é sù rayuq yuq myang é nghut jáng, hparà lhô pé lé tîng byî é zoshuq lé, yhang wám zo rá lé wum byî é a dut kô rá lhú? ¹¹Haú mù, Hkrisduq shî hkám byi bê nghut é, wum nyhôm é gumang hpó haú yuq gi, nungmoq é sumsé hpaqchyî eq lhoq htên pyâm é hui berâ nghut lhê. ¹²Nungmoq gi, haú hkyô đông mai, nungmoq é gumang wuî lé mara kut shut é eq, yhangmoq é myit sôn sê é hkyô wum nyhôm é lé nò nhang é hkûn, Hkrisduq lé mara kut shut é nghut bekô. ¹³Haú mù luî, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhâm le, sho lé a zo lo rá nghut lhê.

9

Lagyo Rayuq É Ahko Ahkáng

¹Ngò gi, lut sù a nghut lhú? Ngò gi, lagyo rayuq, a nghut lhú? Ngò gi, nga-nhúng é Yhumsîng Yesuq lé myang wú bê sù, a nghut lhú? Nungmoq gi, haú Yhumsîng má, ngò zui saí é muzó é ashi pé chyat, a nghut kô lhú? ²Ngò gi, góbâng chyáng lagyo a nghut kôlhang, nungmoq chyáng gè gè nghut lhê! Hkâsu mù gâ le, nungmoq gi, haú Yhumsîng má, ngò lagyo nghut é hkyô saksé dizik nghut bum akô.

³Ngá ahtoq má jéyáng bang lé, ngá gûng ngò taí hung kat kôlé. ⁴Ngamoq gi, zo rá shuq rá ahko ahkáng a wó é bang nghut lhê lhú? ⁵Gotû lagyo pé eq Yesuq é yhanggu yuqzô pé eq Kehpa kut é su, lumjîng sù nghut é yhumsîng myhí shuí chúng rá, ngamoq, ahko ahkáng a wó é nghut lhê lhú? ⁶Ngò eq Barnaba baú za, asak dui hkyo é matú mù zui ra rá lhú?

⁷Ó yuq wá, yhumsîng zoshuq wùn luî, gye mù wùn waq rá lhú? Ó yuq wá, tsibiyiq hkyâm saí mù, haú mâ é tsibiyiq shi a zo kut rá lhú? Ó yuq wá, sau rém mù, sau naú a shuq kut rá lhú? ⁸Ngò gi, shí hkyô pé lé xângzo hkyam đông za taí é nghut lhê lhú? Haú tarâ má le, rajung za taí tô lhê, a nghut lhú? ⁹Hkâsu mù gâ le, haú Mosheq é tarâ má, "Guq nâng nyi é no lé

nhuttsung hkâ-tsung to byi."☆ ga kâ tô ri. Garai Gasang gi, no eq séng luí za chiq é nghut lhê lúhú? ¹⁰ Gè gè yhang, yhang gi, nga-nhung é matú taí é a nghut kô lúhú? Nghut lhê, haú gi, nga-nhung é matú kâ to byí é nghut lhê. Haí mù gâ le, yò hpuq sù, yò hpuq é eq, guq bat sù, guq bat é gi, kyô chôm shù yù râ lé myoqbyù luí, kut kô é nghut lhê. ¹¹ Ngamoq gi, nungmoq chyáng woi-nyí amyui sân kat bê nghut mù, nungmoq chyáng mâ é mingkan zè lé shù yu é nghut jáng, lùm myô é dut byuq bekô lúhú? ¹² Góbang gi, nungmoq chyáng mai garúm é ahko ahkáng wó kô é nghut jáng, ngamoq gi, haú lé je wó râ lhê a nghut kô lúhú?

Nghut kôlhang, ngamoq gi, ahko ahkáng haú lé a yu é nghut lhê. Haú yù râ malaí, Hkrisduq é gabú danglù gi, hkûm zing pyâm é a hui râ matú sheq, jung hkangmó lé ngamoq hkam jân nyi lhê. ¹³ Haú noqkuq yhûm má mù zuí é bang gi, yhangmoq é zoshuq lé haú noqkuq yhûm mai wó é hkyô eq, hkungga gyap má dojaú é bang gi, hkungga gyap má nhông byí é ra-am lé myàng zô é hkyô lé, nungmoq a sé kô lúhú? ¹⁴ Haú eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lhê ga, haú Yhumsing hkunmó hkyô to bê nghut ri.

¹⁵ Nghut kôlhang, ngò gi, ahko ahkáng haú pé haí lé le a yu é nghut lhê. Nungmoq, ngo lé haú su lhom kut byi râ lé myoqbyù mù, ngò, shí hkyô lé kâ é a nghut. Hkâsu mù gâ le, ngò haú su gumrong é hkyô lé, rayuq yuq lhoq htên pyám byi râ htoq má, ngò shi byuq le lhang je ge ri. ¹⁶ Nghut kôlhang, gabú danglù lé ngò hko kyô é hkûn, ngò gumrông jang a joq; hkâsu mù gâ le, haú gi, ngò a kut a ge é ngá wô nghut lhê. Haú gabú danglù lé ngò a hko kyô é nghut le gi, ngò dingnyé wó râ nghut lhê. ¹⁷ Yhumsing nau é myit mai ngò hko é nghut jáng, shigyau chyunghuq wó râ nghut lhê; yhumsing nau é myit mai a nghut jáng gi, ngo lé lùm luí ap tô é lé, agon za wùn waq nyi é dut râ nghut lhê. ¹⁸ Haú mù luí, ngá é shigyau chyunghuq gi, haí nghut lhê lúhú ga jang, haú gabú danglù lé hko kyô é hkûn, ngò gi, ahpau a yu é za wó ap nóng luí, gabú danglù hko kyo hkyô má é ngá é ahko ahkáng pé lé ngò a yu é amyat

nghut lhê.

¹⁹ Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gung ngò, yuq hkangmó é jùn kut nyi lhê. ²⁰ Ngò gi, Yudaq byu pé lé shuí lhing yù râ matú, Yudaq byu pé chyáng nghut nyi é hkûn, Yudaq byù rayuq đông dut nyi lhê. Ngò gi, tarâ hkaú má nyi sù a nghut kôlhang, tarâ hkaú má é bang lé shuí lhing yù râ matú, tarâ hkaú má nyi bang chyáng nghut nyi é hkûn, tarâ hkaú má é byù rayuq đông dut nyi lhê.

²¹ Ngò gi, tarâ a wó bang lé shuí lhing yù râ matú, tarâ a wó bang chyáng nghut nyi é hkûn, tarâ a wó sù rayuq đông dut nyi lhê. Nghut kôlhang, gè gè ga jáng, Garai Gasang é tarâ mai a lut htoq é za, Hkrisduq é tarâ hkaú má nyi sù nghut lhê. ²² Ngò gi, wum nyhóm bang lé shuí lhing yù râ matú, wum nyhóm bang chyáng nghut nyi é hkûn, wum nyhóm sù rayuq đông dut nyi lhê. Ngò gi, wó dut é hkyô đông mai byù ra-am lé wó hkyô sháng gaq nghú, byù lhunglhang bang chyáng, byù aja jà đông nyi nyi lhê. ²³ Ngò gi, gabú danglù mai wó é shimân jeju pé lé wó chôm hkam yù sháng gaq nghú, gabú danglù é yanmai haú pé banshoq lé kut é nghut lhê.

²⁴ Din shingjóng poí má dìn râ bang banshoq dìn kôlhang, rayuq za shigyau chyunghuq wó é hkyô lé, nungmoq a sé kô lúhú? Chyunghuq wó râ matú dìn keq. ²⁵ Sup poí má shingjóng lhûm é bang yuq hkangmó gi, yhumsing gung yhum-sing tarâ htan é đông lhoq mhân yù râ lhê. Yhangmoq gi, gîng nyi râ a nghut é janmaú wó râ matú, haú su kut é nghut akô; nghut kôlhang, nga-nhung gi, ahtum abyuq gîngtîng nyi râ nghut é janmaú wó râ matú shikut é nghut lhê. ²⁶ Haú mù luí, ngò gi, jum dìn dìn é byù rayuq su dìn é sù a nghut. Ngò gi, lài lé bat é byù rayuq su, akôm má bat é sù le a nghut. ²⁷ Ngò gi, góbang chyáng mungdang hko é htang má, ngá gung ngò, shigyau chyunghuq eq a gîngdân sù a dut sháng gaq nghú, ngá gung lé gyai yhang lhoq mhân yù mù, ngá gung lé jùn kut yu nyi lhê.

10

Israelaq Pê É Labaú Mai Sidiq Byí É Hkyô

¹Gumang wuê ê, ngò gi, dut lâi lo é hkyô lé, nungmoq lé a sé a dut nhâng nau é nghut lhê; hí hkûn, nga-nhông é îchyi îwa pé banshoq bang gi, mhutdûm ô má nyi mù, Nhông Nè mai wó lâi byit kô é nghut lhê.* ²Yhangmoq banshoq bang gi, mhutdûm eq Nhông Nè má, Mosheq é chángzô pé đông baptisma hkam yu é bang chyat nghut bekô. ³Yhangmoq banshoq bang gi, rajung zâ é woi-nyí zang zo kô é eq, ⁴rajung zâ é woi-nyí wuê shuq kô é nghut lhê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haû gi, Hkrisduq nghut bê. ⁵Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

⁶Haû hkyô pé dut htoq é gi, agè ashop hkyô má yhangmoq myit tuí bùm é su, nga-nhung a myit tuí nyi râ matú nga-nhung é azông dut bê nghut ri. ⁷"Byu pé gi, zùng mù, zo luí shuq luí, a lumjínq bang kut é đông, toq mù, ye bum akô."† ga kâ tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kó. ⁸Yhangmoq mâ é ra-am gi, ashop é đông gungsho zùm yap é hkyô shut kômù, ra-nyí má za í mûn sum hkyîng yuq shi byuq é su, ashop é đông gungsho zùm yap é hkyô le, nga-nhung gi, a ge kut shut râ nghut lhê. ⁹Yhangmoq mâ é ra-am gi, haû Yhumsîng lé chyâm luí, lhangmuì pé eq hte sat é huí bùm kô é su, haû Yhumsîng lé, nga-nhung gi, a ge chyâm râ nghut lhê. ¹⁰Yhangmoq mâ é ra-am gi, nhutluq shô-myô kôluí, lhoq htên é maumâng eq sat pyâm é hui kô é su, nungmoq gi, nhutluq shô-myô hkâkut kó.

¹¹Yhangmoq chyáng wú yû râ azông đông haû pé dut htoq luí, lô htáng râ ipyat pé má nyi âng to bang nga-nhung é matú sidiq byi râ đông kâ to bê nghut ri. ¹²Haû mù luí, nungmoq gi, yap gîng nyi bê su ngàm kô é nghut jáng, a leqbat râ matú sidiq nyi keq! ¹³Byu chyáng htoq sê é gunglaú hkyô za nungmoq hui râ nghut lhê. Garai Gasang gi, lhumzui sù nghut

lhê mù, nungmoq a wó jân é gunglaú hkyô lé hui nhâng râ a nghut. Nghut kôlhang, nungmoq gunglaú huí é hkûn, Yhang gi, haû lé nungmoq wó jan râ matú, hkyô htong byi râ nghut lhê.

Hparà Lhô Noq Hkyô Lé Koi Pyám Râ Hkyô

¹⁴Haû mù luí, ngò chyitdap é luzúm wuê ê, hparà lhô noq hkyô lé koi pyám keq. ¹⁵Nhik gying bang lé ngò taí lhê; ngò haí taí nyi é hkyô lé nungmoq gùng myit sôn yù keq. ¹⁶Nga-nhung, jeju bûn nyi é jeju góm lé shuq é hkûn, Hkrisduq é sui má chôm zùm bê a nghut kó lú? Nga-nhung, myhik hpê é muk lé zô é hkûn, Hkrisduq é gungdu má chôm zùm bê a nghut kô lú? ¹⁷Haí mù gâ le, muk htung ralhum za nghut mù, nga-nhung gi, myo myo nghut kôle ragùng za nghut nyi lhê. Hkâsu mù gâ le, nga-nhung banshoq bang gi, haû rahtung zâ é muk lé chôm gâm zô é bang chyat nghut lhê.

¹⁸Israelaq byu pé é hkyô lé myit wú keq. Haû hkungga lé zô é bang gi, hkungga gyap má chôm lom é bang nghut lhê, a nghut kó lú? ¹⁹Hparà lhô, a nghut jáng, hparà lhô lé tîng byí é hkungga gi, rajung jung nghut lhê nghû, ngò taí é lú? ²⁰Haû su taí é a nghut, a lumjínq bâng é hkungga gi, Garai Gasang lé nhông byí é a nghut, nat gâng pé lé tîng byí é ru nghut lhê. Ngò gi, nungmoq, nat gâng pé eq chôm zum nyi bang dut râ lé a ô nau é nghut lhê. ²¹Nungmoq gi, haû Yhumsîng é góm lé le, nat gâng pé é góm lé le, ge shuq râ a nghut; nungmoq gi, haû Yhumsîng é zangbó má le, nat gâng pé é zangbó má le, rahá ge bo lòm râ a nghut. ²²Nga-nhung gi, haû Yhumsîng lé manôn nhâng nau é bang dut râ a nghut kô lú? Nga-nhung gi, Yhâng htoq je wúm bo é bang nghut lhê lú?

Lumjínq Su É Luthkyô

²³"Jung hkangmó kut râ ahkáng wó lhê." nghut kôlhang, jung hkangmó gi, akyû wó é a nghut. "Jung hkangmó kut râ ahkáng wó lhê." nghut kôlhang, jung hkangmó gi, byù lé wó kô làm nhang é a nghut.† ²⁴Ó yuq le, yhumsîng é gè hkyo matú ho é a nghut é za, góbâng é gè hkyo é matú hô râ dut lhê.

* 10:1 Bun zo ralhum mai raxê lhum gi, Htoq Lô Laiká má bo é Mosheq htâng cháng bâng é hkyô lé kâ tô é nghut lhê.

† 10:7 Htoq Lô 32:6 † 10:23 Bun zo 23 mâ é dangngho gi, Korinhtuq byu pé lhaq taí é dang nghut lhê.

²⁵ Sho ûng gài má ûng é haî lé lé, úng-âng é myit èq a myî gôn é za zo keq. ²⁶ Hkâsu mù gâ le, "Myidàm htoq eq haú má joq é jung hkangmó gi, Yhumsing é chyat nghut lhê." ✱ gâ tô ri.

²⁷ A lumjîng bang ra-am, nungmoq lé zang zo jì mù, nungmoq ê nau é nghut jáng, úng-âng é myit èq a myî gôn é za, nungmoq hí má to byî é gû lé zo keq. ²⁸ Nghut kôlhang, rayuq yuq, nungmoq lé, "Shí gi, hparà lhô lé tîng byi bê nghut lhê." ga taí kyô é nghut jáng, nungmoq lé taí kyo su é yanmai le, myit úng-âng é yanmai le, haú lé hkâzo kó. ²⁹ Úng-âng é myit haú gi, nungmoq é a nghut, góyuq é úng-âng é myit lé taí nau é ru nghut lhê. Ngá é luthkyô lé, haî mù góyuq é úng-âng é myit èq jéyáng é huí nhang lhê lhú? ³⁰ Ngò jeju bûn é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, haî mù lumu pyâm é ngò hui râ lhú?

³¹ Haú mù luí, nungmoq zo kôlhang, shuq kôlhang, haî kut kôlhang, Garai Gasâng é hpungwup shingkâng é matú chyat kut keq. ³² Ngò gi, yuq hkangmó lé, hkyô hkangmó má shikut luí myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasâng é noqkuq hpúng mâ é byù lé nghut nghut, ó yuq lé le myit hkâleqbat nhâng kó. ³³ Hkâsu mù gâ le, ngò gi, yhangmoq hkyi yu é wó hui kó sháng gaq nghû, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

11

¹ Ngò gi, Hkrisduq é alik châng é su, nungmoq gi, ngá é alik cháng keq.

Noqkuq É Má Htap Htuk Râ Hkyô

² Nungmoq gi, hkyô hkangmó má ngo lé bûn nyi kô é yanmai le, nungmoq lé ngò lai byi bê mhoqshit hkyô pé lé myhik zing nyi kô é yanmai le, ngò, nungmoq lé hkya-ôn lhê.

³ Ahkuí, ngò, nungmoq lé sê hkyâng nhâng nau é hkyô gi: yuqgè hkangmó é ulhum gi, Hkrisduq nghut ri; myiwe hkangmó é ulhum gi, yuqgè nghut ri; Hkrisduq é ulhum kúm gi, Garai Gasang

nghut ri. ⁴ Yuqgè hkangmó gi, kyûdûng le nghut nghut, myiqhtoi htoî le nghut nghut, yhâng é ulhum lé nghop tô é nghut jáng, yhâng é ulhûm é aróng lé lhoq hpoî pyâm é nghut bê. ⁵ Myiwe hkangmó gi, kyûdûng le nghut nghut, myiqhtoi htoî le nghut nghut, yhâng é ulhum lé a nghop tô é nghut jáng, yhâng é ulhûm é aróng lé lhoq hpoî pyâm é nghut bê. Haú gi, yhâng é ulhum lé wuq pyâm é eq rajung za nghut ri. ⁶ Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyám ra râ nghut lhê. Nghut kôlhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoî lhê nghut jáng, yhang gi, yhâng é ulhum lé nghop to ra râ nghut lhê. ⁷ Yuqgè gi, Garai Gasâng é azòng isâm eq hpungwup shingkang nghut é yanmai, yhâng é ulhum lé a nghop râ é nghut lhê. Myiwe kúm gi, yuqgè é hpungwup shingkang nghut ri. ⁸ Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê. ✱ ⁹ Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqgè é matú hpan tô é ru nghut lhê. ¹⁰ Haú nghut é yanmai le, maumang lagyo pé é yanmai le, myiwe gi, ahko ahkáng kumlhá đông yhâng é ulhum lé nghop râ dut lhê.

¹¹ Nghut kôlhang, haú Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê. ¹² Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhang, jung hkangmó gi, Garai Gasang mai lo é nghut lhê. ¹³ Myiwe rayuq, ulhum a nghop é za Garai Gasang lé kyûdûng é gi, htuk kô râ lhú? Nungmoq, yhumsing gung é matú doqdân yù keq. ¹⁴ Yuqgè xâm hîng tô é nghut jáng, yhâng é matú aróng hpoî é hkyô dut é nghut kôle, ¹⁵ myiwe xâm hîng tô é nghut jáng, yhâng é matú hpungwup shingkang nghut é hkyô lé, htûnglî èq nungmoq lé mhoqshit lhê, a nghut kô lhú? Hkâsu mù gâ le, xâm hîng tô é gi, nghop râ zè đông yhang lé byî tô é nghut lhê. ¹⁶ Rayuq yuq, haú hkyô lé taí dang-rháng nau é nghut jáng, ngamoq chyáng le, Garai Gasâng é noqkuq hpúng pé

✱ 10:26 Hkya-on 24:1

✱ 11:8 Apûn 2:21-23

chyáng le, gotû htûngli a joq é nghut lhê.

Yhumsing É Myinzang

¹⁷ Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut. ¹⁸ Sâng-hi má, noqkuq hpúng ralhum dông nungmoq zup zîng é hkûn, nungmoq hkaû má gam hkoq hkyô joq é lé wó gyô é nghut luî, têng é le bò râ nghû, ngò lumjîng lhê. ¹⁹ Ô pé gi, Garai Gasang o é hkyam shut nghut é lé wó shit râ matú, nungmoq ahkaû má gam hkoq lhum hkyô joq râ dut lhê. ²⁰ Nungmoq rahá zup zîng kô é hkûn, nungmoq gi, haû Yhumsing é myinzang zô é a nghut kó. ²¹ Hkâsu mù gâ le, nungmoq zô é hkûn, góyuq lé le a lánq é za, ó le ó hí yù zô akô. Haû mù, rayuq gi, zo mut huî nyî, góyuq gi, shuq wut to dut akô nghut ri. ²² Nungmoq gi, zo jang shuq jang yhûm a wó bang nghut akô lhú? Garai Gasang é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akô lhú? Nungmoq lé ngò hkâsu nghû taí kó râ lhú? Haû pè é yanmai, ngò, nungmoq lé hkya-on râ lhú? Ratsuí lháng a wó dut!

²³ Hkâsu mù gâ le, haû Yhumsing chyáng mai ngò wó hap yu é gû lé, nungmoq lé hai byi bê nghut lhê: Haû Yhumsing Yesuq gi, Yhang lé ap pyám huî é myîn má, muk lé yù mù, ²⁴ jeju hkya-ôn é htâng má, haû lé myhik hpé mù, taí é gi, "Shî gi, nungmoq é matú Ngá é gungsho nghut lhê; Ngo lé bûn nyî râ matú, shî su kut nyî keq." gâ ri. ²⁵ Haû eq rajung za, myinzang bàn zô é htâng má, Yhang gi, góm lé le yù mù, "Góm shî gi, Ngá é sui mâ é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyî râ matú shî su kut keq." gâ taí ri. ²⁶ Hkâsu mù gâ le, nungmoq gi, muk shî lé zo luî, góm shî lé shuq é hkangmó, haû Yhumsing shî hkâm é hkyô lé, Yhang jé lé shoq, shit kyô nyî râ lhê.

²⁷ Haû mù luî, ó yuq nghut kôle, a gingdán é dông Yhumsing é muk haû lé zo mù, góm haû lé shuq é nghut jáng, haû Yhumsing é gungdu eq sui lé shut é mara wó bê nghut lhê. ²⁸ Haû mù, ó yuq le, muk zo góm shuq râ hí má, yhumsing gùng yhumsing jep wú ra râ nghut lhê. ²⁹ Hkâsu mù gâ le, ó yuq nghut kôle, haû Yhumsing é gungdu eq sêng é

hkyô lé a sê gyô é za muk zo góm shuq é nghut jáng, yhânggùng yhang mara zô bò shuq bo yu é nghut lhê. ³⁰ Haû nghut é yanmai, nungmoq mâ é byù myo myo gi, wum nyhôm é, nõhpyo huî é nghut bum akô. Ra-am gi, shi ló byuq bekô nghut ri. ³¹ Nghut kôlhang, nga-nhúng gi, yhumsing gùng yhumsing hí sôn sê yu é nghut jáng tarâ jéyáng é hui râ a nghut. ³² Nga-nhúng gi, mingkan eq rahá, mara byî é a hui zo sháng gaq ga, nga-nhúng lé haû Yhumsing eq jéyáng é hkûn, nga-nhúng gi, mhoqshit é huî nyî gù bê nghut lhê.

³³ Haû mù luî, ngá é gumang wuî ê, nungmoq gi, zo râ nghû rahá zup zîng é hkûn, rayuq eq rayuq lánq lhum keq. ³⁴ Nungmoq rahá zup zîng é hkûn, jéyáng é a hui zo kó sháng gaq, rayuq yuq zòmút é nghut jáng, yhûm má zô chûng râ lhê.

Gotû myit tô é hkyô pé gi, ngò jé lé é hkûn sheq shit kyo râ nghut lhê.

12

Woi-nyí Hkyô Eq Sêng É Chyunghuq Pé

¹ Gumang wuî ê, woi-nyí hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê. ² Nungmoq gi, a lumjîng bang nghut nyî kô é hkûn lé, dang a nyo é hparà lhô noq râ matú hkyô shuî nghoq é hui kô é hkyô lé, nungmoq sê lhê. ³ Haû mù luî, "Yesuq gi, nhîng pyâm é hui sháng gaq." ga, Garai Gasang é Woi-nyí mai taí é byù ó yuq le a nyî é eq, haû Chyoiyúng Woi-nyí mai za a nghut jáng, "Yesuq gi, Yhumsing nghut lhê." ga, ó yuq le a wó taí é nghut lhê nghû, ngò, nungmoq lé taí kyô é nghut lhê.

⁴ Woi-nyí hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyí mai chyat nghut lhê. ⁵ Dojaú é hkyô ajung jung joq lhê; nghut kôlhang, Yhumsing rayuq lé za dojaú é nghut lhê. ⁶ Zui saî é hkyô ajung jung joq lhê, nghut kôlhang, Garai Gasang yhang za, byù lhunglhang bang má, haû pé banshoq lé kut é nghut lhê.

⁷ Woi-nyí é hpông shit hkyô gi, byù pé é gè hkyô matú, yuq hkangmó lé byi bê nghut ri. ⁸ Rayuq lé gi, Woi-nyí haû mai, hpaqchyî byéng-yá byíng é danglù byî é nghut ri; góyuq lé gi, Woi-nyí hau eq za, sumsé hpaqchyî byíng é danglù byî é nghut

ri; ⁹ góyuq lé gi, Woi-nyí hau èq, lumjínq myit byí é nghut ri; dum góyuq lé gi, Woi-nyí hau èq, nò lhoq ge é chyunghuq byí é nghut ri; ¹⁰ dum, góyuq lé gi, hpungwup a-tsam pé; dum, góyuq lé gi, myiqhtoi htoí é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haú pé é lichyúm taí sân kyô é ahkáng, byí é nghut ri. ¹¹ Chyunghuq haú pé banshoq gi, Woi-nyí hau èq za kut é loqmú chyat nghut mù, Yhang myit hpyit é đông yuq hkanqmó lé haú pé tsing gãm byí é nghut ri.

Gungbun Myo Kôlhang, Ra Gùng Za

¹² Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haú eq rajung za, Hkrisduq eq le haú đông nghut ri. ¹³ Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.

¹⁴ Haú gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê. ¹⁵ Haú hkyí gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. ¹⁶ Dum, haú nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. ¹⁷ Ragùng dû é gi, myoqjí za nghut é nghut jáng, gyô é hkyô gi, hkâmá nghut râ lhú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lhú? ¹⁸ Nghut kôlhang, Garai Gasang gi, gungsho showui showang hkanqmó lé, Yhang dut nhâng nau é eq rajung za, gungdu má kut to bê nghut ri. ¹⁹ Gungsho showui showang gi, ra bun za nghut é nghut jáng, gungdu gi, hkâmá nghut râ lhú? ²⁰ Hkyak ga jang, gungsho showui showang pé myo kôlhang, gungdu gi, ragùng za nghut ri.

²¹ Haú myoqjí gi, loq lé, "Ngò, nang lé a ra!" nghû a ge taí. Haú ulhum gi, hkyí lé, "Ngò, nang lé a ra!" nghû a ge taí. ²² Haú za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lhê. ²³ Hau htoq agó, hpau a lùm tap râ su myit ngam é gungsho showui showang pé lé, nga-nhúng je hpautap râ lhê. Haú a shit é jung gungsho pé lé, nga-nhúng hpautap é đông rago nghop râ lhê. ²⁴ Nga-nhúng é wó shit é gungsho pé kúm gi, haú hkyô a ra nghut ri. Nghut kôlhang, Garai Gasang gi, gungdu é gungsho showui showang pé lé pong to mù, aróng nyhum é lé, je riyhang aróng byi bê nghut ri. ²⁵ Haú mù, gungdu má gamhkuí lhùm é hkyô a bo é za, gungsho showui showang pé ralhumm eq ralhumm, rajung za kut wó myit tê byí lhum kó râ nghut lhê. ²⁶ Haú gungsho showui showang ralhumm jamjau huí é nghut jáng, lhum hkanqmó bo jamjau râ nghut lhê. Ralhumm hpautap huí é nghut jáng, lhum hkanqmó bo gabú é nghut lhê.

²⁷ Ahkuí, nungmoq gi, Hkrisduq é gungdu nghut kôluí, nungmoq yuq hkanqmó gi, haú é gungsho showui showang pé nghut akô. ²⁸ Garai Gasang gi, noqkuq hpúng má, sâng-hi lé, lagyô pé, í lhum nghû râ má, myiqhtoi pé, sùm lhum nghû râ má, mhoqshit bang, hau htâng má, laklaí kumlhá pé kut râ bang, nò wó lhoq gê râ chyunghuq wó é bang lé le, góbang lé wó garúm é bang, shuí-u râ chyunghuq wó é bang, laklaí dang ahú hú ge taí é bang lé, masat to bê nghut ri. ²⁹ Banshoq bang gi, lagyô pé nghut lhê lhú? Banshoq bang gi, myiqhtoi pé nghut lhê lhú? Banshoq bang gi, mhoqshit bang nghut lhê lhú? Banshoq bang gi, laklaí kumlhá kut akô lhú? ³⁰ Banshoq bang gi, nò lhoq ge é chyunghuq wó é nghut lhê lhú? Banshoq bang gi, laklaí dang ahú hú ge taí lhê lhú? Banshoq bang gi, dang haú pé é lichyúm ge taí sân kyô lhê lhú? ³¹ Nghut kôlhang, nungmoq gi, je gyaú é chyunghuq lé gyai yhang ô nau nyí keq.

Chyitdap Myit

Hau htoq agó, ahkuí, ngò, nungmoq lé, je gyaú dik é hkyô ralhumm shit kôlé.

13

¹Ngò gi, byu pê é eq maumang lagyô pê é myíng pé lé sê taí é nghut kôlhang, chyitdap myit a bo é nghut jáng, myíng hung htê bo é ut eq myíng tui htê bo é chapchéng su za dut byuq râ nghut lhê. ²Ngò gi, myiqhtoi htoí é chyunghuq, zaú tô é hkyô pé banshoq lé sê gyô é nyan, sumsé hpaqchyí banshoq lé wó é eq, bùm pé lé wó htot nhang é lumjíng myit bo é nghut kôlhang, chyitdap myit a bo é nghut jáng, ngò haí a nghut sù dut berâ nghut lhê. ³Ngò gi, wó é sutzè banshoq myùng bang lé byí pyâm é eq, ngá é gungdu lé nyhê pyám râ matú ap pyâm é nghut kôlhang, chyitdap myit a bo é nghut le gi, hai akyû a bò nghut ri.

⁴Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbùn é nghut lhê. ⁵Chyitdap myit gi, hpau a dap é hkyô a kut, yhumsing é akyû baú za a hô, lui za nhikjum a yo, shut é mara a matsíng é nghut lhê. ⁶Chyitdap myit gi, agè ashop é má a gabú é za, haú tengmán hkyô má gabú nyi ri. ⁷Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

⁸Chyitdap myit gi, hkâ-nhám le htâm byuq é a nghut. Myiqhtoi htoí é hkyô pé gi, byuq byuq râ nghut lhê; laklaí dang ahú hú ge taí é hkyô gi, zim byuq râ nghut lhê; sumsé hpaqchyí hkyô gi, laí ló byuq râ nghut lhê. ⁹Hkâsu mù gâ le, nga-nhúng sê é gi, ra-am rahtâng ru nghut lhê. Nga-nhúng myiqhtoi htoí é gi, ra-am rahtâng ru nghut lhê. ¹⁰Nghut kôlhang, gumjup hkyô jé lé é hkûn, a gumjup hkyô gi, byuq byuq râ nghut lhê. ¹¹Ngò, zoshâng nghut ashí hkûn gi, zoshâng dông dang taí, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô pyám bê nghut lhê. ¹²Ahkuí, nga-nhúng gi, myoqjàm hkaú má é rago a sân é wupzo lé za myàng é nghut lhê; nghut kôlhang, htâng má, myoqdong hkyûm wó myàng râ nghut lhê. Ahkuí, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé râ nghut lhê.

¹³Ahkuí, lumjíng myit, myit myoqbyu hkyô, chyitdap myit shi sôm lhum myit tô ri. Nghut kôlhang, haú pé mâ é kô dik é gi, chyitdap myit nghut ri.

14

Myiqhtoi Htoi É Chyunghuq Pé Eq Laklaí Dang Nyo É Chyunghuq Pé

¹Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoí é chyunghuq lé je riyhang myit o nyi keq. ²Hkâsu mù gâ le, laklaí dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haú Woi-nyí èq nyo htoq é nghut ri. ³Nghut kôlhang, myiqhtoi htoí é sù yuq hkangmó gi, byu pé lé wum byi dang eq nhik tíng dang taí ri. ⁴Laklaí dang rahú nyo é sù gi, yhumsing gùng lé htubqbang byí ri, nghut kôlhang, myiqhtoi htoí é sù gi, noqkuq hpúng lé htubqbang byí ri. ⁵Ngò gi, nungmoq yuq hkangmó laklaí dang ahú hú pé nyò râ lé ô nau ri, nghut kôlhang, nungmoq myiqhtoi htoi râ lé je ô nau é nghut lhê. Hkâsu mù gâ le, laklaí dang ahú hú nyo é sù gi, haú noqkuq hpúng lé wó htubqbang râ matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

⁶Ahkuí, gumang wui ê, ngò gi, nungmoq chyáng lé jé mù, laklaí dang pé nyo é nghut kôle, shing-rán nghut nghut, sumsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a taí kyô é nghut le gi, nungmoq é matú ngò hai akyû htoq râ lhú? ⁷Htê lhoq htoq é asak a bo jung zè pé má lhang gi, sampyí nghut nghut, tíng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé râ lhú? ⁸Dum, tut htê le gam hkoq é dông a mut kyô é nghut jáng, majan htoq râ rì rì ó yuq wá hên râ lhú? ⁹Nungmoq chyáng le haú dông nghut lhê. Nang, laklaí dang ahú hú nyo le, sê gyô é danghkun mai nyo é za a nghut jáng, nang haí taí nyi é lé ó yuq wá hkâsu wó sé râ lhú? Nungmoq gi, maulat má za taí hâng pyâm nyi kó râ nghut lhê. ¹⁰Mingkan má dang ahú hú yhang joq é nghut lhê, nghut kôle, dang lichyúm a htoq é dang gi,

a joq é nghut lhê. ¹¹ Haû mù luî, rayuq yuq haî taî nyi é lichyúm lé ngò a dat chyup é nghut jáng, ngò gi, haû dang taí su é matú maigan byù dut mù, yhang gi, ngá é matú maigan byù dut é nghut lhê. ¹² Nungmoq chyáng le haú dông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekô nghut mù, haú noqkuq hpúng lé kô myhâng nhang é chyunghuq pé lé je ho shikut nyi keq.

¹³ Haû nghut é yanmai, laklaí dang ahú hú taí é sù ó yuq le, yhang haû taí é lichyúm wó taí sân kyo sháng gaq, kyûdung râ dut lhê. ¹⁴ Hkâsu mù gâ le, laklaí dang ahú hú dông ngò kyûdung é nghut jáng, ngá é woi-nyí mai dúng é nghut lhê; nghut kôlhang, ngá é myitnyân é matú, hai akyû a wó nghut ri. ¹⁵ Haû mù, ngò hkâsu kut râ lhú? Ngò gi, ngá é woi-nyí mai le kyûdung râ, ngá é myitnyan mai le kyûdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê. ¹⁶ Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang mâ é rayuq gi, nungmoq haî taí é lé a sê é nghut mù, nungmoq jeju hkya-on é hkûn, "Amen" ga hkâsu wó taí râ lhú? ¹⁷ Nungmoq gi, ge dik shoq jeju hkya-on kô é abe, nghut kôlhang, góbang gi, htuqbâng é a hui kó nghut ri.

¹⁸ Ngò gi, nungmoq banshoq bâng htoq má laklaí dang ahú hú je wó taí é yanmai, Garai Gasang lé jeju bûn ri. ¹⁹ Nghut kôlhang, noqkuq hpúng má, laklaí dang rahû dông danghkun ramun ngò taí râ htoq má, góbang lé mhoqshit râ akyû bo é dang ngo hkun taí râ lé ngò je ô nau ri.

²⁰ Gumang wuî ê, zoshâng wuî su myit nyi é lé nô pyám keq. Agè ashop hkyô eq sêng é má gi, nyheqnú dông kut mù, nungmoq myit é hkyô má gi, ko bang dông kut keq.

²¹ Haû jep é tarâ má kâ tô é gi,

"A wó gyô wú é dang dông mai le, góming byu pê é nhutwuî dông mai le, byù shí bang lé ngò taí râ nghut lhê; nghut kôlhang, yhangmoq gi, ngá dang gyo kó râ a nghut."

ga Yhumsîng taí ri. ✠

gâ ri.

²² Haû mù, laklaí dang ahú hú nyo é hkyô gi, lumjínng bâng matú kumlhá a nghut é

za, a lumjínng bâng matú sheq ru nghut lhê. Myiqhtoi dang kúm gi, a lumjínng bâng matú a nghut é za, lumjínng bâng matú sheq ru nghut lhê. ²³ Haû nghut mù, noqkuq hpúng gón chôm zing mù, yuq hkangmó laklaí dang ahú hú nyò kô é nghut jáng, a sê gyô é bang nghut nghut, a lumjínng é bang nghut nghut, wang lé kô é hkûn, yhangmoq gi, nungmoq nâ bùm bekô ga a taí kó râ nghut lhê lhú? ²⁴ Nghut kôlhang, yuq hkangmó, myiqhtoi dang taí nyi é u má, a lumjínng sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq èq lhoq pûn kyîng é hui râ eq, banshoq èq jéyáng é hui râ nghut é htoq agó, ²⁵ yhâng é i-myit má zaú tô é hkyô pé lé de de lhoq htoq shit é hui râ nghut lhê. Haû mù, yhang gi, ngóm gop luî, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga taí pyo htoq kat râ nghut lhê.

Shuq Shuq Tap Tap Za Noqkuq Râ Hkyô

²⁶ Haû jáng, gumang wuî ê, nga-nhúng haî taí râ lhú? Nungmoq rahá lé chôm zîng é hkûn, yuq hkangmó gi, Garai hkya-on mahkôn nghut nghut, mhoqshit é dang nghut nghut, shing-rán nghut nghut, laklaí dang ahú hú nyo é hkyô nghut nghut, taí sân kyô é nghut nghut pé lé, wó le ge ri. Haú pé banshoq gi, noqkuq hpúng lé wum-o byi râ matú chyat kut é dut râ lhê. ²⁷ Rayuq yuq, laklaí dang ahú hú nyo é nghut jáng, í yuq eq myô htum sum yuq mai a laí é za, rayuq htâng rayuq nyò râ dut é htoq agó, rayuq yuq haû lé taí sân kyo ra râ dut lhê. ²⁸ Taí san kyô é sù a nyi é nghut jáng, laklaí dang ahú hú nyo é sù gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lhê.

²⁹ Myiqhtoi í yuq nghut nghut, sum yuq nghut nghut taí kyo râ dut lhê; góbang gi, haî taí é lé rago gyô chyam wú râ dut lhê.

³⁰ Nghut kôlhang, zung tô é sù rayuq yuq chyáng shing-rán jé é nghut jáng, hí taí nyi é sù gi, nô byuq râ dut lhê. ³¹ Hkâsu mù gâ le, yuq hkangmó gi, mhoqshit é eq myit wum byî é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoí é nghut lhê. ³² Haû

myiqhtoî pê é woi-nyí pé gi, myiqhtoî pé uphkan é a-ô má nghut nyi ri. ³³Hkâsu mù gâ le, Garai Gasang gi, atau ahû dut é Garai Gasang a nghut é za, nguingón hkyo é Garai Gasang ru nghut lhê.

Sân-yúng bâng zing tô é hpúng banshoq mâ é eq rajung za, ³⁴myiwe wui gi, noqkuq hpúng pé má zim za nyi râ dut lhê. Yhangmoq gi, dang taí ahkáng a wó é nghut mù, haû jep é tarâ má bo é eq rajung za a-ô má nyi kó sháng gaq. ³⁵Yhangmoq gi, rajung jung sé naû kô é nghut jáng, yhûm má yhangmoq é yhumsing hpô pê chyáng myi kó sháng gaq; hkâsu mù gâ le, myiwe rayuq noqkuq hpúng má dang taí é gi, ahoq ahí hkyô nghut ri.

³⁶Haû Garai Gasâng é mungdang gi, nungmoq chyáng mai htoq lo é nghut lhê lú? Haû gi, nungmoq chyáng za lé jé bê nghut lhê lú? ³⁷Rayuq yuq, yhang gi, myiqhtoi, a nghut jáng, woi-nyí chyunghuq byí é hui sù nghut lhê ga myit é nghut jáng, ngò, nungmoq lé ká byí é pé gi, haû Yhumsing é hkunmó nghut é lé, yhang sê yù sháng gaq. ³⁸Yhang gi, haû lé haî su a ngàm kut é nghut jáng, yhânggùng le, haî su a ngàm kut é hui zo râ nghut lhê.

³⁹Haû mù luí, ngá é gumang wui ê, myiqhtoi htoi râ lé ô nau nyi mù, laklaí dang ahú hú nyo é lé hkâhkûm pyám kó. ⁴⁰Nghut kôlhang, jung hkangmó gi, htuk é đông eq shuq shuq tap tap zâ é hkyô đông kut é dut râ lhê.

15

Hkrisduq É Dui Toq Hkyô

¹Gumang wui ê, ngò, nungmoq lé hko kyo bê nghut mù, nungmoq le hap yù luí, nungmoq yap gîng tô é jowò nghut é gabú danglù hkyô lé, ahkuí, ngò, nungmoq lé lhoq pûn kat nau ri. ²Ngò, nungmoq lé hko kyo bê é mungdang lé, nungmoq ging ging myhik zing nyi kô é nghut jáng, nungmoq gi, gabú danglù hau é yanmai hkyi yù huí é nghut akô. Haû a nghut jáng, nungmoq lumjîng é gi, akôm dut bê nghut lhê.

³Ngò hap yu tô é pé lé, sâng-hi ahkyak é đông, ngò, nungmoq lé lhai byi bê nghut lhê. Haû pé gi: Chyúmdang eq rajung za, Hkrisduq gi, nga-nhùng é yubak marâ é matú shí hkám byi bê gâ é nghut ri; ⁴Yhang gi, myhup yhûm é hui luí, Chyúmdang eq

rajung za sum nyí nghu é nyí má lhoq dui toq é hui bê nghut mù, ⁵Petruq lé htoq shit luí, haû lagyo raxe í yuq lé le htoq shit ri. ⁶Hau htâng má, Yhang gi, ra-u má za, gumang wui ngo shô yuq chyân lé htoq shit ri. Haû bang mâ é myo hpyang gi, ahkuí jé shoq asak dui nyi bum akô; ra-am kúm gi, shi ló byuq bekô nghut ri. ⁷Hau htâng, Yhang gi, Yakuq lé htoq shit mù lagyo pé banshoq bang lé htoq shit ri. ⁸Ló htâng má, Yhang gi, hkû buinyi a jé shí é má hku é đông nghut sù ngo lé le htoq shit bê nghut ri.

⁹Hkâsu mù gâ le, ngò gi, lagyo pé mâ é tiq dik sù nghut lhê. Haû Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghû râ lháng a gingdán é sù nghut lhê. ¹⁰Nghut kôlhang, ngò ahkuí îsu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq má je riyhang mù wùn waq shikut lhê. Haû gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê. ¹¹Haû mù luí, ngò nghut nghut, yhangmoq nghut nghut, ngamoq hko kyô é gi, haû hkyô chyat nghut lui, nungmoq lumjîng é le, haû hkyô nghut ri.

Shi Byuq Bâng É Dui Toq Hkyô

¹²Nghut kôlhang, haû Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq mâ é ra-am gi, shi byuq bâng é dui toq hkyô a joq nghû, hkâsu wó taí kó râ lú? ¹³Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berâ a nghut. ¹⁴Hau htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjîng hkyô gi, akôm dut byuq râ nghut lhê. ¹⁵Hau htoq agó, Garai Gasang gi, haû Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat râ a nghut. ¹⁶Hkâsu mù gâ le, haû shi byuq bang lhoq dui toq é a huí é nghut jáng, Hkrisduq le, lhoq dui toq é hui berâ a nghut. ¹⁷Hkrisduq gi, lhoq dui toq é a

huí é nghut jáng, nungmoq é lumjínq hkyô gi, akôm dut luí, nungmoq gi, nungmoq é yubak mara hkaû má ru nyi nyi shi kó râ nghut lhê. ¹⁸ Haû nghut jáng, Hkrisduq má shi ló byuq bê bang le, htên byoq byuq râ za nghut lhê. ¹⁹ Nga-nhúng gi, shí ipyat lhê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó râ nghut lhê.

²⁰ Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri. ²¹ Hkâsu mù gâ le, shî-nò hkyô gi, byù rayuq đông mai lò bê nghut é eq rajung za, shi byuq bâng é dui toq hkyô le, byù rayuq đông mai lo é nghut lhê. ²² Hkâsu mù gâ le, lhunglhâng bang gi, Adam é yanmai shi byuq é su, lhunglhâng bang gi, Hkrisduq eq rading ralhum za nghut é yanmai lhoq dui toq é hui râ nghut lhê. ²³ Nghut kôlhang, yuq hkanqmó gi, ó le ó âng é hkûn lhoq dui toq é hui râ nghut lhê: Hkrisduq gi, sâng-hi lhoq dui toq huí é sù nghut lhê. Hau htâng má, Yhang jé lé é hkûn, Yhang eq sêng é bang lhoq dui toq é hui râ nghut lhê. ²⁴ Hau htâng, jiltâm jé râ nghut lhê; haû hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haû Íwa nghut sù Garai Gasang lé mingdán ap byi râ nghut lhê. ²⁵ Hkâsu mù gâ le, Yhang gi, Yhâng é gye pé banshoq lé, Yhâng é hkyî wang ô má tô pyâm é hkûn jé shoq up nyi ra râ nghut lhê. ²⁶ Haû lhoq htên pyâm é hui râ nghut é ló htâng é gye gi, shî-nò hkyô nghut ri. ²⁷ Hkâsu mù gâ le, "Garai Gasang gi, jung hkanqmó lé, Yhâng é hkyî wang ô má tô pyâm bê nghut ri." ✧ gâ Chyúmdang má kê tô ri. "Jung hkanqmó lé" Yhâng é a-ô má tô pyâm bê ga taí é hkûn, jung hkanqmó lé Hkrisduq é a-ô má tô pyâm bê sù Garai Gasang yhang kúm a lom é hkyô, san za nghut nyi ri. ²⁸ Yhang gi, haû hkyô ban kut é htâng má, haû Zo yhang le, jung hkanqmó lé Yhâng é a-ô má tô byi bê sù Garai Gasang é a-ô má nyi sù dut nhang é hui râ nghut mù, Garai Gasang gi, lhunglhâng htoq má gyaú sù nghut luí, lhunglhâng lé sîng sù nghut râ nghut lhê.

²⁹ Dui toq hkyô a joq é ru nghut le gi, shi byuq bê bâng é matú wui-myhup hkám byi bùm kô é gi, hai akyû bò kó râ lhú? Haû shi byuq bang lhoq dui toq é a hui kô é ru nghut le gi, yhangmoq matú haí mù byu pé wui-myhup hkám yù kó râ lhú? ³⁰ Ngamoq gi, ngamoq é matú, hkyíng hkanqmó haí mù chiq râ jowò má nyi râ lhê lhú? ³¹ Gumang wui ê, ngò gi, nyí wui aluq shoí shoí shi é hui zô é nghut lhê. Haû su nghû é gi, nga-nhúng é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê. ³² Ngò gi, xângzo hkyam đông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò râ lhú? Shi byuq bang lhoq dui toq é a huí é ru nghut le gi,

"Nga-nhúng gi, napmá shî râ nghut é yanmai, zo sháng, shuq sháng." ✧

nghû râ za nghut lhê.* ³³ "A ge é zùm yap luzúm wui gi, ge é nyi yap sâmlai lé hten nhang é nghut lhê." gâ é sanghkyang eq rajung za, hkyô shuí nghoq é hkâhui zo kó! ³⁴ Nungmoq gi, tau bûn gyíng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akô. Ngò haû su nghû taí é gi, nungmoq hoq bun râ matú nghut lhê.

Dui Toq É Gungdu

³⁵ Nghut kôlhang, rayuq yuq gi, "Haû shi byuq bê bang, hkâsu kut lhoq dui toq é hui kó râ lhú? Yhangmoq gi, hkasû é gungdu nghut kó râ lhú?" ga myi râ nghut lhê. ³⁶ Haû-í nghâ sù ê! Nàng hô hkyô kat é pé gi, shi byuq é za a nghut jáng, yuq htoq lô râ a nghut mhaí. ³⁷ Nàng, kyô hkyô é hkûn, yuq lò râ nghut é agàm lé hô hkat e a nghut é za, sungso amyui nghut nghut, gotû amyui rajung jung nghut nghut lé za hô kat é ru nghut lhê. ³⁸ Nghut kôlhang, Garai Gasang gi, Yhang myit hpyit to bê eq rajung za haû lé gungdu ralhum byi mù, kyôshi myui hkanqmó lé, ó le ô é gungdu byi ri. ³⁹ Gungsho lhunglhâng gi, rajung za a nghut. Byù pé é gungsho gi, rajung, dusak pé é gi, gó jung, nghoq pé é gi, gó jung, ngozo pé é gi, gó jung ru nghut lhê. ⁴⁰ Mauhkûng gùng pé le joq é nghut luí,

✧ 15:27 Hkya-on 8:6 ✧ 15:32 Esai 22:13 * 15:32 Dang ngho shî gi, a lumjínq bang taí é dang nghut lhê.

myidam gùng pé le joq ri; nghut kôlhang, mauhkûng gùng pê é shing kang gi, rajung, myidam gùng pê é shing kang gi, gó jung ru nghut lhê. ⁴¹ Haû bui má bo é shing kang gi, rajung, lhamó mâ é gi, gó jung, kyî pé mâ é gi, gó jung ru nghut lhê; kyî racham eq rachâm é shing kang le gotû tû shai lhûm lhê.

⁴² Haû mù, shi byuq bê bâng é dui toq hkyô le, haû eq rajung za nghut ri. Haû hô hkyô kat é gungdu gi, htên byoq sê é nghut luí, lhoq dui toq huí é gungdu kúm gi, htên byoq a sê é nghut lhê. ⁴³ Hô hkyô kat é hkûn gi, aróng a bò, lhoq dui toq huí é hkûn gi, hpungwup shing kang bo ri. Hô hkyô kat é hkûn gi, wum nyhóm mù, lhoq dui toq huí é hkûn gi, a-tsam bo ri. ⁴⁴ Gungsho gungdu gi, hô hkyô é hui mù, woi-nyí gungdu gi, lhoq dui toq é huí ri.

Gungsho gungdu joq é nghut le gi, woi-nyí gungdu le joq é nghut lhê. ⁴⁵ Haû nghut mù, "Haû sâng-hi yuq byù Adam gi, asak dui é xângzo dut bê nghut ri." ✧ ga kê tô ri. Haû lô htâng é Adam kúm gi, asak byî é woi-nyí nghut ri. ⁴⁶ Haû woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê. ⁴⁷ Haû sâng-hi yuq byù gi, myidàm mâ é tseyûn lé saí é nghut mù, htang lhê yuq byù gi, mauhkûng htoq mâ é nghut ri. ⁴⁸ Haû myidàm byù nghut sù su, myidàm eq sêng é bang le nghut nyi akô; haû mauhkûng htoq mâ é byù nghut sù su, mauhkûng eq sêng é bang le nghut nyi akô. ⁴⁹ Nga-nhúng gi, myidàm byù é gunghkyâng isâm lé hkam yù bê nghut é su, mauhkûng htoq mâ é byu é gunghkyâng isâm lé le myang hkam yù râ nghut lhê.

⁵⁰ Gumang wui ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yû râ a nghut, htên byoq sê é le, htên byoq a sê é silí wunlí lé wó yû râ a nghut. ⁵¹ Gyo to keq, zaú tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq râ a nghut é za, htaí lhik é hui râ ru nghut lhê. ⁵² Haû gi, lô htâng é tut htê mying é hkûn, rallhap za, myoqkuq ralap má dut râ nghut lhê. Hkâsu mù gâ le, tut htê mying râ nghut lhê, haú hkûn, shi byuq bê bang gi, htên

byoq a sê é shut lhoq dui toq yu é hui râ nghut mù, nga-nhúng gi, htaí lhik é hui râ nghut lhê. ⁵³ Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù râ dut é nghut lhê. ⁵⁴ Haû htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, "Shî-nò hkyô gi, ûng budâng eq myui pyâm é hui bê nghut ri." ✧ ga kê tô é eq,

⁵⁵ "Shî-nò hkyô ê, náng é ûng budang gi, hkâmá lhú? Shî-nò hkyô ê, náng é nyin gi, hkâmá lhú?" ✧

gâ tô é sanghkyang gi, dik râ nghut lhê.

⁵⁶ Haû shî-nò hkyô é nyin gi, yubak mara nghut ri; yubak marâ é a-tsam gi, jep é tarâ nghut ri. ⁵⁷ Nghut kôlhang, Garai Gasang lé jeju hkya-ôn lhê! Yhang gi, nga-nhúng é Yhumsîng Yesuq Hkrisduq đông mai, nga-nhúng lé ûng budang byî é nghut ri.

⁵⁸ Haû mù luí, ngá é chyitdap gumang wui ê, yap gingtîng nyi keq. Hai eq le, nungmoq lé hkâlhoq dui nún nhâng kó. Nungmoq gi, haû Yhumsîng má nungmoq wùn waq é muzó akôm a nghut é lé sé kô é nghut lhê yanmai, haû Yhumsing é muzó lé ayang wùn waq shikut nyi keq.

16

Yerusalem Wà Mó Mâ É Lumjîng Bâng É Matú Alu Hkyuî Râ Hkyô

¹ Ahkuí, Garai Gasâng é byu pê é matú alu hkyuî râ hkyô eq séng luí gi, haû Galatiq mau mâ é noqkuq hpûng pé lé ngò kut nhang é su kut keq. ² Ngò jé lé é hkûn, alu hkyuî râ hkyô a kut ra râ đông, bat hkangmó mâ é sâng-hi nyí má, yuq hkangmó gi, yhumsîng wó ho é má cháng mù, gam tô to lánq keq. ³ Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó má ê dé nhâng râ nghut lhê. ⁴ Ngò le ê ang râ dut é nghut jáng, yhangmoq gi, ngá é byinzùm kut râ nghut lhê.

Poluq Lum Kat É Hkyô Pé

⁵ Ngò gi, Makedoni mau laí byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau laí byit râ

✧ 15:45 Apûn 2:7 † 15:45 Lô htâng é Adam gi, Yesuq lé taí nau é nghut lhê. ✧ 15:54 Esai 25:8 ✧ 15:55 Hos 13:14

za nghut lhê. ⁶Ngò hkâmá ê kôlhang, ngá é hkyowuì má nungmoq wó garúm kat kó râ matú, ngò gi, rayoq zo nghut nghut, gy-oqmyò lhang lai shoq nghut nghut, nungmoq eq rahá nyi abe. ⁷Ngò gi, laí ló uchyang za nungmoq lé lé kum râ nghut mù, ahkuí wó myâng râ lé a nau é nghut lhê; ngò gi, haú Yhumsîng dóng é nghut jáng, nungmoq eq rahá rayoq nyi râ lé myit myoqbyu lhê. ⁸Nghut kôlhang, ngò gi, Penteko-ti poí buinyi jé shoq Ehpesu myuq má nyi râ nghut lhê. ⁹Haí mù gâ le, ngo lé htuoq htîng é bang myo myo nyi é nghut kôlhang, akyû htoq é muzó é matú hkum mó ngo lé hpông to byí é yanmai nghut lhê.

¹⁰Timohti jé lé jáng, yhang, nungmoq eq rahá nyi é u má, gyuq é hkyô haí le a joq râ matú wú byi keq; hkâsu mù gâ le, yhang gi, haú Yhumsîng é muzó lé, ngò su wùn waq wún é sù nghut lhê. ¹¹Haú mù, ó yuq le, yhang lé hkâwú shóm kó. Yhang gi, ngá chyáng wó dum taú jé sháng gaq, yhang é hkyowuì má nguínón é dông nhang kat keq. Haú gumang wuì eq rahá lò kó râ lé, ngò myit láng nyi lhê.

¹²Ahkuí, nga-nhûng é gumang Apolo é hkyô eq séng luí ga jang: yhang gi, haú gumang wuì eq rahá nungmoq chyáng lé râ lé, ngò, gyai yhang wum taí tsuq lhê. Yhang kúm gi, ahkuí lé nau é myit a dê bò shi, nghut kôlhang, yuqyo é ahkyíng wó jáng, yhang lé lô râ nghut lhê.

¹³Machya nyi keq; lumjîng hkyô má ging ging tíng tíng yap nyi keq; gyuq kyum myit hkâbô kó; wum bo nyi keq. ¹⁴Jung hkangmó lé, chyitdap myit eq zui saí keq.

¹⁵Stehpana eq yhang é yhumbyù wuì gi, Ahkaia ming má sâng-hi hpúng wâng bang nghut luí, yhangmoq gi, yhumsîng gùng lé, haú sân-yúng bâng é dojaú hkyô má ap nóng bekô lé, nungmoq sê akô nghut ri. Gumang wuì ê, ngò, nungmoq lé wum taí tsuq kat kôlé, ¹⁶haú sù é bâng é a-ô má le, haú muzó má bo wang lóm mù, mú zui shikut bang yuq hkangmó é a-ô má le, nyi keq. ¹⁷Ngò gi, Stehpana, Hportunatu eq Ahkaiku pé jé lo é hkûn, gyai gabú é nghut lhê, haí mù gâ le, yhangmoq gi, nungmoq a kut byí é hkyô lé, lhoq pyíng byi bekô nghut ri. ¹⁸Hkâsu mù gâ le, yhangmoq gi, ngá é woi-nyí eq nungmoq é woi-nyí lé

lhoq ngón byi bekô nghut ri. Haú sù é bang lé, hpautap nyi keq.

Ló Htâng É Shi-kyám Dang

¹⁹Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhûm má chôm huí é noqkuq hpúng lé, haú Yhumsîng má nungmoq lé gyai yhang shi-kyâm kat akô. ²⁰Shí má nyi é gumang wuì ban-shoq bang gi, nungmoq lé shi-kyâm kat akô. Rayuq eq rayuq chyoiyúng é chyitpuq èq shi-kyâm lhum keq.

²¹Ngò, Poluq gi, shi-kyám dang shí lé, ngá é loq èq yhang ká é nghut lhê.

²²Rayuq yuq, haú Yhumsîng lé a chyitdap é nghut jáng, haú yuq gi, nhîng pyâm é hui sháng gaq. Yhumsîng ê, jé lé aq hkoi!

²³Haú Yhumsîng Yesuq é jeju gi, nungmoq eq rahá nghut nyi sháng gaq.

²⁴Ngá é chyitdap myit gi, Hkrisduq Yesuq má nungmoq banshoq bâng chyáng joq nyi sháng gaq. Amen.

KORINHTUQ
Pê Chyáng Htang Dàm Hun Kat
é Laiká
(2 Corinthians)

¹ Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhùng é gumang Timohti le kut, Korinhtuq myuq mâ é, Garai Gasang é noqkuq hpúng lé le, Ahkaia mau gón mâ é sân-yúng bang banshoq chyáng le, dang kyô kat lhê: ² Nga-nhùng é Íwa nghut é Garai Gasang eq haû Yhumsîng Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyî sháng gaq.

Nhik tíng hkyô banshoq é Garai Gasang

³ Nga-nhùng é Yhumsîng Yesuq Hkrisduq é Yhângwa eq Garai Gasang, shogyo nhikmyin hkyô é Íwa eq nhik tíng hkyô banshoq é Garai Gasang gi, hkya-on kung-ton é huî nyî sháng gaq. ⁴ Garai Gasang chyáng mai ngamoq wó yû bê nghut é nhik tíng hkyô eq, hkasû é wuîhke hkyô hui bang lé le nga-nhùng wó nhik tíng byi sháng gaq ga, Yhang gi, ngamoq é wuîhke hkyô banshoq má nhik tíng byî ri. ⁵ Hkâsu mù gâ le, Hkrisduq hui zô é jamjau hkyô myo myo lé ngamoq bo hui zô é su, Hkrisduq đông mai, ngamoq é nhik tíng hkyô le byíng mui nyi é nghut lhê. ⁶ Ngamoq, myit myo uhkyî é huî é nghut jáng, nungmoq é nhik tíng hkyô eq hkyi yû hkyô é matú nghut nyi ri; ngamoq, nhik tíng é huî é nghut jáng, nungmoq é nhik tíng hkyô é matú nghut luî, haû gi, ngamoq jamjaû é eq rajung za nghut é jamjau hkyô lé, myit hing é đông mai wó jân pyám râ a-tsam, nungmoq chyáng lhoq htoq byî é nghut lhê. ⁷ Haû mù, ngamoq é jamjau hkyô pé má nungmoq bo lòm bekô nghut é su, ngamoq é nhik tíng hkyô má le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

⁸ Gumang wuî ê, Asia mau má, wuîhke jamjaû é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lhang htum shoq

hpuzô é nghut luî, ngamoq gi, asak duì lo râ lhang a myit myoqbyu lô é nghut lhê. ⁹ Gè gè yhang, ngamoq gi, sat hui berâ nghû, ngamoq é i-myt má lumjîng pyâm é nghut lhê. Nghut kôlhang, haû gi, ngamoq gùng ngamoq a lumhkau é za, shî bê bang lé lhoq dui toq sù Garai Gasang lé lumhkaû râ matú dut é nghut lhê. ¹⁰ Garai Gasang gi, haû sù é shî râ hkyô mai hkyi yû bê nghut mù, ngamoq lé hkyi yû râ za nghut lhê. Yhang gi, ngamoq é matú nungmoq kyûdung byî nyi é u má, xoq luî ngamoq lé hkyi yû râ za nghut lhê nghû, ngamoq gi, Yhang lé myit myoqbyu to bê nghut luî, ¹¹ myo myo kyûdung byî é lé gyo byî é má ngamoq shimân jeju wó mù, byû myo myo gi, ngamoq wó é shimân jeju é yanmai Garai Gasang lé jeju hkya-on kó râ nghut lhê.

Poluq, Hen Tô É Muzó Htaî Pyâm É Lé Tai Hung É Hkyô

¹² Ngamoq nghutbun é gi, Garai Gasang chyáng mâ é chyoiyúng hkyô eq lhumzui hkyô má, mingkan zo wuî eq ngamoq asak duì bê hkyô lé le, je luî nungmoq eq zùm yap é hkyô lé le, ngamoq é myit sôn sê é hkyô eq, saksé hkâm byî é hkyô nghut lhê. Ngamoq haû su kut é gi, mingkan hpaqchyî byéng-yá đông mai kut é a nghut é za, Garai Gasang é jeju đông mai kut é ru nghut lhê. ¹³ Hkâsu mù gâ le, ngamoq gi, nungmoq a dat nghap é eq a sê gyô é haî le a ká byî kat é nghut lhê. Ngò, myit myoqbyu kat é gi, ¹⁴ nungmoq gi, ngamoq é hkyô ram lé wó sê gyô yû bê eq rajung za, haû Yhumsîng Yesuq é buinyî má nungmoq é hkyô lé ngamoq nghutbun râ nghut é su, ngamoq é hkyô lé nungmoq wó nghutbun râ matú, nungmoq, banshoq lé sê gyo kó râ nghut lhê.

¹⁵ Haû hkyô lé, ngò hkyak myit lum to bê nghut é yanmai, nungmoq gi, akyû í dam wó hkam yû kó sháng gaq nghû, ngò gi, nungmoq chyáng hí lé kum râ matú hen to bê nghut lhê. ¹⁶ Ngò gi, Makedoni mau shut e ló é hkyowuî má nungmoq lé hí lé kum mù, Makedoni mau mai nungmoq chyáng dum taû lò luî, Yuda mau shut e é hkyowuî má, nungmoq, ngo lé garúm kat kó râ lé myit lum to bê nghut lhê. ¹⁷ Ngò gi, haû hkyô hen é hkûn, agon za hen hkyut

é nghut lhê lú? Haû a nghut jáng, ngò hen é pé gi, ra-u má za, "Nghut lhê, nghut lhê." nghu é eq, "A nghut, a nghut." nghu é wó taí râ matú, mingkan myit đông hen é nghut lhê lú?

¹⁸Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" nghu é a nghut. ¹⁹Hkâsu mù gâ le, ngo èq le, Sila èq le, Timohti èq le, nungmoq chyáng hko kyo bê nghut é sù, Garai Gasang é Yhangzo Yesuq Hkrisduq gi, "Nghut lhê" nghu é eq "A nghut" nghu é sù a nghut é za, Yhang má gi, hkâ-nhám le "Nghut lhê" nghu é za joq lhê. ²⁰Hkâsu mù gâ le, Garai Gasang gi, danggidiq hkâ-myhó to kôle, haû pé gi, Hkrisduq má "Nghut lhê" chyat nghut lhê. Haû mù, Garai Gasang é hpungwup shingkâng é matú, Yhâng đông mai, nga-nhúng gi, "Amen" nghu taí é nghut lhê. ²¹Ngamoq eq nungmoq lé Hkrisduq má yap gingtíng nhang é sù gi, Garai Gasang nghut ri. Yhang gi, nga-nhúng lé masat é xú but byi mù, ²²Yhang sing lhê gâ é dizik, nga-nhúng lé htung tap byi luí, jé lô râ hkyô pé hkyak joq lhê nghu é masat zè đông, Yhâng é Woi-nyí lé nga-nhúng é i-myit unghkaû má kat byi bê nghut ri.

²³Ngò gi, nungmoq hkyamsa râ matú, Korinhtuq myuq má a dum taú lé é hkyô têng é lé, ngá é saksé dut râ đông Garai Gasang lé wut dúng lhê. ²⁴Haû gi, nungmoq é lumjíng hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chôm zui saí é ru nghut lhê; haû mù gâ le, lumjíng myit mai za nungmoq wó yap gíng nyi bùm kô é ru nghut lhê.

2

¹Haû mù luí, ngò gi, nungmoq lé myit nò nhang é dut râ đông, lé dum kúm é a kut râ nghu, myit hpyit to bê nghut lhê. ²Hkâsu mù gâ le, nungmoq lé ngò yón kuq nhang é nghut le gi, ngò yón kuq nhang bê bang nungmoq mai lai luí, ó yuq wá ngo lé wó gabú nhang râ lú? ³Ngò jé lé é hkún, ngo lé gabú nhang râ âng é bâng èq, ngo lé myit nò nhang é a hui sháng gaq nghu, ngò gi, ngò kut é eq rajung za laiká kâ kat bê nghut lhê. Ngá é gabú hkyô lé nungmoq banshoq bang wó bo gabú kó râ

nghut lhê nghu, nungmoq banshoq bang lé ngò hkyak myit lum tô lhê. ⁴Hkâsu mù gâ le, ngò gi, nungmoq lé laiká kâ é hkún, myit myo uhký mó èq le, myit má yón kuq é èq le, ngaubyi ngau-nhap é èq le, kâ kat bê nghut lhê. Haû gi, nungmoq lé yón kuq é hui nhang râ matú a nghut é za, nungmoq lé ngò hkâ-í chyitdap é hkyô lé sé nhang râ matú ru nghut lhê.

Mara Hkyut Byí Lhum Râ Hkyô

⁵Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haû hkyô eq séng luí, ngò gyai wá yhang zuq zuq a taí nau é nghut lhê. ⁶Nungmoq myo hpyâng èq yhang lé mara dam byí é hkyô gi, yhâng é matú gé bê nghut ri. ⁷Nghut kôlhâng, ahkuí, nungmoq gi, yhang a wó jan loshoq myit yón é a hui zo râ matú, yhang lé mara hkyut pyám byi mù, nhik tíng byi keq. ⁸Haû mù luí, nungmoq é chyitdap myit gi, yhang é ahtoq má dum lhoq gíng shit nyí keq nghu, nungmoq lé ngò wum taí tsuq kat lhê. ⁹Ngò, nungmoq lé haû mù laiká ká byí kat é hkyô gi, nungmoq chyam wú huí é hkyô lé wó jân é hkyô eq jung hkangmó má jino gyo hkyô bò a bo é lé, wó sé râ matú le nghut lhê. ¹⁰Nungmoq, rayuq yuq lé mara hkyut byí é nghut le gi, ngò le, haû yuq lé mara hkyut byí lhê. Mara hkyut râ rajung jung joq é nghut jáng, ngò mara hkyut é gi, Tsadán èq nga-nhúng lé a wó ùng râ matú, nungmoq é yanmai, Hkrisduq é myoq hí má ngò mara hkyut byi bê nghut lhê. ¹¹Hkâsu mù gâ le, Tsadán hen é hkyô pé lé nga-nhúng a sê é a nghut.

Dangshikaq Asik Mâ É Hpungmû Wùn Bang

¹²Ngò gi, Hkrisduq é gabú danglù hko kyo râ matú, Troa myuq má ê jé é hkún, haû Yhumsing gi, ngo lé hkum hpóng byí é lé, ngò myang ri. ¹³Nghut kôlhâng, ngò gi, ngá é gumang Tituq lé haû má a myang ho é yanmai, myit myo mù, yhangmoq lé shikyâm to luí, Makedoni mau shut xoq e ló é nghut lhê.

¹⁴Nghut kôlhâng, Hkrisduq má, ngamoq lé hkâ-nhám le ùng budang hkyô shut shuítu yù mù, Hkrisduq lé sê é sumsé hpaqchyí é nam ngón shôm lé, ngamoq đông mai jowò hkangmó má taí pyo é sù, Garai Gasang gi,

jeju hkya-ôn é huî nyi sháng gaq. ¹⁵ Hkâsu mù gà le, ngamoq gi, hkyi yu é huî nyi bâng chyáng le, htên byoq ló é huî nyi bâng chyáng le, Garai Gasâng é matú Hkrisduq é nam ngón shôm nghut nyi lhê. ¹⁶ Ngamoq gi, htên byoq nyi bâng é matú shî-nò hkyo é shôm dut mù, hkyi yù huî nyi bâng é matú nghut jáng, asak hkyo é nam ngón shôm dut é nghut lhê. Haû mù, ó yuq wá muzó shî eq htuk râ lhú? ¹⁷ Ngamoq gi, amyat wó râ matú Garai Gasâng é mungdang lé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé dông lhumzui myit mai taí é nghut lhê.

3

¹ Ngamoq gi, yhumsing gùng yhumsing dum owaq hi ló é nghut lhê lhú? Byù ram kut é su, nungmoq chyáng, ngamoq é matú htuqluq htuqáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq? ² Nungmoq gùng yhang gi, ngamoq é myit nhiklhum má kâ tô é, yuq hkangmó èq nghap luî sê yu é laiká gùng pé nghut akô. ³ Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng mâ é laiká nghut kô é hkyô lé shit nyi akô. Haû gi, kâ jung chî èq kâ tô é dông a nghut é za, rû dui nyi é Garai Gasâng é Woi-nyí èq kâ tô é nghut é htoq agó, luqlong pé má kâ tô é dông a nghut é za, xângzo byu é myit nhiklhum long pé má kâ tô é ru nghut lhê.

⁴ Haû su nghû hkyak wó myit lum é hkyô gi, Garai Gasâng é hí má, Hkrisduq dông mai ngamoq wó yu é nghut lhê. ⁵ Ngamoq gi, yhumsing gùng haî lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é nghut lhê. ⁶ Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haû gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gà le, laiká gi, shî dàm byi lhê, Woi-nyí kúm gi, asak byí é nghut lhê.

Dangshikaq Asik É Hpungwup Shingkang

⁷ Ahkuî, haû Mosheq é myoqdong mâ é hpungwup shingkang é yanmai, haû Israellaq byu pé gi, yhang é myoqdong lé a wó wú tsuq to kó nghut ri. Hpungwup shingkang haû shûm lo byuq sê é nghut kôlháng,

luqlong má dok kâ tô é, shî-nò hkyô lhoq htoq é tarâ muzó gi, hpungwup shingkang eq rahá jé lé é nghut lhê. ⁸ Haû su nghut jáng, haû Woi-nyí é muzó gi, hpungwup shingkang je riyhang dut râ a nghut kó lhú? ⁹ Gè gè yhang, haû byù lé mara byí é tarâ muzó lháng, hpungwup shingkang bo é nghut le gi, dingmán nhang é hkyô sik gi, je riyhang hpungwup shingkang bo é nghut lhê ô! ¹⁰ Hkâsu mù gà le, hpungwup shingkang bo é tarâ muzó gi, hpungwup shingkang je bo é dangshikaq asik eq whuí é hkûn, hpungwup shingkang a bò lo dut byuq bê nghut ri. ¹¹ Shum byuq ló é tarâ lháng gi, hpungwup shingkang eq rahá lé jé bê nghut le gi, ru gîng nyi é dangshikaq asik é hpungwup shingkang gi, je riyhang gyaú râ nghut lhê ô!

¹² Haû mù luî, ngamoq gi, haû sù é myoqbyù hkyô wó é yanmai, gyuq kyum myit a bo é hkyô shit é nghut lhê. ¹³ Ngamoq gi, Mosheq su a nghut. Yhang gi, duqbang é hkyô shûm byuq ló é hkûn, haû Israellaq byu pé haú lé a wú tsuq râ matú, yhang é myoqdong lé myoqgo èq nghop pyâm é sù nghut ri. ¹⁴ Nghut kôlháng, yhangmoq é myit gi, lhoq chut byí é hui bekô nghut ri; hkâsu mù gà le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byí ashí nghut ri. Haû gi, huî sêng pyâm é a hui shi, haî mù gà le, Hkrisduq dông za haû lé wó yu pyâm é nghut lhê. ¹⁵ Hkû-nyí jé shoq lháng, Mosheq é laiká lé nghap é hkûn, yhangmoq é myit nhiklhum má myoqgò èq nghop tô é nghut ri. ¹⁶ Nghut kôlháng, ó yuq le, Yhumsing chyáng hká u lhîng lò kôlháng, haú hkûn jáng, myoqgò gi, hî pyám byí é hui râ nghut lhê. ¹⁷ Yhumsing gi, haû Woi-nyí nghut mù, Yhumsing é Woi-nyí nyi é jowò má, luthkyô le joq lhê. ¹⁸ Haû Yhumsing é hpungwup shingkang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyi é hpungwup shingkang lhoq htoq byi hkyô nghut é, Yhang é isâm shut htaî lhik wang é huî nyi bê nghut lhê. Haú hkyô gi, haû Woi-nyí nghut sù Yhumsing chyáng mai lo é nghut lhê.

4

Tseyam Pé Má Bo É Sutzè

¹Ngamoq gi, Garai Gasâng jeju mai muzô hkyô haû wó é nghut mù, myit wum a gyuî é nghut lhê. ²Ngamoq gi, zaú tô é eq hoq htoq é hkyô pé lé tô pyám luî, mhaú zô é hkyô le a kut, Garai Gasâng é mungdang lé le ahpuq alhik a kut é bang nghut lhê. Haû su kut râ malaî, ngamoq gi, haû tengmán hkyô lé san za lhoq htoq shit é dông, Garai Gasâng é hí má yuq hkangmó é myit sôn sê é hkyô má, yhumsing gùng yhumsîng htuk shoq nyi lhê. ³Ngamoq é gabú danglù gi, myoqgo eq nghop pyâm é huî é nghut jáng, haû gi, htên byoq nyi bâng chyáng za nghop pyám huî é ru nghut lhê. ⁴Haû Garai Gasâng é azông isâm nghut sù, Hkrisduq é hpungwup shingkang bo é gabú danglù é maubó lé, a lumjîng bang a wó myâng kó sháng gaq ga, ipyat shi é garai* gi, yhangmoq é myit lé lhoq chit byi bê nghut ri. ⁵Haû nghut é yanmai, ngamoq gi, yhumsing gùng eq séng luî hko kyô é a nghut é za, Yesuq Hkrisduq gi, Yhumsîng nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lhê! ⁶Hkâsu mù gâ le, "Mauchut hkaû mai maubó htoq lô sháng gaq." ✨ ga taî é Garai Gasang gi, Yesuq Hkrisduq é myoqdong mâ é Garai Gasâng é hpungwup shingkang é maubó lé sê gyô é nyan lé, nga-nhúng lé byî é dông, Yhâng é maubó lé, nga-nhúng é i-myit unghkaû má duqbó nhâng bê nghut ri.

⁷Nghut kôlhang, ngamoq gi, sutzè haû bo é tseyam pé† nghut nyi lhê. Haû gi, gyaú dik é a-tsam mó gi, ngamoq chyáng mâ é a nghut é za Garai Gasâng chyáng mâ é nghut é hkyô lé tân shit râ matú nghut lhê. ⁸Ngamoq gi, wuîhke hkyo eq lhîngkyuq mai gyai yhang nhê zik é hui kôlhang, a gyop byuq é nghut lhê; myit lhoq nhúng pyâm é hui kôlhang, myit a htûm byuq é nghut lhê; ⁹zing-rî é hui kôlhang, kâng pyám huî é a nghut; bat lhêng pyâm é hui kôlhang, htên byoq huî é a nghut. ¹⁰Haû Yesuq é asak duî hkyô le, ngamoq é gungdu má lhoq htoq shit é hui sháng gaq nghû, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wún

é nghut lhê. ¹¹Hkâsu mù gâ le, Yesuq é asak duî hkyô gi, nga-nhúng é shî sê é gungdu má lhoq htoq shit é hui sháng gaq nghû, asak duî nyi é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyâm é huî nyi ri. ¹²Haû mù luî, shi byuq hkyô gi, ngamoq má mù zuî nyi ri; asak duî hkyô kúm gi, nungmoq má mù zuî nyi é nghut ri.

¹³"Ngò gi, lumjîng bê nghut lhê, haû mù, ngò taî é nghut lhê." ✨ ga kê tô é eq rajung za, ngamoq le, lumjîng hkyô hau eq yhang, lumjîng bê nghut mù taî é nghut lhê. ¹⁴Haû mù gâ le, haû Yhumsîng Yesuq lé shi é mai lhoq dui toq é Sû gi, ngamoq lé le, Yesuq eq rahá lhoq dui toq mù, nungmoq eq rahá, ngamoq lé Yhâng é hí má shuî jé râ nghut é lé, ngamoq sê lhê. ¹⁵Haû jeju wó é byu pé gi, je riyhang myô jat lò mù, Garai Gasâng é hpungwup shingkang é matú, jeju hkya-ôn é hkyô gi, byíng mui nyi sháng gaq ga, haú pé banshoq gi, nungmoq é akyu é matú nghut nyi ri.

¹⁶Haû mù luî, ngamoq gi, myit wum a gyuî é nghut lhê. Ngamoq é shinggan gungdu gi, htên byoq ló nyî kôlhang, i-myit unghkaû gi, ra-nyî eq ra-nyî asik dut nhang é huî nyi ri. ¹⁷Hkâsu mù gâ le, ngamoq é tiq é eq razup zâ é wuîhke hkyô pé gi, ngamoq é matú haú pê htoq gyai hkik é ahtum abyuq é hpungwup shingkang lé, wó yû nhang ri. ¹⁸Haû mù, nga-nhúng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

5

Mauhkûng Htoq Mâ É Yhûm

¹Haû myidàm zúm nghut é nga-nhúng lúng nyi é gungdu gi, htên byoq sê é nghut kôlhang, byu loq eq saî é a nghut é za, mauhkûng htoq má joq é ahtum abyuq é yhûm* nghut é, Garai Gasâng chyáng mâ

* 4:4 Ipyat shi é garai gâ é gi, Tsadán lé gâ é nghut lhê. ✨ 4:6 Apùn 1:3 † 4:7 Tseyam pé gâ é gi, nga-nhúng é wum nyhôm é gungdu lé gâ é nghut lhê. ✨ 4:13 Hkya-on 116:10 * 5:1 Mauhkûng htoq má joq é ahtum abyuq é yhûm gâ é gi, nga-nhúng, mauhkûng mingdán má jé é hkûn wó râ gungdu asik lé gâ é nghut lhê.

é yhûm lé, nga-nhúng wó é hkyô lé, nga-nhúng sê lhê. ²Nghut kôlhang, ahkuî, nga-nhúng gi, nga-nhúng é mauhkûng yhûm lé tû hut byî é lé gyai yhang hui naû mù, nò-kying su kyîng nyi lhê. ³Haî mù gâ le, nga-nhúng gi, hut byî é hui jáng, gungdu a bò bang a dut lo râ nghut lhê. ⁴Hkâsu mù gâ le, nga-nhúng gi, zúm shî má lúng nyi é u lé, wôlai wùn mù, nò-kying su kyîng nyi lhê; haû gi, shî byuq sê é lé, asak dui é èq wó htaî lhik pyám sháng gaq nghû, nga-nhúng gi, a hut byî é hui râ lé a ô nau é za, nga-nhúng é mauhkûng yhûm lé tû hut byî é hui râ lé ô nau é yanmai nghut lhê. ⁵Ahkuî kúm, jeju haû hkam yù râ matú, nga-nhúng lé lajâng to byî é sù gi, Garai Gasang nghut mù, jé lô râ hkyô gi, hkyak joq lhê nghû é masat zè đông, nga-nhúng lé haû Woi-nyí byi bê nghut ri.

⁶Haû mù luí, ngamoq gi, hkâ-nhám le hkyak lum tô lhê. Gungdu shî má yhûm đông ru lúng nyí nyí gi, haû Yhumsîng eq wê gâng nyi ashî nghut é lé ngamoq sê nyi lhê. ⁷Ngamoq gi, byu-myang é đông mai a nghut é za, lumjîng myit mai asak dui é ru nghut lhê. ⁸Ngamoq gi, hkyak myit lum tô lhê nghû, ngò taí lhê, haû mù, gungdu shî mai wê gang luí, haû Yhumsîng eq rahá nyi râ lé ngamoq je riyhang ô nau é nghut lhê. ⁹Haû mù, ngamoq gi, gungdu shî má yhûm đông lúng nyi é nghut nghut, haû mai wê gâng é nghut nghut, ngamoq myit myoqbyu tô é jowò gi, Yhang lé gabú nhâng râ matú nghut lhê. ¹⁰Hkâsu mù gâ le, yuq hkanmó gi, gungdu shî má yhûm đông lúng nyi é u lé, ge é nghut nghut, a ge é nghut nghut, kut é eq rajung za hkam yù râ matú, Hkrisduq é tarâ jéyáng tanghkuq hí má, nga-nhúng banshoq bang htoq shit ra râ nghut lhê.

Nguingón Hkyô Xoq É Muzó

¹¹Haû mù, Yhumsîng lé gyuq hkungga râ hkyô haî nghut é lé ngamoq sê é nghut luí, ngamoq gi, byu pé lé taí pún kyîng shikut lhê. Ngamoq haî nghut é gi, Garai Gasâng chyáng san za nghut nyí mù, nungmoq é myit sôn sê é hkyô má le san za nghut râ lé, ngò myit lum lhê. ¹²Haû myit nhiklum má bo é lé gumrông râ malaí, byu-myang é lé gumrong é bang lé, nungmoq wó tû taí kó sháng gaq nghû, ngamoq gi,

nungmoq chyáng yhumsing gùng lé dum owaq shikut é a nghut é za, ngamoq é hkyô lé, nungmoq wó gumrông râ ahkáng, nungmoq lé byî é ru nghut lhê. ¹³Ngamoq a gyîng é đông nghut le gi, Garai Gasâng é matú a gyîng é nghut lhê; ngamoq gyîng é đông nghut le gi, nungmoq é matú gyîng é nghut lhê. ¹⁴Hkâsu mù gâ le, Hkrisduq é chyitdap myit èq ngamoq lé kut nhang nyi é nghut lhê. Haû gi, banshoq bâng é matú rayuq shî hkám byi bê nghut mù, banshoq bang shi é đông nghut bê nghû, ngamoq hkyak sê gyô é yanmai nghut lhê. ¹⁵Yhang gi, asak dui nyi é bang, yhangmoq yhumsing gung é matú a duì lô é za, yhangmoq é matú shî hkám byi luí, lhoq dui toq é huí Su é matú duì kó sháng gaq ga, banshoq bâng é matú shî hkám byi bê nghut ri.

¹⁶Haû mù, ngamoq gi, ahkuî mai, ó yuq eq séng luí le, mingkan hkyam đông mai a wú lô é nghut lhê. Ngamoq gi, hí hkûn Hkrisduq lé haû đông wú é nghut kôlhang, haû su hkâ-nhám le a kut lô é nghut lhê. ¹⁷Haû nghut mù luí, rayuq yuq gi, Hkrisduq má nghut nyi é nghut jáng, yhang gi, asik hpân hui sù dut bê nghut ri; haû axau gi, byuq byuq mù, lhunglhang asik dut bunhung! ¹⁸Haû pé banshoq gi, Garai Gasâng chyáng mâ é chyat nghut lhê. Yhang gi, Hkrisduq đông mai nga-nhúng lé Yhânggùng eq nguingón hkyô xoq yû luí, nguingón hkyô xoq é muzó ngamoq lé byi bê nghut ri. ¹⁹Haû gi, Garai Gasang gi, byu pé é mara lé a matsîng byî é za, Hkrisduq đông mingkan lé Yhânggùng eq nguingón hkyô xoq yû bê nghut luí, Yhang gi, nguingón hkyô xoq yu é mungdang haû lé, ngamoq lé ap byî to bê nghû nau é nghut lhê. ²⁰Haû mù luí, ngamoq gi, Hkrisduq é gunglik pé nghut lhê mù, Garai Gasang gi, ngamoq đông mai nungmoq lé lhoq pún kyîng nyi é nghut lhê. Garai Gasang eq nguingón hkyô xoq yû keq nghû, ngamoq gi, Hkrisduq é gunglik đông nungmoq lé dúng tôngbán nyi lhê. ²¹Nga-nhúng gi, Hkrisduq đông mai Garai Gasâng é dingmán bang wó dut kó sháng gaq ga, Garai Gasang gi, yubak mara a bò Sû lé, nga-nhúng é matú yubak mara hkungga dut nhâng bê nghut ri.

6

¹Ngamoq gi, Garai Gasâng é mù zui by-

inzùm wuì nghut nyi é eq rajung za, Garai Gasâng jeju lé akyû a bo é đông hkâhap yù kó nghû, nungmoq lé wum taì tsuq kat lhê.

²Hkâsu mù gâ le,

"Ngò ô nau é ahkyíng má, nang lé ngò gyo byi bê nghut mù, hkyi yù hui rá buinyì má, nang lé ngò garúm bê nghut lhê."☆

ga luí, Yhang taì ri. Ngò, nungmoq lé taì kyo kôlé, ahkuí gi, Garai Gasang ô nau é ahkyíng, ahkuí gi, hkyi yu é buinyì nghut ri.

Poluq É Wuíhke Hkyô Pé

³Ngamoq é hpungmû gi, taì hpoí pyâm é a hui sháng gaq nghû, ngamoq gi, ó yuq é hkyô má le, leqbat jung a to byí é nghut lhê. ⁴Haù kut rá malaì, ngamoq gi, Garai Gasâng é dui-nhâng zoshâng wuì nghut é hkyô lé, hkyô hkangmó má yhumsing gùng yhumsing shit nyi lhê. Gyai hkam jân é hkyô má le, jamjau hkyô pé má le, wuíhke hkyô pé má le, myit myo uhkyí hkyô pé má le shit nyi lhê. ⁵Nhuq bat huí é pé má le, htóng lhung huí é eq toq gabyông é má htím é huí é má le, mù zui shikut é má le, a myang yhup é myín pé má le, zòmút huí é má le, shit nyi lhê. ⁶Sân-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyí eq chytidap myit akying má le, ⁷tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghû é laknak pé đông le, shit nyi lhê. ⁸Hpungwup shingkang byí é hui kô é đông eq a hkunggâ é hui kô é đông nghut kôle, a ge é luhkyang eq ge é luhkyang taí kôle, shit nyi lhê. Ngamoq gi, tengmán kôlhang, mhaú zo bang đông sôn yu akô nghut ri. ⁹Ngamoq lé sé kôlhang, a sê é đông kut akô nghut ri; shi ló nyí kôlhang, rû dui nyi é bang nghut lhê; nhuq bat é hui kôlhang, sat pyâm é a hui shí é bang nghut lhê. ¹⁰Yón hkyô byíng nhâng kôlhang, hkâ-nhám le gabú nyi lhê; myùng kôlhang, byù myo myo lé wó sùt nhang nyi lhê; haì le a wó kôlhang, jung hkangmó lé sing é đông nghut lhê.

¹¹Korinhtuq bang ê, ngamoq gi, nungmoq lé san za taí bê nghut luí, ngamoq é myit nhiklhum lé, nungmoq é matú làm

shoq hpông to byi bê nghut lhê. ¹²Ngamoq gi, ngamoq é chytidap myit lé, nungmoq chyáng mai lêng taù yu nyi é a nghut, nungmoq sheq, ngamoq chyáng mai lêng taù yu nyi kô é ru nghut lhê. ¹³Nungmoq le, myit nhiklhum lé làm shoq dum taù hpóng keq nghû, ngò gi, ngá zô pé lé đông taì lhê.

A Lumjínq Bang Eq A Nhunghkt Râ Hkyô

¹⁴A lumjínq bang eq rahá kundang hkâwaq kó. Hkâsu mù gâ le, dingmán é hkyô eq agè ashop é hkyô gi, haì sêng lhum lhê lú? Maubó eq mauchut gi, hkâsu wó zùm yap kó rá lú? ¹⁵Hkrisduq eq Beliala* gi, hkâsu kut myit wó huí lhum kó rá lú? Lumjínq sù rayuq eq a lumjínq sù gi, hkâsu wó pung lhum kó rá lú? ¹⁶Garai Gasâng é noqkuq yhûm eq hparà lhô pé gi, hkâsu wó hùm rá lú? Hkâsu mù gâ le, nga-nhúng gi, rû dui nyi é Garai Gasâng é noqkuq yhûm nghut lhê. Haù gi, "Ngò gi, yhangmoq eq rahá nyi mù, yhangmoq chyáng sô nyi rá nghut luí, Ngò gi, yhangmoq é Garai Gasang dut mù, yhangmoq gi, Ngá é byu pé dut kó rá nghut lhê."☆ ga Garai Gasang taì tô é eq rajung za nghut ri.

¹⁷"Haù mù luí, yhangmoq chyáng mai htoq lô mù, gotú san za nyi keq. A sansêng é zè lé hkâzáng kó, haù hkûn, Ngò, nungmoq lé lhom hap yù rá nghut lhê."☆

ga haù Yhumsing taì ri.

¹⁸"Ngò gi, nungmoq é îwa dut mù, nungmoq gi, Ngá é byizo yuqzô pé dut kó rá nghut lhê."☆

ga haù wum-o a-tsam dik shoq bò Sù Yhumsing taì ri.

7

¹Chytidap é luzúm wuì ê, nga-nhúng gi, danggidiq haù pé lé wó tô é bang nghut é yanmai, gungdu eq woi-nyí lé agot a-ù dut nhang é jung hkangmó mai, yhumsing gùng yhumsing lhoq sân-yúng yù luí, Garai Gasang lé gyuq hkunggâ é myit eq chyoiyúng hkyô má lhoq gumjup yu nyi sháng.

Poluq É Gabú Hkyô

²Nungmoq é i-myit unghkaù má ngamoq lé jowò byi keq. Ngamoq gi, ó yuq lé le a

☆ 6:2 Esai 49:8 * 6:15 Beliala gâ é gi, Tsadán é myíng rajà nghut lhê. ☆ 6:16 Nhung 26:12; Yer 32:38; Ezk 37:27

☆ 6:17 Esai 52:11; Ezk 20:34,41 ☆ 6:18 2 Sam 7:14

shut wú, ó yuq lé le a lhoq htên wú, ó yuq lé le a mhaú zô wú é nghut lhê. ³Ngò gi, nungmoq lé mara byi râ matú haú su taí é a nghut. Ngamoq gi, asak duì kôle, shî kôle, nungmoq eq rahá wó dut shoq, nungmoq gi, ngamoq é i-myt unghkaú má lúng nyi é nghut lhê nghû, hí hkûn ngò taí wú bê nghut lhê. ⁴Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byí é gyai yhang huí ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

⁵Hkâsu mù gâ le, ngamoq gi, Makedoni mau má jé é hkûn, ngamoq é gungdu gi, zim za a myang nyi é htoq agó, hkyô hkanmó má ngamoq wuîhke jamjau hui zô é nghut lhê. Shinggan má gi, mabyoq htoq, ahkaú má gi, gyuq kyum nyi é nghut lhê. ⁶Nghut kôlhang, nhik ngê bang lé nhik tîng é Garai Gasang gi, Tituq lé jé lé nhang é dông mai, ngamoq lé nhik tîng byi bê nghut ri. ⁷Yhang jé lé é dông mai za a nghut, yhang lé nungmoq nhik tîng byí é hkyô dông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuí nyi é hkyô, nungmoq gyai yhang shut bûn é hkyô, ngá é matú nungmoq gyai myit chiq byí é hkyô pé lé, ngamoq lé taí kyo bê nghut ri.

⁸Ngá é laikâ eq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê. ⁹Nghut kôlhang, ngò gi, ahkuî gabú lhê; haú gi, nungmoq lé yón hui nhang é yanmai a nghut é za, nungmoq é yón hkyo eq, nungmoq lé myit lîng nhang é yanmai ru nghut lhê. Nungmoq gi, Garai Gasang ô nau é dông yón huí é bang dut bekô nghut mù, nungmoq lé, ngamoq eq hai akyû le a lhoq yôm byí é nghut lhê. ¹⁰Hkâsu mù gâ le, Garai o é dông yón kuq huí é hkyô gi, nungngham wó hkyô a bo é za, hkyi yù hkyô wó shoq, myit lîng nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri. ¹¹Garai o é dông, nungmoq chyáng akyû lhoq htoq byí é yón kuq hkyô lé wú wú keq! Haú gi, gyai yhang myit zuq é hkyô, yhumsing

gùng mara a bo é lé tân shit râ lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byí é hkyô, tengmán hkyô kut râ rì rì nghut é hkyô pé nghut lhê. Nungmoq gi, haú hkyô má mara a bo é lé hkat hkanmó má saksé tân shit bekô nghut ri. ¹²Haú mù luí, ngò, nungmoq lé kê kat é nghut kôlhang, kut shut su é yanmai le a nghut, kut shut é hui zo su é yanmai le a nghut é za, ngamoq lé nungmoq hkâ-í ap nóng byí é hkyô lé, Garai Gasang hí má nungmoq gùng nungmoq wó myâng râ matú kê kat é sheq ru nghut lhê. ¹³Haú pé banshoq dông mai, ngamoq gi, myit wum byí é huí ri.

Ngamoq myit wum byi huí é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haí mù yhang gabú é gâ lé, nungmoq banshoq bâng eq yhâng é myit lé lhoq nguínón byi kê é yanmai nghut ri. ¹⁴Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpû é nghut lhê. Nungmoq lé ngamoq taí é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê. ¹⁵Nungmoq banshoq bang jino gyo kômù, gyuq nán é myit mai yhang lé lhom hap yù kê é lé, yhang myitbûn é hkûn, yhang nungmoq lé chyitdap é myit gi, je riyhang kê dik nyi ri. ¹⁶Ngò gi, nungmoq lé banshoq wó lum to bê lé sê é yanmai, gabú nyi lhê.

8

Byí É Hkyô

¹Gumang wuî ê, ahkuî, ngamoq gi, Makedoni mau mâ é noqkuq hpûng pé lé Garai Gasang byí é jeju eq sêng é hkyô, nungmoq lé sé nhâng nau ri. ²Yhangmoq gi, wuîhke jamjau hkyô myo myô eq chyam lik é huí é nghut kôlhang, yhangmoq é a ung taí loshoq gabú é hkyô eq yhangmoq é gyai yhang myung é hkyô gi, agùn agó byí nau é myit bò nhang ri. ³Hkâsu mù gâ le, yhangmoq gi, yhangmoq wó dut é myhó byi kê é htoq agó, yhangmoq é a-tsam lai shoq lhang byi kê é hkyô lé, ngò saksé hkâm lhê. Yhangmoq gi, yhangmoq é myit hkaú mai yhang haú su kut kê é nghut ri. ⁴Yhangmoq gi, haú sân-yúng bang lé wó bo dojaú râ matú, ngamoq lé gyai yhang

ahkáng dung kô é nghut ri. ⁵Yhangmoq gi, ngamoq myit ngam tô é htoq má lhang lai shoq, Garai Gasang ô nau é hkyô lé châng é đông, yhangmoq gùng lé hí haû Yhumsing lé ap byî pyám kômù, hau htâng sheq ngamoq lé ap kô é nghut ri. ⁶Haû mù luî, Tituq yhang hí kut hi nyi bê nghut é yanmai, ngamoq gi, jeju haû lé nungmoq chyáng le shuí lhoq byíng jup byi râ matú, yhang lé wum byi bê nghut lhê. ⁷Nungmoq gi, lumjíng myit má, dang nyo é hkyô má le, sumsé hpaqchyî hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkgangmó má agùn agó dut bekô eq rajung za, nungmoq gi, byî nau é jeju shî má le agùn agó dut râ lé, bún nyi keq.

⁸Ngò gi, nungmoq lé hkunmó hkyô é a nghut, nghut kôlhang, góbâng é myit zuq é hkyô eq whuí wú é đông, nungmoq é chyitdap myit jet é hkyô lé chyam wú naû luî sheq ru nghut lhê. ⁹Hkâsu mù gâ le, nungmoq gi, nga-nhông é Yhumsing Yesuq Hkrisduq é jeju lé sê akô nghut ri. Yhang gi, Yhông é myùng hkyô đông mai nungmoq wó bang dut kó sháng gaq ga, jung hkgangmó wó sù nghut kôlhang, nungmoq é matú é yanmai, myùng sù dut bê nghut ri.

¹⁰Shí hkyô eq sêng é má, nungmoq é matú ge dik é hkyô ngò hpaqchyî byi kôlé: A-nhik, nungmoq gi, sâng-hi, byî hi kô é za a nghut, haû su kut nau é myit bo é bang le nghut akô. ¹¹Nungmoq wó dut é eq rajung za, haû lé lhoq pân é đông nungmoq é gyai yhang kâm kut é myit lé wó lhoq dik ko sháng gaq, ahkuî, muzó haû lhoq pân keq. ¹²Hkâsu mù gâ le, byî nau é myit bo é nghut jáng, chyunghuq haû gi, yhang a wó é má cháng luî a nghut é za, yhang wó é má cháng luî, hap yù gíng é nghut lhê.

¹³Nungmoq é matú gi, wòlai dut, góbang gi, hkyamsâ nyi râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê. ¹⁴Nungmoq haî râ tô é lé, yhangmoq agùn agó wó é mâ é wó dum taû htuqbang byi kó sháng gaq, ahkui lhê é ahkýng má, yhangmoq haî râ tô é lé, nungmoq agùn agó wó é mâ é htuqbang byi keq. Haû jáng sheq, wuí wuí za wó dut kó râ nghut lhê. ¹⁵Haû gi, "Myo myo tsing yu

é sù gi, lûm myo shoq wó é a nghut, shau za tsing yu é sù gi, lûm shau shoq wó é a nghut."✧ ga kâ tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶Nungmoq é matú ngò myit chiq byî é eq rajung zâ é myit lé, Tituq é i-myt má kat byî é Garai Gasang lé, ngò jeju hkyâ-ôn lhê. ¹⁷Hkâsu mù gâ le, Tituq gi, ngamoq dúng tôngbán é lé za lhom hap yu é a nghut, gyai yhang myit toq mù, yhônggùng yhang myit hpyit yû luî, nungmoq chyáng lé lô gù za nghut ri. ¹⁸Ngamoq gi, haû gabú danglù lé dojaú é má noqkuq hpông pé banshoq eq hkyâ-on huî é gumang hpó haû lé le, yhang eq rahá nhang kat lhê. ¹⁹Hau htoq agó, ngamoq garúm râ myit bo nyi é hkyô lé tân shit mù, haû Yhumsing lé hkungga râ matú ngamoq wú gôn nyi hkyô nghut é, alu lé ngamoq yu chung é hkûn, ngamoq é byinzùm kut râ matú, noqkuq hpông pé eq hkyin yu é sù le yhang nghut lhê. ²⁰Ngamoq gi, myit lòm luî byî é chyunghuq shî lé ngamoq wú gôn nyi é hkyô má, ó yuq eq le mara hô râ hkyô a htoq shoq sidy nyi lhê. ²¹Hkâsu mù gâ le, jô é hkyô kut râ matú ngamoq shikut nyi é gi, haû Yhumsing é myoq hí má za a nghut, byu pê é myoq hí má le nghut lhê.

²²Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotû gumang hpó lé le yhangnhik eq rahá nhang kat lhê. Yhang gi, ahkuî lhang, nungmoq lé gyai yhang myit lum tô é yanmai, shirông myit je riyhang bo nyi ri. ²³Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sù nghut ri. Nga-nhông é gumâng nhik é hkyô ga jáng, yhangnhik gi, noqkuq hpông pé é gunglik eq Hkrisduq é aróng nghut akô. ²⁴Haû mù luî, haû noqkuq hpông pé wó myâng kó sháng gaq, nungmoq má ngamoq haî mù gumrong é hkyô eq nungmoq é chyitdap myit é saksé lé, haû bang lé tân shit keq.

9

¹Ngò gi, haû sân-yúng bang lé htuqbang râ hkyô eq séng luî, nungmoq lé kâ kat râ a ra nghut ri. ²Hkâsu mù gâ le, nungmoq

gyai garúm nau é myit lé ngò sê lhê, haú mù, ngò gi, Makedoni mau bang lé, haú hkyô eq séng luí gumrong kyo mù, a-nhik mai yhang, Ahkaia mau má nungmoq byi râ rì rì nghut bê hkyô lé, yhangmoq lé tái kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaú toq byi bê nghut ri. ³ Nghut kôlhang, shí hkyô má nungmoq eq séng luí ngamoq gumrong é gi, hká đông le dangsôm a dut byuq sháng gaq, ngò tái bê eq rajung za nungmoq rì rì wó hen to râ matú, ngò gi, gumang wuì lé nhang kat é nghut lhê. ⁴ Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu râ a nghut, ngamoq le, nungmoq lé lûm yhang lum pyâm é yanmai, hoq bo hpu râ nghut lhê. ⁵ Haú mù luí, nungmoq danggidiq byi to bê nghut é, chyunghuq lé rago wó lajâng pân to râ matú, gumang wuì lé wum tái tsuq mù, nungmoq lé hí, lé kum nhâng râ gi, ra yhang râ lhê nghú ngò wó myit ri. Haú hkûn sheq, a nau é đông byi é a nghut é za, byí nau é chyunghuq đông hen tô é dut râ nghut lhê.

Agùn Agó Byi É Hkyô

⁶ Shau za sân hkyó sù gi, shau za shù yù râ nghut mù, agùn agó sân hkyó sù gi, agùn agó shù yù râ nghut lhê gâ é dang lé, myitbùn nyi keq. ⁷ Yuq hkangmó gi, a kâm byi é eq byi nhang é đông a nghut é za, yhumsing myit má byi nau é myhó lé myit hpyit yù mù byi é đông dut râ lhê. Hkâsu mù gâ le, Garai Gasang gi, gabú myit èq byi sù lé chyitdap ri. ⁸ Haú mù, ahkyíng hkangmó jung hkangmó má, nungmoq râ é banshoq wó mù, ge é muzó hkangmó lé nungmoq je myo wó kut kó sháng gaq ga, Garai Gasang gi, jeju lhunglhang lé, nungmoq lé wó byi é sù nghut lhê. ⁹ Haú gi, "Yhang gi, a ha bûn é za myùng bang lé yhâng é chyunghuq tsing gâm byi bê nghut ri; Yhâng é dingmán hkyô gi, ahtum abyuq gîng nyi ri."[☆] ga kê to eq rajung za nghut ri. ¹⁰ Kyô hkyô sù lé kyôshi, zoshuq matú muk byi é Sù gi, nungmoq lé kyôshi byi mù, lhoq myô jat

byi râ eq, nungmoq é dingmán hkyô é ashi lé myô lò nhâng râ nghut lhê. ¹¹ Nungmoq gi, ayoq abun hkangmó má agùn agó byi é bang wó dut kó râ matú, hkyô hkangmó má sùt wó é bang dut é hui kó râ nghut lhê. Nungmoq agùn agó byi é hkyô lé, ngamoq lhai byi mù, Garai Gasang lé jeju hkya-ôn é hkyô dut râ nghut lhê.

¹² Nungmoq dojaú é hkyô shí gi, Garai Gasâng é byu pé râ é hkyô lé lajang byi é za a nghut, Garai Gasang lé jeju bûn é dang byíng mui nyi nhang é le nghut lhê. ¹³ Dojaú hkyô hau é yanmai, nungmoq lhuzui hkyô saksé tân shit bekô nghut mù, byu pé gi, Hkrisduq é gabú danglù lé nungmoq yín yù luí jino gyo kô é yanmai le, yhangmoq eq yuq hkangmó lé, nungmoq é a ha bûn é myit mai shuì gam chûng kô é yanmai le, Garai Gasang lé hkya-on kó râ nghut lhê. ¹⁴ Hau htoq agó, Garai Gasang gi, nungmoq lé jeju lai shoq byi tô é yanmai nungmoq é matú yhangmoq kyûdung byi é u má, yhangmoq é myit nhiklhum gi, nungmoq chyáng htoq jé râ nghut lhê. ¹⁵ A ung htoq tái é Garai Gasâng é chyunghuq é yanmai, jeju hkya-on hkyô gi, Yhâng chyáng ru nghut nyi sháng gaq ô!

10

Poluq, Yhâng É Hpungmû Lé Tái Hung É Hkyô

¹ Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wâm dut ri ga kô é sù, ngò Poluq gi, Hkrisduq é nûm é hkyô eq nú-nhâm é hkyô đông mai, nungmoq lé pying kat lhê. ² Shí mingkân é nyi yap a-tsang đông ngamoq asak dui ri ga myit ngam é byù ra-am lé, ngò a gyuq a wam é myit lé shit râ dâ tô lhê. Ngò jé lé é hkûn, nungmoq lé haú sù é myit a shit ra sháng gaq, ngò nungmoq lé dúng tôngbán kat lhê. ³ Hkâsu mù gâ le, ngamoq gi, mingkan shí má asak dui nyi kôlhang mingkan byu pé kut é đông majan zân é a nghut. ⁴ Ngamoq majan zân é laknak gi, mingkan shi é laknak a nghut é za, shut shai é đông dang-rháng hkyô nghut é, gîngtîng é gyedap pé lé lhoq htên pyám râ matú Garaí é a-tsam byíng é laknak ru nghut lhê. ⁵ Ngamoq

☆ 9:9 Hkya-on 112:9

gi, dang-rháng rhâng lhùm é hkyô pé eq Garai Gasang lé sê é hkyô lé shut shaí shoq yhumsing gùng yhumsîng lhoq myhang mhaû é hkyô hkgangmó lé lhoq htên pyám mù, Hkrisduq é jìno gyo râ matú, myit sôn é hkyô hkat hkgangmó lé shúm kut yu é nghut lhê. ⁶ Nungmoq é jìno gyo hkyô gi, gumjup é hkûn, jìno a gyô é hkyô hkgangmó lé ngamoq dam byi râ rì rì dut râ nghut lhê.

⁷ Nungmoq gi, ahtoq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyi sháng gaq. ⁸ Hkâsu mù gâ le, nungmoq lé lîng hkyô râ nó gi, nungmoq lé kô myhâng nhâng râ matú, ngamoq lé haû Yhumsîng byî é ahko ahkáng lé gyai gumrong le lháng, ngò gi, hoq hpû é hui râ a nghut. ⁹ Ngò gi, ngá é laiká pê èq nungmoq lé kyuq é su a dut nhâng nau é nghut lhê. ¹⁰ Hkâsu mù gâ le, ra-am gi, "Yhâng é laiká pé gi, gàng bo é eq wum-o bo é nghut ri; nghut kôlhang, yhânggùng gi, byuwup a bo é nghut mù, yhang taí é dang pé gi, haí a nghut." ga taí akô. ¹¹ Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saí râ nghut é hkyô lé, haû sù é bang sê gyo râ dut lhê.

¹² Ngamoq gi, haû yhumsing gùng yhum-sîng owaq é bâng é hpúng má bo lom é hkyô nghut nghut, yhangmoq eq whuî é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chîn lhùm wú é eq yhangmoq gùng yhangmoq whuî lhùm wú kô é hkûn, hpaqchyî a bo é bang dut bekô nghut ri. ¹³ Nghut kôlhang, ngamoq gi, âng é mai lai shoq gumrông râ a nghut é za, ngamoq lé Garai Gasang masat to byî é, nungmoq chyáng lháng hkyit jé shoq nghut é maukyo hkaû má za gumrông râ nghut lhê. ¹⁴ Ngamoq gi, nungmoq chyáng a jé lé wú é đông mai, gyai yhang gumrong nyi râ a nghut; hkâsu mù gâ le, ngamoq gi, Hkrisduq é gabú danglù chûng mù, nungmoq chyáng lháng lé jé bê nghut lhê. ¹⁵ Dum, ngamoq gi, góbang kut é muzó lé le, âng é mai lai lui gumrong lai é a nghut. Ngamoq myoqbyu é hkyô gi, nungmoq é lumjîng myit kô my-

hang jat nyi jáng sheq, nungmoq chyáng ngamoq zui saí é jowò gyai wó lhoq lâm râ nghut lhê. ¹⁶ Haû gi, nungmoq é mau lháng lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq èq zui saí to bê loqzó eq séng lui, gumrông nau é a nghut. ¹⁷ Nghut kôlhang, "Gumrong é sù gi, haû Yhumsîng má gumrông sháng gaq." ¹⁸ Hkâsu mù gâ le, yhumsing gùng yhumsîng owaq é sù gi, hap yù huî é a nghut é za, haû Yhumsing èq owaq byî é sù sheq, hap yù huî é ru nghut lhê.

11

Lagyo Apyoq Pé Eq Poluq

¹ Ngò gi, ngá é ratsuí ngok é dang lé, nungmoq jân pyám byi râ lé myoqbyu é nghut lhê; gè gè yhang, nungmoq gi, haû su kut nyi gù nghut bekô. ² Haí mù gâ le, ngò gi, Garai Gasang mai nungmoq lé magum é myit èq, nungmoq é matú magûm byî lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghû, Hkrisduq nghut é yhumsîng hpô chyáng za nungmoq lé byi zo râ nghû, danggidiq byi to bê nghut lhê. ³ Nghut kôlhang, Ewaq gi, lhangmuî hpaqchyî dâ é èq mhaû zô é huî é su, nungmoq myit é hkyô pé gi, Hkrisduq chyáng nungmoq é lhumzui é eq sansêng é i-myt ap nóng é hkyô mai shuî nghoq ló byuq é hui râ lé, ngò myit chiq ri. ⁴ Hkâsu mù gâ le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é đông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haû lé lui za lhom hap yu é dut bekô nghut ri. ⁵ Nghut kôlhang, ngò gi, "Ahkyak-lagyô pé" ga bâng é htoq má ratsuí lháng gyamgyi gyó sù a nghut nghû myit ngam é nghut lhê. ⁶ Ngò gi, dang taí hpaqchyî kung sù rayuq a nghut kôlhang, sumsé hpaqchyî bò sù nghut lhê. Ngamoq gi, hkyô hkgangmó má, nungmoq lé haû hkyô hkyâng shoq sé nhâng bê nghut lhê.

⁷ Ngò, nungmoq lé, Garai Gasang é gabú danglù lé ahpau a yu é za hko kyô é đông,

nungmoq lé waq toq râ matú, ngá gùng ngò lhoq nyhum é gi, ngá é mara dut byuq bê lúhú? ⁸Ngò, nungmoq lé dojaú râ matú, gotú noqkuq hpûng pé mai htuqbâng é lé hap yu é gi, haú bâng chyáng mai ngò zik lú yu é đông dut bê nghut lhê. ⁹Ngò gi, nungmoq eq rahá nyi mù, rajung jung râ é hkûn, ó yuq lé le wòlai a dut nhang é nghut lhê; hkâsu mù gâ le, Makedoni mau mai lé jé é gumang wui gi, ngò haí râ é lé htuqbang byi kô é yanmai nghut lhê. Hká đông nghut kôlhang, ngò gi, ngá gùng lé, nungmoq é matú wòlai a dut nhang shoq kut bê nghut mù, xoq luí le haú đông kut nyi râ nghut lhê. ¹⁰Haú Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mâ é bang ó yuq lhang, ngò haú su gumrong é hkyô lé wó hkûm zìng râ a nghut. ¹¹Haí mù lúhú? Ngò, nungmoq lé a chyitdap é yanmai nghut lhê lúhú? Ngò, nungmoq lé chyitdap é hkyô lé, Garai Gasang sê lhê. ¹²Ngò gi, yhangmoq zui saí é lé gumrong é hkyô pé má ngamoq eq rawuí za són byi râ ahko ahkáng ô nau é bang lé ahkáng a byi râ matú, ngò kut nyi é su xoq luí kut shi râ nghut lhê.

¹³Hkâsu mù gâ le, haú sù é bang gi, lagyo apyoq pé, mhaú zô é mù zui bang, Hkrisduq é lagyô pé đông kut mhaú é bang nghut akô. ¹⁴Haú gi, maú ra hkyô a joq, hkâsu mù gâ le, Tsadán lhang gi, maubó é maumang lagyo rayuq đông kut mhaú é sù nghut lhê. ¹⁵Haú mù, Tsadán é dui-nhâng zoshâng wui gi, dingmán hkyô é dui-nhâng zoshâng wui đông kut mhaú é nghut jáng, maú dân râ hkyô a joq é nghut lhê. Yhangmoq é ló htâng má gi, yhangmoq kut é eq rajung za hui zo kó râ nghut lhê.

Yhâng É Wuîhke Jamjau Hkyô Eq Séng Luí, Poluq Gumrong É Hkyô

¹⁶Ngò puq taí kôlé, ó yuq le, ngo lé byù gò đông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrong sháng gaq, byù gò lé nungmoq hap yu é su, ngo lé hap yù kó laq. ¹⁷Ngò, haú su gumrong é hkyô gi, haú Yhumsîng o é đông ngò taí nyi é a nghut, byù gò rayuq đông taí nyi é ru nghut lhê. ¹⁸Byù myo myo gi, mingkân é hkyô đông gumrong nyi bum lhê nghut mù, ngò le gumrong râ nghut lhê. ¹⁹Nungmoq gi,

hpaqchyî lûm bo kô é nghut mù, byù go pé lé gabú myit èq jân nyi akô nhung! ²⁰Gè gè yhang, nungmoq gi, nungmoq lé jùn kut é sù lé le, nungmoq lé rhoí zô é sù lé le, nungmoq chyáng akyû hô zô yu é sù lé le, yhang gùng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri. ²¹Ngamoq gi, nungmoq lé haú hkyô kut râ má wum gyai nyhôm lhê nghu yín yû râ lé, ngò, hoq ri!

Rayuq yuq, haí lé wám gumrong é nghut jáng, ngò le, haú lé wám gumrong lhê nghu, byù gò rayuq đông ngò taí nyi é nghut lhê. ²²Yhangmoq gi, Hebre byu pé nghut akô lúhú? Ngò le nghut lhê. Yhangmoq gi, Israelaq byu pé nghut akô lúhú? Ngò le nghut lhê. Yhangmoq gi, Abraham é awut ashîn pé nghut akô lúhú? Ngò le nghut lhê. ²³Yhangmoq gi, Hkrisduq é dui-nhâng zoshâng wui nghut akô lúhú? (Ngò gi, myit a gyîng é sù đông haú su taí é nghut lhê.) Ngò gi, je nghut lhê. Ngò gi, mù zui je shikut bê, htóng anum num je lúng wú bê, je riyhang bat é huí wú bê, shî râ î é adam dàm huí wú bê nghut lhê. ²⁴Ngò gi, Yudaq byu pé nuichum èq bat é myi xê dàm byíng râ radàm ra ra dut é, ngo lîng hui zô wú é nghut lhê. ²⁵Ngò gi, dumbáng èq nhuq huí é sum dàm, shî sháng gaq ga luqgok èq dú huí é radàm, wui-sanghpo byoq huí é sum dàm, wuimau má myû byôm é ra-nyí ra-myìn hui zô wú bê nghut lhê. ²⁶Ngò gi, xoq xoq hkyowui htoq e ló é hkûn, wui gû é gyuq chiq jung, damyaq huí é gyuq chiq jung, ngá é amyû wui chyáng mâ é gyuq chiq jung, tûngbàu pê chyáng mâ é gyuq chiq jung, myuq hkaú pé mâ é gyuq chiq jung, yoso pé mâ é gyuq chiq jung, wuimau mâ é gyuq chiq jung eq gumang apyoq pê chyáng mâ é gyuq chiq jung pé hui zô wú bê nghut lhê. ²⁷Ngò gi, mù lé zui ngu zui hkyik mù, anum num a myang yhup shoq dut wú bê nghut lhê. Ngò gi, zòmut wui shit huí é eq zoshuq a wó é anum num huí laí lo wú bê nghut lhê. Ngò gi, gyoq hpû é eq gùngchîn dut é huí wú bê nghut lhê. ²⁸Haú pé lhunglhang htoq má, noqkuq hpûng pé banshoq é matú ngò myit chiq byi é hkyô gi, nyí wui ngò má wòlai dut nyi ri. ²⁹Rayuq yuq wum nyhóm le, ngò le wum a nyhóm râ lúhú? Rayuq yuq mara shuí kut shut é hui le, ngò myit a nyé râ lúhú?

³⁰Ngò gumrông rã dut é nghut le gi, ngò wum nyhôm é hkyô lé tân shit é pé lé gumrông rã nghut lhê. ³¹Ngò a mhaû nyi é hkyô lé pyat dedu hkya-on huí é sũ, haû Yhumsing Yesuq é Îwa eq Garai Gasang sê lhê. ³²Damaskuq myuq má, Hkohkâm Areta é a-ô mã é mauzau gi, ngo lé chyup rã matú, myuq lé zúng nhang é nghut lhê. ³³Nghut kôlhang, ngò gi, manghkoq má lúng mù, myuq xêwâm mã é hkohot dong mai lhoq hkyô kat é hui luí, yhang é loq mai wó lut é nghut lhê.

12

Poluq É Myoqwup Shing-rán Pé

¹Ngò gi, rũ gumrông nyi rã za nghut lhê. Akyû wó rã a nghut kôlhang, haû Yhumsing chyáng mai lo é myoqwup shing-rán pé eq hpông shit é shing-rán pé lé gumrông rã nghut lhê. ²Ngò gi, laí lò bê raxe myi zân hkûn, mauhkúng sum tsáng nghu é má shuítuq yu huí é, Hkrisduq mã é byù rayuq* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê. ³Yhang hparadisu mã shuítuq yu huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê. ⁴Yhang gi, byu pé taí kyô htoq rã ahkáng a wó é hkyô pé nghut é, a wó taí sân kyô é hkyô pé lé wó gyô ri. ⁵Ngò gi, haû yuq sũ é byu é hkyô eq séng luí gumrông rã nghut lhê; nghut kôlhang, ngò gi, ngá é wum nyhóm hkyô eq séng luí, gumrông é mai lai luí, ngá gung ngò gumrông rã a nghut. ⁶Ngò gi, gumrông hkyô lé hkyin yù rã dut é nghut jáng lhang, byù gò dut rã a nghut, haí mù gâ le, ngò gi, tengmán hkyô taí nyi rã nghut lhê. Nghut kôlhang, ó yuq le, ngò kut é eq ngò taí é mai myit lum to kô é htoq má, ngo lé, je a myit lo ko sháng gaq nghu, ngò a gumrông kut pyâm nyi lhê.

⁷Haû laklaí dik é dông ngo lé hpông shit é shing-rán mó pé é yanmai, ngò a nghutbun byuq sháng gaq ga, ngo lé gunjang rã matú, Tsadán é lagyo nghut é zu lé, ngá é gungsho mã kat byi to bê nghut ri. ⁸Haû lé ngá chyáng mai yu pyám byi rã matú, ngò, Yhumsing lé sum dâm dúng tôngbán wú

bê nghut lhê. ⁹Nghut kôlhang, Yhang gi, "Ngá é jeju gi, náng é matú luqduñ é nghut lhê; hkâsu mù gâ le, Ngá é a-tsam gi, wum nyhôm é hkyô má lhoq gumjup é hui ri." ga luí, ngo lé taí ri. Haû mù luí, Hkrisduq é a-tsam gi, ngò mã wó joq nyi sháng gaq nghu, ngò gi, ngá é wum nyhôm é hkyô pé eq séng luí, gabú myit mai je riyhang gumrông rã nghut lhê. ¹⁰Haû nghut mù luí, ngò gi, Hkrisduq é yanmai, wum nyhôm é hkyô pé má le, rhoí huí é hkyô pé má le, wuítke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gâ le, ngò wum nyhôm é hkûn sheq, ngò wúm bo é nghut lhê.

Poluq Chiq Byi É Hkyô

¹¹Ngò gi, ngá gung ngò byù gò lhoq kut yu bê nghut ri, nghut kôlhang, haû gi, nungmoq kut nhang é nghut lhê. Ngò gi, nungmoq eq owaq é hui ang sũ nghut lhê; hkâsu mù gâ le, ngò gi, haí a nghut kôlhang, "Ahkyak lãgyô pé" ga bãng é htoq má ratsuí lhang gyamgyi gyó sũ a nghut. ¹²Lãgyo rayuq é masat kumlhá nghut é, kumlhá pé, mauhpo muzó pé eq laklaí kumlhá pé lé, ngò gi, gyai yhang hkam jan mù nungmoq chyáng kut bê nghut lhê. ¹³Ngò gi, nungmoq é matú, hkâ-nhám le wòlai a dut é nhing, nungmoq gi, hkâsu mù, gotu noqkuq hpung pé htoq má gyamgyi gyó nyi akô lhu? Ngò, haû hkyô mã shut é nghut jáng, mara hkyut pyám byi kó laq!

¹⁴Ahkuí, ngò gi, nungmoq lé, sum lhang nghu rã dãm, lé kum rã rì rì nghut bê mù, nungmoq é matú wòlai gi, a dut rã nghut lhê. Haí mù gâ le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká dông nghut kôle, zo wuít gi, mó wui é matú sutzè hkong to byi rã dut é a nghut, mó wuít sheq, zô wuít é matú hkong to byi rã dut é nghut lhê. ¹⁵Haû mù luí, ngò gi, gyai yhang gabú é myit mai, ngò wó é jung hkangmó lé nungmoq é matú chung jai rã nghut mù, ngá gung lé lhang chùng jai rã nghut lhê. Ngò, nungmoq lé myô chyitdap é yanmai, nungmoq gi, ngo lé shaú chyitdap kó rã lhu? ¹⁶Ngò gi, nungmoq chyáng wòlai a dut é hkyô têng lhê. Nghut kôlhang, ngò gi,

* 12:2 Hkrisduq mã é byù rayuq gâ é gi, Poluq yhanggung yhang lé taí nyi é nghut lhê.

hpaqchyî haq da sù dut mù, mhaû lhiq é dông nungmoq lé chyup yû sù dut byuq bê ga nungmoq ra-am myit akô myhi-nhung!
¹⁷Ngò gi, nungmoq chyáng nhang kat byî é byù dông, nungmoq chyáng amyat kut zô yù bê nghut lhê lú? ¹⁸Ngò gi, Tituq lé nungmoq chyáng lé râ matú wum taî tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lú? Nghanhik gi, rajung zâ é myit dông chyat kut mù, rajung zâ é hkyô lé chyat châng é su nhik nghut lhê, a nghut kó lú?

¹⁹Ngamoq gi, nungmoq hí má ngamoq gùng ngamoq taî hung yu nyi ri nghû, ahkuí jé shoq myit nyi akô lú? Ngamoq gi, Hkrisduq mâ é byu pé dông, Garai Gasâng hí má taî nyi é nghut lhê. Chyitdap é gumang wuê, ngamoq kut é jung hkanmó gi, nungmoq é akyu matú chyat nghut lhê.
²⁰Hkâsu mù gâ le, ngo lé jé é hkûn, ngò, nungmoq lé dut nhâng nau é su, nungmoq a wó dut kó râ eq, nungmoq, ngo lé dut nhâng nau é su, ngò a wó dut râ lé, ngò myit gyuq ri. Ngò gi, mabyoq jishûm htoq é, manon é, nhik-ûn buq é, byù hpûng gam é, gansang é, lumu é, gyai nghutbûn é eq atau ahû dut é hkyô pé joq râ lé gyuq ri.
²¹Ngò dum lé jé é hkûn, ngá é Garai Gasang gi, nungmoq é hí má ngo lé myit nyhûm nhâng mù, yhangmoq ô nau é myit châng é má shut é dông nyi zô lhum nau é i-myt, gungsho zùm yap é yubak mara eq a sân-yúng é hkyô kut shut é mai myit a lhîng bang myo myô é yanmai, yón kuq é hui zo râ lé, ngò myit chiq ri.

13

Ló Htáng Má Sidiq Byî É Dang Pé

¹Ahkuí, ngò, nungmoq chyáng lé kum râ gi, sum lhîng nghû râ dâm nghut lhê. Haû gi, "Mara hun é hkyô hkanmó lé, í yuq sum yuq saksé hkâm é eq lhoq teng ra râ nghut lhê." ²Ngò gi, í lhîng nghû râ dâm nungmoq eq rahá nyi é hkûn, nungmoq lé sidiq byi gû bê nghut lhê. Ahkuí le, nungmoq eq wê gâng tô é u lé, dum taî kôlé, ngò dum jé lé é hkûn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo râ nghut lhê. ³Haû gi,

ngò dông mai Hkrisduq dang taî nyi é hkyô saksé shit râ lé, nungmoq dông nyi kômù nghut lhê. Yhang gi, nungmoq é hkyô lé hkâsu kut shuî-û é hkyô má wum nyhôm é a nghut, nungmoq chyáng a-tsam mó shit sù sheq ru nghut ri. ⁴Hkâsu mù gâ le, Yhang gi, wum nyhôm é má jén sat é hui bê nghut kôlhâng, Garai Gasâng é a-tsâm eq dui nyi é gi, hkyak têng lhê. Haû eq rajung za, ngamoq gi, Yhang su wum nyhóm kôlhâng, nungmoq lé dojaú râ matú, Garai Gasâng é a-tsâm eq, Yhang eq rahá dui nyi râ nghut lhê.

⁵Nungmoq gi, lumjîng hkyô má nghut nyi lhê luq, yhumsing gùng yhumsîng myî wú keq. Yhumsing gùng yhumsîng chyam wú keq. Nungmoq gi, chyam é má sùm byuq é za a nghut jáng, nungmoq chyáng Hkrisduq Yesuq lúng nyi bê hkyô lé sé kó râ nghut lhê. ⁶Ngamoq gi, chyam é má a sùm é hkyô lé, nungmoq wó sé kó râ nghut lhê nghû, ngò hkyak lum tô lhê. ⁷Ahkuí, ngamoq gi, nungmoq shut é hkyô haî a kut kó râ matú, Garai Gasâng chyáng kyûdung byi lhê. Haû gi, ngamoq chyâm hui luî wó lut é hkyô lé byu pé myàng kó râ matú a nghut é za, ngamoq sùm é su dut kôlhâng, nungmoq ge é hkyô kut kó râ lé myàng râ matú nghut lhê. ⁸Hkâsu mù gâ le, ngamoq gi, haû tengmán hkyô eq shaî é dông haî le a ge kut é za, tengmán hkyô é matú za kut râ dut é nghut lhê. ⁹Ngamoq wum nyhóm kôlhâng, nungmoq wúm bo é hkûn, ngamoq gabú é nghut lhê; ngamoq kyûdung é gi, nungmoq gumjup râ matú nghut lhê. ¹⁰Ngò gi, wê gâng tô é hkûn, haû hkyô pé lé haî mù kê é gâ le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haû gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haû Yhumsîng ngo lé byî é sheq ru nghut lhê.

Ló Htâng É Shi-kyám Dang

¹¹Ló htáng má ngò taî nau é gi, gumang wuê, nguínón yuqyo nyi keq. Gumjup hkyô shut sô nyi keq, ngò dông tôngbán é dang lé gyo keq, myit rahkat za dut nyi keq, nguínón shoq asak dui nyi keq. Haû hkûn, chyitdap hkyô eq nguínón hkyô é

Garai Gasang gi, nungmoq eq rahá nyi nyi
râ nghut lhê.

¹² Chyoiyúng é bopuq puq é èq, rayuq
eq rayuq shi-kyâm lhum keq. ¹³ Sân-yúng
bang banshoq gi, nungmoq lé shi-kyâm kat
akô.

¹⁴ Haû Yhumsîng Yesuq Hkrisduq é jeju,
Garai Gasâng é chyt dap myit eq Chy-
oiyúng Woi-nyí é zùm yap hkyô gi, nung-
moq banshoq bâng chyáng ru joq nyî sháng
gaq ô.

GALATIQ Mau Bâng Chyáng Hun Kat é Laiká (Galatians)

¹ Byu pê chyáng mai le a nghut, ó yuq èq nhang é le a nghut e za, haû Yesuq Hkrisduq lé shî bê mai dum lhoq dui toq yu é sù Îwa Garai Gasang eq Yesuq Hkrisduq chyáng mai nhang kat é lagyo rayuq nghut sù, ngò Poluq gi, ² ngò eq rahá nyi é gumang wui banshoq bang le mù, Galatiq mau mâ é noqkuq hpûng pê chyáng dang kyô kat lhê.

³ Nga-nhûng é Îwa Garai Gasang eq Yhumsîng Yesuq Hkrisduq chyáng mâ é, jeju eq nguîngón hkyô gi, nungmoq chyáng ru joq nyî sháng gaq ô. ⁴ Haû Hkrisduq gi, nga-nhûng é Îwa Garai Gasang ô nau é eq rajung za, agè ashop é ipyat shî mai, nga-nhûng lé xe yù râ ga, nga-nhûng é yubak marâ é matú yhanggùng lé Yhang byî pyám bê nghut ri. ⁵ Haû hpungwup shing kang gi, Garai Gasâng chyáng pyat dedu ahtum abyuq ru joq nyî sháng gaq ô. Amen.

Gotû Gabú Danglù A Joq É Hkyô

⁶ Ngò gi, haû Hkrisduq é jeju mai nungmoq lé ji yù Sù lé, nungmoq haû-í han kâng pyâm to kôluí, shaî é gabú danglù shut lhing ló nyî kô é hkyô lé, gyai yhang maú nyi ri. ⁷ Danglù haû gi, gabú danglù ratsuí lháng a nghut. Byù ra-am mai nungmoq lé lhoq shuk byi luí, haû Hkrisduq é gabú danglù lé, shikut luí lhoq shai nhang pyâm nyi kô é hkyô za nghut lhê. ⁸ Nghut kôlháng, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkûng htoq mâ é maumang lagyo rayuq nghut nghut, shaî é gabú danglù, nungmoq lé hko kyô é nghut jáng, haû yuq gi, ahtum abyuq dam byî é hui zo sháng gaq ô! ⁹ Ngamoq taí wú bê eq rajung za, ahkuí le, ngò dum taí kôlé: rayuq yuq mai, nungmoq hap yu to bê é gabú danglù mai lai luí, gotû hko nyi e nghut jáng, haû yuq gi, ahtum abyuq dam byî é hui zo sháng gaq ô!

¹⁰ Haû su nghu taí é gi, ahkuí, ngò, byù é hí má myoqdong wó râ matú shikut nyi

é nghut lhê lhú? Haû a nghut jáng, Garai Gasâng é hí má myoqdong wó râ matú shikut nyi é nghut lhê lhú? Byù lé gabú nhang rá matú, ngò shikut nyi é nghut lhê lhú? Ngò gi, byu pé lé za ru gabú nhang nau nyi é nghut le gi, Hkrisduq é dui-nhang zoshâng dut râ a nghut.

Poluq Lé, Garai Gasang Ji Yu É Hkyô

¹¹ Gumang wui ê, ngò hko kyô é gabú danglù haû gi, byu èq kut htoq é hkyô a nghut é lé, ngò, nungmoq lé sé nhang nau ri. ¹² Ngò gi, haû lé, byu chyáng mai wó yu é le a nghut, góyuq èq mhoq byî é le a nghut e za, Yesuq Hkrisduq èq shing-rán byî é đông wó hap yu é ru nghut lhê.

¹³ Ngò, Yudaq noqkuq htûng má nghut nyi ashî hkûn, Garai Gasâng é noqkuq hpûng lé ladu lai shoq hkâsu kut zing-ri luí, haû lé lhoq htên shikut wún é, ngá é hí hpyang lhê é asak duí hkyô lé, nungmoq wó gyô wú bekô râ nghut lhê. ¹⁴ Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htûng lé je cháng sù nghut é htoq agó, ngá é îchyí îwa pê é htûngli lé ladu lai shoq myit zìng zuq sù nghut lhê. ¹⁵ Nghut kôlháng, ngá nû é unghkaû mai yhang hkyin to luí, Yhang é jeju yanmai ngo lé ji yu é Garai Gasang gi, ¹⁶ haû Yhang Zô é hkyô gabú danglù lé, ngò mai tûngbau pê chyáng hko kyo sháng gaq ga, Yhang Zo lé ngá chyáng htoq shit nhang rá matú myit hpyit yu é hkûn, ngò gi, ó yuq eq le a hpyê yù, ¹⁷ Yerusalem wà mó má doq ló luí, ngá hí má lagyo kut é bang lé le a ló huí e za, radá dâm Arabiq mau shut ê luí, Damaskuq myuq má dum taú ló bê nghut lhê.

¹⁸ Sum zân lai é htâng má, ngò gi, Yerusalem wà mó má doq ló mù, Petruq* lé ló hui luí, yhang eq raxe ngo nyí, ló nyi nyi é nghut lhê. ¹⁹ Haû má, Yhumsîng é yhanggu Yakuq mai lai luí, lagyo góbang lé ngò a myàng nghut ri. ²⁰ Nungmoq lé ngò ká byî kat é má, mhaû é hkyô a bò nghu luí, Garai Gasâng hí má, hkyak, ngò taí lhê. ²¹ Hau htâng má, ngò gi, Suriq mau eq Kiliki mau má ê jé é nghut lhê. ²² Haû hkûn, haû Hkrisduq má nghut é, Yuda mau mâ é noqkuq hpûng byû wui gi, ngo lé myoqno a shú kó nghut ri. ²³ Yhangmoq gi,

* 1:18 Petruq lé Kehpa le gâ lhê.

"Hí hkûn, nga-nhúng lé zing-ri sù gi, yhang mai lhoq hten râ matú radàm shikut wú é lumjínq hkyô haû lé, ahkuî hko nyi ri." gâ é hkyanglù lé wó gyô wú kôluî za, ²⁴ ngá é yanmai, Garai Gasang lé hkya-ôn bum akô nghut ri.

2

Poluq Lé Lagyô Pé Lhom Hap Yu É Hkyô

¹ Raxe myi zân laî é htâng má, ngò gi, Barnaba eq rahá Yerusalem wà mó má dum doq ló é hkûn, Tituq lé le shuî chung é nghut lhê. ² Garai Gasang byî é shing-rán eq rajung za doq ló luî, ngò kut wú bê muzó eq ahkuî kut é muzó pé akôm a dut pyám sháng gaq nghû, tûngbaù pè chyáng ngò hko kyô nyi é gabú danglù lé, haû suwún dut bâng é hí má za shap kyô é nghut lhê. ³ Nghut kôlhang, ngò eq rahá nghut é Tituq gi, Grik byù nghut kôle, yhang lé ahpyo-kuq a hpyit nhâng kó nghut ri. ⁴ Haû hkaû wang lo é mhaû é gumang wuî gi, Hkrisduq Yesuq má ngamoq wó é luthkyô má jowú luî, nga-nhúng lé jùn dut nhâng râ dâ kô é yanmai, haû hkyô gabyông htoq lo é nghut ri.* ⁵ Nghut kôlhang, haû gabú danglu é tengmán hkyô gi, nungmoq chyáng joq gîng nyi sháng gaq nghû, razup za lhang, yhangmoq é dang lé ngamoq gyo byî é a nghut.

⁶ Ahkyak é byù su dut é bang gi, yhangmoq hái jung kut kôlhang, ngò eq a séng nghut ri; Garai Gasang gi, du lé wú mù jéyáng é sù a nghut; byù haû bang gi, ngá é mungdang má hái le a jat kat e za, ⁷ Petruq gi, Yudaq byu pé† lé, haû gabú danglù hko kyo râ mô má lum tô é hui bê eq rajung za, ngò gi, tûngbaù pé‡ lé, haû gabú danglù hko kyo râ mô má lum tô é hui bê hkyô lé za, yhangmoq myang akô nghut ri. ⁸ Hkâsu mù gâ le, Yudaq byu pè é matú Petruq lé lagyo ayá dáng byî é sù Garai Gasang gi, tûngbaù pè matú ngo lé le lagyo ayá dáng byi bê nghut lhê. ⁹ Haû hkungmó-zîng su ahkyak é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gâ é loqyo loq èq shi-kyâm yù kôluî, yhangmoq gi, Yudaq byu pè shut, ngá-nhik lé gi, tûngbaù pè

shut ê râ lhê ga, myit hui bekô nghut ri. ¹⁰ Yhangmoq gi, ngá-nhik mai myùng bang lé ru bûn nyi râ matú za pying kat akô; haû gi, ngò gyai yhang kut nau nyi é hkyô nghut lhê.

Petruq Lé Poluq Htuq Htîng É Hkyô

¹¹ Antioku wà mó má Petruq jé lé é hkûn, yhang lé mara hûn râ hkyô joq é yanmai, ngò gi, byu hí má yhang, yhang lé lhom htuq htîng é nghut lhê. ¹² Hkâsu mù gâ le, Yakuq chyáng mai lé é bang a jé shî é u lé, yhang gi, tûngbaù pé eq rahá chôm zo chôm shuq lhaq kut ri. Nghut kôlhang, haû bang jé é hkûn, yhang gi, ahpyo-kuq hpyit râ lhê gâ é hpúng má lom é bang lé gyuq é yanmai, tûngbaù pè chyáng mai htoq gang luî, yhang baú nyi tô ri. ¹³ Yhang, gegùn labyoq kut é hkyô má, gotû Yudaq byu pé le bo châng kut akô nghut mù luî, Barnaba lhang yhangmoq kut é gegùn labyoq hkyô má bo châng nghoq ló bê nghut ri. ¹⁴ Haû gabú danglu é tengmán hkyô eq rajung za, yhangmoq a cháng kô é lé myàng jáng, ngò gi, yhangmoq banshoq bâng é hí má, Petruq lé, "Nàng gi, Yudaq byù nghut to mù luî, Yudaq byù rayuq dông a nyi e za, tûngbaù rayuq dông nyi luî nhîng, tûngbaù pé lé Yudaq byu pè é htûngli hkâsu kut wó cháng nhâng râ lúhú?

¹⁵ Ngamoq gi, yubak dap bang gâ é tûngbaù pé a nghut e za, hkû é buinyi mai yhang, Yudaq byù nghut gû bê nghut lhê. ¹⁶ Byù gi, jep é tarâ lé cháng luí mara hkyut san byi huî é a nghut e za, Yesuq Hkrisduq lé lumjínq é yanmai sheq mara hkyut san byi huî é hkyô lé, ngamoq sê lhê. Haû mù luî, ngamoq gi, jep é tarâ lé cháng luí a nghut e za, Yesuq Hkrisduq lé lumjínq é yanmai, mara hkyut sân pyám byî é hui sháng gaq nghû, Yesuq Hkrisduq lé lumjínq bê nghut lhê; hkâsu mù gâ le, ó yuq le, jep é tarâ lé châng é yanmai, mara hkyut san byî é hui râ a nghut.

¹⁷ Ngamoq gi, Hkrisduq má ngamoq é mara hkyut san byî é hui râ hkyô ho nyi é hkûn, yubak dap é bang ngamoq nghut é lé myang é nghut jáng, mara lé gi, Hkrisduq mai kut nhang é nghut lhê lúhú? Ratsuí le a nghut. ¹⁸ Ngò gi, ngò hpyoq pyám bê hkyô

* 2:4 Yudaq byu pé ra-am gi, hpúng asik wang é bang lé Yudaq htûng tarâ cháng nhâng nau akô nghut ri. † 2:7 Grik má ahpyo-kuq hpyit hkam é bang ga bo tô ri. ‡ 2:7 Grik má ahpyo-kuq hpyit a hkam é bang ga bo tô ri.

lé dum saî kut é nghut jáng, tarâ lu lai é byù ngò nghut é lé tân shit ri. ¹⁹ Ngò gi, jep é tarâ eq sêng é má, jep é tarâ é yanmai shî jáng sheq, Garai Gasâng é matú wó dui nyi râ nghut lhê. ²⁰ Ngò gi, Hkrisduq eq rahá jén sat é hui bê nghut mù luî, ngá gûng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuî, ngò gungsho má asak dui nyi é gi, ngo lé chyitdap luî, ngá é matú yhanggûng lé Yhang byî pyâm é, haû Garai Gasâng é Yhangzo lé lumjîng é yanmai ru nghut lhê. ²¹ Ngò gi, Garai Gasâng é jeju lé tô pyâm é a nghut, hkâsu mù gâ le, dingmán é hkyô lé, jep é tarâ dông wó yu é ru nghut le gi, Hkrisduq shî hkâm é gi, akôm dut byuq râ nghut lhê." nghû tai é nghut lhê.

3

Lumjîng Myit Lhú? Jep É Tarâ Lhú?

¹ Galatiq mau mâ é byùbâm pé ê! Yesuq Hkrisduq gi, tapzîng má jén sat hui bê hkyô lé, nungmoq é myoq má bò nhang to bê le nhîng, ó yuq eq wá nungmoq lé lãng nghoq yû bekô lhú? ² Nungmoq gi, haû Woi-nyí lé, jep é tarâ cháng luî wó yû kô é nghut lhê lhú? A nghut jáng, nungmoq wó gyô yu é gabú danglù lé lumjîng luî wó yû kô é nghut lhê lhú? Haû rahkat lé za, ngò sê yû nau ri. ³ Nungmoq gi, haû-í yhang bâm akô lhú? Haû Woi-nyí lé lumhkaû mù kut hî kôluî nhîng, ahkuî, gungsho wum-o lé lumhkaû mù, yhumsîng myit tô é hkyô lé lhoq pán râ matú shikut nyi akô lhú? ⁴ Nungmoq, myo myo hpuzô pyâm é gi, akôm nghut akô lhú? Gè gè yhang, haû gi, akôm nghut byuq bekô lhú? ⁵ Garai Gasang, nungmoq lé Yhâng é Woi-nyí byî é htoq agó, nungmoq chyáng laklaí kumlhá kut é gi, jep é tarâ lé nungmoq châng é yanmai nghut akô lhú? A nghut jáng, nungmoq wó gyô é gabú danglù lé, nungmoq lumjîng é yanmai nghut akô lhú?

⁶ "Abraham gi, Garai Gasang lé lumjîng luî, yhang lé dingmán sù ga sôn yu é hui bê nghut ri." ✧ ga, Abraham eq séng luî tai tô é lé myit wú keq. ⁷ Haû mù luî, lumjîng myit bo é bang gi, Abraham é yhangzô pé* yhang dut bê nghut é hkyô lé sé keq.

⁸ Lumjîng myit é yanmai, tungbaù pé lé Garai Gasang mara hkyut san byi râ nghut lhê ga, Chyúmdang mai hí byu-myang to bê nghut mù luî, Abraham lé hí shit kyô tô é gabú danglù gi, "Nang é yanmai, byuhú chângjup gi, shimân jeju wó yû kô râ nghut lhê." ✧ gâ ri. ⁹ Haû mù luî, lumjîng myit bo é bang gi, lumjîng myit bo é Abraham eq rahá, shimân jeju lé myang hkam yù kô râ nghut lhê.

¹⁰ Jep é tarâ châng é hkyô má nè hkau é lhunglhâng bang gi, nhîng pyâm é hui bang chyat nghut lhê. Hkâsu mù gâ le, "Tarâ laiká má kê tô é lhunglháng lé a xoq kut é sù, ó yuq nghut kôle, nhîng pyâm é hui kô râ nghut lhê." ✧ ga luî, kê tô ri. ¹¹ Haû htoq agó, "Haû dingmán sù gi, lumjîng myit mai asak duì râ nghut lhê." ✧ ga kê tô é yanmai, ó yuq nghut kôle, Garai Gasâng é hí má jep é tarâ lé cháng luî, mara hkyut san byî é a huî é hkyô gi, san za nghut bê nghut ri. ¹² Haû jep é tarâ gi, lumjîng myit eq haî a sêng é nghut luî, "Haû pé dông châng é sù gi, haû pé mai asak duì râ nghut lhê." ✧ ga kê tô ri. ¹³ Haû Chyúmdang má, "Sik zîng má jén lhâng to huî é sù ó yuq nghut kôle, nhîng pyâm é hui sù nghut ri." ✧ ga kê tô é eq rajung za, Hkrisduq gi, nga-nhûng é matú nhîng pyâm é hui sù dut bê nghut é yanmai, jep é tarâ mâ é nhîng é hkyô mai nga-nhûng lé hkyi yù bê nghut ri. ¹⁴ Haû Abraham lé byî tô é shimân jeju gi, Hkrisduq Yesuq é yanmai tungbaù pé chyáng le jé sháng gaq ga, Yhang nga-nhûng lé hkyi yu é nghut ri; haû mù, nga-nhûng gi, danggidiq byî tô é Woi-nyí haû lé, lumjîng myit mai wó yû râ nghut lhê.

Jep E Tarâ Eq Danggidiq

¹⁵ Gumang wuî ê, nyí wui é asak duì hkyô mâ é lé dangtú yù mù, ngò nungmoq lé tai kôlé, byù mai chôm tô tô é dangshikaq lé, ó yuq eq le wó lhoq hpyoq pyâm râ a nghut, ó yuq eq le haû má wó jat kat râ a nghut. ¹⁶ Abraham eq yhâng é awut ashín lé byi tô é danggidiq le haû eq rajung za nghut ri. "Awut ashín pé lé" gâ é dang gi, byù myo myo lé gâ lhê; nghut kôlhâng, haû Chyúmdang má, haû lé tai nau é a nghut e

✧ 3:6 Apûn 15:6 * 3:7 Abraham é yhangzô pé gâ é gi, Garai Gasâng é yhangzô pé lé gâ é nghut lhê. ✧ 3:8 Apûn 12:3 ✧ 3:10 Tarâ Pun 27:26 ✧ 3:11 Hbk 2:4 ✧ 3:12 Nhung 18:5 ✧ 3:13 Tarâ Pun 21:23 ✧ 3:16 Apûn 12:7; 13:15; 24:7

za, "náng é awut ashín lé" ✨ ga taí nau é ru nghut lhê, haû é lichyúm gi, byù rayuq lé za taí é nghut lhê, haû gi, Hkrisduq nghut ri; ¹⁷ haû mù luí, ngò taí nau é gi, Garai Gasang, dangshikaq tô tô é htàng, myí sho sum xê zàn má lé joq é tarâ gi, dangshikaq haû lé le wó lhoq hpyoq pyám râ a nghut, danggidiq lé le wó lhoq htên pyám râ a nghut. ¹⁸ Hkâsu mù gâ le, haû silí wunlí gi, jep é tarâ eq séng lhúm é nghut jáng, danggidiq eq gi, haí le a sêng lhum lo nghut ri; nghut kôlhang, Garai Gasang gi, Yhâng é jeju yanmai, Abraham lé danggidiq dông silí wunlí haû byí to bê nghut ri.

¹⁹ Haû su nghut jáng, haû jep é tarâ gi, hai akyû bò râ lhú? Haû gi, danggidiq dông lhoq âng tô é Awut ashín nghut é sù jé lé é hkûn jé shoq, mara kut shut nyi bùm kô é yanmai, jat kat tô é nghut lhê; jep é tarâ haû gi, maumang lagyô pé mai gyoro sô xoq byi sù† é loq dông byí tô é ru nghut lhê. ²⁰ Gyoro sô xoq byi sù gi, rahkyam shut mâ é bang eq baú sêng é a nghut, nghut kôlhang, Garai Gasang gi, rayuq za nghut lhê.

²¹ Haû mù luí, jep é tarâ gi, Garai Gasâng é danggidiq pé eq htuaq htîng lhúm lhê lhú? Ratsuí le a nghut. Hkâsu mù gâ le, dui é asak wó byí é jep é tarâ lé byi to bê nghut le gi, gè gè yhang, dingmán hkyô gi, jep é tarâ mai lò râ nghut lhê. ²² Nghut kôlhang, mingkan gón mâ é bang gi, yubak marâ é htongbyu pé chyat nghut akô ga Chyúmdang má bo tô ri; haû mù luí, haû byí to bê danggidiq lé gi, Yesuq Hkrisduq lé lumjîng é bang lé byi râ nghut lhê.

²³ Lumjîng hkyô haû a jé shimá, nga-nhúng gi, haû jep é tara eq htongbyú dông lhúng tô é hui luí, lumjîng hkyô haû htoq shit é hkûn jé shoq myhî lhúng tô é huí wú bê nghut lhê. ²⁴ Haû mù luí, nga-nhúng gi, lumjîng é yanmai mara hkyut san byí é hui sháng gaq ga, jep é tarâ gi, nga-nhúng lé Hkrisduq chyáng shuí ê râ matú, nga-nhúng é hkyô-u shê sù dut bê nghut ri. ²⁵ Ahkuí kúm gi, haû lumjîng hkyô jé bê nghut é yanmai, nga-nhúng gi, haû jep é tarâ mai hkyô-u shê é loq hkaû má a nghut lo.

Garai Gasâng É Yhangzô Pé

† 3:19 Gyoro so xoq byi sù gi, Mosheq nghut ri. shí é bang lé gâ lhê.

* 4:3 Bun zo shí má, zoshâng gâ é lichyúm gi, Yesuq lé a lumjîng

²⁶ Nungmoq lhunglhâng bang gi, Hkrisduq Yesuq lé lumjîng é yanmai, Garai Gasâng é yhangzô pé nghut bê; ²⁷ Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to bekô nghut ri. ²⁸ Nungmoq lhunglhâng bang gi, Hkrisduq Yesuq má rading ralhum za nghut é yanmai, Yudaq byù nghû é eq Grik nghu é, jùn nghu é eq luthkyô nghu é, yuqgè nghu é eq myiwe nghu é, a gam hkoq lo nghut ri. ²⁹ Nungmoq gi, Hkrisduq eq séng bekô nghut jáng, Abraham é awut ashín pé le, haû danggidiq eq rajung za silí wunlí hkam yù bang le, nghut akô nghut ri.

4

¹ Ngò taí nau é lichyúm gi, haû amyû hkûng xoq dut râ sù gi, ikun sutzè banshoq lé sîng ang sù nghut kôlhang, yhang, zoshâng nghut ashî hkûn gi, jùn hpó eq haí a shaí nghut ri. ² Yhang gi, yhâng wa masat tô é ahkyíng jé shoq, yhang lé zúng é sù eq yhúm lé up su é a-ô má ru lúng nyi ashî nghut ri. ³ Haû eq rajung za, nga-nhúng le zoshâng* nghut é hkûn gi, mingkan uphkâng tarâ ô má jùn dut nyi é bang nghut lhê. ⁴ Nghut kôlhang, ahkyíng lo ngap jáng, zo dut râ ahkáng lé byíng shoq, nga-nhúng wó yû sháng gaq ga, Garai Gasang gi, jep é tarâ hkaû má é byu pé lé hkyi yù râ matú, ⁵ jep é tarâ hkaû má, myiwe mai hku kat nhang é Yhang Zo lé, nhang kat byi bê nghut ri. ⁶ Hkâsu mù gâ le, nungmoq le, zo wuí nghut bê yanmai, "Aba, Áwa ê." ga dat wut é, Yhang Zô é Woinyí lé, Garai Gasang gi, nga-nhúng é i-myit unghkaû má kat byi bê nghut ri. ⁷ Haû mù luí, nàng gi, jùn a nghut lô e za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyû hkûng xoq dut nhâng bê nghut ri.

Galatiq Mau Bang Lé Poluq Myit Chiq Byí É Hkyô

⁸ Hí hkûn, Garai Gasang lé nungmoq a sé shí é u lé, nungmoq gi, nat hparâ lháng a nghut bâng é a-ô má jùn dut é bang nghut ri. ⁹ Ahkuí kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhîng, nungmoq gi, hkâsu mù, haû wum nyhôm é eq akyû a

byî é, mingkan uphkanq é tarâ shut dum lhing taû ló nyi akô lhú? Nungmoq gi, haú pê èq jùn zô é dum hui zó nau akô lhú? ¹⁰ Nungmoq gi, buinyì wú, lhohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashî kó nhung! ¹¹ Nungmoq chyáng ngò wum kat pyâm é hkyô gi, akôm dut bê abe nghû, nungmoq é matú ngò myit chiq nyi ri.

¹² Gumang wuè ê, ngò gi, nungmoq su dut bê nghut é yanmai, nungmoq le ngò su dut keq† nghû, nungmoq lé dúng tôngbán kat lhê. Nungmoq gi, ngo lé haí le a kut shut wú kô é nghut lhê. ¹³ Sâng-hî dàm ngò nungmoq lé gabú danglù hko kyo é hkyô gi, nungmoq sê é eq rajung za, ngò nõhpyo huí é yanmai nghut lhê. ¹⁴ Ngá é nõhpyo gi, nungmoq é matú wuîhke hkyô dut kôlháng, nungmoq gi, ngo lé a wú tiq pyám kô é htoq agó, a wú chaq pyám kó e za, Garai Gasâng é maumang rayuq lé su le, Hkrisduq Yesuq lé su yhang le, ngo lé lhom hap yù kô é nghut lhê. ¹⁵ Haú sù é nhîng, nungmoq é gabú hkyô banshoq gi, haí dut byuq bekô lhú? Nungmoq gi, ru wó dut é nghut jáng, nungmoq é myoqjí lé choq yú mù, ngo lé wám byí pyám kó râ í dut laí lò bê hkyô lé, ngò saksé wó hkâm lhê. ¹⁶ Ahkuí, ngò gi, nungmoq lé haú tengmán hkyô taí kyô é yanmai, nungmoq é gyè dut to bê nghut lhê lhú?

¹⁷ Haú byù góbang gi, nungmoq lé gyai shirong é hkyô tân shit ri; nghut kôlháng, ge é hkyô haí a bò; yhangmoq ô nau é hkyô gi, yhangmoq lé nungmoq taû shirông kó abe ga, nungmoq lé ngamoq chyáng mai lhoq kâng yù râ matú ru nghut lhê. ¹⁸ Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haú su shirong le ge lhê. ¹⁹ Ngò chytidap é zo wuè ê, Hkrisduq é a-kyang nungmoq má gumjup lo é jé shoq, ngò gi, zo hkûn nõ no é su radàm dum hkâm zô nyi luí, ²⁰ nungmoq é hkyô lé myit wuîhke tô é yanmai, ahkuí, nungmoq eq rahá myang nyi mù, ngò taí é danghtê wó htaí râ matú, gyai yhang myoqbyu nyi lhê ô.

Hagara eq Sarah Nhk É Hkyô

²¹ Haú jep é tarâ ô má nyi nau é bang ê, nungmoq gi, jep é tarâ má taí é hkyô lé a sê gyo kô é nghut lhê lhú? Ngo lé taí kyô wú kó laq. ²² Hkâsu mù gâ le, Abraham gi, yuqzo í yuq wó ri; rayuq gi, jùn myhî é yhangzo, rayuq gi, jùn myhí a nghut su é yhangzo, ga kâ tô ri. ²³ Haú jùn myhî é yhangzo gi, gungsho dông hku lé é sù nghut kôlháng, jùn myhí a nghut su é yhangzo kúm gi, danggidiq eq rajung za hku lé é sù ru nghut lhê.

²⁴ Haú hkyô pé gi, dangtú ru nghut lhê, myiwe haú í yuq gi, dangshikaq í lhum eq wuí lhê; dangshikaq ralhum gi, Sinaq Bùm mâ é† nghut luí, jùn dut râ nghut é zo wuí lé hku kat é Hagara lé taí nau é nghut ri. ²⁵ Hagara haú gi, Arabiq mau mâ é Sinaq Bùm lé taí nau é nghut luí, ahkuí lhê é Yerusalem eq wuí nyi ri. Hkâsu mù gâ le, Yerusalem haú gi, yhang zô pé eq rahá, jep é tara é jùn dut nyi kô é yanmai nghut lhê. ²⁶ Nghut kôlháng, ahtoq mâ é Yerusalem gi, jùn myhí a nghut sù nghut luí, nga-nhûng é înu nghut ri. ²⁷ Hkâsu mù gâ le,

"Zoshâng a hku é baùdung myhí ê, gabú nyí aq. Zo hkû nõ a no wú shí é myiwe gi, gabú luí, gabú garû nyi aq;

hkâsu mù gâ le, haú chamchyuiyui dut é myiwe myhí gi, làng wó é myiwê htoq má zo wuí je myô wó bê nghut ri." ga kâ tô ri.✧

²⁸ Gumang wuè ê, ahkuí, nungmoq gi, Isak su, danggidiq byí tô é zo wuí nghut bê nghut ri. ²⁹ Haú hkûn lé, haú gungsho dông hku lé lo é sù gi, Woi-nyí wum-o dông hku lé lo é sù lé zing-rî ri. Haú eq rajung za, ahkuí le dut nyi ri. ³⁰ Nghut kôlháng, Chyúmdang má hkâsu ga kâ tô ri lhú gâ le, "Haú jùn myhí eq yhangzo yuqzo lé hkat htoq pyám aq; hkâsu mù gâ le, haú jùn myhí é yhangzo yuqzo gi, jùn myhí a nghut su é yhangzo yuqzo eq rahá, silí wunlí lé wó chôm hkam yù râ a nghut."✧ gâ ri. ³¹ Haú mù luí, gumang wuè ê, nga-nhûng gi, jùn myhí é yhangzô pé a nghut e za, jùn myhí a nghut su é yhangzô pé ru nghut lhê.

† 4:12 Ngò su dut keq gâ é lichyúm gi, nungmoq le ngò su jep é tarâ mai lut htoq keq gá nau é nghut lhê. † 4:24 Sinaq Bùm mâ é dangshikaq gi, jep é tarâ eq sêng é dangshikaq nghut lhê. ✧ 4:27 Esai 54:1 ✧ 4:30 Apùn 21:10

5

Hkrisduq Mã Ê Luthkyô

¹Nga-nhúng luthkyô wó rã matú, Hkrisduq gi, nga-nhúng lé lhoq lhut kat bê nghut ri. Haû mù luí, haû má ru gîng nyì mù, yhumsing gùng lé jun é wòlai hkaû má hkâtaû bainaî nyì kó.

²Ngá dang lé matsîng yù keq! Ngò Poluq, nungmoq lé taí kyo kôlé, nungmoq ahpyo-kuq hpyit hkam yù kô é nghut jáng, Hkrisduq gi, nungmoq é matú hai akyû le bò kó rã a nghut. ³Hau htoq agó, ahpyo-kuq hpyit hkam yu é sũ ó yuq lé nghut kôle, ahpyo-kuq hpyit é sũ gi, jep é tarâ lhunglhang lé châng kut rã lhê nghû, ngò kyô kat lhê. ⁴Jep é tarâ châng shikut é đông mara hkyut san byî é hui naû bang, nungmoq gi, Hkrisduq eq gâng lhûm to bekô nghut luí, haû Garaî jeju mai le byit gyó byuq bekô nghut ri. ⁵Ngamoq kúm gi, myit myoqbyu tô é dingmán hkyô lé, haû Woi-nyí é yanmai lumjîng myit èq gyai yhang lánng nyì é bang nghut lhê. ⁶Hkâsu mù gâ le, Hkrisduq Yesuq má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyû a bò nghut ri; chyitdap myit mai htoq lo é lumjîng myit za sheq, akyû bo lhê.

⁷Nungmoq gi, rago din wú bekô* nghut é wá, haû tengmán hkyô lé a châng sháng gaq ga, nungmoq lé ó yuq èq hkúm zing pyám kô é lúhú? ⁸Haû su kut mhoq hpyoq yu é hkyô gi, nungmoq lé ji yù Su chyáng mai htoq lo é a nghut. ⁹"Mún ratsuí zo gi, muk long gón lé wó lhoq daû lhê."† gâ é dang joq lhê. ¹⁰Nghut kôlhang, nungmoq gi, gotû hkyô đông a lhom yù kó rã nghut lhê nghû, Hkrisduq má hkyak ngò myit lum nyì lhê. Nungmoq lé lhoq byok byî é sũ, ó yuq nghut kôle, yhumsing é mara eq rajung za dam byî é hui zo rã nghut lhê. ¹¹Gumang wuê, ahpyo-kuq hpyit é hkyô lé, ngò rû hko nyì ashî nghut le gi, haû mù luí, zing-rí é lé ngò hui zô nyì rã lúhú? Haû su kut é nghut jáng, haû tapzîng eq séng luí, manghkáng joq rã a nghut lo. ¹²Nungmoq lé lhoq byok nyì é bang gi, hau htoq chyân luí, yhumsing gùng yhumsîng

banshoq hpyit pyám kó sháng gaq nghû, ngò wó myit ri.

¹³Gumang wuê, nungmoq gi, luthkyô wó rã matú ji yù huí é bang nghut akô; nghut kôlhang, nungmoq é luthkyô ahkáng lé, yubak gungsho má hkâchâng nhâng kó, chyitdap myit mai kúm gi, rayuq eq rayuq dojaû lhûm nyì keq. ¹⁴Hkâsu mù gâ le, "Náng gûng lé náng chyitdap é su, náng é chyangnâm mã é bang lé le chyitdap aq."☆ gâ é hkunmó má za, jep é tarâ banshoq lo bo to bê nghut lhê. ¹⁵Nungmoq, rayuq eq rayuq ngat lhum myui lhûm nyì kô é nghut le gi, rayuq eq rayuq lhoq htên pyám lhum kó rã nghut é lé, sidiq nyì keq.

Woi-nyí Êq Asak Dui Rã Hkyô

¹⁶Nghut kôlhang, ngò taí kôlé, Woi-nyí shuî ù é đông asak dui nyì keq; haû hkûn, nungmoq gi, yubak gungsho ô nau é hkyô châng kó rã a nghut. ¹⁷Hkâsu mù gâ le, yubak gungsho ô nau hkyô gi, Woi-nyí eq shai lhûm nyì; Woi-nyí gi, yubak gungsho ô nau hkyô eq shai lhûm nyì, dut ri. Haû í lhum gi, gyè dut lhûm ri; haû mù, nungmoq gi, yhumsîng ô nau é đông hkâkut kó. ¹⁸Nghut kôlhang, nungmoq lé Woi-nyí èq hkyô hí é nghut jáng, nungmoq gi, jep é tarâ ô má a nghut lo nghut ri.

¹⁹Yubak gungsho é muzó gi, de de yhang nghut lhê; haû pé gi, ashop é đông gungsho zùm yap é hkyô, a sân-yúng é hkyô, shut é đông nyì zô lhûm nau é myit, ²⁰hpara noq hkyô, myoqheq mô kut é hkyô, a jú é hkyô, byoq lhûm é hkyô, manon é hkyô, nhiksoq sup é hkyô, yhumsing wuizat é hkyô, gâng lhum sê é hkyô, hpúng gam é hkyô, ²¹ningsû é hkyô, î shuq wut é hkyô, zo yê shuq yê mù achâq achyut kut é hkyô pé eq haû pé su kut é gotû hkyô pé nghut ri; haû su kut nyì yap é bang gi, Garaî Gasâng mingdán é silí wunlí lé wó hkam yù rã a nghut nghû, ngò, hí hkûn nungmoq lé taí wú bê eq rajung za, ahkuí lé, nungmoq lé ngò sidiq byî nyì lhê.

²²Nghut kôlhang, Woi-nyí é ashî gi, chyitdap hkyô, gabú hkyô, nguingón hkyô, myit hîng hkyô, nhik-u nû é hkyô, ge é

* 5:7 Rago din wú bekô gâ é gi, woi-nyí hkyô má kô myhang lai lò bê lé taí nau é nghut lhê. † 5:9 Shut é đông mhoqshit é hkyô ratsuí gi, muk long gón lé mún èq wó lhoq daû é su, nungmoq banshoq lé wó lhoq nghoq yu pyám lhê. ☆ 5:14 Nhung 19:18

hkyô, lhumzui hkyô, ²³ nûm é hkyô, yhum-sing gùng lé wó hkyô é hkyô pé nghut ri. Haú hkyô pé lé hkâm zing pyám râ tarâ haí le a joq nghut ri. ²⁴ Hkrisduq Yesuq eq séng bê bang kúm gi, yubak gungsho ô naú hkyô lé le, hau é yut yut ô naú myit eq shirong é hkyô pé lé le, tapzîng má jén sat pyám bekô nghut ri. ²⁵ Nga-nhúng gi, Woi-nyí mai asak ùi bê nghut mù, haú Woi-nyí htàng châng nyi sháng. ²⁶ Nga-nhúng gi, akôm gyáng dang táí luí, rayuq eq rayuq jeq ho lhúm é eq manon lhúm é bang, a ùt nyi sháng gaq.

6

Lhunglhang Bang Lé, Ge É Hkyô Kut Byi Râ Hkyô

¹ Gumang wui ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nûm é myit èq haú yuq lé lhoq pun lhoq kyîng yù keq. Nghut kôlhang, nàng gi, gunglaú é a hui sháng gaq, sidiq nyi aq. ² Rayuq eq rayuq é wòlai lé tê byi lhúm nyi keq; haú òng mai, nungmoq gi, Hkrisduq é tarâ lé wó lhoq dik kó râ nghut lhê. ³ Rayuq yuq gi, yhumsing gùng haí le a nghut é wá, ahkyak su ngam é nghut jáng, haú yuq gi, yhumsing gùng lé mhaú pyâm é sù nghut ri. ⁴ Yuq hkangmó gi, yhumsîng nyi yap é hkyô lé taú myit wú keq; haú hkûn, yhumsing gùng lé góbang eq whuí nó a râ e za, yhumsing gùng má aróng wó yù râ nghut lhê. ⁵ Hkâsu mù gâ le, yuq hkangmó gi, ó le ô wò lé wùn waq ra râ ùt lhê.

⁶ Haú mungdang lé mhoq yu é sù gi, mhoqshit byi sù lé, ge é zè banshoq gâm byi sháng gaq.

⁷ Garai Gasang lé gi, wó rhoi râ a nghut, yhumsing gùng yhumsîng mhauzô é hkâhui nhâng kó; byù gi, hô kat é eq rajung za, shù yù râ nghut lhê. ⁸ Haú yhumsing é yubak gungsho lé lhoq ngón râ matú hô kat é sù gi, myit haú mai htên byoq é hkyô lé myang hkam yù râ nghut lhê; haú Woi-nyí lé lhoq ngón râ matú hô kat é sù kúm gi, Woi-nyí haú mai ahtum abyuq é asak lé myang hkam yù râ nghut lhê. ⁹ Nga-nhúng gi, ge é hkyô kut é má ngú byuq é bang a ùt sháng gaq, hkâsu mù gâ le,

haú lé nga-nhúng a tô pyâm é nghut jáng, ahkyîng yam-yoq jé é hkûn, nga-nhúng gi, akyû myang hkam yù râ nghut lhê. ¹⁰ Haú mù luí, nga-nhúng gi, kut râ ahkyîng wó tô é u lé, byù lunglhang bang lé ge é hkyô kut byi sháng, haú lumjîng hkyô eq sêng é ikun byu pé lé, je riyhang kut byi sháng.

Ahpyo-kuq Hpyit É Hkyô A Nghut E Za, Byù Sik Hpân Huí É Hkyô

¹¹ Ngò, nungmoq lé, ngá é loq èq hkâ-í kô é laiká cham kê kat byi é lé, wú wú keq!

¹² Ahtoq pyâm za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyi é bang nghut akô; yhangmoq haú su kut é hkyô gi, Hkrisduq é tapzîng é yanmai zing-ri huí é hkyô lé, koi pyám râ matú za nghut ri.

¹³ Hkâsu mù gâ le, haú ahpyo-kuq hpyit é bang lháng jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng luí wó gumrông kó sháng gaq ga, nungmoq lé ahpyo-kuq hpyit nhâng nau akô nghut ri. ¹⁴ Ngò kúm gi, nga-nhúng é Yhumsîng Yesuq Hkrisduq é tapzîng eq séng luí gumrong é mai lai luí, haí má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê. ¹⁵ Ahpyo-kuq hpyit é hkyô nghut nghut, a hpyit é nghut nghut, hai akyû a bò; byù sik hpân huí é hkyô za sheq, ahkyak é nghut lhê. ¹⁶ Tarâ haú lé châng é lunglhang bâng é ahtoq má le, haú Garai Gasang é Israelaq byu pé* é ahtoq má le, nguínón hkyô eq shogyo nhikmyin hkyô gi, ru joq nyi sháng gaq ô.

¹⁷ Ahkuí mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é ùi-nhâng zoshâng nghut é saksé damhkô lé wun wún lhê.

¹⁸ Gumang wui ê, nga-nhúng é Yhumsîng Yesuq Hkrisduq é jeju gi, nungmoq é woi-nyí eq ru joq nyi sháng gaq. Amen.

* 6:16 Bun zo shí lhum mâ é Israelaq byu pé gâ é gi, hpúng byù wui banshoq lé táí nau é nghut lhê.

EHPESU Pê Chyáng Hun Kat é Laiká (Ephesians)

¹ Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haû sân-yúng bâng chyáng nguingón dang shit kyô kat lhê.

² Nga-nhùng é Îwa Garai Gasang eq Yhumsîng Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyi sháng gaq ô!

Hkrisduq Mâ É, Woi-nyí Hkyô Shimân Jeju Pé

³ Mauhkûng htoq tsáng myhâng má, woi-nyí hkyô eq sêng é shimân jeju jung hkanmó lé, Hkrisduq má nga-nhúng lé shimân byi sù, nga-nhùng é Yhumsîng Yesuq Hkrisduq é Yhângwa, Garai Gasang gi, hkungsô wó nyi sháng gaq. ⁴ Hkâsu mù gâ le, nga-nhúng gi, Garai Gasâng é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhúng lé hkyin yu to bê nghut ri. ⁵ Hau htoq agó, Yhang, nga-nhúng lé chyitdap é yanmai, Yhang myit ngui ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhúng lé masat to bê nghut ri. ⁶ Haû mù, Yhang chyitdap é Sû* má, nga-nhúng lé láí láí byi bê nghut é, hpungwup shingkan bo é jeju chyunghuq lé, chôm hkya-on sháng. ⁷ Garai Gasâng é agùn agó é jeju yanmai, nga-nhúng mara hkyut byi é hui luí, Yhang Zô é sui dông mai, nga-nhúng gi, Yhang má hkyi yù hkyô wó yu é nghut lhê. ⁸ Jeju haû lé gi, hpaqchyí byéng-yá eq sê gyô é nyan banshoq le kut, Yhang, nga-nhúng lé agùn agó byi bê nghut lhê. ⁹ Garai Gasang gi, Yhang myit ngui é eq rajung za, Hkrisduq dông mai kut râ matú hen to bê nghut é, Yhâng é zaú tô é hkyô lé, nga-nhúng lé shit bê nghut ri. ¹⁰ Sê gyo wuí é hkyô haû gi, lhoq dik râ ahkýng jé jáng, mauhkûng htoq eq myigùng htoq

mâ é lhunglhang lé, Hkrisduq má rading ralhum za kut râ nghut é hkyô nghut lhê.

¹¹ Hkrisduq má sâng-hi myit myoqbyù bang nghut é nga-nhúng gi, Yhâng é hpungwup shingkan lé hkya-on kungtôn sháng gaq ga, ¹² Garai Gasang gi, Yhang myit sôn tô é lhunglhang lé ban kut mù, Yhâng ô nau é dông, hí mai myit hpyit doqdân to bê eq rajung za, nga-nhúng lé le, Hkrisduq má hkyin yu to bê nghut ri. ¹³ Hau htoq agó, nungmoq le, nungmoq é hkyi yù hkyo é gabú danglù gâ é tengmán mungdang lé wó gyo kô é hkûn, Hkrisduq eq sêng é bang dut bekô nghut ri. Nungmoq gi, Hkrisduq lé lumjîng bekô nghut é yanmai, haû gidiq byi tô é Chyoiyúng Woi-nyí dizik htung tap byi é hui bekô nghut ri. ¹⁴ Garai Gasâng é hpungwup shingkan lé hkya-on râ matú, Yhang eq sêng é byu pé hkyi xe yù huí é hkýng jé shoq, Chyoiyúng Woi-nyí haû gi, nga-nhùng é muizè lé hkyak wó yù râ nghu é masat nghut ri.

Poluq Kyûdung Byi É Hkyô

¹⁵ Haû mù luí, Yhumsîng Yesuq lé nungmoq lumjîng é hkyô eq sân-yúng bang lhunglhang lé nungmoq chyitdap é hkyô lé, ngò wó gyô é yanmai, ¹⁶ ngò gi, ngá é kyûdung dang má nungmoq lé myit bun uchyang, anum yhang, nungmoq é matú jeju hkya-ôn nyi lhê. ¹⁷ Nga-nhùng é Yhumsîng Yesuq Hkrisduq é Garai Gasang nghut é, hpungwup shingkan bò sù haû Îwa gi, Yhang lé nungmoq je sé râ matú, hpaqchyí byéng-yá wó byi é eq san za wó sé nhang é Woi-nyí, nungmoq lé byi sháng gaq nghû, ngò, Yhâng chyáng dúng nyi lhê. ¹⁸ Hau htoq agó, Yhang, nungmoq lé ji yu é myit myoqbyù hkyô, hkasú é nghut é lé le, Yhâng é hpungwup shingkan bo é muizè gi, sân-yúng bâng chyáng agùn agó joq nyi é hkyô lé le, Yhâng é kô dik é a-tsam mó gi, lumjîng bang nga-nhùng é matú nghut é lé le, ¹⁹ nungmoq wó sé râ matú, nungmoq é myit myoqjí lhoq gyeng byi é hui sháng gaq nghû, ngò kyûdung byi nyi lhê. A-tsam mó haû gi, Garai Gasang, Hkrisduq lé shi é mai lhoq dui toq yù mù, ²⁰ mauhkûng htoq tsáng myhâng má, Yhâng é loqyò hkyam shut zùng nhang é hkûn, chung é wum-o a-tsam mó eq rajung za nghut ri. ²¹ Hkrisduq

* 1:6 Yhang chyitdap é Sû gâ é gi, Yesuq lé taí nau é nghut lhê.

gi, uphkan é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhông é myìng lhunglhâng é htoq má le, je gyaú é sù nghut lhê. ²² Hau htoq agó, Garai Gasang gi, lhunglhâng lé Yhâng é hkyiwa ô má tô to luí, haú noqkuq hpûng é matú, Yhang lé, jung hkanmó é ushuq dut râ đông masat to bê nghut ri. ²³ Noqkuq hpúng haú gi, Hkrisduq é gungdu nghut luí, hkyô hkanmó má jung hkanmó lhoq byíng Jup é Hkrisduq byíng nyi é nghut ri.

2

Hkrisduq Má Asak Dui É Hkyô

¹ Láí ló bê hkûn, nungmoq gi, tarâ lu láí é eq mara kut shut é hkyô pé é yanmai, shi tô é bang dut kô é nghut lhê. ² Haú hkûn, nungmoq gi, mingkan ngón hkyô pé má lhaq châng nyi kô é htoq agó, haú tarâ a châng bâng é myit má ahkuí mû zuí nyi é sobyô nghut é, maulat lé up sù htâng châng nyi kô é bang nghut lhê. ³ Nga-nhúng banshoq bang le, yhangmoq su kut nyi láí lo é bang chyat nghut mù, yubak mara byíng é suisho ô nau gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé đông za châng wú é bang nghut lhê. Haú mù, góbang eq rajung za, nga-nhúng gi, Garai Gasâng é nhikmo-yo hkyô eq gingdán wú é bang chyat nghut lhê. ⁴ Nghut kôlhâng, shogyo nhikmyin myit gyaí bo é Garai Gasang gi, nga-nhúng, tarâ lu lai luí shi byuq bê bang dut kôlhâng, Yhâng é chyitdap myit mó èq, nga-nhúng lé chyitdap luí, Hkrisduq eq rahá asak dui nhâng bê nghut ri. ⁵ Haú mù, nungmoq gi, Garaí jejú èq za hkyi yu é hui bekô nghut ri. ⁶ Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung taí é Yhâng é jeju lé, htang pyat má wó shit sháng gaq ga, ⁷ nga-nhúng lé, Hkrisduq eq rahá lhoq dui toq yú mù, mauhkûng htoq tsáng myhông má, Yhang eq rahá zùng nhang to bê nghut ri. ⁸ Hkâsu mù gâ le, nungmoq gi, lumjîng é đông mai Garaí jejú èq za hkyi yu é hui bekô nghut ri. Haú gi, nungmoq chyáng mâ é a nghut, Garai Gasâng jeju chyunghuq za ru

nghut lhê. ⁹ Haú gi, yhumsing é muzó mai wó é a nghut é yanmai, ó yuq le nghutbun râ hkyô a joq. ¹⁰ Hkâsu mù gâ le, nga-nhúng gi, Garai Gasâng é loqmú pé nghut mù, nga-nhúng zui saí râ matú, hí hí mai, Garai Gasang hen lajâng tô é ge é muzó pé lé zui saí râ matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haú mù luí, nungmoq gi, hí hkûn, hku lé lo é mai yhang tûngbaú pé nghut é hkyô lé le, byu loq èq za gungsho má kut é, "ahpyo-kuq hpyit hkâm bang" gâ é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq. ¹² Haú u lé, nungmoq gi, Hkrisduq eq gâng lhûm tô é bang; Israelaq mingbyû a nghut é bang; danggidiq eq sêng é dangshikaq pé má gó ming byû nghut é bang; mingkan htoq má, myoqbyû jowò a joq é eq Garai a wó é bang nghut é lé, myitbun keq. ¹³ Nungmoq gi, hí hkûn wê gâng nyi é bang nghut kôlhâng, ahkuí kúm, Hkrisduq é sui đông mai Hkrisduq Yesuq má shuí chyâng htep é hui bekô nghut ri.

¹⁴ Hkâsu mù gâ le, Yhânggùng yhang gi, nga-nhúng é nguingón hkyô nghut ri. Yhang gi, gyoro má kyo tô é madin nghut é a nau a wom hkyô lé hpýoq hpyi pyám byi luí, haú í myû* dut nyi é lé, rahú za dut nhâng bê nghut ri. ¹⁵ Haú hkunmó pé eq hkanmó tô é tarâ pé bo é jep é tarâ lé, Yhâng é gungsho má lhoq htûm pyám bê nghut ri. Haú mù, Yhang ô nau é hkyô gi, haú í myû dut tô é lé, Yhânggùng má yhang, byû sik ra-myû za hpan to râ matú nghut ri; haú đông, simsaq hkyô kut byi bê nghut ri. ¹⁶ Yhang gi, a nau a wôm lhûm é hkyô lé, haú tapzîng má lhoq htûm pyám byi mù, haú tapzîng đông mai, byû myu í myu é lé ragùng za kut luí, Garai Gasang eq xoq byi bê nghut ri. ¹⁷ Yhang gi, wê gâng nyi é bang† nungmoq lé le, chyâng htep nyi é bang‡ lé le, simsaq hkyô é danglù lé hko kyo bê nghut ri. ¹⁸ Hkâsu mù gâ le, nga-nhúng í myû gi, Yhang đông mai, Woi-nyí ralhum zâ èq, haú îwâ chyáng wàng râ hkyô dong bê nghut ri.

* 2:14 I myû gâ é gi, Israelaq byu pé eq tûngbaú pé lé gâ lhê. † 2:17 Wê gâng nyi é bang gâ é gi, tûngbaú pé lé gâ lhê. ‡ 2:17 Chyâng htep nyi é bang gâ é gi, Israelaq byu pé lé gâ lhê.

¹⁹ Hau é yanmai, nungmoq gi, tungbaù pé eq byù bíng pé a nghut lô é za, Garaí é byu pé eq rahá, mingbyù wùi eq yhumbyù wùi chyat nghut bekô nghut luí, ²⁰ haù lagyô pé eq myiqhtoí pé, hi tô é apùn awang htoq má xuq tô é bang chyat nghut akô; Hkrisduq Yesuq yhang, haù má é ahkyak é htungchyùn luqgok dut bê nghut ri. ²¹ Yhang má, wahpang lhum gón xoq lhùm bùm é nghut mù, haù Yhumsîng má chyoyúng noqkuq yhùm ralhùm dut lò bê nghut ri. ²² Woi-nyí dông mai, Garaí Gasang nyí râjang dut râ matú, nungmoq le, Yhang má, wahpang su tsuq é chôm huí nyi bùm bekô nghut ri.

3

Poluq, Tungbaù Pê É Tarâ Hkô Sará

¹ Haù su nghut mù, Hkrisduq Yesuq é hkyô lé, nungmoq tungbaù pê chyáng hko kyô é yanmai, htongbyù dut sù, ngò Poluq gi, nungmoq é matú kyûdung byí lhê.

² Nungmoq lé dojaù râ é matú, ngo lé byí tô é Garaí Gasâng jeju ayá shí lé, nungmoq gè gè wó gyô wú bekô râ nghut lhê. ³ Haù gi, hí hkún, ngò, tot é dông kê tô wú bê eq rajung za, haù zaù tô é hkyô lé, shing-rán dông ngo lé sé nhang é nghut ri. ⁴ Haù hkyô lé, nungmoq nghap wú é hkún, Hkrisduq eq sêng é zaù tô é hkyô, ngò rago sê é lé, nungmoq wó sé kó râ nghut lhê. ⁵ Haù lé, laí lò bê ipyat pé má é byu pé lé a sé nhang é nghut kôlhang, ahkuí gi, Garaí Gasâng é chyoyúng é, lagyô pé eq myiqhtoí pé lé, haù Woi-nyí èq hpông shit bê nghut ri. ⁶ Zaù tô é hkyô haù gi, gabú danglù dông mai, Hkrisduq Yesuq má, Israelaq byu pé eq rahá, tungbaù pé le, hkung xoq bang wó dut luí, gungdu ralhùm é gungsho showui showang pé chyat dut é eq, danggidiq byi tô é lé wó chôm hkam yu é bang dut é hkyô nghut ri.

⁷ Yhâng é hpungwup a-tsam mai, ngo lé byí tô é Garaí Gasâng jeju chyunghuq é yanmai, ngò gi, gabú danglù shí taí râ dui-nhâng zoshâng dut é nghut lhê. ⁸ Ngò gi, haù Garaí Gasâng é byu pé má é tiq dik sù htoq má lhang je tiq sù nghut kôlhang, haù Hkrisduq é a ung htoq taí é wó sùt hkyô lé, tungbaù pê chyáng hko kyo râ matú le, ⁹ haù lhunglhang lé hpan é Garaí Gasang má, laí lò bê ipyat pé má zaù tô é, zaù tô é

hkyô haù lé hkâsu kut tô é lé, yuq hkangmó lé taí sân kyo râ matú le, jeju shí, ngo lé byi bê nghut ri. ¹⁰ Haù gi, nga-nhung é Yhumsîng Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za, ¹¹ haù Garaí Gasâng é hpaqchyí mó góng lé, noqkuq hpúng dông mauhkung htoq tsáng myhâng má é uphkang bang eq ahkáng ayá wó bang lé, ahkuí sé nhang râ matú nghut lhê. ¹² Nga-nhung gi, nga-nhung é Yhumsîng Hkrisduq Yesuq eq rading ralhùm za nghut é yanmai le, Yhang lé lumjîng é yanmai le, Garaí Gasang chyáng, wám é myit eq a gyuq a wàm é myit èq wó htep è é nghut lhê. ¹³ Haù mù luí, ngò, nungmoq lé dúng tongbán nau é gi, nungmoq é matú, ngò wuîhke jamjau hui zô é yanmai, nungmoq i-myt hkâgyui kó; haù gi, nungmoq é matú akýu bò râ hkyô nghut lhê.

Ehpesu Myuq Byu Pé Lé Kyûdung Byí É Hkyô

¹⁴ Haù pê é yanmai, ngò gi, haù íwâ é hí má hkyihput htuq luí kyûdung é nghut lhê. ¹⁵ Mauhkung eq myigùng htoq má é Yhâng é ikun byù lhunglhang gi, Yhâng chyáng mai mying wó yu é chyat nghut lhê. ¹⁶ Nungmoq é lumjîng myit mai, nungmoq é i-myt unghkaù má Hkrisduq wó nyi nyí sháng gaq nghû, ¹⁷ Yhang é hpungwup shingkang bo é agùn agó wó sùt é mai, nungmoq é i-myt unghkaù má é sù lé, Yhâng é Woi-nyí dông, hpungwup a-tsâm èq wum-o lhoq kîng byi râ matú, ngò kyûdung byi lhê. Hau htoq agó, nungmoq gi, chyitdap myit má amyit chin to luí, awang hi to mù, ¹⁸ sân-yúng bang eq rahá, hau é apyí, a-tsung, myhâng, nik, hkâ-í nghut é lé, rago wó sé kôluí, ¹⁹ Garaí Gasâng é gumjup é hkyô lhunglhang èq wó lhoq gumjup yù kó sháng gaq nghû, sê é nyan htoq má gyaú é Hkrisduq é chyitdap hkyô lé, nungmoq wó sé râ matú, ngò kyûdung byi lhê.

²⁰ Ahkuí, nga-nhung é hkaù má mù zuí nyi é, Yhâng é wum-o a-tsâm é yanmai, nga-nhung dúng é banshoq eq myit é hkyô lhunglhang htoq je wó kut byí é Su chyáng, ²¹ haù noqkuq hpúng é yanmai le, Hkrisduq

Yesuq é yanmai le, pyat pyat zaí zaí, ah-tum abyuq, hpungwup shing kang rû bo nyi sháng gaq ô! Amen.

4

Hkrisduq É Gungdu Má Rading Ralhum Za

¹Haû mù luî, nungmoq gi, nungmoq lé wut yù bê nghut mù, wut yu é hkyô eq gingdán é dōng asak duì keq nghû, haû Yhumsing é yanmai, htóng lúng sù ngò Poluq gi, nungmoq lé lhoq pun lhoq kyîng kat lhê. ²Hkyô hkat hkangmó má i-myit lhoq nyhum é eq i-myit nú-nhâm nyi keq; myit hing é eq chyitdap myit mai rayuq eq rayuq hkam jân lhûm nyi keq. ³Haû Woi-nyí eq byí é myit hui hkyô lé, nguingón hkyô dōng mai châng nyi râ matú, wó dut é í shikut nyi keq. ⁴Nungmoq gi, wut yù hui kô é hkûn, myit myoqbyù hkyô rashut za wut yù hui bekô nghut é eq rajung za, gungdu ralhum eq Woi-nyí ralhum za nghut nyi ri. ⁵Yhumsing rayuq za, lumjîng hkyô rahkat za, bapisma ralhum za nghut nyi ri. ⁶Banshoq bâng é Îwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut luî, lhunglháng dōng mai mù kut é eq lhunglhâng é ahkaû má lúng nyi sù nghut ri.

⁷Nghut kôlháng, nga-nhúng yuq hkangmó gi, jeju chyunghuq lé, Hkrisduq mai ké byí é dōng wó yu é nghut lhê. ⁸Hau é yanmai,

"Yhang gi, myhang é jowò shut doq ló é hkûn, shúm zung é bang lé gi, shuí chûng mù, byu pé lé gi, chyunghuq tsing gâm byí ri."✧

ga, Chyúmdang má taí tô é nghut lhê. ⁹Haû "doq ló" gâ é lichyúm gi, myigùng é a-o tsáng má le, Yhang gyó jé bê nghut lhê, gá naû é a nghut lhi? ¹⁰Haû gyó lé é Sû gi, junghkang jungmó lé lhoq byíng jup râ matú, mauhkûng banshoq é ahtoq má doq ló é Sû yhang nghut lhê. ¹¹Yhang gi, ram lé, lagyô pé, ra-am lé, myiqhtôí pé, ram lé, gabú danglù hko kyo râ bang, ra-am lé, hpúng-up pé eq sará pé kut tsing byí to bê nghut ri. ¹²Haú bang gi, Garai Gasang é byu pé lé wùn waq âng é muzó pè é matú, hen lajâng é bang nghut ri. Haú hkûn sheq, Hkrisduq é gungdu gi, ¹³haû lumjîng hkyô eq Garai Gasang é Yhangzo lé sê é hkyô má,

nga-nhúng banshoq bang rading ralhum za wó dut mù, kô dîng bang dut luî, Hkrisduq é gumjup é isâm banshoq lé wó yu é hkûn jé shoq, wó kô jat nyi râ nghut lhê.

¹⁴Haû mù, nga-nhúng gi, wuibaù pè eq hí shut htâng shut bat myhû é su dut é eq, byu pè é agè ashop é eq haq dâ é mhoq hpyoq hpaqchyí pé eq mhoqshit hkyô laidun hkangmó eq, shí shut hé shut mut tâng é su dut é lé hui zô é zoshâng wuì su a nghut lô é za, ¹⁵chyitdap myit mai tengmán é dang lé taí nyi jáng, Hkrisduq nghu é ulhum má hkyô hkangmó kô myhang lò râ nghut lhê. ¹⁶Yhang dōng mai, gungdu gón gi, ralhum eq ralhum htuqbâng é gungsho showui showang pé lé xoq byí to bê nghut mù, gungsho showui showang haú pé gi, yhumsing é muzó lé zui saí nyi é nghut jáng, gungdu haû gi, chyitdap myit má, yhânggùng yhang kô lò myhang lò râ nghut lhê.

Byù Sik Dōng Asak Duì Râ Hkyô

¹⁷Haû mù luî, haû Yhumsing é ahko ahkáng mai ngò nungmoq lé taí nau é hkyô gi, haû tûngbaù pé gi, akyû a bo é lé myit mù, asak duì kô é su, nungmoq gi, hkâkut kó. ¹⁸Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, haí le a sé kô é yanmai, Garai Gasang byí é asak eq wê gâng byuq bekô nghut ri. ¹⁹Yhangmoq gi, gyuq hoq hkyô a bo byuq lo kô é yanmai, myoqnoq myit dōng a sansêng é hkyô jung hkangmó lé je wó kut xoq nyi shoq ga, yhumsing gùng lé, gungsho ô naù gadaú é hkyô má ap pyám bekô nghut ri.

²⁰Nungmoq kúm gi, Hkrisduq é hkyô lé haú dōng mhoq yû kô é a nghut. ²¹Nungmoq gi, Yesuq chyáng mâ é tengmán hkyô dōng, Yhâng é hkyô lé wó gyô wú é eq mhoq yu wú bekô nghut lhê. ²²Haû mù, nungmoq gi, hí hpyang lhê é nungmoq é nyi yap sâmlai nghut é, ô naù gadaú luî, yhumsing gùng yhumsing mhaù pyâm é dōng htên byoq ló nyi é nungmoq é byù xau lé tô pyám râ matú mhoq yû bê eq rajung za, ²³nungmoq é i-myit lé asik htaí pyám nhâng keq; ²⁴hau htoq agó, nungmoq gi, tengmán é eq sêng é dingmán hkyô eq chyoiyúng hkyô má, Garai Gasang eq dù

shoq hpan to hui bê nghut é byù sik lé, yu wut to keq.

²⁵ Haù mù, nga-nhúng banshoq bang gi, gungdu ralhùm é gungsho showui showang pé chyat nghut é yanmai, nungmoq yuq hkanmó gi, mhaù é hkyô lé tô pyám luí, yhumsing é chyangnâm mâ é sù lé, tengmán é dang taí ra râ nghut lhê. ²⁶ "Nungmoq nhikjum yô é hkûn, mara hkâkut kó." ✱ nungmoq gi, buì wàng shoq nhikjum hkâyô nyi kó. ²⁷ Nat Tsadán lé le, jowò hkâbyi kó. ²⁸ Hkau sù gi, a dum hkau lo sháng gaq; râ nyi é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyi luí, muzó zú shikut ra râ nghut lhê.

²⁹ Nungmoq é nhut mai agè agáu é dang haì le hkâhtoq nhâng kó; wó gyô é bang akyû bò shoq, yhangmoq râ tô é má cháng luí, haù bang kô lam lò râ dang za taí keq. ³⁰ Haù hkyi yù râ buinyi é matú, dizik dông nungmoq lé tap to byí é Garai Gasâng é Chyoiyúng Woi-nyí lé hkâlhoq yón kó. ³¹ Haù myit tot é, nhikjum yô é, nhik-yô é, byoq lhum byoq cheq é eq lumù gansang é, agè agáu é hkyô pé banshoq lé, nungmoq tô pyám keq. ³² Nungmoq gi, rayuq eq rayuq, ge é hkyô eq shogyo nhikmyin é hkyô tân shit lhum luí, Garai Gasang gi, Hkrisduq má, nungmoq lé mara hkyut byí é su, nungmoq yhangchang le mara hkyut byí lhùm nyi keq.

5

¹ Haù mù, nungmoq gi, chyitdap dik é zoshâng wui nghut é yanmai, Garai Gasang lé alik yu é bang kut keq. ² Hkrisduq gi, Yhânggùng lé namngón jung hkungga eq shigu hkungga dông, nga-nhúng é matú Garai Gasâng chyáng Yhânggùng yhang ap byí pyám shoq, nga-nhúng lé chyitdap é su, nungmoq le chyitdap myit èq asak dui nyi keq.

³ Hau htoq agó, ashop é dông gungsho zùm yap é hkyô, a sansêng é hkyô hkanmó eq myoqnoq é hkyô pé lé, nungmoq taí lhang hkâtaí kó; hkâsu mù gà le, nungmoq gi, Garai Gasâng é chyoyúng byu pé nghut lhê. ⁴ Haù eq rajung za, a taí gíng é, ahoq ahí dang, dangsôm eq hkunchoq dông gyá

é dang pé lé a taí é za, jeju hkya-on dang za taí nyi keq. ⁵ Hkâsu mù gà le, ashop é dông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ó yuq nghut kôlhang, Hkrisduq eq Garai Gasâng é mingdán má muizè a wó é hkyô lé, nungmoq sê nyi keq. ⁶ Ó yuq nghut kôle, dangsôm* dông mai nungmoq lé a wó mhaù kó sháng gaq; hkâsu mù gà le, haù hkyô pé é yanmai, Garai Gasâng é nhikmo-yo hkyô gi, haù jìno a gyo bâng é ahtoq má jé râ nghut lhê. ⁷ Haù mù luí, haù bâng chyáng hkâbo wang lòm kó.

⁸ Hkâsu mù gà le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haù Yhumsing má maubó pé nghut bekô nghut ri. ⁹ Haù Yhumsing ô nau é hkyô haì nghut é lé ho htoq yù mù, maubó é yhangzô pé dông asak dui keq. ¹⁰ Hkâsu mù gà le, haù maubó é ashi gi, ge é hkyô banshoq, dingmán é hkyô eq tengmán hkyô chyat nghut ri. ¹¹ Haù ashi a zú é mauchut tuq muzó má a bo wang lom é za, yhangmoq é mara lé tân shit keq. ¹² Hkâsu mù gà le, haù jìno a gyo bang haq zaú kut é hkyô lé gi, taí htoq le lhang hoq hpo nghut ri. ¹³ Nghut kôlhang, junghkang jungmó lé, haù maubó èq tân shit jáng gi, wó byu-myang é chyat dut râ nghut lhê. ¹⁴ Hkâsu mù gà le, junghkang jungmó lé byu-myàng nhang é gi, maubó nghut ri. Hau é yanmai,

"Yhup ngón nyi sù ê, toq aq, haù shi é mai dui toq aq hkoi; haù jáng, Hkrisduq gi, nang lé duqbó byi râ nghut lhê." † ga luí taí tô é nghut lhê.

¹⁵ Haù mù luí, nungmoq hkâsu kut asak dui é hkyô má gyai sidiq nyi keq; hpaqchyí a bò bang su a nghut é za, hpaqchyí bò bang su kut nyi keq. ¹⁶ Buinyi ahkyíng shí pé gi, agè ashop é yanmai, wó é ahko ahkáng banshoq lé ge dik é dông chung jai keq. ¹⁷ Hau é yanmai, byù ngok pé a dut é za, haù Yhumsing ô nau é hkyô gi, haì nghut é lé, sê gyô yu nyi keq. ¹⁸ Haù achayut é yubak hkyô lhoq htoq é í lé hkâshuq wut kó; Woi-nyí lé kúm byíng nhang nyi keq. ¹⁹ Nungmoq gi, hkya-on kungtôn dang dông le, hkya-on mahkôn dang dông le, woi-nyí

✱ 4:26 Hkya-on 4:4 * 5:6 Dangsôm gà é gi, Garai Gasâng é nhikmo-yo hkyô a jé râ ga taí é dang nghut lhê. † 5:14 Dang ngho shí gi, hí lhê é noqkuq hpúng pé taí gyó lo é dang nghut lhê.

eq sêng é mahkôn dông le, rayuq eq rayuq dáng nyo lhum luí, nungmoq é i-myt unghkaú mai, haú Yhumsîng lé mahkôn hkôn mù, lhoq ngón nyí keq. ²⁰ Nga-nhông é Yhumsîng Yesuq Hkrisduq é myîng lé lang luí, jung hkangmó é matú, haú Íwa Garai Gasang lé, hkâ-nhám le jeju hkyâ-ôn nyí keq.

²¹ Hkrisduq lé hkungga hpautap é myit eq, rayuq eq rayuq hpautap lhûm nyí keq.

Myi Eq Làng

²² Ikun myhî pê ê, haú Yhumsîng uphkan é dông châng é su, nungmoq é ikun hpô pé uphkan é dông châng nyí keq. ²³ Hkâsu mù gâ le, Hkrisduq gi, haú noqkuq hpúng é ulhum nghut é su, haú ikun hpó gi, ikun myhî é ulhum nghut nyí ri; Hkrisduq gi, haú Yhâng gungdu nghut é noqkuq hpúng lé hkyi yù Sû nghut ri. ²⁴ Haú noqkuq hpúng gi, Hkrisduq uphkan é dông châng é su, ikun myhî pé le, hkyô hkat hkangmó má, yhangmoq é ikun hpô pé uphkan é dông châng nyí râ lhê.

²⁵ Ikun hpô pé ê, Hkrisduq gi, haú noqkuq hpúng lé chyitdap luí, hau é matú Yhâng-gùng lé Yhang ap pyâm é su, nungmoq é ikun myhî pé lé chyitdap nyí keq. ²⁶ Yhang haú su kut é gi, haú noqkuq hpúng lé, mungdang dông wui má chí pyám luí, lhoq sân-yúng yû râ eq, ²⁷ haú noqkuq hpúng gi, agè agau é eq a-ká akông é hkyô haí le a bo é za, mara hûn râ hkyô a bo é eq chyoyúng é, hpungwup shingkan bo é noqkuq hpúng dông, Yhânggùng lé wó ap byí râ matú nghut lhê. ²⁸ Haú eq rajung za, ikun hpô pé gi, yhangmoq é ikun myhî pé lé, yhumsing gungdu lé su chyitdap râ dut lhê. Yhumsing é ikun myhí lé chyitdap é sù gi, yhumsing gùng lé le, chyitdap é sù nghut bê. ²⁹ Ó yuq le, yhumsing gùng lé a chyitdap a kut é za, Hkrisduq gi, haú noqkuq hpúng lé kut byí nyí é su, yhumsing gùng lé byí tso byí huq luí, rago wú zúng nyí é nghut lhê. ³⁰ Hkâsu mù gâ le, nga-nhông gi, Yhâng é gungdû é gungsho showui showang pé chyat nghut lhê. ³¹ Haú mù, "Hau é yanmai, yuqgè gi, înu îwa eq gang luí, yhangmyi eq zùm-yap mù, yhangnhik í yuq gi, gungsho ralhum za dut kó râ nghut lhê." ³² Haú hkyô gi,

gyai yhang zaú tô é hkyô nghut ri. Nghut kôhang, ngò gi, haú Hkrisduq é hkyô eq noqkuq hpúng é hkyô lé taí nyí é nghut lhê. ³³ Haú mù, nungmoq yuq hkangmó gi, yhumsing gùng lé chyitdap é su, yhumsing é ikun myhí lé le chyitdap râ dut lhê; haú ikun myhí le, yhâng é ikun hpó lé hkungga râ dut lhê.

6

Zo Wuí Eq Mó Wui É Hkyô

¹ Zoshâng wui ê, haú Yhumsîng má, nungmoq é mó wui é jîno gyo keq; hkâsu mù gâ le, haú gi, kut gíng é hkyô nghut ri. ² "Náng é înu îwa lé hkungga aq. ³ Haú jáng, nàng, nyí ngón yuqyò mù, myidàm htoq má náng é asak chyungxe hing nyí râ nghut lhê." ⁴ gâ é dang gi, danggidiq lom é sâng-hi lhum hkunmó nghut ri.

⁴ Íwa pé ê, nungmoq é zo wui lé nhikjum a lhoq yô é za, haú Yhumsing é mhoq kyo hkyô eq mhoqshit lhoq pun hkyô dông yhangmoq lé baú kô nyí keq.

Jùn Pé Eq Junsing Pê É Hkyô

⁵ Jùn pé ê, nungmoq gi, Hkrisduq é jîno gyô é su, gyuq hkunggâ é eq lhumzúi é myit mai, nungmoq é myidàm htoq mâ é junsing pê é jîno gyo keq. ⁶ Nungmoq gi, yhangmoq é hí má za, myoqdong ho é dông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myt unghkaú mai châng kut nyí keq. ⁷ Byù lé za dojaú é dông a nghut é za, haú Yhumsîng lé dojaú nyí é dông le, shirông myit eq dojaú nyí keq. ⁸ Hkâsu mù gâ le, jùn nghut nghut, luthkyô wó sù nghut nghut, ge é hkyô kut nyí é nghut jáng, haú Yhumsîng gi, yuq hkangmó lé shigyau râ nghut é lé, nungmoq sê nyí lhê.

⁹ Junsing pé ê, nungmoq le, nungmoq é jùn pé lé haú eq rajung za kut byí nyí keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsîng hpó gi, mauhkung htoq má nyí é nghut luí, Yhang gi, myoqdong hkyin é hkyô a bo é sù nghut lhê.

Garai Gasâng É Gyè Hking

¹⁰ Lô htâng má, taí nau é hkyô gi, haú Yhumsîng eq Yhâng é hpungwup a-tsam mó má wum-o bo nyí keq. ¹¹ Haú nat

Tsadán wá dâ é hpaqchyî pé lé, nungmoq wó he-ngik pyám kó sháng gaq, haû Garai Gasâng é gyè hking banshoq lé wut to keq. ¹²Hkâsu mù gâ le, nga-nhúng gi, gungsho eq sui lé htuq htíng é bang a nghut é za, haû uphkâng bang, ahkáng ayá wó bang, mauchut tuq dut é mingkan shi é a-tsam pé eq mauhkûng htoq tsáng myhâng mâ é agè ashop é byò eq sêng é wum-o pé lé, htuq htíng é bang ru nghut lhê. ¹³Haû mù luí, Garai Gasâng é gyè hking banshoq lé wut to keq; haú hkûn sheq, nungmoq gi, agè ashop hkyô jé é buinyì má, yhumsîng jowò má wó yap gîng to mù, hkyô hkat hkangmó lé ban kut jáng, wó yap ging tîng nyì kó râ nghut lhê. ¹⁴Haû mù, nungmoq é hpyidum má tengmán hkyô hpyihit hit mù, dingmán hkyô wànggò-long lé gò luí, ¹⁵nungmoq é hkyî má gi, haû simsaq hkyô byî é gabú danglù hkô râ rì rì kut to mù, ging ging yap nyì keq. ¹⁶Hau htoq agó, haû agè ashop su é myidug é myoshi lhunglháng lé wó sat ung pyám râ matú, lumjîng hkyô nghu é golong lé chung to keq. ¹⁷Hkyi yù hkyô shamtoq muq lé tsûng to luí, Garai Gasâng é mungdang nghut é, haû Woi-nyí é shâm lé wun chûng keq. ¹⁸Ahkyíng hkangmó má, kyûdung dang eq dîng tôngbán é dang ajung jûng èq, haû Woi-nyí má kyûdung nyì luí, machya nyì uchyang, sân-yúng bang banshoq é matú, hkâ-nhám le, xoq xoq kyûdung byî nyì keq.

¹⁹Haû gabú danglù é yanmai, shamtoq-tui hut huí é lagyo rayuq ngò nghut nyì kôlhang, haû gabú danglù nghut é zaú tô é hkyô lé, a gyuq a wàm wó taí kyo luí, ²⁰ngò taí râ dut é lé, a gyuq a wàm wó taí sân kyo shoq, ngá nhut hpóng hkangmó, ngò taí râ mungdang pé lé byi sháng gaq, ngá é matú le, kyû bo dung byî nyì keq.

Shi-kyám Dang

²¹Haû Yhumsîng má, chytidap é gumang eq lhumzuí é dui-nhâng zoshâng nghut sù, Tuhkiku gi, nungmoq lé jung hkangmó taí kyo râ nghut luí, ngò hkâsu nghut nyi é hkyô eq haí kut nyi é hkyô lé, nungmoq wó sé kó râ nghut lhê. ²²Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luí, yhang lé, ngò, nungmoq chyáng nhang kat é nghut lhê.

²³Îwa Garai Gasang eq Yhumsîng Yesuq Hkrisduq chyáng mâ é lumjîng hkyô má bo é chytidap myit eq nguingón hkyô gi, haû gumang wui chyáng ru joq nyí sháng gaq ô! ²⁴A dat htûm é chytidap myit mai, nga-nhûng é Yhumsîng Yesuq Hkrisduq lé chytidap é lhunglhâng bang chyáng, Garaí jeju gi, ru joq nyí sháng gaq ô!

HPILIPI Pê Chyáng Hun Kat é Laiká (Philippians)

¹ Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhunglhang eq, hpúng-up, hpungte pé lé, dang kyô kat lhê.

² Nga-nhông é Íwa Garai Gasang eq Yhumsing Yesuq Hkrisduq chyáng mâ é jeju eq nguóngón hkyô gi, nungmoq chyáng ru joq nyí sháng gaq ô.

Jeju Hkya-ôn É Hkyô

³ Ngò gi, nungmoq lé myit bûn kat hkgangmó, ngá é Garai Gasang lé jeju hkya-ôn nyi lhê. ⁴ Ngò gi, kyûdung hkgangmó, hkâ-nhám le nungmoq banshoq bang é matú gabú myit èq dung byí nyi lhê. ⁵ Hkâsu mù gà le, nungmoq gi, sânghí nyí mai ahkuí jé shoq, gabú danglù má ngò eq chôm zùm yap nyi é yanmai nghut lhê. ⁶ Haû nungmoq má ge é muzó kut hi é sù Garai Gasang gi, Yesuq Hkrisduq é buinyi jé shoq muzó haû lé lhoq pán râ nghut lhê nghû, ngò hkyak myit lum tô lhê.

⁷ Nungmoq banshoq bang gi, ngá é i-myit má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gà le, ngò kyum hut huí tô é u lé le, haû gabú danglù hkyô lé taí húng luí, lhoq gíng é u lé le, nungmoq gi, ngò eq rahá Garai Gasang jeju chôm hkâm yu é bang nghut lhê. ⁸ Hkrisduq Yesuq é chytidap myit dông, nungmoq banshoq bang lé, ngò hkâ-í myit chytit nyi é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng luí mara a bo é za, ¹⁰ Garai Gasang é hpungwup shingkang eq hkya-on kungtôn hkyo é matú, Yesuq Hkrisduq é yanmai lo é dingmán hkyo é ashi wó byíng nyí sháng gaq nghû le; ¹¹ nungmoq é chytidap myit gi, tengmán é hpaqchyí eq wó sê é nyan banshoq má je riyhang kô jat lò sháng gaq nghû le, ngò kyûdung nyi lhê.

Dui Nyi Le Gi, Hkrisduq É Matú

¹² Gumang wuì ê, ahkuí ngò nungmoq lé sé nhâng nau é hkyô gi, ngò má haí dut laí lò bê hkyô pé gi, gè gè yhang gabú danglù ríng jat lò rá matú dut lò bê nghut ri. ¹³ Hau é yanmai, haû hkohkâm-wâng zúng é lhunglhang bang eq gotú banshoq bang é hí má, Hkrisduq é yanmai ngò kyum hut huí é hkyô, de de dut htoq bê nghut ri. ¹⁴ Hau htoq agó, ngò htóng lúng é yanmai, haû Yhumsing Yesuq má gumang wuì nghut é myo mi-myô gi, myit wum wó yû kômù, Garai Gasang é mungdang lé, je riyhang a gyuq a kyum wám hko kyo bekô nghut ri.

¹⁵ Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri. ¹⁶ Ge é myit mai hko é bang gi, gabú danglù lé húng rá matú ngo lé hkyin é hkyô lé, yhangmoq sé kômù, chytidap myit èq hko kyô é bang nghut akô. ¹⁷ Haû góbang chyaú gi, sanséng é i-myit eq a nghut é za, ngò kyum wut é hkyô má wuìhke jamjau jat byi rá matú, myit nyi bùm kô é nghut mù luí, Hkrisduq é hkyô lé yhumsing é wuizat é dông za, hko taí nyi bum akô nghut ri. ¹⁸ Nghut kôlhang, haû gi, haí rá ri lú? Yhumsing wuizat é dông hko é nghut nghut, tengmán é dông hko é nghut nghut, hkyô hkat hkgangmó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirâ nghut lhê. ¹⁹ Hkâsu mù gà le, nungmoq kyûdung byí é eq Yesuq Hkrisduq é Woi-nyí garúm é yanmai, ngò má dut laí lò bê hkyô gi, ngò wó luthkyô dut rá nghut é lé ngò sê lhê. ²⁰ Ngò myit lánng tô é eq myit myoqbyù tô é má, ngò gi, hoq nó haí a rá é za, hí hkun lhê su, ahkuí le, dui nyi kôlhang, shi byuq kôlhang, gyuq kyum myit a bo é hkyô lé wó yû mù luí, Hkrisduq gi, ngá gúng má hkya-on waq toq é hui rá nghut lhê. ²¹ Hkâsu mù gà le, ngò, asak dui nyi le gi, Hkrisduq é matú, shí jáng gi, ngá e amyat nghut ri. ²² Nghut kôlhang, ngò gi, gungsho má rû dui nyi mù, ngò kut é muzó má ashi zû lo é nghut le gi, hká lhum lé sheq hkyin yu le gè rá lú? ²³ Ngò gi, hkyô í hkat gyoro má hká hpyang le a hkap dut tô ri; shi ló luí Hkrisduq eq rahá nyi rá lé gi, ngò ô nau ri,

hkâsu mù gâ le, haû gi, je ge é hkyô nghut ri. ²⁴ Nghut kôlhang, ngò gungsho má dui nyi le gi, nungmoq é matú akyû je bò râ nghut lhê. ²⁵ Haû mù, ngò gi, shí hkyô lé hkyak myit lum to luí, lumjín g hkyô má nungmoq kô jat lo é eq gabú nyí râ matú, nyi gyô luí, nungmoq lhunglhâng bang eq nyi nyí râ hkyô lé, ngò sê lhê. ²⁶ Haû mù luí, ngò nungmoq chyáng dum jé lé é hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

²⁷ Haî wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haû jáng, ngò, nungmoq chyáng jé mù huí lhúm é hkûn nghut nghut, we gang lhum tô é hkûn nghut nghut, nungmoq gi, woi-nyí ralhú má za yap gîng to mù, haû gabú danglù lé lumjín g hkyô má, i-myit rahkat zâ èq shikut nyí kô é hkyô lé le; ²⁸ nungmoq gi, hká hkyô má nghut kôlhang, gyè pê èq kyuq zô é lé a gyuq lò kô é hkyô lé le, ngò sé râ nghut lhê. Haû gi, yhangmoq é matú htên byoq hui râ kumlhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haû gi, Garai Gasang kut é nghut lhê. ²⁹ Hkâsu mù gâ le, Hkrisduq má wó lumjín râ é jeju za a nghut, Yhang é matú wuîhke jamjau hui râ jeju le, nungmoq hkam yù bekô nghut ri. ³⁰ Haû gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

2

Yesuq, Myit Lhoq Nyhum É Hkyô

¹ Hkrisduq eq rading ralhú má za nghut nyi é yanmai, myit wum byí é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, nú-nhâm é myit eq shogyo nhikmyîn é hkyô rajung jung lé, nungmoq wó yu é nghut le gi, ² nungmoq gi, haû i-myit huí é hkyô rahkat za, chyitdap myit rajung za, myit nhiklhú eq myit é hkyô má ralhú má za kut nyi é dông, ngá é gabú hkyô lé, byíng jup nhâng keq. ³ Yhumsing é wuizat é dông le, akôm gyáng pyâm é dông le, haî le a kut é za, myit lhoq nyhum nyí mù, góbang gi, nungmoq htoq má je gyaú lhê nghû myit yu nyí keq. ⁴ Nungmoq yuq hkangmó gi, yhumsing eq

sêng é lé za a nghut, góbang eq sêng é lé le, myit byi râ lhê.

⁵ Hkrisduq Yesuq má bo é myit yhang, nungmoq chyáng bò râ dut lhê.

⁶ Yhang gi, Garai Gasang su roq za nghut nyí kôlhang, Garai Gasang eq rawuí za nghut é hkyô lé lú zing nyí râ matú a myit é za,

⁷ Yhânggùng lé lhoq gôm pyám luí, dui-nhâng zôshang é gunghkyâng lé yu chûng mù, xângzo byù gùng roq lé dut bê nghut ri.

⁸ Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí,

haû tapzîng htoq má lháng tap sat pyâm é hui shoq jîno gyô ri.

⁹ Haû mù luí, Garai Gasang gi, Yesuq é myîng lé mauhkûng htoq mâ é hkyihput,

myidàm htoq mâ é hkyihput eq mom-ing mâ é hkyihput hkangmó htuq paí luí,

¹⁰ haû Íwa Garai Gasâng é hpungwup shingkâng é matú, Yesuq Hkrisduq gi, Yhumsing nghut lhê nghû, nhut shô hkangmó yín yù sháng gaq ga,

¹¹ myhang htâng é jowò má Yhang lé lhoq toq tô é eq, myîng lhunglhâng é htoq má gyaú é myîng haû, Yhang lé byí to bê nghut ri.

Kyî Pé Su Duqbo Nyí Râ Hkyô

¹² Haû mù luí, ngò chyitdap é luzúm wuî é, nungmoq gi, hkâ-nhâm le jîno gyô nyi é eq rajung za, ngò, nungmoq eq rahá nyi é u lé su za a nghut, ngò eq wê gâng tô é hkûn le, nungmoq hkyi yù hui bê hkyô lé, gyai gyuq hkunggâ é myit eq je riyhang lhoq htoq nyí keq. ¹³ Hkâsu mù gâ le, Garai Gasang gi, Yhang ô nau é hkyô lé, kut nau râ myit eq wó kut râ hkyô lé nungmoq má lhoq htoq byí nyi é sù nghut lhê.

¹⁴ Haî kut kôlhang, taí put lhúm é dông, haû a nghut jáng, dang jet jet lhúm é dông hkâkut kó. ¹⁵ Haû jáng sheq, myit goí é, agè ashop é pyat hkaú má, nungmoq gi, mara a bo é, sân-yúng é, shut hkyô a bo é, Garai Gasâng é yhangzô pé dut kó râ nghut lhê.

¹⁶ Hau htoq agó, nungmoq gi, asak mung-dang lé chung htoq uchyang, mauhkûng

mâ é kyî pé su, yhangmoq chyáng wó duqbo nyî kó râ nghut lhê. Haú hkûn, ngò gi, ajè a din pyâm é, a nghut jáng, muzó lé akôm a zui pyâm é yanmai, Hkrisduq é buinyî má gumrông jowò wó berâ nghut lhê. ¹⁷ Nghut kôlháng, ngò gi, shuq jung hkungga* ralhú su, nungmoq é lumjúng myit mai nhongjáu byî é shigu hkungga ahtoq má hut gyûn pyâm é hui le lháng, gabú luí, nungmoq banshoq bang eq rahá chôm gabú nyi lhê. ¹⁸ Haú eq rajung za, nungmoq le gabú luí, ngò eq rahá chôm gabú nyi râ dut lhê.

Timohti Eq Epahprodi Nhik Lé Nhang Kat Râ Gà É Hkyô

¹⁹ Ngò gi, nungmoq chyáng Timohti lé hân za wó nhang kat râ lé, haú Yhumsíng Yesuq má myit myoqbyu nyi lhê; haú hkûn sheq, nungmoq eq sêng é ludang lé ngò wó sé jáng, ngò myit ngón râ nghut lhê. ²⁰ Nungmoq é hkyô lé, yhang su hkyak za ge myit chiq byî é byû gotû rayuq le ngò a wó. ²¹ Hkâsu mù gà le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akò nghut ri. ²² Yhang kúm gi, zo rayuq mai îwa lé htuqbâng é su, haú gabú danglù hkyô má ngò eq rahá dojaú é yanmai, yhâng lumluq é hkyô tún shit é lé, nungmoq sê nyi lhê. ²³ Haú mù luí, ngò gi, ngò má hkâsu dut râ lé sê é hkûn yhang, yhang lé nhang kat râ matú ngò myit myoqbyu nyi lhê. ²⁴ Hau htoq agó, hkâ-myháng a myáng má, ngò yhang le nungmoq chyáng wó jé nhâng râ nghut lhê nghû, haú Yhumsíng má hkyak lum nyi lhê.

²⁵ Nghut kôlháng, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taú kat byi râ lhê nghû, ngò myit hpyit to bê nghut lhê. ²⁶ Hkâsu mù gà le, yhang gi, nungmoq lhunglhâng bang lé myàng nau nyi é za a nghut, yhang no é hkyô lé nungmoq wó gyo bekò nghut é yanmai, gyai yhang myit

myo myit chiq nyi ri. ²⁷ Gè gè yhang, yhang gi, aluq shoí shí shoq no pyâm é nghut lhê. Nghut kôlháng, Garai Gasang gi, yhang lé shogyo nhikmyîn yu ri; yhang lé baú a nghut, ngò yón htoq yón a dut nyi râ matú, ngo lé le shogyo nhikmyîn yu ri. ²⁸ Haú mù luí, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom ló byuq râ matú le, yhang lé ngò hân hân nhang kat byi nau ri. ²⁹ Nungmoq gi, gyai yhang gabú é myit èq, haú Yhumsíng má yhang lé lhom hkûlum yù mù, yhang su dut é bang lé hkungga keq. ³⁰ Hkâsu mù gà le, yhang gi, ngo lé nungmoq a wó garúm é hkyô lé garúm râ matú, yhâng é asak lé lháng a ha loshoq kut mù, haú Hkrisduq é muzó é yanmai, aluq shoí shoí shi é hui zô ri.

3

Gungsho Má Lumhkaú Râ Hkyô A Joq

¹ Hau htoq agó, ngá é gumang wui é, haú Yhumsíng má gabú nyi keq! Rajung zâ é hkyô lé, nungmoq é matú dum puq ká byi râ gi, ngò má wui é hkyô haí a joq, nungmoq é matú akyû dut râ matú sheq ru nghut lhê.

² Haú, hkuí pé lé le; agè ashop é muzó jizó kut é bang lé le; gungsho yâm é bang lé le; sidiq nyi keq.* ³ Hkâsu mù gà le, Garai Gasâng é Woi-nyí èq noqkuq é bang, Hkrisduq Yesuq má gabú gumrong nyi é bang, gungsho má a lumhkaú é bang, nganhúng gi, ahpyo-kuq hpyit hkam yu é bang akying† nghut lhê. ⁴ Ngò kúm gi, gungsho má lumhkaú râ hkyô wó ang sù nghut lhê.

Góbang rayuq yuq, haú gungsho má lumhkaú râ hkyô wó âng lhê ga myit é nghut le gi, ngò gi, je riyhang wó sù nghut lhê. ⁵ Ngò gi, hkû lé é htâng shit nyi nghû râ nyi má ahpyo-kuq hpyit bê sù; Israelaq amyû mâ é, Ben-yamyin é awut ashín nghut sù, Hebre byù mâ é Hebre rayuq nghut lhê; jep é tarâ dông ga jang, ngò gi, Hparishe rayuq nghut lhê; °shirong é hkyô eq séng luí ga jang, ngò gi, haú noqkuq hpúng lé zing-rí wú bê nghut lhê; jep é tarâ mâ é dingmán hkyô eq séng luí ga

* 2:17 Shuq jung hkungga gà é gi, tsibiyiq wing ragóm lé myi htoq má hut pyâm é dông Garai lé gyuq hkungga é hkyô lé tún shit é nghut lhê. Bun zo shí má shí hkâm é hkyô lé táí nau é nghut lhê. * 3:2 Bun zo shi lhum gi, ahpyo-kuq hpyit hkyô má noqzuq nyi é bang lé táí nau é nghut lhê. † 3:3 Ahpyo-kuq hpyit hkam yu é bang akying gà é gi, Garai Gasâng é yhangzo hkyak nghut bê bang lé gà lhê.

jang, ngò gi, shut é hkyô a bo wú sù nghut lhê.

⁷ Nghut kôlhang, ngá é amyat nghu é pé lhunglhang gi, ahkuí, Hkrisduq é yanmai sùm byuq é chyat nghut bê nghû myit yù bê nghut lhê. ⁸ Hau htoq agó, ngò gi, ngá é Yhumsîng Hkrisduq Yesuq lé wó sê é ko dik é jeju lé sôn kat jáng, jung hkangmó lé buzaq dông myit yù bê. Hkâsu mù gâ le, lhunglhang lé ngò tô pyâm é gi, Yhang é yanmai nghut lhê. ⁹ Ngò gi, Hkrisduq lé wó yû râ eq, Yhang eq rahá wó nghut nyî râ matú, haû jung hkangmó lé buzaq nghû myit yu pyám bê. Garai Gasâng chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjîng é yanmai za wó yu é ru nghut lhê; haû gi, lumjîng myit mai wó é nghut lhê. ¹⁰ Ngò gi, Hkrisduq lé le, Yhang dui toq hkyô é hpungwup a-tsâm lé le, Yhang hpuzô é hkyô má wó zùm yap râ lé le, Yhang shî hkâm é hkyô lé wó cháng râ lé le, sé nau ri. ¹¹ Haû jáng gi, ngò le, shi byuq bê mai dum dui toq é hkyô lé wó myoqbyù râ nghut lhê.

Myit Myoqbyu Tô É Jowò Shut Din Nyî Râ Hkyô

¹² Ngò gi, haû pé banshoq lé wó gû bê le a nghû naù, ngò gumjup gù bê le a nghû naù. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haû lé wó lhom yù sháng gaq nghû, châng hkat nyi lhê. ¹³ Gumang wuì ê, ngò yhang ngò gi, haû lé wó hap yù bê nghû a myit; nghut kôlhang, ngò kut é muzó ralhumi gi, nunghtáng mâ é lé tô-myhî pyám mù, myoq hí mâ é lé wó yû shoq nghû shikut luí, ¹⁴ Hkrisduq Yesuq má Garai Gasâng eq ngo lé ahtoq shut ji yu é chyunghuq lé wó yû râ matú, myoqbyu tô é jowò shut châng hkat din nyi lhê.

¹⁵ Gumjup bê bang nga-nhúng lhunglhang gi, haû sù é myit bò râ lhê. Rajung jung má nungmoq myit é hkyô shai nyi kô é nghut le gi, haû lé le, Garai Gasâng gi, nungmoq lé san za tân shit râ nghut lhê. ¹⁶ Hká dông nghut kôlhang, nga-nhúng gi, ahkuí jé shoq châng nyi bê hkyô eq rajung za châng kut nyi sháng.

¹⁷ Gumang wuì ê, nungmoq gi, ngò kut é dông chôm kut nyi keq, ngamoq mai nungmoq lé kut shit é alik eq rajung za

châng é bang lé wú yû keq. ¹⁸ Hkâsu mù gâ le, hí hkûn ngò, nungmoq lé anum num taí kyô wú luí, ahkuí lhang, ngaù byî eq dum taí kyô é eq rajung za, Hkrisduq é tapzîng lé gyè kut é bang myo myo nyi bum akô nghut ri. ¹⁹ Yhangmoq é jihtùm gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myt gi, mingkan zè htoq má za nghut ri. ²⁰ Nghut kôlhang, nga-nhúng é yhummau gi, mauhkûng mingdán má nghut lhê. Nga-nhúng gi, haû mâ é Yhumsîng Yesuq Hkrisduq gâ é hkyi yù Sù lé, myoqbyu lán nyi é bang nghut lhê. ²¹ Yhang gi, jung hkangmó lé, Yhang uphkan é a-ô má wó kut tô é Yhâng é a-tsâm eq nga-nhúng é htên byoq sê é gungdu lé htaí lhik pyám byi luí, Yhâng é hpungwup bo é gungdu su dut nhâng râ nghut lhê.

4

¹ Haû mù luí, chyitdap é luzúm wuì le nghut mù, ngò chyitdap bûn nghâm nyi é, ngá é gabú jowò eq janmaù nghut nyi é, ngá é gumang wuì ê, haû gi, Yhumsîng má nungmoq hkâsu kut yap gîng nyi râ hkyô nghut lhê.

Lhoq Pun Lhoq Kyîng É Hkyô

² Ngò gi, Uodia eq Suntuki nhik lé, haû Yhumsîng má rayuq eq rayuq myit huí lhûm nyi râ matú, gyai yhang pyîng kat lhê. ³ Ngá é mù wùn luzúm kyîng ê, ngò gi, myiwe shí nhik lé garúm yû laq nghû, nang lé le dúng tóngbán kat lhê; yhangnhik gi, Klemen eq le, asak jihpán laiká buk má myîng bo é, ngá é mù wùn luzúm wuì góbang eq le, haû gabú danglù hkyô má ngò eq rahá gyai shikut wú bê sù nhik nghut lhê.

⁴ Haû Yhumsîng má hkâ-nhám le gabú nyi keq! Ngò dum taí lhê, gabú nyi keq! ⁵ Nungmoq nú-nhâm é hkyô, byù banshoq bang lé sé nhâng keq. Haû Yhumsîng gi, chyáng bê nghut ri. ⁶ Haû eq séng luí le, myit hkâ-myô hkâchiq kó; hkyô hkangmó má jeju hkya-on uchyang, kyûdúng é eq dúng tóngbán é dông, nungmoq dúng é hkyô pé lé, Garai Gasâng chyáng shit kyô nyi keq. ⁷ Haû hkûn, sé gyô é nyan banshoq htoq má gyaú é, Garai Gasâng é nguingón hkyô

gi, nungmoq é myit nhiklhum eq nungmoq myit é hkyô lé, Hkrisduq Yesuq má upzúng byî nyî râ nghut lhê.

⁸Jihtûm má, gumang wui ê, tengmán é, hpautap gíng é, dingmán é, sansêng é, wó chyitdap é, hkungga gíng é, haî má nghut kôlhang, aróng wó dik é hkyô rajung jung, a nghut jáng, hkya-on gíng é hkyô rajung jung bo é nghut le gi, haû sù é hkyô pé lé myit nyî keq. ⁹Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haî lé le châng kut nyî keq. Haû hkûn, ngingón hkyô byî é Garai Gasang gi, nungmoq eq rahá nyi nyi râ nghut lhê.

Jeju Bân É Hkyô

¹⁰Ahkuî kúm gi, ngá é hkyô lé nungmoq dum myit chiq byi kô é yanmai, ngò gi, haû Yhumsîng má gyai yhang gabú nyi lhê; gè gè yhang, nungmoq myit chiq byî nyi kôlhang, haû lé tân shit râ ahkáng a wó kó nghut ri. ¹¹Ngò îsu nghû taî nyi é gi, ngò má râ é hkyô bo tô é yanmai taî é a nghut, hkâsu mù gâ le, ngò gi, ngò hui mihui má, nhik dik nyi râ matú mhoq yù bê nghut lhê. ¹²Ra châ tô u lé, hkâsu kut râ ngò sê lhê; agùn agó wó u lé, hkâsu kut râ ngò sê lhê; hkyô hkangmó eq dut tô é ahkyo lhum jup má, wam gyi kôlhang, zòmut kôlhang, agùn agó wó tô nyi kôlhang, ra châ to kôlhang, myit dik nyi râ hpaqchyî lé ngò wó mhoq yù bê nghut lhê. ¹³Ngò gi, ngo lé wum-o a-tsam byi sù Hkrisduq é yanmai, hkyô hkat hkangmó wó kut lhê.

¹⁴Nghut kôlhang, ngò wuîhke jamjau huî nyi é hkûn, nungmoq garúm yù kô é gi, ge é hkyô kut bekô nghut ri. ¹⁵Hau htoq agó, Hpilipi byu pé nungmoq sê é eq rajung za, haû gabú danglù lé, ngò hkô mù nungmoq wó gyô yu hi é buinyî pé má, ngò Makedoni mau mai htoq ló râ hkûn, haû byî é hkyô eq lhom yu é hkyô má, nungmoq mai lai lui, noqkuq hpúng gotû ralhûm lháng, ngo lé garúm kat é hkyô a bo é nghut lhê. ¹⁶Ngò Htesaloni wà mó má nyi tô é hkûn lé lháng, nungmoq gi, ngò ra châ é hkyô lé adàm dàm hûn byi bekô nghut ri. ¹⁷Ngò gi, chyunghuq chyunghtâng lé ho nyi é a nghut, nungmoq mai ashi je myo zû jat râ matú lé za sheq ho nyi é nghut lhê.

¹⁸Ngò gi, haî le gúm shoq myang yu é htoq

agó, chyân shoq lháng nghut bê. Ahkuî, haû nungmoq hun kat é chyunghuq lé, Epahprodi chyáng mai ngò lhom myang yù lui, ngò má agùn agó nghut nyî bê. Haû pé gi, namngón jung hkungga su, Garai Gasang lé gabú nhang é, hap yù gíng é hkungga ralhûm nghut ri. ¹⁹Ngá é Garai Gasang gi, Yhang agùn agó wó sùt nyi é eq rajung za, nungmoq râ é hkyô banshoq lé, Hkrisduq Yesuq má lhoq gúm lhoq jup byi râ nghut lhê.

²⁰Hpungwup shingkang gi, nga-nhûng é Îwa Garai Gasâng chyáng pyat dedu ahtum abyuq ru joq nyî sháng gaq ô! Amen.

Shi-kyám Dang

²¹Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wui gi, nungmoq lé shi-kyâm kat akô nghut ri. ²²Sân-yúng bang banshoq gi, nungmoq lé shi-kyâm kat akô; Kehtaq é yhûm mâ é sân-yúng bang gi, je riyhang shi-kyâm kat akô nghut ri.

²³Yhumsîng Yesuq Hkrisduq é jeju gi, nungmoq banshoq bang eq rahá ru joq nyî sháng gaq ô!

KOLOSE Pê Chyáng Hun Kat é Laiká (Colossians)

¹Garai Gasâng eq hkyin yù mù, Hkrisduq Yesuq é lagyo dut sù, ngò Poluq eq nga-nhông é gumang Timohti gi, ²Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyáng dang kyô kat lhê. Nga-nhông é Íwa Garai Gasâng chyáng mâ é jeju eq nguóngón hkyô gi, nungmoq chyáng ru joq nyí sháng gaq.

Jeju Hkya-ôn É Eq Kyûdung É Dang

³Ngamoq gi, nungmoq é matú kyûdung byí é hkûn, nga-nhông é Yhumsîng Yesuq Hkrisduq é Íwa nghut é Garai Gasang lé ayang jeju hkya-ôn lhê. ⁴Haí mù gâ le, Hkrisduq Yesuq má nungmoq lumjîng hkyô eq Yhâng é sân-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê. ⁵Lumjîng myit eq chyitdap myit haú gi, nungmoq é matú mauhkûng htoq má hkong to byí é myit myoqbyù hkyô* mai lo é nghut lhê. Myit myoqbyù hkyô haú lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gû nghut lhê. ⁶Nungmoq gi, gabú danglù haú lé wó gyo luí, Garai Gasâng jeju eq sêng é tengmán hkyô lé sê hkyang é buinyi mai, nungmoq chyáng ashi zuí é eq kô myhang nyi bê nghut é eq rajung za, gabú danglù haú gi, mingkan gón má ge é ashi zuí nyi é eq kô myhang nyi bê nghut ri. ⁷Nungmoq gi, haú hkyô lé, ngamoq é chyitdap byinzùm Epahpra chyáng mai mhoq yu é nghut lhê. Yhang gi, ngamoq é gunglik dông, Hkrisduq é lhumzuí é hpúng mù wùn sù nghut lhê. ⁸Yhang gi, haú Woinyí eq nungmoq lé byí tô é chyitdap hkyô lé, ngamoq lé taí kyo sù le nghut ri.

⁹Haú nghut é yanmai, ngamoq gi, nungmoq eq sêng é hkyô lé wó gyô é nyí mai, nungmoq é matú ayang kyûdung byí nyi lhê. Garai Gasang ô nau é hkyô lé sé râ hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq dông

mai nungmoq chyáng lhoq pyíng byi sháng gaq nghû, Yhâng chyáng kyûdung byí nyi lhê. ¹⁰Haú su kut kyûdung byí é gi, haú Yhumsîng ô nau é hkyô eq gingdán é dông nungmoq asak wó duí luí, hkyô hkangmó má Yhang lé wó gabú nhâng râ matú nghut lhê. Hau dông mai, nungmoq gi, ge é muzó hkangmó má ashi zuí nyi luí, Garai Gasang lé sê é hpaqchyí má kô myhang nyi kó râ nghut lhê. ¹¹Hau htoq agó, nungmoq gi, Yhâng é hpungwup a-tsam dông mai a-tsam banshoq eq wum-o lhoq kîng byí é huí nyi kó râ nghut lhê. Haú mù, nungmoq gi, gyai hkam jân é hkyô eq myit hing é hkyô lé, gabú myit mai wó yú kó râ nghut lhê. ¹²Maubó é mingdán má, sân-yúng bang eq sêng é muizè lé wó bo hkam yù râ matú, nungmoq lé gingdán nhang é sù haú Íwa lé le, jeju wó hkya-on kó râ nghut lhê. ¹³Hkâsu mù gâ le, Íwa haú gi, nga-nhông lé, mauchut eq up é hkaú mai hkyi htoq yú luí, Yhang chyitdap é Yhang Zô é mingdán má shuí hâng é Sù nghut lhê. ¹⁴Nga-nhông gi, haú Yhang Zo dông mai, hkyi xe yu é hui mù, yubak mara hkyut pyám byí é hui bê nghut lhê.

Jung Hkangmó É Ushuq, Hkrisduq

¹⁵Hkrisduq gi, myoq eq a byu-myàng é Garai Gasâng é gunghkyâng isâm nghut luí, zomún dông hpan tô é lhunglhâng htoq má gyaú é sù nghut ri. ¹⁶Hkâsu mù gâ le, mauhkûng eq myigùng htoq má joq é azíng zê pé, myoq eq byu-myang é eq a byu-myang é pé nghut kôle, hkohkâm ayá pé, a-tsam pé, uphkâng bang, ahkáng ayá wó bang nghut kôle, lhunglháng gi, Yhâng eq hpan to huí é chyat nghut lhê. Lhunglháng gi, Yhâng é matú, Yhâng eq hpan to huí é chyat nghut ri. ¹⁷Yhang gi, lhunglhâng é hí mâ é nghut mù, lhunglháng gi, Yhâng é yanmai joq gîng bum é chyat nghut lhê. ¹⁸Yhang gi, noqkuq hpúng nghu é gungdú é ulhum nghut ri; Yhang gi, jung hkangmó má gyaú dik é ushuq dut sháng gaq ga, sâng-hi awang nghut sù eq shi é bang mâ é hí dui toq é zomún dut sù nghut ri. ¹⁹Hkâsu mù gâ le, Garai Gasang gi, Yhâng é byíng jup hkyô banshoq, Yhang Zo má joq nyi râ lé myit nguí ô nau é nghut mù, ²⁰haú tapzîng má htoq byí é Yhang Zô é

* 1:5 Bun zo shí má bo é myit myoqbyù hkyô gi, Yesuq lé taí é nghut lhê.

sui đông mai nuingón hkyô kut byî é eq, myigùng htoq mâ é azíng zê nghut nghut, mauhkúng mâ é azíng zê nghut nghut, lhunglhang lé, Yhang Zo đông mai, Yhang eq nuingón simsaq hkyô xoq yû bê nghut ri.

²¹ Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlaí é yanmai, nungmoq i-myt má, Yhâng é gyè dut wú bekô nghut lhê.

²² Nghut kôlhang, ahkuí, Garai Gasang gi, nungmoq lé, râ é hkyô a bo é eq mara hún râ hkyô a bo é za, chyoiyúng é đông Yhâng é hí má shit râ matú, Hkrisduq é gungsho gungdu shî hkâm é đông, nungmoq eq nuingón simsaq hkyô xoq yû bê nghut ri. ²³ Haú gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gingtîng nyi mù, nungmoq é lumjîng hkyô má xoq nyi nyi é nghut jáng sheq dut râ nghut lhê. Gabú danglù shî gi, nungmoq wó gyô wú bê nghut é htoq agó, mauhkúng ô má hpan tô é jung hkanmó lé hko kyô nyi bê nghut lhê. Ngò, Poluq le, gabú danglù hau é dui-nhâng zoshâng dut é nghut lhê.

Noqkuq Hpúng É Matú Poluq Wùn Waq É Hkyô

²⁴ Ahkuí, ngò gi, nungmoq é matú jamjau huí é má gabú lhê; hau htoq agó, Hkrisduq é gungdu nghut é, noqkuq hpúng é matú, râ tô ashî nghut é, Yhang hpuzó é hkyô lé, ngá é gùng má ngò lhoq gumjup yu nyi lhê. ²⁵ Ngò gi, Garai Gasâng é mungdang lé, nungmoq chyáng gumjup shoq hko kyo râ matú, Garai Gasang, ngo lé hun tô é wò mai, noqkuq hpúng hau é mù wùn sù dut é nghut lhê. ²⁶ Mungdang haú gi, gohkún mai apyat pyat haq tô gyó lo é zaú tô é hkyô nghut kôlhang, ahkuí gi, haú sân-yúng bang lé hpông shit bê nghut ri. ²⁷ Garai Gasang, haú su kut é gi, zaú tô é hkyô hau é agùn agó hpungwup shingkang, tûngbau pè chyáng hkâsu nghut é hkyô, yhangmoq lé sé nhâng râ matú nghut lhê. Zaú tô é hkyô haú gi, hpungwup shingkang lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lhê.

²⁸ Hkrisduq má gumjup é đông, byù yuq hkanmó lé wó shuí jé sháng gaq nghû, ngamoq gi, Hkrisduq é hkyô lé taí pyô luí, yuq hkanmó lé, hpaqchyí byéng-yá

banshoq eq taí pun taí kyîng é eq mhoqshit nyi é nghut lhê. ²⁹ Ngò, haú-í yhang wó wùn waq shikut é gi, ngò má wum-o a-tsam byíng byíng mù zuí nyi Su é wum-o banshoq eq wùn waq shikut nyi é ru nghut lhê.

2

¹ Ngò gi, nungmoq é matú le, Ladoki wà mó bàng é matú le, ngò eq myoqdong hkyûm a huí wú shî é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri. ² Haú su awui ahke shikut é hkyô gi, yhangmoq, myit má wum-o byî é hui râ eq chyitdap myit má rading ralhum za wó dut râ matú nghut lhê. Haú hkún, yhangmoq gi, Garai Gasâng é zaú tô é hkyô nghut é, Hkrisduq lé wó sé râ matú, sê gyô é nyan lhunglhang é isut byíng shoq lé wó yû kó râ nghut lhê. ³ Haú Hkrisduq má kúm gi, hpaqchyí byéng-yá eq sumsé hpaqchyí gâ é sutzè lhunglhang lé tsîng tô ri. ⁴ Nungmoq lé ngò haú hkyô taí kyô é gi, ó yuq le, dang ngón dang ngui eq mhoq hpyoq é đông, nungmoq lé a wó mhaú zo râ matú nghut lhê. ⁵ Hkâsu mù gâ le, ngá gungdu nungmoq eq rahá a nyi kôlhang, ngá é myit gi, nungmoq eq rahá nghut nyi luí, nungmoq shuq shuq tap tap za nghut nyi kô é eq Hkrisduq lé lumjîng é má hkâ-í gingtîng nyi kô é lé myàng mù, ngò gabú nyi lhê.

Hkrisduq Đông Mai Wó É Gumjup É Asak Duí Hkyô

⁶ Haú mù luí, nungmoq gi, Hkrisduq Yesuq lé Yhumsîng nghû hap yù bekô nghut é eq rajung za, Yhang má asak xoq dui nyi keq. ⁷ Yhang má apùn amyit chîn gîng nyi mù, kô myhang lò luí, nungmoq mhoq yù bê eq rajung za, lumjîng hkyô má wum-o lhoq kîng mù, jeju hkya-ôn é hkyô byíng zan nyi keq.

⁸ Hkrisduq chyáng mâ é a nghut é za, mingkan shî mâ é uphkâng tarâ pé eq xângzo wui é htungli cháng luí, mhaú zô é myit sôn hpaqchyí eq akyû a bo é dang đông, ó yuq eq le, nungmoq lé a wó shuí nghoq yû kó sháng gaq, sidiq nyi keq.

⁹ Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyi mù, ¹⁰ nungmoq gi, a-tsam bo é banshoq eq ahkáng ayá wó

é banshoq é ushuq nghut é Hkrisduq eq sêng é bang nghut kômù, gumjup é bang dut bekô nghut ri. ¹¹ Yhang má, nungmoq gi, byu loq èq kut é ahpyo-kuq hpyit hkyô dông a nghut é za, ahpyo-kuq hpyit é su, Hkrisduq èq yubak gungsho mara lé hkyut sêng pyâm é hkyô lé hkam yù bekô nghut ri. ¹² Nungmoq gi, wui-myhup hkâm é hkûn Hkrisduq eq rahá myhup yhûm é hui bekô nghut mù, Yhang lé shi é mai lhoq dui toq yu é, Garai Gasâng é a-tsam lé nungmoq lumjîng kô é yanmai, Yhang eq rahá lhoq dui toq yu é hui bekô nghut ri.

¹³ Nungmoq é yubak mara pê é yanmai le, nungmoq é yubak gungsho mara lé huî sêng pyâm é a hkam yu é yanmai le, nungmoq shi tô é hkûn, Garai Gasang gi, nungmoq lé, Hkrisduq eq rahá asak dui nhâng bê nghut ri. Yhang gi, nga-nhûng é yubak mara lhunglhâng lé hkyut pyâm byi luî, ¹⁴ nga-nhûng eq shai lhum mù, nga-nhûng lé htuq htîng é, tarâ pé bo é jéyâng râ jihpán lé huî sêng pyâm byi bê nghut ri. Yhang gi, haû lé tapzîng htoq má dok tap pyâm é dông yu pyâm byi bê nghut lhê.* ¹⁵ Haû dông mai, a-tsam bò bang eq ahkáng ayá wó bâng a-tsam lé lang hkyut hkyô pyâm mù, Yhang gi, tapzing èq yhangmoq lé ung pyâm é dông, byù pê é hí má yhangmoq lé de de kut to bê nghut ri.

¹⁶ Haû mù luî, nàng haî zo haî shuq é yanmai le, noqkuq htûng eq sêng é poî buinyi, Lhoxan Lhosik poî, Bánno buinyi eq séng luî le, nungmoq lé, ó yuq èq le a wó jéyâng kó sháng gaq. ¹⁷ Haû pé gi, dut lò râ hkyô pê é wupzo chyat nghut lhê; haû gùng gyíng gi, Hkrisduq yhang nghut nyi ri. ¹⁸ Myit lhoq nyhum mhaû é eq maumang lagyô pé lé noqkuq é lé myit nguî é sù ó yuq èq le, nungmoq lé, chyunghuq eq a gingdán râ dông hkâkut nhâng kó. Haû su é yuq gi, yhumsîng byu-myang é lé† za taî shikut mù, yhumsîng é gungsho myit mai, akôm yhang nghut é lé gyáng dang taî é sù nghut ri. ¹⁹ Yhang gi, Garai Gasang kô myhâng nhang é su, gungdu gón é gungsho showui showang pé eq shogyi pé lé htuqbang byi

mù rahá lâng tsing tô é haû ulhum nghut é Hkrisduq eq xoq é hkyô lé byoq ló nhâng bê nghut ri.

²⁰⁻²¹ Nungmoq gi, Hkrisduq eq rahá, mingkan shî mâ é tarâ pé eq shi gang bekô nghut le nhîng, haî mù, haû eq sêng lhum nyi ashî kó lhú? "Hkâzui, hkâchyâm, hkâzâng." gâ é tarâ ô má nyi nyi ashî kó lhú? ²² Haû pé gi, waxâng zô wui é hkunmó pé eq mhoqshit hkyô pé nghut é yanmai, jai chung é hkûn, htên byuq râ chyat nghut lhê. ²³ Haû sù é tarâ pé gi, yhumsîng yhang noqkuq shikut é, myit lhoq nyhum mhaû é eq gungdu lé gunjâng é pé nghut luî, hpaqchyî byéng-yá bo é su dut kôlhang, gungshô é agè ashop yut yut ô nau hkyô lé wó hkûm zing pyâm râ má, hai akyû a bò nghut ri.

3

Chyoiyúng É Dông Asak Dui Râ Hkyô

¹ Haû mù luî, nungmoq gi, Hkrisduq eq rahá lhoq dui toq é hui bekô nghut jáng, Garai Gasâng é loqyo hkyam* má zung tô é Hkrisduq é jowò má joq é, ahtoq mâ é azíng zê pé lé myit ô nau nyi keq. ² Nungmoq gi, myidàm htoq mâ é azíng zê lé myit tuî é a nghut é za, ahtoq mâ é azíng zê lé myit tuî nyi keq. ³ Hkâsu mù gâ le, nungmoq gi, shî bekô nghut luî, ahkuî, nungmoq é asak gi, Hkrisduq eq rahá, Garai Gasang má haq tô é hui bekô nghut ri. ⁴ Nungmoq é asak nghut sù, Hkrisduq htoq shit é hkûn, nungmoq le, Yhang eq rahá, hpungwup shing kang hkaû má htoq shit kó râ nghut lhê.

⁵ Haû mù luî, nungmoq é mingkan hkyô eq sêng é, ashop é dông gungsho zùm yap é hkyô, agot a-û nyi zô lhûm é hkyô, ye lhaî nau é hkyô, agè ashop yut yut ô nau é hkyô eq, hparà noq hkyô nghut é myoqnoq hkyô pé haî lé le sat pyâm keq. ⁶ Haû hkyô pê é yanmai, Garai Gasâng é nhikmo-yo hkyô gi, jîno a gyo bâng é ahtoq má† jé râ za nghut lhê. ⁷ Laî lò bê hkûn, nungmoq le, haû hkyô pé dông sô wú kô é nghut lhê. ⁸ Nghut kôlhang, ahkuî, nungmoq gi, nhikjum yô é, nhikmo-yô é, agè ashop é dông nò shoq kut

* 2:14 Yhang gi, haû lé tapzîng htoq má dok tap pyâm é dông yu pyâm byi bê nghut lhê gâ é gi, Hkrisduq tapzîng má shî hkám byî é hkûn, nga-nhûng é yubak mara banshoq lé, Garai Gasâng èq hkyut pyâm byî é lé taî nau é nghut lhê.

† 2:18 Byu-myang é lé gâ é gi, yhang myit htoq é shing-rán lé gâ lhê. * 3:1 Loqyo hkyam nghû é gi, ahko ahkáng wó é jowò lé gâ é nghut lhê. † 3:6 Jîno a gyo bâng é ahtoq má, gâ é dang, chyúmding ra-am má a bò nghut lhê.

é, lumù gansang é eq, nungmoq é nhutwui mai hkunchuq taí é hkyô shí pé banshoq lé, yhumsing gùng yhumsing tô pyám râ dut lhê. ⁹Rayuq eq rayuq hkâ-mhaú lhum kó; hkâsu mù gâ le, nungmoq gi, nungmoq é byù xau eq byù xaú é nyi yap hkyô lé hkyut pyám mù, ¹⁰byù sik lé tû wut yû kô é nghut lhê; byù sik haú gi, sumsé hpaqchyî dông mai, yhang lé hpân Su é gungdu isâm má asik jat lò nhang é huí nyi ri. ¹¹Byù sik má gi, Grik eq Yudaq byù nghu é, ahpyo-kuq hpyit hkâm bang eq a hkâm bang nghu é, byù bíng eq byù jum nghu é, jùn eq jùn a nghut sù nghu é a nyi lô é za, Hkrisduq gi, banshoq nghut mù, banshoq má nyi nyi ri.

¹²Haú mù luí, Garai Gasang èq hkyin yù huí é bang, Yhâng èq gyai yhang chyitdap é huí é chyoiyúng bang dông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhumsing gùng yhumsing mebu su wut to keq. ¹³Nungmoq yhangchang mara kut shut é hkyô joq é nghut jáng, hkam jan byi lhum luí, rayuq eq rayuq mara hkyut byi lhum keq. Haú Yhumsing gi, nungmoq é mara hkyut pyám byi é su, nungmoq le mara hkyut byi keq. ¹⁴Haú ge é sâmlai banshoq wó é htoq agó, gumjup é rading ralhum za dut é hkyô má, banshoq lé rahá wó tuí zing tô é chyitdap myit lé puq wut to keq.

¹⁵Nungmoq gi, nguingón hkyô wó râ matú ji yu é hui bekô nghut mù, gungdu ralhum mâ é bang chyat nghut bekô yan-mai, Hkrisduq é nguingón hkyô lé, nungmoq é myit má up nhang nyi keq. Haú mù, jeju hkya-ôn nyi keq. ¹⁶Nungmoq, rayuq eq rayuq, hpaqchyî byéng-yá banshoq èq mhoqshit é eq lhoq pun lhoq kyíng lhúm é hkûn le, Garai Gasang lé nungmoq jeju bûn é myit mai, jihkyang dang, hkya-on mahkôn, woi-nyí eq sêng é mahkôn pé hkôn é hkûn le, haú Hkrisduq é mungdang lé, nungmoq é myit nhiklhúm má agùn agó bò nhang nyi keq. ¹⁷Nungmoq haí wá kut kut, dang dông nghut nghut, zui saí é dông nghut nghut, banshoq lé Yhumsing Yesuq é myíng mai kut é hkûn, haú Îwa nghut é Garai Gasang lé Yhang dông mai jeju hkya-on keq.

Hkristan Ikun Byu Pé Nyi Yap Râ Hkyô

¹⁸Ikun myhí pé ê, ikun hpô pé uphkan é ahkaú má nyi keq. Haú gi, Yhumsing é hí má kut gíng é hkyô nghut lhê.

¹⁹Ikun hpô pé ê, ikun myhí pé lé chyitdap nyi keq. Yhangmoq lé dang htân hkâ-nyô kó.

²⁰Zo wui ê, jung hkanmó má nungmoq é mó wui é jino gyo keq; hkâsu mù gâ le, haú gi, Yhumsing ô nau é hkyô nghut lhê.

²¹Îwâ pé ê, nungmoq é zo wui lé myit hkâ-nô nhâng kó, nô nhâng jáng gi, yhangmoq, myit wum gyui byuq kó râ nghut lhê.

²²Jùn pé ê, hkyô hkanmó má nungmoq é myidàm htoq mâ é jùn sîng bang uphkan é ahkaú má nyi nyi keq; yhangmoq é myoq hí má za zui saí luí, myoqdong ho é dông a nghut é za, haú Yhumsing lé gyuq hkunggâ é eq lhumzui é myit mai zui saí nyi keq.

²³Nungmoq haí wá kut kôle, byu é matú kut é a nghut, haú Yhumsing é matú kut nyi é dông, nungmoq é myit nhiklhúm banshoq eq zui saí nyi keq. ²⁴Haí mù gâ le, nungmoq gi, haú Yhumsing chyáng mai, muizè lé chyunghuq dông wó yû kó râ nghut é lé, sé kô é yanmai nghut lhê. Nungmoq dojaú nyi é sù gi, Yhumsing Hkrisduq ru nghut lhê. ²⁵Kut shut sù gi, yhang kut shut é marâ matú dam byi é hui zo râ nghut lhê, haí mù gâ le, Garai Gasang gi, myoqdong hkyin é hkyô a joq.

4

¹Jùn sîng bang ê, nungmoq é jùn pé lé, tengmán é eq gíng âng é dông lajang byi nyi keq; haí mù gâ le, nungmoq le, mauhkung htoq má Yhumsing rayuq wó é lé sé kô é yanmai nghut lhê.

Xoq Lui Pying Kat É Hkyô

²Nungmoq gi, kyúdûng é má myit zìng zuq nyi mù, machyâ luí, jeju hkya-ôn nyi keq. ³Ngò, shamtoq-tui hut huí nyi shoq dut é, Hkrisduq é zaú tô é hkyô lé ngamoq wó taí pyô sháng gaq, Garai Gasang gi, mungdang lé ngamoq taí râ hkyô hkum hpóng byi râ matú kyû bo dung byi kó laq.

⁴Haú Hkrisduq é zaú tô é hkyô lé, ngò taí âng é dông san za wó taí pyô sháng gaq, kyû bo dung byi kó laq. ⁵Nungmoq gi, a lumjìng bang eq zùm yap é hkûn hpaqchyî bo nyi keq; wó yu é ahkyíng hkanmó lé rago yhang chung jai keq. ⁶Nungmoq gi, yuq hkanmó lé hkâsu tû taí râ hkyô wó

sé kó shoq, dáng nyo é má, xô èq nghám nhang é su, hkâ-nhám le jeju byíng é dang bo nyi sháng gaq.

Ló Htâng É Shi-kyám Dang

⁷Tuhkiku gi, ngá hkyô eq sêng é danglù banshoq, nungmoq lé taí kyo râ nghut lhê. Yhang gi, ngá é chyitdap gumang, haû Yhumsîng má, lhumzui é hpúng mù wùn sù eq byinzùm nghut lhê. ⁸Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé râ eq, nungmoq lé myit wum wó byi râ matú nghut lhê. ⁹Yhang gi, nungmoq chyáng mâ é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shî má dut nyi é hkyô jung hkangmó lé taí kyo kó râ nghut lhê.

¹⁰Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba é yhâng za-aû Markuq le, nungmoq lé shi-kyâm kat ri. (Markuq eq séng luí pying kat é hkyô lé nungmoq wó yù to bê nghut mù, nungmoq chyáng, yhang jé lé é nghut jáng, lhom hkûlum yù keq.) ¹¹Yustu le gâ é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haú bang za Yudaq byu pé nghut kômù, yhangmoq gi, ngo lé nhik títng byî é bang nghut akô. ¹²Nungmoq chyáng mâ é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhunglhang má hkyak lùm to mù, gumjup luí wó gíngtítng nyi sháng gaq ga, Yhang gi, ayang nungmoq é matú kyûdung shikut byî nyi ri. ¹³Nungmoq é matú le, Ladoki wà mó eq Herapoli wà mó bâng é matú le, yhang gi, gyai yhang mù zui shikut byî é hkyô lé, yhang é matú ngò saksé hkâm lhê. ¹⁴Ngamoq é chyitdap chi sará Lukaq eq Demaq gi, nungmoq lé shi-kyâm kat akô nghut ri. ¹⁵Ladoki wà mó mâ é gumang wui lé le, Numhpa eq yhâng yhûm mâ é noqkuq hpúng lé le, bo shi-kyám byi keq.

¹⁶Laiká shî lé, nungmoq lé nghap kyô é htâng má, Ladoki byu pê é noqkuq hpúng má le nghap nhâng mù, Ladoki wà bâng chyáng hûn kat é laiká lé le, nungmoq nghap wú keq.

¹⁷"Haû Yhumsing chyáng mai nàng hap yù to bê é muzó lé rago za lhoq pán pyám aq." nghû, Arhkipò lé taí kyo keq.

¹⁸Ngò, Poluq gi, ngá é loq èq yhang shi-kyám dang shî lé kê kat é nghut lhê. Ngò, shamtoq-tui wut tô é lé bûn nyi keq. Jeju gi, nungmoq chyáng ru joq nyi sháng gaq ô.

HTESALONI
Pê Chyáng Hî Dàm Hun Kat é
Laiká
(1 Thessalonians)

¹Ngò Poluq, Sila* eq Timohti pé gi, Îwa Garai Gasang eq Yhumsîng Yesuq Hkrisduq má nghut nyî bê bang, haû Htesaloni wà mó byu pê é noqkuq hpúng lé dang kyô kat lhê. Garaî jeju eq ngingón hkyô gi, nungmoq chyáng ru joq nyî sháng gaq.

Jeju Hkya-ôn É Hkyô

²Ngamoq gi, hkâ-nhám le, nungmoq banshoq bâng é matú, Garai Gasang lé jeju hkya-on luî, ngamoq é kyûdung dang má nungmoq lé bo dúng lhôm nyi lhê. ³Nungmoq é lumjîng myit mai zui saî é nungmoq é muzó lé le; chyitdap myit é yanmai, nungmoq shikut é hkyô lé le; nga-nhông é Yhumsîng Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhông é Îwa Garai Gasâng é hí má, ngamoq ru bûn nyi lhê.

⁴Garai Gasang chyitdap é gumang wui ê, Yhang nungmoq lé hkyin yù bê lé, ngamoq sê lhê. ⁵Hkâsu mù gâ le, ngamoq é gabú danglù gi, nhutdang đông za nungmoq chyáng jé é a nghut, wum-o a-tsam đông le, Chyoiyúng Woi-nyí đông le, tengmán hkyô byíng jup é đông le, jé bê nghut é yanmai nghut lhê. Ngamoq, nungmoq eq rahá nyi é hkûn, nungmoq é matú hkâsu kut lai lo é hkyô lé, nungmoq sé gù nghut lhê. ⁶Nungmoq gi, wuîhke jamjau myo myo hui zo kôlhang, Chyoiyúng Woi-nyí byî é gabú myit mai, danglù haû lé lhom yù kôluî, ngamoq lé le, haû Yhumsîng lé le, alik kut yu é bang dut bekô nghut ri. ⁷Haû mù, Makedoni mau eq Ahkaia mau mâ é lumjîng bang banshoq é alik, nungmoq dut bekô nghut ri. ⁸Nungmoq chyáng mai, Makedoni mau eq Ahkaia mau má, haû Yhumsîng é mungdang hû htoq ló e za a nghut, Garai Gasang má nungmoq lumjîng hkyô gi, jowò hkangmó jam ló bê nghut luî, ngamoq gi, haî le taí nó a ra lo nghut ri. ⁹Hkâsu mù gâ le, ngamoq lé nungmoq hká

đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luî, Garai Gasang shut hkâsu kut lhing lò mù, rû dui nyi é eq tengmán é Garai Gasang lé dojaú nyi é hkyô lé le; ¹⁰mauhkûng mâ é haû Yhang Zo lé lánng nyi é hkyô lé le, yhangmoq taí kyô akô. Yhangzo haû gi, Yhang eq shi é mai lhoq dui toq yu é hui luî, jé lô râ nhikmó yo hkyô mai nga-nhông lé hkyi yù sù, Yesuq nghut ri.

2

Poluq, Htesaloni Wà Mó Má Garaî Mû Wùn Waq É Hkyô

¹Gumang wui ê, nungmoq chyáng ngamoq lé kûm é hkyô gi, akôm a nghut é lé, nungmoq yhang sê lhê. ²Nungmoq sê é eq rajung za, ngamoq gi, hí hkûn, Hpilipi wà mó má wuîhke jamjau eq rhoi é hui wú bê nghut lhê; nghut kôlhang, nga-nhông é Garai Gasang garúm é yanmai, gyaí lhom htuo htîng é hui kôle, Garai Gasâng é gabú danglù lé, a gyuo a kyum nungmoq lé wám taí kyô é nghut lhê. ³Hkâsu mù gâ le, ngamoq lhoq pun lhoq kyîng é hkyô gi, shut é, a nghut jáng, a sansêng é i-myit đông eq nungmoq lé mhaú zô é đông a nghut e za, ⁴haû gabú danglù lé chûng gíng é bang ga, Garai Gasâng chyáng mai ahkáng wó é đông za, ngamoq taí é nghut lhê. Ngamoq gi, byu pé lé gabú nhâng râ matú a nghut, ngamoq é myit lé chyam wú nyi é Garai Gasang lé, gabú nhâng râ matú shikut é ru nghut lhê. ⁵Hkâsu mù gâ le, nungmoq sê é eq rajung za, ngamoq gi, lhoq ngón mhaû é dang le hkâ-nhám a chûng wú, nghop tô é myoqnoq myit le hkâ-nhám a bò, Garai Gasang gi, ngamoq é saksé nghut lhê. ⁶Ngamoq gi, byu pé mai le, nungmoq mai le, gotû ó yuq mai le hkya-on râ lé ho nyi é a nghut, Hkrisduq é lagyô pé nghut é eq rajung za, nungmoq lé wòlai hûn naù jáng wó hun lhê; nghut kôlhang, ⁷înu rayuq, yhang é zoshâng zô pé lé hku baú é su, nungmoq chyáng nú-nhâm é đông nyi lai lò bê nghut lhê. ⁸Ngamoq gi, nungmoq lé gyai yhang chyitdap luî, Garai Gasâng é gabú danglù za a nghut, ngamoq é asak pé nungmoq lé byî pyâm le lhang nhik dik lhê; hkâsu mù gâ le, nungmoq

* 1:1 Sila lé gi, Salwanu le gâ lhê.

gi, ngamoq chyitdap dik é bang dut bekô nghut é yanmai nghut lhê. ⁹ Gumang wuê ê, nungmoq gi, ngamoq gyai yhang mô zui shikut é hkyô lé, gè gè bun kó râ nghut lhê; Garai Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wôlai a byi sháng gaq nghû, ngamoq gi, nyí lé, myín lé, mô zuí é nghut lhê.

¹⁰ Ngamoq gi, lumjínng bê bang nungmoq é hí má, hkâsu chyoiyúng é eq dingmán é, mara hún râ a bo é bang dut láí lo é hkyô lé, nungmoq le, Garai Gasang le, saksé nghut lhê. ¹¹ Hkâsu mù gâ le, ngamoq gi, îwa rayuq mai yhumsing yhangzô pé lé kut byí é su, nungmoq yuq hkanmó lé, myit wum byí nyi é hkyô lé le, nhik taí tîng nyi é hkyô lé le, ¹² Yhang é mingdán eq hpungwup shingkang má, nungmoq lé wut yu é Garai Gasang eq gingdán é dông, nungmoq asak wó dui nyi sháng gaq nghû, nungmoq lé wum byí nyi é hkyô lé le, nungmoq yhang sê nyi lhê.

¹³ Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkûn, byu é dang lé lhom yu é dông a nghut e za, lumjínng é bang nungmoq má mô zuí nyi é, haû Garai Gasâng é mungdang lé yhang, lhom yù kô é yanmai, Garai Gasang lé xoq xoq jeju hkyâôn nyi lhê. ¹⁴ Gumang wuê ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpûng pé lé, alik kut yu é bang dut bekô nghut ri. Noqkuq hpûng haú pé gi, Yudaq byu pé zing-rî é lé hui zô é su, nungmoq le, yhumsing mau mâ é byu pé zing-rî é lé hui zô akô nghut ri. ¹⁵ Yudaq byu pé gi, haû Yhumsîng Yesuq eq myiqhtoí pé lé sat pyám kôluí, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byù lhunglhang eq gyè dut é bang nghut akô. ¹⁶ Tûngbaù pé hkyi yù hui râ matú, ngamoq hko kyô é hkyô lé, yhangmoq hkûm akô; yhangmoq gi, hkâ-nhám le, yhumsing é mara lé dik shoq haú dông lhoq jat myô yù akô nghut ri. Haû mù, Garai Gasâng é nhikmo-yô é hkyô gi, yhangmoq ahtoq má jé bê nghut ri.

Htesaloni Byu Pé Lé Poluq Huí Nau Nyi É Hkyô

¹⁷ Gumang wuê ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi luí, wó myang hui shoq nghû, ngamoq gyai yhang shikut nyi lhê. ¹⁸ Nungmoq chyáng ngamoq jé lé naù mù luí, ngò Poluq yhang, adàm dàm shikut wú bê; nghut kôlhang, Tsadán gi, ngamoq lé hkûm tang pyâm ri. ¹⁹ Hkâsu mù gâ le, nga-nhûng é Yhumsîng Yesuq Hkrisduq é hí má, Yhang jé lé é hkûn, ngamoq é myit myoqbyù hkyô, gabú hkyô eq gumrông râ janmaú gi, haí jung wá nghut lhê gâ le, nungmoq yhang nghut nyi lhê a nghut kó lhú? ²⁰ Gè gè yhang, nungmoq gi, ngamoq é gumrông jowò eq gabú hkyô nghut nyi ri.

3

¹ Haû mù luí, ngamoq gi, haû lé a wó jân nyi lo jáng, Ahten myuq má ngamoq baú nyi gyó le je gè râ nghut lhê nghû, myit hpyit yù mù, ² wuîhke jamjau shí pê é yanmai, ó yuq le, myit a hten kó sháng gaq nghû, nungmoq é lumjínng hkyô má, nungmoq lé wum-o byi râ eq myit wum byi râ matú, ³ Hkrisduq é gabú danglù lé hko kyô é hkyô má, ngamoq é gumang eq Garai Gasâng é mô wùn luzúm nghut é Timohti lé, nhang kat é nghut lhê. Nga-nhúng gi, wuîhke jamjau pé hui zo râ matú, hkyin to huí é bang nghut é lé, nungmoq yhang rago sê nyi lhê. ⁴ Nga-nhúng gi, zing-ri hui zo râ nghut lhê nghû, ngamoq, nungmoq eq rahá nghut nyi é hkûn, noq mai nungmoq lé ngamoq taí kyô nyi gù nghut bê. Nungmoq rago sê é eq rajung za, haú dông dut bê nghut ri. ⁵ Hau é yanmai, ngò a wó jân nyi lo jáng, haû gunglaú sù mai nungmoq lé gunglaú yù luí, ngamoq wùn waq bê muzó gi, akôm dut byuq râ lé, myit chiq mù, nungmoq é lumjínng hkyô lé wó sé râ matú, yhang lé ngò nhang kat é nghut lhê. Gunglaú sù gi, nat Tsadán nghut lhê.

Timohti Lo Shit Kyô É Wum Byi Dang

⁶ Ahkuí kúm, Timohti gi, nungmoq é lumjínng hkyô eq chyitdap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bûn nyi é hkyô lé le; ngamoq, nungmoq lé myàng nau nyi é eq rajung za, nungmoq,

ngamoq lé myàng nau nyi é hkyô lé le, yhang lo tái kyo bê nghut ri. ⁷Haû mù luí, gumang wuì ê, ngamoq myit myo uhkyô é hkyô eq zing-ri huí é hkyô pé banshoq má, nungmoq é lumjínng hkyo é yanmai, nungmoq eq séng luí myit wum byí é hkyô lé ngamoq wó yû bê nghut lhê. ⁸Ahkuí, ngamoq gi, haû Yhumsínng má nungmoq yap gínng nyi kô é yanmai, gè gè nyi ngón bê nghut lhê. ⁹Nga-nhúng é Garai Gasàng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu kut jeju ûng hkya-on rá lhú? ¹⁰Ngamoq gi, nungmoq lé dum myàng rá matú eq, nungmoq é lumjínng myit má langhpyut é hkyô lé wó lhoq hkúm byi rá matú, nyí, myín, gyai yhang lhumzui luí kyúdûng nyi lhê.

¹¹Nungmoq chyáng ngamoq lé rá matú, nga-nhúng é Yhumsínng Yesuq eq nga-nhúng é Íwa Garai Gasang yhang ngamoq lé hkyô hpóng byi sháng gaq. ¹²Nungmoq lé ngamoq chyitdap nyi é su, haû Yhumsínng gi, nungmoq é chyitdap myit lé, rayuq eq rayuq é ahtoq má le, yuq hkanmó é ahtoq má le, lhoq kô jat, lhoq pyíng byi sháng gaq. ¹³Nga-nhúng é Yhumsínng Yesuq gi, Yhàng é chyoiyúng bang banshoq eq rahá lé é hkûn, nga-nhúng é Íwa Garai Gasàng é hí má, nungmoq gi, mara hûn jowò a joq é eq chyoiyúng é bang dut rá matú, nungmoq é myit nhiklhum má, haû Yhumsínng mai wum-o lhoq kíng byí nyi sháng gaq. Yhàng é chyoiyúng bang gâ é gi, byù lé, a nghut jáng, maumang lagyô pé lé, tái záng lhê.

4

Garai Gasang Ô Nau É Đông Asak Dui Râ Hkyô

¹Xoq luí tái nau é gi, gumang wuì ê, ngamoq gi, ahkuí nungmoq cháng nyi é eq rajung za, nungmoq hká đông nyi yap luí, Garai Gasang lé gabú nhàng rá hkyô nungmoq lé mhoqshit byi bê nghut lhê. Ahkuí le, ngamoq gi, shí hkyô lé nungmoq hau htoq je wó châng jat rá matú, Yhumsínng Yesuq má nungmoq lé dúng tôngbán luí, myit wum byi kat lhê. ²Hkâsu mù gâ le, nungmoq gi, haû Yhumsínng Yesuq é ahko ahkáng đông, ngamoq gi, nungmoq lé

mhoqshit to byí é hkyô pé lé, sê akô nghut ri.

³Garai Gasang ô nau é hkyô gi, haû nungmoq sân-yúng é hui rá matú le, ashop é đông gungsho zùm yap é hkyô lé koi pyám rá matú le; ⁴nungmoq yuq hkanmó gi, haû Garai Gasang lé a sê é, a lumjínng bang kut é su, gungsho yut yut ô nau é hkyô a châng e za, ⁵haû chyoiyúng é eq hkungga gínng é sù wó dut shoq, yhumsínng gùng lé wó hkan é hkyô mhoq yû rá matú le; ⁶shí hkyô eq séng luí, ó yuq le, yhumsínng é gumang lé, a ge shut, a ge lhúngzo rá matú le nghut lhê. Ngamoq, nungmoq lé tái kyo mù, lhoq pun lhoq kying gù nghut bê eq rajung za, haû Yhumsínng gi, haû hkyô shut é banshoq lé, dam byi rá nghut lhê. ⁷Hkâsu mù gâ le, Garai Gasang gi, nga-nhúng lé a sân-yúng é bang dut rá matú wut yu é a nghut, chyoiyúng é đông asak dui nyi rá matú sheq wut yu é ru nghut lhê. ⁸Haû mù luí, mhoqshit hkyô shí lé he-ngik pyám é sù gi, byù lé he-ngik é a nghut, haû nungmoq lé, Yhàng é Chyoiyúng Woi-nyí byí tô é sù, Garai Gasang lé he-ngik pyám é sheq ru nghut lhê.

⁹Rayuq eq rayuq chyitdap lhum rá matú, nungmoq yhang, Garai Gasàng èq mhoqshit é hui bekô nghut é yanmai, gumang yhangchang chyitdap lhùm é hkyô eq séng luí, ngamoq gi, nungmoq chyáng kâ kat byi a ra lo nghut ri. ¹⁰Haû eq rajung za, nungmoq gi, Makedoni mau gón mâ é gumang wuì banshoq lé chyitdap nyi akô nghut ri. Nghut kôlhang, gumang wuì ê, haû su je myo kut rá matú nungmoq lé ngamoq wum byí lhê.

¹¹⁻¹²Nungmoq é nyí wui lhê é asak dui hkyô má, gotú byu pê èq hkunggâ é wó yû luí, ó yuq lé le, lumhkaû a ra wó dut sháng gaq, hí hkûn nungmoq lé ngamoq tái kyô tô é eq rajung za, num num byù zè rá hkyô lé le, yhumsínng eq a sêng é hkyô a kut wún rá lé le, yhumsínng loq èq zui saí mù nyi rá lé le, nungmoq é myit myoqbyù jowò kut yû keq.

Haû Yhumsínng Gyó Lé Râ Hkyô

¹³Gumang wuì ê, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haû yhup ngón byuq é bang eq séng luí, nungmoq a sé rá lé, ngamoq a ô nau é nghut lhê.

Yhup ngón byuq é bang gâ é gi, lumjínng luí shi ló byuq é bang lé gâ é nghut lhê. ¹⁴Hkâsu mù gâ le, Yesuq shí luí, dum dui toq bê hkyô lé nga-nhúng lumjínng é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé râ nghut lhê nghû, nga-nhúng lumjínng é nghut lhê. ¹⁵Haû Yhumsîng taí é dang eq rajung za, nungmoq lé ngamoq taí kyo kôlé, haû Yhumsîng dum lé é hkûn, asak dui nyi é eq myit gyo tô é bang nga-nhúng gi, yhup ngón byuq bê bâng htoq ratsuí le wó hí râ a nghut. ¹⁶Hkâsu mù gâ le, haû Yhumsîng yhang gi, htê mó hkunmó èq le, maumang lagyo mó é hte èq le, Garai Gasâng é tutmó mut hte èq le, mauhkûng mai gyó lé lô luí, haû Hkrisduq má shi ló bê bang hí dui toq râ nghut lhê. ¹⁷Hau htâng, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuí toq yu é hui luí, maulat má haû Yhumsîng eq hui râ nghut lhê. Haû hkûn, nga-nhúng gi, haû Yhumsîng eq ahtum abyuq nyi nyi berâ nghut lhê. ¹⁸Haû mù luí, nungmoq gi, dang shí pé mai rayuq eq rayuq myit wum byî lhûm nyi keq.

5

¹Nghut kôlhang, gumang wuì ê, ahkyíng buinyi eq séng luí, nungmoq lé ngamoq kâ hûn byi a ra lo nghut ri. ²Hkâsu mù gâ le, haû Yhumsîng é buinyi gi, myín lé hkau sù wang é su jé lé râ nghut é hkyô lé, nungmoq rago za sê akô nghut ri. Yhumsîng é buinyi gi, Yesuq dum jé lé râ buinyi lé taí nau é nghut lhê. ³Byu pé gi, 'Nguínngón yuqyo ri.' ga taí nyi bùm kô é u lé, gùng laí é myiwe rayuq zohkû-nò no lo é su, htên byoq hkyô gi, byodàn tung yhangmoq chyáng jé luí, hká dông lé yhangmoq wó hpang lut kó râ a nghut.

⁴Nghut kôlhang, gumang wuì ê, nungmoq gi, mauchut hkaû má nyi é bang a nghut é yanmai, buinyi haû gi, hkau sù lé é su, nungmoq é matú byodàn tung dut râ a nghut. ⁵Nungmoq lhunglhâng bang gi, maubó é yhangzô pé eq nyí é yhangzô pé nghut lhê. Nga-nhúng gi, myín eq mauchut hkaû eq sêng é bang a nghut. ⁶Haû mù luí, nga-nhúng gi, byù góbang su a yhup nyi e za, machyâ luí, gyíng gyíng kut nyí sháng. ⁷Hkâsu mù gâ le, yhup é bang

gi, myín lé yhup akô; î shuq wut é bang le, myín lé shuq wut akô. ⁸Nghut kôlhang, nga-nhúng gi, nyí eq sêng lhê nghut é yanmai, gyíng gyíng kut nyí luí, lumjínng myit eq chyitdap myit lé gi, wànggò-long lé su gò to, hkyi yù hui râ lé myit myoqbyù tô é hkyô lé gi, shamtoq-muq lé su tsung to, kut sháng. ⁹Hkâsu mù gâ le, Garai Gasang gi, Yhâng nhikmo-yô é hkyô lé hkâm zo râ matú, nga-nhúng lé hkyin tô é a nghut e za, nga-nhúng é Yhumsîng Yesuq Hkrisduq mai, hkyi yù hkyô lé nga-nhúng wó yù râ matú hkyin to bê nghut lhê. ¹⁰Yesuq gi, nga-nhúng yhup bûn nyi kôlhang, yhup ngón to kôlhang, Yhang eq rahá wó nyi nyi sháng gaq ga, nga-nhúng é matú shí hkâm byi bê nghut ri. ¹¹Haû mù luí, nungmoq gi, ahkuí, nungmoq kut nyi é eq rajung za, rayuq eq rayuq myit wum byî lhûm mù, htuqluq htuqbáng kut lhûm nyi keq.

Ló Htâng Lhê É Mhoqshit Hkyô

¹²Gumang wuì ê, nungmoq mâ é muzó shikut luí, haû Yhumsîng má nungmoq lé up nyi é eq lhoq pun lhoq kyíng nyi é bang lé, nungmoq hkungga râ matú le; ¹³yhangmoq zui saí é muzó jizó é yanmai, yhangmoq lé chyitdap myit dông gyai yhang hkungga râ matú le, nungmoq lé ngamoq sang kat lhê. Nungmoq le, rayuq eq rayuq nguínngón lhûm nyi keq. ¹⁴Gumang wuì ê, nungmoq lé ngamoq wum byî kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkangmó lé, i-myit hîng byî nyi keq; ¹⁵ó yuq lé nghut kôlhang, a ge é hkyo é yanmai, a ge é dông a taû kut râ lé lhoq pun lhoq kyíng nyi keq; nungmoq rayuq eq rayuq le, góbang banshoq eq le, shikut luí, hkâ-nhám le, ge é hkyô kut byî lhûm nyi keq.

¹⁶Hkâ-nhám le, ru gabú nyí keq; ¹⁷abyit alan kyûdûng nyi keq; ¹⁸hkyô hkak hkangmó má jeju hkya-ôn nyi keq, hkâsu mù gâ le, haû pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

¹⁹Haû Woi-nyí lé hkâlhoq jôm pyám kó; ²⁰myiqhtoi htoí é lé, haû su a ngàm hkâkut kó. ²¹Jung hkangmó lé, chyam wú luí, ge é

hkyô lé zuî zing nyî mù, ²² agè ashop é hkyô hkanmó lé, koi pyám keq.

²³ Nguingón hkyo é apûn awang nghut é Garai Gasang yhang, nungmoq lé, lhungl-háng lhoq sân-yúng pyám byi sháng gaq; nga-nhông é Yhumsîng Yesuq Hkrisduq dum lé é hkûn, nungmoq é woi-nyí, myit nhiklhun, gungdu gi, mara hûn râ hkyô a bò sháng gaq. ²⁴ Nungmoq lé ji yu é Sû gi, lhumzuí é Sû nghut lhê mù, Yhang, shí hkyô lé kut râ nghut lhê.

²⁵ Gumang wuì ê, ngamoq é matú kyû bo dung byi kó laq. ²⁶ Gumang wuì banshoq bang lé, chyoyúng é chytpuq puq é dông bo shi-kyám byi kó laq. ²⁷ Gumang wuì banshoq bang lé, hun kat é laiká shî nghap kyo râ matú, haû Yhumsing é myìng mai, ngò, nungmoq lé pying kat lhê.

²⁸ Nga-nhông é Yhumsîng Yesuq Hkrisduq é jeju gi, nungmoq chyáng ru joq nyî sháng gaq ô!

HTESALONI
Pê Chyáng Htang Dàm Hun Kat
é Laiká
(2 Thessalonians)

¹Ngò Poluq eq Sila, Timohti pé gi, nga-nhùng é Íwa Garai Gasang eq Yhumsing Yesuq Hkrisduq má nghut nyí bê bang, haû Htesaloni wà mó byu pê é noqkuq hpúng lé dang kyô kat lhê.

²Haû Íwa Garai Gasang eq Yhumsing Yesuq Hkrisduq chyáng mâ é jeju eq ngu-ingón hkyô gi, nungmoq chyáng ru joq nyí sháng gaq ô!

Jeju Hkya-on É Eq Kyûdung É Hkyô

³Gumang wuê ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri; haû gi, gíng lhê; hkâsu mù gâ le, nungmoq é lumjín myit gi, je je kô jat lo nyí luí, nungmoq yuq hkangmó é chyitdap myit le, rayuq eq rayuq é ahtoq má je myô jat lo nyi é yanmai nghut lhê.

⁴Haû mù luí, ngamoq gi, nungmoq zing-ri huí é hkyô pé eq wuîhke jamjau huí é hkyô pé banshoq lé, nungmoq wó jân nyí kô é yanmai, nungmoq é hkam jan hkyô eq lumjín hkyô lé, Garai Gasang é noqkuq hpúng pê é hí má gumrong nyi lhê.

⁵Shí hkyô banshoq gi, haû Garai Gasang dingmán é dông jéyáng é hkyô lé saksé tân shit é nghut lhê; haû mù luí, nungmoq gi, Garai Gasang é mingdán é matú wuîhke jamjau hui zo bekô nghut é yanmai, mingdán haû eq gingdán é bang gâ é hui kó râ nghut lhê; ⁶Garai Gasang gi, tengmán Sû nghut lhê; haû mù, nungmoq lé jamjau byí é bang lé, Yhang mai jamjau byi râ eq, ⁷jamjau huí nyi é bang nungmoq lé le, ngamoq lé le lhoq lhut byi râ nghut lhê. Shí hkyô gi, haû Garai Gasang lé a sê é bang eq nga-nhùng é Yhumsing Yesuq eq sêng é gabú danglù lé a gyo a châng é bang lé, jéyáng râ matú, ⁸haû Yhumsing Yesuq, wum-o a-tsam byíng é Yhâng é maumang lagyô pé eq rahá, myishâm eq mauhkung mai htoq shit é hkûn, dut râ nghut lhê. ⁹Yesuq jé lé lô mù, Yhâng é choyiýung bang má hpungwup shingkan wó yu é eq lumjín bang banshoq mai mauhong é

huí é buinyì má, yhangmoq gi, htên byoq hkyô lé ahtum abyuq jéyáng é hui zo kó râ nghut lhê. ¹⁰Hau htoq agó, haû Yhumsing é hí mai le, Yhâng é a-tsam kô làm é mai le, lhoq kâng pyâm é hui kó râ nghut lhê. Ngamoq é saksé dang lé nungmoq lumjín bekô nghut é yanmai, haû lumjín bang má nungmoq le lòm bekô nghut lhê.

¹¹Haû mù luí, nga-nhùng é Garai Gasang gi, nungmoq lé, Yhang ji yu é hkyô eq gingdán ri ga râ le, haû Yhang é wum-o a-tsam mai, nungmoq myit tô é ge é hkyô hkangmó eq nungmoq é lumjín myit eq sêng é muzó lhumjup lé, lhoq dik byi sháng gaq nghu le, nungmoq é matú, hkâ-nhám le, ngamoq kyûdung byí nyi lhê. ¹²Ngamoq haû su dung byí nyi é hkyô gi, nga-nhùng é Garai Gasang eq Yhumsing Yesuq Hkrisduq é jeju yanmai, haû nga-nhùng é Yhumsing Yesuq é myìng gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó râ matú nghut lhê.

2

A Tara É Sû

¹Gumang wuê ê, haû nga-nhùng é Yhumsing Yesuq Hkrisduq dum lé râ hkyô, Yhang eq nga-nhùng rahá zup nyi to râ hkyô eq séng luí, nungmoq lé ngamoq pying kat nau é gi, ²haû Yhumsing é buinyì gi, jé to gù nghut bê gâ é myiqhtoi dang, luhkyang, laiká pé rajung jung, ngamoq chyáng mâ é nghut lhê ga nungmoq chyáng jé é nghut jáng, nungmoq é myit luí za hkâduí kó, hkâgyuq dàn kó. ³Hkâsu mù gâ le, haû htên byoq é yhangzo nghut é a tarâ Sû htoq shit luí, haû gumlau toq é hkyô hí a htoq htoq gi, buinyì haû jé râ a nghut, haû mù luí, nungmoq lé, ó yuq èq, hká dông mai mhaú kôlhang hkâjín kó. ⁴Haú yuq gi, Garai ga noqkuq huí é zè lhunglhang lé htuoq htíng luí, haú pé banshoq é htoq má yhanggùng yhang lhoq gyaú yû râ nghut lhê; haû mù luí, Garai Gasang é noqkuq yhûm má zung to luí, yhanggùng yhang Garai Gasang nghut lhê ga taí râ nghut lhê.

⁵Ngò gi, nungmoq eq rahá nyi tô é hkûn, shí hkyô pé lé lhaq taí kyo kyo kut é hkyô lé, nungmoq a bun lo kó lhuí? ⁶Haú yuq gi, ahkyíng yam-yoq jé jáng sheq htoq shit sháng gaq ga, ahkuí, yhang lé hai èq hkûm

zing tô é hkyô lé, nungmoq sê lhê. ⁷Haû a tara é hkyo é haq dâ é a-tsam gi, mô zui nyi gù nghut bê; nghut kôlhang, haû lé hkûm zing nyi sù gi, hui htot pyám huí é hkûn jé shoq, haû lé hkûm zing nyi shirâ nghut lhê. ⁸Haû hui htot pyám huí é hkûn, a tarâ Sû htoq shit râ nghut lhê; haû Yhumsing Yesuq kúm gi, Yhâng nhut mâ é soq eq yhang lé sat pyám râ eq, Yhang gyó lo u lhê é hpungwup mó eq, yhang lé lhoq htên pyám râ nghut lhê. ⁹Haû a tarâ Sû lé lo é gi, Tsadán a-tsam đông laklaí kumlhá pé, kumlhá pé, mauhpo muzó pé ajung jung kut mhaû é eq, ¹⁰htên byoq huí nyi é bang lé mhaû zo râ agè ashop é hkyô jung hkanmó lé tûn shit râ nghut lhê. Yhangmoq htên byoq é gi, haû tengmán hkyô lé chytidap luí hkyi yù hui râ nghut é hkyô lé he-ngik pyám kô é yanmai nghut ri. ¹¹Hau é yanmai, Garai Gasang gi, haû tengmán hkyô lé a lumjín e za agè ashop hkyô má ô nau é lhunglhang bang mara byi é hui kó sháng gaq ga, ¹²mhaû é dang lé jín kó râ matú, a-tsam mó bo é lum shut râ hkyô lé, yhangmoq chyáng nhâng byi bê nghut ri.

Mhoqshit é hkyô má gîng nyi râ hkyô

¹³Nghut kôlhang, haû Yhumsing chytidap é gumang wuê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri. Hkâsu mù gâ le, haû Woinyí eq lhoq sân-yúng nyi é muzó đông le, tengmán hkyô lé lumjín é đông le, hkyi yù hui râ matú, Garai Gasang gi, nungmoq lé, sâng-hi mai hkyin yù bê nghut ri. ¹⁴Yhang gi, nga-nhông é Yhumsing Yesuq Hkrisduq é hpungwup shinkang má, nungmoq wó bo lóm shoq ga, ngamoq é gabú danglù đông nungmoq lé shí hkyô má ji yù bê nghut lhê. ¹⁵Haû mù luí, gumang wuê, nhutdang đông nghut nghut, laiká đông nghut nghut, nungmoq lé ngamoq hai byi é mhoqshit hkyô lé zui gîng nyi luí, gîng gîng yap nyi keq.

¹⁶Yhâng é jeju yanmai, nga-nhông lé, ahtum abyuq é myit wum byi hkyô eq ge é myit myoqbyù hkyô lé byi é, nga-nhông lé chytidap é, nga-nhông é Îwa Garai Gasang eq nga-nhông é Yhumsing Yesuq Hkrisduq gi, ¹⁷nungmoq é i-myt má wum byi luí, ge é muzó eq ge é nhutdang lhumjup má,

nungmoq lé wum-o lhoq kóng byi sháng gaq ô!

3

Kyû Dung Byi Râ Matú Lung Kat É Hkyô

¹Gumang wuê, je htâng má pying kat nau é hkyô gi, nungmoq chyáng dut wú bê eq rajung za, haû Yhumsing é mungdang gi, hân hân byo myín ló mù, lhoq gyaú é hui sháng gaq, ngamoq é matú kyû bo dung byi kó laq. ²Yuq hkanmó gi, lumjín myit bo é a nghut é yanmai, haû achayut agè ashop é byu pê chyáng mai ngamoq wó lut râ matú le, kyû bo dung byi kó laq. ³Nghut kôlhang, haû Yhumsing gi, lhumzui é sù nghut é yanmai, Yhang nungmoq lé wum-o lhoq kóng byi mù, haû agè ashop su chyáng mai nungmoq lé hung yù râ nghut lhê. ⁴Nungmoq gi, ngamoq pying tô é dang pé lé kut nyi mù, xoq luí le kut nyi râ nghut lhê nghû, haû Yhumsing má ngamoq hkyak myit lum tô lhê. ⁵Haû Yhumsing gi, nungmoq lé Garai Gasang é chytidap hkyô eq Hkrisduq é hkam jân é hkyô má, shuí wàng sháng gaq ô!

Mû Zui Shikut Râ É Hkyô

⁶Gumang wuê, ngamoq gi, ngamoq chyáng mai nungmoq hap yù bê ngamoq mhoqshit é hkyô đông a nyi yap é eq lagôn é gumang ó yuq eq le, we we nyi keq nghû, haû Yhumsing Yesuq Hkrisduq é mying mai nungmoq lé hkunmó hkyô kat lhê. ⁷Hkâsu mù gâ le, ngamoq kut é alik lé hká đông cháng râ dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó, ⁸ó yuq é zoshuq lé le, ngùn a byi é a zo wú é nghut lhê. Nungmoq má ó yuq lé le wòlai a byi sháng gaq nghû, ngamoq gi, muzó shikut hkyô eq wuîhke hkyô má, nyí lé, myín lé, zui saí é nghut lhê. ⁹Ngamoq gi, nungmoq lé garúm nhâng râ ahkáng a wó é a nghut, yhumsing gùng lé nungmoq cháng râ matú alik dut sháng gaq nghû sheq, haû su kut é ru nghut lhê. ¹⁰Hkâsu mù gâ le, ngamoq, nungmoq eq rahá nyi é hkûn, "Mû a kâm zui sù gi, a zo sháng gaq." nghû, nungmoq lé ngamoq mai sang to bê nghut lhê.

¹¹Hkâsu mù gâ le, nungmoq chyáng má é byù ra-am lagon luí, haí mô le a zui e

za, mô châng lhoq gyô byî wún akô gâ é hkyô lé, ngamoq wó gyô é yanmai nghut lhê. ¹² Ngamoq gi, haû su kut é bang lé, zim za nyî mù zui saí luî, yhumsing é zoshuq ho nyî kó sháng gaq nghû, haû Yhumsîng Yesuq Hkrisduq é myîng lé lang luî, hkunmó hkyô kat mù, wum byî kat lhê. ¹³ Gumang wuî ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

¹⁴ Byù rayuq yuq gi, laiká shî má ngamoq mhoqshit é hkyô lé, a châng é nghut jáng, haú yuq lé rago chôm matsîng yù mù, yhang hoq bun sháng gaq, yhang eq hkâzûm yap kó. ¹⁵ Nghut kôlhang, yhang lé gyè rayuq dông a sôn e za, gumang rayuq dông lhoq pun lhoq kyîng nyî keq.

Ló Htâng Lhê É Shi-kyám Dang

¹⁶ Haû nguîngón hkyô é Yhumsîng yhang gi, ahkyîng hkangmó eq hkyô hkat hkangmó má, nungmoq lé nguîngón hkyô byî nyî sháng gaq. Haû Yhumsîng gi, nungmoq banshoq bang eq ru nyî nyî sháng gaq.

¹⁷ Ngò, Poluq gi, ngá é loq mai yhang shi-kyám dang shî lé kê kat lhê; shî gi, ngò kê é laiká banshoq má kumlhá nghut lhê. Ngò kê é gi, shî dông chyat nghut lhê.

¹⁸ Nga-nhûng é Yhumsîng Yesuq Hkrisduq é jeju gi, nungmoq banshoq bâng chyáng ru joq nyî sháng gaq ô!

TIMOHTI

Chyáng Hî Dàm Hun Kat é Laiká (1 Timothy)

¹ Nga-nhông é hkyi yù Sû Garai Gasang eq nga-nhông é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi, ² haù lumjínng hkyô má ngá zo sîng nghut sù, Timohti lé dang kyô kat lhê; haù Íwa Garai Gasang eq nga-nhông é Yhumsîng Hkrisduq Yesuq chyáng mâ é, jeju eq shogyo nhikmyin hkyô, nguingón hkyô gi, náng chyáng ru joq nyî sháng gaq ô.

Sará Pyoq Pé Lé Sidiq Râ Hkyô

³ Ngò, Makedoni mau má jé wang ló é hkûn, pying to hkô é eq rajung za, Ehpesu myuq má nyi to shi aq; haù hkûn sheq, nàng gi, shut shai é mhoqshit hkyô lé mhoqshit é bang a mhoq xoq lo râ matú le, ⁴ myit htoq mhô-myi dang eq a dat htûm é byù xik labaù má yhangmoq a ap nóng râ matú le, haù bang lé hkunmó wó hkyô râ nghut lhê. Haù hkyô pé gi, lumjínng myit mai kut htoq é Garai Gasâng é muzó lé lhoq htoq râ malaî, mabyoq jishûm za sheq lhoq htoq nyi é nghut lhê. ⁵ Haù hkunmó hkyô luî myit myoqbyu tô é hkyô gi, chyitdap myit yhang nghut ri; chyitdap myit haù gi, sansêng é i-myt, mara a bò bûn é myit eq lumjínng myit akying mai lo é nghut lhê. ⁶ Byù ra-am gi, haù hkyô pé mai htoq ló kôluî, dangsôm taî é hkyô shut lhing ló byuq bekô nghut ri. ⁷ Haù bang gi, jep é tarâ sará pé dut naù kôlhang, yhangmoq haî taî nyi é hkyô lé le, hkyak, haî lé mhoqshit é hkyô lé le, a sé kó nghut ri.

⁸ Rayuq yuq, jep é tarâ lé rago chung é nghut jáng, jep é tarâ gi, ge é hkyô nghut é lé, nga-nhông sê lhê. ⁹ Haù jep é tarâ gi, dingmán bâng é matú tô tô é a nghut e za, tarâ lu laî é bang eq gumlau toq bâng é matú, tarâ a hkunggâ é bang eq mara kut bâng é matú, a chyoiyúng é bang eq lumjínng hkyô a cháng bâng é matú, yhangmoq é yhangwa lé nghut nghut, yhangnu lé nghut nghut, sat pyám bâng é matú, byù sat bâng é matú, ¹⁰ ashop é dòng gungsho zùm yap é bang eq yuqgè yhangchang nyi

zo lhum bâng é matú, jùn dòng byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhûm é lhunglhang bâng é matú sheq, jep é tarâ tô tô é nghut é lé, nga-nhông sê lhê. ¹¹ Tengmán mhoqshit hkyô haù gi, hkungsô wó é Garai Gasâng èq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

Poluq Chyáng Yhumsing É Jeju Joq Nyi É Hkyô

¹² Ngò gi, ngo lé wum-o byî é, nga-nhông é Yhumsîng Hkrisduq Yesuq lé jeju hkya-ôn lhê; hkâsu mù gâ le, Yhang gi, ngo lé lhumzui sù rayuq dòng sôn yù luî, Yhâng é muzó jizó má hkyin kat yu é yanmai nghut lhê. ¹³ Hí hkûn, ngò gi, Garai Gasang lé taî hpoi sù, zing-ri sù eq byù rhoî sù nghut wú kôlhang, a sé shi mù lumjínng myit a bo e za kut é yanmai, shogyo nhikmyin yu é hkyô lé ngò wó yu é nghut lhê. ¹⁴ Nga-nhông é Yhumsîng é jeju lé le, Hkrisduq Yesuq eq sêng é lumjínng myit eq chyitdap myit lé le, ngá chyáng agùn agó hut hkyô kat byi bê nghut ri.

¹⁵ Yubak dap bang lé hkyi yù râ matú, Hkrisduq Yesuq gi, mingkan má jé lé bê gâ é dang gi, lumjínng é mungdang nghut luî, gè gè yhang lhom yù gíng é dang nghut lhê. Haù yubak dap bang má, ngò gi, yubak je ko sù nghut é nghut lhê. ¹⁶ Nghut kôlhang, Hkrisduq Yesuq gi, Yhang lé lumjínng luî ahtum abyuq é asak lé wó yù râ bâng é alik dut râ matú, yubak dap bang má yubak je ko sù nghut é, ngá é ahtoq má, Yhâng é hkam jan hkyô lhunglhang wó tûn shit sháng gaq ga, Garai Gasang gi, ngo lé shogyo nhikmyin yu ri. ¹⁷ Haù mù, haù aróng eq hpungwup shingkang gi, ahtum abyuq é, a dat htên byoq é, myoq èq a byu-myang é Hkohlâm nghut sù, rayuq zâ é Garai Gasâng chyáng pyat dedu ahtum abyuq ru joq nyî sháng gaq ô! Amen.

¹⁸ Ngá zo Timohti ê, nàng eq séng luî myiqhtoi dang joq wú é eq rajung za, ngò gi, nang lé haù dòng mhoqshit kat lhê; haù mù, nàng gi, haù pé lé chung nyi luî, ge é majan zan mù, ¹⁹ lumjínng myit eq mara a bò bûn é myit bo nyi sháng gaq. Byù ra-am gi, haù hkyô pé lé he-ngik pyám kô é nghut luî, yhangmoq é lumjínng myit gi, wui-sanghpo

htên byoq ló é su htên byoq byuq bekô nghut ri. ²⁰ Haú bang má, Humenu eq Alesander le bò kômù, Garai Gasang lé taí hpoí é dang a taí râ matú mhoq yù kó sháng gaq nghû, ngò, yhangnhik lé Tsadán é loq má ap pyám bê nghut lhê.

2

Noqkuq Hkyô Eq Séng Luí Mhoqshit Byí É Hkyô

¹ Haú mù luí, ngò, hí pying kat nau é gi, tarâ hkunggâ é eq hkungga gíng é hkyô banshoq má, nga-nhúng wó ngu-ingón yuqyo nyi sháng gaq, hkohkâm pé eq ahkáng ayá wó bang banshoq é matú le, ² yuq hkanmó é matú le, dúng tôngbán byi, kyûdung byi, dúng xoq byi, jeju hkyon byi, kut aq nghû nau ri. ³ Haú gi, ge é hkyô nghut mù, nga-nhúng é hkyi yù Sû Garai Gasang ô nau é hkyô nghut ri. ⁴ Yhang gi, byù lhunglhâng bang hkyi yu é hui mù, tengmán é mungdang lé sê gyo râ lé, ô nau nyi ri. ⁵ Hkâsu mù gê le, Garai Gasang gi, rayuq za nghut luí, Garai Gasang eq byu é gyoro má sô xoq byi sù le rayuq za nghut lhê; haú yuq gi, xângzo byù nghut é Hkrisduq Yesuq nghut ri. ⁶ Yhang gi, byù lhunglhâng bâng é matú shíhtaí gunglik hkungga dông Yhânggùng lé byí pyám bê nghut ri; haú gi, ahkýing yam-yoq jé é hkûn, saksé htoq shit bê nghut lhê. ⁷ Ngò gi, tûngbau pé lé, tengmán é lumjíng hkyô mhoqshit râ matú, hkô kyo sù rayuq eq lagyo rayuq dông hkyin tô é hui sù nghut lhê. Ngò, haú su taí é gi, mhaú taí é a nghut, têng é hkyô lé za taí nyi é ru nghut lhê.

⁸ Yuqgè wuì gi, nhikjum yô é hkyô eq dang htíng htíng lhûm é hkyô a bo e za, jowò hkanmó má chyoiyúng é loq tû mù kyûdung râ lé, ngò ô nau ri.

⁹ Myiwe wuì gi, xâm nik nik é, hîng zè, palhé, hpaú jung mebû eq a mhôn chung e za, siri bo é mebu wut chûng mù, tap tap za, shuq shuq za kut luí, ¹⁰ Garai Gasang lé noqkuq é myiwe wuì eq gíng shoq, ge é muzó eq yhumsing gùng lé mhôn nyi râ lé le, ngò ô nau ri.

¹¹ Myiwe gi, uphkang tô é dông châng nyi mù, zim za mhoq yù kó sháng gaq. ¹² Myiwe gi, yuqgè lé mhoqshit râ hkyô lé le, yuqgè lé uphkang râ hkyô lé le, ngò ahkáng a byi;

myiwe gi, zim za kut nyi ra râ nghut lhê. ¹³ Hkâsu mù gê le, Adam lé hí hpan to mù, Ewaq lé hpan é ru nghut lhê. ¹⁴ Hau htoq agó, Adam gi, mhaú é hui zo sù a nghut; haú myiwe sheq mhaú é hui zo luí, mara kut shut é ru nghut lhê. ¹⁵ Nghut kôlhâng, myiwe wuì gi, lumjíng myit, chyitdap myit eq chyoiyúng hkyô má, shuq shuq za kut mù, yhangmoq xoq châng nyi kô é nghut jáng, zoshâng hku é dông mai hkyi yu é hui kó râ nghut lhê.✧

3

Hpúng-up Eq Hpungtê Kut Râ Bâng É Hkyô

¹ Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gê é dang gi, lumjíng é dang nghut nyi ri. ² Haú mù luí, hpúng-up rayuq gi, mara hûn râ hkyô a bo é sù, myiwe rayuq za wó é sù, dat sidiq é sù, yhumsing gùng lé wó hkan é sù, hkungga gíng é sù, byù bíng lé dat hkulum é sù, dat mhoqshit é sù, ³ îhpê é jùn a dut é sù, byoq lhum byoq cheq a kut e za nûm é sù, mabyoq jishûm a lhoq htoq é sù, ngunzè lé a chyitdap é sù, nghut râ lhê. ⁴ Yhang gi, yhâng é ikun lé rago dat uphkang luí, yhang zô pé mai hkungga myit bo é eq yhâng dang lé gyo byí é sù le, nghut râ lhê. ⁵ Rayuq yuq, yhumsing é ikun lé lhang a dat uphkang é nghut le gi, Garai Gasang é noqkuq hpúng lé gi, hkâsu kut wó wú gon râ lhu? ⁶ Chángzo dut é a myáng shi é sù gi, hpúng-up wó kut râ a nghut, kut é nghut jáng, yhang gi, nghutbún lò luí, jéyáng é hkyô lé nat Tsadán hui zô é su hui zo abe. ⁷ Hpúng-up rayuq gi, tûngbau pé hí má ge é myíng wó é sù le dut râ lhê; haú jáng, yhang gi, taí hpoí pyám é lé le a hui, nat Tsadán é tuihkyó má le a myí, dut râ nghut lhê.

⁸ Haú eq rajung za, hpungtê pé gi, hkungga gíng é bang, shô-kó a xân é bang, îhpê é jùn a dut é bang, a tengmán é amyat lé a ho é bang, nghut râ lhê. ⁹ Yhangmoq gi, lumjíng hkyô mã é nik é mauhpo tengmán hkyô pé lé, sansêng é i-myt eq châng nyi ra râ nghut lhê. ¹⁰ Yhangmoq gi, chyam é lé hí huí wú kó sháng gaq, hau htâng, yhangmoq lé mara hûn râ hkyô haí a bò lò jáng, hpungtê mù lé wùn kó sháng gaq.

¹¹ Haù eq rajung za, yhangmoq é yhum-sing myhî pé le, myit no nhang é dang a taì e za, dat sidiq é eq hkyô hkangmó má lumgíng luí, hkungga gíng é myiwe wuì, nghut ra rà dut lhê.

¹² Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra rà nghut lhê.

¹³ Hpungtê mù lé rago za wùn waq bê bang gi, yhumsing é matú aróng lé le, Hkrisduq Yesuq lé yhangmoq lumjíng hkyô má, gyuq kyum é hkyô a bo é myit mó lé le, hkyak wó yu akô nghut ri.

¹⁴ Ngò gi, hkâ-myháng a myáng má náng chyáng lé jé rà matú, myit myoqbyu to kôlhang, ahkýng du myáng pyâm le, ¹⁵ Garai Gasâng é ikun hkaù má, byu pé hká dông nyì yap rà é hkyô lé, nàng sé sháng gaq nghû, pying kat é dang shi pé lé ká byì kat lhê; ikun haù gi, rû dui nyi é Garai Gasâng é noqkuq hpúng nghut luí, tengmán hkyo é hkungmó-zíng eq apùn awang nghut ri.

¹⁶ Tarâ hkungga hkyo é zaù tô é hkyô gi, ko dik é nghut é lé, ó yuq le wó he-ngik pyâm é a nghut;

haù gi, Yhang, byù gungsho má htoq shit mù, haù Woi-nyí mai Yhang lé saksé hkám byi luí, maumang lagyô pé gi, Yhang lé myàng bê nghut ri; byuhú ahú hú má Yhâng é hkyô lé hko kyo mù, Yhang lé mingkan byu pé lumjíng luí, hpungwup shingkang eq Yhang lé mauhkûng shut shuí toq yù bê nghut ri.

4

Timohti Lé Mhoqshit É Hkyô

¹ Jihtùm buinyì pé má, byù ra-am gi, lumjíng hkyô mai htak htoq ló luí, mhaù zô é woi-nyí pé htàng cháng kó rà eq nat gang mai lo é mhoqshit hkyô pé lé gyo byi kó rà nghut lhê ga, haù Woi-nyí gi, san za taì ri. ² Haù sù é mhoqshit hkyô pé gi, gegùn labyoq kut é byù-mhaù pé chyáng mai lo é nghut lhê; haù bâng é myit nhiklhum gi, nyhê nhe tô é shamtoq èq nyhê man tô é su dut byuq bê nghut ri. ³ Haù bang gi, hâng lhùm é hkyô lé hkùm tang é hkyô lé le, haù lumjíng luí tengmán hkyô lé sê é bang mai jeju hkya-on mù hap yù ge é, Garai Gasang hpan to byì é zoshuq lé koi pyám nhang é le, kut akô nghut ri. ⁴ Garai Gasang hpan tô

é lhunglháng gi, ge é chyat nghut ri; Garai Gasâng é mungdang eq kyûdûng é dang dông haù pé lé lhoq sân-yúng nyi é nghut é yanmai, ⁵ jeju hkya-on luí hap yu é nghut le gi, haì jung lé lháng he-ngik pyám rà hkyô a bò nghut ri.

⁶ Haù gumang wuì lé, nàng haù hkyô pé lhoq pun lhoq kyíng é nghut le gi, nàng gi, haù nàng cháng bê ge é mhoqshit hkyô eq lumjíng hkyô má é tengmán hkyô má, kô myhâng sù nàng nghut rà htoq agó, Hkrisduq Yesuq é ge é hpungmù wùn sù le dut rà nghut lhê. ⁷ Garai a bo é myit htoq mhô-myi dang eq hpô-myhí mâng pé é mhô-myi dangsôm lé koi pyám luí, tarâ hkunggâ é hkyô má yhumsing gùng lé lhoq kûng yù aq. ⁸ Hkâsu mù gâ le, gungsho lé lhoq kûng é hkyô gi, akyû shau za htoq é nghut lhê; nghut kôlhang, tarâ hkunggâ é hkyô kúm gi, jung hkangmó é matú akyû bo lhê nghut mù luí, shí ipyat má le, htang pyat má le, akyû bo nyi ri.

⁹ Haù gi, banshoq hap yù gíng é, lumgíng é mungdang nghut lhê. ¹⁰ Haù mù luí, xângzo byù banshoq bâng é hkyi yù Sù nghut é, je riyhang, lumjíng bâng é hkyi yù Sù nghut é, rû dui nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gyai yhang shikut nyi lhê.

¹¹ Haù pé lé, hkunmó hkyó luí mhoqshit byì nyi aq. ¹² Náng é zorâm pyat lé, ó yuq èq le a wú tiq pyám sháng gaq, dang taì é má le, nyì yap é hkyô má le, chyitdap é hkyô má le, lumjíng hkyô má le, sansêng é hkyô má le, lumjíng bâng é matú alik kut shit nyì aq. ¹³ Náng chyáng ngò jé lé é buinyì jé shoq, nàng gi, Chyúmdang nghap kyô é má le, hko kyô é má le, mhoqshit é má le, ap nóng nyì aq. ¹⁴ Nàng gi, hpúng suwún wuì náng é ahtoq má loq ke byì é hkùn, myiqhtoi dang dông nang lé Garai Gasang byì to bê nghut é, woi-nyí hkyô eq sêng é chyunghuq lé, haì su a ngàm hkâkut pyám.

¹⁵ Haù hkyô pé lé, myit zìng zuq luí zui saì nyi aq; nàng kô myhang lo é hkyô lé, yuq hkangmó byu-myàng kó sháng gaq, náng gûng banshoq haù pé má ap nóng nyì aq. ¹⁶ Náng é asak duì hkyô má le, nàng mhoqshit é hkyô má le, rago sidiq nyi aq. Haù pé má ru gíng nyi aq, hkâsu mù gâ le, nàng haù su kut é nghut jáng, náng é asak

lé le, náng chyáng mai gyô yu é bang lé le, nàng wó hkyi yù râ nghut lhê.

5

Suwún Wui, Chuimó Pé, Jùn Pé Eq Séng Luí Hpaqchyí Byí É Hkyô

¹ Asak ko sù lé dang htân a tân e za, yhumsing é îwa lé su, yhang lé lhoq pun lhoq kying aq. Zorâm wui lé gi, gumang wui lé su, ² asak kô é myiwe wui lé gi, înu pé lé su zùm yap luí, zomyi wui lé gi, nhammó wui lé su sansêng é i-myt banshoq èq zùm yap nyi aq.

³ Gè gè yhang garúm râ dut é chuimó myhî pé lé, hkunggâ nyi keq. ⁴ Nghut kôlhang, chuimó myhî rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhumsing é ikun lé wú gon luí, înu îwa eq îchyí îwhoí pé lé jeju taú é dông, yhangmoq é lumjínng hkyô lé, zui saí é má lhoq mhán nhâng râ lé hí mhoq yú ra râ nghut lhê; hkâsu mù gà le, haú gi, Garai Gasang ô nau é hkyô nghut ri. ⁵ Haú lum râ ó yuq le a wó mù, gè gè yhang râ tô é chuimó myhî gi, Garai Gasang chyáng myit myoqbyu nyi luí, nyí, myín xoq xoq kyúdung mù, Garai Gasang garúm râ hkyô lé dúng nyi ri. ⁶ Nghut kôlhang, ngón hkyô za cháng luí asak dui é chuimó myhî gi, asak dui nyi kôlhang, shî gù nghut bê nghut ri. ⁷ Yhangmoq lé, ó yuq èq le mara a hùn kó sháng gaq, haú hkyô pé lé le mhoqshit byí nyi aq. ⁸ Rayuq yuq, yhang é buinùm ji-myi wui lé a baú é htoq agó, je luí yhumsing é ikun byù lé a baú é nghut le gi, haú lumjínng hkyô lé he-ngik pyám bê nghut luí, a lumjínng su htoq má je ashop é sù dut bê nghut ri.

⁹ Hkyuq xê zàn byíng bê é chuimó myhî za a nghut jáng, chuimó jihpán má wó kat râ a nghut; hau htoq agó, yhang gi, yuqgè rayuq za wó wú é sù; ¹⁰ zoshâng wui lé hku baú é sù, bíng lé rago dat hkulum é sù, sân-yúng bê bang é hkyô lé chi byí é sù, wuîhke huí tô é bang lé garúm luí, ge é muzó junghkang jungmó má yhumsing gùng yhang ap nóng nyi ri ga, yhang kut é ge é muzó má myíng hù é sù le, nghut râ lhê.

¹¹ Asak tiq é chuimó myhî pé lé, jihpán haú má hkâkat. Hkâsu mù gà le, gungsho ô nau é hkyô èq Hkrisduq chyáng yhangmoq ap nóng tô é hkyô lé ung pyám é hkûn, yhangmoq gi, myi ló naú kó râ nghut lhê. ¹² Haú mù, yhangmoq gi, sâng-hi lé yhangmoq tô tô é danggidiq lé lhoq hpyoq pyám kô é yanmai, tarâ darâ é hui zo kó râ nghut lhê. ¹³ Hau htoq agó, yhangmoq gi, rayhùm htâng rayhùm châng wang wún kômù, lagôn mán byuq kó râ nghut lhê. Lagôn é bang za dut kó râ a nghut, lumù gansang é bang eq yhangmoq taí a ge é pé lé taí kômù, yhumsing eq a sêng é mù má châng wang nyo wún é bang le, dut kó râ nghut lhê. ¹⁴ Haú mù luí, gyè pé mai lumù gansang dang a wó taí pyám kó sháng gaq, asak tiq é chuimó myhî pé gi, myi ló mù, zoshâng hkû luí, yhangmoq é ikun lé gôn lajang râ matú, ngò, yhangmoq lé hpaqchyí byí kat lhê. ¹⁵ Hkâsu mù gà le, ra-am gi, lhing taú ló kôluí, Tsadán é htâng châng nyi lugù nghut bekô nghut ri.

¹⁶ Lumjínng é myiwe rayuq yuq gi, yhang é ikun má chuimó myhî wó é nghut le, haú yuq é matú noqkuq hpúng lé wòlai a hun e za, yhang mai garúm yú ra râ nghut lhê; haú hkûn sheq, noqkuq hpúng gi, gè gè yhang râ tô é chuimó myhî pé lé wó garúm râ nghut lhê.

¹⁷ Haú noqkuq hpúng lé rago za shuí ù é hpúng suwún wui gi, akyú í tú hkam yù gíng lhê; haú mungdang hko é hkyô eq mhoqshit é hkyô má shikut é suwún wui gi, je riyhang hkam yù gíng lhê. ¹⁸ Hkâsu mù gà le, "Guq nâng nyi é no lé, nhuttsung hkâ-tsung to byi."* ga le, "Mù zui sù gi, yhang é zuihpau wó yú gíng lhê."* ga le, Chyúmdang má taí tô ri. ¹⁹ Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhom yù. ²⁰ Nghut kôlhang, lhoq pun lhoq kyîng é hkyô lé góbang wó yú kó sháng gaq, mara kut shut é bang lé, shiwa byu pé hí má tân mhoqshit aq.

²¹ Pying kat é dang shi pé lé, gamhkui myit a bo e za châng nyi râ eq, myoqdong hkyîn luí hái le a kut râ matú, Garai Gasang eq Hkrisduq Yesuq é hí má le, hkyin yù huí

* 5:18 Tarâ Pun 25:4

* 5:18 Luk 10:7

* 5:22 Haú hkun lhê bang gi, hpúng suwún kut râ matú hkyin to bê bang lé, loq ke kyúdung byí é nghut lhê.

é maumang lagyô pê é hí má le, ngò, nang lé pying kat lhê.

²² Ó yuq é ahtoq má le loq ke* byi râ lé hkâhân; góbâng é mara hkaû má le hkâbo lòm. Yhumsîng yhang yhumsîng sân-yúng shoq kut nyî aq.

²³ Náng é wamdau ra luî, anum num no lò lò dut é yanmai, nàng gi, wui za shuq é hkyô lé nô pyám luî, tsibiyiq wing le ratsuí tsuí shuq byi aq.

²⁴ Byù ra-âm é mara pé gi, de de dut é nghut mù luî, tarâ jéyáng é jang má hí ló jé ri; ra-âm é mara kúm gi, hau é htâng má châng byông htoq lo ri. ²⁵ Haû eq rajung za, ge é muzó pé gi, de de nghut nyî luî, haû su de de a nghut é pé lé le, wó zaú to râ a nghut.

6

¹ Jùn dut é wòlai hkaû má nyi é lhungl-hâng bang gi, yhangmoq é yhumsîng wui lé gyai yhang hkungga gíng lhê nghû, myit yù râ dut lhê; haû hkûn sheq, Garai Gasâng é myìng eq nga-nhông é mhoqshit hkyô gi, lumù gansang é a hui râ nghut lhê. ² Lumjîng é yhumsîng wui é jùn gi, gumang wui nghut é yanmai, yhangmoq lé a wú myuq é za, yhangmoq dojaú luî akyû myang hkâm zô é bang gi, lumjîng bang eq chyitdap gíng é bang nghut é yanmai, yhangmoq lé je ge é dông dojaú râ lhê. Shí hkyô pé lé, nàng gi, yhangmoq lé mhoq byî nyi é eq lhoq pun lhoq kying byî nyi aq.

Ngùn Lé Chyitdap É Hkyô

³ Rayuq yuq gi, shut é lumjîng hkyô lé mhoqshit luî, nga-nhông é Yhumsîng Yesuq Hkrisduq é tengmán mhoqshit hkyô eq tarâ hkunggâ é mhoqshit hkyô lé a myit huí é nghut jáng, ⁴ haû yuq gi, nghutbùn é sù eq haí lé le a sê gyô é sù nghut ri. Yhang gi, htuq htîng lhûm é hkyô pé lé ô nau é, a ge é myit bò luî, dang eq séng mù mabyoq lhoq htoq ri; haû mai, manon é hkyô, byoq lhum byoq cheq é hkyô, lumù gansang é hkyô, agè ashop é dông myit ngam pyâm é hkyô eq, ⁵ haû tengmán hkyô lé lhoq hpyuq pyám mù, tarâ hkungga hkyô gi, ngùn zè wó hkyô za nghut ri ga myit yu é, i-myit lhoq htên pyám bê bâng é gyoro má, byìn a huí é hkyô pé lé, lhoq htoq kat ri.

⁶ Nghut kôlhang, tarâ hkunggâ hkyô má nhik dik é hkyô bo é nghut le gi, amyat mó

nghut nyi ri. ⁷ Hkâsu mù gà le, nga-nhông gi, mingkan htoq má haí jung le a yu wang lé, haû mai le haí wó yu htoq ló râ a nghut. ⁸ Haû mù luî, nga-nhông gi, wutbu wutmè eq zoshuq wó é nghut jáng, hau eq nhik dik nyi sháng. ⁹ Wó nau sùt nau é byu pé gi, gunglaú hkyô eq tuihkyó má le, haû byoq yeq hkyô eq htên byoq hkyô má, byu pé lé myup shî nhang é, ngha é hkyô myo myo eq myit nò nhang nau é hkyô má le, byit gyó wâng kó râ nghut lhê. ¹⁰ Hkâsu mù gà le, ngùn lé chyitdap é hkyô gi, agè ashop hkyô ajungjûng é apùn awang nghut nyi ri. Byù ra-am gi, ngùn lé ô nau luî, haû lumjîng hkyô mai sô nghoq ló mù, yhumsîng gùng lé yhumsîng, haû yón kuq hkyô eq htaû rot pyám bekô nghut ri.

Timohti Lé Pying Kat É Dang

¹¹ Nghut kôlhang, Garai Gasâng é byù nàng gi, haû pé banshoq lé koi pyám luî, dingmán hkyô, tarâ hkungga hkyô, lumjîng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyi aq. ¹² Lumjîng hkyô eq sêng é ge é majan le zân nyi aq. Hap yù lumjîng bê ga, saksé myo myô pê é hí má, ge é dông nàng yín yu é hkûn, wut yu é hui luî wó é ahtum abyuq é asak lé, zuî zing nyi aq. ¹³ Haû lhunglhang lé asak byî é Garai Gasâng é hí má le, Pontu Pilat chyáng saksé hkâm nyi é hkûn, ge é dông yín yu é Hkrisduq Yesuq é hí má le, ngò, nang lé pying kat lhê: ¹⁴ Yhâng é ahkyíng yam-yoq jé jáng, Garai Gasang htoq shit nhang râ nghut é sù, nga-nhông é Yhumsîng Yesuq Hkrisduq htoq shit é buinyi jé shoq, ¹⁵ nàng gi, agot a-u é hkyô eq mara hûn râ hkyô a bo e za, hkunmó shî lé châng nyi aq. Garai Gasang gi, hkungsô wó sù, Yhang za up sù, hkohkam pê é Hkohkâm, yhumsîng pê é Yhumsîng, ¹⁶ Yhang za ahtum abyuq dui nyi sù, a ge chyâng htep e é maubó má dui nyi sù, ó yuq èq le a myang wú é, a wó myang é sù nghut nyi ri. Aróng eq hpungwup a-tsam gi, Yhâng chyáng ahtum abyuq ru joq nyi sháng gaq ô! Amen.

¹⁷ Shí ipyat má wó sùt é bang gi, a gum-rông râ eq a gíng é sutzè má yhangmoq é myit myoqbyù hkyô a tô e za, nga-nhông nguingón yuqyo nyi râ matú junghkang jungmó lé agùn agó byî é sù, Garai Gasâng

chyang za, yhangmoq myit myoqbyu nyi ra matu, hkunmo hkyo aq. ¹⁸ Ge e hkyo kut lu, ge e muzo ma wo sut nyi mu, a chum e za, gam chung nau e myit bo ra matu, yhangmoq le hkunmo hkyo aq. ¹⁹ Hau dong mai, yhangmoq gi, je lo ra ipyat e matu ging e apun awang dong, yhangmoq e matu sutze wo tsing to ko ra nghut lhe; hau hkun sheq, yhangmoq gi, asak kyng nghut e asak hau le wo zu zing to ko ra nghut lhe.

²⁰ Timohti e, nang le ap to be hkyo le, zung nyi aq. Tarâ a hkungga e po-ming ming bang eq hpaqchy nghut lhe ga myhing shut e htuq htng lhum lhum kut e hkyo le, koi pyam aq. ²¹ Byu ra-am gi, hau le hpaqchy nghut lhe ga yin yu kolu, hau lumjing hkyo mai so nghoq htoq lo byuq bekô nghut ri.

Jeju gi, nungmoq chyang ru joq nyi shang gaq o.

TIMOHTI
Chyáng Htang Dàm Hun Kat é
Laiká
(2 Timothy)

¹Hkrisduq Yesuq chyáng mâ é asak byi râ gâ é danggidiq eq rajung za, Garai Gasang ô nau é dông, Hkrisduq Yesuq é lagyo nghut sù, ngò, Poluq gi, ngò chyitdap é ngá zo Timohti lé, dang kyô kat lhê.

²Haû Îwa Garai Gasang eq nga-nhông é Yhumsîng Hkrisduq Yesuq chyáng mâ é jeju eq shogyo nhikmyin hkyô, nguingón hkyô gi, ru joq nyî sháng gaq ô!

Lumluq Râ Matú Myit Wum Byî É Hkyô

³Ngò gi, ngá é kyûdung dang má, nyî, myín, abyit alan nang lé bún nyi uchyang, sân-yúng é i-myt mai, ngá é íchýí îwâ pé dojaú é su, ngò dojaú nyi é Garai Gasang lé, jeju hkyâ-ôn nyi lhê. ⁴Ngò gi, ngò má gabú hkyô byíng jup sháng gaq nghû, náng é ngaubyi lé myit bûn nyi mù, nang lé gyai yhang myàng nau nyi ri. ⁵Ngò gi, nang é gyíng é lumjíng myit lé lhoq pûn yù mù, náng whoí Lu-i eq náng nu U-ni nhik chyáng má hí bo é lumjíng myit, ahkuî, náng chyáng le bo ri nghû, hkyak myit lum nyi lhê. ⁶Hau é yanmai, ngò loq ke byî é dông, nàng má bo tô é Garai Gasâng é chyunghuq lé, gyúng nhang nyi râ matú, nang lé ngò lhoq pûn kat lhê. ⁷Hkâsu mù gâ le, Garai Gasang gi, gyuq sê é myit nga-nhúng lé a kat byî e za, a-tsam bo é myit, chyitdap sê é myit, yhumsing gùng lé dat hkan é myit sheq kat byî tô é ru nghut lhê.

⁸Haû mù luí, nàng gi, nga-nhông é Yhumsîng eq séng luí saksé hkâm é hkyô má le, Yhâng é yanmai htóng byû dut to sù ngá é hkyô má le, hoq myit a bo é za, Garai Gasâng é wum-o mai, haû gabú danglu é matú, ngò eq rahá wúhke jamjau chôm hui goq. ⁹Garai Gasang gi, nga-nhúng zui saí é muzó dông a nghut e za, Yhânggùng yhang myit sôn tô é hkyô eq Yhâng é jeju yanmai za, nga-nhúng lé, hkyi yù luí chyoiyúng é asak ùi hkyô má ji yù bê nghut ri. Ahkýng nghu é lhang a joq shi mai yhang, jeju haû gi, Hkrisduq Yesuq má nga-nhúng lé byi to gù nghut bê. ¹⁰Nghut kôlhang, nga-nhông

é hkyi yù Sù, Hkrisduq Yesuq pô htoq é dông, ahkuî, haû lé lhoq htoq shit bê nghut ri. Yhang gi, shî-nò hkyô lé lhoq htên pyám luí, haû gabú danglu dông mai, asak lé le, a dat htên byoq é hkyô lé le, lhoq htoq shit bê nghut ri. ¹¹Ngò gi, gabú danglu é matú hko kyo sù, lagyo eq mhoqshit sù dông, hkyin tô é hui sù nghut lhê. ¹²Hau é yanmai, ngò gi, wúhke jamjau shî lé huí nyi é nghut lhê. Nghut kôlhang, ngò gi, ó yuq lé lumjíng bê nghut é hkyô lé, sê é htoq agó, Yhang lé ngò ap tô é pé lé, haû buinyi jé shoq, Yhang wó zúng râ nghut lhê nghû hkyak myit lum tô é yanmai, ngò a hoq.

¹³Nàng gi, ngá chyáng mai wó gyô yu é tengmán dang pé lé, Hkrisduq Yesuq má, lumjíng myit eq chyitdap myit mai alik kut yu nyi aq. ¹⁴Nang lé ap byî to bê, haû ge é mungdang lé, nga-nhông chyáng bo tô é Chyoiyúng Woi-nyí é wum-o mai zúng nyi aq.

¹⁵Asia mau mâ é bang yuq hkangmó gi, ngo lé pyâm to kô é hkyô lé, nàng sê lhê; haû bang má, Hpugelu eq Heramoge nhik le bo akô nghut ri.

¹⁶Haû Yhumsîng gi, Onesihpurú é yhum-byù lé shogyo nhikmyin é hkyô tân shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é shamtoq-tuî é yanmai, a hoq e za, ¹⁷yhang, Romaq myuq má jé nyi é hkûn, ngo lé myang hui shoq, ho shikut é sù nghut ri. ¹⁸Haû Yhumsîng gi, haû buinyi má, yhang lé haû Yhumsing é shogyo nhikmyin hkyô byi sháng gaq! Ehpesu myuq má, yhang ngo lé hkâ-myhó garúm bê nghut é gi, nàng rago yhang sê lhê.

2

¹Haû mù, ngá zo ê, nàng gi, Hkrisduq Yesuq mâ é jeju hkaû má, wúm bo nyi aq. ²Nàng gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq. ³Hkrisduq Yesuq é ge é gyezo rayuq su, wúhke hkyô lé chôm jan nyi sháng. ⁴Gyezo rayuq dông gyè mù wùn waq nyi é sù, ó yuq nghut kôle, gotû muzó má a bo lom é za, yhang lé hkunmó hkyô nyi é gyezau lé, gabú nhâng nau é chyat nghut lhê. ⁵Haû eq rajung za, shingjóng é sù rayuq le, shingjóng lhum poí wang é

hkûn, tô tô é tarâ dông a châng e nghut le gi, ung é aróng chyunghuq lé wó yû râ a nghut. ⁶ Yo-mû zûi shikut é sù gi, kyôshi lé sâng-hi myang hkam yû râ sù nghut lhê. ⁷ Haû Yhumsîng gi, shí pé banshoq lé wó sê é nyan nang lé byi râ nghut é yanmai, ngò taí é hkyô pé lé myit wú aq;

⁸ Haû Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haû gi, ngá é gabú danglù nghut lhê. ⁹ Gabú danglù hau é yanmai, mara bò sù rayuq lé su, ngò gi, kyum hut é hui luí, hpuzô nyi é nghut lhê. Nghut kôlhang, Garai Gasâng é mungdang gi, kyum hut huí é a nghut. ¹⁰ Haû mù luí, ngò gi, Hkrisduq Yesuq chyáng mâ é hkyi yû hkyô eq ahtum abyuq é hpungwup shingkang lé wó yû kó sháng gaq nghû, haû hkyin yû hui bâng é matú, jung hkangmó lé hkam jân nyi lhê.

¹¹ A-ô mâ é dang gi, lumgíng é dang nghut lhê:

Nga-nhúng gi, Yhang eq rahá shí bê nghut jáng, Yhang eq rahá dui râ nghut lhê.

¹² Nga-nhúng gi, hkam jân é nghut jáng, Yhang eq rahá up râ nghut lhê.

Nga-nhúng gi, Yhang lé he-ngik pyâm é nghut jáng, Yhang le, nga-nhúng lé he-ngik pyâm râ nghut lhê.

¹³ Nga-nhúng gi, lhumzui myit a bò kôlhang, Yhang gi, lhumzui nyi râ nghut lhê. Hkâsu mù gâ le, Yhang gi, yhânggùng yhang wó he-ngik pyâm é a nghut.

Garai Gasâng Hí Má Myoqdong Wó É Mû Zui Sù

¹⁴ Nang gi, yhangmoq lé, shí hkyô pé xoq luí lhoq pún nyi aq. Dang pé eq séng luí, a byoq lhúm nyi kó sháng gaq, Garai Gasâng hí má yhangmoq lé sidiq byi aq. Haû gi, akyû a bo é htoq agó, wó gyô é bang lé htên byoq nhang é hkyô za nghut lhê. ¹⁵ Nang gi, haû tengmán é mungdang lé jo shoq chung jai é eq, hoq nó a râ é mû zui sù rayuq dông Garai Gasâng hí má myoqdong wó shoq, wó dut é myhó shikut aq. ¹⁶ Tarâ a hkunggâ é po-ming ming bang lé koi pyám aq. Hkâsu mù gâ le, haû su kut é bang gi, tarâ a hkunggâ é hkyô má je riyhang wang nân ló byuq é bang dut kó râ nghut lhê.

¹⁷ Yhangmoq é mhoqshit hkyô gi, mong ana su byo myín ló râ nghut lhê; haû bang má Humenu eq Hpilitu nhik le bò kôluí, ¹⁸ haû tengmán hkyô mai sô nghoq ló byuq akô. Yhangnhik gi, haû dum dui toq hkyô dut lai bê ga taí kômù, ra-âm é lumjíng hkyô lé lhoq htên pyám byi akô nghut ri. ¹⁹ Nghut kôlhang, "Haû Yhumsîng gi, Yhang eq sêng é bang lé sê lhê." ☆ ga luí le, "Haû Yhumsîng é myíng lé yín yu é bang yuq hkangmó gi, agè ashop hkyô mai lhing tau ra kó râ nghut lhê." ga luí le, dizik haû htung tap tô é, Garai Gasâng é ging tîng é apûn awang gi, gîng nyi ri.

²⁰ Yhúm mó ralhúm má gi, hîng auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut. ²¹ Haû mù luí, haû pé mai yhumsîng gùng lé lhoq sansêng pyâm é sù gi, chyoiyúng luí, haû Yhumsîng chung jai gíng é sù, ge é muzó hkangmó kut râ hen tô é sù nghut é yanmai, aróng hkyo é matú chungzè dut râ nghut lhê.

²² Zoram é agè ashop é ô nau hkyô lé koi pyám mù, haû sân-yúng é myit mai, Yhumsîng lé wut dîng é bang eq rahá, dingmán hkyô, lhumzui hkyô, chyitdap hkyô, nguínón hkyô pé lé, châng hkat nyi aq. ²³ Go é eq ngok é dông dang jet jet lhúm é hkyô gi, mabyoq lhoq htoq é hkyô nghut é lé, nang sê lhê nghut é yanmai, haû hkyô lé koi pyám aq. ²⁴ Haû Yhumsîng é dui-nhâng zoshâng gi, mabyoq a lhoq htoq é za, yuq hkangmó lé dat myit tê byi é, wó mhoqshit é, a dat nhik-yô é su dut ra râ nghut lhê.

²⁵ Yhang gi, yhang lé htuq htíng é bang lé, nú-nhâm é dông mhoqshit byi ra râ nghut lhê; haû hkûn, Garai Gasang gi, yhangmoq lé myit lhîng hkyô byi mù, tengmán hkyô lé sê gyo nhâng luí, ²⁶ yhangmoq gi, bûn gyîng lò mù, nat Tsadán ô nau é hkyô lé kut byi râ matú, chyup yû huí é, nat Tsadán é tuihkyó mai wó hpang lut ló kó abe nghû, myit lum kat lhê.

3

Jihtûm Buinyi Pé Má Dut Lò Râ Hkyô

¹ Jihtûm buinyi pé má, wúihkê é ahkýing pé joq lò râ nghut é lé, nang matsîng to aq. ² Hkâsu mù gâ le, haû u lé, byu pé

gi, yhumsing gùng lé za chyitdap é bang, ngùn lé myoqnoq é bang, gumrong é bang, nghutbùn é bang, góbang lé taí hpoí é bang, înu îwa nyo é lé a gyô é bang, jeju a dat bûn é bang, a chyoiyúng é bang, ³chyitdap myit a bo é bang, mara hkyut byi a sê é bang, lumù gansang é bang, yhumsing gùng lé hkàng a sê é bang, byuwuî pé, ge é hkyô lé a ngui é bang, ⁴haq gumlaû é bang, a bun a so dut wún é bang, yhumsing gùng lé za hkik bûn é bang, Garai Gasang lé chyitdap é bang dut râ malaî ngón kún hkyô lé za chyitdap é bang, dut bùm kó râ nghut lhê. ⁵Yhangmoq gi, tarâ hkunggâ é bang su dut kôlhang, haú pê é a-tsam lé he-ngik pyâm akô nghut ri; haú sù é bang lé, nàng koi pyâm nyi aq.

⁶Yhangmoq gi, hpaqchyî da mù yhûm pé má wàng kôluî, mara wòlai lé wun é, agè ashop é ô naù hkyô ajung jung má sô nghoq lô byuq é, ⁷hkâ-nhám le mhoq yu nyi kôlhang, haú tengmán hkyô lé a sê gyô é, myit nyhôm é myiwe wuî lé wó lãng nghoq yu é bang nghut akô. ⁸Yanne eq Yambre nhik gi, Mosheq lé htuq htîng é su, haú bang le, haú tengmán hkyô lé htuq htîng akô nghut ri; yhangmoq gi, myit é hkyô htên byuq kôluî, haú lumjîng hkyô má lhum a zuî é bang nghut akô. ⁹Nghut kôlhang, haú nhik é hkyô byông htoq lo é su, yuq hkangmó é hí má, yhangmoq ngok é hkyô byông htoq lô râ nghut mù, haú mai lai luî yhangmoq wó kut jat kó râ a nghut.

Timohti Lé Pying Kat É Dang

¹⁰Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjîng hkyô, myit hîng hkyô, chyitdap hkyô, hkam jan hkyô, ¹¹zing-ri huî é hkyô eq wuîhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haú Yhumsîng gi, haú pé banshoq mai ngo lé xe yù bê nghut ri. ¹²Gè gè yhang, agè ashop é byu pé eq mhaú kut é bang gi, mhaú zô nyi bum é eq mhaú zô é huî nyi bùm kôluî, a ge é hkyô shut je riyhang myô jat lò kô é hkûn, ¹³Hkrisduq Yesuq má tarâ hkunggâ é asak đông nyiyap nau é bang yuq hkangmó gi, zing-rí é hui kó râ nghut lhê. ¹⁴Nghut kôlhang, nàng gi,

ô pê chyáng mai nàng mhoq yù bê hkyô lé le, Hkrisduq Yesuq lé lumjîng jáng hkyi yu é hui shoq, ¹⁵nàng lé hpaqchyî byéng-yá wó byî é chyoiyúng Chyúmdang pé lé, zoshâng hkûn mai nàng sê to bê hkyô lé le, nàng sê é yanmai, nàng mhoq yu to bê hkyô eq hkyak lumjîng to bê hkyô má, xoq kut nyi aq. ¹⁶Chyúmdang hkangmó gi, Garai Gasâng é soq hâng tô é pé chyat nghut é yanmai, mhoqshit é hkyô, tân mhoq é hkyô, lhoq jo byî é hkyô eq dingmán hkyô lé tân shit byî é hkyô pê é matú, akyû bo ri; ¹⁷haú mù luî, haú Garai Gasâng é byù gi, ge é muzó jizó hkangmó lé kut râ matú, wó gumjup râ nghut lhê.

4

¹Garai Gasâng é hí má le, dui nyi bang eq shi byuq bang lé tarâ dara râ sù Hkrisduq Yesuq é hí má le, Yhang htoq shit râ hkyô eq Yhâng mingdán é yanmai, ngò, nàng lé pying kat é gi, ²haú mungdang lé hko kyo aq; ahkyíng yam-yoq ang kôlhang, a ang kôlhang, rì rì hen to aq; myit gyaí hing é eq rago za mhoqshit é đông, lhoq jo byi, tân mhoqshit é eq myit wum byi kut nyi aq. ³Hkâsu mù gâ le, byu pé gi, tengmán mhoqshit hkyô lé a kâm gyô é ahkyíng jé mù, yhangmoq ô naù yut yut é hkyô cháng luî, yhangmoq é no yo bui nau é nohkyap gyô nau é hkyô taí nhâng râ matú, sará pé rajùm rayò lé lhîngkyuq má lhoq tsing to kó râ nghut lhê. ⁴Yhangmoq gi, haú tengmán hkyô mai yhangmoq é nohkyap lé lhîng pyám mù, myit htoq mhô-myi dang shut lhîng lô kó râ nghut lhê. ⁵Nghut kôlhang, nàng gi, dut tô é hkyô banshoq má rago sidiq nyi aq; wuîhke jamjau hkyô lé hkam jân nyi aq; gabú danglù hko kyô é muzó kut nyi aq; nàng é hpungmû banshoq lé wùn waq nyi aq.

⁶Hkâsu mù gâ le, ngò gi, shuq jung hkungga ralhum đông hut pyâm é huî nyi gù nghut mù luî, mingkan mai ngò htoq lô râ ahkyíng jé bê nghut ri. ⁷Ngò gi, haú ge é majan le zan bê; din shingjóng lhûm é hkyô le bàn bê; haú lumjîng hkyô le chang bê nghut lhê. ⁸Ahkuî, haú tengmán é tarâ Agyi nghut sù, Yhumsîng gi, haú buinyi má ngo lé ap byi râ nghut é, haú dingmán hkyô é janmaú lé, ngá matú tô to byi bê nghut lhê. Haú gi, ngá é matú za a nghut, Yhang

htoq shit râ hkyô lé myit láng nyi é bang banshoq é matú le nghut lhê.

Timohti Lé Jì Kat É Hkyô

⁹ Nàng gi, ngá chyáng wó dut é í hân hân lé lô aq. ¹⁰ Hkâsu mù gâ le, Demaq gi, mingkan shî lé chytđap é yanmai, ngo lé pyám to luî, Htesaloni wà mó shut; Krezen gi, Galatiq mau shut; Tituq gi, Dalamati mau shut, e ló byuq bekô nghut é yanmai nghut lhê. ¹¹ Lukaq za ngò eq rahá nghut nyi lhê. Markuq lé, nàng eq rahá shuí lé lò aq; yhang gi, ngá é hpungmû má wó htuqbang râ sù nghut lhê. ¹² Ngò gi, Tuhkiku lé Ehpesu myuq shut nhang kat bê nghut lhê. ¹³ Nàng gi, lé lo é hkûn, Troa myuq má, Karpu chyáng ngò tô tô é buhîng haû lé le, ngá é chyúmding lé le, je luî eq haû shokuq chyúmding pé lé le, yù lé lô byi aq.

¹⁴ Haû ningdup hpó Alesander gi, ngo lé a ge é myo myo kut bê nghut ri; haû Yhumsîng gi, yhang kut é eq rajung za, yhang lé dam byi râ nghut lhê. ¹⁵ Yhang gi, ngamoq é danglù lé wum kat htuq htíng bê sù nghut é yanmai, nàng le, yhang lé sidiq ra râ nghut lhê.

¹⁶ Sâng-hî dàm, ngá gûng lé ngò taî hung é hkûn, yuq hkanmó gi, ngá é hkyam shut a bo lom e za, ngo lé pyâm tô akô. Nghut kôlhang, haû gi, yhangmoq ahtoq má mara a dut sháng gaq. ¹⁷ Nghut kôlhang, ngò dông mai danglù haû lé rago wó hko pyo kat luî, tûngbaù pé banshoq bang wó gyo kó sháng gaq ga, haû Yhumsîng gi, ngá hkyam shut yap to mù, ngo lé wum-o byí é nghut lhê. Hau htoq agó, ngò gi, hkanghkyî é nhut mai le hkyi yù hui bê nghut lhê.*

¹⁸ Haû Yhumsîng gi, ngo lé agè ashop é hkyô hkanmó mai hkyi yù luî, Yhang é mauhkûng mingdán má ngón za shuí jé râ nghut lhê. Hpungwup shingkang gi, Yhâng chyáng ahtum abyuq ru joq nyî sháng gaq ô. Amen.

Shi-kyám Dang

¹⁹ Priskila eq Akula nhik lé le, Onesihpuru yhumbyù wuî lé le, bo shi-kyám byi laq.

²⁰ Erastu gi, Korinhtuq myuq má nyi gyó to bê; Trohpimu lé gi, nò luî, Melitu wà mó má ngò nyhi pyâm to bê nghut lhê. ²¹ Nàng gi, wó dut é í, gyoqmyò a wàng shi lé, shî má

jé lé lò aq. Ubulu gi, nàng lé shi-kyâm kat ri; haû eq rajung za, Pudén, Linu, Klodia eq gumang wuî banshoq bang gi, nàng lé shi-kyâm kat akô nghut ri.

²² Haû Yhumsîng gi, náng é woi-nyí eq rahá nghut nyî sháng gaq. Jeju gi, nungmoq chyáng ru joq nyî sháng gaq ô.

* 4:17 Haû hkûn lé, Romaq byu pé, byù sat lé gi, hkanghkyi lé tsô pyâm lhê.

TITUQ Chyáng Hun Kat é Laiká (Titus)

¹ Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yanmai, Garai Gasang hkyin yu to bâng é lumjínq hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê. ² Haù ahtum abyuq é asak hkyô lé, mhaù a sê é Garai Gasang gi, ahkyínq nghu é lhang a joq shi mai danggidiq byi to mù, Yhang masat tô é ahkyínq yam-yoq má sheq mungdang hko kyô é dông lhoq htoq shit luí, ³ nga-nhông é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

⁴ Nga-nhông chòm lumjínq é hkyô dông mai, ngá zo sng nghut é Tituq lé laiká kâ kat lhê. Íwa Garai Gasang eq nga-nhông é hkyi yù Sù Hkrisduq Yesuq chyáng mâ é jeju eq nguínqón hkyô gi, náng chyáng ru joq nyí sháng gaq ô.

Kreti Zinlóng Má, Tituq Wùn Waq Râ Muzô

⁵ Ngò, nang lé Kreti zinlóng má nyhi hkyô tô é gi, ngò, nang lé pying tô é eq rajung za, ngò a ban zui saí é loqzó pé lé lhoq pán râ matú eq, wà hkangmó má hpúng suwún ayá dâng to byi râ matú nghut lhê. ⁶ Haù hpúng suwún kut râ sù gi, mara hùn râ hkyô a bo é sù; yhangmyi rayuq za wó é sù; yhang zô pé le, agè ashop é eq jìno a gyô é ga, mara hùn râ jowò a joq é lumjínq bang nghut é sù, nghut râ lhê. ⁷ Hkâsu mù gâ le, hpúng-up rayuq gi, Garai Gasâng é sùt zum sù rayuq dông nghut lhê mù, mara hùn râ hkyô a bo é sù nghut râ lhê; yhang gi, yhumsing myit a cháng; i-myt a lûm tot; ìhpê é jùn a dut; mabyoq jishûm a kut; a sansêng é ngùn hng lé a myit ô nau é sù nghut râ lhê. ⁸ Yhang gi, byù bíng lé dat hkulûm sù; ge é hkyô lé chyitdap sù; nûm é sù, dingmán sù; chyoiyúng sù; yhumsing gùng lé wó hkang é sù; ⁹ mhoq yu to bê hkyô eq rajung za, lumjínq é mungdang lé ging eq zú zing nyi é sù nghut râ lhê. Haù

hkûn sheq, yhang gi, góbang lé tengmán é mhoqshit hkyô dông myit wum wó byí é eq, haù eq shai lhum é bang lé, shut é hkyô wó tân shit râ nghut lhê.

¹⁰ Hkâsu mù gâ le, gumlau kut é bang, dangsôm taí é bang eq mhaù zô é bang myo myo nyi ri. Ahpyo-kuq hpyit é hpúng bang je riyhang myo akô. ¹¹ Haù bâng é nhut shô lé gi, xaù pyám byi râ lhê. Hkâsu mù gâ le, yhangmoq gi, a tengmán é dông sutzè lé wó yù shoq ga luí, mhoqshit a gíng é hkyô pé lé mhoqshit mù, rayhum bang bang lé lhoq hpyoq lhoq htên nyi akô nghut ri. ¹² Kreti byù mâ é myiqhtoi rayuq lhang gi, "Kreti byu pé gi, ayang mhaù é bang, tân jung yosô dusak pé, lagôn é zo myoqnoq bang nghut akô." ga taí wú ri. ¹³ Saksé shí gi, têng ri. Haù mù luí, yhangmoq gi, Yudaq byu pê é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyo kô é za, ¹⁴ haù lumjínq hkyô má gíng tng nyi kó sháng gaq, yhangmoq lé htân htân tân mhoqshit byí nyi aq. ¹⁵ Sân-yúng bâng é matú gi, azíng zê lhunglhang sân-yúng ri; a sân-yúng bang eq a lumjínq bâng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhiklhum eq myit sôn sê é hkyô pé gi, gè gè yhang, a sân-yúng dut byuq bekô nghut ri. ¹⁶ Yhangmoq gi, Garai Gasang lé sê lhê ga kôlhang, yhumsing zui saí é loq zó dông, Yhang lé he-ngik pyâm é bang nghut akô. Yhangmoq gi, achay achyut é bang, jìno a gyô é bang eq, ge é mù joq mijoq eq a htuk é bang nghut akô nghut ri.

2

Hká Dông Nyi Yap Râ Hkyô

¹ Nang kúm gi, tengmán é mhoqshit hkyô eq wuí é dông mhoqshit nyí râ dut lhê. ² Hpô-mâng pé lé gi, i-myt shirâm sé râ hkyô; hkungga gíng é byù dut râ hkyô; yhumsing gùng lé wó hkâng râ hkyô eq, lumjínq myit gíng râ, chyitdap myit gíng râ, hkam jan hkyô gíng nyi râ hkyô pé lé, mhoqshit byí nyi aq.

³ Haù eq rajung za, hpô-myhí mâng pé lé gi, hkungga gíng é a-kyang bo nyi râ hkyô; lumù gansâng dang a taí râ hkyô; ìhpê é jùn a dut râ hkyô eq ge é hkyô lé za dat mhoqshit é bang wó dut râ matú mhoqshit

byi aq. ⁴Haú hkûn, Garai Gasâng é mung-dang gi, lumu pyâm é a hui sháng gaq, yhangmoq gi, hpô-myhí zô pé lé, yhumsing yhanglâng eq, yhangzô pé lé chyitdap é, ⁵yhumsing gùng lé wó hkang é, siri bo é, ikun lé dat wùn waq é, ge é myit wó tân shit é, yhumsing é yhanglâng uphkang é đông dat châng é bang dut râ matú, ge mhoqshit é hpô-myhí mâng pé dut râ nghut lhê.

⁶Haú eq rajung za, zorâm wuì lé le, yhumsing gùng lé wó hkang nyì kó sháng gaq, lhoq pun lhoq kyîng nyì aq. ⁷Hkyô hkat hkangmó má, yhangmoq lé nàng yhang ge é muzó alik tân shit nyí aq. ⁸Nàng lé lhom htuq htîng é bang gi, nga-nhûng é hkyô má mara a wó hûn kômù hoq hpû nyì kó sháng gaq, nàng mhoqshit é hkyô má, taí pyám râ hkyô a bò shoq, têng é, siri bo é, eq sansêng é dang taí nyì aq.

⁹⁻¹⁰Nga-nhûng é hkyi yù Sû Garai Gasang eq sêng é mhoqshit é hkyô pé hkat hkangmó yúng nyí sháng gaq, hkyô hkat hkangmó má, jun pé lé, yhangmoq é yhum-sing wui pé é a-ô má nyì mù, yhumsing wui é i-myt ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

¹¹Hkâsu mù gâ le, hkungsô wó é myit myoqbyù hkyô ga é, nga-nhûng é kô myhang é Garai Gasang eq hkyi yù Sû, Yesuq Hkrisduq gi, hpungwup shíngkang eq htoq shit râ hkyô lé lánng nyi é hkûn, ¹²tarâ a hkunggâ é myit eq mingkan myit ô nau é hkyô koi pyám luí, shí ipyat má yhum-sing gùng lé wó hkâng râ, dingmán râ eq, tarâ hkunggâ é hkyô wó cháng shoq, ¹³nga-nhûng lé mhoqshit byi râ matú, Garai Gasâng jeju chyunghuq gi, htoq shit bê nghut mù luí, byù lhunglhâng bang lé hkyi yù hkyô hpóng byi bê nghut ri. ¹⁴Haú Yesuq Hkrisduq gi, agè ashop é hkyô banshoq mai nga-nhûng lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut râ matú wó lhoq sân-yúng yû shoq ga, nga-nhûng é matú Yhânggùng lé ap byí pyám bê nghut ri.

¹⁵Nang lé ó yuq èq le, a wú shôm pyám kó sháng gaq; nàng gi, ahko ahkáng banshoq eq, yhangmoq lé shí hkyô pé mhoqshit nyí aq; myit wum byí é eq, tân mhoqshit é hkyô lé le kut nyí aq.

3

Ge É Muzo Zui Saí Râ Hkyô

¹Nàng gi, lumjîng bang lé, zau wuì eq ahko ahkáng wó bâng é a-ô má nyì mù, jîno gyô nyì râ eq, hkâ-nhám le ge é muzó hkangmó zui saí râ lé hen nyì uchyang, ²ó yuq lé le lù a mù râ; ngingón hkyô hô râ; myit tê byí é hkyô tân shit râ eq; byù banshoq lé nûm é i-myt tân shit nyí kó sháng gaq, lhoq pun lhoq kyîng nyì aq.

³Hkâsu mù gâ le, nga-nhûng le, hí hpyang gi, byù ngok pé, jîno a gyô é bang, mhaú zo huí é bang eq, gungsho ô nau é hkyô eq mingkan ngón hkyô ajung jûng èq jùn kut é hui bang, dut mù luí, agè ashop é eq manon lhûm é hkyô kut nyí mù, rayuq eq rayuq a jú lhûm é đông nyi laí lò bê nghut lhê. ⁴Nghut kôlhâng, nga-nhûng é hkyi yù Sû Garai Gasâng jeju eq chyitdap myit htoq shit é hkûn, ⁵nga-nhûng yhang kut é dingmán é muzó èq a nghut é za, Yhâng é shogyo nhikmyîn é jeju yanmai sheq, Garai Gasang gi, nga-nhûng lé hkyi yù bê nghut ri. ⁶Yhang gi, nga-nhûng é hkyi yù Sû Yesuq Hkrisduq é yanmai, nga-nhûng é ahtoq má agùn agó hut hkyô byí é Chyoiyúng Woi-nyí èq nga-nhûng lé chí san chí sêng pyám byi mù, woi-nyí má dum hku é hui nhâng luí, myit sik htaí byí é hkyô đông nga-nhûng lé hkyi yù bê nghut ri. ⁷Haú mù luí, Yhâng é jeju mai mara hkyut san byí é hui bê nghut é yanmai, ahtum abyuq é asak lé myit myoqbyu nyi é eq rajung za, nga-nhûng gi, silí wunlí wó hkam yu é bang dut lò râ nghut lhê. ⁸Dang shí pé gi, lumjîng é dang nghut lhê mù luí, Garai Gasang lé lumjîng é bang gi, ge é muzó lé myit lòm luí rago zui saí nyì kó sháng gaq, haú hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lhunglhâng bâng é matú ge é eq, akyû bo é hkyô nghut lhê.

⁹Nghut kôlhâng, ana apâ ga luí taí htîng lhûm é hkyô lé le; byùxik labaú gôn é hkyô lé le; nyo byoq lhûm é hkyô lé le; jep é tarâ eq séng mù byoq lhûm é hkyô pé lé le koi pyâm nyì aq, hkâsu mù gâ le, haú pé gi, akyû a bo é hkyô eq chûng a ge é hkyô pé nghut ri. ¹⁰Gam hkuí é myit bò sù lé gi, í dâm mhoqshit wú mù, a wó jáng, yhang lé baú tô pyám aq. ¹¹Haú su kut sù gi, yhang

kut é muzó má mara wó to bê nghut mù,
yhumsing gùng lé yhumsîng mara hun é sù
nghut é lé, nàng sê to lo aq.

Je Htâng Má Pying É Dang

¹²Ngò gi, Nikopoli wà má gyoqmyò lhoq
lhai râ đông myit hpyit tô é yanmai, Artima
lé, a nghut jáng Tuhkiku lé, náng chyáng
nhang kat byi râ, jé eq yhang, nàng gi,
shikut luî, haû wà shut ngá chyáng lé lô
aq. ¹³Nàng gi, tarâ sê é sù Zena eq Apolo
nhik lé, yhangnhik é hkyowuì má râ é hkyô
banshoq, shikut luî garúm kat aq. ¹⁴Nga-
nhûng é byu pé gi, nyí wuî râ é hkyô lé wó
htuq é eq ashi zuî é bang dut kó sháng gaq,
ge é muzó lé myit lòm mù zui saî nyì râ
hkyô lé mhoq yû râ lhê.

¹⁵Ngò eq rahá nyi é bang yuq hkangmò
gi, nang lé shi-kyâm kat akô. Lumjîng hkyô
má ngamoq lé chyitdap é bang lé, bo shi-
kyám byi aq.

Garaî é jeju gi, nungmoq eq rahá joq nyi
sháng gaq ô!

HPILEMON Chyáng Hun Kat é Laiká (Philemon)

¹Hpilemon ê, Hkrisduq Yesuq é yanmai htóng lúng nyi sù, ngò Poluq eq nga-nhông é gumang Timohti nhik gi, ngá-nhik chyitdap é mù wùn luzúm nghut é sù nang lé le, ²ngá-nhik é gu-nhá Ahpiaq lé le, ngá-nhik é sarhé luzúm Arhkipó lé le, náng é yhùm má huí lhum lhum kut é noqkuq hpúng lé le, dang kyô kat lhê.

³Nga-nhông é Îwa Garai Gasang eq Yhumsîng Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyi sháng gaq ô!

Jeju Hkya-ôn É Hkyô Eq Kyûdung Dang

^{4,5}Ngò gi, Yhumsîng Yesuq lé nàng lumjîng é hkyô lé le, sân-yúng bang ban-shoq lé nàng chyitdap é hkyô lé le, wó gyô é yanmai, ngò kyûdung é hkún, nang lé myit bûn nyi luí, hkâ-nhám le ngá é Garai Gasang lé jeju hkya-ôn nyi lhê. ⁶Ngò gi, Hkrisduq é matú nga-nhông chyáng bo tô é ge é mù lhumjup lé sê gyô é hkyô lé, nàng wó yù sháng gaq nghû, náng é lumjîng hkyô lé, nàng saksé hkâm é má akyû htoq râ matú, kyûdung byî nyi lhê. ⁷Náng é chyitdap myit gi, ngo lé gyai gabú nhang é eq wum-o wó yû nhang ri; hkâsu mù gâ le, gumang hpó ê, náng é yanmai, sân-yúng bâng é i-myit má nguingón yuqyo é hkyô wó yû bekô nghut ri.

Onesimu É Matú Tôngbán Byî É Hkyô

⁸Haû su mù, nàng kut gíng é muzó hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haû wó kut nhang lhê nghut kôlhang, chyitdap myit dông za nang lé pying kat lhê. ⁹Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le nghut luí, ¹⁰ngò kyum hut huí nyi é u lé ngá zo dut lo é Onesimu é matú nang lé ngò dông tôngbán kat lhê. ¹¹Yhang gi, hí hpyang náng é matú akyû a bo é nghut kôlhang, ahkuí gi, náng é matú le, ngá é matú le, akyû bò bê nghut ri.

¹²Ngò nhik htông é Onesimu lé náng chyáng dum taû nhang kat lhê. ¹³Haû gabú

danglu é yanmai, ngò htóng lúng nyi é má náng é malaî ngo lé garúm râ matú, yhang lé ngò shuí nyi to naû kôlhang, ¹⁴ngò gi, nàng myit a huí le haî le a kâm kut. Hau é yanmai, ngò, nang lé kut nhang é dông a nghut e za, nàng ô nau é dông kut é san za nghut sháng gaq. ¹⁵Hkâsu mù gâ le, náng chyáng mai yhang rayoq rabun zo gâng nyi é gi, yhang dum taû lò mù hkâ-nhám le nàng eq rahá dum wó nyi nyi râ matú nghut lhê abe. ¹⁶Yhang gi, htông hpyang, jùn rayuq dông a nghut e za, jùn htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byû rayuq dông le, Yhumsîng Yesuq má gumang hpó rayuq dông le, je riyhang chyitdap râ sù dut bê nghut ri.

¹⁷Haû mù luí, nàng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq. ¹⁸Yhang, nang lé rajung jung shut pyâm é nghut le le, chyín dap tô é nghut le le, haû gi, ngá chyáng dap é chyín nghû sôn yù aq. ¹⁹Ngò, Poluq gi, chyín haû xap râ nghû luí, ngá loq eq yhang kê kat kôlhang, nàng yhang lháng, ngo lé asak chyín xap râ sù nghut é lé bûn nham aq. ²⁰Nghut bê, gumang hpó ê, nang é yanmai, haû Yhumsîng má ngò gabú é hkyô wó yu nyi sháng gaq, Hkrisduq má ngá é i-myit lé lhoq ngui lhoq ngón byî é dông, shî, ngò pying kat é dang lé gyo byi laq. ²¹Nàng gi, ngò taî kat é htoq má je lhom kut râ nghut é lé, hkyak za sé luí, ngò kê kat é nghut lhê.

²²Hau htoq agó, ngá é matú nyi râ gok lajang lánq aq. Hkâsu mù gâ le, nungmoq kyûdung byî é yanmai, ngò gi, nungmoq chyáng dum wó jé râ lé myit myoqbyu nyi lhê.

²³Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri. ²⁴Ngá é htuq luq htuq bang nghut é Markuq, Aristakuq, Demaq, Lukaq pé le, nàng lé shi-kyâm kat akô.

²⁵Yhumsîng Yesuq Hkrisduq é jeju gi, nungmoq é woi-nyí eq rahá za ru joq nyi sháng gaq ô!

HEBRE Pê Chyáng Hun Kat é Laiká (Hebrews)

*Garai Yhangzo Gi, Maumang Lagyô Pê Htoq
Je Gyaú É Hkyô*

¹Laí ló bê ipyat pé má, Garai Gasang gi, nga-nhúng é íchýí íwâ pé lé myiqhtoí pé dông alhîng lhîng eq adông dông mai dáng nyo wú bê nghut lhê. ²Nghut kôlháng, ló htâng é buinyì shí pé má, Yhang gi, Yhâng Zo dông mai nga-nhúng lé dang nyô bê nghut ri; Yhang gi, lhunglháng lé sîng sù dut râ matú haú Zo lé masat to mù, Zo dông mai, nyì mí-nyì, joq mijoq lé hpan to bê nghut ri. ³Haú Zo gi, Garai Gasang é hpungwup shingkang duqbó é hkyô eq Yhâng é gunghkyâng isâm roq nghut nyì mù, lhunglháng lé Yhâng é a-tsam byíng é dang eq zú zing tô ri. Yhang gi, yubak mara lé lhoq sân-yúng é hkyô lé ban kut é htâng, mauhkûng htoq má Hkikhkam dik Sù Garai Gasang é loqyo hkyam má zung to bê nghut ri. ⁴Haú mù luí, Yhang gi, maumang lagyô pê é myîng htoq gyaú é myîng lé wó sing yù bê nghut é eq rajung za, yhangmoq htoq je riyhang gyaú sù dut bê nghut ri.

⁵Hkâsu mù gâ le, Garai Gasang gi, "Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê."✠

ga le, dum, "Ngò gi, Yhâng Wa dut râ nghut mù, Yhang gi, Ngá Zo dut râ nghut lhê."✠

ga le, maumang lagyo hká yuq lé hkâ-nhám wá taí wú é nghut lhê lú? ⁶Dum, Garai Gasang gi, Yhâng é zomún lé mingkan shut nhang hâng kat é hkûn,

"Ngá é maumang lagyô pé banshoq gi, Yhang lé noqkuq kó sháng gaq."✠

ga taí ri. ⁷Maumâng pé eq séng luí Garai Gasang taí é má,

"Yhang gi, Yhâng é maumang lagyô pé lé laí su dut nhâng mù, Yhâng é dui-nhâng zoshâng wuì lé, myishâm pé su dut nhang é nghut ri."✠

gâ ri. ⁸Nghut kôlháng, haú Zo eq séng luí, Yhang gi,

"Garai Gasang ê, Náng é hkohkâm-tanghkuq gi, pyat dedu ahtum abyuq gîng nyì mù,

Náng é dingmán hkyô gi, Náng é mingdán lé uphkang é hkyô dut râ nghut lhê.

⁹Nàng gi, dingmán hkyô lé chyitdap bê nghut mù, agè ashop é hkyô lé a ngui byuq lô é nghut lhê.

Haú mù luí, Garai Gasang, náng é Garai Gasang gi, Nang lé, gabú nhang é xú but byí é dông, Náng é luzúm wui htoq je lhoq gyaú to bê nghut ri."✠

ga taí ri. ¹⁰Hau htoq agó, Yhang gi,

"Yhumsîng ê, Nàng gi, a-nham sâng-hi má myidàm é apûn awang lé hi tô é nghut mù,

mauhkûng pé gi, Náng é loqmú chyat nghut ri.

¹¹Haú pé gi, htên byoq byuq râ nghut lhê; nghut kôlháng, nàng gi, ru gîng nyì râ nghut lhê; haú pé banshoq gi, mebu su xau byuq râ nghut lhê.

¹²Nàng gi, haú pé lé, bumó lé su dîng yup râ nghut lhê; Nàng gi, haú pé lé, mebu su htaí pyám râ nghut lhê.

Nghut kôlháng, Nàng gi, rajung za ru gîng nyì râ nghut mù, Náng é zanwut pé gi, hkâ-nhám le htûm râ a nghut."✠

ga le taí ri. ¹³Garai Gasang gi,

"Ngò, náng é gye pé lé, náng é hkyî nang tanghkuq kut pyám byí é hkyíng jé shoq,

Ngá é loqyo hkyam shut zung nyì shi aq."✠
ga maumang lagyo hká yuq lé hkâ-nhám wá taí wú é lú? ¹⁴Maumâng pé banshoq gi, hkyi yù hkyô lé hkam yù râ nghut é bang lé dojaú râ matú, nhang kat huí é mù wùn woi-nyí pé chyat za nghut akô, a nghut kó lú?

2

Sadiq Byí É Hkyô

¹Haú mù luí, nga-nhúng gi, châng nghoq ló byuq é a hui zo sháng gaq, haú nga-nhúng wó gyô yu to bê hkyô lé je riyhang rago châng nyì râ dut lhê. ²Hkâsu mù gâ le, maumang lagyô pê eq taí bê mungdang gi, gîng nyì mù, shut shaí lu laí é hkyô eq

✠ 1:5 Hkya-on 2:7 ✠ 1:5 2 Sam 7:14 ✠ 1:6 Tarâ Pun 32:43 ✠ 1:7 Hkya-on 104:4 ✠ 1:9 Hkya-on 45:6-7
✠ 1:12 Hkya-on 102:25-27 ✠ 1:13 Hkya-on 110:1

jìno a gyô é hkyô hkangmó kut é sù gi, yhumsîng eq gíng é mara dam byî é hui zo kô é nghut le gi, ³ nga-nhúng gi, haû-í yhang gyaú é hkyi yù hkyô lé haî su a ngàm kut é nghut jáng, nga-nhúng hkâsu wó hpang lut râ lú? Hkyi yù hkyô haû gi, haû Yhumsing eq hí taî pyo htoq é nghut mù, Yhâng chyáng mai wó gyô yu é bang gi, haû hkyô têng é lé, ngamoq chyáng saksé shit bekô nghut ri. ⁴ Garai Gasang le, kumlhá pé, mauhpo muzó pé, laklaí kumlhá myo myo eq, Yhang ô nau é eq rajung za Chyoiyúng Woi-nyí chyunghuq pé lé gàm byî é đông mai, haû hkyô lé saksé shit bê nghut ri.

Hkyi Yù Hkyô Hpóng Byi Sù

⁵ Garai Gasang gi, maumang lagyô pé lé, ngamoq taî nyi é jé lô râ mingkan lé, uphkâng nhâng râ a nghut. ⁶ Rayuq yuq mai, rawò má saksé hkâm tô é gi,

"Byù gi, haî wá nghut mù, Nàng, yhang lé bûn nyi lhê lú?

Byu Yhangzo gi, haî wá nghut mù, Nàng, yhang lé wú gôn nyi lhê lú?

⁷ Nàng gi, yhang lé, maumang lagyô pê htoq ratsuí lhoq nyhum to bê nghut ri.

Nàng gi, yhang lé, hpungwup shingkang eq aróng bò nhâng mù,

⁸ jung hkangmó lé, yhâng é hkyiwa ô má tô to bê nghut ri."✠

gâ ri. Jung hkangmó lé yhâng é a-ô má tô to bê gâ é gi, Garai Gasang, haî lháng a myhit to loshoq yhang uphkâng é a-ô má tô to bê nghut é lé gâ lhê. Nghut kôlhang, yhang é a-ô má tô tô é jung hkangmó lé, ahkuî, nga-nhúng a myàng shî é za nghut lhê. ⁹ Nghut kôlhang, nga-nhúng gi, maumang lagyô pê htoq ratsuí zo lhoq nyhûm huí é sù Yesuq lé myang é nghut lhê. Yhang gi, Garai Gasâng jeju mai, yuq hkangmó é matú shî hkám byî é hui zo sháng gaq ga, shî-nò jamjau hkyô lé hkâm zo bê nghut é yanmai, ahkuî, Yhang lé hpungwup shingkang eq aróng bò nhâng bê nghut ri.

¹⁰ Zo wuî myo myo lé hpungwup shingkang wó hkam yù nhâng sháng gaq ga, jung hkangmó lé Yhang é matú chyat eq Yhang đông mai chyat joq nyi nhang é Garai Gasang gi, wuîhke jamjau hui nhang é đông, yhangmoq é hkyi yù Sù lé lhoq

gumjup byi râ matú htuk âng nyi ri. ¹¹ Haû byu pé lé chyoiyúng nhang é Sù eq lhoq chyoiyúng huí é bang gi, ikun ralthum za mã é bang chyat nghut lhê. Haû mù, Yesuq gi, yhangmoq lé, gumang wuî nghû râ lé a hoq é nghut lhê.

¹² "Ngò gi, Náng myîng lé, Ngá gumang wui chyáng taî pyô râ nghut lhê; Ngò gi, shiwa hpông é myoq hí má, Nang lé hkya-on mahkôn hkôn râ nghut lhê."✠

ga, Yhang taî ri. ¹³ Yhang gi,

"Ngò gi, Yhang lé lumhkau nyi râ nghut lhê."✠

ga le dum taî ri. Hau htoq agó,

"Ngò gi, Garai Gasang ngo lé byî é zoshâng wuî eq shî má nyi nyi lhê."✠

ga, Yhang dum taî ri.

¹⁴ Haû zoshâng wuî gi, sui sho eq nghut é yanmai, Yhang le, yhangmoq é xângzo gùng bo hkam yù bê nghut ri. Hau é yanmai, Yhang gi, Yhâng é shî-nò hkyô đông mai, shî-nò hkyô é a-tsam lé zuî zìng é sù nghut é nat Tsadán lé wó lhoq htên pyám râ eq, ¹⁵ yhangmoq é shî-nò hkyô lé gyuq é èq, yhangmoq é asak gón lé jùn đông zuî zìng to huí é bang lé, wó lhoq lhut râ nghut lhê. ¹⁶ Gè gè yhang, Yhang gi, maumang lagyô pé lé garúm é a nghut é za, Abraham é awut ashín pé lé garúm é sheq ru nghut lhê. ¹⁷ Haû nghut é yanmai, Yhang gi, Garai Gasang lé dojaú é má shogyo nhikmyîn é eq lhumzuî é hkyangjong mó wó dut râ eq, byu pê é yubak marâ é matú shîhtá gunglik hkungga wó kut râ matú, hkyô hkangmó má Yhâng é gumang wuî eq dù shoq kut é hui râ dut é nghut lhê. ¹⁸ Yhang gi, gunglaú huí é hkûn, Yhânggùng yhang jamjau hui zo bê nghut é yanmai, gunglaú huí nyi é bang lé wó garúm yu é nghut lhê.

3

Yesuq Gi, Mosheq Htoq Gyaú É Hkyô

¹ Haû mù luí, mauhkûng mai wut yù huí é, chyoiyúng é gumang wuî ê, lagyo eq hkyangjong mó nghû nga-nhúng yín yu é Yesuq é hkyô lé rago myit wú keq. ² Mosheq, Garai Gasâng é yhûm gón má lhumzuî é su, Yesuq le, Yhang lé masat

✠ 2:8 Hkya-on 8:4-6 ✠ 2:12 Hkya-on 22:22 ✠ 2:13 Esai 8:17 ✠ 2:13 Esai 8:18 * 3:2 Bun zo shî eq bun zo 5, 6 lhum mâ é Garai Gasâng é yhûm gâ é gi, Garai Gasâng é byu pé lé gâ é nghut lhê.

yù sù Garai Gasâng chyáng lhumzui sù dut bê nghut ri.*³ Yhûm kut sù gi, yhûm htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri.⁴ Hkâsu mù gâ le, yhûm hkangmó gi, rayuq yuq èq saí é chyat nghut ri. Nghut kôlhang, Garai Gasang gi, jung hkangmó lé saí é sù nghut lhê.⁵ Mosheq gi, Garai Gasâng é yhûm gón má dui-nhâng zoshâng rayuq đông lhumzui mù, Garai Gasang taí râ nghut é lé saksé hkám bê nghut ri.⁶ Nghut kôlhang, Hkrisduq gi, lhumzui é zo rayuq đông Garai Gasâng é yhûm lé up ri. Nga-nhúng kúm gi, nga-nhúng lé wám é myit bò nhang é hkyô eq nga-nhúng gumrong nyi é myoqbyù hkyô lé myhik zing nyi é nghut jáng, Yhâng é yhûm nghut nyi bê.

A Lumjúng Bang Lé Sidiq Byí É Hkyô

⁷Haù mù luí, haù Chyoiyúng Woi-nyí taí é eq rajung za,

"Hkû-nyí, nungmoq gi, Yhâng é danghtê lé wó gyo kô é nghut jáng,⁸ yoso má Yhang lé chyâm kô é u lé, gumlau toq é hkûn nungmoq é îchyí îwâ pé kut kô é su, nungmoq é i-myt lé hkâlhoq htan to kó.

⁹Nungmoq é îchyí îwâ pé gi, myi xê zàn yhang Ngò kut é muzó lé myàng kôle, yoso haù má Ngo lé chyam lik bekô nghut ri.

¹⁰Haù nghut é yanmai, Ngò gi, ipyat haù lé nhikjum yo mù,

'Yhangmoq é myit nhiklum gi, hkâ-nhám le hkyô nghoq byuq akô; yhangmoq gi, ngá é hkyô pé lé a sé kômù nghut ri.' nghû taí é nghut lhê.

¹¹Haù mù, 'Ngá é bánno jowò má yhangmoq hkâ-nhám le wó wâng kó râ a nghut.' nghû, Ngò, nhikjum yô é eq dakâm dang taí bê nghut lhê."✧

gâ ri.

¹²Gumang wui ê, nungmoq mâ é ó yuq le, haù rû dui nyi é Garai Gasâng chyáng mai, lhing taù ló byuq sê é, yubak mara byíng é, a lumjúng é i-myt a bò sháng gaq, sidiq nyi keq.¹³ Nungmoq gi, ó yuq le, yubak marâ é mhaù zô é hkyô èq i-myt lhoq htan pyâm é a hui kó sháng gaq, "hkû-nyí" nghû ru

wó taí nyi nyi gi, nyi wui, rayuq eq rayuq myit wum byí lhûm nyi keq.¹⁴ Nga-nhúng gi, sâng-hi mai wó to bê myit lùm hkyô lé, ló htáng shoq zuí gíng nyi é nghut jáng, Hkrisduq eq chôm zùm yap nyi é bang dut bê nghut ri.¹⁵ Haù gi,

"Hkû-nyí, nungmoq, Yhâng é danghtê lé wó gyô é nghut jáng, gumlau toq é hkûn, nungmoq é îchyí îwâ pé kut kô é su, nungmoq é i-myt lé hkâlhoq htan to kó."✧

ga taí é eq rajung za nghut ri.

¹⁶Wó gyô yù mù, gumlau toq é bang gi, ô pé nghut akô lhú? Haù bang banshoq gi, Egutuq ming mai Mosheq èq shuí htoq lo é bang nghut bum lhê, a nghut kó lhú?¹⁷ Myi xê zàn yhang Garai Gasang lé nhikjum yô nhang é bang gi, ô pé nghut akô lhú? Haù bang gi, mara kut shut mù, yoso má shi leq byuq é bang nghut bum lhê, a nghut kó lhú?¹⁸ Jino a gyô bùm kô é nghut jáng, Yhâng é bánno jowò má yhangmoq hkâ-nhám le wó wâng kó râ a nghut ga, Garai Gasâng èq dakam é bang gi, ô pé nghut akô lhú?¹⁹ Haù mù, yhangmoq a lumjúng kô é yanmai, a wó wâng kô é lé, nga-nhúng myang é nghut lhê.

4

Garai Gasâng É Byu Pê É Matú Bánno Buinyi Đông Nghut É Bánno Jowò

¹Haù nghut mù luí, Garai Gasâng é bánno jowò má wàng râ danggidiq ru gíng nyi ashí nghut é yanmai, nungmoq mâ é ó yuq le, haù má a hkyit hkap é a dut râ matú, nga-nhúng sidiq nyi sháng.² Hkâsu mù gâ le, yhangmoq lé gabú danglù haù hko kyo bê su, ngamoq lé le hko kyo bê nghut lhê; nghut kôlhang, yhangmoq wó gyô é mungdang gi, yhangmoq é matú akyú a bò, haù mù gâ le, haù wó gyô é bang gi, lumjúng myit mai a lhom hap yù kô é yanmai nghut ri.³ Nga-nhúng lumjúng bê bang za, bánno jowò haù má wó wang é nghut lhê. Haù hkyô gi,

"Haù mù, 'Ngá é bánno jowò má yhangmoq hkâ-nhám le wó wâng ko râ a nghut.' nghû, Ngò, nhikjum yô é eq dakâm dang taí bê nghut lhê."✧

ga Garai Gasang taí bê eq rajung za dut é nghut ri. Nghut kôlhang, Yhâng é muzó gi, mau htoq xâng hkun mai ban kut to bê nghut lhê. ⁴Hkâsu mù gâ le, "Garai Gasang gi, nyhit nyí nghû râ buinyì má Yhâng é muzó banshoq mai bánno bê nghut ri." ✧ gâ é dang pé má, haû nyhit nyí nghû râ buinyì eq sêng é hkyô lé rawò má Yhang taí tô ri. ⁵Bánno jowò joq é eq séng luí, Yhang dum taí tô é gi, "Ngá é bánno jowò má yhangmoq hkâ-nhám le wó wâng kó rá a nghut." ✧ gâ ri.

⁶Bánno jowò haú má wàng râ bang ram nyi é danggidiq joq tô ashî nghut ri; hí hkûn, gabú danglù haû wó gyô wú bê bang kúm gi, yhangmoq jino a gyo kô é yanmai, a wàng kô é nghut lhê. ⁷Haû mù luí,

"Hkû-nyí, nungmoq, Yhâng é danghtê lé wó gyo kô é nghut jáng, nungmoq é i-myt lé hkâlhoq htân kó." ✧

gâ é lé, ngò hí lé taí bê eq rajung za, Garai Gasang gi, gyai myáng é htâng má Dawiq dông mai taí é hkûn, "Hkû-nyí" gâ é buinyì ra-nyí dum masat to bê nghut ri. ⁸Hkâsu mù gâ le, yhangmoq lé, Yoshuq èq bánno jowò byi bê ru nghut le gi, Garai Gasang gi, htâng má, gotû buinyì eq séng luí táí rá a nghut lo. ⁹Haû mù luí, Garai Gasâng é byu pé é matú gi, Bánno buinyì dông nghut é bánno jowò ru joq tô ashî nghut lhê. ¹⁰Hkâsu mù gâ le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sù gi, yhumsing é muzó mai bánno râ nghut lhê. ¹¹Haû nghut mù, yhangmoq é jino a gyo hkyo é alik lé cháng mù leqbat é, ó yuq le a bò sháng gaq, nga-nhúng gi, bánno jowò haú má wó wâng shoq, a-tsam bo é í shikut sháng.

¹²Hkâsu mù gâ le, Garai Gasâng é mung-dang gi, rû dui nyi é eq a-tsam bo é nghut lhê. Haû gi, shamsó íshut dap é sham htoq má je htoq é nghut mù, myit nhiklhum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haû gi, nga-nhúng myit é hkyô pé eq myit sôn é hkyô pé lé wó jéyáng é nghut lhê. ¹³Hpan tô é lhunglháng gi, Garai Gasâng é hí mai wó haq pyâm é haí le a joq é nghut lhê. Jung hkangmó gi, nga-nhúng, jihpán

shit ra râ Su é myoq hí má a wó nghop tô é hkyô, de de dut é nghut lhê.

Je Gyaú É Hkyangjong Mó Yesuq

¹⁴Haû mù luí, nga-nhúng gi, Garai Gasâng é Yhangzo Yesuq nghut sù, mauhkûng pê shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê lumjínng hkyô lé ging ging myhik zing nyi sháng. ¹⁵Hkâsu mù gâ le, nga-nhúng gi, nga-nhúng wum nyhôm é hkyô pé lé a sê gyo byi é hkyangjong mó wó é a nghut é za, nga-nhúng su hkyô hkangmó má gunglaú é huí wú kôlhang mara a bo é sù hkyangjong mó lé sheq wó é ru nghut lhê. ¹⁶Haû mù luí, nga-nhúng gi, shogyo nhikmyîn é hkyô wó yû râ eq, nga-nhúng ra châ é u má nga-nhúng le wó garúm râ jeju lé myang hô sháng gaq, hkyak lum é myit mai Garaí jeju tanghkuq shut chyâng htep ê sháng.

5

¹Hkyangjong mó yuq hkangmó gi, byu pê chyáng mai hkyin htoq yû huí é nghut mù, mara pê é matú, chyunghuq pé eq hkungga pé nhông byi hkyô nghut é, Garai Gasang eq sêng é muzó pé má, yhangmoq é gunglik dông, hkyin masat to huí é bang nghut akô. ²Yhânggùng yhang gi, wum nyhóm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é dông wó shuí-û é nghut lhê. ³Wum nyhôm é yanmai, yhang gi, byu pê é marâ é matú le, yhânggùng yhâng é marâ é matú le, hkungga nhông byi râ dut é nghut lhê.

⁴Ó yuq le, yhumsing gùng yhumsing aróng haû lé wó yu é a nghut; Arun lé su, Garai Gasâng èq wut yu é hui jáng sheq wó é nghut lhê. ⁵Haû eq rajung za, Hkrisduq le, hkyangjong mó dut lo é hpungwup shingkang lé, Yhânggùng yhang kut yu é a nghut. Garai Gasang sheq, Yhang lé, "Nàng gi, Ngá Zo nghut ri; Ngò, hkû-nyí Náng Wa dut bê nghut lhê." ✧ ga taí é nghut lhê. ⁶Hau htoq agó, "Nàng gi, Melahkizedek wó é hkyangjong ayá hkyô dông mai ahtum abyuq hkyangjong rayuq nghut nyi ri." ✧ ga, gó wô má le, Yhang taí to ashî nghut ri.

⁷Yesuq gi, myidàm htoq má asak dui nyi é buinyi pé má, Yhang lé, shi é mai wó hkyi yù Su chyáng, ngaubyi ngau-nhap eq wut garú é èq, kyúdung é eq dung tôngbán bê nghut mù, Yhâng é hkungga gíng é ap nóng hkyo é yanmai, gyo byí é hui bê nghut ri. ⁸Yhang gi, Zo rayuq nghut to kôle, Yhang hui zô é wuîhke jamjau hkyô mai jìno gyo hkyô wó mhoq yù bê nghut ri. ⁹Yhang gi, lhoq gumjup huí é hkûn, Yhang é jìno gyo bang banshoq é matú, ahtum abyuq é hkyi yù hkyo é awang dut byuq bê nghut é eq, ¹⁰Melahkizedek wó é hkyangjong ayá hkyô dông mai hkyangjong mó dut rã matú, Garai Gasâng èq hkyin masat é hui bê sù nghut ri.

Woi-nyí Má Wáng Ra Bê Hkyô

¹¹Ngamoq gi, shí hkyô eq séng luí taí rã gyai joq lhê; nghut kôlhang, nungmoq gi, ra luí za a sê gyô é bang nghut kô é yanmai, taí sân kyo wuî ri. ¹²Gè gè ga jáng, ahkui lhê ahkýing má, nungmoq gi, sará dut gíng bê bang nghut lhê; nghut kôlhang, Garai Gasâng é mungdang mâ é tengmán hkyo é awang lé, rayuq yuq èq nungmoq lé dum taú mhoq byi rã ru dut nyi akô nghut ri. Nungmoq gi, htan é zoshuq rã é bang a nghut, naú wíng rã é bang ru nghut nyi ashí kó myhi-nhung! ¹³Naú wíng shuq rã é sù ó yuq le, zonú nghut nyi ashí mù, dingmán é hkyô lé mhoqshit é má a mán shi nghut ri. ¹⁴Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yù shoq, hkâ-nhám le yhumsing gùng yhumsing lhoq mhân yu nyi é, kô dîng bê bâng é matú ru nghut lhê.

6

¹Haú mù luí, nga-nhúng gi, Hkrisduq eq séng é mhoqshit hkyô awang lé tô to mù, myit kô dîng é hkyô shut xoq sô ê sháng. Nga-nhúng gi, shí-nò hkyô shut shuî jé é muzó mai myit lîng hkyo é, Garai Gasang lé lumjîng hkyo é, ²baptisma pé, loq ke byi hkyô, shi é mai dum dui toq hkyô eq ahtum abyuq jéyáng hkyô eq séng é mhoqshit hkyo é, apûn awang dum hí nó a ra lô é nghut lhê. ³Garai Gasang gyô é nghut jáng, nga-nhúng gi, myit kô dîng hkyô shut xoq so rã nghut lhê.

⁴Myoq lhoq bóng é radàm hui bê bang, mauhkûng chyunghuq lé myang hap yù bê bang, haú Chyoiyúng Woi-nyí lé chôm hkam yù bê bang, ⁵Garai Gasâng é mungdâng é gè hkyô eq jé lo nyi é ipyat é a-tsam pé lé myang chyam wú bê bang, ⁶yhangmoq hpuq lhik ló byuq é nghut le gi, hká dông lé myit lîng dum ge wó rã a nghut lo, haí mù gâ le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyám kô é nghut lhê.

⁷Yhâng ahtoq má wo gyûn é mau wuî lé shuq yù mù, yò mù saí bâng é matú akyû bo é hôwa nuqhpýí lhoq htoq byí é maumyî gi, Garai Gasâng é shimân jeju myang hap yu é nghut ri. ⁸Nghut kôlhang, zu gâm eq myoq gàm yuq htoq nhang é maumyî gi, akyû a bò mù, nhîng pyâm é hui zo rã lé chiq rã ri. Haú gi, ló htáng má nyhê hkyô pyâm é hui rã nghut lhê.

⁹Nghut kôlhang, chyitdap é gumang wuî ê, ngamoq gi, haú su nghû taí é nghut kôlhang, nungmoq é hkyi yù hkyô eq séng é je ge é jung pé, nungmoq wó bekô rã nghû hkyak myit lum tô lhê. ¹⁰Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luí garúm nyi é dông, Yhang lé nungmoq chyitdap é myit shit kô é hkyô lé le, a tô-myhí rã nghut lhê.

¹¹Ngamoq gi, nungmoq é i-myt myoqbyù hkyô wó byíng jup rã matú, nungmoq yuq hkgangmó ipyat htum shoq xoq shikut nyi kó rã lé gyai ô nau ri. ¹²Ngamoq gi, nungmoq lagon bang dut byuq rã lé a ô nau é za, Garaî danggidiq byí to bê é lé, lumjîng myit eq myit hîng hkyô dông mai hkam yu é bang su châng kut kó rã lé ô nau é ru nghut lhê.

Garai Gasâng É Danggidiq Gîng Nyi É Hkyô

¹³Garai Gasang gi, Abraham lé danggidiq tô é hkûn, Yhâng htoq gyaú é dakâm myîng lang rã rayuq lhang a nyi é nghut mù, Yhânggùng lé Yhang lang luí dakam é gi, ¹⁴"Ngò gi, nang lé teng yhang shimân byi mù, nang lé awut ashín myo myo byi rã nghut lhê." ✨ gâ ri. ¹⁵Haú mù, Abraham gi, myit hîng hîng lánng yu é htàng má, byí tô é danggidiq lé wó yù bê nghut ri.

¹⁶Byu pé gi, yhangmoq htoq gyaú su é myìng lé lang luí, dakâm kô é eq, yhangmoq dakam é dang lé saksé kut mù, dangrháng é hkyô pé banshoq lé lhoq pân pyâm akô nghut ri. ¹⁷Garai Gasang gi, Yhang myit hpyit tô é hkâ-nhám le a htaí lhik é hkyô lé, danggidiq byí tô é lé hkam yù râ bâng chyáng san za shit nau ri; haú mù luí, dakâm dang eq lhoq gîng to bê nghut ri. ¹⁸Garai Gasang gi, mhaú a ge é yanmai, hkâ-nhám le a htaí lhik é hkyô í hkat nghut é danggidiq eq dakâm dang joq é nghut mù, Yhang haú su kut é gi, nga-nhûng hí má tô to byí é myit myoqbyù hkyô lé myhik zîng râ matú gaú é jowò shut hpang wàng bê bang nga-nhûng lé wum mó byí é dut râ matú nghut lhê. ¹⁹Nga-nhûng gi, myit nhiklhûm é shamtoq goknghe dông myit myoqbyù hkyô haú lé wó é nghut mù, haú gi, gîngtîng é eq gaú é hkyô nghut ri. Myit myoqbyù hkyô haú gi, mauhkûng noqkuq yhûm mâ é pân-gyang ahkaú mâ é sân-yúng gok má jé wang é nghut ri. ²⁰Jowò haú gi, nga-nhûng é akyu é matú, nga-nhûng é hí má wàng byí é sù Yesuq wang jé é jowò nghut ri. Yhang gi, Melahkizedek wó é hkyangjong ayá hkyô dông mai, ahtum abyuq é hkyangjong mó dut bê nghut ri.

7

Hkyangjong Melahkizedek É Hkyô

¹Melahkizedek gi, Salem myuq é hkohkâm eq Myhang Htâng é Garai Gasâng é hkyangjong nghut ri. Yhang gi, hkohkâm pé lé sat ûng pyám luí dum taú lo é Abraham lé hui mù, shimân byi bê nghut ri. ²Haú mù, Abraham gi, wó lo é jung hkangmó mâ é, xê gambùm mâ é ragambùm, yhang lé byi bê nghut ri. Sâng-hi lhê é Melahkizedek é myìng lichyúm gi, "dingmán hkyo é hkohkâm" gâ é nghut mù, htâng lhê é "Salem é hkohkâm" gâ é gi, "nuingón hkyo é hkohkâm" gâ é nghut lhê. ³Yhâng é înu îwa é hkyô eq byùxik labaú le, hi é buinyì eq asak htûm é hkyô le a kê to nghut ri. Yhang gi, Garai Gasâng é Yhangzo su, ahtum abyuq hkyangjong ru nghut nyi ri.

⁴Yhang hkâ-í hkik lhê nghû é lé, myit wú keq. Haú îchyí îwa Abraham lháng gi, wó lo é mâ é xê gambùm mâ é ragambùm, yhang lé byi ri-nhung! ⁵Hkyangjong dut

bang Lewiq é awut ashîn pé gi, yhangmoq é gumang wuì, Abraham mai nyi gyó lo é bang nghut kôle, tarâ má bo é eq rajung za, haú bâng chyáng mai xê gambùm mâ é ragambùm lé hkyui yù râ dut é bang nghut akô. ⁶Nghut kôlhâng, Melahkizedek gi, Lewiq mai gyó lo é amyû a nghut kôle, danggidiq pé wó to sù nghut é Abraham chyáng mai xê gambùm mâ é ragambùm hap yù mù, shimân byí ri. ⁷Shimân byi sù gi, shimân byí é lé hkam yù sù htoq je gyaú sù nghut é lé, ó yuq le úng-áng râ hkyô a joq é nghut lhê. ⁸Hkyangjong pé eq séng luí ga jang, shi byuq sê é byu èq, xê gambùm mâ é ragambùm lé hkyui yu é nghut lhê; nghut kôlhâng, Melahkizedek eq séng luí nghut jáng, asak dui nyi é ga taí pyô byí é hui su èq hkyui yu é nghut lhê. ⁹Xê gambùm mâ é ragambùm hkyui yù sù, Lewiq lháng gi, Abraham dông mai xê gambùm mâ é ragambùm byi bê nghû wó taí ri. ¹⁰Haú mù gâ le, Melahkizedek gi, Abraham lé hui é hkûn, Lewiq gi, yhâng é îchyí îké é gungdu hkaú má ru bo tô ashî nghut ri.

Melahkizedek Eq Dù É Yesuq

¹¹Haú Lewiq hkyangjong amyû pé é ipyat má, byu pé gi, jep é tarâ lé wó yu bùm kô é nghut mù, hkyangjong ayá haú mai gumjup hkyô wó yù kô é nghut le gi, haú mù luí, Arun wó é hkyangjong ayá hkyo dông a nghut é za, Melahkizedek wó é hkyangjong ayá hkyo dông lo é sù gotû hkyangjong rayuq ra shirâ lhú? ¹²Hkâsu mù gâ le, hkyangjong amyû htaí é hkûn gi, tarâ le htaí yhang htaí râ dut é nghut lhê. ¹³Haú su nghû taí é hkyô pé eq séng é Sù gi, gotû byuhú mâ é sù nghut mù, byuhú haú mai gi, ó yuq le hkungga gyap má dojaú wú é a nghut. ¹⁴Hkâsu mù gâ le, nga-nhûng é Yhumsîng gi, Yudaq byuhú mai gyó lo é awut ashîn nghut é hkyô, san za nghut nyi ri. Mosheq kúm gi, byuhú haú eq séng é hkyô má, hkyangjong pé eq séng luí haú lé a taí é nghut lhê. ¹⁵Melahkizedek eq dù é gotû hkyangjong rayuq pô htoq bê nghû, ngamoq taí bê hkyô gi, je riyhang san za dut bê nghut ri. ¹⁶Yhang gi, îwa rayuq é awut ashîn pé nghut râ lhê gâ é tarâ dông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê. ¹⁷Hkâsu mù gâ le,

"Nàng gi, Melahkizedek wó é hkyangjong ayá hkyô đông mai, ahtum abyuq hkyangjong rayuq nghut nyi ri."✠
ga Yhang eq séng luí taí pyo tô é nghut lhê.

¹⁸ Haû hí lhê é cháng râ tarâ gi, wum nyhôm é eq akyû a bo é yanmai, tô pyám bê nghut lhê. ¹⁹ Hkâsu mù gâ le, haû jep é tarâ gi, gumjup hkyô haí a wó kut byí é nghut lhê. Haû mù, je ge é myit myoqbyù hkyô lajang byí é nghut luí, nga-nhúng gi, myit myoqbyù hkyô haû mai Garai Gasâng chyáng wó chyâng htep ê é nghut lhê.

²⁰ Myit myoqbyù hkyô haû gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjông pé wó dut bekô nghut ri. ²¹ Nghut kôlhang, Yesuq kúm gi,

"Nàng gi, ahtum abyuq hkyangjong rayuq nghut lhê."

ga haû Yhumsîng dakâm bê nghut mù, Yhang myit é hkyô htaí râ a nghut."✠

ga, Yhang eq séng luí Garai Gasang taí é hkûn, dakâm dang haû mai hkyangjong rayuq dut bê nghut ri. ²² Dakâm dang hau é yanmai, Yesuq gi, je ge é dangshikaq é pahkám wò yù sù dut bê nghut ri.

²³ Hkyangjông pé myo myo nyi râ dut é gi, yhangmoq é muzó a wó xoq zui shoq shi byuq hkyô èq hkûm zing pyám kô é yanmai nghut ri. ²⁴ Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zúí nyí râ nghut lhê. ²⁵ Haû mù luí, Yhang gi, Yhang đông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haû mù gâ le, Yhang gi, yhangmoq é matú dúng tôngbán byi nyi râ matú, rû dui nyi é sù nghut lhê.

²⁶ Yesuq gi, chyoyúng é sù, mara hûn râ hkyô a bo é sù, sân-yúng é sù, yubak dap bang eq rahá a nghut shoq gotû san kut huí é sù, mauhkûng pê ahtoq má lhoq toq lhoq gyaú yu huí é sù nghut ri. Haû sù é hkyangjong mó gi, nga-nhúng râ é lé lajang byi râ htuk ang ri. ²⁷ Nyí nyí bui bui, yhumsîng é marâ é matú hí hkungga nhông byi mù, byu pê é mara matú le hkungga nhông byí é gotû hkyangjong mó pé su, Yhang gi, a kut râ é sù nghut lhê. Yhang

gi, Yhânggùng lé Yhang nhông byí é hkûn, yhangmoq é yubak marâ é matú banshoq radàm za hkungga nhông byi pyám bê nghut ri. ²⁸ Hkâsu mù gâ le, haû jep é tarâ gi, wum nyhôm é byu pé lé hkyangjong mó pé đông masat é nghut ri. Nghut kôlhang, Garai Gasang gi, haû jep é tarâ é htâng má lé jé é dakâm dâng èq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

8

Dangshikaq Asik É Hkyangjong Mó Yesuq

¹ Ngamoq taí nyi é dangkàng gi, shí đông nghut lhê: Nga-nhúng gi, haû sù é hkyangjong mó lé wó é bang nghut lhê. Yhang gi, mauhkûng htoq má, Hkikhkam dik Sû Garaí é hkohkâm-tanghkuq é loqyò hkyam shut zùng to mù, ² byu èq saí é a nghut é za, haû Yhumsîng èq saí é saksé zúm akying hkaû mã é, sân-yúng dik gok má dojaú é sù nghut ri.

³ Hkyangjong mó hkanmó gi, chyunghuq pé eq hkungga pé lé nhông byi râ matú wò hun to huí é chyat nghut lhê. Haû mù luí, hkyangjong mó shí yuq le, rajung jung nhông byi ra râ nghut lhê. ⁴ Yhang gi, mingkan htoq má nyi tô é ru nghut le gi, hkyangjong dut râ a nghut; hkâsu mù gâ le, jep é tarâ đông ga jang, chyunghuq nhông jaú é byu pé nyi to gù bê nghut lhê. ⁵ Yhangmoq, sân-yúng dik gok má dojaú é hkyô gi, mauhkûng htoq má joq é azòng eq wupzo đông nghut ri. Haû nghut é yanmai, Mosheq gi, saksé zúm saí râ nghut é hkûn, "Nang lé, bùm má tûn shit é azòng eq rajung za jung hkanmó wó saí shoq kut aq."✠ ga sidiq byi huí é nghut lhê. ⁶ Nghut kôlhang, Yesuq, gyoro sô xoq byí é dangshikaq gi, axaû lhùm htoq má je gyaú é eq rajung za Yhang hap yu tô é dojaú hkyô gi, yhangmoq é dojaú hkyo htoq má je gyaú é nghut lhê. Haû mù, dangshikaq haû gi, je ge é danggidiq pê htoq má awang hi tô é nghut lhê.

⁷ Hkâsu mù gâ le, sân-hi lhê é dangshikaq má râ é hkyô haí a bo é ru nghut le gi, gotû ra râ a nghut lo. ⁸ Nghut kôlhang, Garai Gasang gi, byu pê chyáng mara bo é myàng mù, taí é gi,

"Haû Israelaq é yhumbyù wuì eq le, Yudaq é yhumbyù wuì eq le, Ngò, dangshikaq asik to râ ahkyíng jé lo nyi ri ga haû Yhumsíng taí pyo ri.

⁹ Haû gi, Ngò, yhangmoq é îchyí îwâ pé lé loq eq zui mù, Egutuq ming mai shuî htoq lo é hkûn, yhangmoq eq tô tô é dangshikaq su dut râ a nghut.

Haî mù gâ le, yhangmoq gi, Ngá é dangshikaq lé a xoq cháng kô é nghut mù,

Ngò gi, yhangmoq chyáng mai lhing ló byuq é nghut lhê ga haû Yhumsing taí pyo ri.

¹⁰ Shî gi, ahkyíng haû laí é htâng má, Israelaq é yhumbyù wuì eq Ngò to râ nghut é dangshikaq nghut lhê ga haû Yhumsíng taí pyo ri.

Ngò gi, Ngá é tarâ pé lé, yhangmoq é i-myt má kat byi mù, yhangmoq é myit nhiklum má kâ to byi râ nghut lhê.

Ngò gi, yhangmoq é Garai Gasang nghut mù, yhangmoq gi, Ngá é byu pé dut kó râ nghut lhê.

¹¹ 'Haû Yhumsíng lé sé keq.' ga, yhang é gumang hpó lé nghut nghut, yhang é chyangnâm mâ é sù lé nghut nghut, mhoqshit é byù nyi râ a nghut lo,

haî mù gâ lé, yhangmoq lhunglhâng bang gi, tiq htáng sù mai kô htáng sù jé shoq Ngo lé sé kó râ nghut lhê.

¹² Hkâsu mù gâ le, Ngò gi, yhangmoq é agè ashop hkyô lé mara hkyut pyám byi mù, yhangmoq é mara pé lé dum a bun byi lo râ nghut lhê. "✧

gâ ri.

¹³ Dangshikaq haû lé, Yhang "asik" gâ é gi, sâng-hî lhum lé, axau kut pyâm é nghut ri; xau ló byuq é haî le, hkâ-myháng a myáng má byuq ló byuq râ nghut lhê.

9

Myidàm Saksé Zúm Má Noqkuq É Hkyô

¹ Sâng-hi lhê é dangshikaq gi, noqkuq râ htungtarâ pé eq noqkuq râ myidàm sâng-yúng dik gok bo é nghut ri. ² Saî tô é saksé zúm é sâng-hi gok má gi, haû myibung tsung jang, siboí eq haû nhông byî é muk

✧ 8:12 Yer 31:31-34

* 9:5 Hkerubim gâ é gi, byù su su, dusak su su dut é, dùng dap é maumang lagyo rahú nghut lhê.

joq mù, haû gok lé gi, Chyoiyúng Jowò ga myhîng ri. ³ Í dang nghû râ gok pâng-gyang é ahkaû mâ é gok lé gi, Chyoiyúng Htâng é Jowò gâ é nghut lhê. ⁴ Gok haû má gi, namngón jung nyhê é hîng hkungga gyap eq hîng shup dangshikaq sidek joq ri. Dangshikaq sidek haû má gi, mannaq muk bo é hîng yam, ahaq nyún tô é, Arun é dumbáng eq, dangshikaq luqlong pé bo tô ri. ⁵ Dangshikaq sidek é ahtoq má gi, shîhtaí gunglik hkungga byi jang htoq má wup tô é, Hpungwup shingkang bò Sû é hkerubim* pé joq tô ri. Nghut kôlhâng, ngamoq gi, ahkaû haû pé lé jihkúm nuqguq a wó taí san kyo é nghut lhê.

⁶ Haû dông jung hkangmó ban lajang tô é hkûn, hkyangjông pé gi, ayang sâng-hi gok má wàng mù, yhangmoq é dojaú muzó lé wùn waq bekô nghut ri. ⁷ Nghut kôlhâng, ahkaû gok má gi, hkyangjong mó za, yhanggùng é matú le, a sê é za byu pé kut shut é marâ é matú le, nhông byi râ sui chûng mù, razàn má radàm za wang é nghut lhê. ⁸ Haû Chyoiyúng Woi-nyí gi, haû pé dông mai, sâng-hi é saksé zúm ru joq nyi nyi, haû Chyoiyúng Htâng é Jowò wàng hkyô a hpông shit shi é lé, tân shit nyi ri. ⁹ Haû gi, ipyat shi é matú tân shit é azông nghut mù, nhông byî é chyunghuq pé eq shigu hkungga pé gi, dojaú sù é i-myt lé a wó lhoq sâng-yúng byî é hkyô lé taí nau é nghut lhê. ¹⁰ Haû pé gi, zojung, shuqjung eq chî san chî séng hking ahú hú eq za sêng é nghut mù, htungli asik, lé joq é ahkyíng jé shoq za tô tô é gungsho eq sêng é tarâ pé nghut ri.

Hkrisduq É Sui

¹¹ Hkrisduq gi, shî má joq to gù nghut é gè hkyô pé é hkyangjong mó dông lé jé é hkûn, hpan tô é má a lom nghû nau é, byu eq saî é a nghut é, je kô é eq je gumjup é saksé zúm mai wang lai bê nghut lhê. ¹² Yhang gi, Chyoiyúng Htâng é Jowò má wang é hkûn, bainám eq nojùng zo pé é sui lé chûng mù wang é a nghut é za, Yhâng é suí eq yhang banshoq é matú radàm za ahtum abyuq é hkyi yù hkyô wó yù bê nghut ri. ¹³ Htungli dông agot a-û dut é bang lé lhoq sâng-yúng

râ matú, bainám eq nohtó zo pê é sui eq no-pyâ é myi-mhop lé, yhangmoq é ahtoq má hpyun gyun é hkûn, yhangmoq gi, ahtoq gungsho pyâm wó lhoq sansêng é hui kô é nghut lhê. ¹⁴ Haû nghut jáng, Garai Gasâng é hí má ra a bo é Yhânggùng lé, ahtum abyuq é Woi-nyí dông mai nhông byî é Hkrisduq é sui gi, rû dui nyi é Garai Gasang lé nga-nhúng wó dojaú sháng gaq ga, shi é hkyô shut shuí jé é nyi yap sâmlai mai nga-nhúng é myit sôn sê é hkyô lé, je riyhang wó lhoq sanséng yu ri-nhung mhaî!

¹⁵ Haû nghut é yanmai, Hkrisduq gi, danggidiq byi tô é ahtum abyuq é muizè lé, ji yù huí é bang wó hap yù kó sháng gaq ga, dangshikaq asik é gyoro sô xoq byi sù nghut nyi ri. Haû su wó kut é gi, sâng-hi lhê é dangshikaq ahkaû má mara kut shut é bang lé lhoq lhut yû râ matú, yubak chyîn xap zê ralhum dông, Yhang shî hkâm byi yanmai nghut ri.

¹⁶ Madat dang eq séng luí ga jang, madat dang tá sù haû shî bê hkyô saksé shit râ lhê. ¹⁷ Haî mù gà le, madat dang gi, rayuq yuq shî jáng za sheq lichyúm htoq é nghut lhê. Madat dang tá sù rû dui nyi nyi, haû gi, hkâ-nhám le lichyúm htoq râ a nghut.

¹⁸ Haû nghut é yanmai, sâng-hi lhê é dangshikaq lháng gi, sui a bo lòm jáng lichyúm a htoq é nghut lhê. ¹⁹ Mosheq gi, haû jep é tarâ má bo é hkunmó hkangmó lé, shiwa byù banshoq bang lé ban taí pyo é hkûn, zam zam ne é saumaú eq jàm kyâng lé yù mù, nojúng zô é sui eq bainám sui eq wuì nyhò tô é lé, chyúmding má le, shiwa byù banshoq bang lé le, hpyun gyûn é nghut ri. ²⁰ Yhang gi, "Sui shî gi, nungmoq cháng râ matú, Garai Gasang, hkunmó hkyô to bê nghut é, dangshikaq tô tô é sui nghut lhê." ✱ ga taí ri. ²¹ Yhang gi, saksé zúm eq dojaú é má chung é zè pé má le, haû eq rajung za sui haû hpyûn gyûn ri. ²² Gè gè gi, haû jep é tarâ má bo é dông ga jang, azíng zê aluq banshoq gi, suí eq lhoq sân-yúng é hui râ dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Haû mù, mauhkúng zè pê é azông pé gi, hkungga haú pê eq lhoq sân-yúng é hui râ é nghut lhê. Nghut kôlhang, mauhkúng zè pé yhang gi, haú pê htoq je ge é hkungga pê eq lhoq sân-yúng é hui râ dut é nghut

lhê. ²⁴ Hkâsu mù gà le, akying lhùm é azông za nghut é, byu eq saí é chyoiyúng dik é jowò má Hkrisduq wang é a nghut é za, Yhang gi, mauhkúng má yhang wang é nghut mù, ahkuí gi, nga-nhúng é matú Garai Gasâng é hí má bo yap byî nyi é nghut lhê. ²⁵ Yhang gi, haû hkyangjong mó mai yhumsîng é sui a nghut é sui lé chùng mù, Chyoiyúng Htâng é Jowò má zàn wuì wàng luí kut é su, yhânggùng lé dum nhông byi byi kut râ matú mauhkúng má wang é le a nghut. ²⁶ Haú dông ru nghut le gi, Hkrisduq gi, mau htoq xâng hkûn mai shî hkâm é adàm myo myo nghut berâ nghut lhê. Nghut kôlhang, ahkuí, Yhang gi, yubak mara huí sêng pyâm byi râ matú, yhânggùng lé hkungga nhông byi râ ga ipyat pé ló htâng ló nyi é má, banshoq é matú radàm za htoq shit bê nghut ri. ²⁷ Byù gi, radá za shî râ nghut mù, hau htâng má tarâ jéyáng é hui râ nghut é eq rajung za, ²⁸ Hkrisduq gi, byù myo myô é yubak mara lé yu pyâm byi râ matú, radá za hkungga nhông é hui bê nghut ri. Haû mù, Yhang gi, yubak mara wun pyâm byi râ a nghut lo é za, Yhang lé lán nyi é bang lé hkyi yù hkyô yu lé byi râ matú, htâng má í dâm nghû râ dàm htoq shit râ nghut lhê.

10

Hkrisduq É Gùng Lé, Banshoq É Matú Radàm Za Nhông Byî É Hkyô

¹ Haû jep é tarâ gi, jé lô râ nghut é gè hkyô pê é akyîng a nghut é za, wupzo za nghut ri. Haû nghut é yanmai, jep é tarâ gi, zàn wuì ru nhông byi byi kut nyi é eq rajung zâ é shigu hkungga pé dông mai, noqkuq râ matú chyâng lé é bang lé hkâ-nhám lé wó lhoq gumjup é a nghut. ² Tarâ haû wó lhoq gumjup byî é ru nghut le gi, yhangmoq nhông byî é hkyô nô pyâm kó râ a nghut lí? Hkâsu mù gà le, haû noqkuq é bang gi, banshoq é matú radàm za lhoq sanséng huí é nghut jáng, yhangmoq é yubak marâ é matú, hkâ-nhám le mara a bò bun lo kó râ nghut lhê. ³ Nghut kôlhang, shigu hkungga haú pé gi, zàn wuì yubak mara pé lé lhoq pun byî é zè nghut ri. ⁴ Haî mù gà le, nohtó pé eq bainám pê é sui gi, yubak mara lé huí sêng pyâm é hkyô wó dut é a nghut.

✱ 9:20 Htoq Ló 24:8

⁵Haù mù luí, Hkrisduq, mingkan má lé jé é hkûn, Yhang taí é gi,

"Shigu hkungga eq hkungga lé Nàng a o é nghut mù,

Nàng kúm gi, Ngá é matú gungdu hen to byi bê nghut ri.

⁶Myi nyhé hkungga pé eq mara hkyut hkungga pé gi, Nang lé gabú nhang é a nghut.

⁷Hau htâng, Ngò gi, 'Garai Gasang ê, Ngò eq séng luí chyúmding má kê tô é eq rajung za,

Nàng ô nau é hkyô kut râ matú, Ngò, shí má nyi lhê.' nghû taí é."☆

gâ ri. ⁸Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haú pé lé Nàng a gabú é nghut lhê." ga taí ri. Haù jep é tarâ dông haú pé lé kut râ dut kôlhang taí é nghut ri. ⁹Hau htâng má, Yhang gi, "Nàng ô nau é hkyô kut râ matú, Ngò, shí má nyi lhê." ga taí ri. Haù gi, Yhang, htang lhum dangshikaq lé htaí masat to râ matú, sâng-hi lhum lé tô pyâm é nghut ri. ¹⁰Myit ô nau hkyô hau é yanmai, Yesuq Hkrisduq, Yhâng é gungdu lé hkungga dông banshoq é matú radàm za nhông byi é dông mai, nga-nhúng gi, lhoq chyoyúng é hui bê nghut ri. ¹¹Hkyangjong hkanmó gi, nyí nyí bui bui, yap mù, yhâng é hkyangjong muzó lé zui saí é nghut lhê. Yhang gi, yubak mara lé hkâ-nhám lhang a wó huí séng pyâm byí é, rajung zâ é shigu hkungga lé, dum nhông byi byi kut é nghut lhê.

¹²Nghut kôlhang, hkyangjong mó nghut é Hkrisduq gi, yubak mara hkyut byi râ hkungga ralhú lé za, ahkyíng banshoq é matú ban nhông byí é hkûn jáng, Garai Gasâng é loqyo hkyam shut zung to bê nghut ri. ¹³Haù hkûn mai, Yhang gi, Yhâng é gye pé lé, Yhâng é hkyí nang jang kut byi râ lé lánng nyi é nghut ri. ¹⁴Haí mù gâ le, Yhang gi, lhoq chyoyúng é huí nyi bang lé, hkungga ralhú eq za, pyat dedú é matú lhoq gumjup byi bê nghut ri.

¹⁵Haù Chyoyúng Woi-nyí le, haú hkyô eq séng luí nga-nhúng lé saksé hkâm kyô ri. Sâng-hi má, Yhang taí é gi,

¹⁶"Haù Yhumsíng taí ri, shí gi, ahkyíng haù laí htâng má, Ngò, yhangmoq eq to râ dangshikaq nghut lhê.

Ngò gi, Ngá é tarâ pé lé, yhangmoq é myit nhiklhum hkaù má kat byi mù, yhangmoq é i-myt má kê to byi râ nghut lhê."☆

gâ ri. ¹⁷Hau htâng, Yhang taí jat é gi,

"Ngò gi, yhangmoq é yubak mara pé eq tarâ a chung é muzó pé lé, bûn lô râ a nghut."☆

gâ ri. ¹⁸Haù mù, mara haú pé lé hkyut pyâm byi bê nghut jáng, yubak marâ é matú hai hkungga le a ra lo nghut ri.

Hkam Jan Râ Hkyô

¹⁹Haù mù luí, gumang wui ê, nga-nhúng gi, Yesuq é suí èq, haù Chyoyúng Htâng é Jowò má wàng râ matú hkyak wó lum to bê nghut lhê. ²⁰Haù gi, Yesuq é gungdu nghut é pán-gyang dông mai, nga-nhúng é matú hpóng byi bê nghut é asik eq rû dui nyi é hkyô nghut lhê. ²¹Haù nghut é yanmai le, Garai Gasâng é yhúm lé up é gyaú é hkyangjong lé nga-nhúng wó é yanmai le, ²²nga-nhúng gi, gingtíng é lumjíng hkyô mai sanséng é i-myt èq, Garai Gasâng chyáng ê mù, mara bò bûn é myit sôn sê é hkyô mai, nga-nhúng lé lhoq sanséng râ matú nga-nhúng é i-myt lé hpyun gyûn é hui nhâng luí, nga-nhúng é gungdu gi, sân-yúng wui èq chí byí é hui yù sháng. ²³Nga-nhúng gi, nga-nhúng yín yu é myit myoqbyù hkyô lé zuí gingtíng nyi sháng; hkâsu mù gâ le, danggidiq byí to bê Sû gi, lhumzui Sû nghut lhê. ²⁴Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaù toq byí lhum râ hkyô lé, dat myit nyi sháng. ²⁵Chôm huí zup lhúm nyi é hkyô lé, ra-am lhaq tô pyâm nyi kê é su, nga-nhúng gi, a tô pyâm é za, haù Buinyi chyâng lò bê nghut é lé nungmoq sê é eq rajung za, rayuq eq rayuq je riyhang myit wum byí lhúm nyi sháng.

²⁶Nga-nhúng gi, tengmán hkyô lé sê yu é htâng má, shi-ngé ngé mara dum kut shut kut é nghut jáng, mara hkyut byi râ hkungga a joq lo. ²⁷Tarâ jéyáng hkyô eq Garai Gasâng é gye pé lé nyhê hkyô pyâm râ nghut é nhikmo-yô é myi lé za, gyuq chiq myit mai lánng nyi râ dut bê nghut

lhê. ²⁸ Mosheq é tarâ lé he-ngik é sù ó yuq le, saksé í sum yuq é dang é yanmai, shogyo nhikmyin a huí é za sat pyâm é hui bê nghut lhê. ²⁹ Haû jáng, Garai Gasâng é Yhangzo lé hkyiwa ô má nâng pyeq bê sù, yhumsîng lé lhoq sân-yúng byi bê nghut é dangshikaq é sui lé a chyoiyúng é zè dông kut pyâm bê sù eq, jeju byî é Woi-nyí lé rhoi é sù gi, hkâ-í yhang gyaú é mara dam byî é hui gîng râ nghut lhê nghû, nungmoq wó myit akô lúú? ³⁰ Hkâsu mù gâ le, "Lató hpuq râ gi, Ngò ru nghut lhê; Ngò lató hpuq râ." ✨ ga le, "Haû Yhumsîng gi, Yhâng é byu pé lé tarâ jéyáng râ nghut lhê." ✨ ga le, taí é Sù lé, nga-nhúng sê lhê. ³¹ Haû rû dui nyí sù Garai Gasâng é loq hkaû má byit gyó wang é gi, gyuq chiq jung yhang nghut ri.

³² Nungmoq, haû maubó lé hap yu é* htâng, wuîhke jamjau huí é má gyai yhang shikut kôluí wó jân pyâm bê nghut é, hí lhê buinyí pé lé myit bun keq. ³³ Ra-u u má, nungmoq gi, byu pê hí má de de rhoi shit é eq zing-rî é hui zo bekô nghut ri; ra-u u má, nungmoq gi, haû su hui zo bang eq rahá bo hui zo bekô nghut ri. ³⁴ Nungmoq yhang, je ge é eq ru gîng nyí é zè pé wó é lé sé kô é yanmai, nungmoq gi, htông lúng bang lé shogyo nhikmyin bekô eq, nungmoq é sutzè pé lé sing yu pyâm byî é bang lé, gabú myit eq jân pyâm bekô nghut ri.

³⁵ Haû mù luí, nungmoq é hkyak myit lum tô é hkyô lé hkâdú pyâm kó; agùn agó chyunghuq shigyaú é hui kó râ nghut lhê.

³⁶ Nungmoq gi, Garai Gasâng é ô nàu hkyô lé kut é hkûn, Yhâng danggidiq byî tô é lé wó hap yù râ matú, nungmoq hkam jan râ dut é nghut lhê. ³⁷ Hkâsu mù gâ le, razup zo nghut jáng,

"Haû lé lô râ Sù gi, jé lé râ nghut mù, ahkyíng lhoq myáng râ a nghut.

³⁸ Nghut kôlhang, Ngá é dingmán sù gi, lumjîng myit mai asak duí râ nghut lhê.

Yhang nungzut zut é nghut le gi, Ngò, Yhang lé myit nguì râ a nghut." ✨ ga tô ri. ³⁹ Nghut kôlhang, nga-nhúng gi, nungzut zut mù htên byoq huí é bang a nghut é za, lumjîng mù hkyi yù huí é bang ru nghut lhê.

11

Lumjîng Myit Mai

¹ Lumjîng myit nghu é gi, nga-nhúng myit myoqbyu tô é lé hkyak wó râ nghu é eq nga-nhúng a myàng shî é lé joq lhê nghû hkyak sê é hkyô nghut lhê. ² A-nham lhê bang gi, lumjîng myit haû mai Garaí èq owaq é hui kô é nghut lhê.

³ Lumjîng myit mai, nga-nhúng gi, nyí mi-nyí, joq mijoq lhunglhang lé Garai Gasâng é hkunmó èq hpan tô é hkyô sê gyô é nghut lhê. Haû mù, myoq èq wó myang é pé gi, byu-myang é pé mai saí htoq tô é a nghut.

⁴ Lumjîng myit mai, Abelaq gi, Ka-in kut é htoq je ge é hkungga, Garai Gasang lé nhông byí é nghut ri. Lumjîng myit mai, yhang gi, yhâng é hkungga eq séng luí Garai Gasang hkya-ôn é hkûn, dingmán sù rayuq dông owaq é hui bê nghut ri. Haû mù, lumjîng myit mai, yhang gi, shi byuq bê nghut kôlhang, dang rû nyo nyi ashî nghut lhê.

⁵ Lumjîng myit mai, Enuq gi, shi é a hui zo shoq, asak shî mai mauhkûng shut shuî yu é hui bê. Yhang lé, Garai Gasang shuî ló byuq bê nghut é yanmai, yhang lé a wó myâng lo nghut ri. Hkâsu mù gâ le, yhang gi, shuî yu é a hui shî é hí má, Garai Gasang lé nguì nhâng sù rayuq dông owaq é hui sù nghut ri. ⁶ Lumjîng myit a bo é nghut le gi, Garai Gasang lé a wó nguì nhang é nghut lhê. Haû mù gâ le, Yhâng chyáng shikut luí lé jé é sù gi, Yhang nyí é hkyô lé le, lhumzui myit mai Yhang lé hô bang lé, Yhâng èq shigyaú é lé le, lumjîng râ dut é nghut lhê.

⁷ Lumjîng myit mai, Noaq gi, a myang wú shî é hkyô pé eq séng luí sidiq byi huí é hkûn, yhâng é yhumbyù wuì lé hkyî râ matú, gyuq hkunggâ é dông mai wuì-sanghpo saí bê nghut ri. Yhâng é lumjîng myit mai, mingkan lé mara byî é nghut mù, lumjîng myit mai lo é dingmán hkýo é jeju lé hkam yù sù dut bê nghut ri.

⁸ Lumjîng myit mai, Abraham gi, yhâng é muizè dông, htâng má yhang hap yù râ nghut é, Garai Gasang byí é jowò shut e ló râ matú ji yu é huí é hkûn, jîno gyo mù, yhang hká shut e ló é a sé kôlhang, ê bê

✨ 10:30 Tarâ Pun 32:35 ✨ 10:30 Tarâ Pun 32:36 * 10:32 Haû maubó lé hap yu é gâ é gi, gabú danglù lé sâng-hi wó hap yu é lé gâ lhê. ✨ 10:38 Hbk 2:3-4

nghut ri. ⁹Lumj́ing myit mai, yhang gi, gó ming má nyi é byù bíng rayuq su, danggidiq byi tô é mau má nyi bê nghut ri. Yhang gi, zúm pé má lúng é nghut mù, rajung zâ é danggidiq é muizè lé hkam yu é Isak eq Yakup le, zúm pé má lúng bekô nghut ri. ¹⁰Hkâsu mù gâ le, Abraham gi, Garai Gasâng eq azòng hên mù sai tô é, gîng é apûn awang pé eq mu é myuq lé myit myoqbyu nyi é nghut ri.

¹¹Lumj́ing myit mai, Abraham gi, yhang é asak ipyat lâi lô byuq é eq, Sarah le baùdung nghut to kôlhang, haù danggidiq byi Sû, lhumzui sù nghut lhê ga myit sôn yu é yanmai, îwa rayuq wó dut é hui bê nghut ri. ¹²Haù mù luí, yhang gi, shî gùng dông nghut kôle, yhang rayuq mai lo é awut ashín pé gi, mauhkûng mâ é kyî pé eq wuimau yàm mâ é a ung nghap é semuî myhó myô lò bê nghut ri.

¹³Byù haù bang banshoq gi, yhangmoq shi é hkûn jé shoq lumj́ing myit mai asak dui nyi kô é nghut lhê. Yhangmoq gi, danggidiq byi tô é pé lé a hap yù kó nghut ri; nghut kôlhang, haù pé lé myàng za myàng kômù, we mai te yu akô. Yhangmoq gi, myidàm htoq má gó ming byu pé eq byù bíng pé nghut é lé yín yù bekô nghut ri. ¹⁴Haù su yín yu é byu pé gi, yhangmoq yhumsing é ming lé ho nyi é bang nghut é lé tân shit é nghut akô. ¹⁵Yhangmoq htoq lo é ming lé, yhangmoq myit tui nyi kô é ru nghut le gi, dum tau lô râ ahkáng wó kó râ nghut lhê. ¹⁶Ahkuí kúm, yhangmoq gi, je ge é ming nghut é, mauhkûng mingdán lé myit tuí nyi akô nghut ri. Haù mù luí, Garai Gasang gi, yhangmoq é Garai Gasang nghu é hui râ lé a hoq é nghut lhê. Hkâsu mù gâ le, Yhang gi, yhangmoq é matú myuq ralhùm lajàng to byi bê yanmai nghut ri.

¹⁷Lumj́ing myit mai, Abraham gi, Garai Gasâng eq yhang lé chyam é hkûn, Isak lé hkungga ralhùm dông nhông byi bê nghut ri. Haù gi, danggidiq pé lé hap yu to bê sù gi, yhang é yuqzo zote lé nhông byi râ dâ é nghut lhê. ¹⁸Garai Gasang gi, "Isak dông mai lo é lé, náng é awut ashín nghû sôn byi râ nghut lhê." ✧ ga yhang lé danggidiq byi to bê nghut kôle, yhang haù su kut é nghut ri. ¹⁹Abraham gi, shi é mai Garai Gasang wó

lhoq dui toq lhê ga myit yu ri. Tái sháng ga jáng, Isak lé, shi byuq bê mai, yhang dum wó hap yu é nghut ri.

²⁰Lumj́ing myit mai, Isak gi, Yakup eq Eso nhik é htàngnùng lhê é matú, shimân byi bê nghut ri.

²¹Lumj́ing myit mai, Yakup gi, yhang shi lô râ u má, Yosep é yhangzô nhik lé shimân byi mù, yhang é dumbáng-u má ngè luí, noqkuq bê nghut ri.

²²Lumj́ing myit mai, Yosep gi, yhang asak htûm lô râ u lé, Israelaq byu pé Egutuq ming mai htoq lò râ eq séng luí tái mù, yhang é showui pé eq séng luí hkâsu kut râ hkyô lé pying to bê nghut ri.

²³Lumj́ing myit mai, Mosheq é yhangnu eq yhangwâ nhik gi, yhang hku lé é htàng má, yhang lé lhamó sum hkyap haq to bekô nghut ri. Haù mù gâ le, yhangnhik gi, zoshâng haù yúng é myàng kômù, hkohkam é mungdang lé a gyuq kó nghut ri.*

²⁴Lumj́ing myit mai, Mosheq gi, yhang kô lo é hkûn, Hpara-uq é byizô é yhangzo ga râ lé he-ngik pyâm ri. ²⁵Yhang gi, yubak marâ é ngón hkyô má rayoq zo ngón kún râ malaî Garai Gasâng é byu pé eq rahá hpuzô é hui râ lé sheq hkyin yù bê nghut ri. ²⁶Yhang gi, haù Hkrisduq é matú rhoî huí é lé, Egutuq ming mâ é sutzè htoq má je riyhang hpaudap lhê ga myit sôn yu ri. Haù mù gâ le, yhang gi, yhang é shigyaú chyunghuq lé myit myoqbyu nyi sù nghut ri. ²⁷Lumj́ing myit mai, yhang gi, hkohkâm hpó nhikjum yô é lé a gyuq é za, Egutuq ming mai htoq lô byuq bê nghut ri. Yhang gi, myoq eq a wó myang é sù Garai lé wó myang é sù dông, hkam jân é nghut ri. ²⁸Lumj́ing myit mai, yhang gi, haù zomún lé sat é maumang lagyô eq Israelaq byu pê é zomún lé a wó záng sháng gaq ga, Lhoqlhai Poî eq sui hpyûn é hkyô le kut hî bê nghut ri.

²⁹Lumj́ing myit mai, haù shiwa byu pé gi, Nhông Nè lé kyuaq huí é myigùng htoq mai su lâi byit bekô nghut ri; nghut kôlhang, Egutuq byu pé le, haù dông lâi shikut wú kô é hkûn, yhangmoq gi, myup shi byuq bekô nghut ri.

✧ 11:18 Apûn 21:12 * 11:23 Haù-u lé, hkohkâm hpó gi, Israelaq pê é yuqzo zonú wuî lé sat pyâm râ hkunmó hkyô tô é nghut lhê.

³⁰ Lumj́ing myit mai, shiwa byu pé, Yer-ihko myuq xêwâm lé nyhit nyí sô lhing é htâng má, xêwâm haû leq gyop byuq bê nghut ri.

³¹ Lumj́ing myit mai, shiwa myhí Rahap gi, haû Israelaq jó wú bang lé nguingón é eq lhom hkulum yu é yanmai, jìno a gyo bang eq rahá sat pyâm é a huí é nghut lhê.

³² Haû htoq lai luí, ngò haí taí jat ra shirâ lhú? Gidon, Barak, Samson, Yephtha, Dawiq, Samuelaq pé eq myiqhtoí pê é hkyô lé taí râ ahkyíng ngò a wó. ³³ Haú bang gi, lumj́ing myit mai mingdán pé lé wó zân ung yù bekô, tengmán hkyô lé chung jài bekô, danggidiq byí to bê lé wó hap yù bekô, hkanghkyi pê é nhut lé wó myhí pyám bekô, ³⁴ myiduoq myishâm lé wó sat pyám bekô, shamsó mai le wó hfang lut bekô nghut ri. Yhangmoq é wum nyhóm hkyô gi, wum taû bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung pyám kô é nghut lhê. ³⁵ Myiwe wuì gi, yhangmoq eq sêng é shi byuq bê bang asak dum lhoq tuí huí é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui râ lé hengik pyám kômù, zing-rí é gyai yhang hui zo bekô nghut ri. ³⁶ Ra-am gi, wuizuì kut pyám byí é eq nhuq bat é hui bekô, góbang gi, shamtoq kyum hut huí é eq htóng lhùng é hui bekô nghut ri. ³⁷ Yhangmoq gi, luqgok eq dú sat é, í túm dut shoq yik hpyit é, sham èq sat pyâm é hui bekô nghut ri. Yhangmoq gi, sau-kuq eq bainám-kuq wut mù, htot lhing wún luí, myung kyuq é, zing-rí é eq rhoi pyâm é hui bekô nghut ri. ³⁸ Yhangmoq lhumzuí nyí kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqkyûng pé eq myìdong pé má nyi lhing wún bekô nghut ri.

³⁹ Haú bang banshoq gi, yhangmoq é lumj́ing myit é yanmai, owaq é hui bê nghut kôle, yhangmoq ó yuq le, danggidiq byí tô é lé a myang hkam yù kó nghut ri.

⁴⁰ Haí mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajâng to byi bê nghut ri.

12

Garai Gasang, Zo Wuí Lé Mhoqshit É Hkyô

¹ Haû mù luí, nga-nhúng gi, haû myhô é saksé pé mhutdùm su nga-nhúng é lhinghkyuq má joq to bê nghut é yanmai, nga-nhúng lé hkâm tang é hkyô pé jung hkangmó eq, lui za lhoq nhúng byí é yubak mara lé dú pyám mù, nga-nhúng òn ra matú tô tô é hkyô lé, hkam jan luí òn e ló sháng. ² Nga-nhúng gi, nga-nhúng é lumj́ing hkyô é apùn awang lé hî sù eq lhoq gumjup byi sù nghut é Yesuq lé wú tsuq nyí sháng. Yhang gi, Yhâng é hí má joq tô é gabú hkyô é yanmai, hoq hpû é hkyô lé haí su a ngam é za, tapzîng má shî hkâm é hkyô lé jân pyám luí, Garai Gasang é hkohkâm-tanghkuq é loqyo hkyam shut zung to bê nghut ri. ³ Nungmoq gi, a ngú byuq râ eq myit wum a gyuí byuq kó sháng gaq, yubak dap bâng chyáng mai haû su htuoq htîng é hkyô lé jân pyâm é Yesuq chyáng mai myit wum yù keq.

⁴ Nungmoq gi, yubak mara lé htuoq htîng shikut é hkyô má, nungmoq é sui shun pyám shoq yhang a kut shi kó nghut ri. ⁵ Hau htoq agó, nungmoq gi, zo wuí lé òng Garai Gasang nungmoq lé wum byí é dang lé tô-myhí pyám bekô lhú? Wum byi dang haû gi,

"Ngá zo ê, haû Yhumsîng mhoqshit é hkyô lé agya alhâ hkâkut pyám,
Yhang, nang lé tân é hkûn, myit wum hkâgyui,

⁶ haí mù gâ le, haû Yhumsîng gi, Yhang chytidap é bang lé mhoqshit mù, zo rayuq lé òng,

Yhang hap yu é bang yuq hkangmó lé dam byí é nghut lhê."[☆]

gâ é nghut ri.

⁷ Mhoqshit huí é hkyô má, wuîhkê é lé hkam jan keq. Garai Gasang gi, nungmoq lé, zo wuí lé òng kut é ru nghut lhê. Hkâsu mù gâ le, yhumsîng é yhângwâ èq a mhoq é zo gi, ó wá nyi lhê lhú? ⁸ Nungmoq gi, yuq hkangmó huí laí é mhoqshit hkyô lé, a hui kô é nghut jáng, dezô pé òng nghut byuq mù, zo sîng wuì a nghut lo kó. ⁹ Nga-nhúng banshoq bang gi, nga-nhúng lé mhoqshit é xângzo îwâ pé wó é bang chyat nghut mù, yhangmoq lé hkunggâ é

nghut lhê. Haû nghut jáng, je riyhang, nga-nhúng é woi-nyí eq sêng é Íwâ é a-ô má nyí mù, asak duì râ dut ri myhi-nhung!
¹⁰Nga-nhúng é xângzo íwâ pé gi, yhangmoq je ge dik bûn é lé, nga-nhúng lé rayoq zo mhoqshit é nghut ri. Nghut kôlhang, Garai Gasang gi, Yhâng é chyoiyúng hkyô má nga-nhúng wó bo lòm shoq, nga-nhúng é gè hkyô é matú, nga-nhúng lé mhoqshit ri.
¹¹Mhoqshit é hkyô hkangmó gi, mhoqshit u lé ngón hkyô a nghut é za, nô hkâm hkyô nghut nyi ri. Nghut kôle, mhoqshit hkyô haû lé hkam yù bê bâng é matú gi, htâng má, nguingón hkyô eq dingmán hkyô é ashi lhoq htoq byî ri.

¹²Haû mù luí, myûng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kíng keq.
¹³Hkyî hten bang a wó sô é a dut shoq, lhoq gè byî é wó hui kó sháng gaq, nungmoq so râ matú, hkyô lhoq nyhang nyi keq.

Garai Lé He-ngik Bang Dàm Byi Hui Râ Hkyô

¹⁴Byù banshoq bang eq nguingón shoq nyí râ eq chyoiyúng râ matú wó dut é í shikut keq. Hkâsu mù gâ le, ó yuq le, chyoiyúng hkyô a bo é gi, haû Yhumsîng lé myàng râ a nghut. ¹⁵Ó yuq le, Garai Gasâng jeju lé a tô pyám râ matú, sidiq keq. Haû, yuq htoq lô mù, wuîhke hkyô lhoq htoq é eq byù myo myo lé agot a-û dut nhang é nuí hko su, ó yuq lé le hkâdut nhâng kó. ¹⁶Ó yuq le, ashop é đông gungsho zùm yap é hkyô nghut nghut, zang radún é matú, yhang wó tô é yuqzo zomún muizè ahko ahkáng lé ung zô pyâm é, Garai a lom é Eso su nghut nghut, a kut râ matú sidiq keq. ¹⁷Nungmoq sê é eq rajung za, Eso gi, htâng má, shimân jeju haû lé hkam yù nau é hkûn, he-ngik pyâm é hui bê. Yhang gi, shimân jeju haû lé ngaubyi ngau-nhap èq hô kôlhang, yhang kut é hkyô lé a wó htaí byi lo nghut ri.

¹⁸Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyî dut é eq laidun lo é má le, ¹⁹tut htê mying é eq, dang táí htê mying é má le, a jé ê kó nghut ri. Dang htê haû lé wó gyô é bang gi, yhangmoq lé, dang a taí jat lo

râ matú dung tôngbán akô nghut ri. ²⁰Haî mù gâ le, yhangmoq gi, "Bùm haû má dusak pé záng jáng lháng, luqgok èq dú sat râ dut lhê." ✧ ga Garai Gasang hkyô tô é hkunmó lé a wó hkâm kô é yanmai nghut ri. ²¹Haû byu-myàng hkyô gi, lùm wú gyuq hpo dut é yanmai, Mosheq lháng gi, "Ngò, gyuq nán ri." ✧ ga taí é nghut ri.

²²Nghut kôlhang, nungmoq gi, Zi-un Bùm eq rû dui nyi é Garai Gasâng é myuq nghut é mauhkûng Yerusalem má, mau-mang lagyô pé ajùm ayò gabú ratung zup zîng é jang eq, ²³mauhkûng htoq má mying kâ to huí é, zomún pê é noqkuq hpúng joq jang má, jé lé bekô nghut ri. Haû mù, nungmoq gi, byù banshoq é tarâ agyì nghut sù Garai Gasâng chyáng le, lhoq gumjup huí é dingmán bâng é woi-nyí pê chyáng le, ²⁴dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyûn gyûn é sui má le, jé lé é nghut bekô.*

²⁵Nungmoq gi, dang nyô Sù lé a gyo a kut râ matú, sidiq keq. Myidàm htoq má sidiq byî é sù lé he-ngik pyâm é bang, a lut kô é nghut lhê. Haû mù, mauhkûng mai nga-nhúng lé sidiq byî é Su chyáng mai, nga-nhúng lhing ló byuq é ru nghut le gi, je riyhang nga-nhúng a wó lut râ a nghut kó lí? ²⁶Haû Garaí dang táí é u má, Yhâng é htê gi, mingkan lé lhoq nhûn kat ri, ahkuí kúm gi, "Ngò, mingkan lé za a nghut, mauhkûng pé lé le radàm dum lhoq nhún râ nghut lhê." ✧ ga Yhang danggidiq byî to bê nghut ri. ²⁷"Radàm dum" gâ é dang gi, haû a wó lhoq nhûn é pé wó myit to sháng gaq ga, hpan to huí é zè pé nghut é, wó lhoq nhûn é pé lé huí sêng pyám râ lé gâ é nghut lhê.

²⁸Haû mù luí, nga-nhúng gi, a wó lhoq nhûn é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garai Gasang hap yù gíng é đông noqkuq sháng. ²⁹Hkâsu mù gâ le, nga-nhúng é "Garai Gasang gi, nyhê jôm é myi nghut ri". ✧

13

Ló Htáng Má Lhoq Pun Kyîng É Hkyô

✧ 12:20 Htoq Ló 19:12-13 ✧ 12:21 Tarâ Pun 9:19 * 12:24 Abelaq lé gi, yhangmang Ka-in èq sat é nghut luí, yhâng é sui gi, lató-hpuq râ matú nghut ri; nghut kôlhang, Hkrisduq é sui kúm gi, hkyi yù hkyô lajang byî ri. ✧ 12:26 Hagi 2:6 ✧ 12:29 Tarâ Pun 4:24

¹ Rayuq eq rayuq, gumang yhangchang đông chytidap lhâm nyi keq. ² Byù bing pé lé hkulúm râ hkâtô-myhí kó, hkâsu mù gâ le, ra-am gi, haû su kut nyi kô é yanmai, a sê é za maumang lagyô pé lé hkulum záng bekô nghut ri. ³ Nungmoq gi, htóng lúng bang eq rahá htóng lúng luzúm wuî đông, htóng lúng bang lé le, nungmoq yhang jamjau hui zô nyi é đông, hpuzô é bang lé le, myit bun keq.

⁴ Myiháng hkyô gi, lhunglhâng bâng èq hpautap é hui râ dut é nghut mù, myiháng yhuphpú gi, sân-yúng râ dut lhê. Hkâsu mù gâ le, Garai Gasang gi, su-myi sulàng lú é bang eq ashop é đông gungsho zùm yap é bang banshoq lé jéyáng râ nghut lhê. ⁵ Nungmoq é asak duì hkyô má, ngùn lé chytidap é myit tô pyám mù, nungmoq wó é lé nhik dik nyi keq, haî mù gâ le, Garai Gasang gi,

"Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ." ✧

ga taî é nghut lhê. ⁶ Haû mù, nga-nhúng gi, hkyak lum é myit mai,

"Haû Yhumsîng gi, ngo lé garúm sù nghut lhê yanmai, ngò, gyuq râ a nghut. Ó yuq wá, ngo lé haî wó kut râ lú?" ✧
nghû taî é nghut lhê.

⁷ Nungmoq lé Garai Gasâng é mungdang taî kyô é, nungmoq é hkyô-u shê bang lé, myit bun keq. Yhangmoq asak htum shoq nyi laî lo é sâmlai lé myit wú mù, yhangmoq é lumjîng myit lé alik kut yù keq. ⁸ Yesuq Hkrisduq gi, a-nyí nap, hkû-nyí, htàngnùng pyat dedu rajung za nghut nyi ri.

⁹ Maû nhô zâ é mhoqshit hkyô ajung jung maî èq shuî nghoq huî é bang hkâdut kó. Zo bang lé hai akyû a byî é, htungli zoshuq èq a nghut é za, Garaî jejú èq nga-nhúng é myit nhiklum lé wum-o lhoq kîng yu é gi, gè hkyô nghut lhê. ¹⁰ Nga-nhúng gi, saksé zúm má dojaú é hkyangjong pé zo râ ahkáng a wó é hkungga gyap ralhum wó é nghut lhê.

¹¹ Haû hkyangjong mó gi, dusak pê é sui lé, yubak mara hkungga đông Chyoiyúng Htâng é Jowò má yu wang ri; nghut kôlhang, gungsho pé lé gi, byù nyi jowò shinggan má nyhê hkyô pyâm ri. ¹² Haû eq rajung za, Yesuq le, Yhâng é sui đông mai byu pé

lé wó lhoq chyoiyúng râ matú, myuq hkum shinggan má jamjau hpuzo mù shí hkám bê nghut ri. ¹³ Haû mù luî, nga-nhúng gi, byù nyi jowò shinggan má Yhâng chyáng é mù, Yhang hui zô é rhoî hkyô lé é bo hui zo sháng. ¹⁴ Hkâsu mù gâ le, nga-nhúng gi, mingkan shí má ru gîng nyi é myuq wó bang a nghut é za, jé lé lô râ myuq lé ho nyi é bang ru nghut lhê.

¹⁵ Haû mù luî, nga-nhúng gi, Garai Gasâng é myîng lé yín yu é nhutwui é ashi nghut é, hkya-on hkungga lé, Yesuq đông mai, Garai Gasâng chyáng xoq xoq nhông byî nyi sháng. ¹⁶ Ge é hkyô kut râ eq góbang lé shuî gam chûng râ hkyô lé, hkâtô-myhí kó; hkâsu mù gâ le, Garai Gasang gi, haû sù é hkungga pé lé ô ngui nyi ri.

¹⁷ Nungmoq é hkyô-u shê bâng é jîno gyo mù, yhangmoq é ahko ahkáng ô má nyi keq. Yhangmoq gi, jihpán shit râ dut é bang đông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyû a bo é wôlai a dut é za, gabú hkyô ralhum wó dut sháng gaq, yhangmoq é jîno gyô nyi keq.

¹⁸ Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é đông asak duì râ lé ô nau lhê nghû, hkyak wó myit ri. ¹⁹ Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghû wum taî tsuq kat lhê.

²⁰ Sau hpúng pê é sau zúng Sù mó nghut é, nga-nhúng é Yhumsîng Yesuq lé, haû ahtum abyuq é dangshikaq é sui đông, shí bê mai dum lhoq dui toq é sù, nguîngón hkyo é Garai Gasang gi, ²¹ Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq đông mai Yhang lé gabú nhang é hkyô lé, nga-nhúng chyáng kut nyi sháng gaq. Hpungwup shingkang gi, Yesuq Hkrisduq chyáng pyat dedu ahtum abyuq ru joq nyi sháng gaq. Amen.

²² Gumang wuî ê, ngò lhoq pûn kyîng é dang lé nungmoq wó hkam jan kó sháng gaq nghû, wum taî tsuq kat lhê; hkâsu mù gâ le, ngò gi, nungmoq lé, laiká ratot za kâ kat é nghut lhê.

²³ Ngò gi, nga-nhông é gumang Timohti lhoq lhut kat é hui bê hkyô lé, nungmoq lé sé nhâng nau ri. Yhang shî má myap jé lé é nghut le gi, ngò, yhang eq rahá nungmoq lé, lé hui râ nghut lhê.

²⁴ Nungmoq lé shuí-u bang banshoq eq Garai Gasâng é byu pé banshoq lé bo shi-kyâm byi keq. Itali ming mâ é gumang wui gi, nungmoq lé shi-kyâm kat akô nghut ri.

²⁵ Jeju gi, nungmoq banshoq bâng chyáng ru joq nyî sháng gaq ô.

YAKUQ Hun Kat é Laiká (James)

¹Garai Gasang eq Yhumsîng Yesuq Hkris-duq é jùn, ngò Yakuq gi, byo myín tô é Israelaq raxe í myû lé, nguingón dang shit kyô kat lhê.

*Lumjîng Myit Lé Chyam É Hkyô Eq
Hpaqchyî Byéng-yá*

²Ngá gumang wuî ê, nungmoq é lumjîng myit lé chyam wú é hui jáng, shikut shirâng sê é myit jat nyi é lé, nungmoq sê nyi lhê nghut mù, ³wuîhke jamjau ajung jung lé htûng huî é hkûn, gaù jowò mó nghut nyi lhê nghû luî myit yù keq. ⁴Hau htoq agó, nungmoq banshoq gúm gumjup jup dut mù luî, haî le a langhpyut shoq, shikut shirang é myit gi, yhumsîng kut nyi é muzó lé wó lhoq gumjup nyi sháng gaq. ⁵Nungmoq má rayuq yuq hpaqchyî byéng-yá langhpyut tô é nghut le gi, haù banshoq bang lé, mara a hun é za, agùn agó byî nyi é Garai Gasâng chyáng dúng nyi sháng gaq, haù jáng, Garai gi, yhang lé byi râ nghut lhê. ⁶Nghut kôlhang, lum shut é myit a bo é za, lumjîng é myit eq dúng nyi sháng gaq, hkâsu mù gâ le, lum shut é sù gi, laidûn eq hik luî toq lo é nhông mâ é wuîlhêng eq wuî nyi ri. ⁷Haù yuq gi, Yhumsîng Garaî chyáng mâ é haî le wó yû râ su a ngam nyi sháng gaq. ⁸Yhang gi, myit-kó xan sù nghut luî, yhâng é hkyô hkat hkangmó má, mù htâng a nyang é sù nghut nyi ri.

Myùng Sù Eq Wó Sù

⁹Myung é gumang hpó gi, waq toq huî é má, wó sù gi, lhoq nyhúm huî é má, gabú gumrong nyi sháng gaq. ¹⁰Hkâsu mù gâ le, wó sù gi, wàhu banbó su woî byuq ló râ nghut lhê. ¹¹Buî gi, nyé é lai eq toq lô jáng, haù wàhu nyhuî byuq ló mù, abó le yoq gyó byuq é eq, hau é yúng sâm pé gi, htên byuq é su; wó sù le haù eq rajung za, yhang kut nyi é muzó má woî byuq ló râ nghut lhê.

Gunglaú É Hkyô

¹²Wuîhke jamjau huî le, wó shikut shirang nyi sù gi, hkungsô wó nyi ri; hkâsu mù

gâ le, chyam wú é ban hui jáng, yhang gi, Garai Gasang lé chyitdap é bang lé, byî tô é danggidiq asak janmaú lé, wó yû râ nghut lhê.

¹³Gunglaú huî é sù ó yuq nghut kôlhang, gunglaú huî é hkûn lé, "Garai Gasang, ngo lé gunglaú nyi ri." nghû luî, a taí sháng gaq, hkâsu mù gâ le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú râ a nghut. ¹⁴Nghut kôlhang, ó yuq nghut le le, yhumsîng é gungsho ô nau é dông, shuî lãng nghoq ló é nghut le gi, agúng alaú hui bê. ¹⁵Gungsho ô nau é hkyô kúm gi, zogûng dut jáng, mara lé hku htoq lo ri. Mara kô dîng jáng, shi é má jé râ nghut lhê.

¹⁶Ngò chyitdap é gumang wuî ê, i-myit hkyô nghoq hkâ-nghoq nyi kó. ¹⁷Gè réng é eq byíng jup é chyunghuq lhunglhang gi, ahtoq shut mâ é nghut mù luî, maubó gung pê* é Yhângwa Garaî chyáng mai gyó lo é nghut ri. Yhang gi, ahpuq alik atau ahù dut é buishúm su dut râ a nghut. ¹⁸Yhang hpan tô é amyû pé má, nga-nhúng gi, sâng-hi myhîng é ashi pé dut lo sháng gaq ga, Yhang gi, Yhang ô nau é hkyô cháng luî, haù tengmán é mungdang mai, nga-nhúng lé hkû to bê nghut ri.

Gyo Yu É Eq Cháng Kut É Hkyô

¹⁹Ngò chyitdap é gumang wuî ê, shí hkyô lé nungmoq sê nyi akô. Byù ó yuq nghut kôlhang, gyô yù râ lé han nyi sháng; dang taí râ lé a hân sháng gaq; nhik-yo râ lé le hkâhân kó. ²⁰Hkâsu mù gâ le, byù nhik-yô é hkyô gi, Garai Gasang ô nau é dingmán é dông asak dui hkyô wó lhoq htoq râ a nghut. ²¹Haù mù luî, achaq achyut é banshoq eq ladu laî agè ashop é pé lé lhoq san lhoq sêng pyám luî, nungmoq é i-myit lé wó hkyi yù rá matú, i-myit unghkaú má Garai Gasang hô tô é mungdang lé, nú-nhâm é myit eq hkam yu nyi keq.

²²Nungmoq gi, yhumsîng gùng lé a mhaù pyám sháng gaq, haù mungdang lé wó gyô yu é bang za a nghut, haù dông châng kut é bang le nghut nyi sháng gaq. ²³Mungdang haù lé wó gyô yù mù, a châng kut é sù ó yuq le, yhumsîng é gungdu lé myoqjâm má wú sù eq wuî ri. ²⁴Yhang gi, yhâng é gungdu lé wú yù mù, myoqdong lhik é eq, yhumsîng

* 1:17 Maubó gung pé gâ é gi, buî, kyî, lhamó lé gâ lhê.

gungdu hkâsu dut é lé tô-myhî pyâm ri.
²⁵ Nga-nhúng lé wó lhoq lhut yu é gumjup
 é tarâ má, rago za wú tsuq nyî sù kúm gi,
 wó gyô yù mù tô-myhî pyâm é sù a nghut,
 muzó èq tân shit é sù nghut é yanmai, haú
 yuq gi, yhang cháng kut é muzó má shimân
 jeju wó râ nghut lhê.

²⁶ Byù rayuq yuq, "Ngò gi, noqkuq htông
 lé lhoq dik sù nghut lhê." ga luí, myit to
 kôlhang, yhumsing nhut shô lé a wó hkâng
 mù, yhumsing myit lé mhaú pyâm é nghut
 le gi, haú yuq é noqkuq htông gi, akôm za
 nghut nyi ri. ²⁷ Îwa Garai Gasâng é hí má
 sansêng é eq, râ é hkyô a bo é noqkuq htông
 gi, wuîhke jamjau huí é chuimó chuizô pé
 lé, châng wú garúm é hkyô eq, mingkan
 htoq mâ é achaq achyut é hkyô lé koi pyâm
 é hkyô nghut ri.

2

Myoqdong A Wó Hkyin Lhum

¹ Ngá é gumang wuî ê, hpungwup
 shingkang bo é nga-nhông é Yhumsing
 Yesuq Hkrisduq lé lumjínq hkyô má, byu é
 myoqdong lé hkâhkyin lhum kó. ² Dangké,
 hîng loqchyop chyop luí, réng é mebu wut
 é sù rayuq eq ajeq amyha é mebu wut
 é asho awuî é sù rayuq gi, nungmoq é
 tarajong má wang lò kô é nghut le, ³ haú
 réng é mebu wut é sù lé, nungmoq lhom
 wú mù je hkunggâ é èq, "Shî aróng wó é
 jowò má zùng aq." dum, haú asho awuî é
 sù lé nghut jáng gi, "Mhó má yap to aq."
 haú su a nghut jáng, "Ngá é hkyî htâng má
 zùng aq." ga taí kô é nghut le gi, ⁴ nungmoq
 rayuq eq rayuq gamhkuí lhum luí, a ge é i-
 myit èq doqdân é bang dut lò bekô a nghut
 kó lhú?

⁵ Ngò chyitdap é gumang wuî ê, gyô yù
 keq, lumjínq hkyô má wó sùt nyi luí, gidiq
 tô tô é mingdán é silí wunlí lé, Yhang lé
 chyitdap bang wó hkam yù sháng gaq ga,
 Garai Gasang gi, myigùng htoq mâ é asho
 awuî é bang lé hkyin yù bê a nghut kó lhú?
⁶ Nungmoq kúm gi, asho awuî é sù lé a hpau
 a yùm kut pyám bekô nhung; wó bang sùt
 bang kúm gi, nungmoq lé zik zo mù luí,
 yhumsing é loq èq yhang, tarâ tingnyâng
 shut she hkyut ló bekô, a nghut kó lhú?
⁷ Nungmoq eq sêng é kô dik é myìng lé

lhang, yhangmoq yhang rhoi dang taí bum
 akô, a nghut kó lhú?

⁸ Haú mù luí, Chyúmdang má, "Náng
 gûng lé nàng chyitdap é su, náng é
 chyangnâm mâ é bang lé le chyitdap aq." ✧
 ga luí, taí tô é hkohkam tarâ lé, nungmoq
 tsuq za châng é nghut le gi, nungmoq ge
 é hkyô lé kut nyi bê. ⁹ Nghut kôlhang,
 byu é myoqdong lé nungmoq hkyin nyi kô
 é nghut le gi, nungmoq mara kut nyi gû
 nghut bê yanmai, haú tarâ lé shut é bang
 lé su tarâ jéyáng é huí nyi bekô râ nghut
 lhê. ¹⁰ Byù ó yuq nghut le le tarâ banshoq
 lé cháng kôlhang, haú mâ é ralhum lhum
 lé shut pyám jáng gi, tarâ banshoq lé shut
 pyám sù dut byuq râ nghut lhê. ¹¹ Hkâsu
 mù gâ le, "Su-myi sulàng hkâlú." ✧ ga luí,
 hkang tô é sù gi, "Byù lé hkâsat." ✧ ga luí
 le, taí tô ashî. Nàng su-myi sulàng a lú
 kôlhang, byù sat é sù nghut le gi, tarâ lé
 shut é sù nghut bê.

¹² Haú su mù luí, nungmoq lé lhoq lhut
 kat é tarâ đông jéyáng doqdân é hui râ bang
 su, ru taí nyi keq; ru châng kut nyi keq.
¹³ Hkâsu mù gâ le, shogyo myit a bò sù gi,
 a shogyô é đông jéyáng doqdân é hui râ
 nghut lhê. Shogyo nhikmyîn é hkyô kúm
 gi, jéyáng doqdân é hkyô lé wó ông lut râ
 nghut lhê.

Lumjínq Myit Eq Zui Saí É Hkyô

¹⁴ Ngá gumang wuî ê, byù rayuq yuq,
 "Ngò gi, lumjínq myit bo lhê." ga taí nyi
 kôlhang, muzó a bo lom é nghut le gi, haú
 akyû bò râ lhú? Lumjínq myit haú gi, yhang
 lé wó hkyi yù râ lhú? ¹⁵ Gumang, gu-nhá
 rayuq yuq a chîn dut nyi é eq, nyi wui é
 zoshuq langhpyut tô é nghut le, ¹⁶ nungmoq
 chyáng mâ é rayuq yuq gi, yhangmoq é
 gungsho má râ é hkyô haú le a byi é za,
 yhangmoq lé, "Nungmoq wut é gùng lúm
 sháng gaq, zô é ûng gyi sháng gaq, ngui
 ngui ngón ngón ló keq." ga taí é nghut le
 gi, hai akyû bò kó râ lhú? ¹⁷ Haú eq rajung
 za, lumjínq myit má muzó a bo é nghut le
 gi, shi é eq rajung za nghut nyi ri.

¹⁸ Dum rahkyô gi, "Nàng gi, lumjínq myit
 bo ri, ngò gi, muzo bo lhê. Muzó a bo é
 náng é lumjínq myit ngo lé tân shit wú aq,
 haú hkûn, ngá muzó èq ngá lumjínq myit
 lé, nang lé ngò tân shit râ nghut lhê." ga luí,

rayuq yuq taí rã nghut lhê. ¹⁹ Garai Gasang rayuq za nghut é lé nàng lumjínng ri-nhung! Nghut bê, haû gi, jô é hkyô nghut nyi ri, nat gâng pé le haû su yhang lumjínng mù gyuq nán nyi akô nghut ri.

²⁰ Kyoq a bo é byù bam ê, lumjínng myit má muzó a bo le akôm za nghut é hkyô lé, nàng sé nau lhê a nghut lhú? ²¹ Nga-nhung é Íwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saí é muzó mai dínngmán é sù gâ é lé wó yû bê a nghut lhú? ²² Haû mù luí, yhang é lumjínng myit gi, yhang é muzó eq rahá za e ló é yanmai, lumjínng myit gi, jup byínng lo é lé, nàng wó myâng bê nghut ri. ²³ Haû su mù, "Abraham gi, Garai Gasang lé lumjínng é nghut mù luí, yhang lé dínngmán sù ga són byi bê." ✧ ga luí, kã tô é Chyúmdang gi, dik to bê. Dum, yhang lé Garai Gasâng é buinùm hpó ga luí le myhínng byi bê. ²⁴ Haû mù luí, byù gi, lumjínng é myit eq baú za a nghut, zui saí é muzó eq mara hkyut san byi huí é lé, nungmoq bûn sê nyi akô.

²⁵ Haû eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat đông nhang kat pyâm é hkûn le, yhang zui saí é muzó mai dínngmán é sù gâ é wó yû bê a nghut lhú? ²⁶ Haû su mù, gungdu má woi-nyí a bo le gi, shi é eq rajung za, haû lumjínng myit má muzó jizó a bo le gi, shí gû nghut bê nghut ri.

3

Mhé Wuí É Shô

¹ Ngá é gumang wuì ê, byù myo myo sará hkâkut naú kó. Hkâsu mù gâ le, ngamoq sê é eq rajung za, sará pé gi, je riyhang htan é đông jéyáng doqdân é hui zo rã nghut lhê.

² Nga-nhung banshoq bang gi, hkyô myo myo má myit lingbat é bang chyat nghut ri. Byù rayuq yuq dâng eq a lingbat é nghut le gi, yhang gi, jup byínng sù eq yhumsing é gùng lé wó hkang é sù nghut ri.

³ Nga-nhung myang lé nhutkyáng kyáng byi jáng, myang hau é gungdu gón lé, nga-nhung ô nau é đông wó cháng nhang lhê.

⁴ Haû mai gotû, wuì-sanghpo pé lé wú wú keq, haû-í kô é sanghpo lé htan é laidûn eq mut é hui kôlhang, sanghpo hkâng sù gi, gyai tiq é sanghpo shap eq za, yhang ô nau é đông, haú pé lé wó hkang yu ri.

⁵ Haû eq rajung za, shô gi, tiq é gungsho za nghut kôlhang, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang rinhung. ⁶ Shô haû gi, myi eq wuì nyi ri. Nga-nhung é gungsho má, shô haû gi, agè ashop é mingkan dut lò mù, nga-nhung é gungsho asak lé achâq achyut dut nhâng luí, gungsho asak lé nyhê tuq kat ri. Haû gi, ngaraí myí eq nyhê tuq kat é nghut bê.

⁷ Dusak ajung jung, nghoq ahú hú, myi má yê é jung eq wuì hkaû má nyi jung banshoq gi, wó mhê yu é jung chyat nghut mù, byu pé gi, haú pé lé mhê yu nyi akô.

⁸ Nghut kôlhang, shô lé kúm gi, byù ó le a wó mhê yù kó nghut ri. Haû gi, apyí abat, agè ashop, uphkâng a wó é eq, shi é jung duq eq byínng tô é jung nghut nyi ri.

⁹ Nga-nhung gi, shô hau eq nga-nhung é Yhumsing eq Íwa Garai lé hkya-on nyi lhê; hau eq za, Garai Gasâng é gunglhô đông hpan tô é waxâng zo wuì lé le nhing pyâm nyi ri. ¹⁰ Nhut ralhûm za mai, hkya-ôn é dang eq nhing é dang htoq lo ri. Ngá é gumang wuì ê, haû su kut é gi, a gè. ¹¹ Wuìbúm radong za mai, chuí nghâm é wuì eq hkô é wuì wó htoq rã lhú? ¹² Ngá gumang wuì ê, maihpáng gâm mai tsanlun shi, tsibyiq nuí mai maihpáng shi, wó zui rã lhú? Haû eq rajung za, xô ngam é wuì gi, chuí nghâm é wuì lé wó lhoq htoq byi rã a nghut.

Ahtoq Mai Lo É Hpaqchyí

¹³ Nungmoq má, hpaqchyí byéng-yá bo é sù eq sê é dat é sù, ó nghut lhê lhú? Haú yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyo eq, yhumsing zui saí é ge é muzó đông tân shit nyí sháng gaq. ¹⁴ Nghut kôlhang, nungmoq é myit má ladu laí é manon é i-myt eq, lú lhûm bat zik é i-myt bo é nghut le gi, hkâ-nghutbun kó, haû tengmán hkyô lé le hkâ-mhaû pyám kó. ¹⁵ Haú sù é hpaqchyí byéng-yá kúm gi, mauhkung htoq mai gyó lo é hpaqchyí byéng-yá a nghut, haû gi, myigùng htoq mâ é, gungsho ô nau é eq, nat é hpaqchyí byéng-yá chyat nghut nyi ri. ¹⁶ Hkâsu mù gâ le, manon é eq lú lhûm bat zik é dut nyi le gi, ruk ruk rak rak é hkyô

eq agè ashop é mô ajung jung jup hkûm nyi ri.

¹⁷ Mauhkûng htoq mâ é hpaqchyî byéng-yá kúm gi, sâng-hi awang má sansêng nyi ri; hau htâng má gi, nguingón hkyô lé ô nau é, myit nûm é, jîno gyô é, shogyo nhikmyin sê é eq ge é ashi zuî nyi mù luî, gamhkui a bò, ahpuq alik a dut é eq, kut mhaú a sê é hpaqchyî byéng-yá nghut nyi ri. ¹⁸ Hau htoq agó, nguingón é hkyô dat sô xoq é bang gi, nguingón é shijí lé sân kat é bang nghut mù, ge é ashi wó yû kó râ nghut lhê.

4

Yhumsing Gùng Lé, Garai Gasâng Chyáng Ap To Râ Hkyô

¹ Nungmoq má gyè dut lhûm é eq mabyoq jishûm gi, hkâmai htoq lo é lhú? Nungmoq ahkaû má gungsho ô nau é hkyô pé ngón hkyô hô mù, majan zân lhûm é yanmai, dut htoq lo é a nghut kó lhú? ² Nungmoq yut yut myit ô nau nyi kôlhang, haî le a wó yû kó. Nungmoq sat nyi é eq manon nyi kôlhang, a wó yû kó. Nungmoq byoq lhûm nyi é eq majan htoq lhûm nyi kôlhang, haî le a wó yû kó; hkâsu mù gâ le, nungmoq, Garai Gasang lé a dung kô é yanmai nghut ri. ³ Nungmoq dung kôlhang, a myang yù kó nghut ri; hkâsu mù gâ le, nungmoq é ngón kún hkyô má jai chûng langsâ pyám râ matú, shut é dông dûng nyi kô é yanmai nghut ri.

⁴ Su-myi sulàng lú é bang su gidig a gîng é bang ê, mingkan ô nau é hkyô lé buinûm du é myit gi, Garai lé a ngui é myit nghut é hkyô lé, nungmoq a sé kó lhú? Haû mù luî, mingkan ô nau é hkyô eq buinûm dù naù sù ó nghut kôlhang, Garai Gasâng é gyè nghut nyi ri. ⁵ Dum ralhûm, nga-nhúng má Garai Gasang kat lhûng tô é woi-nyí gi, manon é myit lûng nyi ri ga luî, Chyúmdang má taî é gi, akôm nghut ri nghû, nungmoq myit ngam nyi akô lhú? ⁶ Nghut kôlhang, Yhang gi, je kô é jeju ru byî nyi lhê. Haû eq rajung za, Chyúmdang má,

"Garai Gasang gi, nghutbûn é bang lé hkûm zing pyám kôlhang, myit lhoq nyhum é bang lé jeju byî ri." [☆]
ga taî tô ri.

⁷ Haû mù, Garai uphkang é a-ô má ru nyi nyi keq; Nat Tsadán lé hkûm tang pyám

keq; haú hkûn, yhang nungmoq chyáng mai hpang byuq râ nghut lhê. ⁸ Garai Gasâng chyáng huî ê keq, haú hkûn, Yhang, nungmoq chyáng huî lé lô râ nghut lhê. Yubak kut é bang ê, nungmoq é loq pé lé chî san chî sêng pyám keq. Myit koq xân é bang ê, nungmoq é myit nhiklhum lé lhoq chyoi lhoq yúng to keq. Yudaq htûng dông loq lé chî san chî sêng pyám keq gâ é lichyúm gi, i-myt, gungdu lé lhoq san lhoq sêng pyám é lé gâ lhê. ⁹ Nungmoq gi, myit yón é, iyon yón é eq ngaubyi ngau-nhap é kut nyî keq. Nungmoq é wuihâ é hkyô lé gi, iyon dông, nungmoq é gabú é hkyô lé gi, yón kuq é dông htaî pyám keq. ¹⁰ Haû Yhumsîng Garaî é hí má i-myt lhoq nyhum nyi keq, haú hkûn, Yhang gi, nungmoq lé lhoq toq râ nghut lhê.

¹¹ Gumang wui ê, nungmoq yhangchang a ge é dông hkâtaî hpoî lhûm kó. Yhumsing é yhanggu yhangmang lé a ge é dông taî hpoî nyi é sù, haû a nghut jáng, jéyáng é sù gi, haû tarâ lé a ge é dông taî hpoî nyi mù luî, jéyáng é sù nghut nyi ri. Haû tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri. ¹² Garai Gasang za tarâ byî tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Hau é yanmai, náng é yhumkyo hpó lé jéyáng é sù nàng gi, ó yuq wa nghut lhê lhú?

Gyáng Dang A Taî Râ Hkyô

¹³ "Ngamoq, hkû-nyí napmá ra-nyí nyí, wà rawà wà shut ê mù, haû má razàn kô é nyí luî, hpugá wuiloq gá mù amyat wó myang yù râ." ga taî nyi é bang ê, gyô wú keq. ¹⁴ Napmá haî dut lô râ lé lhang, nungmoq gi, a sé ko. Nungmoq é asak gi, haî nghut nyi lhê lhú? Haû gi, razup rahtâng za htoq shit luî dum byuq byuq ló mù é, nghansoq eq rajung za nghut nyi ri. ¹⁵ Haû mù luî, nungmoq haû su ga taî nyi râ malaî gi, "Yhumsîng Garai dông é nghut le gi, ngamoq le ru wó dui nyi mù, shî le, mhô le, wó kut râ nghut lhê." nghû luî, wó taî râ nghut lhê. ¹⁶ Ahkuî kúm gi, nungmoq é gyáng é dang dông gumrong nyi akô; haû su gumrong é hkyô banshoq gi, agè ashop é jung chyat nghut nyi ri. ¹⁷ Haû mù luî, ge

☆ 4:6 Sânghkyang 3:34

é mû sê kut to luí, a kut é sù gi, mara kut sù dut bê nghut ri.

5

Sùt Wó Bang Lé Sidiq Byî É Dang

¹ Sùt wó é bang ê, gyo keq, nungmoq chyáng jé lé lô râ é wuîhke jamjau hkyo é yanmai, ngau garû nyi keq. ² Nungmoq é sutzè gi, htên bup byuq bê nghut ri; nungmoq é wutbu wutmè le manot èq zô pyám bê nghut ri. ³ Nungmoq é hîng eq ngùn má lhang, jogyik zû byuq mù luí, haû jogyik gi, nungmoq é mara hkyam shut saksé dut byî é eq, nungmoq é gungsho lé myi su zô pyám râ nghut lhê. Nungmoq gi, jiytûm buinyi shí pé má, sutzè lé za hkong to bekô nhung! ⁴ Wú keq, nungmoq é yohtung dùng yò yam nhâng mù luí, ahpau a byî é za, nungmoq mhaú zô tô é ahpau pé garû nyi é htê pé eq, mû zui bang garû é htê pé lé gi, haû a-tsam dik shoq bo é Garai wó gyo byi bê nghut ri. ⁵ Nungmoq gi, myigùng htoq má hkik hkik hkâm hkâm wó nyi é eq, i-myt ô nau é dông ngón hkyô chyat châng nyi bum akô. Nungmoq gi, sat râ buinyi matú yhumsing é gùng lé tsô myum to bekô nghut ri. ⁶ Haû dingmán é sù* lé, nungmoq mara hûn mù, sat pyám bekô. Yhang kúm gi, nungmoq lé a lhom hkâm zìng nghut ri.

Myit Hîng Hîng Hkam Jan Ra Râ Hkyô

⁷ Haû mù luí, gumang wuî ê, haû Yhumsîng dum jé lé é buinyi jé shoq myit hîng é èq lánng nyî keq ô! Hkyâm saí sù lé wú wú keq, yhang gi, myihpún mai ahpau dán é ashi lé wó yû shoq ga mau mún eq wò htáng htáng é mau wo gyûn é jé shoq myit hîng hîng lánng nyi ri. ⁸ Haû eq rajung za, nungmoq le, Yhumsîng Yesuq dum jé lé râ gi, chyâng lo nyi bê nghut é yanmai, myit hîng é èq, i-myt lé lhoq ging lhoq tîng to keq. ⁹ Gumang wuî ê, nungmoq jéyáng a hui sháng gaq, nungmoq yhangchang hkânyung nyâng lhûm nyi ko. Wú keq, Tarâ agyî gi, hkúmdong má jé nyi to bê nghut ri.

¹⁰ Gumang wuî ê, haû Yhumsîng Garaî é myîng eq hko kyô é myiqhtoî pé wuîhke jamjau huî é hkûn, jân pyám é myit lé, nungmoq gi, ge é alik agàn kut yû keq. ¹¹ Wú keq, shikut shirang é bang lé, nga-nhúng gi, hkungsô wó é bang nghu é nghut

lhê. Yobaq hkâm jân é yanmai, Yhumsîng Garai gi, yhang lé htâng má myo myo dum shimân byî é hkyô lé, nungmoq wó gyô wú bê nghut lhê. Haî mù gâ le, haû Yhumsîng Garai gi, gyai shogyo nhikmyîn é sù nghut nyi ri.

¹² Ngá é gumang wuî ê, banshoq má ahkyak dik é gi, haî le le hkâdakâm kó. Mauhkûng lé a nghut jáng, myigùng lé lang luí le hkâdakâm kó. Dakam é dang gotû lé le hkâtaî nyi kó. Nungmoq doqdân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghû za, taí keq.

Lumjîng Myit Eq Kyûdung Râ Hkyô

¹³ Nungmoq má rayuq yuq wuîhke jamjau huî é nghut le gi, kyûdung nyi sháng gaq; rayuq yuq myit ngón nyi é nghut le gi, hkyâ-on mahkôn hkon nyi sháng gaq.

¹⁴ Nungmoq má rayuq yuq nõhpyo huî é nghut le gi, nõkquq hpúng mâ é nhik bô suwún wuî lé ji yù mù, haû bang gi, Yhumsîng Yesuq é myîng mai yhang lé xû but byi luí, kyûdung byi kó sháng gaq. ¹⁵ Haû su mù, lumjîng myit èq kyûdung é dang gi, haû nõ sù lé lhoq gê luí, Yhumsîng Garaî gi, haû yuq lé lhoq toq yû râ nghut lhê. Yhang gi, yubak mara kut shut é nghut kôlhang, hkyut pyám byî é hui râ nghut lhê. ¹⁶ Haû mù luí, nungmoq lhoq ge é hui kó sháng gaq, nungmoq é yubak mara lé rayuq eq rayuq yín lhum mù, kyûdung byî lhûm nyi keq. Dingmán su é kyûdung dang gi, wó dut nhâng râ a-tsam wum-o myo myo bo nyi ri.

¹⁷ Eliyaq gi, nga-nhúng su i-myt unghkaû bo é xângzo byù za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung jáng, súm zan eq lhamó hkyuq hkyap tup myigùng htoq má mau a wò shoq dut byuq é nghut lhê. ¹⁸ Kyû dum dúng kat jáng, mauhkûng gi, maú wo hkyô kat byi mù, myigùng gi, yhang é kyô shi mui shi lé lhoq htoq byî wú bê nghut lhê.

¹⁹ Ngá é gumang wuî ê, nungmoq chyáng mâ é rayuq yuq, haû tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shuí taû lo é nghut le kúm gi, ²⁰ haû shuí taû yù sù gi,

* 5:6 Dingmán é sù gâ é danghkun lé, Chyúmlaika ra-am má gi, dingmán é bang gâ ri.

yubak mara kut é sù lé, shut shai é hkyô
mai tengmán hkyô shut shuî taû yù mù,
myit woi-nyí lé shi é mai hkyi yù bê nghut
é yanmai, yubak mara myo myo lé shuî
nghop pyám byî é sù dut berâ lé, bûn nyî
keq ô!

PETRUQ Hí Dàm Hun Kat é Laiká (1 Peter)

¹ Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihituni mau pé má byo myín tô bum é, Yesuq Hkrisduq é jìno gyo râ matú le, Yhâng é suí eq hpyûn gyûn é hui* râ matú le, haù Woi-nyí é lhoq sân-yúng nyi é muzó dông mai, Îwa Garai Gasâng é hí te sê tô é hpaqchyî má cháng luí, hkyin yù huí é bang nghut é, ² Garai Gasâng eq hkyin htoq yù luí, mingkân é byùbítng dut bâng chyáng dang kyô kat lhê. Jeju eq nguínghón hkyô gi, nungmoq chyáng agùn agó joq nyi sháng gaq.

Dui Nyi É Myit Myoqbyù Hkyô

³ Hkya-on kungtôn hkyô gi, nga-nhùng é Yhumsing Yesuq Hkrisduq é Yhângwa nghut sù Garai Gasang chyáng nghut nyi sháng gaq! Yhang gi, Yesuq Hkrisduq, shi é mai dum dui toq é hkyô dông, Yhâng é gyai shogyo nhikmyín é yanmai, nga-nhúng lé, asik hku é dum hui nhâng mù, rù dui nyi é myit myoqbyù hkyô lé wó nhang é htoq agó, ⁴ nungmoq é matú mauhkúng htoq má tô to byi bê nghut é, hkâ-nhám le, a hten a byoq é, agot a-û a dut é, a hpoí byuq é mùi lé le wó nhang é nghut lhê. ⁵ Nungmoq gi, lumjítng kô é yanmai, ló htâng é ahkyíng má lhoq htoq shit râ rì rì nghut é hkyi yù hkyô jé shoq, Garai é hpungwup a-tsâm eq upzúng é hui bang nghut akô. ⁶ Haù mù, nungmoq gi, ahkuí razup zo, wuîhke hkyô junghkang jungmó má yón hpuzô é hui kó râ nghut kôlháng, gyai yhang gabú nyi keq. ⁷ Wuîhke hkyô haù pé mai, nungmoq é lumjítng myit gi, jet é hkyô lé wó chyam htoq mù, myi mai jên yù kôlháng htên byoq sê é hìng htoq je gyaù luí, Yesuq Hkrisduq htoq shit é hkûn, hkya-on kungtôn hkyô, hpungwup shingkang eq aróng sitang lé, nungmoq wó kó râ nghut lhê. ⁸ Nungmoq gi, Yesuq lé a myang wú kôlháng, Yhang lé chyitdap bum akô; Ahkuí, nungmoq, Yhang lé a myàng kôlháng, Yhang lé lumjítng kô é nghut mù,

a ung htoq taí é eq hpungwup bo é gabú hkyô gi, nungmoq chyáng byíng jup nyi ri. ⁹ Hkâsu mù gà le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjítng myit é akyû lé wó yu nyi kô é nghut ri.

¹⁰ Hkyi yù hkyô haù eq séng luí, nungmoq chyáng jé bê nghut é jeju hkyô lé taí é myiqhtoí pé gi, gyai yhang sidiq myit eq jí jí chyun chyun ho gon wú bekô nghut ri. ¹¹ Yhangmoq gi, Hkrisduq wuîhke jamjau hui luí, hpungwup shingkang wó râ nghut é hkyô lé, yhangmoq má lúng nyi é, Hkrisduq é Woi-nyí mai te taí é hkûn, hkâ-nhám nghut râ eq hkasú é u má nghut râ hkyô lé ho gôn wú bekô nghut ri. ¹² Mauhkúng mai nhang kat é Chyoiyúng Woi-nyí eq, nungmoq lé gabú danglù hko kyo bê bang mai, ahkuí nungmoq lé taí kyo bê nghut é hkyô pé lé, yhangmoq taí kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyo pé lháng gi, haù hkyô pé lé gyai wú nau bum akô nghut ri.

Chyoiyúng Nyi Râ Hkyô

¹³ Haù mù luí, zui saí râ matú nungmoq é i-myit lé hen to keq; yhumsing gùng yhumsing hkang nyi keq; Yesuq Hkrisduq htoq shit é hkûn, nungmoq lé byi râ nghut é jeju lé, hkyak za myit myoqbyu nyi keq. ¹⁴ Jìno gyô é zoshâng wuì su, myoq a bóng shí é pyat má nungmoq nyi tô é hkûn, nungmoq é agè ashop ô naù hkyô lé a châng kut é za, ¹⁵ haù nungmoq lé ji yu é Sù gi, chyoiyúng é su, nungmoq zui saí é hkyô banshoq má chyoiyúng nyi keq. ¹⁶ Hkâsu mù gà le, "Ngò gi, chyoiyúng Sù nghut é yanmai, nungmoq le chyoiyúng nyi keq." ✧ ga kâ tô ri.

¹⁷ Byù yuq hkangmó é muzó lé, myoq-dong a hkyin é za tarâ jéyáng é sù Îwa lé, nungmoq wut dung kô é yanmai, byùbítng dông shí má nyi é u lé, Garai lé gyuq hkunggâ é myit mai asak duí keq. ¹⁸ Hkâsu mù gà le, nungmoq gi, nungmoq é íchýí îwâ pê chyáng mai bo gyó lo é hpau a dap é asak duí hkyô mai, htên byoq sê é ngùn, hìng eq hkyi yù huí é a nghut é za, ¹⁹ gumjup é

* 1:1 Yhâng é suí eq hpyûn gyûn é hui gà é gi, Yhâng é suí eq mara chí sân pyám byi é lé gà lhê. ✧ 1:16 Nhung 11:44-45; 19:2; 20:7

eq mara a bo é sauzo nghut sù, Hkrisduq é hpaù dik é suí èq sheq hkyi yù huí é ru nghut é lé, nungmoq sê lhê. ²⁰ Yhang gi, mau htoq xâng hkun mai hkyin yu é hui bê nghut kôlhang, jiltûm ahkyíng shí pé má sheq, nungmoq é matú htoq shit nhang é hui bê nghut ri. ²¹ Yhang lé, shi é mai lhoq dui toq yù mù, hpungwup shingakang bò nhang é Garai Gasang lé, nungmoq gi, Hkrisduq dông mai lumjíng kô é nghut luí, nungmoq é lumjíng myit eq myit myoqbyù hkyô gi, Garai Gasang chyáng nghut nyí bekô nghut ri.

²² Ahkuí kúm, nungmoq gi, haù tengmán hkyô lé châng é dông mai, yhumsing gùng yhumsíng lhoq sân-yúng yù bekô nghut mù, nungmoq é gumang wuí lé, lhumzuí é dông chyitdap bekô nghut luí, myit nhiklhum mai, rayuq eq rayuq gyai yhang chyitdap lhum keq. ²³ Hkâsu mù gâ le, nungmoq gi, htên byoq sê é amyui mai dum hkù huí é a nghut é za, Garai Gasang é, rû dui nyi é eq ru gíng nyi é mungdang dông, htên byoq a sê é amyui mai dum hku é hui bang ru nghut lhê. ²⁴ Hkâsu mù gâ le,

"Byù lhunglhâng bang gi, wàhu mhan eq pung ri, yhangmoq banshoq bâng é hpungwup shingakang gi, yò mã é banbó pé eq pung ri;

wàhu mhan gi, nyhuí kyuq byuq luí, banbó pé gi, yoq gyó byuq lhê;

²⁵ nghut kôlhang, haù Yhumsing é mungdang gi, ahtum abyuq gíng nyi lhê."✠

gâ tô ri. Haù gi, nungmoq lé hko kyo bê mungdang nghut lhê.

2

¹ Haù mù luí, i-myt dũ é hkyô banshoq eq mhaù zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkanmó pé lé tô pyám keq.

² Asik hku é zonú pé naú lé ô naù gadaú é su, woi-nyí eq sêng é jet é naú* lé ô naù gadaú nyí keq, haù jáng, nungmoq gi, hau é yanmai, nungmoq é hkyi yù hkyô má wó kô myhâng kó râ nghut lhê. ³ Hkâsu mù gâ le, haù Yhumsíng gi, gè sù nghut é lé, nungmoq chyam wú bekô nghut ri.

Rû Dui Nyi É Luqgok Eq Hkyin Yù Huí É Byù Myù

⁴ Byu pé mai hkyin htoq pyám kôlhang, Garai Gasang é matú hpaudap luí, Yhâng èq hkyin yù huí é, rû dui nyi é Luqgok nghut sù, haù Yhumsing chyáng nungmoq jé lé é hkùn, ⁵ nungmoq le, rû dui nyi é luqgok pé su, woi-nyí eq sêng é yhûm† saí nyi é hui luí, Yesuq Hkrisduq dông mai, Garaí èq hap yù gíng é, woi-nyí eq sêng é hkungga nhông byi râ matú, chyoiyúng é hkyangjong amyù dut bekô nghut ri. ⁶ Hkâsu mù gâ le, Chyúmdang má,

"Wú keq, hkyin yù huí é eq hpaudap é htungchyûn luqgok racham lé, Zi-un bùm má ngò lheq tô é nghut lhê; Yhang lé lumhkau é sù gi, hkâ-nhám le hoq hpû é hui râ a nghut."✠

ga taí tô ri. ⁷ Haù mù, lumjíng bang nungmoq é matú gi, luqgok haù hpaudap é nghut lhê. Nghut kôlhang, a lumjíng bâng é matú gi,

"Haù yhûm saí bang hkyin htoq pyám é luqgok gi, htungchyûn mã é ahkyak dik é luqgok‡ dut bê nghut ri."✠

ga le,

⁸ "Byu pé lé, htûng leng râ luqgok eq myit leqbat nhâng râ luq mó cham dut bê nghut ri."✠

ga le, taí tô ri. Yhangmoq gi, mungdang lé a cháng kô é yanmai, myit leqbat kô é nghut lhê. Haù dut râ lé, yhangmoq é matú masat to gũ nghut bê nghut ri.

⁹ Nghut kôlhang, nungmoq gi, mauchut hkaù mai Yhâng é mauhpo maubó shut nungmoq lé wut htoq yù Su é mauhpo muzó lé wó taí pyô kó sháng gaq ga, hkyin yù huí é byuhú, hkohkâm hkyangjong amyù, chyoiyúng é byù myù, Garai Gasang eq sêng é byu pé nghut akô nghut ri.

¹⁰ Nungmoq gi, hí lé byù ra-myù a nghut wú kôlhang, ahkuí gi, Garai Gasang é byù myù nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yù bekô nghut ri.

¹¹ Chyitdap é luzúm wuí ê, nungmoq é asak woi-nyí lé majan zân nyi é, yubak

✠ 1:25 Esai 40:6-8 * 2:2 Woi-nyí eq sêng é jet é naú gâ é gi, Garai Gasang é mungdang lé taí é nghut lhê. † 2:5 Woi-nyí eq sêng é yhûm gâ é gi, noqkuq hpúng lé taí nau é nghut lhê. ✠ 2:6 Esai 28:16 ‡ 2:7 Ahkyak é luqgok gâ é gi, Hkrisduq lé taí é nghut lhê. ✠ 2:7 Hkya-on 118:22 ✠ 2:8 Esai 8:14

mara byíng Jup é ô nau gadaú hkyô lé koi pyám keq nghû, gó ming byu pé eq byùbing pé dông mingkan htoq má nyi é bang nungmoq lé, ngò, wum taí tsuq kat lhê. ¹² Haú a lumjíng shí é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng èq lé kùm é buinyi má Garai lé shigyaú kó sháng gaq, a lumjíng shí é byu pé é ahkaú má haú su ge é asak duì hkyô dông nyi yap keq.

Uphkàng Bang Eq Yhumsing Wui É A-ô Má Nyi Râ Hkyô

¹³ Haú Yhumsing é yanmai, byu pé mâ é ahko ahkáng wó bang banshoq é a-ô má nyi keq; kô dik é ahkáng ayá wó é hkosêng é a-ô má nghut kôle, ¹⁴ shut é hkyô kut bang lé dam byi râ matú eq jô é hkyô kut bang lé shigyaú râ matú, hkosêng èq nhang tô é mauzaú pé é a-ô má nghut kôle, nyi nyi keq. ¹⁵ Hkâsu mù gâ le, ge é hkyô kut é dông, byù nâ pé é a sé a dat é dang lé nungmoq lhoq zím pyâm é gi, Garai Gasang ô nau é hkyô nghut lhê. ¹⁶ Lut bê bang dông nyi keq, nghut kôlhang, agè ashop é hkyô lé nghop pyám râ matú nungmoq é luthkyô lé hkâchúng kó; Garai Gasâng é dui-nhâng zoshâng wui dông nyi keq. ¹⁷ Yuq hkangmó lé rago za hkunggâ é hkyô shit keq; lumjíng é gumang wui lé chyitdap keq; Garai Gasang lé gyuq hkunggâ nyi keq; hkoséng lé hkungga keq.

¹⁸ Dui-nhâng zoshâng wui ê, hkungga myit banshoq èq, nungmoq é yhumsing wui é a-ô má nyi keq; ge é eq nú-nhám bâng é a-ô má za a nghut, byuwui pé é a-ô má le nyi keq. ¹⁹ Hkâsu mù gâ le, byù rayuq gi, Garai Gasang lé bân nyi sù nghut é yanmai, mara dông a nghut kôlhang, wuîhke jamjau huí é hkyô lé hpuzô é lé, jân pyâm é nghut le gi, hkya-on gíng é sù nghut lhê. ²⁰ Nghut kôlhang, nungmoq gi, mara kut shut é yanmai, nhuq bat é hkâm zo luí, haú lé jân nyi é nghut le gi, hai aróng wó kó râ lúhú? Nghut kôlhang, nungmoq gi, ge é hkyô kut luí, wuîhke hui zô é lé jân pyâm é nghut jáng, haú gi, Garai Gasâng hí má hkya-on gíng é hkyô nghut lhê. ²¹ Nungmoq gi, haú hkyô é matú ji yù huí é nghut lhê; haí mù gâ le, Hkrisduq gi, nungmoq é matú

wuîhke hkyô huí é má, nungmoq lé alik dông tô to byi bê nghut mù, nungmoq gi, Yhâng é hkyô-kám pé lé cháng râ dut lhê.

²² "Yhang gi, hai mara le a kut shut, Yhâng é nhut mai mhaú é lé a myàng." ✧

²³ Yhang gi, rhoi é huí é hkûn, yhangmoq lé a dum taú rhoi; wuîhke hkyô huí é hkûn, kyuq é dang a taí. Haú kut râ malaí, tengmán é dông jéyáng é Su chyáng, Yhâng-gùng lé ap pyâm ri. ²⁴ Nga-nhúng gi, yubak mara eq wó shi gang mù, dingmán hkyo é matú asak wó duí kó sháng gaq ga, Yhang gi, sik zíng má, Yhânggùng èq yhang, nga-nhúng é yubak mara lé Yhânggùng má wun pyám byi bê nghut ri; Yhâng é dàm pé é yanmai, nungmoq gi, lhoq gê byí é hui bekô nghut ri. ²⁵ Hkâsu mù gâ le, nungmoq gi, hkyô nghoq byuq é sau pé su dut wú kôlhang, ahkuí, nungmoq gi, haú sau zúng Sù eq nungmoq é asak woi-nyí lé upzúng Su chyáng lhing taú lò bekô nghut ri.

3

Ikun Myhí Pé Eq Ikun Hpô Pé

¹ Ikun myhí pé ê, haú eq rajung za, yhumsing é ikun hpó uphkang é a-ô má nyi keq; haú hkûn, yhangmoq mâ é rayuq yuq, haú mungdang lé a lumjíng kôlhang, ² yhumsing é asak duì hkyô mâ é sansêng é hkyô eq hkunggâ é hkyô lé myàng kôjáng, dang dông a nghut é za, yhâng é yhumsing myhí é nyi yap é sâmlai dông mai yhang lé wó lhoq lhiq yú râ nghut lhê. ³ Nungmoq yúng é hkyô gi, ahtoq pyâm za nghut é, xâmban nik é dông, hing zè mhôn chung é eq réng é mebu wut é dông mai lo é a ge nghut. ⁴ Hau é malaí, haú gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoí é yúng hkyô nghut é nungmoq é i-myit unghkaú mâ é su é yúng hkyô sheq dut râ lhê. ⁵ Hkâsu mù gâ le, gó hkûn, Garai Gasâng chyáng myit myoqbyù bang nghut é, chyoiyúng é myiwe wui gi, yhangmoq gùng lé haú dông mhôn yù yù kut kô é nghut lhê. ⁶ Sarah gi, Abraham é jino gyo luí, yhang lé yhâng é yhumsing ga wut é su, yhangmoq gi, ó le ô é yhumsing é ikun hpó uphkang é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷Ikun hpô pé ê, haú eq rajung za, yhum-sing é ikun myhí eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlî wó é bang đông, yhangmoq lé hkungga keq. Haú hkûn, nungmoq é kyûdung dang lé a he-ngik pyám byi râ nghut lhê.

Ge É Kut Luî, Jamjau Hkam É Hkyô

⁸Dang htâng sat é má, nungmoq banshoq bang gi, rayuq eq rayuq myit huí lhâm nyi keq; myit wú nô mù, gumang nhiktâng wui su chytđap lhâm nyi keq; shogyo nhikmyin myit bò luî, i-myit nyhum nyi keq. ⁹Agè ashop é lé, agè ashop é đông lató a hpuq é eq rhoi é lé rhoi é đông lató a hpuq é za, shimân byi keq; haí mù gâ le, nungmoq gi, haú pé é matú, shimân jeju muí wó hkam yù kó sháng gaq ga, ji yu é hui kô é ru nghut lhê. ¹⁰Hkâsu mù gâ le,

"Asak duì râ lé chytđap é eq ge é buinyi pé lé myàng nau é sù ó yuq le, yhâng é shô lé, agè ashop é mai, yhâng é nhutwui lé, mhaú dang tái é mai, lhoq kâng pyám ra râ nghut lhê.

¹¹Yhang gi, agè ashop hkyô mai lhing tau mù, ge é kut ra râ nghut lhê; yhang gi, nguingón simsaq hkyô lé hô mù, châng hkat nyi ra râ nghut lhê.

¹²Hkâsu mù gâ le, haú Yhumsing é myoqjí gi, dingmán bang lé wú nyi é nghut luî, yhangmoq é kyûdung dang lé, Yhâng é nohkyap èq gyo byi ri; nghut kôlhang, haú Yhumsing é myoqđong gi, agè ashop hkyô kut bang lé gyè đông myang pyám ri."✧

gâ tô ri.

¹³Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang râ lhu? ¹⁴Nghut kôlhang, dingmán hkyo é matú, nungmoq wuihke jamjau huí le lhang, nungmoq gi, hkungsô wó nyi ri. "Yhangmoq gyuq é hkyô lé hkâ-gyuq kó; hkâgyuq dân kó."✧ ¹⁵Nungmoq kúm gi, myit nhiklhúm má, Hkrisduq lé, Yhumsing đông jowò byi keq. Nàng wó é myit myoqbyù hkyô lé myí é sù yuq hkanmó lé, haí mù wó é hkyô tô tái kyo râ matú, ayang hen to aq. Nghut kôlhang, nú-nhâm é eq hkunggâ é đông haú lé kut

nyi aq; ¹⁶nungmoq é unghkaú myit san za dut nyi keq, haú hkûn, Hkrisduq đông mai nungmoq wó é ge é a-kyang lé rhoi dang tái é bang gi, yhangmoq lumù gansang é yanmai hoq hpû é hui kô râ nghut lhê.

¹⁷Garai Gasang ô nau é nghut le gi, agè ashop kut luî jamjau hkâm râ htoq má, ge é kut luî jamjau hkam le gi, je ge é nghut lhê.

¹⁸Hkâsu mù gâ le, nungmoq lé Garai Gasâng chyáng shuí jé shoq, Hkrisduq gi, byu pé é yubak marâ é yanmai, radâm za shí hkâm pyám bê nghut ri; haú gi, dingmán Sù, a dingmán bâng é matú shí hkâm byi é nghut lhê. Yhang gi, gungdu shí bê nghut kôlhang, haú Woi-nyí má lhoq dui é hui bê nghut ri. ¹⁹Yhang gi, Woi-nyí đông, htóng lúng tô é woi-nyí pé lé ê hko kyô ri. ²⁰Woi-nyí haú pé gi, a-nham lé, Noaq é ipyat má wui-sanghpo lé Noaq tsuq nyi é hkûn Garai Gasang myit hâng hâng lánng nyi é u lé, jino a gyô é bang nghut akô.

Wui-sanghpo má wàng mù, wui mai hkyi yù huí é byù shau luí, shit yuq za nghut akô. ²¹Wui haú gi, ahkuí nungmoq lé le hkyi yu é nghut é baptisma é azông nghut ri; haú gi, gungdu mâ é agot a-û lé huí sêng pyám byi é a nghut é za, sansêng é unghkaú myit mai Garai Gasâng é hí má gidíq tô é ru nghut lhê. Yesuq Hkrisduq é dum dui toq hkyô đông, nungmoq gi, baptisma hkâm yù luí, hkyi yu é hui kô é nghut lhê.

²²Yesuq Hkrisduq gi, mauhkûng má doq ló luí, Garai Gasâng é loqyò hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkanng é a-ô má nghut nyi bum akô.

4

Garai Gasâng É Matú Asak Duì Râ Hkyô

¹Haú mù luí, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myit sâmlai hau èq yhumsing gùng má gyehking đông wut to keq, haí mù gâ le, yhâng é gungdu má hpuzo bê sù gi, mara eq gang bê nghut ri.

²Haú nghut é yanmai, yhang gi, yhang nyi tùm tô é mingkan asak duì hkyô má, agè ashop é xângzo byù ô nau é đông a nghut é za, Garai Gasang ô nau é đông asak dui é ru nghut lhê. ³Hkâsu mù gâ le, nungmoq gi,

lái lò bê ahkyíng má, a lumjíng shî é byu pé hkyin kut nau é hkyô nghut é, shut é đông nyi zô lhum nau é i-myt, agè ashop é yut yut ô nau é hkyô, î shuq wut é hkyô, zo yê shuq yê mù achag achyut kut é hkyô, ye lhai râ wut jung zoshuq lé yut yut ô nau é hkyô, achag achyut é hparà noq hkyô pé má, ahkyíng luq shoq nyi láì lò bê bang nghut akô. ⁴ Nungmoq gi, ladu lai shoq achag achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luí, nungmoq lé lumù gansang pyâm akô nghut ri. ⁵ Nghut kôlhang, yhangmoq gi, dui nyi é bang eq shî bê bang lé tarâ jéyáng râ rì rì nghut to Sû lé jihpán shit kyo ra kó râ nghut lhê. ⁶ Hau é yanmai, ahkuí shi byuq bê bang lé lhang gabú danglù hko kyô é hui bekô nghut lhê; haú gi, gungdu eq séng luí ga jang, yhangmoq gi, byù đông mai tarâ jéyáng é hui râ eq, woi-nyí eq séng luí ga jang, Garai Gasang đông mai asak wó duí râ matú nghut lhê.

⁷ Lhunglhang htum râ ahkyíng gi, chyáng bê nghut ri. Haú mù luí, nungmoq kyû wó dung kó sháng gaq, bûn gying luí, yhumsing gùng yhumsing hkanng nyi keq. ⁸ Banshoq htoq má ahkyak é gi, rayuq eq rayuq gyai yhang chyitdap lhum é hkyô nghut lhê, haí mù gâ le, chyitdap myit gi, yubak mara myo myo lé wó nghop pyâm é nghut lhê. ⁹ Rayuq eq rayuq, tái nyung nyâng é hkyô a bo é za, rago hkulum lhum keq. ¹⁰ Yuq hkanng mó gi, yhumsing wó hkam yù bê chyunghuq eq rajung za, góbang lé dojaú râ lhê; Garai Gasang jeju chyunghuq ajung jung lé, lhumzui é èq rago chung jài râ lhê. ¹¹ Rayuq yuq tái é nghut jáng, Garai Gasang é mungdang haú eq yhang rajung za tái ra râ nghut lhê. Garai Gasang gi, lhunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wum-ô èq dojaú ra râ nghut lhê. Haú hpungwup shingkanng eq a-tsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

Hkristan Dut É Yanmai Jamjau Huí É Hkyô

¹² Chyitdap é luzúm wuí ê, wuîhke hkyô đông chyam é lé nungmoq hkâm zô nyi

é hkûn, nungmoq chyáng maú nhô zâ é hkyô dut htoq bê đông, hkâgyuq dàn kó.

¹³ Hkrisduq é jamjau hkyô pé lé bo hui zô é yanmai kúm gi, nungmoq gabú keq, haú hkûn sheq, Yhang é hpungwup shingkanng eq rahá Yhang htoq shit é hkûn, nungmoq gi, gabú dik é hui kó râ nghut lhê.

¹⁴ Hkrisduq é myíng yanmai, nungmoq gi, rhoi é hui zô é nghut jáng, hkungsô wó nyi ri; hkâsu mù gâ le, hpungwup shingkanng bo é Woi-nyí nghu é, Garai Gasang é Woi-nyí gi, nungmoq chyáng nyi nyi ri. ¹⁵ Nungmoq mâ é rayuq yuq jamjau huí é nghut le gi, byù sat sù, hkau sù, gotû agè ashop kut sù, góbang é mù má cháng gunjang sù đông jamjau huí é a dut sháng gaq. ¹⁶ Nghut kôlhang, Hkristan rayuq đông nungmoq jamjau huí é nghut le gi, hkâhoq nyí kó, Garai Gasang lé kúm gi, myíng hau é yanmai hkya-ôn nyi keq. ¹⁷ Hkâsu mù gâ le, tarâ jéyáng râ ahkyíng gi, jé bê nghut luí, Garai Gasang é ikun byu pé mai hí râ nghut lhê; haú gi, nga-nhúng mai hi é nghut jáng, Garai Gasang é gabú danglù lé a châng é bang gi, hkâsu wá dut lò râ nghut lhê lhu?

¹⁸ "Haú dingmán sù, hkyi yù hui râ wuí é nghut le gi, tarâ a hkunggâ é eq yubak dap é sù gi, hkâsu wá dut râ nghut lhê lhu?"[☆]

gâ tô ri. ¹⁹ Haú nghut mù luí, Garai Gasang ô nau é đông jamjau huí é bang gi, yhumsing gùng lé, lhumzui é Hpân Su chyáng ap byi mù, ge é lé xoq kut nyi ra râ nghut lhê.

5

Suwún Wuí Éq Zorâm Wuí

¹ Nungmoq mâ é hpúng suwún wuí lé, ngò, nungmoq é byinzùm suwún, Hkrisduq é jamjau hkyô pé é saksé nghut sù eq lhoq htoq shit râ nghut é Yhâng é hpungwup shingkanng lé bo hkâm râ nghut sù đông mai sang kat kôlé: ² Nungmoq lé ap to bê nghut é Garai Gasang é sau hpúng* lé zúng rém bang dut mù, shuí u bang đông dojaú nyí keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut râ lhê; ngunzè lé a myoqnoq é za, shirông myit mai dojaú râ

☆ 4:18 Sângghyang 11:31 * 5:2 Sau hpúng gâ é gi, lumjíng bang lé gâ lhê.

lhê. ³Nungmoq é loq má ap byî to bê bang lé a up zô é za, yhangmoq é hí má alik dut nyi keq. ⁴Haû jáng, Sau zúng Agyì mó† htoq shit é hkûn, nungmoq gi, hpungwup shingkang bo é, hkâ-nhám le a shum a byuq é janmaú lé myang hap yù kó râ nghut lhê.

⁵Zorâm wuì ê, nungmoq le, nungmoq htoq ipyat ko bâng é a-ô má nyi keq. Nungmoq lhunglhâng bang gi, myit lhoq nyhum é hkyô lé mebu su wut to mù, rayuq eq rayuq dojaú nyi keq, hkâsu mù gâ le,

"Garai Gasang gi, nghutbûn é bang lé hkûm zing pyám kôlhâng, myit lhoq nyhum é bang lé jeju byî ri."☆

ga tô ri. ⁶Haû mù luî, ahkyíng jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaû má, yhumsing myit lé yhumsîng lhoq nyhum nyi keq. ⁷Nungmoq é myit chiq hkyô banshoq lé, Yhâng htoq má dú kê pyâm to keq, haî mù gâ le, Yhang gi, nungmoq é matú chiq byî nyi sù nghut lhê.

⁸Yhumsing gùng lé yhumsîng hkâng mù, machya nyi keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, mying wún é hkanghkyi su hkat gadaú jón wún ri. ⁹Yhang lé htuoq htîng pyám mù, lumjîng myit má gingtîng nyi keq, haî mù gâ le, mingkan gón mâ é nungmoq é gumang wuì le, rajung zâ é jamjau hkyô pé hui zô nyi kô é lé, nungmoq sê lhê.

¹⁰Haû mù, jeju banshoq é Garai Gasang gi, Hkrisduq má ahtum abyuq joq nyi é Yhâng é hpungwup shingkâng matú nungmoq lé ji yù bê nghut luî, nungmoq razup zo jamjau huî é htâng má, Yhang yhang nungmoq lé gumjup nhâng mù, wum bô nhâng luî, ging ging tíng tíng dut nhâng râ nghut lhê.

¹¹Haû hpungwup a-tsam banshoq gi, Yhâng chyáng pyat dedu ahtum abyuq rû joq nyi sháng gaq. Amen.

Ló Htâng É Shi-kyám Dang

¹²Lhumzuî é gumang nghû ngò sôn yu é Sila eq garúm luî, ngò gi, nungmoq lé myit wum byi dang eq, myit wum byi dang haú pé gi, Garai Gasâng é tengmán é jeju nghut é lé saksé hkâm é dang pé lé, tot za kê kat é

nghut lhê. Tengmán é jeju haú má yap gêng nyi keq.

¹³Babelon má nyi é, nungmoq eq rahá hkyin yù huî é Hpúng gi, nungmoq lé shi-kyâm kat ri; ngá zo đông nghut sù Markuq le, nungmoq lé shi-kyâm kat ri. ¹⁴Rayuq eq rayuq, chyitdap bopuq puq é eq shi-kyâm lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyi sháng gaq ô.

† 5:4 Sau zúng Agyì mó gâ é gi, Hkrisduq lé gâ é nghut lhê.

☆ 5:5 Sânghkyang 3:34

PETRUQ Htang Dàm Hun Kat é Laiká (2 Peter)

¹ Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhông é Garai Gasang eq hkyi yù Sù nghut é Yesuq Hkrisduq é dingmán hkyô dông, ngamoq su, hpaû dik é lumjínq hkyô lé hap yù bê bâng chyáng dang kyô kat lhê.

² Garai Gasang eq nga-nhông é Yhumsíng Yesuq lé, nungmoq sê jat nyi é hkyô má, jeju eq nguínqón hkyô gi, nungmoq chyáng agùn agó ru joq nyí sháng gaq.

Ji Yu É Eq Hkyin Yu É Hkyô Lé Lhoq Ging Lhoq Tíng Râ Hkyô

³ Yhâng é hpungwup shingkang eq ge é hkyô dông nga-nhông lé ji yù Sù lé nga-nhông sê é dông mai, Garai Gasâng é hpungwup a-tsam gi, asak duì hkyô eq tarâ hkungga hkyo é matú nga-nhông râ é jung hkanqmó lé byi bê nghut ri. ⁴ Haú pé dông mai, Yhang gi, Yhâng é kô dik, hpaû dik é danggidíq pé nga-nhông lé byi bê nghut ri; haú hkûn, nungmoq gi, haú danggidíq pé dông mai, Garaí é myit sâmlai lé wó bo hkam yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô râ nghut lhê.

⁵ Hau é yanmai yhang, nungmoq gyai yhang shikut luí, nungmoq é lumjínq hkyô má ge é hkyô lé jat yù keq; ge é hkyô má sumsé hpaqchyí lé, ⁶ sumsé hpaqchyí má yhumsíng gùng yhumsíng hkanq é hkyô lé, yhumsíng gùng yhumsíng hkanq é hkyô má jân shirang é hkyô lé, jân shirang é hkyô má tarâ hkunggâ é hkyô lé, ⁷ tarâ hkunggâ é hkyô má gumang chyitkâng myit lé, gumang chyitkâng myit má chyitdap myit lé, jat yù keq. ⁸ Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhông é Yhumsíng Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng râ a nghut. ⁹ Nghut kôlháng, rayuq yuq gi, hau pé lé a wó é nghut jáng, chyâng é lé za myang é eq myoqjit é sù nghut luí, lai lò bê yhâng é

yubak mara pé mai lhoq sanséng byí é hui bê hkyô lé, tô-myhí pyám bê sù nghut ri.

¹⁰ Haú mù luí, ngá é gumang wuì ê, nungmoq lé ji yu é hkyô eq hkyin yu é hkyô lé, je riyháng lhoq gíngtíng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó râ a nghut; ¹¹ hau htoq agó, nga-nhông é Yhumsíng eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó râ nghut lhê.

Chyúmdang Mâ É Myiqhtoi Dang

¹² Haú mù luí, nungmoq gi, hau pé lé sé kô é htoq agó, nungmoq wó tô é tengmán hkyô má gíngtíng nyi kô é nghut kôlháng, ngò, nungmoq lé hkâ-nhám le hau pé lé ru lhoq pûn nyi râ nghut lhê. ¹³ Shí gungdu má ngò rû dui nyi nyi gi, nungmoq lé lhoq pûn kying byí le ge ri nghû, ngò wó myit ri; ¹⁴ haí mù gâ le, nga-nhông é Yhumsíng Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shi lé tô pyám to râ nghut é lé sê lhê. ¹⁵ Ngò htoq ló byuq é htâng má, nungmoq, hkâ-nhám le haú pé lé ru wó bûn nyi râ lé myàng nau mù, ngò, wó dut é í shikut nyi râ nghut lhê.

¹⁶ Nga-nhông é Yhumsíng Yesuq Hkrisduq é a-tsam eq lé lo é hkyô eq séng luí, nungmoq lé ngamoq taí kyô wú é hkûn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq èq myang é saksé pé nghut lhê. ¹⁷ Hkâsu mù gâ le, haú Kô Làm Hkikhkâm Hkyo é Hpungwup Shingkang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê." ✧ ga taí é htê, Yhâng chyáng jé é hkûn, haú Íwa Garai Gasâng chyáng mâ é aróng eq hpungwup shingkang lé Yhang wó hap yù bê nghut ri. ¹⁸ Ngamoq yhang, chyoiyúng bùm má Yhang eq rahá nyi tô é hkûn, htê haú mauhkûng mai htoq lo é lé wó gyô é nghut lhê.

¹⁹ Haú mù luí, myiqhtoi pé dang lé je lhoq gíng bê hkyô, ngamoq wó é nghut lhê; haú mù, maubó lô luí, nungmoq é myit má bó-myhí htoq lo é hkûn jé shoq, mauchut tuq dut é jowò má duq nyi é myibung lé su,

✧ 1:17 Mht 17:5; Mrk 9:7; Luk 9:35

myiqhtoi dang haú lé, nungmoq gyo mù rago châng kut râ dut lhê. ²⁰Banshoq htoq má, Chyúmdang mâ é myiqhtoi dang gi, haú myiqhtoí pé mai ó le ó lichyúm lhoq htoq yu é dông a nghut é lé, nungmoq sê to râ dut lhê. ²¹Hkâsu mù gà le, myiqhtoi dang gi, byù ô nau é dông hkâ-nhám lé a htoq wú é za, haú Chyoiyúng Woi-nyí eq shuí u huí é bang mai, Garai Gasâng chyáng mâ é dang taí é ru nghut lhê.

2

Sará Apyoq Pê É Hkyô

¹Nghut kôlhang, myiqhtoi pyoq pé gi, Israelaq byù haú bâng é ahkaú má nyi wú bê nghut lhê, haú eq rajung za, nungmoq é ahkaú má le sará apyoq pé nyi râ za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wui yu é, Yhumsíng lé lhang he-ngik pyám kó râ nghut lhê. Haú mù, yhangmoq gi, yhumsing gùng yhumsing byòdàn tung htên byoq hkyô jê nhâng bekô râ nghut lhê. ²Byù myo myo gi, haú bâng é ahoq ahî hkyô má cháng kó râ eq, tengmán hkyô lé taí hpoí pyám nhâng kó râ nghut lhê. ³Sará apyoq haú bang gi, yhangmoq myoqnoq é hkyô má, yhangmoq kut htoq tô é mhô-myi dông nungmoq lé mhaú zo kó râ nghut lhê. Yhangmoq lé mara dam byi hkyô gi, gohkun má yhangmoq ahtoq má lhang to gù bê nghut é htoq agó, yhangmoq é htên byoq hkyô gi, yhup myhî tô nyi é a nghut.

⁴Hkâsu mù gà le, Garai Gasang gi, mara kut shut é maumâng pé lé lhang a ha bün é za, ngaraí ming má hkyô pyám luí, tarâ jéyáng é hui râ hkün jê shoq, yhangmoq lé tuq tuq chut é dong hkaú má kat tô é nghut lhê. ⁵Yhang gi, tarâ a hkunggâ é byu pé lé dowui tîng é hkün, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotû nyhit yuq lé hung yu é nghut ri; ⁶Yhang gi, Sodom eq Gomoraq myuq lé, myi-mhop dut shoq nyhê hkyô pyám é dông mara dam byi luí, tarâ a hkungga bâng chyáng dut lò râ hkyô é azông kut tô é nghut ri; ⁷ nghut kôlhang, tarâ a chùng bâng é achayut asak duí hkyô é yan-mai myit wui myit hke huí é, haú dingmán sù Lot lé hkyi htoq yu é nghut ri; ⁸(hkâsu

mù gà le, dingmán sù haú gi, nyí hkangmó yhangmoq ahkaú má nyi nyi é nghut luí, tarâ a chùng é muzó hkyô lé, yhang wó myâng wó gyô é yanmai, yhang é dingmán myit má gunjâng é hui sù nghut ri.) ⁹Haú su nghut é nghut jáng, Yhumsíng gi, tarâ hkunggâ é byu pé lé, wuñke hkyô mai hkâsu kut hkyi htoq yu râ eq, a dingmán é bang lé, tarâ jéyáng é buinyí jê shoq, dam byí é hkyô lé xoq kut nyi é u má hkâsu kut zuí zing to râ lé sê lhê. ¹⁰Haú yubak gungshô é htên byoq sê é yut yut ô nau hkyô châng é eq ahko ahkáng lé wú tiq bâng chyáng, haú hkyô hkyak dut râ nghut lhê.

Byù haú bang gi, ngegáng-htu é eq nghutbün é bang nghut kôluí, mauhkung bang lé lumù gansâng râ lé a gyuq kó nghut ri; ¹¹ nghut kôlhang, maumang lagyô pé lhang gi, wum je bo é eq a-tsam je bo é nghut kôle, haú Yhumsing é hí má, haú mauhkung bang lé mara hun é dông lumù gansâng hkyô a wám kut kó nghut ri. ¹²Nghut kôlhang, haú sará apyoq pé gi, yhumsing a sê gyô é hkyô pé lé rhoí dang taí akô. Yhangmoq gi, haú chyup yu é hui luí, lhoq htên pyám é hui râ matú za hku lé lo é, nhik a bo é tân jung dusak dông nghut akô; dusak haú pé su, yhangmoq le, htên byoq byuq kó râ nghut lhê.

¹³Yhangmoq gi, nò shoq kut bekô nghut é yanmai, nò shoq kut é hui zo kó râ nghut lhê. Yhangmoq é ngón kún nau é myit gi, nyí mó káng lé lhang gungsho yut yut ô nau hkyô lhoq dik râ matú nghut ri. Yhangmoq gi, nungmoq eq rahá zoshuq poí kut kô é hkün, mhaú é lé yhangmoq é ngón hkyô kut kômù, agè agau é eq achayut é bang nghut akô. ¹⁴Yhangmoq é myoqjí pé má gi, su-myi sulàng lú hkyô byíng zan to kômù, mara kut é hkyô lé hkâ-nhám le a hkying kó nghut ri; yhangmoq gi, a gingtîng é bang lé mhoq hpyoq yu akô; yhangmoq gi, myoqnoq é hkyô má kung é bang nghut kômù, nhîng pyám é hui bang nghut akô. ¹⁵Yhangmoq gi, haú dîng é hkyô lé tô pyám to kômù, Beora é yhangzo nghut é, agè ashop hkyo é ahpaú lé chyitdap sù Balam é hkyô má châng yông wún bekô nghut ri. ¹⁶Nghut kôlhang, Balam gi, yhang kut shut é hkyo é yanmai, logúng eq tân mhoqshit é hui ri; dang a dat nyo é logúng

haù gi, byu é htê dông dang taì lò mù, myiqhtoi hpó a gyîng é hkyô lé hkûm tang pyâm ri.

¹⁷Byù hau bang gi, wuì a bo é wuìhtung eq, laidûn èq mut tâng lô é nghansoq eq pûng kômù, yhangmoq é matú gi, tuq tuq chut é mauchut hkaù lé lajang to bê nghut ri. ¹⁸Hkâsu mù gâ le, yhangmoq gi, asôm gyáng dang lé taì mù, yubak gungshô é yut yut ô nau é hkyô dông mai, haù shut shai é hkyô má asak dui nyi é mai asik za hpanq htoq lo é bang lé, mhoq hpyoq yù akô nghut ri. ¹⁹Yhangmoq gi, haù bang lé luthkyô byi râ gididq byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô nau hkyô é jùn dut nyi akô; haì mù gâ le, byù rayuq gi, yhumsîng lé hai èq up sing le, hai é jùn nghut lhê. ²⁰Byu pé gi, nga-nhûng é Yhumsîng eq hkyi yù Sû nghut é Yesuq Hkrisduq lé sê é dông mai, mingkân é agè ashop hkyô mai wó hpanq lut htoq bê nghut kôle, yhangmoq lé hau èq tuì yup tô é dum hui luì, ung pyâm é hui kô é nghut jáng, yhangmoq é matú, hí lhê htoq má je wuì byuq kó râ nghut lhê. ²¹Haù dingmán é hkyô lé yhangmoq sé luì, yhangmoq lé ap byi to bê nghut é chyoiyúng hkunmó lé tô pyâm to mù lhing taù lò byuq kô é htoq má, haù hkyô lé a sê é gi, yhangmoq é matú je gè kó râ nghut lhê. ²²"Hkui gi, yhang hpat tô é lé dum taù zô lhê." gâ é eq, "Waq gi, chî pyâm byi é htâng, yhâng é galhu htum má dum taù lhû lhê." [☆]gâ é sanghkyang gi, yhangmoq chyáng dik bê nghut ri.

3

Haù Yhumsîng Jé Lé Râ Buinyì

¹Chyitdap é luzúm wuì ê, shî gi, nungmoq lé ngò í dá nghû râ dàm ká byi kat é laiká nghut lhê. Laiká shî í lhum má, nungmoq é sansêng é i-myt lé lhoq toq râ matú taì pûn kat é laiká nghut lhê. ²Haù gi, chyoiyúng myiqhtoi pé mai lai lò bê hkûn taì tô é dang pé eq, nga-nhûng é Yhumsîng eq hkyi yù Sû mai, nungmoq é lagyô pé dông byi to bê nghut é hkunmó lé, ngò, nungmoq lé bun nhâng nau luì nghut lhê.

³Sâng-hi má, lò htâng é buinyì pé má yhumsing é agè ashop ô nau hkyô má cháng luì taì hpoi bang htoq lô râ nghut é

lé, nungmoq sê gyô to ra râ nghut lhê. ⁴Haù bang gi, "'Dum jé lé râ' ga Yhang gididq byi é gi, hkâmá lhú? Nga-nhûng é îchyí îwâ pé gi, shi byuq lô bekô nghut mù, junghkang jungmó gi, mau htoq xâng hkun mai dut é su roq dut nyi ri." ga taì kó râ nghut lhê. ⁵Nghut kôlhâng, yhangmoq gi, a-nham lé, Garai Gasâng é hkunmó mai, mauhkûng pé joq é eq, myigùng gi, wuì mai dut htoq nhâng mù, wuì dông hpan tô é hkyô lé, a sé gûn kut pyâm akô nghut ri. ⁶Wuì hau èq sheq, haù hkun lhê é mingkan lé dowuì tîng mù, lhoq htên pyâm é nghut lhê. ⁷Ahkui lhê é mauhkûng pé eq myigùng lé gi, tarâ a hkungga bang htên byoq hui râ nghut é, tarâ jéyáng é buinyì jé shoq, myi má nyhé râ matú, hkunmó hau èq Yhang hkong to bê nghut ri.

⁸Nghut kôlhâng, chyitdap é luzúm wuì ê, haù Yhumsing é hí má, ra-nyí gi, zanwut rahkyîng dông, zanwut rahkyîng gi, ra-nyí dông nghut é hkyô shî lé, hkâtô-myhí kó. ⁹Haù Yhumsîng gi, Yhâng é danggididq lé hân a lhoq dik ga byù ra-am myit ngam pyâm é su, nyhâm é Sû a nghut. Yhang gi, ó yuq le htên byoq byuq râ lé a ô nau é yanmai, yuq hkangmó myit lhîng râ lé za ô nau mù, nungmoq lé myit hîng byi nyi é nghut lhê.

¹⁰Nghut kôlhâng, haù Yhumsing é buinyì gi, hkau sù su a bún nùng má jé râ nghut lhê. Haù buinyì má, mauhkûng pé gi, mying hum htê eq byuq byuq râ nghut lhê; duqbó-gûng pé gi, myi èq lhoq htên pyâm é hui luì, myigùng eq haù mâ é joq mijoq gi, nyé gyó byuq râ nghut lhê.

¹¹⁻¹²Joaq mijoq gi, haù hkyô dông lhoq htên pyâm é hui râ nghut é yanmai, nungmoq gi, hkasû é byu pé dut ra râ lhú? Nungmoq gi, haù Garai Gasâng é buinyì lé ho nyi é eq buinyì haù hân za jé râ lé ô nau nyi é hkûn, chyoiyúng é eq tarâ hkunggâ é asak duì hkyô dông nyi ra râ nghut lhê. Buinyì haù gi, mauhkûng pé lé, myi èq lhoq htên pyâm luì, duqbó-gûng pé le, lûm nyé luì, nyé yui pyâm é buinyì dut râ nghut lhê. ¹³Nghut kôlhâng, nga-nhúng gi, Garaì é danggididq nghut é, dingmán hkyô é yhûm, mauhkûng asik eq myigùng asik lé, myoqbyu nyi é bang nghut lhê.

¹⁴ Haû nghut mù luî, chyitdap é luzúm wuî ê, nungmoq gi, haú hkyô lé myoqbyu é bang nghut kô é yanmai, Yhang é hí má achag achyut a dut é eq mara hûn râ hkyô a bo é za, Yhang eq nguingón nyî râ hkyô lé gyai yhang shikut nyî keq. ¹⁵ Nga-nhûng é chyitdap gumang Poluq gi, yhang lé, Garai Gasang byî tô é hpaqchyî byéng-yá èq, nungmoq chyáng ká byi bê eq rajung za, nga-nhûng é Yhumsing é myit hîng hkyô gi, hkyi yù hkyô nghut é lé matsîng to keq. ¹⁶ Poluq gi, yhang kâ é laiká pé banshoq má, haú hkyô pé eq séng luî rajung za kâ shit tô ri. Yhang é laiká hkaû pé má, ra-am gi, sê gyo wuî é hkyô pé bo é yanmai, a mhoq wú é bang eq a gîngtîng é bang gi, gotú Chyúmdang pé lé lichyúm htaî lhik pyám kô é su, yhangmoq lichyúm htaî lhik pyám kômù, yhumsîng htên byoq hkyô kut yu nyi akô nghut ri.

¹⁷ Haû mù luî, chyitdap é luzúm wuî ê, nungmoq gi, shí hkyô lé sê to gù nghut é yanmai, tarâ a chûng bâng é shut shaî hkyo èq nungmoq lé a wó shuí nghoq yû râ eq, nungmoq é gaû é jowò mai a wó byit gyó byuq sháng gaq, yhumsing gùng yhumsîng upzúng nyî keq. ¹⁸ Nga-nhûng é Yhumsîng eq hkyi yù Sû nghut é Yesuq Hkrisduq é jeju eq hpaqchyî hkyô má, nungmoq kô myhang lò kó sháng gaq. Hpungwup shîngkang gi, Yesuq Hkrisduq chyáng, ahkuî le, ahtum abyuq le, ru joq nyî sháng gaq ô! Amen.

YOHAN Hí Dàm Hun Kat é Laiká (1 John)

Asak Mungdang

¹Ngò gi, haù sâng-hi mai joq nyi mù, ngamoq wó gyô wú bê é, ngamoq é myoq èq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé taí kyô kat lhê. ²Asak haù gi, htoq shit bê nghut mù, ngamoq gi, haù lé myang wú luí, saksé hkám bê; haù Íwa eq rahá nyi wú é, ngamoq chyáng htoq shit bê nghut ê ahtum abyuq é asak haù lé nungmoq lé taí kyô lhê. ³Ngamoq eq zùm yap é hkyô lé, nungmoq le wó sháng gaq nghû, ngamoq gi, myang wú bê eq wó gyô wú bê hkyô lé, nungmoq lé taí kyô lhê. Ngamoq gi, haù Íwa eq le, Yhâng zo Yesuq Hkrisduq eq le, zùm yap nyi é bang nghut lhê. ⁴Ngamoq é gabú hkyô byíng jup sháng gaq nghû, ngamoq gi, nungmoq lé shí hkyô ká byí kat lhê.

Maubó Hkaù Má Sô Nyi Râ Hkyô

⁵Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé taí kyô é danglù nghut lhê. ⁶Nga-nhúng gi, Yhang eq zùm yap nyi lhê nghû taí kôlhang, mauchut hkaù má ru sô nyi bum é nghut jáng, nga-nhúng gi, mhaù é bang dut mù, haù tengmán hkyô đông asak a dui é bang nghut ri. ⁷Nghut kôlhang, Yhang gi, maubó má nghut nyi é eq rajung za, nga-nhúng le haù maubó má sô nyi é nghut le gi, nga-nhúng rayuq eq rayuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sân-yúng pyám byi râ nghut lhê.

⁸Mara a bò nghû nga-nhúng taí é nghut le gi, yhumsing gùng yhumsing mhaù pyám luí, haù tengmán hkyô gi, nga-nhúng chyáng a bò nghut ri. ⁹Nghut kôlhang, nga-nhúng gi, yhumsing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhúng é mara lé hkyut pyám byi luí, a ding a mán

é hkyô banshoq mai le, nga-nhúng lé lhoq sân-yúng byi râ nghut lhê. ¹⁰Nga-nhúng gi, mara a kut shut nghû taí é nghut jáng, nga-nhúng mai Yhang lé mhaù sù nghû chyo pyám é nghut luí, Yhâng é mungdang gi, nga-nhúng má a bò nghut ri.

2

Hkrisduq Gi, Nga-nhúng Lé Garúm Sù

¹Ngò chyitdap é zo wuít ê, ngò gi, nungmoq mara a kut shut kó sháng gaq nghû, nungmoq lé shí hkyô ká byí kat lhê. Nghut kôlhang, rayuq yuq mara kut shut é nghut le gi, nga-nhúng é matú haù Íwâ chyáng bo taí xoq byí é, Yesuq Hkrisduq gâ é Dingmán Sù lé, nga-nhúng wó lhê. ²Yhang gi, nga-nhúng é yubak marâ é matú, shíhtáí gunglik hkungga nghut nyi ri. Nga-nhúng é yubak marâ é matú baú za a nghut, mingkan gón mâ é byu pê é yubak marâ é matú le nghut nyi ri.

³Nga-nhúng gi, Yhang hkyô tô é hkunmó pé lé châng kut é nghut jáng, Yhang lé nga-nhúng rago sé bê nghut é hkyô lé, wó sé bê nghut ri. ⁴Byù rayuq yuq mai, "Ngò gi, Yhang lé rago sê lhê." ga taí kôlhang, Yhang hkyô tô é hkunmó lé a châng kut é nghut jáng, haù yuq gi, byù mhaù nghut luí, tengmán hkyô gi, yhang má a bò nghut ri. ⁵Ó yuq nghut kôlhang, Garai Gasâng é mungdang lé châng kut nyi é nghut jáng, Yhang lé chyitdap é myit gi, haù yuq má gè gè byíng jup bê nghut ri. ⁶Yhang má asak dui nyi lhê ga taí é sù ó yuq nghut kôlhang, Yesuq kut bê eq rajung za, châng kut râ lhê. Haù hkùn sheq, nga-nhúng gi, Yhang má nghut nyi bê hkyô lé, wó sê lhê.

Hkunmó Asik

⁷Chyitdap é luzúm wuít ê, ngò gi, nungmoq lé hkunmó asik ká byí kat é a nghut é za, haù sâng-hi mai nungmoq wó to bê hkunmó axau sheq ru nghut lhê. Hkunmó axau shí gi, nungmoq wó gyô wú bê mungdang nghut nyi ri. ⁸Nghut kôlhang, ngò gi, nungmoq lé hkunmó asik ká byí kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haù mauchut gi, láí ló byuq luí, haù tengmán é maubó gi, duq nyi gù bê nghut ri.

⁹Ngò gi, maubó hkaù má nghut nyi lhê ga luí, yhumsing é gumang lé a jú é sù ó

yuq nghut kôlhang, haû mauchut hkaû má ru nghut nyi ashî. ¹⁰ Yhumsing é gumang lé chyitdap é sù ó yuq nghut kôlhang, haû maubó má asak dui nyi é nghut mù luí, yhang má myit leqbat nhâng râ hkyô haí le a bò nghut ri. ¹¹ Nghut kôlhang, yhumsing é gumang lé a jú é sù kúm gi, haû mauchut hkaû má nghut nyi luí, haû má sô lhing jón wún ri; haû mauchut gi, yhang lé myoq lhoq chit to byî é yanmai, yhang gi, hkâ shut e ló nyi é hkyô lé a sé nghut ri.

¹² Chyitdap é zo wuí ê, Yhâng mying é yanmai, nungmoq é mara pé hkyut pyám byi hui bekô nghut luí, nungmoq lé ngò kê kat é nghut lhê.

¹³ Íwâ pé ê, nungmoq gi, haû sâng-hi mai nyi é sù lé sé bekô nghut é yanmai, nungmoq lé ngò kê kat é nghut lhê.

Zorâm wuí ê, nungmoq gi, haû agè ashop sù lé ùng pyám bekô nghut é yanmai, nungmoq lé ngò kê kat é nghut lhê.

Chyitdap é zo wuí ê, nungmoq gi, haû Íwâ lé sé bekô nghut é yanmai, nungmoq lé ngò kê kat é nghut lhê.

¹⁴ Íwâ pé ê, nungmoq gi, haû sâng-hi mai nyi é sù lé sé bekô nghut é yanmai, nungmoq lé ngò kê kat é nghut lhê.

Zorâm wuí ê, nungmoq gi, wum-o bo é eq, haû Garai Gasâng é mungdang nungmoq chyáng dui nyi é nghut mù, haû agè ashop sù lé ùng pyám bekô nghut é yanmai, nungmoq lé ngò kê kat é nghut lhê.

Mingkan Lé A Chyitdap Râ Hkyô

¹⁵ Mingkan eq mingkan htoq mâ é haí le lé, hkâchyitdap kó. Byù rayuq yuq, mingkan lé chyitdap é nghut le gi, haû Íwâ lé chyitdap é myit, yhâng chyáng a bò nghut ri. ¹⁶ Hkâsu mù gâ le, mingkan htoq má joq é lhunglhang gi, gungsho ô nau é hkyô, myoqjí yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haû gi, Íwâ chyáng mai htoq lo é a nghut, haû mingkan mai htoq lo é ru nghut lhê. ¹⁷ Mingkan eq mingkan ô nau hkyô pé gi, laí ló byuq râ nghut lhê; nghut kôlhang, haû Garai Gasang ô nau é hkyô lé kut é sù gi, ahtum abyuq dui nyi râ nghut lhê.

Hkrisduq É Gye Pé

¹⁸ Chyitdap é zo wuí ê, shí gi, ló htâng é ahkyíng nghut bê; haû anti-hkrisduq* gi, lé lo nyi ri gâ é lé, nungmoq wó gyô wú bê eq rajung za, ahkuí lhang, anti-hkrisduq myo myo gi, jé lé bekô nghut ri. Hau é yanmai, nga-nhúng gi, ló htâng é ahkyíng nghut bê hkyô lé wó sé bê nghut ri. ¹⁹ Yhangmoq gi, nga-nhúng é hpúng mai htoq ló byuq bê bang nghut kôle, gè gè ga jang, nga-nhúng eq a sêng é bang nghut akô. Hkâsu mù gâ le, nga-nhúng eq sêng é nghut jáng, yhangmoq gi, nga-nhúng eq nyi to râ nghut lhê, nghut kôlhang, yhangmoq htoq ló byuq bekô nghut é yanmai, yhangmoq rayuq lhang nga-nhúng eq a sêng é hkyô lé tûn shit bê nghut ri.

²⁰ Nghut kôlhang, nungmoq gi, haû Chyoiyúng Sù mai xû but byî é hui† bekô nghut mù luí, nungmoq banshoq bang haû tengmán hkyô lé sê akô nghut ri. ²¹ Haû tengmán hkyô lé nungmoq a sé kôluí, nungmoq lé ngò kê kat é a nghut; haû hkyô lé nungmoq sé gù nghut luí le, haû mhaú é hkyô gi, tengmán hkyô mai lo é a nghut é lé nungmoq sé gù nghut luí le, nungmoq lé ngò kê kat é nghut lhê. ²² Mhaú é sù gi, ó yuq nghut lhê lhuí? Haû Yesuq gi, Hkrisduq a nghut ga he pyâm é sù nghut ri. Haû Íwâ eq Yhangzo lé he-ngik é sù gi, anti-hkrisduq yhang nghut nyi ri. ²³ Haû Yhangzo lé he-ngik sù ó yuq nghut kôle, haû Íwâ lé sé sù a nghut. Haû Yhangzo lé hap yu é sù kúm gi, haû Íwâ lé le sé bê sù nghut lhê.

²⁴ Haû sâng-hi mai nungmoq wó gyô wú bê é hkyô pé lé, nungmoq i-myit má ru bo nyi keq. Haû nghut jáng, nungmoq gi, haû Yhangzo eq Íwâ chyáng nyi nyi râ nghut lhê. ²⁵ Haû gi, nga-nhúng lé Yhang byî tô é ahtum abyuq é asak wó yû râ gâ é danggidiq nghut ri.

²⁶ Ngò gi, nungmoq lé hkyô shuí nghoq shikot nyi bâng é hkyô eq séng luí, nungmoq lé shí gù kê kat é nghut lhê. ²⁷ Nungmoq chyáng kúm gi, Yhâng chyáng mai xû but jeju lé nungmoq wó yù bekô nghut mù luí, mhoqshit râ góyuq a ra lo nghut ri. Nghut kôlhang, haû Yhâng é xû but jeju gi, hkyô hkgangmó má nungmoq lé

* 2:18 Anti-hkrisduq nghû é lichyúm gi, Hkrisduq lé gye kut é sù lé gâ lhê † 2:20 Xû but byî é hui gâ é lichyúm gi, Hkrisduq chyáng mai, Chyoiyúng Woi-nyí lé myang hap yu é lé gâ lhê.

mhoqshit byi mù, haû gi, tengmán nyi é nghut luí, mhaû é hkyô haî le a bo é za, nungmoq lé mhoqshit byí nyi é eq rajung za, Yhâng chyáng nungmoq nyi nyi keq.

²⁸ Chyitdap é zo wuî ê, nga-nhúng gi, Yhang jé lé mù htoq shit é hkûn, Yhâng é hí má a gyuq a kyum é, hoq a hpu é, wó dut râ matú Yhâng chyáng ru nyi nyi keq.

²⁹ Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkû kat é sù nghut é hkyô lé, nungmoq sê akô nghut ri.

3

Garai Gasâng É Yhangzô Pé

¹ Nga-nhúng gi, haû Garai Gasâng é yhangzô pé ga wut râ hui bê nghut é yanmai, haû Íwâ é chyitdap myit gi, nga-nhúng ahtoq má hkâ-í yhang ko nyi ri myhi-nhung! Nga-nhúng gi, yhangzô pé yhang nghut bu-nhung! Mingkan gi, Yhang lé a sê é yanmai, nga-nhúng lé le a sé nghut ri.

² Chyitdap é luzúm wuî ê, ahkuí, nga-nhúng gi, Garai Gasâng é yhangzô pé nghut nyi to kôlhang, nga-nhúng hkâsu dut râ hkyô lé, a tûn shit shi nghut ri. Nghut kôlhang, Hkrisduq htoq shit é hkûn, nga-nhúng gi, Yhang su dut râ nghut é hkyô lé, nga-nhúng sê lhê; hkâsu mù gâ le, Yhang hkâsu nghut é hkyô lé roq yhang, nga-nhúng myàng râ nghut lhê. ³ Myit myoqbyù hkyô shí lé, Yhâng chyáng má wó tô é bang ó yuq nghut kôle, Yhang sân-yúng é eq rajung za, yhumsing gùng lé lhoq san lhoq yúng nyi ri.

⁴ Mara kut é sù ó yuq nghut kôle, tarâ lu laî é sù nghut ri; gè gè ga jang, mara gi, tarâ lu laî é hkyô nghut nyi ri. ⁵ Nghut kôlhang, Yhang gi, nga-nhúng é yubak mara lé hkyut pyám byi râ matú, pô htoq bê hkyô lé nungmoq sé akô; Yhâng chyáng mara a bò nghut ri. ⁶ Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sé shi nghut ri.

⁷ Chyitdap é zo wuî ê, nungmoq lé ó yuq èq le hkyô a shuí nghoq kó sháng gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri. ⁸ Mara kut nyi é sù

gi, nat Tsadán chyáng mâ é nghut nyi ri; hkâsu mù gâ le, Tsadán haû gi, sânghi mai yhang mara kut nyi bê nghut ri. Haû Garai Gasâng é Yhangzo gi, Tsadán é muzó lé lhoq hpyoq lhoq hten râ matú pô htoq le é nghut lhê. ⁹ Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haû yuq gi, Garai Gasang chyáng mai hku kat é hui bê nghut é yanmai, mara wó xoq kut lo râ a nghut. ¹⁰ Ó yuq nghut kôle, dingmán é hkyô a kut é eq, yhâng gumang lé a chyitdap é sù gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhúng wó sê yu ri.

Rayuq Eq Rayuq Chyitdap Lhum Râ Hkyô

¹¹ Nga-nhúng rayuq eq rayuq chyitdap lhum râ lhê gâ é hkyô haû gi, sânghi mai nungmoq wó gyô yù bê danglù nghut ri.

¹² Haû agè ashop sù eq le sêng é, yhanggu lé sat pyâm é Ka-in su a ge kut. Yhang gi, haî mù luí yhanggu lé sat pyâm lhê lú ga le, yhâng é muzó pé gi, agè ashop hkyô, yhanggu é muzó pé gi, dingmán é hkyô nghut é yanmai nghut ri. ✨ ¹³ Ngá é gumang wuî ê, nungmoq lé mingkân èq a ngui a jú kut kôlhang, hkâmaú kó. ¹⁴ Nga-nhúng gi, nga-nhúng é gumang wuî lé chyitdap é yanmai, shi byuq é mai wó lut luí asak dui é hkyô lé, wó sê é nghut lhê. Chyitdap myit a bò sù gi, shi é hkyô má lúng tô ashí nghut ri. ¹⁵ Yhâng é gumang lé a ngui a jú é sù gi, byù sat sù dut râ nghut lhê; byù sat sù ó yuq chyáng nghut kôle, ahtum abyuq é asak a bo é hkyô lé, nungmoq sê nyi akô.

¹⁶ Yesuq Hkrisduq gi, nga-nhúng é matú Yhâng é asak byi pyám bê lé wú jáng, chyitdap myit hkasú é nghut é hkyô lé, nga-nhúng wó sê ri. Nga-nhúng le, gumang wui é matú, nga-nhúng é asak lé byi pyám gíng ri. ¹⁷ Ó yuq nghut kôlhang, mingkan sutzè wó to luí, yhâng gumang hpó asho awui dut nyi é lé myàng kôlhang, a shogyô yu é nghut jáng, haû Garai Gasâng é chyitdap myit gi, yhâng chyáng hkâsu wó bò râ lú? ¹⁸ Chyitdap é zo wuî ê, nga-nhúng gi, dang nhut shô mai za a nghut, muzó eq tengmán é đông le chyitdap nyi sháng.

✨ 3:12 Apûn 4:1-6

¹⁹ Haú hkûn, nga-nhúng gi, tengmán hkyô eq séng bê bang nghut é lé wó sê é eq, nga-nhúng é i-myt mai nga-nhúng lé mara hun lò hkangmó, Garai Gasâng é hí má nga-nhúng i-myt wó ngón nyî bê nghut ri. ²⁰ Hkâsu mù gâ le, Garai Gasang gi, nga-nhúng myit é htoq má je kô é sù nghut mù, jung hkangmó lé sê nyi ri.

²¹ Chyitdap é luzúm wuî ê, nga-nhúng é i-myt mai nga-nhúng lé mara a hun é nghut le gi, Garai Gasâng hí má nga-nhúng gyuq kyúm râ hkyô a joq lo nghut ri. ²² Nga-nhúng gi, Yhang hkyô tô é hkunmó pé lé châng kut é eq Yhang lé gabú nhang é hkyô haî lé le kut é yanmai, nga-nhúng dúng é hkyô lhunglhang lé, Yhâng chyáng mai wó yû râ nghut lhê. ²³ Yhang hkunmó hkyô tô é eq rajung za, Yhâng zo Yesuq Hkrisduq é mying má lumjîng é eq, rayuq eq rayuq chyitdap lhùm é hkyô gi, Yhang hkyô tô é hkunmó yhang nghut bê. ²⁴ Yhang hkyô tô é hkunmó pé lé, châng kut é bang gi, Yhang má dui nyî bê nghut mù, Yhang le haú bâng chyáng dui nyî bê nghut ri. Yhang nga-nhúng chyáng dui nyî bê hkyô lé, nga-nhúng lé Yhang byî tô é Woi-nyí đông nga-nhúng wó sê yu é nghut lhê.

4

Woi-nyí Pé Lé Gôn Wú Râ Hkyô

¹ Chyitdap é luzúm wuî ê, woi-nyí hkangmó lé hkâlumjîng ko, woi-nyí haú pé gi, Garai Gasâng chyáng mâ é nghut é, a nghut e lé gôn wú keq; hkâsu mù gâ le, myiqhtoi pyoq pé myo myo gi, mingkan htoq má jón wún bekô nghut ri. ² Garai Gasâng é Woi-nyí lé nungmoq wó sê yù râ hkyô gi, shí đông nghut lhê: haú Yesuq Hkrisduq gi, gungsho đông jé lé bê ga, yín yu é woi-nyí hkangmó gi, Garai Gasâng chyáng mâ é nghut lhê. ³ Nghut kôlhang, Yesuq Hkrisduq lé a yín yu é woi-nyí hkangmó gi, Garai Gasâng chyáng mâ é a nghut. Woi-nyí haú gi, lé lo nyi ri ga nungmoq wó gyô wú bê; ahkuî lhang mingkan htoq má nyi to gù nghut é anti-hkrisduq é woi-nyí nghut ri.

⁴ Chyitdap é zo wuî ê, nungmoq gi, Garai Gasâng chyáng mâ é nghut mù luî, yhangmoq lé ung pyám bekô nghut ri. Hkâsu mù gâ le, nungmoq má lúng to Sù gi, mingkan má nyi to su htoq je kô ri. ⁵ Yhangmoq

gi, mingkan eq séng é bang nghut lhê mù luî, mingkan hkyam đông taî bum akô; mingkan zo wuî le yhangmoq é dang lé gyo byî akô nghut ri. ⁶ Nga-nhúng gi, Garai Gasang eq séng é bang nghut lhê; Garai Gasang lé sê é sù ó yuq nghut kôle, nga-nhúng é dang lé gyô ri; nghut kôlhang, Garai Gasang eq a séng é sù gi, ngamoq é dang lé a gyo nghut ri. Shí hkyô lé wú jáng, tengmán hkyo é Woi-nyí eq hkyô shuî nghoq é woi-nyí lé, nga-nhúng sê gam hkoq yû bê nghut ri.

Garai Gasang Gi, Chyitdap Myit

⁷ Chyitdap é luzúm wuî ê, nga-nhúng gi, rayuq eq rayuq chyitdap lhùm nyî sháng; hkâsu mù gâ le, chyitdap myit gi, Garai Gasâng chyáng mâ é nghut ri. Chyitdap myit bò sù ó yuq nghut kôle, Garai Gasâng chyáng mai hku kat é hui bê sù nghut luî, Garai Gasang lé sé sù nghut ri. ⁸ Chyitdap myit a bo é sù ó yuq nghut kôle, Garai Gasang lé a sé sù nghut ri; hkâsu mù gâ le, Garai Gasang gi, chyitdap myit nghut lhê. ⁹ Garai Gasang gi, Yhang Zô é yanmai nga-nhúng asak wó duî sháng gaq ga, Yhang Zo zote lé mingkan htoq má nhang kat byi bê nghut ri. Haú gi, Garai Gasang mai nga-nhúng lé, Yhâng é chyitdap myit tân shit é hkyô nghut ri. ¹⁰ Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luî, nga-nhúng é yubak marâ é matú, shîltaî gunglik hkungga dut sháng gaq ga, Yhang Zo lé nhang kat byî é nghut ri; haú gi, chyitdap myit yhang nghut bê. ¹¹ Chyitdap é luzúm wuî ê, Garai Gasang gi, nga-nhúng lé haú-í yhang chyitdap é nghut jáng, nga-nhúng le rayuq eq rayuq chyitdap lhùm râ dut lhê. ¹² Garai Gasang lé ó yuq èq le, hkânham lhang myang wú é a nghut; nghut kôlhang, nga-nhúng rayuq eq rayuq chyitdap lhùm nyi é nghut jáng, Garai Gasang gi, nga-nhúng má nyi nyî bê nghut luî, Yhâng é chyitdap myit gi, nga-nhúng má gumjup râ nghut lhê.

¹³ Garai Gasang gi, nga-nhúng lé, Yhâng é Woi-nyí byî to bê nghut é yanmai, Yhâng chyáng nga-nhúng dui nyî bê hkyô lé le, Yhang nga-nhúng má nyi nyî bê hkyô lé le, nga-nhúng sé bê nghut ri. ¹⁴ Haú Îwa gi, Yhang Zo lé mingkân é hkyi yù Sù dut

sháng gaq ga nhang kat é hkyô lé, ngamoq myàng luî, saksé hkâm lhê. ¹⁵ Ó yuq nghut kôlhang, Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasang nyi nyi bê nghut luî, yhang le Garai Gasâng chyáng dui nyi bê nghut ri. ¹⁶ Nga-nhúng gi, Garai Gasâng eq nga-nhúng lé chyitdap é hkyô lé, sé luî lumjínng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasâng chyáng dui nyi bê nghut luî, Garai Gasang le haú yuq má nyi nyi bê nghut ri. ¹⁷ Haú dông mai, chyitdap myit gi, nga-nhúng chyáng gumjup bê nghut luî, nga-nhúng gi, tará jéyáng é buinyi má a gyuq a kyum é myit wó yû râ nghut lhê; hkâsu mù gâ le, nga-nhúng gi, mingkan shî má Yhang su dut nyi bê nghut ri. ¹⁸ Chyitdap myit má gyuq é hkyô a bò nghut ri; gyuq é hkyô gi, mara dam byî é hkyô eq sêng é nghut mù luî, gumjup é chyitdap myit gi, gyuq é hkyô lé hkat htoq pyâm ri. Haú gyuq é myit bò sù gi, chyitdap myit má gumjup sù a nghut.

¹⁹ Yhang hí nga-nhúng lé chyitdap bê nghut é yanmai, nga-nhúng le chyitdap nyi lhê. ²⁰ Byù rayuq yuq gi, "Ngò, Garai Gasang lé chyitdap lhê." ga táí kôlhang, yhâng é gumang lé a jú é nghut jáng, haú yuq gi, byù mhaú rayuq nghut ri; hkâsu mù gâ le, yhumsîng byu-myang é gumang lé lháng a chyitdap é sù gi, a byu-myang é Garai Gasang lé wó chyitdap râ a nghut. ²¹ Garai Gasang lé chyitdap é sù ó yuq le, yhumsîng gumang lé le chyitdap râ lhê gâ é dang haú gi, nga-nhúng é matú, Yhang mai hkyô tô é hkunmó nghut lhê.

5

Garai Gasâng É Yhangzo Lé Lumjínng Hkyô

¹ Yesuq gi, haú Hkrisduq nghut ri ga lumjínng é sù ó yuq nghut kôle, Garai Gasâng chyáng mai hku kat bê sù nghut ri; îwa lé chyitdap é sù ó yuq nghut kôle, yhang zo lé le chyitdap é nghut bê. ² Garai Gasang lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzô pé lé le, chyitdap nyi é hkyô lé, nga-nhúng wó sê yu é yanmai, ³ Garai Gasang hkyô tô é hkunmó pé lé

châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wòlai mó a nghut. ⁴ Hkâsu mù gâ le, Garai Gasâng chyáng mai hku kat bê sù ó yuq nghut kôle, mingkan lé ung pyâm bê nghut ri. Nga-nhúng é lumjínng myit gi, mingkan lé nga-nhúng ung pyâm é ongdang hkyô nghut ri. ⁵ Yesuq gi, Garai Gasâng é Yhangzo nghut é lé lumjínng é sù mai lai luî, mingkan lé wó ung pyâm é sù gi, ó yuq wá nghut lhê lhú?

⁶ Haú yuq gi, wuì eq sui* mai lé é sù, Yesuq Hkrisduq yhang nghut nyi ri. Yhang gi, wuì mai za lé é a nghut, wuì mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkâm byî ri. ⁷ Hkâsu mù gâ le, Woi-nyí le, wuì le, sui le, haú sùm lhùm é saksé hkâm akô nghut ri; ⁸ haú sùm lhùm gi, rajung za nghut akô. ⁹ Nga-nhúng gi, byu é saksé lé lhom yu lhê; nghut kôlhang, Garai Gasâng é saksé gi, haú htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byî é yanmai nghut ri. ¹⁰ Garai Gasâng é Yhangzo lé lumjínng é sù gi, saksé haú lé yhâng é i-myt má wó bê nghut ri; Garai Gasang lé a lumjínng é sù kúm gi, Yhang lé byù mhaú rayuq ga chyo pyâm bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkâm é lé, yhang a lumjínng é yanmai nghut ri. ¹¹ Nga-nhúng lé, Garai Gasang byî é ahtum abyuq é asak gi, saksé haú nghut nyi ri. Asak haú gi, Yhang Zô chyáng bo ri. ¹² Garai Gasâng é Yhangzo lé wó sù gi, asak haú lé wó bê; Yhang Zo lé a wó sù gi, asak haú lé le a wó nghut ri.

Ahtum Abyuq Asak

¹³ Garai Gasang é Yhangzô é myìng lé lumjínng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghû, shí hkyô pé lé ngò ká byî kat é nghut lhê. ¹⁴ Nga-nhúng haí dung le le, Garai Gasang ô nau é dông nghut jáng gi, Yhang gyo byi râ nghut lhê; haú gi, Yhâng é hí má nga-nhúng a gyuq a kyum wó wâng râ matú nghut ri. ¹⁵ Haú mù, nga-nhúng haí dung kôlhang, Yhang gyo byî é lé nga-nhúng sê é nghut le gi, Yhâng chyáng nga-

* 5:6 Wuì eq sui nghu é gi, Yesuq baptisma hkam yu é hkyô eq shî hkâm é hkyô lé táí nau é nghut ri.

nhúng dúng é hkyô lé, nga-nhúng wó yu é lé, nga-nhúng sê lhê.

¹⁶ Ó yuq nghut kôle, yhumsing é gumang hpó mai shî a gíng é mara kut shut é lé, myang é nghut le gi, haú yuq é matú kyû-dung byi râ lhê. Haú hkûn, Garai Gasang gi, haú yuq lé asak byi râ nghut lhê. Haú gi, shî a gíng é mara wó bâng é matú taí é nghut lhê. Shî gíng é mara le joq lhê; nghut kôlhang, hau é matú dung râ lhê nghû, ngò taí nyi é a nghut. ¹⁷ A dingmán é hkyô lhunglhang gi, mara nghut lhê; nghut kôlhang, shî a gíng é mara le joq lhê.

¹⁸ Garai Gasâng chyáng mai hku kat bê sù ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gâ le, haú Garai Gasâng é Yhangzo gi, haú yuq lé wú zúng nyi é nghut mù luí, haú agè ashop sù gi, haú yuq lé wó záng htung râ a nghut.

¹⁹ Nga-nhúng gi, Garai Gasâng é yhangzô pé nghut é lé le, mingkan gón lé haú agè ashop su èq up tô é hkyô lé le, sê lhê. ²⁰ Hau htoq agó, Garai Gasâng é Yhangzo jé lé luí, haú tengmán Sù lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyi bê eq rajung za, haú tengmán Sù má le nyi nyi bê nghut lhê. Yhang gi, haú tengmán é Garai Gasang eq ahtum abyuq é asak nghut nyi lhê.

²¹ Chyitdap é zo wuî ê, hparà l hó pé lé koi pyâm nyi keq.

YOHAN
Htang Dàm Hun Kat é Laiká
(2 John)

¹Ngò suwún hpó gi, tengmán hkyô má ngò chyitdap é, hkyin yù huí é nàng hpô-myhí eq nung zô pé lé, dang kyô kat lhê; ngò baú za a nghut, haú nga-nhúng chyáng lúng to luí, ²nga-nhúng eq ahtum abyuq ru joq nyí rã nghut é tengmán hkyô é yanmai, haú tengmán hkyô lé sê é lhunglhâng bang le, nungmoq lé chyitdap nyi lhê.

³Haú Íwa Garai Gasang eq Íwã é Yhangzo Yesuq Hkrisduq chyáng mã é jeju, shogyo nhikmyin hkyô eq nguingón hkyô gi, haú tengmán hkyô eq chyitdap hkyô má, nga-nhúng eq rahá joq nyi sháng gaq.

⁴Haú Íwa mai nga-nhúng lé hkunmó hkyô tô é eq rajung za, nung zô pé ram gi, haú tengmán hkyô má châng nyi é hkyô lé, ngò wó sê é yanmai, gyai yhang gabú nyi lhê. ⁵Chyitdap é hpô-myhí ê, nga-nhúng rayuq eq rayuq chyitdap lhum sháng nghû, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhum a nghut. ⁶Yhang hkyô tô é hkunmó eq rajung za, nga-nhúng cháng kut é nghut jáng gi, chyitdap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chyitdap myit bo nyi rã matú nghut lhê.

⁷Hkâsu mù gâ le, Yesuq Hkrisduq gi, gungsho đông jé lé é hkyô lé a yín yu é, mhaú zô é byù myo myo gi, mingkan htoq má jón wún bekô nghut ri; haú sù é byù gi, haú mhaú zo sù eq anti-hkrisduq dut rã nghut lhê. ⁸Nungmoq zui saí bê muzó é akyû lé a lhoq hpyuq é za, gumjup é shigyaú chyunghuq lé, nungmoq wó hkam yù kó sháng gaq, yhumsing gùng sidiq nyi keq. ⁹Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haú mhoqshit é dang lé ru châng nyi é sù kúm gi, haú Íwa lé le, Yhangzo lé le, wó bê sù nghut ri. ¹⁰Mhoqshit é dang haú lé a wun é byù rayuq yuq, nungmoq chyáng jé lé é nghut le gi, haú yuq lé nungmoq é yhúmhaú má

hkâwâng nhâng kó; yhang lé hkâlhom xoq yù kó. ¹¹Hkâsu mù gâ le, haú yuq lé lhom xoq yu é sù gi, yhâng é agè ashop é muzó má lóm bê sù nghut ri.

¹²Ngò gi, nungmoq lé ká byí kat rã hkyô myo myo joq kôlhang, laiká hkyap eq kajung-chi lé a kâm chùng naù. Nga-nhúng é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong hkyûm kut nyo lhum rã lé myit myoqbyu nyi lhê.

¹³Hkyin yù huí é nàng nhã é yhangzô pé gi, nang lé shi-kyâm kat akô nghut ri.

YOHAN

Súm Dam Dàm Hun Kat é Laiká (3 John)

¹Ngò suwún hpó gi, haû tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.

²Chyitdap é luzúm hpó ê, ngò gi, haû náng é asak woi-nyí nyí-ngón yuqyo nyi é eq rajung za, nàng nguingón wángzán râ eq hkyô hkat hkangmó má, nyí-ngón yuqyo nyi sháng gaq nghû, kyûdung byî kat lhê.

³Hkâsu mù gâ le, ngò gi, gumang wuî ra-am, ngá chyáng lé jé mù, haû tengmán hkyô má nàng lhumzui é hkyô lé le, haû tengmán hkyô má nàng hkâsu kut xoq châng nyi é hkyô lé le, lé taî kyo kô é hkûn, gyai yhang gabú é yanmai nghut lhê. ⁴Haû tengmán hkyô má, ngá zô pé châng nyi é hkyô lé, ngò wó gyô é hkûn gabú é í, gotû gabú hkyô a wó lo nghut ri.

⁵Chyitdap é luzúm hpó ê, haû gumang wuî gi, mau we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzui nyi ri. ⁶Yhangmoq gi, haû noqkuq hpúng má é bang lé, náng é chyitdap myit eq séng luî taî kyo bekô nghut ri. Nàng gi, Garai Gasâng hí má gingdán é dông, yhangmoq é hkyowui matú garúm luî, dé kat é nghut jáng, ge é muzó jizó kut é nghut bê. ⁷Hkâsu mù gâ le, yhangmoq gi, Hkrisduq é myìng hau é matú htoq ló kôluî, a lumjìng bâng chyáng mai haî lháng a hap yù kó nghut ri. ⁸Haû mù luî, nga-nhúng gi, haû tengmán hkyô é matú rahá za wó chôm zui saí sháng gaq, haû sù é byu pé lé lhom hkûlum yù râ lhê.

⁹Ngò gi, haû noqkuq hpúng lé laiká ká byî kat bê nghut lhê; nghut kôlhang, haû ushuq kut nau é sù Diotrehpi gi, ngamoq lé a lhom hap yù nghut ri. ¹⁰Haû mù luî, ngò lé jé jáng gi, ngamoq lé a jo a âng é dang taî é eq lumù gansang é, yhang kut é muzó lé, taî hpyî kyo râ nghut lhê; yhang gi, haû hkyô lé myit a dik shî é nghut mù luî, yhang yhang le gumang wuî lé a lhom hkûlum yù, lhom hkûlum yù nau bang lé le, yhang mai hkûm zing pyám luî, yhangmoq lé haû noqkuq hpúng mai hkat htoq pyâm ri.

¹¹Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng má é nghut bê; agè ashop é hkyô kut é sù gi, Garai Gasang lé a myàng shî é sù nghut ri.

¹²Demetri ge é hkyô lé, yuq hkangmó mai le, haû tengmán hkyô èq le, saksé hkám byî akô nghut ri; ngamoq le, yhang ge é hkyô lé saksé hkám byî lhê; haû ngamoq hkâm é saksé gi, têng é hkyô nghut é lé, nàng sê lhê.

¹³Ngò gi, nang lé kê kat ra hkyô myo myo joq kôlhang, kâjung eq kâjung-chi dông a kê kat nau lo. ¹⁴Ngò gi, a myáng má, nàng eq myang huî lhum râ lé myit myoqbyu tô lhê. Haû hkûn sheq, ngá-nhik myoqdong hkyûm myang nyo lhum râ nghut lhê.

¹⁵Nàng nguingón yuqyo nyi sháng gaq; shî má é luzúm wuî gi, nang lé shi-kyâm kat akô nghut ri. Nàng le, haû má é luzúm wuî lé, myìng du htau luî bo shi-kyâm byi laq.

YUDE Hun Kat é Laiká (Jude)

¹ Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Iwa Garai Gasâng eq ji yù mù, chyitdap é hui luí, Yesuq Hkrisduq eq upzúng é hui bâng chyáng dang kyô kat lhê.

² Shogyo nhikmyin hkyô, nguingón hkyô eq chyitdap hkyô gi, nungmoq chyáng agùn agó joq nyi sháng gaq ô!

Garai A Wó Bâng É Yubak Mara

³ Chyitdap é luzúm wuí ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kê kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjínng hkyo é matú nungmoq htuq htíng rã dut é lé, myit wum byi rã hkyô kã rã dut é lé, ngò byu-myang ri. ⁴ Hkãsu mù gã le, haù mara dam byí é hui zo rã hkyô lé, a-nham pyat mai kê matsíng tô é hui bê bang ra-am gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, míngkan ngón hkyo eq htaí lhik pyám kê é htoq agó, Yhang za nga-nhúng é Yhumsíng nghut sù eq Ahko ahkáng lhunglháng wó sù, Yesuq Hkrisduq lé he-ngik pyám akô nghut ri.

⁵ Nungmoq kúm gi, shí pé banshoq lé sê to gù nghut kôlháng, ngò mai nungmoq lé taí pún nau é hkyô gi, a-ô mã é pé nghut lhê: Haù gi, Yhumsíng Garai mai, Yhâng é byu pé lé, Egutuq ming mai hkyi htoq yù kôlháng, a lumjínng é bang lé gi, htâng má dum lhoq htên pyám é nghut lhê. ⁶ Hau htoq agó, haù yhumsing é ayá lé tô pyám luí, yhumsing é nyi jowò lé pyám tô é maumâng pé lé, Yhang gi, haù tarã jéyáng é hui rã Buinyi mó jé shoq, ahtum abyuq é toqjâng tuí eq tui luí, mauchut hkaù má lhúng tô é nghut lhê. ⁷ Haù eq rajung za, Sodom eq Gomoraq myuq eq hau é awui ayàm mã é wà pé mã é bang gi, ashop

é dông gungsho zùm yap é hkyô shut é eq myiwe yhangchang yuqgè yhangchang nyi zô lhúm é hkyô kut kê é nghut mù, yhangmoq gi, ahtum abyuq é myi má dam byí é hpuzo bâng é alik dut bekô nghut ri.

⁸ Haù eq rajung za yhang, yhupmoq moq é byù shí bang gi, yhumsing é gungsho lé agot a-ù kut kômù, ahkáng ayá wó sù lé he-ngik pyám kôluí, mauhkúng bang lé lumù gansang akô nghut ri. ⁹ Nghut kôlháng, haù maumang lagyo agyì Mihkaelaq lháng gi, Mosheq é gùng eq séng luí, haù nat zau eq dang rhâng lhúm é hkùn, yhang lé rhoi é dông mara hún dang a wám taí é za, "Nang lé, haù Yhumsíng nhik-yo sháng gaq!" ga za taí ri. ¹⁰ Nghut kôlháng, byù haù bang gi, yhangmoq a sê gyô é hkyô pé lé rhoi dang taí pyám akô nghut ri; yhangmoq gi, haù myit woi-nyí a bo é dusak pé su, yhumsing myit mai sê gyô é hkyô pé má lháng, yhumsing gùng lé lhoq htên yu akô nghut ri.

¹¹ Yhangmoq gi, dingnyé wó rã! Hkãsu mù gã le, yhangmoq gi, Ka-in* kut é agè ashop é hkyô dông cháng kê é yanmai le, akyù wó rã matú, Balam† shut é dông bo shut kê é yanmai le, Kora‡ é gumlau toq hkyô kut kômù, yhang su htên byoq byuq é hui kê é yanmai le nghut ri.

¹² Yhangmoq gi, nungmoq é chyitdap zoshuq poí má nungmoq lé agot a-ù wó dut nhang é bang nghut mù, gyuq hoq a bo é za, nungmoq eq rahá chôm zoshuq kê é hkùn, yhumsing gùng lé za yhumsíng lhoq gyí yu é sau zúng bang nghut akô; yhangmoq gi, lai eq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpùn pyám luí, í dâm shi é, xung nám lhê é siggãm pé su nghut akô. ¹³ Yhangmoq gi, yhumsing é hoq jung lé, tsù-myup su htoq nhang é, haù wuimau mã é kê é wuìlhêng pé eq, tuq tuq chut é mauchut hkaù má tarã jéyáng hui rã matú, ahtum abyuq tô to huí é, yông wún é kyí pé su nghut akô.

¹⁴ Byù haù bang eq séng luí, Adam mai byùxik nyhit xik má nyi é Eruk, myiqhtoi htoi tô é gi, "Wú keq, haù Yhumsíng gi, Yhâng é chyoiyúng bang mun mun sen sen

* 1:11 Ka-in gi, yhanggu lé sat sù nghut lhê. Apùn 4:1-8
ngunzè lé myoqnoq mù, Garai lé shut sù nghut lhê. Gyung So 22:1-35

† 1:11 Balam gi, myiqhtoi nghut lhê, nghut kôlháng,
‡ 1:11 Kora gi, Garaí byù nghut é hkyô-u shé sù Mosheq lé gumlau toq é hkyangjong nghut lhê. Gyung So 16:1-33

eq rahá gyó lé lo nyi bê nghut ri. ¹⁵ Yhang gyó lé lo é gi, yuq hkgangmó lé tarâ jéyáng râ matú eq, haú tarâ a hkunggâ é lhunglhâng bang, tarâ a hkunggâ é đông kut é muzó pé banshoq lé le, tarâ a hkunggâ é yubak byu pé, Yhang lé taí shut é dang htân pé banshoq lé le, mara byi râ matú nghut lhê." gâ ri. ¹⁶ Byù haú bang gi, put dang taí é bang eq mara hân dang taí é bang nghut akô; yhangmoq gi, yhumsîng ô nau é agè ashop hkyô cháng kô é htoq agó, yhumsîng gùng yhumsîng nghutbûn é dang taí é eq yhumsîng maiwáng zat é đông, góbang lé owaq é bang nghut akô.

Hkam Jân Râ Hkyô

¹⁷ Nghut kôlhang, ngò chyitdap é luzúm wú ê, nungmoq gi, haú nga-nhông é Yhumsîng Yesuq Hkrisduq é lagyô pé mai te taí tô é dang lé, bûn nyi keq. ¹⁸ Hkâsu mù gâ le, yhangmoq gi, "Haú ló htâng é ahkýng pé má, tarâ a hkunggâ é yhumsîng ô nau é hkyô đông châng é, rhoijap-dap dang taí é byu pé nyi to râ nghut lhê." ga, nungmoq lé taí wú kô é nghut lhê. ¹⁹ Byù haú bang gi, nungmoq lé gam hkoq é bang, mingkan hkyô lé baú za châng é bang, haú Woi-nyí a bo é bang nghut akô.

²⁰ Nghut kôlhang, ngò chyitdap é luzúm wú ê, nungmoq gi, haú Chyoiyúng Woi-nyí má kyûdúng é đông, nungmoq é chyoiyúng é lumjîng hkyô má, yhumsîng gùng yhumsîng lhoq kô yu nyi keq. ²¹ Ahtum abyuq é asak lé wó yû râ matú, haú nga-nhông é Yhumsîng Yesuq Hkrisduq é shogyo nhikmyin hkyô lé láng uchyang, nungmoq gi, Garai Gasâng é chyitdap myit má, yhumsîng gùng yhumsîng nyi nyi keq.

²² Lumjîng hkyô má úng-âng é bang lé, shogyo nhikmyin nyi keq; ²³ góbang lé gi, myi mai she htoq yû mù, hkyi yû keq; dum, góbang lé gi, sidiq myit èq shogyo nhikmyin hkyô tân shit mù, haú gungshô é achâq achyut dap é yhangmoq é mebu lé chaq nyi keq.

Hkya-on Kungtôn Dang

²⁴⁻²⁵ Nungmoq lé, a lingbat shoq wó up-zúng lú, nungmoq lé, mara hân râ hkyô a bo é za, gabú dik é đông mai Yhang é hpungwup shingkang bo é myoq hí má wó shuí shit é, nga-nhông é hkyi yû Sû, rayuq

za nghut é Garai Gasâng chyáng, hpungwup shingkang, hkikhkam hkyô, hpungwup a-tsam eq ahkáng ayá gi, nga-nhông é Yhumsîng Yesuq Hkrisduq đông mai, láỉ lò bê ipyat pé má le, ahkuí pyat má le, pyat dedu ahtum abyuq má le, rujoq nyi sháng gaq ô! Amen.

YOHAN É SHING-RÁN Laiká (Revelation)

Dang-hi Hpóng

¹ Yesuq Hkrisduq é shing-rán shí gi, adê myáng má dut lò râ hkyô pé lé, Yhâng é dui-nhâng zoshâng wuì lé tân shit nhâng râ matú, Garai Gasâng eq Yesuq Hkrisduq Yhang lé byî tô é nghut lhê. Yhang gi, Yhâng é maumang lagyo lé nhang kat luí, Yhâng é dui-nhâng zoshâng Yohan lé, shing-rán haú sé nhang ri. ² Yohan gi, Garai Gasâng é mungdang eq Yesuq Hkrisduq é saksé lé, yhang myang é gû banshoq eq rajung za saksé hkâm kyô é nghut ri. ³ Haú ahkýng gi, chyâng lò bê nghut é yanmai, myiqhtoi dang shí pé lé, nghap kyô é sù eq, gyô yù luí, haú má kê tô é gû lé châng kut é bang gi, hkungsô wó nyi akô.

Noqkuq Hpúng Nyhit Lhum Lé Dang Kyô Kat É Hkyô

⁴ Ngò Yohan gi, Asia mau mâ é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hkohkâm-tanghkuq hí mâ é nyhit woi-nyí chyáng mai le, ⁵ lhumzuí é saksé nghut sù, shi byuq é mai sâng-hi dui toq é zomún dut sù, myidàm htoq mâ é hkohkam pé lé up sù, Yesuq Hkrisduq chyáng mai le, jeju eq nguóngón hkyô gi, nungmoq chyáng joq nyí sháng gaq.

Nga-nhúng lé chyitdap luí, Yhâng é suí eq, nga-nhúng lé, nga-nhúng é mara pé mai lhoq lhut byî é eq, ⁶ Yhâng é Garai Gasang eq Íwa lé dojaú râ matú, nga-nhúng lé, mingdán byu pé eq hkyangjông pé* dut nhang é Su chyáng, duqwup shingkang eq hpungwup a-tsam gi, pyat dedu ahtum abyuq ru joq nyí sháng gaq ô! Amen.

⁷ Wú keq, Yhang gi, mhut mai lé lo nyi é nghut luí, myoqjí hkangmó gi, Yhang lé myàng kó râ nghut lhê; haú Yhang lé htaú rot bang† lháng, myàng kó râ nghut lhê;

haú myidàm htoq mâ é byù lhunglhang bang gi, Yhâng é yanmai, yón ngau é hui zo kó râ nghut lhê.

Haú đông nghut sháng gaq! Amen.

⁸ "Ngò gi, Alhpa eq Omega‡ nghut lhê. Ahkui pyat le, a-nham pyat le, htang pyat má le rû nyi nyi é, wum-o a-tsam dik shoq bò Sù nghut lhê." ga, haú Yhumsing Garai Gasang taí ri.

Byu Yhangzo Su Dut Su É Hkyô

⁹ Yesuq é, wuìhke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Patmo zinlóng má nyi nyi é nghut lhê.

¹⁰ Haú Yhumsing é Buinyì§ má, ngò gi, Woi-nyí eq shuí moq byuq ló é nghut mù, "Nàng myang é eq rajung za, chyúmding ralhum má ká luí, Ehpesu, Samurna, Pergamu, Htu-atira, Sardi, Hpiladehpi eq Ladoki wà pé má joq é, ¹¹ noqkuq hpúng nyhit lhùm chyáng hun kat aq." ga, tut htê su gâ é htê mó, ngá é nunghtáng má mying é lé, ngò wó gyô ri.

¹² Haú ngo lé nyo nyi é htê yhumsing lé wú râ matú, ngò, gùng lhing kat é nghut lhê. Ngò gi, gùng lhing kat é hkùn, hìng myi-kok tsungjang nyhit lhum lé le, ¹³ myi-kok tsungjang haú pê é agùng má, byu yhangzo su dut é Sù rayuq nyi tô é lé le, myang kat ri; haú yuq gi, hkyigoq htoq jé é buhìng wut to luí, wànggàng má hìng wànggò le wut tô ri. ¹⁴ Yhâng é ulhum eq xâm gi, sau hpyû maú eq gyo su hpyu zan tô ri; Yhâng é myoqjí gi, myishâm su duq nyi ri. ¹⁵ Yhâng é hkyî gi, myi bunghkyûng má jên yu é jet é gyi su dut ri; Yhâng é htê gi, wuì myo myo mying hùm é htê su gâ ri. ¹⁶ Yhâng é loqyo loq má gi, kyî nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyí gùng buì su tso nyi ri.

¹⁷ Yhang lé myang é hkùn, ngò gi, shí gùng su, Yhâng é hkyî wang má lèng leq tô é nghut lhê. Haú hkùn, Yhang gi, Yhâng é loqyo loq ngá ahtoq má ke byi mù, taí é gi, "Hkâgyuq, Ngò gi, Sâng-hi eq Jihtùm nghut

* 1:6 Htoq Ló 19:6 † 1:7 Htau rot bang gâ é gi, Yesuq tapzìng má jén to huí é hkùn, Yhâng é namcham má lham eq htaú é bang lé gâ lhê. ‡ 1:8 Alhpa eq Omega gi, Grik laiká myhí mâ é sâng-hi cham eq ló htàng cham nghut lhê; haú taí nau é gi, rû dui nyi sù gâ é nghut lhê. § 1:10 Yhumsing é Buinyì gâ é gi, yuban nyí lé gâ lhê.

lê. ¹⁸Ngò gi, dui nyi Sû le nghut lê; Ngò gi, shî bê nghut kôle, wú keq, pyat dedu ahtum abyuq dui nyi é nghut lê! Hau htoq agó, Ngò gi, shî hkyô eq momîng é zoqshi pé lé chûng Su nghut lê.

¹⁹Haû mù, nàng myang é lé le, ahkui dut é hkyô eq htàngnùng le dut lò râ hkyô lé le, kê to aq. ²⁰Nàng myang é, Ngá é loqyo loq mâ é kyî nyhit cham eq hîng myi-kok tsungjang nyhit lhûm é záu tô é hkyô é lichyúm gi, isu nghut lê. Kyî nyhit cham gi, noqkuq hpúng nyhit lhûm é maumang lagyo nyhit yuq nghut ri; myi-kok tsungjang nyhit lhum gi, noqkuq hpúng nyhit lhum nghut ri.

2

Ehpesu Myuq Mâ É Noqkuq Hpúng Lé Kâ Kat É Laiká

¹Ehpesu myuq mâ é noqkuq hpúng é maumang lagyo lé isu nghû kê kat aq:

Haû yhâng é loqyo loq má kyî nyhit cham chûng luí, hîng myi-kok tsungjang nyhit lhûm é gyoro má sô nyi Su é dang gi, ²Ngò gi, náng é a-kyang, nàng shikut é hkyô, nàng hkam jân é hkyô pé lé, sê lê. Agè ashop é byu pé lé, nàng a jân pyâm é hkyô lé le, haû lagyo a nghut kôlhang, lagyo pé nghut lê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kô é hkyô lé le, Ngò sê lê. ³Nàng gi, shikut shirâng bê nghut é htoq agó, Ngá mying é yanmai, wuîhke hkyô lé hkam jan bê nghut kôle, ngú byuq é hkyô a bò nghut ri.

⁴Nghut kôlhang, nàng gi, náng é sâng-hi lê é chytidap myit lé tô pyâm é yanmai, ngò, nang lé mara hûn râ hkyô joq ri. ⁵Nàng hká mai byit gyó é lé, myit bun aq! Myit lhîng luí, sâng-hi nàng kut é muzó pé lé, kut aq. Nàng myit a lhîng é nghut jáng, ngò, náng chyáng lé jé mù, náng é myi-kok tsungjang lé, hau é jowò mai huí pyâm byi râ nghut lê. ⁶Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, náng chyáng ge é hkyô rallhum bo ashî nghut ri.

⁷Gyo râ nohkyap dap sù gi, haû Woinyí mai noqkuq hpúng pé lé taí é hkyô

lé, gyô yù sháng gaq. Wó ung é sù lé gi, haû Garai Gasâng é hparadisú má joq é asak sigâm mâ é ashi zo râ ahkáng, Ngò byi râ nghut lê.' gâ ri.

Samurna Myuq Mâ É Noqkuq Hpúng Lé Kâ Kat É Laiká

⁸Samurna myuq mâ é noqkuq hpúng é maumang lagyo lé isu nghû kê kat aq:

Haû Sâng-hi eq Jihtûm nghut é eq, shi byuq luí, asak dum dui Su é dang gi, ⁹Nàng hui zô é wuîhke jamjau hkyô eq nàng myung é hkyô lé, Ngò sê lê; nghut kôlhang, nàng gi, wó sù nghut ri! Tsadán é tarajong bang nghut to luí, Yudaq byu pé a nghut kôlhang, Yudaq byù nghut lê gâ é bang taí hpoí é hkyô lé le, Ngò sê lê. ¹⁰Nàng hui zo râ nghut é wuîhke hkyô lé, hkâgyuq. Ngò, nungmoq lé taí kyo kôlé, haû nat Tsadán gi, nungmoq lé chyam wú é dông, nungmoq chyáng mâ é ra-am lé, htóng má hkyô pyâm râ nghut lê; hau htàng, nungmoq gi, raxê nyí tup zing-rí é hui zo kó râ nghut lê. Shî shoq lhumzui nyi aq, haû hkûn, Ngò, nang lé, asak janmaú byi râ nghut lê.

¹¹Gyo râ nohkyap dap sù gi, haû Woinyí mai noqkuq hpúng pé lé taí é hkyô lé, gyô yù sháng gaq. Í dâm nghû râ shi é hkyô* gi, wó ung é sù lé, wó záng htung râ a nghut.' gâ ri.

Pergamu Myuq Mâ É Noqkuq Hpúng Lé Kâ Kat É Laiká

¹²Pergamu myuq mâ é noqkuq hpúng é maumang lagyo lé isu nghû kê kat aq:

Haû shamsó í shut dap é shâm wó Su é dang gi, ¹³Nàng nyi é jowò lé, Ngò sê lê; haû gi, Tsadán é hkohkâm-tanghkuq joq é jang nghut ri. Nghut kôlhang, nàng gi, Ngá myîng má lumhkau nyi é nghut luí, Tsadán nyi é jang nghut é nungmoq é myuq má, Ngá é lhumzui é saksé hpó Antipa sat huí é hkûn lhang, nàng Ngo lé lumjîng é hkyô lé, a he-ngik pyâm nghut ri.

¹⁴Nghut kôlhang, Ngò, nang lé mara hûn râ hkyô ratsui joq ashî; hkâsú mù gâ le, hparà lhô pé lé tîng byî é zoshuq zô é eq, ashop é dông gungsho zùm yap é mara kut shut râ matú, Israellaq byu pé lé mhoq hpyoq râ hpaqchyî, Balak lé

* 2:11 Í dâm nghû râ shi é hkyô gâ é gi, ngaraí ming wang é lé gâ lê.

mhoq byî é Balam é mhoqshit hkyô lé myhik zing é byu pé, náng chyáng nyi ri. ¹⁵Haû eq rajung za, haû Nikola é chángzô pé mhoqshit é hkyô lé myhik zing é byu pé le, náng chyáng nyi ri. ¹⁶Haû mù luî, myit lhîng aq! Haû a nghut jáng, Ngò gi, náng chyáng hân jé lé mù, haû Ngá nhut mai htoq é sham èq yhangmoq lé zan râ nghut lhê.

¹⁷Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq. Wó ung é sù lé gi, haq tô é mannaq muk lé le, myîng asik kâ tô é luqgok hpyû racham lé le, Ngò byi râ nghut lhê, lhom hap yu é sù za sheq, myîng haû lé sé râ nghut lhê.' gâ ri.

Htuatira Myuq Mâ É Noqkuq Hpûng Lé Kâ Kat É Laiká

¹⁸Htuatira myuq mâ é noqkuq hpûng é maumang lagyo lé isu nghû kâ kat aq:

Haû myishâm su duq nyi é myoqjí eq jet é gyi su dut é hkyô dap é Sù, Garai Gasâng é Yhangzô é dang gi, ¹⁹'Náng é a-kyang, chyitdap myit, lumjîng myit, dojaú é hkyô, hkam jân é hkyô pé lé le, nàng gi, hí lhê htoq má ahkuí je myô zui sai é hkyô lé le, Ngò sê lhê.

²⁰Nghut kôlhâng, yhumsing gùng yhumsîng myiqhtoi myhí nghut lhê gâ é myiwe Yezebulaq lé, nàng nyi nhang tô é yanmai, Ngò, nang lé mara hûn râ hkyô joq ri. Yhang gi, Ngá é dui-nhâng zoshâng wuî lé, ashop é dông gungsho zùm yap râ eq hparà lhô pé lé tîng byî é zoshuq zo râ hkyô lé mhoqshit luî, yhangmoq lé hkyô shuî nghoq ri. ²¹Ngò gi, yhang lé, ashop é dông gungsho zùm yap é hkyô mai myit lhîng râ ahkýng byi kôlhâng, yhang gi, a myit lhîng naù nghut ri. ²²Haû mù, Ngò gi, yhang lé, jamjau hui râ yhupchong má dú lheq pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lhîng kô é za a nghut jáng, wuîhke jamjau mó hui zo nhâng râ nghut lhê. ²³Ngò gi, yhang zô pé lé sat pyám râ nghut lhê; haú hkûn, Ngò gi, myit nhikllhum eq myit é hkyô lé sé Sù nghut é lé le, nungmoq kut é muzó eq rajung za, nungmoq yuq hkanmó lé,

Ngò tau byi râ nghut é lé le, haû noqkuq hpûng pé banshoq wó sé kó râ nghut lhê. ²⁴Mhoqshit hkyô haû lé a châng é eq Tsadán é nik é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò taí kôlé, nungmoq lé gotû wòlai Ngò jat byi râ a nghut. ²⁵Ngò jé lé é jé shoq, nungmoq wó tô é lé za myhik zing nyi keq.

²⁶⁻²⁷Wó ung é eq Ngò ô nau é hkyô lé jîhtûm jé shoq châng é sù lé gi, "Yhang gi, yhangmoq lé, shamtoq dumb-áng èq up† râ nghut lhê; Yhang gi, tso-au hkoq pé lé su, yhangmoq lé bat hkyop pyám râ nghut lhê."✧

gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê. ²⁸Ngò gi, yhang lé, haû bó-myhû byi râ nghut lhê. ²⁹Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

3

Sardi Myuq Mâ É Noqkuq Hpûng Lé Kâ Kat É Laiká

¹Sardi myuq mâ é noqkuq hpûng é maumang lagyo lé isu nghû kâ kat aq:

Haû Garai Gasâng é woi-nyí nyhit woi-nyí eq kyî nyhit cham lé chûng Su é dang gi, 'Ngò gi, náng é a-kyang lé sê lhê; nàng gi, asak dui nyi sù ga kôlhâng, shi byuq sù nghut ri. ²Gyîng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâsu mù gâ le, Ngá é Garai Gasâng é hí má, náng é a-kyang a gumjup é hkyô lé, Ngò myang ri. ³Haû mù, nàng hkâsu kut wó hap yu é eq wó gyô yu é hkyô lé, myit bun aq; haú dông cháng luî, myit lhîng aq. Nàng a bûn gyîng é nghut le gi, Ngò hkau sù su lé râ nghut luî, nàng gi, Ngò hká u lé râ lé, sé râ a nghut.

⁴Nghut kôlhâng, Sardi myuq má, yhumsing é mebu lé agot a-û a kut é byù ra-am nyi akô. Haú bang gi, hpyu é mebu wut luî, Ngò eq rahá sô wún kó râ nghut lhê; hkâsu mù gâ le, yhangmoq gi, gîngdán é bang nghut akô. ⁵Wó ung é sù gi, haú bang su, hpyu é mebu myang wut

† 2:26-27 Shamtoq dumbáng èq up gâ é gi, ahko ahkáng banshoq wó luî, up é lé gâ lhê. ✧ 2:26-27 Hkya-on 2:9

râ nghut lhê. Ngò gi, haú yuq é myìng lé, hkâ-nhám le, asak jihpán laiká buk mai yu pyám râ a nghut; hau htoq agó, Ngá Wâ é hí má le, Yhâng é maumang lagyô pé é hí má le, haú yuq é myìng lé, Ngò yín yû râ nghut lhê. ⁶Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

Hpiladehpi Myuq Mã É Noqkuq Hpûng Lé Kâ Kat É Laiká

⁷Hpiladehpi myuq mã é noqkuq hpûng é maumang lagyô lé isu nghû kâ kat aq:

Haú chyoiyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpóng loshoq myhî é Su é dang gi, ⁸Nàng kut é muzó pé lé, Ngò sê lhê. Wú aq, ó yuq le a wó myhî é hkum ralhum, Ngò náng hí má hpông to byî lhê. Nàng gi, wum-o ratsuí za bò kôlhang, Ngá é dang gyo luí, Ngá é myìng lé a he-ngik pyâm é hkyô lé, Ngò sê lhê. ⁹Haú tarajong má noqkuq kôlhang, Tsadán lé dojaú bang nghut é, Yudaq byù a nghut kôlhang, nghut lhê gâ é byù mhaú pé lé, Ngò, náng é hkyî wang má, lé paí gop nhâng luí, Ngò, nàng lé chyitdap é hkyô, yhangmoq lé sé nhâng râ nghut lhê. ¹⁰Nàng gi, myit hîng hîng hkam jan râ é Ngá é hkunmó lé châng nyì bê nghut é yanmai, myidàm htoq má nyi é bang lé chyam lik wú râ matú, mingkan gón má jé râ nghut é wúhke jamjau ahkyíng mai, Ngò, nang lé lhoq lhut yû râ nghut lhê.

¹¹Ngò gi, a myáng má jé lé lô râ nghut lhê. Náng é janmaú lé, ó yuq èq le a wó yu pyám byi sháng gaq, nàng wó tô é pé lé myhik zing nyì aq. ¹²Wó ung é sù lé gi, Ngá é Garai Gasâng é noqkuq yhûm mã é hkungzing mó dut nhâng râ nghut lhê. Haú yuq gi, hkâ-nhám le haú mai dum htoq ló râ a nghut. Ngò gi, Ngá é Garai Gasâng é myìng lé le, Ngá é Garai Gasâng chyáng mai htoq luí, mauhkúng mai gyó lé lo é, Yerusalem wà mó Asik ga é, Ngá é Garai Gasâng é myuq myîng lé le, Ngá é myìng sik lé le, yhâng chyáng kâ tap byi râ nghut lhê. ¹³Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

Ladoki Myuq Mã É Noqkuq Hpûng Lé Kâ Kat É Laiká

¹⁴Ladoki wà mó mã é noqkuq hpûng é maumang lagyô lé isu nghû kâ kat aq:

Haú lhumzúi é eq tengmán é saksé nghut é, Garai Gasang hpan tô é lé up é, Amen gá Su é dang gi, ¹⁵Ngò gi, nàng kut é muzó lé sê lhê; nàng gi, gú le a nghut, nye le a nghut dut ri. Nàng gi, gú jáng jâng gú, nye jáng jâng nye dut râ lé, Ngò ô nau ri. ¹⁶Nghut kôlhang, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám râ za nghut bê. ¹⁷"Ngò gi, wó sù nghut lhê; ngò gi, sutzè gyai wó bê nghut luí, haí lháng a ra lo." ga nàng taí ri. Nghut kôlhang, nàng gi, wúhke jamjau hui sù, asho awui dut sù, myùng sù, myoqjit sù eq achîn dut sù nghut é lé, nàng a sé myhi-nhung. ¹⁸Haú mù luí, nàng gi, wó sù sùt sù wó dut sháng gaq, myi má jên yu é hîng lé le, nàng achîn dut é hoq hpu hkyô lé, wó nghop pyám sháng gaq, wut râ matú, mebu hpyù lé le, nàng myoq wó myâng sháng gaq, náng é myoqjí má kat râ matú, myoq chi lé le, nàng, Ngá chyáng mai wui yù râ matú, Ngò, nang lé hpaqchyí byî lhê.

¹⁹Ngò chyitdap é bang lé gi, tan luí, mhoqshit lhê. Haú mù, nàng gi, hân bûn gying luí, myit lhíng aq. ²⁰Wú aq! Ngò gi, hkum yâm má yap to luí, hkum lé kok nyi lhê. Rayuq yuq, Ngá é htê lé wó gyo luí, hkum hpóng byî é nghut jáng, Ngò gi, wàng mù, haú yuq eq rahá zo shuq râ nghut lhê; haú yuq le, Ngò eq rahá zo shuq râ nghut lhê.

²¹Ngò gi, ûng luí, Ngá Wa eq rahá Yhâng é hkohkâm-tanghkuq má zung é eq rajung za, wó ung é sù lé gi, Ngò eq rahá Ngá é hkohkâm-tanghkuq má zùng râ ahkáng, Ngò byi râ nghut lhê. ²²Gyo râ nohkyap dap é sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq.' gâ é nghut ri." gâ ri.

4

Mauhkúng Htoq Má Hkohkâm-tanghkuq Joq É Hkyô

¹Hau htâng má, ngò wú kat le, mauhkúng má hkum ralhum bóng tô é lé myang ri. Ngò sâng-hî dàm wó gyô é

tut htê su gâ é danghtê ngo lé taí é gi, "Shí má doq lò aq, htângnùng má dut lò râ hkyô pé lé, Ngò, nang lé tún shit bá." gâ ri. ²Haú hkûn jáng yhang, ngò gi, Woi-nyí má moq byuq ló luí, mauhkûng htoq má hkohkâm-tanghkuq ralhú joq é lé myàng ri; tanghkuq haú má, byù rayuq zung tô ri. ³Haú má zung to Su é isâm gi, huhpé eq ne yúng lungsêng su dut ri. Huí nyuì lungsêng su dut é woqgan síng-yang gi, haú hkohkâm-tanghkuq má hkông lêng tô ri. ⁴Hkohkâm-tanghkuq hau é lêngghkyuq má, hkohkâm-tanghkuq gotú í xe myí lhum le joq to luí, hpyu é mebu wut mù, ulhum má hêng janmaú tsûng tô é suwún í xe myi yuq gi, haú má zung tô bum akô. ⁵Haú hkohkâm-tanghkuq mai, lhap hpyat é, mying hûm é eq maugum gûm é pé dut htoq lo ri. Haú hkohkâm-tanghkuq hí má, myi-kok nyhit lhum le duq tô ri; haú pé gi, Garai Gasâng é woi-nyí nyhit woi-nyí nghut ri. ⁶Hau htoq agó, san zâ é myoqjâm su dut mâ é wui-nhông le, haú hkohkâm-tanghkuq hí má dítg tô ri.

Haú hkohkâm-tanghkuq agùng má le, lêngghkyuq má le, hî-u nunghtáng lêngghkyuq myoqjí dap é dui é dusak myí du nyi tô ri. ⁷Dui é dusak sâng-hî du gi, hkanghkyi su dut ri; í du nghû râ du gi, nohtó su dut ri; sûm du nghû râ dû é myoqdong gi, byu myoqdong su dut ri; myí du nghû râ du gi, dâng wún é zunbung su dut ri. ⁸Dui é dusak myí du haú gi, du hkangmó dùng hkyuq lhum lhum dap é htoq agó, lêngghkyuq má myoqjí kôm dap luí, dùng hkaú má lêng dap ri. Yhangmoq, nyí myín hkâ-nhám a no loshoq taí nyi kô é gi,

"A-nham pyat le, ahkuí pyat le, htang pyat má le, rû nyi nyi é, haú wum-o a-tsam dik shoq bò Sû Yhumsing Garai Gasang gi,

chyoiyúng, chyoiyúng, chyoiyúng nyi ri." gâ akô. ⁹Haú dui é dusak myí du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shingkang, aróng eq jeju bun hkyô byí é hkangmó, ¹⁰haú suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akô. Yhangmoq gi, yhangmoq é hkohkâm-janmaú lé, haú

hkohkâm-tanghkuq hí má hkyut to mù, taí kô é gi,

¹¹"Ngamoq é Yhumsing eq Garai Gasang ê, nyi mi-nyì, joq mijoq lé, Nang hpan to bê nghut luí,

haú pé gi, Nang ô nau é dông hpan tô é hui bê nghut mù, nyi to joq tô bùm bê nghut é yanmai,

Nang gi, hpungwup shingkang, aróng eq hpungwup a-tsam lé, hap yù gíng Sû nghut ri."

gâ akô.

5

Chyúmding Eq Sauzo

¹Hau htâng, ngò gi, hkohkâm-tanghkuq má zung to Su é loqyo loq má, í shut é laiká kê to é, dizik nyhit lhum tap tô é chyúmding le myang ri. ²Hau htoq agó, a-tsam mó bo é maumang lagyo rayuq gi, "Haú dizik pé lé hí pyám râ eq chyúmding lé hpóng râ gi, ó yuq wá gíngdán lhê lú?" ga luí, htê mó eq wut taí nyi é lé le, ngò myang ri. ³Nghut kôlháng, mauhkûng htoq má le, myigùng htoq má le, myigùng ô má le, haú chyúmding lé wó hpóng râ eq ahkaú má wó wú râ byù rayuq lêng a nyi nghut ri. ⁴Haú chyúmding lé hpóng mù, ahkaú má wú râ gíngdán é byù rayuq hkâlêng a nyi é yanmai, ngò gyai yhang ngau pyâm é nghut lhê. ⁵Haú hkûn, haú suwún wui mâ é rayuq, ngo lé taí é gi, "Hkâ-ngaú! Wú aq, haú Yudaq byuhú mâ é Hkanghkyi nghu é, haú Dawiq é Amyit nghut Sû gi, úng bê nghut luí, haú chyúmding eq haú mâ é dizik nyhit lhum lé wó hpông lhê." gâ ri.

⁶Hau htâng, haú dui é dusak myí du eq suwún wui é agùng mâ é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo haú gi, hkyuí nyhit lhum eq myoqjí nyhit lhum dap ri. Myoqjí haú nyhit lhum gi, myidàm htoq gón má nhang htoq kat é, Garai Gasâng é woi-nyí nyhit woi-nyí nghut ri. ⁷Haú Sauzo gi, lé mù, hkohkâm-tanghkuq má zung to Su é loqyô mâ é chyúmding lé yu ri. ⁸Haú chyúmding lé yu é hkûn jáng, haú dui é dusak myí du eq suwún í xe myi yuq gi, Sauzô é hí má ngóm gop akô. Yhangmoq yuq hkangmó gi, tíng eq sâng-yúng bâng é kyúdung dang gâ é

namngón jung byíng mui tô é hîng góm pé le chung bum akô nghut ri. ⁹Yhangmoq gi, "Nàng gi, haû chyúmding lé yù râ eq hau é dizik pé lé hpóng râ gingdán Sû nghut ri.

Haî mù gâ le, Nàng gi, sat hui bê nghut luî, byuhú hkangmó mai le, myíng hkangmó mai le, byù myû hkangmó mai le, mingdán hkangmó mai le, Garai Gasâng é matú, Náng é suí èq byù pé lé wui hpyit yû bê nghut ri.

¹⁰ Nga-nhûng é Garai Gasang lé dojaú râ matú, Nàng gi, yhangmoq lé, mingdán byu pé eq hkyangjông pé dut nhâng bê nghut luî, yhangmoq gi, myidàm htoq má up kó râ nghut lhê."

ga luî, mahkôn sik ralhum hkôn akô nghut ri.

¹¹ Haú hkûn, ngò wú kat le, haû hkohkâm-tanghkuq lhînghkyuq má le, dui é dusak pé eq suwún wui é lhînghkyuq má le, nyi tô bum é maumang lagyo ajùm ayò mun mun sen sên é htê lé wó gyô ri.

¹² Yhangmoq gi,

"Haû sat hui bê Sauzo gi, hpungwup a-tsam, sutzè, hpaqchyî byéng-yá, wum-o, aróng sitang, hpungwup shingkang eq hkya-on kungtôn hkyô lé, hap yù gíng ri." ga luî, htê mó èq ton bum akô nghut ri.

¹³ Hau htoq agó, mauhkûng htoq má nyi é, myigùng htoq má nyi é, myigùng ô má nyi é, wuiming má nyi é, hpan to huî é lhunglhang gi,

"Hkya-on kungtôn hkyô, aróng sitang, hpungwup shingkang eq hpungwup a-tsam gi,

haû hkohkâm-tanghkuq má zung tô é Sû eq Sauzô chyáng,

pyat dedu ahtum abyuq ru joq nyî sháng gaq ô!"

ga luî, ton nyi bùm kô é lé, ngò wó gyô ri.

¹⁴ Haû dui é dusak myî du gi, "Amen" ga taí jang, haû suwún wuî gi, ngóm gop luî noqkuq akô nghut ri.

¹ Haû Sauzo gi, dizik nyhit lhum mâ é sâng-hî lhum lé hpông kat é hkûn, ngò myang é nghut lhê. Hau htâng, haû dui é dusak myî du mâ é radu gi, maugum su gâ é htê mó èq, "Lé aq." gâ é lé, ngò wó gyô ri. ² Ngò wú kat é hkûn, ngá é myoq hí má myang hpyû radu nyi tô é lé myang ri! Haú má jî to sù gi, lai rahpu chung tô é htoq agó, yhang lé, janmaú ralhum tsûng to byî luî, ûng budang wó râ matú ûng sù rayuq dông htoq ló ri.

³ Haû Sauzo gi, í lhum nghû râ dizik lé hpông kat é hkûn, haû í du nghû râ dui é dusak gi, "Lé aq." ga taí é lé, ngò wó gyô ri. ⁴ Hau htâng, myang nè radu htoq lo ri; haú má jî tô é sù gi, myidàm htoq mâ é nguingón simsaq hkyô lé wup yù râ eq, byù yhangchang rayuq eq rayuq sat lhum nhâng râ a-tsam byî é hui sù nghut luî, yhang lé shâm mó rahkyam le byî to bê nghut ri.

⁵ Haû Sauzo gi, sùm lhum nghû râ dizik lé hpông kat é hkûn, haû sùm du nghû râ dui é dusak gi, "Lé aq." ga taí é lé, ngò wó gyô ri. Ngò wú kat le, myang noq radu ngá myoq hí má nyi tô é lé myang ri! Haú má jî tô é sù gi, yhâng é loq má jàng rahpu chung to ri. ⁶ Haú hkûn, "Ra-nyí é zuihpau gi, sungso rabyé, ra-nyí é zuihpau gi, muk-yo guq sum byé nghut lhê; haû tsanlun xû eq tsibiyaq wing lé kúm gi, hkâlhoq hten kó." gâ é htê, haû dui é dusak myî du hkaû mai htoq ló é su gâ é lé, ngò wó gyô ri.

⁷ Haû Sauzo gi, myî lhum nghû râ dizik lé hpông kat é hkûn, haû myî du nghû râ dui é dusak gi, "Lé aq." ga taí é lé, ngò wó gyô ri. ⁸ Ngò wú kat é hkûn, ngá é myoq hí má, myang muí radu nyi tô é lé myang ri! Haú má jî to su é myíng gi, Shî hkyô gâ ri; Moming le, yhâng é htâng má châng tô ri; yhangnhik gi, sham èq, mutmó gyó é èq, wúm gyó é èq, tân é yosô-ze èq, myidàm htoq myi tú mâ é ratú má nyi é bang lé sat pyám râ ahkáng wó yu to bekô nghut ri.

⁹ Sauzo gi, ngo lhum nghû râ dizik lé hpông kat é hkûn, Garai Gasâng é mungdâng é yanmai le, yhumsîng hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri. ¹⁰ Yhangmoq gi, "Chyoiyúng é eq tengmán é, ahko ahkáng lhunglhang wó é Yhumsîng ê, myidàm htoq má nyi é

byu pé lé, ngamoq é sui manglat dam a byi é eq tarâ a jéyáng é za, hkâ-myháng jé shoq nyi nyi râ lhu?" ga, htê mó èq garu bum akô. ¹¹Haú hkûn, yhangmoq yuq hkangmó gi, bu hpyû hîng radung dung hut é hui luî, yhangmoq su sat hui râ bang, yhangmoq é byinzùm dui-nhâng zoshâng wui nghut é gumang wui sat huî ngap é hkûn jé shoq, razup zim za nyi shi keq ga taí é lé wó gyô akô nghut ri.

¹²Hkyuq lhum nghû râ dizik lé, Yhang hpông kat é hkûn, ngò myang ri; haú u lé, layàng mó le nún lo ri; haú bui gi, saumaú noq èq woq é pán su noq byuq ri; haú lhamó lhum gón gi, sui su ne byuq ri; ¹³maihpáng gâm lé, lai mó èq lo mut nhûn kat é hkûn, a myhíng shí é mairpáng-shi yoq gyó é su, mauhkûng mâ é kyî pé gi, myidàm htoq má byit gyó lo bum ri. ¹⁴Haú mauhkûng gi, laiká lé dîng lhûm é su htot pyâm é hui luî, bùm hkang bùm mó eq zinlóng lhumjup pé gi, yhâng é jowò mai huî pyâm é huî ri.

¹⁵Haú hkûn, haú myidàm htoq mâ é hkohkam pé, uphkâng bang, gyezaú pé, sut wó bang, wum-o a-tsam bò bang, jun pé eq luthkyô wó é lhunglhâng bang gi, bùm dong pé eq bùm pé mâ é luqgok gyoro pé má haq tô bùm uchyang, ¹⁶haú bùm pé eq luqgok pé lé, "Ngamoq é gùng htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é nhikmo-yô é hkyô mai le, ngamoq lé haq pyám kó laq. ¹⁷Hkâsu mù gâ le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi râ lhu?" ga garû taí bum akô nghut ri.

7

144,000 Yuq Masat Lhô Tap Hui Kô É Hkyô

¹Hau htâng má, maumang lagyo myi yuq gi, maumyî myi chyûn má yap to mù, myigùng htoq má le, wui ming htoq má le, sigâm pé má le, lai a hik sháng gaq ga, myi shut mâ é lai lé zû zing to kô é lé, ngò myang ri. ²Haú hkûn, haú dui nyi é Garai Gasâng é masat lhô chung é maumang lagyo gotû rayuq gi, buihtoq hkyam mai htoq lé lo é lé, ngò dum myang ri. Yhang gi, haú myigùng eq wui ming lé lhoq hten râ ahkáng wó tô é maumang lagyo myi yuq haú lé, ³"Nga-nhûng é Garai Gasâng dui-nhâng zoshâng wui é ngelang

má, ngamoq mai masat lhô a tap byi byi gi, haú myigùng, wui ming eq sigâm pé lé hkâlhoq hten shi kó." ga htê mó èq wut taí kat ri. ⁴Haú hkûn, masat lhô tap huî é bang byù hkâ-myhó yuq nghut é lé, ngò wó gyô ri. Israelaq byuhú banshoq mâ é 144,000 yuq nghut ri.

⁵Masat lhô tap huî yu é,
Yudaq up mâ é bang gi, 12,000 yuq,
Rubin up mâ é bang gi, 12,000 yuq,
Gat up mâ é bang gi, 12,000 yuq,
⁶Ashe up mâ é bang gi, 12,000 yuq,
Nahtali up mâ é bang gi, 12,000 yuq,
Manase up mâ é bang gi, 12,000 yuq,
⁷Simeon up mâ é bang gi, 12,000 yuq,
Lewiq up mâ é bang gi, 12,000 yuq,
Yishahka up mâ é bang gi, 12,000 yuq,
⁸Zebulun up mâ é bang gi, 12,000 yuq,
Yosep up mâ é bang gi, 12,000 yuq,
Ben-yamyin up mâ é bang gi, 12,000 yuq,
nghut bum akô.

Bu Hpyû Hîng Wut Bâng É Hkyô

⁹Hau htâng, ngò wú kat é hkûn, mingdán hkangmó mai le, byuhú hkangmó mai le, byù myû hkangmó mai le, myíng chângjup mai le, lé é bang, ó yuq lhang a ung nghap é byù moq mó gi, haú hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hîng wut luî, yhangmoq é loq má byùm-haq chung tô bùm kômù,

¹⁰"Hkyi yù hkyô gi, haú hkohkâm-tanghkuq má zung tô é nga-nhûng é Garai Gasang eq Sauzo chyáng mâ é nghut ri ô!"

ga luî, htê mó èq garû bum akô nghut ri. ¹¹Haú maumang lagyo lhunglhâng bang gi, haú hkohkâm-tanghkuq é lînghkyuq má le, suwún wui eq dui é dusak myî du é lînghkyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,

¹²"Amen! Hkya-on kungton hkyô eq hpungwup shing kang,
hpaqchyî byéng-yá eq jeju bun hkyô,
aróng, hpungwup a-tsam eq wum-o gi,
nga-nhûng é Garai Gasâng chyáng pyat dedu ahtum abyuq ru joq nyi sháng gaq ô!"

Amen!"

ga taí bum akô.

¹³ Haú hkûn, suwún wuí mâ é rayuq gi, "Shí bu hpyû hîng wut é bang gi, ô pé lhú? Yhangmoq gi, hkâmai lé é bang nghut akô lhú?" ga ngo lé myí ri.

¹⁴ Ngò gi, "Suwún hpó ê, nàng sê lhê." nghû tû taí jáng, yhang gi, "Shí bang gi, haú wúhke jamjau mó mai wó lut htoq lô luí, yhangmoq é bu hîng lé, haú Sauzô é sui má chí hpyû yù bê bang nghut akô.

¹⁵ Haú mù, yhangmoq gi, Garai Gasâng é hkohkâm-tanghkuq hí má nyí mù, Yhâng é noqkuq yhûm má, nyí, myín Yhang lé dojaú nyí kô é nghut lhê; haú hkohkâm-tanghkuq má zùng Sû gi, Yhâng é jongh-pang lé, yhangmoq é ahtoq má nghop byi râ* nghut lhê. ¹⁶ Yhangmoq gi, hkâ-nhám le, zòmut wuìshit hui râ a nghut lo; buì lhap é le, hkyíng hkyíng nyé é le, yhangmoq lé wó záng râ a nghut. ¹⁷ Hkâsu mù gâ le, haú hkohkâm-tanghkuq agùng mâ é Sauzo gi, yhangmoq é sau-rém sù dut râ nghut luí, Yhang gi, yhangmoq lé, asak wuìbúm jé shoq shuí ê râ nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi râ nghut lhê." ga taí ri.

8

Nyhit Lhum Nghû Râ Dizik Eq Namngón Jung Nyhê É Hîng Góm

¹ Haú Sauzo gi, nyhit lhum nghû râ dizik lé hpông kat é hkûn, mauhkûng htoq má hkyíng hkum rawuí kô zîm byuq ri.

² Haú hkûn, Garai Gasâng é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byi tô ri.

³ Namngón jung nyhê é hîng góm chung é maumang lagyo gotû rayuq gi, haú hkungga gyap yàm má lé yap tô ri. Haú hkohkâm-tanghkuq hí mâ é hîng hkungga gyap má, sân-yúng bang banshoq é kyû-dung dang eq rahá nhông byi râ matú, namngón jung gyai myo shoq, yhang lé byi tô ri. ⁴ Haú namngón jûng é myihkau gi, sân-yúng bâng é kyûdung danghtê eq rahá, maumang lagyo haú yuq é loq mai Garai Gasâng chyáng hkyang rot lô bê nghut ri.

⁵ Hau htâng, maumang lagyo haú yuq gi, góm lé yù mù, hkungga gyap mâ é myi lhoq

pyíng yù luí, myidàm htoq má dú hkyô kat é hkûn, maugum mó gûm é, mying hûm é, lhap hpyat é eq layàng nún é pé dut htoq lo ri.

Tut Mut É Hkyô

⁶ Hau htâng, tut nyhit lhum wó é mau-mang lagyo nyhit yuq gi, tut mut râ hen akô nghut ri.

⁷ Sâng-hî yuq nghû râ maumang lagyo gi, yhâng é tut lé mut kat ri; haú hkûn, sui nyó é likwò eq myi htoq lô mù, haú lé myidàm htoq má lhoq hkyô kat jáng, maumyí sum tú mâ é ratú eq sîkgâm sum tú mâ é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

⁸ Í yuq nghû râ maumang lagyo gi, yhâng é tut lé mut kat ri; haú hkûn, myi dap tô é bùm mó su é lé, wuìshuq lung-aú má dú hkyô kat ri. Wuìshuq lung-aú sum tú mâ é ratú gi, sui dut byuq bê nghut ri; ⁹ wuìshuq lung-aú mâ é dui jung sum tú mâ é ratú gi, shi byuq luí, wuì-sanghpo pé sum tú mâ é ratú gi, htên byuq bê nghut ri.

¹⁰ Sum yuq nghû râ maumang lagyo gi, yhâng é tut lé mut kat ri; haú hkûn, myihu dùm su duq é kyî mó racham gi, mauhkûng mai byit gyó lô mù, wuìlàng sum tú mâ é ratú eq wuìbúm pê htoq má lo gyó záng ri.

¹¹ Kyî hau é myíng gi, Kyî Kyî Hko gâ é nghut ri. Wuìlàng sum tú mâ é ratú hkô byuq luí, wuì haú hkô byuq é yanmai byù myo myo shi byuq bekô nghut ri.

¹² Myi yuq nghû râ maumang lagyo gi, yhâng é tut lé mut kat ri; haú hkûn, buì sum tú ratú, lhamó sum tú ratú, kyî sum tú ratú gi, hten luí, haú pê é sum tú ratú gi, mauchut byuq bê nghut ri. Hau htoq agó, nyí sum tú mâ é ratú le, myín sum tú mâ é ratú le, maubó a joq dut byuq ri.

¹³ Ngò wú nyi le, zunbung radu gi, maulat má dang wún mù, "Gotû maumang lagyo sum yuq eq mut râ nghut é, tut hte é yanmai, myidàm htoq má nyí bâng é matú, dingnyé, dingnyé, dingnyé nghut ri." ga luí, htê mó eq garú taí ri.

9

¹ Ngo yuq nghû râ maumang lagyo gi, yhâng é tut mut kat é hkûn, mauhkûng mai myidàm htoq má byit gyó tô é kyî racham

* 7:15 Yhâng é jonghpang lé, yhangmoq é ahtoq má nghop byi râ, gâ é gi, yhangmoq eq rahá nyí mù, yhangmoq lé upzúng nyí râ gâ é nghut lhê.

lé, ngò myang ri. Haù nik dik htùm é Lasang-dông é zoqshi gi, kyî haù lé byî tô ri. ²Kyî haù gi, nik dik htùm é Lasang-dông lé hpông kat é hkùn, myi bungghkyûng mó mai htoq lo é myihkau dùm sù é myihkau gi, dong haù mai htoq lo ri. Nik dik htùm é Lasang-dông haù mâ é myihkau dum é yanmai, bui eq maulat gi, mauchut byuq bê nghut ri. ³Myihkau dùm haù mai dinggám pé htoq lô mù, myidàm htoq má gyó lé akô; myidàm htoq mâ é gogok é a-tsam sù é a-tsam le, yhangmoq lé byî to bê nghut ri. ⁴Myidàm htoq mâ é wàhu pé lé le, mhan-haq hpoqnoq pé lé le, sikgâm pé lé le a lhoq htên é za, yhumsing é ngelang má Garai Gasâng é masat lhô a dap é byu pé lé baú zing-ri râ matú, yhangmoq lé taî tô ri. ⁵Nghut kôlhang, haù bang lé sat pyám râ ahkáng kúm gi, yhangmoq a wó e za, lhamó ngo hkyap tup haù bang lé zing-ri râ ahkáng za ru wó akô nghut ri. Haù bang hui zô é shî-nò jamjau gi, gogok èq pat hkùn no hpû é su yhang nghut ri. ⁶Haù buinyi pé má, byu pé gi, shî hkyô hô kôlhang, myàng kó râ a nghut; shî nau dik kôlhang, haù shî hkyô gi, yhangmoq chyáng mai hpang byuq râ nghut lhê.

⁷Dinggám haù pé gi, majan zan râ matú buí tô é myang pé su dut akô. Yhangmoq é ulhum má gi, hîng janmaú sù é tsûng tô é htoq agó, yhangmoq é myoqdong gi, byu myoqdong su dut bum akô nghut ri. ⁸Yhangmoq é xâm gi, myiwe wui é xâm su dut luî, yhangmoq é zui gi, hkanghkyi zui su dut ri. ⁹Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang ló é myang jûm eq myanglhêng pé mying hûm é htê su gâ ri. ¹⁰Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri râ a-tsam bo ri. ¹¹Yhangmoq é hkohkâm gi, nik dik htùm é Lasang-dông mâ é maumang nghut ri; haù é mying gi, Hebre myíng dong Abadon ga, Grik myíng dông Apolion* gâ ri.

¹²Sâng-hî lhum dingnyé gi, laí ló byuq bê nghut ri; nghut kôlhang, dingnyé í lhum jé lô shirâ nghut lhê.

¹³Haù hkyuq yuq nghû râ maumang

lagyo gi, yhâng é tut mut kat ri. Haù hkùn, Garai Gasâng é hí má joq é hîng hkungga gyap é hkyuî myî lhum mai htê htoq lo é gi, ¹⁴"Uhprat wui mó lêng má tuí lhûng tô é maumang myi yuq lé, nhang pyám aq." ga tut chung tô é hkyuq yuq nghû râ maumang lagyo lé taî é lé, ngò wó gyô ri. ¹⁵Haù hkùn, xângzo byù sum tú mâ é ratú lé sat pyám râ matú, ahkyíng, buinyi, lhôhkyap, zanwut lé, rì rì hen to bê nghut é haù maumang myi yuq lé nhang kat bê nghut ri. ¹⁶Myang ji jî é gyè jum gi, byù du sen í hkyîng bo é hkyô lé, ngò wó gyô ri.

¹⁷Ngò, shing-rán myang é má, myang jûm eq haù pé má ji bâng é wànggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyi pé é ulhum su dut luî, yhangmoq é nhut mai, myi, myihkau eq hang pé htoq lo ri. ¹⁸Haù yhangmoq é nhut mai htoq lo é myi, myihkau eq hang gâ é wúm ihkyup sùm jûng é yanmai, xângzo byù sum tú ratú gi, sat hui bekô nghut ri. ¹⁹Myang haù jum é sho-myi gi, lhangmuì su dut luî, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

²⁰Wúm ihkyup haù sùm jung mai wó lut luî, myit gyó tô é xângzo byu pé gi, yhangmoq é loq pé èq zui saí é muzó mai, myit a lhîng shi kô é htoq agó, nat gâng pé lé le, a wó myâng, a wó gyo, a wó sô é, hîng, ngùn, gyi, luqgok, sik pé é alhô lé le, noqkuq é hkyô lé a tô pyám shi kó nghut ri. ²¹Hau htoq agó, yhangmoq gi, byù sat é mù mai le, myoqheq hpaqchyî mù mai le, ashop é dông gungsho zùm yap é hkyô mai le, hkaù é mai le, myit a lhîng shi kó nghut ri.

10

Maumang Eq Laiká Ding É Hkyô

¹Hau htâng, ngò gi, wum-o bo é maumang lagyo gotú rayuq, mauhkûng mai gyó lé lo é lé myang é nghut lhê. Yhang lé gi, mhut èq htup yup to luî, yhâng é u htoq má woqgan síng-yang gyân tô ri; yhâng é myoqdong gi, bui su dut luî, yhâng é hkyî gi, myi zîng su dut ri. ²Yhâng é loq má gi, hpông tô é laiká ding zo ralhum chung tô ri; yhâng é loqyo hkyî gi, wuìshuq lung-aù

* 9:11 Apolion gâ é lichyúm gi, lhoq hten lhoq hpyoq sù gâ é nghut ri.

má nang, yhâng é loqpaî hkyî gi, myigùng htoq má nâng to luî, ³hkanghkyi mying é htê su ga, htê mó èq garû kat ri. Yhang garu kat jáng, maugum htê nyhit lhum tû gûm kat ri. ⁴Haû maugum htê nyhit lhum tû gûm kat é hkûn, ngò ká râ da jáng, "Haû maugum htê nyhit lhum tû gûm é hkyô lé zaú pyám aq; haú pé lé hkâkâ to." ga, mauhkûng mai danghtê htoq lo é lé ngò wó gyô kat ri.

⁵Haú hkûn, wuîshuq lung-aû eq myigùng htoq má nâng yap tô é lé, ngò myang é maumang lagyo haû gi, yhâng é loqyo loq lé mauhkûng shut tu toq kat ri. ⁶Haû mù, yhang gi, mauhkûng eq haú má nyi é lhunglhang lé le, myidàm htoq eq haú má nyi é lhunglhang lé le, wuîshuq lung-aû eq haú má nyi é lhunglhang lé le, hpan tô é, pyat dedu ahtum abyuq dui nyi Su é mying lé lang luî, dakam é gi, "Ahkyíng ratsuí le, lhoq myáng nyî lo râ a nghut! ⁷Nghut kôlhang, Garai Gasang mai Yhâng é dui-nhâng zoshâng wuî nghut é myiqhtoî pé lé taí to bê é danglù eq rajung za, Yhâng é zaú tô é hkyô gi, nyhit yuq nghû râ maumang lagyo èq yhâng é tut lé mut myhîng é buinyî pé má, shit râ nghut lhê." gâ ri.

⁸Hau htoq agó, ngò wó gyô wú bê mauhkûng mâ é htê, ngo lé dum taí é gi, "Haû wuîshuq lung-aû eq myidàm htoq má nâng yap tô é maumang lagyo loq má hpông tô é laiká ding lé, ê yù aq." gâ ri.

⁹Haû mù, ngò gi, ê luî, laiká ding zo haû, ngo lé byi râ matú maumang lagyo haû lé ê dung le, yhang gi, "Shî lé yù mù, zo kat aq. Náng é wam má hko râ nghut lhê; nghut kôle, náng é nhut má gi, byo-î su yhang chui râ nghut lhê." gâ ri. ¹⁰Haû mù, ngò gi, laiká ding zo haû lé, maumang lagyo é loq mai yù mù, zô é nghut lhê; haú hkûn, ngá é nhut má gi, byo-î su yhang chuî nghâm ri; nghut kôle, bàn zô kat é hkûn, ngá é wam hkaû má hkô bê nghut ri. ¹¹Haú hkûn, "Nàng gi, byù myû myo myo eq séng luî le, mingdán myo myo eq séng luî le, myíng ahú hú eq séng luî le, hkohkam pé myo myo eq séng luî le, myiqhtoi dum htoi ra râ nghut lhê." ga, ngo lé taí kyô ri.

11

Saksé Í Yuq É Hkyô

¹Ké râ jung dumbáng su dut é jàm-yang rahkat ngo lé byi luî, ngo lé taí é gi, "È mù, haû Garai Gasâng é noqkuq yhûm lé le, hkungga gyap lé le, kê wú luî, haú má noqkuq é bang lé nghap wú aq. ²Nghut kôlhang, shinggan mâ é wâng lé gi, a kê é za lhaî pyâm to aq; hkâsu mù gâ le, haû gi, tûngbaù pé lé byî to bê nghut lhê. Yhangmoq gi, haû chyoiyúng myuq lé, lhamó myixe í hkyap tup chôm nang kó râ nghut lhê. ³Hau htoq agó, ngò gi, ngá é saksé í yuq lé a-tsam byi râ nghut luî, yhangnhik gi, ji mebu wut* mù, buinyî 1260 nyî tup myiqhtoi htoi kó râ nghut lhê." gâ ri. ⁴Yhangnhik gi, haû myidàm Yhumsing é hí má yuq tô é tsanlun gàm í gâm eq myibung tsungjang í lhum nghut ri. ⁵Byù rayuq yuq, yhangnhik lé zing-ri nau é nghut jáng, yhangnhik é nhut mai myi htoq lô mù, yhangnhik é gyè pé lé nyhê hkyô pyám râ nghut lhê. Yhangnhik lé kâm zing-ri é sù gi, haû su kut sat pyâm é hui zo râ nghut lhê. ⁶Yhangnhik gi, yhangnhik myiqhtoi htoi nyi é buinyî pé má mau a wò râ matú, mauhkûng lé myhî pyám râ a-tsam wó akô; hau htoq agó, wuî pé lé sui dut nhâng râ eq, nau é hkûn, wúm ajung jûng èq myidàm htoq lé ihkyup hkyó byi râ a-tsam le, wó akô nghut ri.

⁷Yhangnhik gi, saksé ban hkâm é hkûn, haû nik dik htûm é Lasang-dong mai htoq lo é tân jung dusak gi, yhangnhik lé htim mù, ûng luî, sat pyám râ nghut lhê. ⁸Yhangnhik é mâng lé gi, danglîng dông Sodom eq Egutuq gâ é, yhangnhik é Yhumsîng lé le, tapzîng má jén sat pyâm é myuq mó é hkyô gùng má, leq to râ nghut lhê. ⁹Haú hkûn, byù myû hkangmó mâ é bang, byuhú hkangmó mâ é bang, myíng hkangmó mâ é bang, mingdán hkangmó mâ é bang gi, yhangnhik é mâng lé myhup pyám râ matú a gyo kô é za, sum nyî èq rahkyuí tup chôm wú nyî kó râ nghut lhê. ¹⁰Myidàm htoq má nyi é bang gi, yhangnhik shi byuq é yanmai gabú nguínón luî, rayuq eq rayuq chyunguq byî lhûm é dông ngón poî kut kó râ nghut lhê. Hkâsu mù gâ le, myiqhtoi haú nhik gi, myidàm

* 11:3 Ji mebu wut gâ é gi, iyon yôn é lé gâ lhê.

htoq má nyi nyi é bang lé, wuîhke jamjau byî lai bê su nhik nghut akô.

¹¹ Nghut kôlhang, sum nyí eq rahkyuí tup lai é htâng má, Garai Gasâng chyáng mâ é asak soq gi, yhangnhik chyáng wàng mù, yhangnhik gi, toq yap tô kô é nghut luî, yhangnhik lé myang é bang gi, gyai yhang gyuq nán bùm bekô nghut ri. ¹² Haú hkûn, "Shî má doq lò keq." ga, mauhkûng mai yhangnhik lé wut é htê mó lé wó gyo kômù, yhangnhik é gye pé wú tô é u lé, mhut ji mù mauhkûng shut doq ló bekô nghut ri.

¹³ Haú u lé yhang, layàng mó nún lô luî, myuq hkaú raxê tú mâ é ratú gi, htên gyop byuq bê nghut ri. Hau htoq agó, byù nyhit hkyîng yuq shi byuq bê nghut luî, myit gyó tô é bang gi, gyai yhang gyuq nán bùm kômù, mauhkûng mâ é Garai Gasang lé hkya-on shigyaú bum akô nghut ri.

¹⁴ Í lhum nghû râ dingnyé gi, lai byuq bê nghut ri; sùm lhum nghû râ dingnyé gi, jé râ za nghut bê.

Nyhit Lhum Nghû Râ Tut Mut É Hkyô

¹⁵ Nyhit yuq nghû râ maumang lagyo gi, yhâng é tut mut kat ri; haú hkûn, mauhkûng htoq má htê mó pé htoq lo é gi, "Mingkan htoq mâ é mingdán gi, nganhûng é Yhumsîng eq Yhâng é Hkrisduq é mingdán dut bê nghut luî,

Yhang gi, pyat dedu ahtum abyuq up nyî râ nghut lhê."

gâ ri. ¹⁶ Haú hkûn, yhumsîng é hkohkâm-tanghkuq má zùng mù, Garai Gasâng é hí má nyi tô é suwún í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang taí kô é gi,

¹⁷ "Ahkuî pyat, a-nham pyat rû dui nyi é, wum-o a-tsam dik shoq bò Sû Yhumsîng Garai Gasang ê!

Nàng gi, hpungwup a-tsam mó chûng mù, up nyî bê nghut é yanmai, ngamoq, Nang lé jeju hkya-on lhê.

¹⁸ Byù myû pé gi, nhikjum yo bùm kôluî, Náng é nhikmo-yo hkyô gi, jé bê nghut ri.

Shî bê bang lé, tarâ jéyang râ eq, Náng é dui-nhâng zoshâng myiqhtoî pé lé le,

Náng é sân-yúng bang lé le, Náng é myìng lé gyuq hkunggâ é tiq ko lé le,

shigyaú chyunghuq byi râ eq, myidàm htoq lé lhoq hten bang lé lhoq hten râ, ahkyíng gi, jé bê nghut ri."

gâ akô.

¹⁹ Haú hkûn, mauhkûng htoq má, Garai Gasâng é noqkuq yhûm hpông to luî, Yhâng é noqkuq yhúmhaú má, Yhâng é dangshikaq eq sêng é saksé sidek lé byu-myang ri. Haú hkûn jáng, lhap hpyat é, myìng hûm é, maugum gûm é, layàng nún é, likwò mó gyó é pé dut htoq lo ri.

12

Myiwe Myhí Eq Manjung É Hkyô

¹ Hau htoq agó, mauhkûng má limik kumlhá mó htoq shit é gi: myiwe myhí rayuq gi, bui lé wut chûng mù, lhamó má hkyî ke luî, kyî raxe í cham dap é janmaú lé, yhâng é ulhum má tsûng tô ri. ² Yhang gi, zogûng dut tô é nghut luî, zo hkû râ matú, zohkû-nò no nyi é yanmai, gyai yhang ngau garû nyi ri. ³ Hau htâng, mauhkûng má gotú kumlhá dum htoq shit é gi: gyai kô é manjung nè mó* radu gi, ulhum nyhit lhum eq hkyuî raxê lhum dap luî, yhâng é ulhum hkangmó má janmaú tsûng tô ri. ⁴ Yhâng é sho-myi gi, mauhkûng mâ é kyî sum tú mâ é ratú lé shûm tsîng yù mù, myidàm htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhí é hí má lánng yap tô ri. ⁵ Myiwe myhí haú gi, mingdán banshoq lé shamtoq dumbáng eq up râ nghut é yuqzo rayuq lé hkû bê nghut ri; yhâng é zoshâng lé gi, Garai Gasâng é hí má le, Yhâng é hkohkâm-tanghkuq hí má le bún toq yû bê nghut ri. ⁶ Myiwe myhí haú gi, yhâng é matú Garai Gasang lajâng to byî é yoso hkaú má hpang wang ê bê nghut ri; haú jowò má, yhang gi, 1260 nyí tup lhom baú é hui râ nghut lhê.

⁷ Mauhkûng htoq má majan htoq bê nghut ri. Mihkaelaq eq yhâng é maumang lagyo pé gi, manjung lé majan ê zan kôluî, haú manjung eq yhâng é maumâng pé le, tau zân akô. ⁸ Nghut kôlhang, yhangmoq gi, a ûng kômù, mauhkûng mâ é yhangmoq nyî jowò lhoq hpyuq pyám bekô nghut ri.

* 12:3 Manjung nè mó gâ é gi, Tsadán lé taí nau é nghut lhê.

⁹Haû mingkan gón lé hkyô shuí nghoq é, natzau eq Tsadán ga é, a-nham lhê é lhangmuì nghut é manjung mó haû gi, yhâng é maumang pé eq rahá myidàm htoq má dú hkyô pyâm é hui bê nghut ri.

¹⁰Haû hkûn, mauhkûng htoq má htê mó dông taí é lé, ngò wó gyô é gi,

"Ahkuí gi, nga-nhûng é Garai Gasâng é hkyi yù hkyô, hpungwup a-tsam eq mingdán le,

Yhâng é Hkrisduq é ahko ahkáng le, jé bê nghut ri.

Hkâsu mù gâ le, nga-nhûng é Garai Gasâng é hí má, nga-nhûng é gumang wui lé,

nyí, myín mara hun nyi é sù gi, dú hkyô pyâm é hui bê nghut ri.

¹¹Yhangmoq gi, haû Sauzô é suí é yanmai le, yhangmoq saksé hkâm é mungdâng é yanmai le,

yhang lé ung pyám bekô nghut luí, shi byuq é jé shoq yhumsing asak lé a ha kó nghut ri.

¹²Haû mù luí, mauhkûng eq haú má nyi é bang ê, gabú nyí keq!

Nghut kôlhang, myidàm htoq eq wuìshuq lung-aû gi, dینگnyé wó ri;

hkâsu mù gâ le, haû natzau gi, yhâng é ahkyíng yàm-yoq tot za ru joq alò nghut é lé sê é yanmai,

nhikmo-yô é èq, nungnhik chyáng gyó lé lô bê nghut ri."

gâ ri.

¹³Haû manjung gi, myidàm htoq má dú hkyô kat huí é lé myàng luí, haû yuqzo hku é myiwe myhí lé zing-rí ri. ¹⁴Myiwe myhí haû gi, lhangmuì chyáng mai wó lut luí, yhang é matú lajâng tô é yoso má wó dang jé mù, ahkyíng ralhú, ahkyíng í lhum, ahkyíng rawuí hkup† lhom baú nyi é hui sháng gaq ga, zùn mó é dùng í lhum byí é huí ri. ¹⁵Haû hkûn, haû lhangmuì gi, myiwe myhí haû lé wó lhoq myhú pyám shoq ga, myiwe myhí é nunghtáng má, yhâng é nhut mai wui mó llang í é wui lhoq htoq kat ri. ¹⁶Nghut kôlhang, manjung nhut mai lhoq htoq kat é wui mó llang haû lé, myigùng gi, yhâng é nhut há mù myui pyám byí é dông, myiwe myhí haû lé garúm yu ri. ¹⁷Haû mù, manjung haû gi, myiwe

myhí hau é yanmai, gyai yhang nhikmo-yo luí, Garai Gasâng é jep é tarâ lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan râ matú htoq e ri. ¹⁸Manjung haû gi, wuìshuq lung-aû yàm má yap tô ri.

13

Tân Jung Dusak Radu Wuìshuq Lung-aû Mai Htoq Lo É Hkyô

¹Haû hkûn, haû wuìshuq lung-aû mai tân jung dusak radu htoq lo é lé, ngò myàng ri. Dusak haû má, hkyuí raxê lhum eq ulhum nyhit lhum dap to luí, yhâng é hkyuí pé má gi, janmaú raxê lhum tsùng to mù, ulhum hkangmó má gi, Garaí aróng lhoq hpoi é myìng dap tô bum ri. ²Ngò myang é tân jung dusak haû gi, bauze-lo su dut ri; nghut kôlhang, hkyí gi, wàm hkyí su dut luí, nhut gi, hkanghkyí nhut su dut ri. Haû manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haû lé ap byí ri. ³Tân jung dusak hau é ulhum ralhú gi, shí râ í é dàm dap huí é su dut kôlhang, damhkô haû gi, yâ ge pyám bê nghut luí, mingkan gón gi, mauhong byuq kômù, yhâng htâng châng bùm bekô nghut ri. ⁴Manjung gi, tân jung dusak lé ahko ahkáng ap byí é yanmai, byu pé gi, manjung haû lé noqkuq é htoq agó, tân jung dusak haû lé le, noqkuq kômù, "Ó yuq wá, tân jung dusak shí du su dut ri lhu? Ó yuq wá, yhang lé wó zan ûng râ lhu?" ga bum akô.

⁵Gyang dang taí râ eq Garaí aróng lhoq hpoi dang taí râ nhut gi, tân jung dusak haû lé byi to bê nghut é htoq agó, lhamó myí xe í hkyap tup, yhâng é ahko ahkáng lé chûng râ ahkáng wó bê nghut ri. ⁶Yhang gi, yhâng nhut hpóng mù, Garai Gasâng aróng lé lhoq hpoi dang taí é htoq agó, Garai Gasâng é myìng eq nyi jowò lé le, mauhkûng htoq má nyi é bang lé le, lumù gansang é sù nghut ri. ⁷Haû sân-yúng bang lé majan zân ung yù râ a-tsam, yhang lé byi bê nghut ri. Hau htoq agó, byuhú hkangmó lé le, byù myú hkangmó lé le, myíng hkangmó lé le, mingdán hkangmó lé le, up râ ahkáng, yhang lé byi bê nghut ri. ⁸Haû sat hui

† 12:14 Ahkyíng ralhú, ahkyíng í lhum, ahkyíng rawuí hkup gâ é gi, "razàn, í zân, lhamó hkyuq hkyap" lé gâ é nghut lhê; haû gi, 1260 nyí nghut ri.

bê Sauzo eq sêng é asak jihpán laiká buk má, mau htoq xâng hkun mai, myìng a kâ lhôm é, myidàm htoq má nyi é lhunglhâng bang gi, haù tân jung dusak lé noqkuq kó rà nghut lhê.

⁹Gyo rà nohkyap dap sù gi, gyô yù sháng gaq.

¹⁰Shúm zung é hui rà sù gi, shúm zung é hui rà za nghut lhê.

Sham èq sat é hui rà sù gi, sham èq sat é hui rà za nghut lhê.*

Haù mù, sân-yúng bang gi, hkam jân é hkyô eq lhumzui hkyô bò kó rà nghut lhê.

Tân Jung Dusak Radu Myigùng Mai Htoq Lo É Hkyô

¹¹Hau htâng, ngò gi, tân jung dusak gotû radu† myigùng mai htoq lo é lé myang ri. Yhang gi, sauzô é hkyuít su dut é hkyuít í lhum yuq ri; nghut kôlhâng, yhang gi, manjung su ga dang nyo ri. ¹²Yhang gi, tân jung dusak hí lhê dû é ahko ahkáng lhunglháng lé, haù du é hí má chûng mù, shî rà î é damhkô ge byuq é tân jung dusak haù lé, haù mingkan eq mingkan htoq má nyi é bang lé noqkuq nhang ri. ¹³Hau htoq agó, yhang gi, byu pè é myoq hí má, mauhkûng mai myigùng shut myi lé lháng wó lhoq hkyô é, limik kumlhá mó kut shit ri. ¹⁴Yhang gi, tân jung dusak hí lhê dû é hí má, kumlhá haù pé kut rà ahkáng wó é yanmai, myidàm htoq má nyi é bang lé mhoq hpyoq yû luít, haù shâm damhkô dap kôlhâng, dui nyi é tân jung dusak haù lé, hkunggâ é dông, yhangmoq lé, yhâng é alhô saít nhang ri. ¹⁵Yhang gi, haù tân jung dusak hí lhê dû é alhô lé, soq wó mut kat byít é a-tsam lé wó yû sù nghut ri; haù mù, alhô haù gi, dang wó taít luít, yhang lé a noqkuq é bang lé, sat hui nhang ri. ¹⁶Hau htoq agó, yhang gi, byù mó byù zo, wó sù myùng sù, luthkyô wó bang eq jùn pé, yuq hkangmó lé, yhumsing é loqyo loq má nghut nghut, ngelang má nghut nghut, masat lhô zik tap yû nhang ri. ¹⁷Haù hkûn, haù tân jung dusak é myìng, a nghut jáng, yhâng myìng é masat námbat dap sù mai lai luít, ûng é, wui é hkyô, ó yuq le wó kut rà a nghut.

¹⁸Hpaqchyít byéng-yá gi, shî má bo rà ri. Hpaqchyít bò sù gi, haù tân jung dusak é

námbat lé sôn wú sháng gaq; hkâsu mù gâ le, haù gi, byù rayuq é námbat nghut lhê. Yhâng é námbat gi, 666 nghut ri.

14

Sauzo Eq 144,000 Yuq É Hkyô

¹Hau htâng, ngò wú kat le, haù Sauzo gi, Zi-un bùm má yap tô é lé myang ri; Yhâng myìng eq Yhâng Wâ é myìng lé, yhumsing é ngelang má kâ tap tô é byù 144,000 yuq le, Yhang eq rahá yap tô bùm ri. ²Haù hkûn, ngò gi, wui pé mying hûm é htê eq maugum mó gûm é htê su gâ é htê, mauhkûng mai htoq lo é lé wó gyô ri. Ngò wó gyô é htê haù gi, tíng bat bang, yhangmoq é tíng lé bat myhîng é htê su gâ ri. ³Yhangmoq gi, haù hkohkâm-tanghkuq é hí má le, dui é dusak myít du eq suwún wui pé hí má le, mahkôn sik lé hkôn akô nghut ri. Haù myidàm htoq mai hkyi yù huít é byù 144,000 yuq mai lai luít, ó yuq le, mahkôn haù lé a wó mhoq sê yù kó nghut ri. ⁴Haù bang gi, myiwe wui eq gungsho a zum é bang nghut luít, yhangmoq gi, zorâm jet pé nghut bum akô. Yhangmoq gi, haù Sauzo hká shut é le hká shut châng é bang nghut akô. Yhangmoq gi, byu pè chyáng mai wui yu é hui luít, sân-hi myhîng é ashi lé su, haù Garai Gasang eq Sauzo lé ap byít é hui akô nghut ri. ⁵Yhangmoq é nhut má, mhaù é hkyô haít le a taít kó; yhangmoq chyáng mara hûn rà hkyô le a bò kó nghut ri.

Maumang Sum Yuq É Hkyô

⁶Hau htâng, maumang lagyo gotû rayuq gi, maulat má dâng wún é lé ngò myang ri; yhang gi, haù mingkan htoq má nyi é, mingdán hkangmó mâ é bang, byuhú hkangmó mâ é bang, myíng hkangmó mâ é bang, byù myít hkangmó mâ é bang lé, hko kyo rà ahtum abyuq é gabú danglù wó ri. ⁷Yhang gi, "Garai Gasang, tarâ jéyáng rà ahkyíng jé bê nghut é yanmai, Yhang lé gyuq hkungga luít, Yhâng é hpungwup a-tsam lé shigyaú keq. Haù mauhkûng eq myigùng, wuìshuq lung-aù eq wuìbúm pé hpan tô é Sù lé, noqkuq keq." ga luít, htê mó èq taít ri.

* 13:10 Chyúmding ra-am má gi, Byù rayuq yuq lé, shúm kut é sù gi, shúm zung é hui rà nghut lhê. Sham èq byù sat é sù gi, sham èq sat é hui rà nghut lhê, ga bo tô ri. † 13:11 Tân jung dusak gotû radu gâ é shí gi, myiqhtoi pyoq lé gá nau é nghut lhê.

⁸Í yuq nghû râ maumang lagyo gi, htâng má châng lé mù, "Haû mingdán pé* lhungl-háng lé, yhang kut shut é ashop é dông gungsho zùm yap é hkyô, nhik lhoq yô é tsibiyiq wing shuq nhang é, Babelon myuq mó gi, lêng gyop bê! Lêng gyop bê!" ga taí ri.

⁹Sum yuq nghû râ maumang lagyo gi, yhangnhik é htâng má châng lé mù, "Haû tân jung dusak eq yhâng é alhô lé, noqkuq luí, yhumsing é ngelang má nghut nghut, loq má nghut nghut, yhâng é masat lhô lé tap yu é sù, ó yuq nghut kôle, ¹⁰Garai Gasâng é nhikmo-yo nghu é góm má hut kat tô é, nhik-yô é tsibiyiq wing jet lé shuq râ nghut lhê. Hau htoq agó, haû chyoiyúng maumang lagyo pê hí má le, Sauzô é hí má le, yhang gi, duq nyi é myi eq hang èq zing-rí é hui zo râ nghut lhê. ¹¹Yhangmoq zing-ri huí é myihkau gi, pyat dedu ahtum abyuq htoq nyi râ nghut lhê. Haû tân jung dusak eq yhâng é alhô lé, noqkuq é bang eq yhâng mying é masat lhô tap yu sù é matú gi, nyí, myín, no râ ahkyíng wó râ a nghut." ga luí, htê mó èq taí ri. ¹²Garai Gasâng é jep é tarâ cháng luí, Yesuq lé lhumsuzi nyi é bang nghut é, sân-yúng bang gi, hkam shirang é hkyô bò râ lhê.

¹³Hau htâng, "Ahkuí mai gi, haû Yhum-sîng má shí é sù, hkungsô wó nyi ri nghu kâ to aq." gâ é htê, mauhkûng mai htoq lo é lé, ngò wó gyô ri.

Haú hkûn, haû Woi-nyí gi, "Nghut rô, yhangmoq kut é muzó é akyû gi, yhangmoq htâng cháng râ nghut é yanmai, yhangmoq gi, yhumsîng zuí ngu é muzó mai myang hkying bekô râ nghut lhê." ga taí ri.

Myidàm Htoq Mã É Kyôshi Shû É Hkyô

¹⁴Ngò dum wú kat le, mhut hpyû rahtui ngá hí má joq tô é lé myang ri; mhut hpyû htoq haú má Byu Yhangzo su dut é byu rayuq zung tô ri; Yhâng é ulhum má gi, hîng janmaú tsûng to luí, Yhâng é loq má gi, htoq é zaiyik ralhum chung tô ri. ¹⁵Haú hkûn, gotû maumang lagyo gi, noqkuq yhûm mai htoq lô mù, "Haû myidàm htoq mã é kyôshi gi, myhîng zan to bê nghut luí, kyôshu yoq jé bê nghut é yanmai, náng é zaiyik chûng mù, yik shû yù aq." ga, haû mhut htoq má zung tô é Sû lé, htê mó èq

taí garû kat ri. ¹⁶Haû mù, mhut htoq má zung tô é Sû gi, Yhâng é zaiyik lé, myigùng htoq má dú hkyô kat luí, myidàm htoq mã é kyôshi lé, ban shû yù bê nghut ri.

¹⁷Maumang lagyo gotû rayuq gi, mauhkûng htoq mã é noqkuq yhûm mai htoq lo ri; haú yuq le, htoq é zaiyik ralhum chung tô ri. ¹⁸Haû, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mã é tsibiyiq shi gi, myhîng bê nghut é yanmai, náng é htoq é zaiyik yù mù, tsibiyiq shipaû haú pé lé, yâm tsîng yù aq." ga, htê mó èq taí garû kat ri.

¹⁹Maumang lagyo haû gi, yhâng é zaiyik lé, myidàm htoq mã dú hkyô kat mù, haú mã é tsibiyiq shi pé lé yâm tsîng yù luí, Garai Gasang nhikmo-yô é tsibiyiq wing pyik jang mó má hut kat bê nghut ri. ²⁰Myuq shinggan mã é tsibiyiq wing pyik jang haú má, tsibiyiq shi haú pé lé nâng nyhoq luí, tsibiyiq wing pyik jang haú mai suí yui htoq lo é gi, myang lunghtúng myháng jé shoq jé lô mù, 180 déng† kô we shoq yui ló bê nghut ri.

15

Ló Htâng É Wúm Nyhit Lhum Chung É Maumang Lagyo Nyhit Yuq É Hkyô

¹Ngò gi, mauhkûng má gotû limik kumlhá joq é lé, dum byu-myang ri; haû gi, wúm nyhit lhum chung é maumang lagyo nyhit yuq nghut ri; wúm haú pé gi, ló htâng é wúm pé nghut ri; hkâsu mù gâ le, Garai Gasang nhikmo-yô é hkyô gi, haú gû mai bàn râ nghut lhê. ²Hau htoq agó, myi eq nyhò tô é myoqjàm wui-nhông su dut é lé le, ngò myang ri; haû tân jung dusak eq yhâng é alhô lé le, yhâng mying é nâmbat lé le, wó ung pyám bê bang gi, wui-nhông yàm haú má yap tô bum akô; yhangmoq gi, Garai Gasang byí é tíng pé lé chung to kôluí, ³Garai Gasâng é dui-nhâng zoshâng Mosheq é mahkôn eq haû Sauzô é mahkôn lé hkôn kô é gi,

"Wum-o a-tsam dik shoq bò Sû Yhumsîng Garai Gasang ê, Náng kut é muzó gi, hkik é eq mauhpo yhang nghut ri.

* 14:8 Mingdán pé gâ é gi, a lumjîng bang lé gâ é nghut lhê. † 14:20 180 déng gi, Grik pê é stadia 1600 kô bo ri.

Pyat pyat zaí zaí é Hkohlkâm ê, Náng é hkyô gi, dingmán é eq tengmán é nghut ri.

⁴Yhumsîng ê, Nàng lé a gyuq a hkungga râ eq Náng myîng lé a lhoq gyaú râ gi, ó yuq wá nyi râ lú?

Hkâsu mù gâ le, Nàng za chyoyúng é Sû nghut ri.

Nàng kut é dingmán hkyô gi, tân shit bê nghut é yanmai,

byù myû lhunglhang gi, Náng hí má lé noqkuq kó râ nghut lhê."

gâ akô nghut ri.

⁵Hau htâng, ngò wú kat le, mauhkûng má, saksé zúm joq é noqkuq yhûm bóng tô é lé, myang ri. ⁶Haú wúm nyhit jung chung é maumang lagyo nyhit yuq gi, noqkuq yhûm haú mai htoq lo ri; yhangmoq gi, sân-yúng duqbó é nú nhám mebu wut luí, yhangmoq é wànggàng má hîng hpyihit baíyup tô akô nghut ri. ⁷Haú hkûn, haú dui é dusak myî du mâ é radu gi, pyat dedu ahtum abyuq dui nyi é Garai Gasâng é nhikmo-yo hkyô byíng tô é hîng góm nyhit lhum, haú maumang lagyo nyhit yuq lé byi ri. ⁸Garai Gasâng é hpungwup shingkang eq hpungwup a-tsâm é yanmai, haú noqkuq yhûm gi, myihkau byíng zan to bê nghut luí, haú maumang lagyo nyhit yuq é wúm nyhit jung za a bàn bàn gi, noqkuq yhûm haú má ó yuq le a wó wâng kó nghut ri.

16

Garai Gasâng É Nhikmo-yo Hkyô Bo É Góm Nyhit Lhum

¹Hau htâng, maumang lagyo nyhit yuq lé, "Htoq ê mù, haú Garai Gasâng é nhikmo-yo hkyô bo é góm nyhit lhum lé, myigùng htoq má hut hkyô kat keq." ga, noqkuq yhûm mai htê mó èq taí é lé, ngò wó gyô ri.

²Haú hkûn, sân-hî yuq nghû râ maumang lagyo gi, htoq ê mù, yhang é góm lé, myigùng htoq má hut hkyô kat jáng, haú tân jung dusak é masat lhô dap é eq yhang é alhô lé noqkuq é bâng chyáng, achayut é eq hkê-nho dik é, yapjeq ana dap tô bùm bê nghut ri.

³I yuq nghû râ maumang lagyo gi, yhang é góm lé, wuìshuq lung-aú má hut hkyô kat ri; haú gi, shí bê byù rayuq é sui su dut

byuq é htoq agó, haú má lúng é dui jung lhunglhang gi, shi byuq bê nghut ri.

⁴Sum yuq nghû râ maumang lagyo gi, yhang é góm lé, wuìlàng pé eq wuìbúm pé má hut hkyô kat jáng, haú pé gi, sui dut byuq bê nghut ri. ⁵Haú hkûn, haú wuì lé upzúng é maumang lagyo taí é lé, ngò wó gyô é gi,

"A-nham pyat le, ahkui pyat le, rû nyi nyi é Chyoyúng Sû ê,

Nàng haú su kut jéyáng bê nghut é yanmai, Nàng gi, tengmán Sû nghut ri;

⁶hkâsu mù gâ le, yhangmoq gi, Náng é sân-yúng bang eq myiqhtoí pé é sui lé, lhoq htoq pyám bekô nghut luí,

Nàng gi, yhangmoq lé sui shuq nhang é nghut ri; haú gi, yhangmoq hui zo gíng é hkyô nghut ri."

gâ ri. ⁷Haú hkûn, haú hkungga gyap mai,

"Nghut rô! Wum-o a-tsam dik shoq bò Sû Yhumsîng Garai Gasâng ê, Nàng jéyáng é hkyô pé gi, tengmán é eq dingmán é nghut ri."

ga le, taí kat é htê lé, ngò dum wó gyô ri.

⁸Myi yuq nghû râ maumang lagyo gi, yhang é góm lé, bui é ahtuq má hut hkyô kat é hkûn, bui gi, byu pé lé myî èq nyhê kyuq râ ahkáng wó bê nghut ri. ⁹Haú mù, yhangmoq gi, nyé dik é èq nyhê kyuq é hui zo luí, wúm shí pé lé up nyi é Garai Gasâng é myîng lé nhîng akô; haú-í yhang hpuzo kôlhang, yhangmoq gi, myit le a lhîng kó, Garai Gasâng lé le a shigyaú kó nghut ri.

¹⁰Ngo yuq nghû râ maumang lagyo gi, yhang é góm lé, tân jung dusak é hkohlkâm-tanghkuq htoq má hut hkyô kat jáng, yhang é mingdán gi, mauchut tuq dut byuq bê nghut ri. Mingbyû wuì gi, yhumsîng é shô lé lhang, ngat tân bùm shoq shî-nò jamjau hui zo kôluí, ¹¹yhangmoq no hpû é eq jeq é ana dap é yanmai, mauhkûng mâ é Garai Gasâng lé nhîng akô; haú-í yhang hpuzo kôlhang, yhangmoq gi, yhangmoq kut é hkyô mai myit a lhîng shi kó nghut ri.

¹²Hkyuq yuq nghû râ maumang lagyo gi, yhang é góm lé, Uhprat wuì mó láng má hut hkyô kat jáng, wuìlàng haú gi, kân byuq luí, haú buihtoq hkyam mâ é hkohlkam pé, lé lô râ hkyô dong bê nghut ri. ¹³Haú hkûn, po su dut é, agè ashop é byò sum woi-nyí lé, ngò myang ri; haú pé gi, manjung, tân jung

dusak, myiqhtoi pyoq pê é nhut mai htoq lô kô é bang nghut akô. ¹⁴Woi-nyí haú pé gi, nat gâng pê é woi-nyí nghut luí, limik kumlhá pé kut shit kômù, haú wum-o a-tsam dik shoq bò Sû Garai Gasâng é buinyì mó má majan zan râ matú, mingkan gón mâ é hkohkam pé lé lhoq tsing yù râ ga, htoq e ló akô nghut ri.

¹⁵"Wú keq, Ngò gi, hkau sù su jé lé é nghut lhê! Su hí má gungchín a so râ eq hoq hpu hkyô a lhoq htoq shit sháng gaq ga, yhumsing é wutbu wutmè lé, zúng nyí luí, gying gying kut nyi é sù gi, hkungsô wó nyi ri."*

¹⁶Haú mù, nat haú bang gi, hkohkam pé lé, Hebre myíng đông Armagedon gâ é jowò má, rahá ji tsing tô akô nghut ri.

¹⁷Nyhit yuq nghû râ maumang lagyo gi, yhâng é góm lé, maulat má hut hkyô kat ri; haú hkûn, haú noqkuq yhûm mâ é hkohkâm-tanghkuq mai, "Bàn bê!" gâ é htê mó htoq lo ri. ¹⁸Hau htoq agó, lhap hpyat é, mying hûm é, maugum gûm é eq layàng mó nún é pé dut htoq lo ri. Myidàm htoq má, xângzo byù lé nyi é hkûn mai, layàng haú su nún é eq haú-í htan é gi, a joq wú shí é nghut lhê. ¹⁹Haú mù, haú myuq mó gi, sùm hkyam byak goq byuq luí, mingdán pé mâ é myuq pé le, gyop byuq bê nghut ri. Garai Gasang gi, Babelon myuq mó lé le myit bun luí, Yhâng é nhikmo-yô é tsibiyiq wíng byíng shoq bo é góm lé shuq nhâng bê nghut ri. ²⁰Zinlóng hkangmó gi, hfang byuq bê nghut luí, bùm pé le byuq byuq bê nghut ri. ²¹Haú hkûn, myi xê jói kô laí é likwò mó gi, mauhkûng mai byu pê htoq má wo gyó gyûn ri; likwò wúm gi, gyai yhang wúhke jamjaú é wúm nghut é yanmai, byu pé gi, Garai Gasang lé nhing bum akô nghut ri.

17

Shiwa Myhí Mó É Hkyô

¹Haú góm nyhit lhum chung tô é maumang lagyo nyhit yuq mâ é rayuq gi, lé lô mù, "Lé aq, haú wui myo myô pê htoq má zung tô é shiwa myhí mó lé dam byi râ hkyô, ngò, nang lé tân shit bá. ²Myidàm htoq mâ é hkohkam pé gi, yhang eq rahá ashop é đông gungsho zùm yap é hkyô kut

shut kôluí, myidàm htoq má nyi é bang gi, yhang kut shut é myiwe yuqgè nyi zô lhúm hkyo é tsibiyiq wíng lé shuq wut bùm bekô nghut ri." ga luí, ngo lé taí ri.

³Haú mù, maumang lagyo haú gi, Woi-nyí má, ngo lé yoso shut shuí wang e ló ri. Haú ulhum nyhit lhum eq hkyuít raxê lhum dap luí, taí hpoi é myíng kôm dap tô é, zam zam ne é tân jung dusak htoq má zung tô é myiwe myhí rayuq lé, ngò myang ri. ⁴Myiwe myhí haú gi, me me dut é eq zam zam ne é mebu wut luí, hîng, lungsêng, palhé pê èq mhôn chung ri; yhâng é loq má gi, yhâng é myiwe yuqgè nyi zô lhúm hkyo é agot a-û hkyô eq achaq achyut é zè pé byíng tô é hîng góm ralhumm chung tô ri.

⁵NIK DIK É HKYÔ, MYIDÀM HTOQ MÂ É ACHAQ ACHYUT HKYÔ PÉ EQ SHIWA MYHÍ PÊ É YHÂNGNU, BABELON MYUQ MÓ.

gâ é myíng gi, yhâng é ngelang má kê tap tô ri. ⁶Myiwe myhí haú gi, sân-yúng bâng é sui eq Yesuq é saksé hkám bâng é sui shuq wut tô é lé, ngò myang ri.

Haú mù, ngò gi, gyai yhang maú byuq é nghut lhê. ⁷Haú hkûn, maumang lagyo haú ngo lé taí é gi, "Nàng, haú mù maú lhê lú? Myiwe myhí haú eq, yhang jî tô é, ulhum nyhit lhum eq hkyuít raxê lhum dap é tân jung dusak é zaú tô é hkyô lé, ngò, nàng lé taí kyo râ nghut lhê. ⁸Nàng myàng é tân jung dusak haú gi, hí hkûn nyi wú bê, ahkuí a nyi lo, nghut kôlhâng, nik dik htâm é Lasang-dong mai htoq lô mù, htên byoq é hui râ nghut lhê. Mau htoq xâng hkun mai, asak jihpán laiká buk má myíng a kê tô é, myidàm htoq má nyi é bang gi, tân jung dusak haú lé myàng kô é hkûn, maú byuq bùm kó râ nghut lhê. Hkâsu mù gâ le, haú gi, nyi wú bê, ahkuí a nyi lo, nghut kôlhâng, dum lé râ nghut é yanmai nghut ri.

⁹Hpaqchyí byéng-yá bo é nyan gi, shí má râ ri. Haú ulhum nyhit lhum gi, myiwe myhí zung é bùm nyhit lhum nghut ri; hau htoq agó, hkohkâm nyhit yuq le nghut ri.

¹⁰Ngo yuq gi, byit gyó byuq bê; rayuq gi, ahkuí nyi to ashí; myit tô é rayuq gi, a jé lé shi nghut ri; haú yuq jé lé é hkûn, yhang gi, ahkyíng razup zo za wó nyí râ nghut lhê. ¹¹Hí hkûn nyi wú bê, ahkuí a nyi lo dut é tân jung dusak haú gi, shit yuq nghû râ

* 16:15 Dang shí hkun gi, Yesuq taí é dang nghut lhê.

hkohkâm nghut ri. Yhang gi, haû nyhit yuq eq sêng é yanmai, yhâng é htên byoq hkyô shut e ló râ nghut lhê.

¹²Haû nàng myàng é hkyuî raxê lhum gi, mingdán a myang yù shî é hkohkâm raxê yuq nghut ri; nghut kôlhang, yhangmoq gi, haû tân jung dusak eq rahá za, hkyíng hkum rahkum kô hkohkâm ayá lé wó yú kó râ nghut lhê. ¹³Yhangmoq gi, myit myoqbyù hkyô ralhum za nghut kômù, yhangmoq é a-tsam eq ahko ahkáng lé, haû tân jung dusak lé byi kó râ nghut lhê. ¹⁴Yhangmoq gi, haû Sauzo lé majan chôm zan kó râ nghut lhê; nghut kôlhang, Sauzo haû gi, yhumsing pê é Yhumsîng eq hkohkam pê é Hkohkâm nghut é yanmai, yhangmoq lé ung pyám râ nghut lhê. Haû Sauzo eq rahá nghut é bang gi, ji yù huî é bang, hkyin yù huî é bang eq lhumzuî é bang nghut akô." gâ ri.

¹⁵Hau htâng, maumang lagyo haû ngo lé dum taí é gi, "Nàng myang é, shiwa myhí zung tô é wuî pé gi, byù myû pé, byù ajùm ayò pé, mingdán pé eq myíng lhumjup nghut ri. ¹⁶Haû nàng myang é tân jung dusak eq hkyuî raxê lhum gi, shiwa myhí haû lé a jú kut kó râ nghut luî, yhâng é sutzè banshoq shang yu pyám byi mù, mebu lhang a dap loshoq achîndum kut to kó râ nghut lhê; hau htoq agó, yhâng é sho lé zo luî, myî eq nyhê hkyô pyám kó râ nghut lhê. ¹⁷Hkâsu mù gâ le, Garai Gasang gi, haû bang mai, i-myit rahkat zâ èq, yhumsing é a-tsam, haû tân jung dusak lé byi râ myit, yhangmoq lé kat byi Sû nghut ri. Haû mù, yhangmoq gi, Garai Gasâng é mungdang lhoq dik é hkûn jé shoq, haû su kut kó râ nghut lhê. ¹⁸Nàng myang é myiwe myhí haû gi, myidàm htoq mâ é hkohkam pé lé up zô é myuq mó nghut ri." gâ ri.

18

Babelon Lêng Gyop É Hkyô

¹Hau htâng, maumang lagyo gotû rayuq mauhkûng mai gyó lo é lé, ngò myang ri. Yhang gi, ahko ahkáng mó wó é nghut luî, haû myidàm htoq lé, yhâng é hpungwup èq duqbó to byî ri. ²Yhang, htê mó o mó èq garû taí kat é gi, "Babelon myuq mó gi, lêng gyop bê, lêng gyop bê!

Myuq haû gi, nat gâng pê é yhûm eq agè ashop é nat hkangmó é hkyûng dut byuq é htoq agó,

a sansêng é eq achaq achyut é nghoq pé nyi é sùt dut byuq bê nghut ri.

³Hkâsu mù gâ le, haû byù myû lhunglhang gi, yhang kut shut é ashop é dông gungsho zùm yap é hkyo é nhik lhoq yô é tsibiyiq wing shuq wut bùm bekô nghut ri.

Haû myidàm htoq mâ é hkohkam pé gi, yhang eq myi shut làng shut hkyô kut bekô nghut é htoq agó,

myidàm htoq mâ é hpugá wuiloq gá bang gi, yhâng é ladu lai shoq ngón kûn é hkyo é yanmai, sutzè wó bôm bekô nghut ri."

gâ ri.

⁴Hau htâng, mauhkûng mai htoq lo é htê gotû lé ngò dum wó gyô é gi,

"Ngá é byu pé ê, myuq hau é mara pé má nungmoq a bo lòm râ matú le,

yhâng é wúm pé lé nungmoq a hui zo kó râ matú le, haû mai hân hpang htoq lò keq;

⁵hkâsu mù gâ le, yhâng é mara gi, mauhkûng htung shoq bum zang to bê nghut luî,

Garai Gasang gi, Yhâng é a dingmán é hkyô lé myit bun bê nghut ri.

⁶Yhang kut byî é eq rajung za, yhang lé tau kut byi keq; Yhang kut bê muzó eq rajung za, yhang lé í tú taû kut keq. Yhang nyhó byî é góm má, í tú taû nyhó byi keq.

⁷Yhang gi, yhumsing gùng lé yhumsîng lhoq gyaú yû luî, ladu lai shoq ngón kún nhang é í,

wuîhke jamjau hkyô eq iyon hkyô myo myo, yhang lé taû byi keq.

Hkâsu mù gâ le, yhang gi, yhâng é myit má, 'Ngò gi, hkohkâm myhí nghut lhê; ngò gi, chuimó a nghut;

hkâ-nhám le iyon hui râ a nghut.' ga gumrong nyi ri.

⁸Haû mù luî, yhâng é wúm nghu é shî hkyô, iyon hkyô eq mutmó gyó hkyô gi, ra-nyí bui má za, yhâng chyáng jé râ nghut lhê.

Hau htoq agó, yhang gi, myî eq nyhê hkyô pyám é lé hui râ nghut lhê;

hkâsu mù gâ le, yhang lé jéyáng é, haû
Yhumsîng Garai Gasang gi, wum-o
a-tsam bò Sû nghut ri.

⁹ Haû yhang eq rahá myiwe yuqgè nyi
zô lhum hkyô kut shut é eq yhâng é ladu
lai shoq ngón kún hkyô má bo lom é, haû
myidàm htoq mâ é hkohkam pé gi, yhang
lé nyhê hkyô é myihkau lé myàng kôjáng,
ngaubyi ngau-nhap eq iyon yôn é huî bùm
kó râ nghut lhê. ¹⁰ Yhangmoq gi, yhang no
jamjaû nyi é lé wú gyuq kôluí, we we má
yap to kômù,

'Hkik é myuq mó, a-tsam bo é Babelon gi,
dingnyé wó ri-nhung!

Dingnyé wó ri-nhung! Hkyíng hkum ral-
hum má za, dam byí é hkyô gi, náng
chyáng jé bu-nhung!

ga luí, taí garu kó râ nghut lhê.

¹¹ Myidàm htoq mâ é hpugá byu pé gi,
yhang é yanmai, ngaubyi ngau-nhap é eq
iyon yôn é hui kó râ nghut lhê; hkâsu mù
gâ le, yhangmoq é gài zè lé, ó yuq le a wui
byi lo kô é yanmai nghut ri. ¹² Gài zè haú
pé gi, hîng, ngùn, lungsêng eq palhé, nú-
nhâm é pán, me me dut é pán, laí hkyîng
eq zam zam ne é pán; namngón jung sik
ajung jung, maguí zúí lé saí é, gùloq hpaû
jung sik lé saí é, gyi lé saí é, shamtoq lé
saí é, luq hpyû lé saí é jung ajà jà nghut ri.

¹³ Hau htoq agó, changhpyik gâm, xunmân,
namngón jung, mura, loban, tsibiyiq wing,
tsanlun xû, mún eq sungso, nojûng eq sau,
myang eq myanglhêng pé; byù é gungdu eq
asak pé nghut ri.

¹⁴ Yhangmoq gi, 'Nàng myit ô nau nyi é
hkyô pé gi, náng chyáng mai gâng ló byuq
bê nghut ri. Nàng wó é sùt é hkyô eq
hkikhkam é hkyô pé banshoq gi, byuq byuq
bê nghut luí, hkâ-nhám le dum wó taû yù
râ a nghut.' ga taí kó râ nghut lhê. ¹⁵ Gài zè
haú pé lé ung luí, yhâng chyáng mai sutzè
wó yu é byù pé gi, yhang hpuzô é jamjau
hkyô lé wú gyuq kô é yanmai, we we má
yap to kômù, ngaubyi ngau-nhap eq iyon
yon uchyang,

¹⁶ 'Nú-nhâm é pán, me me dut é pán eq
zam zam ne é mebu wut luí, hîng,
lungsêng eq palhé pé lé
mhôn tô é myuq mó gi, dingnyé wó ri-
nhung! Dingnyé wó ri-nhung!

¹⁷ Hkyíng hkum rahkum má za, haû-í yhang
wó é sutzè pé htên byoq byuq bu-
nhung!

ga taí kó râ nghut lhê.

Wuì-sanghpo agyì yuq hkangmó eq wuì-
sanghpo mai jón wún é bang banshoq, wuì-
sanghpo hkâng bang eq wuìshuq lung-aû
mai wam baú hkyô wó yu é bang banshoq
gi, we we má yap to kômù, ¹⁸ myuq haû
nyé gyó nyi é myihkau lé myàng kôjáng,
'Myuq mó shî eq pûng é myuq gi, hkâmá
joq shirâ lhú?' ga taí garu kó râ nghut
lhê. ¹⁹ Yhangmoq gi, yhumsing é ulhum
má hpuilhup kyaq gyun mù, ngaubyi ngau-
nhap eq iyon yon uchyang,

'Myuq mó gi, dingnyé wó ri-nhung!
Dingnyé wó ri-nhung!

Wuìshuq lung-aû má wuì-sanghpo pé wó é
bang gi, yhâng é sutzè pé é yanmai,
sutzè wó bum akô.

Nghut kôlhang, hkyíng hkum rahkum
má za, htên byoq hkyô gi, yhâng
chyáng jé bu-nhung!

²⁰ Mauhkûng ê, yhang é yanmai hkye gabú
aq! Sân-yúng bang, lagyô pé eq
myiqhtoí pé ê, hkye gabú keq!

Hkâsu mù gâ le, yhang, nungmoq lé kut
é eq rajung za, Garai Gasang gi,
yhang lé jéyáng bê nghut ri.'
ga taí kó râ nghut lhê." gâ ri.

²¹ Hau htâng, wum-o a-tsam mó bo é
maumang lagyo rayuq gi, luqluí long mó sù
é luqgok racham waq toq yû mù, wuìshuq
lung-aû má dú hkyô kat luí, taí é gi,

'Haû Babelon myuq mó gi, haû su kut wum
kat dú hkyô pyâm é hui râ nghut luí,
hkâ-nhám le dum myàng râ a nghut
lo.

²² Haû tíng bat é bang, dat gó dat ye é bang,
sampyí mut é bang eq tut mut é
bâng é htê lé,
náng chyáng hkâ-nhám le dum wó
gyo lo râ a nghut.

Loq hpaqchyí ajung jung kûng é byù lé,
náng chyáng hkâ-nhám le dum
myàng lo râ a nghut.

Luqluí luí é htê lé, náng chyáng hkâ-nhám
le dum wó gyo lo râ a nghut.

²³ Haû myibung duq é myishâm lé, náng
chyáng hkâ-nhám le dum wó duq lo
râ a nghut.

Myisik lusik é htê lé, náng chyáng hkâ-nhám le dum wó gyo lo râ a nghut.

Náng é hpugá byû pé gi, mingkân é byû mó pé nghut ri.

Náng é myoqheq hpaqchyi èq mingdán banshoq mâ é bang lé, hkyô shuí nghoq bê nghut ri.

²⁴ Haû myiqhtoî pê é sui, sân-yúng bâng é sui eq myidàm htoq má sat hui bang banshoq é sui pé gi,

yhâng chyáng chyat byu-myàng bê nghut ri."

gâ ri.

19

Haleluya!

¹ Hau htâng, mauhkûng htoq má, byû ajùm ayò garû é htê mó su gâ é lé, ngò wó gyô é gi,

"Haleluya!"

Hkyi yù hkyô eq hpungwup shing kang, a-tsam gi, nga-nhûng é Garai Gasang eq sêng é nghut lhê.

² Hkâsu mù gâ le, Yhang tarâ jéyáng é hkyô gi, tengmán é eq dingmán é yanmai nghut ri.

Yhang gi, myidàm htoq mâ é bang lé, haû yhâng é ashop é đông gungsho zùm yap é hkyo èq mara kut shut nhang é shiwa myhí mó lé, mara byi luí,

Yhâng é dui-nhâng zoshâng wuì é sui yuichyîn dam byi bu-nhung ô!"

gâ ri.

³ Dum radàm, yhangmoq taî garu kô é gi, "Haleluya!"

Myuq hau é myihkau gi, pyat dedu ahtum abyuq ru ìng doq nyì sháng gaq ô!" gâ bum akô nghut ri.

⁴ Haû suwún í xe myi yuq eq dui é dusak myî du gi, haû hkohkâm-tanghkuq má zung tô é Garai Gasang lé paî gop luí, noqkuq uchyang,

"Amen, Haleluya!"

ga, taî garû bum akô.

⁵ Haû hkûn, "Garai Gasâng é dui-nhâng zoshâng wuì nghut é, yhang lé gyuq hkunggâ é tiq ko banshoq bang ê!"

Nga-nhûng é Garai Gasang lé, hkya-on kungtôn keq ô."

gâ é htê, haû hkohkâm-tanghkuq mai htoq lo ri.

⁶ Hau htâng, byû ajùm ayo é htê su ga, wuì myo myo mying hûm é htê su ga, maugum mó é htê su ga, taî garû é htê lé ngò wó gyô é gi,

"Haleluya!"

Hkâsu mù gâ le, wum-o a-tsam dik shoq bò Sû nga-nhûng é Yhumsîng Garai Gasang gi, up nyi ri.

⁷ Nga-nhûng gi, ngón gabú luí, Yhâng é hpungwup shing kang lé lhoq gyaú sháng ô!"

Hkâsu mù gâ le, haû Sauzo myiháng poî gi, jé bê nghut luí, Yhâng é myisik gi, rì rì mhôn to bê nghut ri.

⁸ Sân-yúng duq wik nú-nhâm é mebu le, wut râ matú, Yhang lé byî to bê nghut ri."

gâ ri. (Nú-nhâm é mebu haû gi, sân-yúng bang kut é dingmán é muzó nghut ri.)

⁹ Hau htâng, maumang lagyo gi, ngo lé, "'Haû Sauzô é myiháng zoshuq poî má ji yu é hui bang gi, hkungsô wó nyi ri.' nghû ká aq." ga taî luí, "Dang shí pé gi, Garai Gasâng é tengmán mungdang yhang nghut lhê." ga xoq taî ri.

¹⁰ Haû hkûn, ngò gi, yhang lé noqkuq râ nghû, yhâng é hkyî wang má paî gop kat é nghut lhê. Nghut kôlhang, yhang gi, "Haû su hkâkut! Ngò gi, nàng eq haû Yesuq é saksé lé hkâm é náng gumang wuì eq rahá, byinzùm dui-nhâng zoshâng ru nghut lhê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoî htoî é Woi-nyí é myit đông nghut ri." ga, ngo lé taî hkûm ri.

Myang Hpyû Jî To Su É Hkyô

¹¹ Hau htâng, ngò gi, mauhkûng bóng tô é lé le, ngá é myoq hí má myang hpyû radu nyi tô é lé le, myang ri. Myang hpyû haû má jî tô é gi, Lhumzui eq Tengmán gâ é Sû nghut ri. Yhang gi, tengmán é đông tarâ jéyáng luí, majan zan Sû nghut ri. ¹² Yhâng é myoqjí gi, myishâm su dut mù, Yhâng é ulhum má gi, janmaú myo myo tsûng tô ri. Yhang mai lai luí, ó yuq le a bo sê é mying, Yhâng chyáng kê tap tô ri. ¹³ Yhang gi, sui má jum yù bê nghut é buhîng radung wut to luí, Yhâng é mying gi, Garai Gasâng

* 19:1 Haleluya gâ é gi, Hebre myíng đông, "Yhumsîng Garai Gasang lé hkya-on kungtôn lhê" gâ é dang nghut ri.

é mungdang gâ ri. ¹⁴ Haû mauhkûng gye pé gi, hpyu é eq sanséng nú-nhâm é mebu wut mù, myang hpyû ji kôluí, Yhâng htâng má châng bum akô nghut ri. ¹⁵ Byù myû haú pé lé zan râ matú, htoq é shâm gi, Yhâng é nhut mai htoq lo ri. Yhang gi, yhangmoq lé, shamtoq dumbáng èq up râ nghut lhê. Yhang gi, wum-o a-tsam dik shoq bò Sû Garai Gasâng é nhikmo-yô é tsibiyiq shi pyik jang má, yhangmoq lé pyik râ nghut lhê. ¹⁶ Hkohkam pé é Hkohkâm eq yhumsing pé é Yhumsîng gâ é myîng gi, Yhâng é buhîng eq Yhâng é tangbaú má kâ tap tô ri.

¹⁷ Dum, maumang lagyo rayuq gi, bui má yap tô é lé ngò myang ri; yhang gi, maulat mâ é nghoqzô pé banshoq lé, "Lé keq, Garai Gasâng é zoshuq poí mó matú, lé zup zing keq; ¹⁸ haú hkûn, nungmoq gi, hkohkam pé é, gyezaú pé é, wum-o a-tsam mó bò bâng é, myang jûm eq ji bâng é gungsho, luthkyô wó bang eq jùn pé é, byù mó byù zo pé lhunglhâng é gungsho pé lé, myàng zo kó râ nghut lhê." ga, htê mó èq wut garú tá ri.

¹⁹ Hau htâng, haû tân jung dusak eq myidàm htoq mâ é hkokhâm eq yhangmoq é gyezô pé gi, haû myang htoq má jî to Sû eq Yhâng é gyezô pé lé, majan zan râ matú chôm zîng bùm kô é lé, ngò myang ri. ²⁰ Nghut kôlhâng, haû tân jung dusak gi, chyup yu é hui bekô nghut ri; hau htoq agó, haû tân jung dusak é masat lhô lé hkam yù luí, yhâng é alhô lé noqkuq é bang lé, mhaú zo râ matú, tân jung dusak hau é gunglik dông limik kumlhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má duí gù dú hkyô kat é hui bekô nghut ri. ²¹ Haû myit gyó tô é bang gi, myang gûng má jî to Su é nhut mai htoq lo é sham èq sat pyâm é hui bekô nghut luí, nghoq pé lhunglhâng gi, haú bâng é gungsho lé, gyi gyi dau dau myàng zô bùm bekô nghut ri.

20

Rahkyîng Zàn

¹ Dum, maumang lagyo rayuq gi, nik dik htâm é Lasang-dông é zoqshi eq joqtoq tui mó lé, yhâng é loq má chûng mù, mauhkûng mai gyó lé lo é lé, ngò myang

ri. ² Yhang gi, natzau eq Tsadán nghut é, a-nham lhê é lhangmuí gâ é manjung lé, zanwut rahkyîng lhûng to râ matú, chyup tuí yù bê nghut ri. ³ Haû mù, maumang lagyo haû gi, rahkyîng zàn a byíng shí é gyoro má, manjung haû, byù myû pé lé a wó mhaú zo sháng gaq ga, nik dik htâm é Lasang-dong má yhang lé dú hkyô hâng kat luí, zoq myhî to mù, hau é ahtoq má dizik htûng tô ri. Haû rahkyîng zàn lai eq, yhang lé, ra yoq zo hpông htoq kat ra râ nghut lhê.

⁴ Ngò gi, haû tarâ jéyáng râ ahko ahkáng wó é bang zung tô bum é hkokhâm-tanghkuq pé lé, dum myang ri. Hau htoq agó, haû Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bâng é sobyô pé lé, ngò myang ri. Haú bang gi, haû tân jung dusak eq yhâng é alhô lé a noqkuq é htoq agó, yhumsing é ngelang eq loq má hau é masat lhô lé a htûng tap yù bâng é sobyo pé nghut ri. Yhangmoq gi, dum dui toq mù, zanwut rahkyîng tup Hkrisduq eq rahá up nyi bekô nghut ri. ⁵ Haû gi, sâng-hî dàm dum dui toq é hkyô nghut ri. (Shi byuq bê myit gyó tô bang gi, rahkyîng zàn haû a byíng byíng wó dum dui toq kó râ a nghut.) ⁶ Sâng-hî dàm dum dui toq é hkyô má lom é bang gi, hkungsô wó bang eq chyoiyúng bang nghut ri. Í dâm nghû râ shi é hkyô gi, haú bang lé up râ ahkáng wó é a nghut; haú bang gi, Garai Gasang eq Hkrisduq é hkyangjông pé dut râ nghut é htoq agó, Hkrisduq eq rahá zanwut rahkyîng tup up kó râ nghut lhê.

Tsadán Htên Byoq Hui É Hkyô

⁷ Rahkyîng zàn haû lai jáng, Tsadán gi, htóng mai nhang htoq kat é hui luí, ⁸ majan zan râ matú, myidàm htoq myi chyûn má nyi é, Goga eq Magoga gâ é byù myû pé lé mhaú shuí tsîng yù râ ga, htoq ê râ nghut lhê. Byù haú bang gi, wuîshuq lung-aû yàm mâ é semuí myhó myo kó râ nghut lhê. ⁹ Yhangmoq gi, maumyî htunghtáng hkap shoq chôm yán doq lò kômù, haû Garai Gasâng é byu pé nyi é dap nghut é, Garai Gasang chyitdap é myuq lînhghkyuq má, lé lóm tô bùm bekô. Nghut kôlhâng, mauhkûng mai myi gyó lô luí, yhangmoq lé nyhê hkyô pyám bê nghut ri. ¹⁰ Haû tân jung dusak eq myiqhtoi pyoq pé lé dú

hkyô kat jang nghut é, hang myi duq nyi é nhông má, yhangmoq lé mhoq hpyoq yu é natzau haú le dú hkyô pyâm é hui bê nghut ri. Yhangmoq gi, nyí, myín, pyat dedu ahtum abyuq wuîhke jamjau hui zô nyi kó râ nghut lhê.

Ló Htâng É Tarâ Doqdan Hkyô

¹¹ Hau htâng, hkohkâm-tanghkuq hpyû mó ralhum eq haú má zung tô é Sû lé, ngò myang ri. Haú mauhkûng eq myigùng gi, Yhâng é hí mai hfang ló bê nghut mù, yhangnhik é matú jowò a joq lo nghut ri. ¹² Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gâ é gotû laiká buk le, hpông tô ri. Haú shi byuq bê bang gi, yhumsîng kut é eq rajung za, laiká buk pé má kê tô é dông, tarâ doqdan é huî bùm bekô nghut ri. ¹³ Haú hkûn, wuîshuq lung-aú gi, yhang má lúng tô é, shi byuq bê bang lé ap byi luí, haú shi é hkyô eq Moming le, yhangnhik chyáng lúng tô é, shi byuq bê bang lé ap byí akô nghut ri; yuq hkangmó gi, yhumsîng kut é eq rajung za tarâ doqdan é hui bekô nghut ri. ¹⁴ Hau htâng, shi é hkyô eq Moming gi, myi nhông má dú hkyô kat é hui bekô nghut ri. Myi nhông haú gi, í dâm nghû râ shi é hkyô nghut lhê. ¹⁵ Asak jihpán laiká buk má, mying a bo é sô ó yuq nghut kôle, myi nhông haú má dú hkyô kat é hui bekô nghut ri.

21

Yerusalem Asik

¹ Hau htâng, mauhkûng asik eq myigùng asik lé, ngò myang ri; hkâsu mù gâ le, hí lhê é mauhkûng eq myigùng gi, laí ló byuq bê nghut luí, wuîshuq lung-aú le, dum joq râ a nghut lo. ² Haú hkûn, Chyoiyúng Myuq gâ é Yerusalem asik gi, lusik é matú mhôn yúng tô é myisik su, hen lajâng yù luí, Garai Gasâng chyáng mâ é nghut mù, mauhkûng mai gyó lé lo é lé, ngò myang ri. ³ Hau htoq agó, hkohkâm-tanghkuq mai htoq lo é danghtê mó lé, ngò wó gyô é gi, "Ahkuî, Garai Gasâng é nyi jowò gi, xângzo byu pé eq rahá nghut luí, Yhang gi, yhangmoq eq rahá nyi nyi râ nghut lhê. Yhangmoq gi, Yhâng é byu pé dut râ nghut luí, Garai

Gasang yhang, yhangmoq eq rahá nyi mù, yhangmoq é Garai Gasang dut râ nghut lhê. ⁴ Garai Gasang gi, yhangmoq é myoq mâ é ngaubyi lhunglháng lé, sut pyám byi râ nghut lhê. Htângnùng má gi, shî-nò hkyô, iyon hkyô, ngaubyi ngau-nhap hkyô eq no hpu hkyô nghû é joq râ a nghut lo; hkâsu mù gâ le, hí lhê é hkyô pé gi, laí ló byuq bê nghut ri." gâ ri.

⁵ Haú hkohkâm-tanghkuq má zung to Sû gi, "Wú aq, jung hkangmó lé, Ngò asik kut nyi bê nghut lhê." ga taí luí, "Shî lé kê to aq, hkâsu mù gâ le, dang shí pé gi, lumgíng é dang eq tengmán é dang nghut lhê." ga taí ri.

⁶ Hau htoq agó, Yhang gi, "Haú pé gi, ban kut bê. Ngò gi, Alhpa eq Omega nghut lhê; Sâng-hi Awang eq Ló Htâng Sû le nghut lhê. Wuî shit sô lé gi, ahpau a dúng é za, asak wuîbúm mâ é uchyam lé, Ngò byi huq râ nghut lhê. ⁷ Wó ung é sô ó yuq nghut kôle, Garaí é silí wunlí haú pé banshoq lé sîng râ nghut mù, Ngò gi, yhâng é Garai Gasang dut luí, yhang gi, Ngá zo dut râ nghut lhê. ⁸ Nghut kôlháng, gyuq myit bò bang, a lumjíng bang, acháq achyut dut bang, byù sat bang, ashop é dông gungsho zùm yap é hkyô shut é bang, myoqheq hpaqchyí kut é bang, hparà noq é bang eq mhaú bang lhunglháng é jowò gi, haú hang myi duq nyi é nhông nghut râ nghut lhê. Haú gi, í dâm nghû râ shi é hkyô nghut ri." ga ngo lé taí ri.

⁹ Ló htâng é wúm nyhit jung byíng tô é góm nyhit lhum chung tô é maumang lagyo nyhit yuq mâ é rayuq gi, lé mù, "Lé aq, haú Sauzô é yhangmyi gâ é myisik lé, ngò tân shit râ nghut lhê." ga ngo lé taí ri. ¹⁰ Hau htâng, yhang gi, ngo lé Woi-nyí mai bùm myhâng mó ralhum má shuí jé luí, Garai Gasâng chyáng mâ é nghut mù, mauhkûng mai gyó lé lo é, haú Chyoiyúng Myuq gâ é Yerusalem lé tân shit ri. ¹¹ Myuq haú gi, Garai Gasâng é hpungwup shíngkang hû é htoq agó, haú maubó gi, hpaú dik é huhpé lungsêng su dut luí, myoqjàm su sân-yúng ri. ¹² Myuq xêwâm gi, kô myhang é htoq agó, hkum raxe í lhum hpông tô ri; hkum haú pé má, maumang lagyo raxe í yuq zúng tô ri. Hau htoq agó, Israelaq byù myû raxe í hu é mying lé, hkum haú pé má kê tap to bum ri. ¹³ Hkum

haú pé gi, buihtoq hkyam shut sôm lhum, buiwàng hkyam shut sôm lhum, maupyî shut sôm lhum, mautsûng shut sôm lhum kut hpông tô ri. ¹⁴ Myuq xêwâm haú gi, awang raxe í lhûm èq hi tô é nghut luí, awang haú pé má, Sauzô é lagyo raxe í yuq é myìng dap tô bum ri.

¹⁵ Haú ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké râ matú, kê é jung hîng jâm-yang ralhûm chung tô ri. ¹⁶ Myuq haú gi, myi chyûn dut mâ é nghut luí, hîng hpyang làm hpyang rawuí wuí za dut mâ é nghut ri. Maumang haú gi, myuq lé jâm-yang hau èq kê wú é hkûn, hîng hpyang, làm hpyang, myhâng hpyang banshoq 1400 déng* kê bo ri; ¹⁷ yhang gi, haú byù kê é jung eq wuí é maumang lagyo é kê jung lé chúng mù, myuq xêwâm lé ké wú é hkûn, rasho myí xê myi dúng bo ri. ¹⁸ Myuq xêwâm haú gi, huhpé lungseng èq saí é nghut ri; myuq gi, hîng gyíng èq saí é nghut mù, myoqjâm su yhang sân-yúng ri. ¹⁹ Myuq xêwâm haú é awang pé gi, hpau jung lungsêng ajung jûng èq mhôn tô é nghut ri. Sâng-hî lhum gi, huhpé lungseng èq, í lhum nghû râ gi, nila (mauhkûng nyuì su dut jung) lungseng èq, sôm lhum nghû râ gi, mahuya (noq é isâm myo jung) lungseng èq, myí lhum nghû râ gi, myaq (huí nyuì nyuì é jung) lungseng èq, ²⁰ ngo lhum nghû râ gi, nyháu myoqjí su dut jung lungseng èq, hkyuq lhum nghû râ gi, pate-mya (nè é jung) lungseng èq, nyhit lhum nghû râ gi, huí muí muí é su dut jung lungseng èq, shit lhum nghû râ gi, myek-yoi (wuimau nyuì su dut jung) lungseng èq, gaú lhum nghû râ gi, utohpaya (bó huí hui é jung) lungseng èq, raxê lhum nghû râ gi, mahuya nyuì lungsêng èq, raxe ralhûm nghû râ gi, wakintu (mhan-haq nyuì eq mauhkûng nyuì nyhò tô é su dut é jung) lungsêng èq, raxe í lhum nghû râ gi, (me me dut é jung) htihtu-nila lungseng èq mhôn tô ri. ²¹ Haú myuq hkum raxe í lhum gi, palhé raxe í cham nghut ri; hkum ralhûm gi, palhé rachâm èq saí é nghut ri. Haú myuq é hkyô mó gi, hîng jet èq saí é nghut luí, myoqjâm su duq san é hkyô nghut ri.

²² Ngò gi, myuq haú má noqkuq yhûm joq

* 21:16 1400 déng gi, Grik pé é stadia 12000 kê nghut ri.

é lé a myàng, hkâsu mù gâ le, haú wum-o a-tsam dik shoq bò Sû Yhumsîng Garai Gasang eq Sauzo gi, myuq hau é noqkuq yhûm nghut nyi é yanmai nghut ri. ²³ Haú Garai Gasâng é hpungwup shing kang gi, myuq haú má duqbó byî é htoq agó, Sauzo gi, myuq hau é myibung nghut é yanmai, myuq haú má gi, bui eq lhamó tsô byi a ra nghut ri. ²⁴ Haú byù myû pé gi, myuq haú duqbó é hkaú má hkyô wó so kó râ nghut lhê; haú myidàm htoq mâ é hkohkam pé gi, yhangmoq é hkikhkâm hkyô lé, myuq haú má yù lé kó râ nghut lhê. ²⁵ Myuq haú má gi, myín nghû é a joq é yanmai, myuq hkum myhî é le joq râ a nghut lo. ²⁶ Haú byù myû pé é hpungwup shing kang eq aróng lé, myuq haú má yu lé kó râ nghut lhê. ²⁷ Myuq haú má, a sansêng é hkyô haí le wó wàng râ a nghut é htoq agó, hoq hpu hkyô eq mhaú zô é hkyô kut é sù ó yuq le wó wàng râ a nghut; haú Sauzô é asak jihpán laiká buk má myìng bo é bang za wó wàng râ nghut lhê.

22

Asak Wui Mó Lâng

¹ Hau htâng, Garai Gasang eq Sauzô é hkohkâm-tanghkuq mai yui htoq lô luí, myuq hkaú mâ é hkyô mó gûng dông yui lô é, myoqjâm su sân-yúng é asak wui mó lâng lé, maumang lagyo haú, ngo lé tân shit ri. ² Wuilàng í hpoq é má, ashi raxe í myû zuí é asak shigâm yuq tô é nghut luí, lhohkyap hkangmó ashi zuí ri. Hau htoq agó, shigâm haú pé mâ é ahaq pé gi, byù myû pé lé yâ gè râ matú nghut ri. ³ Nhîng é haí le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaú haú má joq nyi râ nghut mù, Yhâng é dui-nhâng zoshâng wui gi, Yhang lé noqkuq dojaú kó râ nghut lhê. ⁴ Yhangmoq gi, Yhâng é myoqdong lé myàng kó râ nghut é htoq agó, yhangmoq é ngelang má, Yhâng é myìng kê tap é hui kó râ nghut lhê. ⁵ Myín nghû é le joq râ a nghut lo. Myibung duqbó byî é le, bui tsô byî é le, yhangmoq ra kó râ a nghut lo, hkâsu mù gâ le, haú Yhumsîng Garai Gasang gi, yhangmoq lé duqbó byî nyi râ nghut lhê. Hau htoq agó, yhangmoq gi, pyat dedu ahtum abyuq up nyi kó râ nghut lhê.

⁶Maumang haû gi, ngo lé, "Dang shí pé gi, lumgíng é dang eq tengmán é dang nghut lhê. Myiqhtoî pé é woi-nyí lé up é Yhumsîng Garai Gasang gi, adê myáng má dut lò râ hkyô pé lé, Yhâng é dui-nhâng zoshâng wuì lé tân shit râ matú, Yhâng é maumang lagyo lé nhang kat é nghut ri." ga taî ri.

Yesuq Jé Lé Lô Râ Hkyô

⁷"Wú keq, Ngò gi, a myáng má jé lé lô râ nghut lhê! Laiká shí má bo é myiqhtoi dang pé lé châng kut é sù gi, hkungsô wó nyi ri."* gâ é lé, ngò wó gyô ri.

⁸Haû hkyô pé lé wó myâng wó gyô é sù gi, ngò Yohan nghut lhê. Ngò gi, haû hkyô pé lé wó myâng wó gyô é hkûn, ngo lé, shí hkyô pé tân shit é maumang lagyo é hkyî wang má noqkuq râ matú paî gop é nghut lhê. ⁹Nghut kôlhâng, yhang gi, ngo lé, "Haû su hkâkut! Ngò gi, nàng eq le, náng é gumang myiqhtoî pé eq le, laiká shí mâ é mungdang pé lé châng kut é lhunglhâng bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga taî ri.

¹⁰Hau htâng, yhang gi, "Laiká shí má bo é myiqhtoi dang pé lé, hkâzaú to lo, hkâsu mù gâ le, haû ahkyíng gi, chyâng lò bê nghut ri. ¹¹A dingmán é sù gi, a dingmán é dông xoq kut nyí sháng gaq; a sansêng é sù gi, a sansêng é dông xoq dut nyí sháng gaq; dingmán é sù gi, dingmán é dông xoq kut nyí sháng gaq; chyoiyúng é sù gi, xoq chyoiyúng nyí sháng gaq." ga ngo lé taî kyô ri.

¹²"Wú keq, ngò gi, a myáng má jé lé lô râ nghut lhê! Ngò gi, yuq hkangmó lé, yhumsîng kut é eq rajung za byi râ shigyau chyunghuq chung tô lhê. ¹³Ngò gi, Alhpa eq Omega nghut lhê, Sâng-hi eq Jihtûm nghut

lhê, Sâng-hi Awang eq Lô Htáng Sù le nghut lhê.

¹⁴Asak shigâm má jé râ eq myuq hkaû shut hkúmdong mai wó wang jé râ ahkáng wó yû shoq, yhumsîng é buhíng lé chí sân é bang gi, hkungsô wó nyi ri. ¹⁵Shinggan má gi, hkui dông nyi é bang, myoqheq hpaqchyî kut é bang, ashop é dông gungsho zùm yap é hkyô shut é bang, byù sat é bang, hparà noq é bang eq mhaû é hkyô lé ô nàu luí châng kut é bang lhunglhâng nyi bum akô nghut ri.

¹⁶Ngò, Yesuq gi, haû noqkuq hpûng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haû duqbó é Bó-myhû le nghut lhê."† gâ é lé, ngò wó gyô ri.

¹⁷Haû Woi-nyí eq myisik gi, "Lé aq!" gâ akô. Haû wó gyô é sù gi, "Lé aq!" ga sháng gaq. Wuì shit sù ó yuq nghut kôle, lé sháng gaq; shuq nau é sù ó yuq nghut kôle, ahpa byi a ra é asak wuì lé, shuq sháng gaq.

¹⁸Laiká shí má bo é myiqhtoi dang pé lé wó gyô é bang yuq hkangmó lé, ngò sidiq byî é gi: dang haû pé má, rajung jung kat jat é sù ó yuq chyáng nghut kôle, Garai Gasang gi, laiká shí má kê tô é wúm pé lé jé nhâng râ nghut lhê. ¹⁹Myiqhtoi laiká shí má bo é dang pé lé, yu pyâm é sù ó yuq lé nghut kôle, Garai Gasang gi, laiká shí má kê tô é asak shigâm eq chyoiyúng myuq mâ é yhang eq sêng é gû lé, yu pyâm byi râ nghut lhê.

²⁰Shí hkyô pé lé saksé hkâm byî é Sù gi, "Nghut bê, Ngò gi, a myáng má jé lé lô râ nghut lhê." ga taî ri.

Amen. Yhumsîng Yesuq ê, lé lô aq ô!

²¹Haû Yhumsîng Yesuq é jeju gi, Garai Gasâng é byu pé chyáng joq nyí sháng gaq ô! Amen.

* 22:7 Dang shí hkun gi, Yesuq taî é nghut lhê. † 22:16 Dang shí hkun gi, Yesuq taî é nghut lhê.